



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



N Ý J A S A G A N

HEPTIR

PÁL MELSTED.

GEFIN ÚT

AF

HINU ÍSLENZKA BÓKMENTAFÉLAGI.

I. HEPTI.

(1517—1648).

REYKJAVÍK.

Í PRENTSMIDJU ÍSLANDS. EINAR ÞÓRDARSON.

1868.



227 . e . 5

YFIRLIT EFNISINS.

Inngangur	Bla. 1.
-----------------	------------

FYRSTI KAFLI.

FRÁ SIÐABÓTINNI TIL WESTFALSKA FRÍÐARINS.

(frá 1517—1648).

Siðabót Lúthers.....	4.
Siðabótin í Sveiz	24.
Viðureign Karls fimmta við Frakka og Tyrki.....	26.
Trúarbragðastríð á Þýzkalandi. Dauði Lúthers.....	37.
Páfatrúin gegn siðabótinni. Kristmúnkar. Kirkjuþingið í Trídent.....	46.
Filippus annar Spánar konungur (1556—1598).....	49.
Ítalía. Sixtus páfi hinn fimmti.....	58.
Viðureign Filippusar annars og Niðurlendinga.....	66.
England um daga Hinriks áttunda (1509—1547).....	80.
Játvarður sjötti (1547—1553). María (1553—1558)....	85.
Elísabet (1558—1603). María Stúart.....	87.
Stúartar hefjast til ríkis. England og Skotland undir ein- um konungi. Jakob fyrsti (1603—1625).....	101.
Frakkland um daga Hinriks annars og sona hans (1547 —1589).....	103.

Bourbonar hefjast til ríkis á Frakklandi með Hinriki fjórða	120.
Rússland	128.
Pólland.....	129.
Danmörk og Norvegur frá 1523—1648.....	131.
Svíþjóð frá 1523—1630.....	147.
Þýzkaland frá dögum Karls 5. til þrjátígi ára stríðsins (1556—1618)	177.
Þrjátígi ára stríðið (1618—1648).....	182.
Sviar taka þátt í þrjátígi ára stríðinu	193.
Westfalski friðurinn	224.

Inngangur.

A ofanverðum miðöldum og einkum á fimmtánda öld urðu ýms-ir þeir atburðir með mönnum, er leiddu til stórmikillar breyt-ingar víðsvegar um Norðurálfuna, og snertu bæði líkamlegt og andlegt ástand þjóðanna, bæði stjórn þeirra og trúarbrögð. Til þessa er að vísu bent í hinum síðari hluta miðaldarsögunnar, en þó þykir oss hlýða, að taka hér fram hina helztu af þeim atburðum, er breyttu hinu forna ástandi, og mynduðu annað nýtt og frábrugðið, og sem menn eru vanir að kalla sögu hinna síðustu alda, eða *nýju söguna*. Landnám Portúgalsmanna og Spánverja í Austindíum og Ameríku beindu verzluninni í alt aðra stefnu en áður hafði verið. Venezíu- og Genúaborgarmenn höfðu áður haft aðalverzlun heimsins í hendi sér, en nú breytti verzlunin um bústaði og fluttist fyrst til Spánar og Portúgals, en síðan mistu þeir hana og þá tóku Englendingar við og Nið-urlandamenn, og varð uppgangur þeirra þjóða sem mestur. Hin nýfundnu lönd leiddu fram ný og margvísleg auðæfi, er höfðu hin mestu áhrif á hugi manna og háttalag hér í Norðurálfunni, en þó ber þess að gæta, að það er fyrst á þessari öld, er vör nú lifum á, og eptir að Ameríkumenn náðu sjálfsförræði sínu og samgöngur allar urðu greiðari, að þeir hinir miklu ávextir algjörlega komu í ljós, er fundur Ameríku hafði í för með sér. Því að alla þá stund sem Portúgal, Spánn, England o. s. frv. höfðu yfirráð yfir nýlendunum í Ameríku, þá lá verzlun þeirra og atvinna í fjötrum, með því að konungar og stjórnendur hugðu eigi á annað, en að raka sem mestu fæ saman fyrir hand-an haf og safna í rikissjóðinn heima hjá sér. Þegar ófriðurinn stóð milli Frakka og Englendinga á fjórtánda öld höfðu menn fundið *púðrið* og þá fyrst var það við haft (í orustunni við Crecy 1346). Sú uppgötvan og sá vopnabúnaður breytti mjög allri hernaðaraðferð. Alt fram til þeirra tíma, og alla þá stund,

er lènsherravaldið stóð í blóma, hafði riddaraliðið einatt ráðið úrslitum málanna í orustum, en nú þegar eldvopn þessi voru til sögunnar komin, þá dugðu hvorki riddarar nè hlífar þeirralengur; í stað riddaranna komu þá fram nýjar hermannasveitir, *fót-göngulið*, og höfðu byssur að vopni. Þar sem áður hafði verið venja að herinn safnaðist saman án þess að liðsmenn væri æfðir við vopn, eður kynni hernaðaríþróttina til nokkurra muna, og færi svo aptur hver heim til sín að lokinni herferð, þá varð það nú tíðska, að liðsmenn urðu svo árum skipti að læra allan vopnaburð, áður en til hernaðar kæmi, og voru þannig að staðaldri undir vopnum. Á þann hátt myndaðist stöðugt eða fast herlið (*staaende Hære*); var það þá í fyrstu sumstaðar, að konungar tóku slíkt herlið á mála (*Miðaldasagan* bls. 226), og fengu þeir flest liðið, er mestan og beztan guldu málann. En seinna breyttist þetta þannig, að konungarnir komu sér sjálfir upp innlendu herliði, og fyrst á Frakklandi, en aðrir þjóðhöfðingjar tóku það síðan eptir, nema Englakonungur. Hafði þetta hin mestu áhrif á alla ríkisstjórn, þar sem þetta fastalið var alt af við hendina, hvenær sem á þurfti að halda, til þess að treysta konungsvaldið en temja þegnana og bæla þá niður ef á þeim bryddi. Nýja sagan sýnir og hversu *einveldið* ryður sér til rúms á sextándu og einkum á seytjándu öld því nær um alt meginland Norðurálfunnar.

Frá þeim tímum er það og, að ríki Norðurálfunnar komast, að því er snerti alla stjórnarathöfn þeirra, í miklu nánara samband hvert við annað, heldur en verið hafði að undanfögnu. Lènsdrotna öldin er liðin undir lok og ófriður sá, er einatt ríkti innanlands milli konunganna og lendra manna; ríkin eru orðin ein samgróin heild hvert um sig og hafa náð festu. En hins vegar eru sum ríki orðin afar-víðlend og völdug, sökum hinna miklu landnáma og als þess auðs, er þaðan streymdi, og svo sökum breytingar og framfara í hernaðaríþróttinni. Af þessu óttuðust menn, að hin völdugu ríkin myndu bæla hin smærri undir sig. Til þess að sporna við slíkum yfírgangi einstakra ríkja, komu menn sér niður á því, að öll ríki Norðurálfunnar skyldu upp frá því haldast í einskonar jafnvægi (*Ligevægtssystemet*), það er að segja, að eitt ríki skyldi eigi verða völdugra en annað, en vildi út af því bregða, þá skyldi öll hjálpast að til

þess að afstýra því, að eitt ríki veitti öðrum yfirgáng. Þessi jafnvægis-tilraun hafði að nokkru leyti átt sér stað milli smá-ríkjanna á Ítalíu, og milli ríkja þeirra, er þar börðust um yfir-ráðin undir endalok miðaldanna.

En um sömu mundir sem ríki Norðurálfunnar, hvað ver-aldlega stjórn þeirra snerti, komust í nánara samband en verið hafði að undanfögnu, þá slitnaði það band að fullu og öllu, er á miðöldunum hafði bundið öll ríki og lönd í hinum vestri hluta Norðurálfunnar hvað fastast saman, en það var hið *rómverska páfavalð*. Viðrétting visindanna opnaði augu margra ágætis-manna og sýndi þeim og sannfærði þá um villu og ofríki páfa-dómsins; þá tók prentlistin við og breiddi hina nýju kenningu út yfir lönd og lýði, og alt ruddi þetta *siðabótinni* braut meðal margra þjóða. En að vísu var það eigi nema nokkur hluti hinna kristnu þjóða í Norðurálfunni, er gjörðist hluttakandi í hinum nýja sið, og jafnvel í sumum löndum, þar sem siðabótin þó ruddi sér til rúms og vann sigur, þar varð þó að lyktum nokkur ágreiníngur með mönnum, og þar urðu reglur trúarinnar mismun-andi. Hinn nýi siður hafði ofsóknir og ófrið í för með sér, því að katólska trúin og klerkavaldið var orðið svo rótgróið meðal þjóð-anna, að enginn kostur var að losast undan því með kyrð og spekt. Svo leið ein öldin og nokkuð fram á aðra, að trúar-brögðin áttu löngum mestan og stundum allan þáttinn í aðal viðburðum þeim sem urðu í Norðurálfunni. Á þessu verður fyrst algjörð breyting þegar *þrjátígi ára stríðinu* er lokið, og *vestfalski friðurinn* er saminn (1648), og með honum eru menn vanir að láta lykta hið fyrsta tímabil, eða *hinn fyrsta kafla* nýju sögunnar, sem þannig tekur yfir tímabilið frá 1517 til 1648. Hið næsta tímabil, eður *annan kaflann*, telja menn frá 1648 til stjórnarbyltíngarinnar miklu á Frakklandi árið 1789; á því tíma-bili verður *einveldi* konúnganna hvað ríkast og ramast hær í álfunni.

Fyrsti kafli.

Frá siðabótinni til vestfalska friðarins

(frá 1517 til 1648).

Siðabót Lúthers.

Í miðaldasögunni hefir þess verið getið, að páfarnir höfðu aðsetu um 70 ára tímabil ekki í Rómaborg heldur í *Avignon* á Frakklandi (frá 1309 til 1378); sömuleiðis hefir þess verið getið, að þegar þessum útistöðum þeirra létti af, þá varð hið mikla hneyksli í rómversku kirkjunni, svo að ýmsir voru þá páfar uppi í einu, og leiddi þetta hvorttveggja til þess að skerða hinn mikla veg og virðingu, sem páfáveldið hafði haft á tólftu og þrettánda öld. Páfadóminum fór þannig hnignandi, og þó að kirkjupíngin, sem áttu sér stað á fimmtánda öld, reyndu að ráða bót á því, þá vildi það eigi heppnast. Þegar nú þar við bættist, að slíkur maður sem Alexander sjötti settist í postullegt sæti og gat haldizt þar við um nokkur ár, þá sýnir það nóg samlega í hve mikla niðurlægingu páfatignin var komin.

Þegar menn kyntust að nýju linum ágætu fornfræðum Rómverja og einkum Grikkja, þá lukust skjótt upp augu margra svo þeir sáu fram á villigötur rómversku kirkjunnar; þó liðu langir tímar áður sá fróðleikur setti nokkuð annað nýtt og betra í þess stað sem hann reif niður. Hið andlega líf, sem sá fróðleikur kveikti, sýndi sig fyrst og fremst í þeim miklu framförum sem *fagrar listir* (málaralist, byggínga-íprótt o. s. frv.) tóku á þeim tímum. Menn kyntust listasmiðum fornaldarinnar einkum þeim, sem átt höfðu sér stað á Grikklandi, og nú keptust menn við að stæla eptir þeim og ná fegurð þeirra. Af þeim afbragðs listamönnum, sem uppi voru um þær mundir, skal hér að eins nefna *Rafael frá Úrbínó* (1483—1520), einhvern hinn mesta málara sem nokkru sinni hefir uppi verið, og *Michel Angeló Buonarotti* (1474—1563), hinn fjölhæfasta meistara, og jafnfrægan sem málara, myndasmið og húsasmið; hann var yfirsmiður Péturskirkjunnar meðan til vanst. En eins og þessi

fornu fræði heiðinna þjóða fjarlægðu hugi manna frá hinni rómversku kirkju, eins var það hinsvegar svo fjærri því, að menn fyrst framan af nálguðust hina hreinu og ómengduðu kristnu trú, að jafnvel háskólinn í Flórenz (hinn platónski) var ekki fráhverfur því, að setja hina fornu heimsspeki í stað hins kristilega trúarlærdóms. Þannig varð *vantrúin* algeng meðal lærðra manna og alls stórmennis, en *hjátrúin* meðal hinna óæðri, meðal alþýðunnar. Sönn kristin trú var að mestu leyti horfin úr kirkjunni; sérplægni og sjálfsþótti ræð gjörðum manna; veraldlegt byggjувit og slægð var eingöngu höfð í hávegum. Hefir hinn nafnkendi rithöfundur *Machiavelli* frá Flórenz († 1527) lýst þeim aldarhætti furðu vel í riti sínu *um þjóðhöfðingjann* (*«il principe»*).

Þannig var nú ástatt þegar Leó páfi hinn 10. með því nafni settist að páfastóli 1513, Hann lét kirkjuleg málefni liggja milli hluta, en var aldavin allra íþrótta og bókmenta, og einkum var honum umhugað um að koma upp hinni dýrðlegu Péturskirkju í Rómaborg. Til þess að standast þann feyki-mikla kostnað, er slík stórsmíð hafði í för með sér, tók hann það til bragðs, að selja mönnum út um hin kristnu lönd *aflátsbréf*, eða syndakvittun, móti ærnum peningum. Erindsrekar hans gjörðust svo frekir og áleitnir í fjárheimtu þessari, að þeir seldu mönnum aflausn, eigi að eins fyrir drýgðar syndir, heldur og einnig fyrir allar ódrýgðar misgjörðir, sömuleiðis fengu sálir dauðra manna fyrir ákveðið peningagjald lausn af öllum kvölum í hreinsunareldinum. Einn af þessum útsendurum páfans hét *Jóhann Tezel*, hann var af Dóminíkusar reglu, og fór um Þýzkaland og seldi mönnum aflausn móti ærnu gjaldi. Aðfarir þess manns urðu tilefni til þess, að *Marteinn Lúther* reis á sætur og tók til sinna starfa.

Lúther var fæddur á dögum Friðriks keisara hins þriðja, í þorpi einu á Saxlandi, er Eisleben heitir, 10. dag nóvembermánaðar 1483. Hann var kominn af lágu stigum og fátæku foreldri og átti allerfyllt á uppvaxtar árum sínum, var þó snemma settur til bókmenta, og árið 1501 komst hann til háskólans í Erfurt (Herfurðu), og stundaði af miklu kappi þær vísindagreindir, sem þar voru þá um hönd hafðar; hann var löngum í bóka- hlöðu háskólans, og þar var það að hann einhverju sinni fann

skíran málróm og skæran». Raddmaður var hann sagður góður á yngri árum, en alla æfi hafði hann mestu mætur á söng og hljóðfæraslætti, og samdi sjálfur ýms lög. Hann var vanur að segja, að næst guðfræðinni væri söngfræðin bin fegursta list, og hresti menn tíðum meira en matur og drykkur.

Árið 1510 var Lúther sendur í einhverjum erindagjörðum til Rómaborgar. Hann kom þangað með allri þeirri lotningu fyrir páfadyrðinni, sem katólskum manni var í þá daga unt. En þegar þangað var komið leízt honum ekki á blikuna; þar heyrði hann margar sögur ljótar; honum blæddi í brjósti að heyra með hvílikri lættúð hinir ítölsku klerkar þuldu messur sínar. «Meðan eg sýng eina, sagði hann, þá sýngja þeir tuginn á enda, það virðist sem allt sè til fjárins unnið». En svo sagði hann síðan, að hvað sem í boði hefði verið þá vildi hann eigi þessa Rómaför ófarna.

Nokkrum tíma eptir að Lúther var kominn heim aptur úr Rómaför sinni, vildi Staupiz vinur hans, að hann yrði lærifaðir í guðfræði (*doktor theologiæ*). Lúther taldi á því öll tormeiki, og bar einkum við æsku og heilsuleysi, en svo varð þó að vera sem Staupiz vildi, og 19. október 1512 varð Lúther doktor í guðfræði. Friðrik kjörfursti, sem hafði á honum miklar mætur, greiddi allan þann kostnað, er sá frami hafði í för með sér, því Lúther var mjög fátækur, launin voru lítil, og maðurinn allt annað en fægjarn; hann ritaði og kendi fyrir alls ekkert. Nú fór hann fyrst að lesa bifliuna á frummálinu, og því betur sem hann skildi hana og komst niður í henni, því minna þótti honum varið í hina sèrvizkulegu og smásmuglegu fræði «skólastisku» spekinganna, sem þá var svo almennt höfð í hávegum. Þetta vakti eptirtekt manna og þótti nýlunda; hann átti einatt orðakast við lærða menn um þetta efni, en af því að engum var biflián svo kunnug sem honum, þá fóru þeir allir halloka fyrir honum þegar til kappmálanna kom.

Það var árið 1517 að Leó páfi hinn tíundi tók það ráðs, að leggja skatt á allt Þýzkaland til þess að safna fè því, er hann þá þóttist við þurfa. *Albrekt* erkibiskup af Mainz og Magdeborg tókst á hendur að stýra þeirri fjárheimtu, og sendi *Jóhann Tezel*, þann er fyr er nefndur, með aflátsbréf út um landið. Jóhann fór sveit úr sveit og hafði tvær kistur meðferðis, í ann-

ari voru aflátsbréf, en í hinu fæð sem fyrir þau var goldið; hann lét mikið yfir sér, hvar sem hann kom, sýndi mönnum bréf páfans, og sagðist hafa leyst fleiri sálir úr breinsunareldinum en Pétur postuli hefði nokkru sinni getað gjört; Jóhann hafði og á boðstólum bæði mjólkurbréf og smjörbréf, það er svo að skilja, að sá, sem keypti þau, mátti vítalaust fyrir prestunum drekka mjólk og eta smjör á föstunni. Leyfisbréf þessi seldi Jóhann við ýmsu verði eptir efnum manna og ástæðum, og eptir því hvernig á syndum manna stóð. Hinn margblindaði lýður streymdi að þessum skjalara og færði honum ógrynna fjár; að vísu hafði aflátssalan átt sér stað að undanfögnu, en aldrei eins freklega sem í þetta skipti; ýmsum þjóðhöfðingjum þótti reyndar úr hófi keyra, en af gömlum vana þorðu þeir eigi í móti að mæla. En nú var sá maður kominn til sögunnar, er drottinn hafði veitt dug og djörfúng til að brjótast í móti venjunni, og taka eins og þurfti í taumana á spiltum aldarhætti.

Þegar Lúther sá þenna ófögnuð, aflátssöluna, komna í nágreinni við sig, hóf hann þegar að prædika gegn henni, ritaði því næst öllum hinum næstu biskupum, og beiddi þá sporna við henni af alefli. En sem þeir dauðfeyrðust við beiðni hans, þá ritaði hann 95 greinir móti aflátssölnunni, og lét festa þær upp við kirkjudyr einar í Wittenberg 31. október 1517, kvöldinu fyrir allra heilagra messu, og skoraði á hvern sem vildi að mæla opinberlega móti þessum greinum. Nokkrar af þeim eru svo látandi: „Þeir fara með villulærdóm sem kenna mönnum, að jafnskjótt sem peningurinn kemur í kistuna, þá fari sálin út af breinsunareldinum. Víst er um það, að þegar peningurinn kemur í kistuna, þá kemur gróði og ágirnd og vex að því skapi, en hjálp kirkjunnar og fyrirbætur standa einungis í guðs hendi eptir hans velpóknun. Þeir sem hugsa, að aflátsbréfin veiti sér ugglause sálhjálp, þeir fara til helvítis og þeirra meistarar með þeim. Menn eiga að fræða kristna menn um það, að sá sem sér náunga sinn líða skort, og samt sem áður kaupir aflausn, útvegar sér eigi aflausn páfans, heldur aflar sér þar í móti óhylli guðs. Menn eiga að fræða kristna menn um það, að svo framarlega sem páfinn vissi hve herflega aflátsmángararnir fæfletta menn, þá mundi hann heldur kjósa að Péturskirkjan brinni til kaldra kola, en að hún yrði reist af skinni, holdi og

hann sagði svo: „eg skal þegja og jafnvel hætta að tala um lausnarbréfin, en þá verða einnig mótstöðumenn mínir að þagna“. En þess var enginn kostur úr því sem komið var, og jafnvel einstakir menn gátu nú eigi lengur við ráðið, þó þeir hefðu viljað. Einn af hinum helztu mótstöðumönnum Lúthers, er þá risu upp, hét *Jóhann Eck*, háskólakennari í Ingolstadt, hinn lærdasti maður og leiknasti í kappræðum. Hann átti harðar ræður og lángar við Lúther í borginni Leipzig á Saxlandi árið 1519; þóttust hvorir tveggja hafa þar sigurinn unnið. Á því sama ári andaðist *Maximilian* keisari hinn fyrsti, stýrði þá Friðrik kjörfursti ríkinu um Norður-Þýzkaland til þess er nýr keisari var kosinn, og var Lúther og siðabótinni allmikill hagur að þeirri millibilsstjórn, því að kjörfurstinn reyndist Lúther jafnan velviljaður, og í annan stað hliðraði páfinn í mörgu til við kjörfurstann, því að hann vissi, að kjörfurstinn mátti sér mjög mikið á Þýzkalandi, en páfa var mest í hug að geta komið Franz Frakkakonungi hinum fyrsta til keisaratignar, og til þess vildi hann hafa aðstoð kjörfurstans; en þetta fór annan veg en páfinn vildi; Franz komst eigi að, en *Karl*, sonarsonur Maximilians, var kosinn til keisara (1519) og nefndur *Karl fimmti*. Ári síðar fór Jóhann Eck til Rómaborgar til þess að fá því fram komið, að ramari skorður yrðu reistar eptir en áður við athæfi Lúthers. Fekk Jóhann Eck því til leiðar komið, að páfinn lét bann útganga gegn kenningum Lúthers, og honum var settur fárra vikna frestur, til umhugsunar og apturhvarfs; bætti hann eigi ráð sitt á þeim tíma skyldi hann settur í bann og allir sem honum fylgdu. Þegar Lúther komu þessi boð ritaði hann páfanum bréf og er það í alla staði mjög merkilegt. Hann segir þar meðal annars: „Eg hef jafnan talað um páfann með virðingu, eins og skylt er, svo að þeir, sem annað segja um mig, eru ósannsöglismenn. En hitt er satt, að eg hef einatt verið harðorður um páfastólinn, það er að skilja, um hina rómversku hirð, og hlýtur þú og hvert mannsbarn á jörðu að játa, að sú hirð er svívirðulegri og hneykslanlegri en Sódóma, Gomorra og Babylon nokkru sinni voru; og að því er eg fæ skilið er þeirri hirð og hennar ílsku ekki viðbjálpandi; þar er alt orðið vitlaust og botnlaust. Þess vegna hefur mér sárnað, að menn hafa í þínu nafni og skjóli hinnar rómversku kirkju svikið og á talar dregið

hinn fáfróða lýð. Við þeirri óhæfu hefi eg viljað sporna, og ætla mér að halda áfram meðan kristilegur andi lifir í mér. Því næst lýsir hann siðaspillingu hinnar rómversku hirðar og segir, að sér gremjist, að páfinn verði að lifa í jafnvondum solli, eins og lamb á meðal úlfa; það særi sig, að jafn-góður maður sem hann (þ. e. Leó 10.), er átt hefði skilið að lifa á annari og betri öld, skyldi einmitt nú vera páfi. »Hinn rómverski stóll verðskuldar ekki þig eða þína líka, hinn illi andi ætti að vera þar páfi, enda ríkir hann þar í Babýlon miklu fremur en þú. Guð gæfi, að þú gætir verið laus við þá *sæmd* — er hinir verstu óvinir þínir nefna því nafni — og gætir alið aldur þinn við eitt-hvert kennimannlegt embætti, eða lifað af föðurleifð þinni. Eg segi það satt, að slík sæmd er rétt kosin til handa Júdasí Iskariot og öðrum hans jafnþingjum, sem eru útlagar guðs. Þú ert mikill ógæfumaður Leó, að sitja á hinum hættulegasta stóli. Eg segi þér satt, því að eg ann þér als góðs.

Menn sjá þegar af því, sem hér að framan er ritað, hvílik að var sannfæring og trúartraust Lúthers, og styrktist þetta hvorttveggja hjá honum með degi hverjum, þegar hann sá, að hin þýzka þjóð veitti orðum hans hið mesta athygli. Tveir riddarar eru nefndir þar í landi, er hétu *Franz von Sickingen* og *Úlrik von Hütten*, frægir sökum hreysti og drengskapar; þeir skorðu fast á Lúther, að hann skyldi halda svo fram stefnunni, sem hann hefði byrjað, og ef honum þætti sér eigi óbætt í Wittenberg, skyldi hann leita á þeirra fund og eitt yfir þá alla ganga. Þá ritaði Lúther bækling: *til kristilegra eðalmanna á Þýzkalandi um endurbót klerkastættarinnar*; skorar hann í því riti á Þjóðverja, að varpa af sér hinu rómverska oki og svipta páfann þeim umráðum, er hann hafði haft yfir kirkjunnar mál-efnum á Þýzkalandi, og þeim ógna tekjum, er þaðan hafði runnið til páfastólsins að undanfögnu, að prestum verði leyft að kvongast, klaustrin hreinsuð og reglum þeirra breytt til hins betra, o. s. fl. Rit þetta hafði meiri áhrif á Þjóðverja, en frá verði sagt.

Doktor Eck var kominn aptur til Þýzkalands úr Rómabær sinni og hafði verið boðið að lýsa páfabanni yfir Lúther, en það vildi eigi ganga sem greiðlegast. Í Leipzig var páfabrèfinu kastað í sorp, og Eck komst sjálfur nauðuglega undan aðsúgi og meiðingum stúdenta; það var víða, að valdsmenn fyrirbuðu

en nokkur annar þjóðhöfðingi Norðurlöndunnar um þær mundir, því að, auk þess sem hann var þýskalands keisari, ræð hann einnig fyrir Niðurlöndum, og svo var hann konungur á Spáni, en undir það ríki lágu á þeim tímum Neapel, Sikiley og Sardinía, og öll hin víðlendu ríki fyrir vestan haf, er þá voru nýfundin, eins og fyr er ritað. Karl keisari var alinn upp í Niðurlöndum og á Spáni, og hafði því jafnan meiri mætur á þeim en á Þýskalandi, enda er sagt að hann hafi lítt kunnað þjóðverska túngu. Hann átti Ísabellu dóttur Emanúels mikla í Portúgal; þeirra son var Filippus annar Spánar konungur, er síðar mun verða getið. Karl keisari var stórhugaður maður, mjög ágjarn til fjár og landa, en vitur og gættinn. Menn skorðu þegar á hann, að hann skyldi gjörast oddviti siðabótarinnar, svipta páfann öllum yfirráðum kirkjunnar á Þýskalandi, stofna eina þjóðkirkju þar í landi, og sameina þar alt hið marga sem sundrað var, en keisaranum var aldrei sérlega ant um þýzkt þjóðerni og því síður um siðabótina, hann var þvert á móti óvinur hennar fullkominn. En hann vildi þó fara varlega og gjöra báðum nokkuð til hæfis, páfanum og Friðriki kjörfursta, hliðra til við báða, og hafa gott af báðum; þess vegna kvaddi hann til ríkisfundar í borg þeirri er Worms heitir. Þar skyldi ræða um ýms umvarðandi ríkismálefni, en einkum um hina miklu og merkilegu nýlundu, sem Lúther hafði komið fram með, og sem öllum þótti þá hvað mestu máli skipta. Til þessa þings var nú Lúther stefnt, að líkindum eptir ráðum Friðriks kjörfursta, sem hafði afstýrt því, að Lúther sætti utanstefnum og ákærum í Rómaborg, en vildi heldur hitt, að sök hans yrði prófuð af óvilhöllum mönnum á Þýskalandi. Legáti páfans mælti harðlega móti því, að bannfærður maður sem Lúther skyldi mæta fyrir verzlegum dómendum og annarstaðar en í Róm, en það tjáði eigi, og er það eitt meðal annars sem berlega sýnir hve stórum páfaveldinu var farið að hnigna á Þýskalandi þegar hær var komið. Keisarinn gaf út leiðarbréf handa Lúther, þar sem á var ritað, að honum skyldi við engu hætt á ferðinni til eða frá Worms. En alt um það löttu margir hann fararinnar og sögðu, að slíkt verndarbréf hefði Jóhann Húss forðum haft, og mættu menn þó muna afdrif hans. Lúther, sem ekki kunni að hræðast mennina, var veikur um þessar mundir og

naumast ferða fær. Þó kvaðst hann fara mundu eigi að síður, og láta bera sig til fundarins, ef hann mætti eigi annan veg komast. »Hér dugar ekki — sagði hann — að hugsa um sjálfan sig, um hættur eða mannraunir, heldur einungis um hitt, að sjá guðsorði borgið, sem vör eitt sinn höfum að oss tekið; ef vör látum það varnarlaust, þá munu mótstöðumenn vorir hælast um og segja, að vör þorum eigi að játa það, er vör kennum, og því síður láta lífið fyrir það ef á herðir; flýja vil eg ekki, aptur kalla orð mín því síður, svo sannlega sem drottinn styrkir mig; því hvorugt get eg gjört, nema því að eins, að guðhræðslu margra manna og sálubjálps sé hætta búin». Í Worms var alt stórmenni saman komið. Þar var keisarinn og Ferdinand bróðir hans, 6 kjörfurstar, 28 hertogar, greifar ótalmargir, legátar páfars, erkibiskupar, biskupar og sendiherrar því nær frá öllum konungum Norðurláfu; þar var og Kristján, er síðar varð Danakonungur, hinn 3. með því nafni. Fram fyrir alla þessa höfðingja átti Lúther að ganga, hann sem nokkrum árum á undan hafði lifað sem einsetu maður í klaustri, og lítil mök haft við veröldina og alla hennar stórmensku. Hann lagði af stað frá Wittenberg með miklum áhyggjum, og við góðu var eigi að búast. Þegar hann kvaddi Melankthon sagði hann: »ef eg kem eigi aptur, og óvinir vorir ráða mér bana, þá bið eg þig þess um fram alt bróðir! að þú haldir fast við trúna og hættir eigi að kenna; þó mín missi við, er skaðinn eigi stór, ef þú að eins lifir eptir; drottinn á lærðari liðsmann þar sem þú ert». Á leið hans til Worms flyktist að honum múgur og margmenni til að sjá hann og undrast; sumir hughreystu hann, sumir gjörðu hið gagnstæða, sjálfur var hann veikur á líkamanum; frá Frakkafurðu ritaði hann vin sínum Spalatín, og segir þar svo: »eg fer til Worms hvað sem í vegi stendur, því að Kristur lifir; eg hef einsett mér að mótstanda djöflinum og fyrirlíta hann; þó það væru eins margir djöflar í Worms eins og þar eru hellur á húspökum þá skal eg þó þangað halda».

Lúther kom til Worms 16. apríl 1521. Degi síðar átti hann að mæta í ríkisráðinu. Mannþröngin var fram úr öllu hófi; Lúther veitti jafnvel erfitt að ná inngöngu í þingsalinn. Þá var það, að *Georg Frúndsberg*, gamall hershöfðingi og hinn mesti kappi, lagði höndina á öxl Lúthers og mælti: »Múnkur! múnk-

ur! Þú gengur nú út í þá baráttu, að eg og margur hershöfðingi höfum eigi átt slíkri að mæta í hinum mannskæðustu orustum; en hafir þú rétt mál að verja, og þykist óhultur um þitt málefni, þá haltu áfram í guðs nafni og vert öruggur! Guð mun eigi yfirgefa þig». Lúther var fólur og máttfarinn, og þótti höfðingjunum, þar sem þeir strituðust við að sitja og sáu hann ganga í höllina, lítið að manninum kveða; og mælt er að Karl keisari hafi sagt við þann, er næstur honum sat; «eigi mun þessi fá talið mig af trúnni». Bækur þær, sem Lúther hafði ritað, voru lagðar fram, og hann aðspurður, hvort hann kendist við þær, og hvort hann vildi taka það aptur, sem hann þar hefði ritað. Hinni fyrri spurníngunni játaði hann, en hinni síðari svaraði hann svo, að hann beiddist umbugsunartíma, og var honum í því skyni veittur frestur til næsta dags. Inntakið úr svari hans var þá, að hann beiddi hvern sem vildi, að sanna sér af orðum ritningarinnar, að hann hefði á röngu að standa; yrði það gjört, skyldi hann fúslega kannast við villu sína, og verða manna fyrstur til að kasta bókum sínum á bálið. Mönnunum líkaði eigi svarið, og beiddu hann segja skýrt og í sem fæstum orðum: hvort hann vildi kalla aptur orð sín eður eigi. Þá svaraði Lúther á þessa leið: «Ef menn geta eigi sigrað mig eða sannfært með orðum ritningarinnar, eða með ljósum og órækum röksemdum (því að páfum og kirkjupóngum trúi eg eigi, þar sem öllum er alkunnugt, að þeim hefir svo opt skjátlazt og orðið sjálfum sér svo opt sundurþykkir), þá get eg eigi, og vil eigi taka það aptur, sem eg hef ritað; því að það er hvorki óhult eða ráðlegt að breyta móti samvizku sinni. Hér stend eg, eg get ekki annað. Guð hjálpi mér, amen!»

Mörgum sem á heyrðu þótti Lúther segjast vel og urðu vinir hans upp frá því, en enginn varð þó glaðari en Friðrik kjörfursti. Þegar hann kom af þingi sagði hann við Spalatín: «Af mikilli snild talaði *pater Martein*»; nóg var einurðin, ef til vill heldur mikil. Nú urðu nokkrir af höfðingjum þeim, er á þinginu höfðu verið, til þess að tala við Lúther einslega og reyna á ýmsa vegu að telja honum hughvarf, en það kom fyrir ekki, og að skilnaði mælti hann til þeirra þessum orðum Gamalíels: «ef þetta fyrirtæki er af mönnum, fellur það sjálfkræfa, en ef það er frá guði, þá megnið þér ekki að hefja

það¹. Þessu næst var Lúther boðið að fara burtu frá Worms, vildu þá sumir menn að hann væri höndum tekinn og brendur sem Jóhann Húss og eggjuðu keisarann mjög til þess verks; en hann aftók það með öllu. En hins vegar lét keisarinn það boð útganga, að Lúther skyldi útlægur vera um allt ríkið. Sá Friðrik kjörfursti þá eigi annað fært, en koma Lúther undan og geyma hann á einhverjum þeim stað, er hann mætti óhultur vera um líf sitt. Því var það einn dag, er Lúther fór leiðar sinnar, að 5 menn komu að honum riðandi, allir í dularklæðum og með grímur fyrir andliti, og tóku hann höndum, og hleyptu síðan í skóginn; vissi Lúther eigi hvað þeir fóru. Loksins komu þeir að höll einni, er Wartborg hét; var Lúther vísað þar til herbergja; voru þar als nægtir fyrir, enda bækur nógar og ritföng, og aðbúnaður hinn bezti, en sterkur vörður á því hafður, að hann kæmist eigi þaðan. Þar var hann nú um hríð og eigi aðgjörðalaus, því að þá tókst hann það þrekvirki á hendur, að *snúa heilagri ritningu úr frummálunum á þjóðverska túngu*. Þessi bifliupýðing hans varð samt eigi fullgjör, og kom eigi út á prenti fyrir en nokkrum árum síðar (1534), en ómetanlegt gagn gjörði þetta starf hans, eigi einungis hinum þýzku þjóðum, heldur öðrum út í frá, því að þá fyrst gátu alþýðumenn kynzt ritningunni, þar sem hún áður hafði verið þeim hulin helgidómur, og hvað sjálfa Þjóðverja snertir, þá varð þessi bifliupýðing, slíkt afbragð sem hún var, undirstaðan að bókmáli þeirra eins og það er síðan orðið.

Lúther sat 10 mánuði í Wartborg, en þá hélzt hann þar eigi lengur við, því að honum bárust þær fregnir, að óeirðir höfðu kviknað í ýmsum stöðum, fyrir þá sök að nokkrir af siðabótarmönnum höfðu farið með frekju og óspektum, brotið ölturu og helgra manna líkneskjur fyrir pápiskum mönnum, lagt hendur á múnka og leikið þá harðlega, svo að til vandræða horfði. Lúther hélt því tafarlaust til Wittenbergs, hvað sem hver sagði, prédikaði þar fyrir lýðnum 8 daga samfleytt, og fékk með málsnild sinni og skörúngskap sesað allar óeirðir. Karl keisari var þá farinn úr landi og kominn til Niðurlanda og þaðan til Spáns og dvaldist þar á áttunda ár. Þessi útivist keisarans varð siðabótinni til mikilla framfara og viðgangs, því að

1) Postul. Gjörn. 5. kap., 38.—39. v.

nú breiddist hún út með kyrð og spekt um alt Saxland og mörg nálæg lönd; ýmsu var nú breytt í klerkasiðum og helgihöldum: prædikun var flutt á móðurmáli manna, í stað þess sem áður var á latínu; kvöldmáltíðar-sakramentinu útteilt bæði í brauði og víni; prestarnir kvæntust eins og aðrir menn. Lúther kvæntist sjálfur; hét kona sú Katrín er hann átti, og hafði áður verið nunna; prestar urðu alment betur að sèr en áður hafði verið, þó margir teldust þeir fyrst framan af, er tæpir voru í fræðunum. Til þess að ráða bót á því, ferðuðust þeir Lúther og Melankthon um Saxland til þess að líta eptir kenningum prestanna og uppfræðslu alþýðunnar; setti Lúther eptir það saman «kathekismus» (fræðabók), annan stærri handa prestunum, annan minni handa söfnuðunum; en Melankthon ritaði vísindalega bók um kristileg trúarfræði, er hann kallaði: *Loci communes rerum theologicarum*. Þótti svo mikið að þeirri bók kveða, að á rúmum 70 árum var hún prentuð 67 sinnum á frummálinu, en marg opt snúið á önnur tungumál. Páfinn misti þar, sem hinn nýji siður komst á, alla yfirstjórn kirkjunnar er hann hafði áður haft, en í þess stað komst sú yfirstjórn í hendur þeim þjóðhöfðingja, sem þar ræð fyrir landi (landshöfðingja) hverju nafni sem hann nefndist t. a. m. konungur, kjörfursti o. s. frv).

Það leið eigi á löngu áður hinn nýji siður (hin lútherska trú) breiddist út frá Saxlandi til annara ríkja norðan á Þýzka-landi t. a. .m. í Hessen, Brandenburg, Hannover, Austurfríslandi, Holsetalandi og Slèsvík og víðar. Fyrir Prússlandi ræðu um þær mundir hinir *þýzku riddarar*, og *Albrekt* markgreif, foringi þeirra og einn af ætt Brandenborgar kjörfurstanna, tók við Lúthers trú árið 1525, sagði skilið við páfann og hið þýzka ríki, og tók nú Austur-Prússland að lèni af móðurbróður sínum Sigmundi 1. Pólverja konungi, og gjörðist *hertogi* yfir; en Vestur-Prússland þar í móti var lengi fram eptir öldum skattland Pólverjakonungs. (Hertogadæmið Prússland — Austurprússland — var ríki fyrir sig til 1618, þá sameinaðist það kjörfurstadæminu Brandenburg). Meðan Lúther lifði komst siðabótin til Norðurlanda. Gustaf Vasa, Svía konungur (1523—1560) kom henni á í Svíþjóð (1544); í Danmörku var hún boðuð á dögum Friðriks

konungs hins fyrsta († 1533), og í tíð Kristjáns þriðja var siðabótin leidd í lög á ríkisdegi í Kaupmannahöfn 1536.

En þó að hinn nýi siður gengi með kyrð og spekt yfir sum lönd og suma staði, þá var eigi við því að búast, að slíkt gæti alstaðar átt sér stað. Það kom hér fram eins og endrarnær í sögu þjóðanna, að alþýða manna skoðar einatt hlutina með mikilli fljótfærni en dæmir síðan málin með lítilli stillingu, og rasar þess vegna fyrir ráð fram. Alþýðan misskildi víða hina nýju kenningu Lúthers. Hann barðist fyrir *trúarfrelsi manna*, og kendi mönnum að hlýða eigi páfanum í blindni í málefnum *trúarinnar*. Bændamúgurinn lagði miklu meiri þýðingu í orð Lúthers og samþjóna hans heldur en í þeim lá, og hugði að hér væri um að gjöra *alskonar* frelsi, bæði andlegt og veraldlegt; alþýðan hugði, að samkvæmt hinni nýju kenningu væri hún laus allra mála við yfirdrotna sína; bæði við klerka og við verzlega yfirboðara. Í því var villa hennar fólgin. Það er að vísu satt, að klerkar og aðalsmenn höfðu að undanfögnu kúgað bændalýðinn helzt of lengi og freklega, og einatt höfðu bændur hlaupið upp til ófriðar, en þau rángindi höfðingjanna gáfu þó eigi bændum heimild til að beita rángindum í móti: gripa til vopna, gjöra uppreisn, og vinna mörg grimdarverk. Mest urðu brögð að þessum *bænda ófriði* á Suður-Þýzkalandi 1524. Á litlum tíma höfðu bændur reist allmikinn her; þeir kröfðust, að söfnuðirnir mættu sjálfir kjósa sér presta, og reka þá af embættum, sem þeim líkaði eigi við; að sköttum og skyldum yrði á sér lætt o. s. frv. Þegar þetta fekst eigi, tóku bændur að herja og brenna, eyddu þeir þá mörg klaustur, klerkasetur og aðalsmanna borgir, og fóru yfir byggðina með hinni mestu grimd. En er höfðingjar sáu sitt óvænna höfðu þeir einnig liðsafnað og sendu her manns í móti bændalýðnum; fór þá eins og við mátti búast, þar sem vel æfður her og óvalinn bændamúgur skiptist vopnum við, að bændur höfðu ósigur, og uppreistin varð bældniður að sinni. Það er mælt, að í þessum bænda ófriði á Þýzkalandi hafi farizt yfir 50 þúsundir manna. Meðan á óeirðum þessum stóð sóktu bændur Lúther að ráðum; mislíkaði honum mjög aðfarir þeirra og veitti hvorumtveggja harðar átölur, bæði höfðingum og bændum, og er hann sá, að bændur létu eigi sefazt, varð hann þeim móthverfur og tók málstað hinna, því

að ekkert var honum viðbjóðslegra en slík óstjórn og hryðjuverk. «Þeir sem lesa og skilja rétt kenningu mína — sagði Lúther — þeir gjöra ekki uppreisn, þeir hafa eigi lært það af mér».

Mótstöðumenn siðabótarinnar létu eigi sitt eptir liggja að telja mönnum trú um, að allan þann ófrið og öll þau ílskuverk, sem unnin voru, hefði hin nýja kenning beinlínis í för með sér. Þessi óhróður var að vísu ástæðulaus og ósannur, en hitt er víst, að bænda ófriðurinn átti allmikinn þátt í því, að flokka-drættir urðu meiri og verri eptir en áður, og ástand hins þýzka ríkis viðsjárverðara en verið hafði.

Keisarin var um þessar mundir annarstaðar, eins og fyr er ritað, og hafði öðrum önnur að gegna, en *Ferdinand* erkihertogi, bróðir hans, stýrði á meðan ríkisstörfum heima á Þýzka-landi. Nú skorti eigi fortölur nè eggjunarorð páfamanna, að í eitthvað yrði að brjótast til þess að reisa rönd við hinum nýja sið og útbreiðslu hans. Og fyrir slíkar fortölur bundust þeir í félag, í Regensburg 1524, Ferdinand, og þeir hertogarnir af Bajern, Maximilian og Loðvík, og flestir biskupar sunnan á Þýzka-landi, til þess að vernda katolska trú og kirkju. Í annan stað áttu þeir fund með sér á Norður-Þýzka-landi ári síðar, *Jóakim* kjörfursti af Brandenburg og *Georg* hertogi af Saxlandi, hvortveggja mótstöðumaður Lúthers, og bjuggust siðabótamenn við engu góðu af þeirra hálfu. Þar til kom og, að um þetta leyti boðaði keisarin nýjan ríkisfund, og var þar orðum að því vikið, að öll þörf væri á, að hafa gát á hættulegum trúarlærdómum, og bæla þá niður fyr en síðar. Sökum als þessa skoraði *Filippus* landgreifi af Hessen, hinn ákafasti maður og ötulasti, og siðabótunni einkar meðmæltur, á alla þjóðhöfðingja, sem tekið höfðu Lúthers trú, að þeir skyldu gæta sín og ganga allir í eitt félag til þess að vernda trú sína gegn katólskum mönnum. Lúther var því ráði fremur mótfallinn, og kvað þess eigi mundu viðþurfa. Alt um það félst *Jóhann* kjörfursti af Saxlandi á til-lögur Filippusar landgreifa. Sá Jóhann var bróðir Friðriks vitra, er þá var nýdáiinn (5. maí 1525). Þeir Filippus og Jóhann hitt-ust í Torgau (1526) og sömdu þar með sér, að þeir skyldu báðir fylgjast að málum og vernda trú sína gegn katólskum mönnum, ef á þyrfti að halda. Litlu síðar gengu nokkrir aðrir höfðingjar, er

hinum nýja sið fylgðu, í lið með þeim Filippusi, og þegar nú ríkisdagurinn litlu síðar hlöð sama ár (1526) var settur í Speier, og keisariinn vildi fá því boði sínu framfylgt, er hann fyrrum hafði gefið út í Worms, þá mæltu allir þessir lúthersku höfðingjar í gegn því, svo að keisariinn kom því eigi fram; urðu samtök þessi siðabótinni til hins mesta gagns. Landgreifinn af Hessen lét eigi af að skora á trúarbræður sína, að þeir skyldu vera varir um sig og fylgjast vel að málum; þessa var heldur eigi vanþörf, því að bæði tók nú að brydda á því, að lútherskir menn væru ofsóktir af pápiskum — þannig voru nokkrir lútherskir prestar suður í Baiern og víðar teknir og brendir á báli — og svo höfðu menn sannar sögur af því, að keisariinn var mjög óvinveittur hinni lúthersku trú. Þess vegna voru miklar viðsjár með mönnum þá er til þings var stefnt í Speier árið 1529. Katólskir menn fengu því til leiðar komið þar á þinginu með atkvæðafjölda, að banna skyldi alla frekari útbreiðslu hinnar lúthersku trúar í þeim löndum, er hún var þá komin til, en að öðru leyti halda fast við skipun þá, er keisariinn hafði gjört í Worms; var það hið sama sem að segja útbreiðslu trúarinnar ólögmæta. Þá var það, að þeir, sem hinum nýja sið fylgðu, fundu sig knúða til að bera fram á þinginu í heyranda hljóði *mótmæli sín* (*protestation*) gegn þessari ályktun þingsins; voru lútherskir menn síðan nefndir *Prótestantar*, þ. e. mótmælendur. Þjuggust þeir nú við, að keisariinn mundi reiðast þessum tíðindum, og sendu þegar menn á hans fund, þar sem hann var staddur suður á Ítalíu. Keisariinn brást reiður við og virti sendimenn naumast viðtals og hótaði þeim öllu illu, ef þeir tækju eigi aptur sín mótmæli; við þau málalok snèru þeir heim aptur.

Meðan Karl keisari dvaldist á Ítalíu stefndi hann til þings í *Augsborg*, er byrja skyldi 8. aprílmán. 1530; átti á því þingi meðal annars að jafna trúarágreinínginn og trúarhreifínguna á Þýzkalandi, og prótestantar gjöra opinberlega grein fyrir kenníngu sinni. Þíngið var fjölment og voru þar komnir flest allir þjóðhöfðingjar af Þýzkalandi og margt annað stórmenni. Jóhann kjörfursti af Saxlandi var á þingi og Melankthon með honum, en Lúther kom eigi, því að hann var útlægur. Á því þingi báru prótestantar fram *trúarjátningu sína*; er hún síðan kend við þingstaðinn og kölluð *Augsborgarjátning* (*confessio Augustana*)

og er ein af aðalundirstöðubókum lúthersku kirkjunnar. Melankthon hafði samið hana og Lúther samþykkt, og má þar um segja, að verkið lofar meistarann. Rit þetta er í tveim þörtum, og eru í hinum fyrra partinum helztu greinir trúarinnar, 21 að tölum, en í hinum síðari eru tilgreindir í 7 greinum ósiðir þeir, sem prótestantar höfðu leiðrétt. Þegar búið var að lesa játningu þessa fyrir þingheimi, afhenti keisarinn hana nokkrum katólskum guðfræðingum, er svara skyldu og hrekja hana; en þeim mistókst svo mjög svarið, að keisarinn lét semja annað svar og kvaðst nú vænta þess, að menn gætu allir orðið á eitt sáttir, en færist það fyrir hlyti hann að leyta annara bragða. En prótestantar voru staðfastir og létu eigi hræðast; sleit svo þinginn að eigi gekk saman, og að þinglausnum var því yfirlýst, að allar þær breytingar, er orðnar væru á kirkjulegum málefnum hin síðustu árin, væru ógildar, og þeir, sem eigi vildu hlýðnast, skyldu fara útlægir eða sæta annari refsingu. Þannig sleit þinginu í Augsborg, er staðið hafði um 5 mánuði, og sem allir hugðu að mundi koma miklu góðu til leiðar; en hér var öðru nær, og mátti nú við öllu búast af beggja hálfu.

Það var nú þessu næst, að Jóhann kjörfursti af Saxlandi og Filippus landgreifi af Hessen og nokkrir aðrir þjóðhöfðingjar meðal prótestanta, gjörðu samband sín í millum í *Smalkalden* (*Smalkaldar sambandið* 1531), til þess að veita hver öðrum hjálp, og verjast allir í samfélagi ef á þá væri leitað. Keisarinn, sem um þær mundir varð að snúast við Tyrkjum, og hafði í mörg horn að líta, slakaði nú til, og gjörði svo feldan frið í *Nürnberg* árið eptir (1532) við bandamennina frá Smalkalden, að fullkomnar trygðir og friður skyldi standa með hvorum tveggja, þángað til kirkjufundur yrði settur og málefnið leitt til lykta. Litlu síðar dó Jóhann kjörfursti, og *Jóhann Friðrik*, sonur hans, fékk kjörfurstatignina eptir hann.

Siðabótin í Sveiz.

Um sama leyti sem Lúther hóf siðabótina á Þýzkalandi, var sá maður uppi í Sveiz er *Úlrik Zvinglí* hét. Hann var ári yngri en Lúther, vellærður maður, skarpskign, drenglyndur og hugprúður. Hann varð prestur í Zürich 1518, en árið eptir (1519), er múnkur einn að nafni *Bernhard Samson* fór um

Sveiz og seldi mönnum syndakvittunarbréf, eins og Jóhann Tezel á Saxlandi hafði gjört litlu áður, reis Zvínglí upp og mótmælti slíkri óhæfu í ræðum sínum og ritum. Hann kendi, að menn ættu að fylgja heilagri ritningu, því að hún ein gæti úr því skorið, hvað rétt væri eða rángt í trúarefnum, og því að eins skyldu menn fylgja úrskurðum páfanna, lærdómssetningum kirkjufeðranna og venjunni, að samkvæmt væri ritningunni. En Zvínglí lét sér eigi nægja, að mæla í gegn villu manna í trúarefnum, heldur leytaðist hann einnig við, að leiðrétta alskonar ósiðu og siðaspillingu hjá Sveizlendíngum. Hann var ákafur þjóðveldismaður (Republikaner), og einmitt það hafði mikil áhrif á tilhögun hans í fyrirkomulagi kirkjustjórnarinnar. Svo að þar sem Lúther lagði hina æztu stjórn kirkjunnar á vald landstjórans eða landsstjórnarinnar, þá fékk Zvínglí *söfnuðunum sjálfum* þá stjórn í hendur. En það, sem einkum skildi á milli í kenníngu Lúthers og Zvínglís, var skilningur þeirra á innsetningar orðum kveldmáltíðar-sakramentisins. Zvínglí sagði að kveldmáltíðin væri endurminningarmáltíð, er kristnir menn höldu til þess að minna sig á dauða Krists; en Lúther fylgdi orðum ritningarinnar, og þess vegna segir í Augsborgarjárníngunni 10. gr. „að líkami og blóð Krists sé í sannleika nálæg og úthlutuð þeim, sem ganga til borðs drottins“. Um þetta atriði áttu þeir orðastrið mikið og gátu þó eigi orðið á eitt sáttir. Í mörgum fylkjum Sveizlands féllust menn á siðabót Zvínglís, en í sumum fylkjunum (einkum í 5) stóðu menn fast í móti og höldu við katólskan sið; leiddi sú sundurskiptíng trúarinnar til þess, að friðurinn einnig skiptist í landinu og varð af borgarastrið; stóð aðalorustan við *Kappel* skamt frá Zúrick 1531; unnu katólskir menn þar sigur, en siðabótamenn urðu undir; var Zvínglí í liði þeirra sem prestur og féll þar; náðu katólskir menn líki hans og brendu síðan.

En siðabótin leið eigi undir lok í Sveiz þó að þetta óhapp vildi til, því að þá tók sá maður við, þar sem Zvingli varð að hætta, er hét *Jóhann Calvin*. Hann var fæddur 1509 í Frakklandi, en varð að flýja þaðan úr landi, af því að hann hafnaði katólskum sið og gekk í lið með siðabótamönnum. Hann kom til borgar þeirrar í Sveiz, er Genf heitir, fáum árum síðar en Zvínglí féll, og settist þar að og gjörðist oddviti siðabótamanna þar í landi. Hann var afbragðsmaður að lærdómi og vann verk

sinnar köllunar af ópreytanda kappi og atorku, en þótti ærið harður og ósveigjanlegur. Í kenníngu sinni þokaðist hann í sumu nær Lúther, en Zvíngli hafði gjört t. a. m. í lærdóminum um kvöldmáltíðina, en hann kendi og, að guð hefði frá öndverðu ákvarðað suma menn til sælu en suma til glötunar (*Prædestinatio*). Að öðru leyti fylgdi hann kenníngu Zvínglis og gjörði þá fyrirskipun, að allir kirkjusiðir og helgihöld yrðu sem einföldust og viðhafnarminst, en Lúther þar á móti hélt því öllu úr katólskum kirkjusið, sem honum virtist eigi vera gagnstætt boðum heilagrar ritníngar. Hið veraldlega vald hefir heldur eigi, eptir boðum Calvíns, nein afskipti af stjórn kirkjulegra málefna, en klerkar og leikmenn skyldu hafa þá stjórn á hendi. Calvin dó í Genf 1564. Þeir sem kenníngum hans fylgja, eða þann sið hafa tekið, eru kallaðir *reformeraðir* (þ. e. endurbættir) til aðgreiníngar frá hinum, er Lúthers sið fylgja, og sem út gekk frá Þýzkalandi; þeir eru kallaðir *evangelísk-lútherskir*. Reformeraða trúin barst út frá Sveiz til *Niðurlanda*, *Skotlands*, og vestari hluta Þýzkalands; hún hafði einnig mikil áhrif á siðabótina á *Englandi*, og um mörg ár voru Calvinstrúar menn útdreifðir víða um Frakkland (þar voru þeir nefndir *Huguenottar*); en um síðir tókst páfa trúar mönnum eptir binar grimmustu ofsóknir að eyða siðabótinni þar í landi.

Viðureign Karls fimmta við Frakka og Tyrki.

Nú hefir um hrið verið sagt frá því, hvernig siðabótin hófst og náði fótfestu í nokkrum löndum þrátt fyrir mótspyrnur þeirra manna, er eigi vildu á hana fallast. Hér í þessari grein verða trúarbrögðin um sinn látin sitja við sitt, en í þess stað skýrt frá öðrum viðburðum, er um sama mund gjörðust og þykja næsta frásagna verðir.

Franz fyrsti var kominn til ríkis á Frakklandi, þegar siðabótin hófst á Þýzkalandi, og þar lengi síðan konungur (1515—1547). Um sama leyti var *Karl fimmti* keisari á Þýzkalandi. Báðir þessir menn voru ágjarnir til fjár og landa; þeir voru nábúar og litu öfundarauga hver til annars, enda bar margt til þess. Karl ræð fyrir mörgum löndum og þjóðum, er voru næsta ólíkar; hann vildi sameina allar þessar þjóðir sem bezt í eina ríkisheild, bæta nýjum löndum við ríki sitt, og hefja hina rómverksu keisaratígn

til hinnar fornu vegsemdar, og í fám orðum að segja: stofnsetja nýtt *alsherjar-einvaldsdæmi*.

Franz konungur hafði yfirráð yfir hertogadæminu Búrgund, er Loðvík konungur ellefti hafði svælt undir sig þegar Karl djarfi var dáinn; þessu hertogadæmi vildi Karl fimm tí ná undir sig, því hann var kominn af Karli djarfa (Karl djarfi var langafi hans). Franz konungur hafði 1515, eins og fyr er ritað¹, unnið hertogadæmið Milánó, og rekið þar frá ríkjum hertogann, Maximilian Sforza. Karl vildi ná því ríki úr höndum Frakkakonungs. Franz þóttist eiga heimtingu á Neapelsríki, eins og forverar hans, en Karl keisari hafði fengið það ríki að erfðum eptir afa sinn Ferdinand katólska. Þegar Maximilian keisari dó (1519) vildi Franz verða Þýskalands keisari, en Karl varð þar hlutskarpari; hér var því margt ágreiningsefnið. Báðir þeir, Karl og Franz, reyndu á allar lundir til að fá í lið með sér *Hinrik 8.* Englands konung (1509—1547), en þar varð Karl einnig drjúgari, einkum fyrir þá sök, að hann hét *Wolsey* kardinála, ráðgjafa Hinriks, að styrkja hann til páfatignar að Leó tíunda dauðum. En um það sveikst þó Karl síðan þegar til kom. Árið 1521 laust upp ófriðnum milli þeirra Karls keisara og Franz konungs; fyrst í Niðurlöndunum og á Spáni, en þau viðskipti voru að eins smámunir hjá hinu, sem þá þegar gjörðist á Ítalíu. Karl hafði einn kost, og hann mikinn, fram yfir mótstöðumann sinn, og það var, að hann kunni manna bezt að sjá til hvers starfa hver var fallinn, og þess vegna hafði hann löngum í sinni þjónustu afbragðs sendiherra, ráðgjafa og hershöfðingja. Það kom hér einnig fram. Yfir herlið það, sem átti að ráðast á Milánó, setti keisarinn landstjóra sinn frá Neapel, er *Cólonna* hét, gamlan mann en góðan hershöfðingja. Landstjóri Franz konungs í Milánó hét *Lautrek*; hann var þá staddur í París, er ófriðarsagan barst þangað; hann kvaðst eigi geta varið Milánó nema því að eins, að Franz læti sig fá fè svo sem með þyrfti til þess að gjalda liðinu mála. Konungur hét honum fènu, en það kom aldrei, því að *Lóvísa* af Savoyen, móðir Franz konungs, náði því, áður það komst í hendur Lautreks, með því hún kvaðst hafa átt það í skuld hjá syni sínum. Niðurstaðan varð sú, að Lautrek varð að rýma landið, en keisarans menn unnu það undan konungi; hélt Lautrek við

1) Sjá Miðaldasögu bls. 227.

það heim á Frakkland og fékk fyrst nokkrar ávítur af konungi, en þegar það kom í ljós, að móðir hans hafði fengu náð, þá lét konungur þá sök falla niður.

Árið eftir fékk keisarinn fleiri þjóðhöfðingja í lið með sér. Alt um það dróg Franz konungur af nýju lið saman og bjóst að vinna aptur undir sig Milanó. En þá brást honum sá maður sem mest var um vert.

Sá maður var *Karl* hertogi af Bourbon, »Connetable»¹ af Frakklandi, dugandi hershöfðingi og hin mesta hetja í öllum mannraunum. Franz hafði á fyrsta ríkisstjórnar ári sínu gjört hann að landstjóra í Milanó, en síðan vikið honum úr þeim völdum, og þar á ofan gjört honum annað til skaprauna; vildi Karl hertogi síðan hefna þess óskunda á konungi, og gekk í lið með Karli keisara. Franz konungur setti þann mann yfir lið sitt á Ítalíu, er *Bonnivet* hét; hann var aðmíráll, hraustur maður og fullhugi, en fjærri því að vera slíkur hershöfðingi sem þeir, er í móti honum voru, bæði Karl af Bourbon og einkum *Peskara* — *Cólonna* var þá dáinn —. *Bonnivet* varð því að hopa á hæl fyrir þeim, og í orustunni við *Rómagnanó* (1524) beið hann ósigur og varð sár; tók hinn ágæti riddari *Bayarð*² þá við yfirstjórn hersins, en var skotinn til bana, og hörmuðu allir hans lát. Frakkar urðu að flýja burt af Ítalíu, en keisarinn setti *Franz Sforza*, er seinna kvæntist dóttur Kristjáns annars Danakonungs, til hertoga-tignar í Milanó.

Þegar nú hér var komið gaf Karl af Bourbon keisaranum það ráð, að halda sem fyrst öllu liðinu inn á Frakkland og taka Lyonsborg; en keisarinn fylgði eigi því ráði, heldur sendi hann *Peskara* með allmiklu liði og bauð bonum að taka borgina *Marseille*. En þó *Peskara* væri afbragðsmaður gat hann eigi framkvæmt erindið, því að Frakkar höfðu lagt alt landið umhverfis borgina í eyði, svo að *Peskara* varð, þegar vistaskortur þrengdi að honum, að halda liði sínu til Ítalíu. Franz konungur elti hann með miklu liði, vann Milanó aptur, hélt síðan liði sínu til *Pavía* og settist um þá borg. Þar hafði keisarinn setulið og foringja þann fyrir, er *Antonio de Leyva* hét, hinn vaskasta

1) Sjá Miðaldasögu neðanmálsgrein bls. 258.

2) *Bayarð* var kallaður: »le chevalier sans peur et sans reproche» þ. e. riddarinn án ótta og án ámælis.

mann. Varði hann borgina af mikilli hreysti og fengu Frakkar eigi tekið hana, og gekk svo lengi. Nú er að segja frá Karli af Bourbon og Peskara, að þeir voru með lið sitt norður í fjöllum og áttu þar illa búð, því að bæði var þá vetur og hitt þaðan af verra, að liðið vantaði mála sinn. Þá tók Karl af Bourbon það til bragðs, að hann veðsetti gimsteina þá og dýrgripi, er hann hafði (jarðeignir hans hafði Franz konungur allar tekið) og *Lannoy*, landstjóri í Neapel, er staddur var við herinn á Norðurítalíu, veðsetti allar tekjur sínar, til þess að geta fengið fè og goldið liðsmönnum mála. Fór Karl af Bourbon þá norður á Þýzkaland og fekk þar 15000 manna hjá Ferdinand keisarabróður og Georgi af Frúndsberg. Með þessu liði hélt Karl suður til móts við Peskara, og síðan héldu þeir öllu liðinu til Pavíaborgar. Það var í öndverðum febrúar-mánuði 1525. Frakkar sátu um borgina sem fyr er sagt. Franz konungur hafði sent nokkuð af liði sínu suður á Neapel til þess að vinna það ríki. Lannoy þótti ríki sínu hætta búin og vildi elta konung með nokkrum hersveitum, en Peskara kvað hið mesta óráð að skipta liðinu, því að við Pavía ættu þeir að láta skriða til skara með sér, og reð hann því að eigi var farið. Nú var svo komið, að Leyva var þrotinn að vistum í borginni; lið keisarans vildi berjast, og eggjaði Frakka til orustu. Hinir reyndustu hershöfðingjar í liði Franz konungsildu eigi að svo stöddu leggja til bardaga, konungur var framgjarn, þóttist vera eins lið margur sem óvinir hans, og þess vegna mínkun að þora eigi að berjast. Þannig hófst hin nafnkenda orusta við Pavía (24. febr. 1525). Frakkar gjörðu hið harðasta áhlaup á keisarans menn og skorti lítið á, að þeir mundu koma þeim á flóttu, en Peskara með Spánverjum og Georg Frúndsberg með Þjóðverjum réttu við bardagann, og um sama leyti brauzt Leyva með sína menn út úr borginni. Snéri þá mannfallinu á Frakka; mistu þeir þar allar fallbyssur sínar; fjöldi manna varð höndum tekinn og margir féllu; á meðal þeirra var Bonnivet. Franz konungur barðist af hinni mestu hreysti, og þegar flóttinn brast í liði hans, hugði hann eigi á annað en vinna sem mest áður hann félli, og hjó og lagði á tvær hendur; bárust þá sár á konung og varð hann handtekinn. Því næst var hann fluttur til Madríd, því að Karl keisari var þar þá, og þar sat konungur eitt ár í

varðhaldi, þángað til hann gekk að þeim friðarkostum, sem keisarinn setti honum; samdist þá friður með þeim (1526) þannig, að konungur slepti öllu tilkalli til hertogadæmisins Milánó og annara landa á Ítalíu, afsalaði sér öllum rétti til hertogadæmisins Búrgúnd, og sömuleiðis öllum yfirráðum yfir skattlöndunum Flandern og Artois í Belgíu. En þegar Franz samdi þenna frið, var það enganvegin áform hans, að efna loforð sín og halda þessa sætt; hann hugsaði einungis um hitt, að losna úr varðhaldi og komast aptur heim í ríki sitt. *Klemenx* páfi hinn sjöundi, sem óttaðist ofurveldi keisarans, leysti Franz konung af öllum eiðum og loforðum, og þótt páfinn hefði áður verið í sambandi við keisarann gjörðist hann nú bandamaður konungs móti honum. Hertogadæmið Búrgund brást og keisara, því að landsmenn þar mótmæltu alsendis að ganga undir keisarann og skiljast við Frakkland, en buðu að greiða honum 2 millíónir krónudala í þess stað. Hinrik áttundi Englakonungur gekk einnig í lið með fjandmönnum Karls, bæði vegna þess, að Wolfsey kardínáli þóttist svikinn af Karli um páfatignina, og líka hins vegna, að Hinrik vildi eiga páfann að, til þess að geta skilið sig við fyrstu konu sína, Katrínu af Arragoníu, dóttur Ferdínands katólska og Ísabellu, en móðursystur Karls keisara. Venezia og jafnvel Franz Storza, er átti keisaranum upphefð sína að þakka, gengu einnig í lið með óvinum hans. Þessi samtök móti keisaranum, er nú voru gjörð (1526), hafa menn kallað *helga sambandið* (*den hellige Ligue*), af því að páfinn var þar fremstur í flokki. Þannig hófst ófriður í *annað sinn* milli Karls keisara öðrumeginn, og Franz konungs og bandamanna hans hinumeginn (frá 1527 til 1529). Keisarinn hafði nokkurt lið í Milánó, og Karl af Bourbon var þar yfirforingi, en Peskara var dáinn. Keisarinn átti í peningapröng eins og vant var, og gat eigi goldið liði sínu mála. Er það allmerkilegt, að slíkur þjóðhöfðingi sem Karl fimmti, er allra konunga var víðlendastur og voldugastur á þeim tímum, skyldi jafnan eiga svo þröngt í búi, að hann gæti eigi goldið mála rúmum 20 þúsundum hermanna. Sýnir það bezst mismun á fjárhagsstjórn þjóðanna á þeim tímum og nú. Því að nú þykir það ríki að engu nýtt og naumast sjálfbjarga, er kemst í nokkur vandræði, þó gjöra þurfi út 20—30 þúsundir hermanna og gjalda þeim

viðunanlegan mála. Karl af Bourbon, hershöfðingi hins volduga keisara, gat eigi haldizt við á Norðurítalíu, gat eigi fætt eða klætt menn sína, því að fæ skorti til hvorstveggja; hann greip því til ofríkis og rána, og lagði höndur á fæ kirkna, klaustra og einstakra manna, er nokkuð áttu. Og, þegar alt um þrotnaði, ræð hann af að brjótast inn í lönd páfans, en setti Leyva til landvarnar í Mílanó. Það var um miðvetrarskeið. Herinn var um 25000 manns, Ítalir, Spánverjar og Þjóðverjar. Alt vantaði, einkum fæ og fallbyssur. Karl fór fótgángandi fyrir liði sínu eins og Cortez og Pízarro, og hirti hvorki um vosbúð eða vök-ur; hann lét sér miklu annara um þarfir manna sinna, en sjálf-an sig; þess vegna trúði herinn á hann og fylgði honum út í hvað sem fyrir varð.

Í öndverðum maí mánuði 1527 var herinn kominn alla leið suður að Rómaborg. Karl benti mönnum sínum á hinar háreistu kirkjur og skrantlegu hallir, og hét þeim fæ og frama, ef þeir fengju unnið hina nafnfrægu borg. Var nú blásið til atlögu. Umhverfis borgina voru múrveggir og hafði margt manna skip-azt þar fyrir til varnar. Karl eggjaði liðið ákaflega til fram-göngu, og tókst nú mannfall mikið af hvorum tveggja; Karl lét setja stiga að múrnum og ráða til uppgöngu, fór hann nú fram og aptur um herinn og skipaði fyrir; hann kom þar að, sem einn af mönnum hans fór með stiga, þótti Karli honum vinnast seint, greip af honum stigann, setti að múrnum og ræð til upp-göngu; en í því sama vetfangi var hann skotinn til bana. Lét Karl af Bourbon þannig líf sitt, og var vetri meir en hálfertug-ur er hann féll. En er menn hans vissu, að foringi þeirra var fallinn, gjörðust þeir svo óðir og ákafir, að ekki stóðst við þeim, og fengu þeir náð borginni; gjörðu þeir þar þau hervirki, að eigi voru önnur verri unnin, og gekk svo um hríð. Páfinn sat í kastala þeim þar í borginni, er *Engilsborg* heitir; er sá kast-ali ramlega víggirtur. Þó þrengdi svo að páfa, að hann hafði eigi aðra fæðu sér til munns að leggja en asnakjöt, og gjörði hann þá svofelda sætt við Filibert prins, af Óraníu, er orðinn var herstjóri eptir fall Karls af Bourbon, að páfinn hét að greiða honum 400 þúsundir «dúkata», láta af hendi nokkrar víggirtar borgir og kastala, og vera sjálfur í varðhaldi þangað til meiri hluti fjárins væri greiddur.

Nú fréttir Karl keisari að Rómaborg er unnin og páfinn í hers höndum. Þóttist hann þá sjá, að illa mundi mælast fyrir slíkum tíðindum, og að margt gæti þar af ílt spunnizt; tekur hann þá það ráðs, að hann ritar bréf í ýmsar áttir og segir, að allar þær aðfarir, sem orðið hafi í Rómaborg, og öll hin illa meðferð á páfanum hafi verið á móti vilja sínum og vitund. Og, hvort sem satt er eður eigi, þá segja sumir, að keisarinn hafi skipað að gjöra skyldi fyrirbætur í kirkjum fyrir páfa og lausn hans úr þessum nauðum. Litlu fyrir jól hinn næsta vetur slapp páfinn úr varðhaldi og komst klaklaust til bandamanna sinna. En allar þessar ófarir sínar mátti páfinn kenna Franz konungi, því að hann hafði illa efnt orð sín við páfa og sendi honum enga liðveizlu meðan tími var til. Loksins fékk Franz fjárstyrk nokkurn hjá Hinriki áttunda, og þá safnaði hann liði og setti Lautrek yfir, og sendi til Ítalíu; unnu Frakkar þá nokkrar borgir í Lombardíi (Lángbarðalandi) og fóru með mikilli grimd yfir landið. Keisarinn vantaði fé eins og vant var, og vildi nú semja frið, kvaðst skyldi þykkja þær 2 milliónir krónudala fyrir Búrgund, sem áður er nefnt, ef Franz vildi flytja herlið sitt burt af Ítalíu. En Franz þóttist nú standa helzt til vel að vígi, og vildi fyrir því engum sáttum taka. Helt því næst Lautrek til Neapel, og þá loks fór herlið keisarans burt úr Rómaborg eptir 10 mánaða dvöl, og hélt á eptir Frökkum. Lautrek varð vel framgengt í Neapel, en er honum lá mest á peningum komu þeir engir frá Frakkakonungi, því að hann hafði eytt þeim til annars. Lautrek settist um höfuðborgina, og krepti óðum að borgarmönnum; en þá varð Franz í öðru sinni á sú yfirsjón, að hann stygði þann mann, er honum hafði þjónað og honum reið þá mest á að styggja eigi. En það var *Andrès Dória*, hin fræga þjóðhetja Genúaborgarmanna. Dória átti að halda flota sínum til Neapel og hjálpa Lautreki gegn borginni. En áður hann færi af stað beiddi hann konung ýmsra bæna, er lutu að því, að minka yfirráð Frakka yfir Genúa. Þessum bænum spilti ráðgjafi Franz konungs sá, er *Duprat* hét, hinn mesti ódrengur; gramdist þá Dória svo mjög við konung, að hann sagði skilið við hann og bauð keisaranum sína þjónustu með því skilyrði, að Genúa yrði sjálfri sér ráðandi. Síðan skipaði Dória öllu fyrir þar í feðraborg sinni sem best mátti verða og vitur-

legast, og hélt að því búnu flota sínum til liðs við Neapels menn. En það er frá Lautrek að segja, að sótt kom upp í liði hans, er varð svo mannskæð, að á rúmum mánuði dóu svo margir menn, að af 25000 urðu einar 4000 lífs eptir. Lautrek dó í sóttinni. Umsátinni var hætt, og mælt er að enginn maður hafi komið aptur heim til Frakklands af öllum þeim her. Árið eptir rak Leyva annan her frakkneskan út af Mílanó, er þángað hafði komið. Slíkan enda fékk allur sá mikli leiðángur, er Franz konungur hafði gjört sér svo fagrar vonir um í öndverðu. Nú vildi konungur seginn að friður kæmist á, og keisari var einnig allfús til sátta, því að Tyrkir voru á leiðinni að austan, og prótestantar í Þýzkalandi höfðu þá fyrir skemstu á ríkisdeginum í Speier gjört Karli súrt í broti. Þannig komst friður á í *Cambray* í ágústmánuði 1529, líkur því sem Madrídari friðurinn hafði verið, þó hélt Frakkakonungur hertogadæminu Búrgund. Þessi friður í *Cambray* er kallaður „konufriður“, af því að tvær konur rituðu nöfn sín undir friðarsamninginn, Lovísa af Savoyen móðir Franz, og Margrét föðursystir Karls keisara, sú hin sama, er fyrrum átti að giptast Karli áttunda Frakkakonungi¹.

Um það leyti er friður þessi var saminn, fór Karl keisari sjóveg frá Spáni til Ítalíu og lenti skipum sínum í Genúa. Keisariinn hafði hið fríðasta föruneysi og hélt þaðan til Bólogna; kom páfinn þar til móts við hann, og var þá mikið um dýrðir. Á þeim fundi krýndi páfinn Karl til konungs á Ítalíu og til keisara að fornum sið (24. febr. 1530); þá var Karl þrítugur að aldri. Það var hin síðasta krýning af páfa hendi til þess er Napóleon keisari hinn fyrsti lét páfann krýna sig fyrst á þessari öld.

En Karli keisara var eigi til setu boðið á Ítalíu, því að þá bárust hin mestu ótíðindi austan af Úngverjalandi. Tyrkir voru þar komnir með óslýjandi her og höldu fram stefnuinni vestur til Wínarborgar (Wien); var öllu Þýzkalandi hinn mesti háski búinn ef þeir næðu borginni; Ferdinand Úngverja konungur, bróðir keisarans, fékk eigi rönd við reist; Karl varð því að koma til hjálpar. Selim I. Tyrkjaöldán var dáiinn 1520, en kominn til ríkis sonur hans, *Sóliman annar* (1520—1566), hinn mesti afreksmaður bæði í friði og stríði, enda stóð veldi Tyrkja aldrei

1) Sjá Miðaldasögu bls. 193—194.

með meiri blóma en á hans ríkisstjórnarárum. Sólíman vann borgina Belgrað; síðan vann hann *Ródusey* af Jóhannesriddurum eptir. hina frægustu vörn (1522), en þeir fengu aptur hjá Karli keisara bústað á Malta. Þegar því var lokið, hélt Sólíman liði sínu móti konungi þeim, er þá ræð fyrir Úngverjalandi, og *Loðvík* hét hinn annar með því nafni¹. Stóð orusta milli þeirra hjá Móhacz á áliðnu sumri 1526; var Sólíman miklu liðfleiri og fékk sigur, en Loðvík konungur féll; þar féllu og í þeirri orustu sjö biskupar. Eptir orustuna fór Sólíman hershöndum um Úngverjaland, og unnu Tyrkir þar mörg hryðjuverk. Svo hafði áður samizt með mönnum, að *Ferdínand* bróðir Karls keisara, er átti Önnu systur Loðvíks annars, skyldi erfa að Loðvíki látnum bæði Böhmen og Úngverjaland. Ferdínand komst og til ríkis í Böhmen, en á Úngverjalandi gekk honum alt erfiðara. Jarlinn í Siebenbürgen, *Jóhann Zapolýa*, vildi brjótast til konungdóms á Úngverjalandi, og Sólíman styrkti hann að málum. Árið 1529 brauzt Sólíman að nýju inn á Úngverjaland, tók Ófen höfuðborg landsins, og setti Jóhann Zapolýa til valda. Um haustið, það hið sama ár, hélt Sólíman öllu liði sínu til Wínarborgar og settist um borgina, en borgarmenn vörðust svo ágætlega, að Sólíman varð frá að hverfa við svo búið, og var allur á burtu, þegar Karl keisari kom sunnan af Ítalíu um veturnætur til liðs við Ferdínand bróður sinn. Eptir nokkurra ára ófrið skiptu þeir Ferdínand og Zapolýa Úngverjalandi með sér, og þegar Zapolýa var dainn (1540), lögðu Tyrkir meiri hluta landsins undir sig, en Siebenbürgen var lengi eptir það ríki útaf fyrir sig. Fyrst eptir friðinn í *Karlóviz* (1699) eignuðust Þýzka-lands keisarar alt Úngverjaland.

Þegar Tyrkir höfðu unnið Ródusey, eins og áður er sagt, magnaðist stórum yfírgangur þeirra og óspektir um miðjarðarhaf og strendur þær, er þar liggja að; gjörðu þeir bæði að ræna kristna menn, er um hafð fóru, og að brjóta borgir á landi uppi. Bræður tveir eru nefndir til sögunnar er hétu *Horúk* og *Schereddín Barbarossa*, ættaðir frá Lesbos í Gríkklandshafi; þeir höfðu verið kristnir en kastað trú sinni og tekið Tyrkja trú; þeir voru hinir mestu víkingar, og þóttu verri viðureignar en aðrir menn. Þeir herjuðu um norðurstrendur Afríku og náðu þar Algiersborg.

1) Miðaldasaga bls. 233.

Litlu síðar féll Horúk, en Schereddín settist í völdin eptir bróður sinn. Nú var bæði, að Schereddín grunaði þjóðir þær um trygð, er þeir bræður höfðu undir sig lagt á Afríku ströndum, og svo hinsvegar óttaðist hann Spánverja, og fyrir því tók hann það ráðs, að leyta Tyrkjasoldáns í Constantínópel, og bauð honum yfirráð yfir löndum þeim og borgum, er hann hafði unnið þar vestur um strandirnar, en sjálfur kvaðst hann skyldi vera jarl hans yfir landinu. Sólíman annar þektist boðið, og þannig náðu Tyrkir fótfestu og fengu einskonar yfirráð yfir þeim þremur ríkjum norðan á Afríku: *Algier, Túnis og Trípólís*. Aðfarir Schereddíns knúðu Karl keisara til að láta eigi við svo búið standa, enda var þegnum keisarans bæði á Spáni og á Suður-Ítalíu hinn mesti háski búinn af áhlaupum og ránskap Tyrkja. Árið 1535 hafði Karl keisari her úti af ríkjum sínum og hélt því-liði suður til Afríku; átti Schereddín orustu við keisara, en beið ósigur og flýði; keisarinn tók borgina Túnis og lagði skatta á landið, en leysti úr ánauð Tyrkja alla hertekna menn af ýmsum kristnum þjóðum, er hann hitti þar. Segja nokkrir sagnaritendur að tala þeirra manna næði 20 þúsundum. Gaf keisarinn þeim öllum heimfararleyfi, og varð hinn frægasti af þeirri herför.

Frá Túnis hélt keisarinn aptur til Ítalíu. Í-Neapel barst honum sú fregn, að hertoginn af Mílanó, Franz Sforza, væri dæinn, og með því að hertoginn átti eigi börn á lífi, en hafði haft hertogadæmi sitt *Lombardí (Långbarðaland*, er Ítalir kölluðu Milano) að lèni af keisara, þá lagði keisarinn það undir krúnuna. En þá kom Franz Frakkakonungur fram með þá kröfu, að hann ætti heimtingu til landsins, því að hann hefði aldrei látið það laust við keisarann, heldur að eins við Franz Sforza og hans ættmenn. Af þessum ágreiníngi hófst *ófriður hið þriðja sinn* milli þeirra Karls og Franz, er stóð um tvö ár (1536—1538), og vann hvorigur á öðrum, en ósómi þótti það af Franz konungi, að hann fékk Sólíman annan Tyrkjasoldán í lið með sér og það á móti kristnum mönnum; höldu Tyrkir skipum sínum til Ítalíu og herjuðu í ríki keisarans. Páfinn gekk á milli og tókst honum loks að koma sættum á, í borg þeirri er Nizza heitir, og skyldu grið vera með mönnum um 10 ár hin næstu. Keisarinn fékk Filippusi syni sínum, er síðar varð konungur á Spáni, hertogadæmið Mílanó að lèni, og var það lengi síðan

undir Spánarkonungi. En þegar keisarinn árið 1541 fór herferð suður á Afríku til þess að herja á Tyrkjum og reka Schèreddín burt af Algeir, og hafði beðið allmikið tjón bæði á skipum og mönnum, þá rauf Franz griðin, og hélt liði sínu inn í lönd keisarans, og vildi nú að skriða skyldi til skara með þeim. Það var í fjórða sinn er ófriður stóð milli þeirra (1542—1544). Franz konungur var enn sem fyr í sambandi við Tyrki, og herjuðu þeir víða um Ítalíu strandir, og gjörðu þar hinn mesta skaða. Þegar ófriður þessi hafði staðið um hríð, fór Karli keisara að vegna betur; hann hafði haldið liði sínu inn á Frakkland og átti skamt eitt ófarið til Parísar; Hinrik konungur áttundi, var þá enn af nýju orðinn bandamaður hans og kominn með hærmanns yfir á Frakkland. Sá Franz þá sitt óvænna og leitaði sátta og friðar, og sá varð þar endir á, að friður var saminn í Crespy 1544. Létu þá hvorirtveggja það laust, er þeir höfðu undir sig lagt eptir sáttagjörðina í Nizza. Franz slepti öllu tilkalli til ríkis á Neapel en Karl til Burgundar; en hvað hertogadæmið Milano snerti, var svo um samið, að Karl hertogi af Orleans, sonur Franz konungs, skyldi kvongast annaðhvort Maríu elztu dóttur keisarans, og fá með henni Niðurlöndin, ellegar Önnu dóttur Ferdínands Ungverjakonungs og bróður keisarans, og fá með henni hertogadæmið Milano. En hvorugt varð, því hertoginn af Orleans dó ári síðar. Það gjörðu þeir og að skilmála með sér, Karl keisari og Franz fyrsti, að þeir skyldu styrkja hver annan til þess að fullur friður kæmist á í ríkjum þeirra í öllum trúarbragðadeilum, og að því búnu herja á Tyrkjann og reka hann algjörlega af höndum sér. Þannig lauk ófriðnum milli Karls 5. og Franz fyrsta; en ófriður stóð milli Franz og Hinriks 8. þangað til friður var saminn milli þeirra árið 1546. Árið þar á eptir (1547) dó Franz konungur, rúmlega fimmtugur að aldri. Á friðarárum sínum var hann mjög nýtur konungur og efldi vísindi og fagar listir og ýms nytsamleg fyrirtæki; iðnaður, verzlun og siglingar tóku þá talsverðum framförum í ríki hans. En mjög var hann hneigður til svalls og sællífis, enda styttaði það honum aldur. Hann lézt vera mikill vinur prótestanta á Þýzkalandi, en sú vinátta var ekki af góðu komin, heldur af hinu, að æsa menn til mótstöðu og ófriðar gegn Karli keisara. Franz var sjálfur rampápiskur, og siðabótamenn sættu

ofsóknum og dauða á Frakklandi um hans daga, en þó urðu seinna miklu meiri brögð að þeim ófögnuði, eins og enn mun sagt verða.

Trúarbragðastríð á Þýzkalandi. Dauði Lúthers.

Meðan Karl keisari átti í ófriði við Franz fyrsta, eins og nú hefir sagt verið, gat keisarinn lítil afskipti haft af málefnum manna á Þýzkalandi. Siðabótin hafði nú fest þar rætur og breiðst þar út í allgóðu næði; ýmsir þjóðhöfðingjar styrktu hana af mætti og höfðu bundið félag með sér henni til eflingar. En þegar hér var komið, friðurinn í Crespy saminn (1544) og Karl keisari var laus orðinn við Frakka, þá gat hann snúið huga sínum til Þýzkalands, og þá voru það fyrst og fremst trúarbragðadeilurnar, er hann vildi leiða til lykta. Um þessar mundir (1545) stefndi páfinn (Páll 3. af Farnese-ætt) til kirkjupings í *Trídent*, eins og fyr hafði verið heitið. Var það að líkindum áform keisarans, að á því þingi skyldi blutdrægnislaust ransaka hin kirkjulegu málefni frá rótum, og síðan reynt að miðla málum milli siðabótamanna og pápiskra, og koma á fullum friði þeirra í millum. En siðabótamenn bjuggust við engu góðu af þessu þingi, og þóttust miklu fremur sjá fram á, að leikurinn væri til þess gjörður, að lýsa algjörðu hanni yfir siðabótinni og öllum hennar játeendum. Þessvegna komu mjög fáir prótestantar á þenna fund. Þegar nú keisarinn sá, að eigi gat gengið saman með mönnum, einsetti hann sér að beita valdi við prótestanta og brjóta þá til blýðni við sig og hina katólsku trú.

Þau ár sem liðin voru síðan Lúthers var síðast getið, hafði hin mikla trúarhetja eigi verið aðgjörðalaus. Hann gjörði ýmist að kenna á háskólanum, prædika í söfnuðunum, rita bréf og bækur, eða ferðast um byggir og borgir, til þess að líta eptir siðum manna og framferði; en þrátt fyrir alla hans óþreytandi starfsemi hafði hann, eins og þeir menn sem kunna að verja tímanum réttilega, nægar stundir afgangs, sér og öðrum til skemtnunar og fróðleiks; sönglistina hafði hann í miklum metum, og sagði, að sá sem eigi hefði ánægju af henni, væri líkastur stokki eða steini, og eptir því kvaðst hann hafa tekið, að djöflinum væri illa við alla sönglist, því að allar áhyggjur og sorgir flýðu úr huga sér við hljóminn af henni, eins og við heyrn guðs orða.

En Lúther var vanur að eigna árásum djöfulsins alla hugsýki, allar sóttir og kvilla. Því var það einusinni er Melankthon lá veikur, og var orðinn mjög magur og máttfarinn, að Lúther gjörði sér ferð til hans, og þegar hann sá Melankthon, þá sagði Lúther: «guð hjálpi mér, en að sjá hvernig djöfullinn er búinn að útleika fyrir mér þetta organon!». Hin síðustu 20 ár æfi sinnar var Lúther löngum sjúkur og þjáðist mjög af steinsótt og höfuðverki, en alt um það var hugurinn samur og jafn, sál-arþrekið bilaði aldrei. Undir árslokin 1545 var Lúther beðinn að jafna misklið nokkra, sem átti sér stað milli greifanna af Mansfeld. Í þeim erindum varð hann að takað ferð á hendur og fara til Eisleben; kom hann þangað í janúar-mánuði 1546, en var þá í meira lagi sjúkur; þó prédikaði hann þar nokkrum sinn-um, og sótti fundi þá, er ræddu málefni greifanna, á hverjum degi til þriðjudags 16. febr; að kveldi þess dags sagði hann við vin sinn einn: «Þegar eg er búinn að sætta mína kæru landshöfð-ingja, greifana, þá vil eg halda heim aptur til mín, leggjast í kistu mína, og gefa ormunum líkama minn til fæðu». Daginn eftir (17. febr.) var honum þýngra, en þó hafði hann fótavist, og talaði við vini sína um dauðann og eilífðina og sam-fundi manna í öðru lífi. Um kvöldið gekk hann snemma til herbergja sinna og vinir hans nokkrir með honum. Þegar leið á kvöldið mælti hann: «gæti eg sofnað að eins hálfa stund svo held eg að mér mundi batna». Hann blundaði litlu síðar, en vaknaði skjótt og bað þá, sem hjá honum voru, ganga til hvílu, en þeir kváðust vilja vaka yfir honum og leiddu hann síðan til rekkju. Lúther bauð þeim öllum góðar nætur og sagði: «biðjið guð, drottinn vorn, að varðveita sitt evangelium, því að þingið í Trídent og hinn leiði páfi gjöra því árásir». Þegar komið var fram yfir miðnætti, og menn sáu, að Lúther átti skamt eftir ólifað, sagði doktor Jónas, einn af þeim sem þar voru við-staddir: «viljið þér, æruverði faðir, deyja í trúnni á Krist, eins og þér hafið kennt hana?». Lúther svaraði skírt: já! snéri sér á hægri hlið og lagði augun aptur, og héldu þeir hann blunda, en, er þeir gættu betur að, var hann liðinn. Þannig dó Lúther á 63. ári aldurs síns í því sama þorpi, sem hann var fæddur í. Lík hans var flutt til Wittenberg og jarðað þar að hallarkirkju kjörfurstans.

En nú víkur sögunni aptur til hina, er frá var horfið, að páfatrúarmenn og prótestantar gátu eigi orðið sáttir og sam-mála. Páfinn sendi Karli keisara bæði menn og fè. Hvorirtveggja söfnuði liði, bæði keisarinn og höfðingjar siðabótamanna (eða *Smalkaldar bandamennirnir*. bls. 24). Urðu þeir fyr búnir en keisarinn og stefndu liði sínu til Baiern. Helzti foringi prótestanta var *Jóhann Friðrik*, kjörfursti af Saxlandi, bróðurson Friðriks vitra. Kjörfurstinn var enginn hershöfðingi; hann þótti-ist eigi vilja verða fyrstur til að hefja ófriðinn og byrja borgara-stríð; tíminn leið í aðgjörðaleysi fyrir honum, en þann tíma notaði keisarinn sem best, og dró lið að sér úr öllum áttum. En svo bættist hér annað atriði við, og það var þetta. Kjörfurstinn átti frænda þann er *Móriz* hét. Hann var ungur að aldri, en hinn mesti atgervimaður bæði til sálar og líkama; hann ræð fyrir nokkrum hluta Saxlands, og var ríki hans nefnt hertogadæmi; kvongaður var hann og átti dóttur Filippusar landgreifa, sem fyr er nefndur. Móriz hertogi hafði verið með ýms-um höfðingjum og í hernaði, og reynzt bæði vitur og hið bezta herforingja efni. Slíkur maður sem Móriz gat eigi dulizt Karli keisara; hann lét sér mjög annt um að laða hertogann til sín, og það tókst keisaranum; hann hafði Móriz í hinum mestu há-vegum, og var það þó eigi venja hans við þýzka menn. Móriz hafði tekið við Lúthers trú, en þó var hann eigi í Smalkaldar-sambandinu. Við frænda sinn, Jóhann Friðrik kjörfursta, var Móriz mjög illa, og þótti hann eigi vaxinn þeirri tign, er hon-um hafði hlotnast. Móriz vildi sjálfur verða kjörfursti. Ein-hverju sinni urðu þeir frændur svo stórkostlega missáttir, að kjörfurstinn, sem annars var seinþreyttur til vandræða, safnaði mönnum og ætlaði að veita Mórizi aðgöngu; en þá skarst Lút-her í leikinn, og sagði þeim: „Þið gjörðið ykkur að athlægi; allir skynsamir menn munu líta á ófrið ykkarn sömu augum, eins og þeir sæu tvo drukna bændur fljúgast á um brotið staup, eða tvö sífl um brauðbita“. Af ófriðnum varð að sönnu eigi í það sinn, en ekki greri að heldur um heilt með þeim.

Þegar hér var komið hafði Móriz hertogi, í von um að geta náð kjörfurstatign á Saxlandi, gjört svofeldan samning við keis-arann, að hann skyldi vera honum trúr og dyggur og hinum austurrísku ættmönnum hans, og ganga að þeim kostum, er

settir yrðu á almennu kirkjuþingi, og sem hinir aðrir þjóðhöfðingjar á Þýzkalandi vildu ganga að; og hinsvegar hafði keisarinn fengið Móríz yfirráð yfir biskupsdæmunum Magdeborg og Halberstad, með því skilyrði, að páfatrúnni yrði þar borgið. Meðan kjörfurstinn af Saxlandi var suður í Baiern með bandamanna herinn, settist Móríz hertogi með sínar sveitir í lönd hans norður í Saxen, meðfram eptir skipun keisarans. En sem kjörfurstinn frétti það, hélt hann með sínum mönnum heim á leið, til þess að vinna ríki sitt aptur af Mórízi; við það tvístraðist her bandamanna í Baiern, svo að keisarinn gat þar einn öllu ráðið. Því næst hélt keisarinn liði sínu til Saxlands, til þess að greiða kjörfurstanum makleg málagjöld. Þar kom Móríz til móts við keisarann. Litlu síðar varð orustan við *Muhlberg*, lítinn bæ við Elfunu (1547). Keisarinn var liðfleiri og fékk sigur, en kjörfurstinn var höndum tekinn og settur í varðhald. Keisarinn fékk því næst Mórízi kjörfurstatignina á Saxlandi í hendur, en lýsti yfir því, að Jóhann Friðrik og allir aðrir þjóðhöfðingjar og borgir á Þýzkalandi, er gjört hefðu uppreisn á móti sér, væru sekir orðnir um landráð. Það var um þessar mundir, að Karl keisari kom til Wittenbergs og lét sýna sér legstað Lúthers. Í för með Karli var hertoginn af Alba, (er síðar mun getið); hann gaf keisara það ráð, að láta grafa Lúther upp og brenna bein hans, en Karl svaraði: «eg á í ófriði við þá sem lifa, en eigi við hina, sem dauðir eru». Skömmum tíma eptir orustuna við Muhlberg gafst landgreifinn af Hessen upp og gekk á vald keisarans. Nú þóttist keisarinn einvaldur á Þýzkalandi; en þó svo væri, þá gjörði hann enga gangskör að því, að kúga prótestanta til katólskra siða, og þegar pálinn sá það, var úti um vináttu hans við keisarann. Í annan stað geðjaðist prótestöntum miður að mörgu í fyrirskipunum keisarans, og undu hvorirtveggju illa sínum hlut, bæði pápiskir menn og prótestantar. Hér var úr vöndu að ráða. Keisarinn reyndi til þess, og stefndi þing í Augsborg; á því þingi (1548) voru settar reglur (Augsborgar Interim) um það, hvernig menn skyldu hegða sér í trúarmálefnum *þángað til* þingið í Trident hefði lokið sínum störfum, og kveðið á fulla og fasta skipun um allar trúargreinir og kirkjuleg málefni. En þetta Augsborgar «Interim» varð hvorigum til hæfis, hvorki katólskum eða prótestöntum. Eptir Augsborgarþingið fór keis-

arinn til Niðurlanda og dvaldist þar alt að tveim árum. Á Þýzkalandi var illur kur í mönnum. Margir lútherskir klerkar og kennimenn, sem urðu mjög háværir móti Augsborgar reglunum, voru reknir frá embættum; leytuðu flestir þeirra til Magdeborgar, sem var mikil borg og auðug í þá daga; þar áttu þeir víst hæli. Þess vegna varð keisarinn stórreiður þeirri borg, og bauð Mórizi kjörfursta að kúga hana til hlýðni. Kjörfurstinn hafði liðsafnað og hélt þángað 1550 á áliðnu ári.

Um þessar mundir hafði Karl keisari fast í huga, að Filippus sonur hans gæti náð rómverkri keisaratign að sér látnum, en Ferdinand bróðir keisarans vildi ekki til slaka og sleppa því tilkalli, er hann hafði til keisaradóms fyrir sig og sína niðja; þó lézt hann mundi gefa kost á, að Filippus yrði keisari eptir sig, en þar næst Maximilian sonur sinn. Þá barst það mönnum til eyrna, að Karl ætlaði sér að láta keisaratignina ganga að erfðum til ættmanna sinna, og þótti hinum þýzku þjóðhöfðingjum það allíll tíðindi. Keisarinn skýrði þeim frá samningum þeirra Ferdínands bróður síns, og beiddist samþykkis kjörfurstanna, en þeir settu þar þvert nei fyrir. Keisarinn hafði haft Filippus son sinn með sér til Þýzkalands, en Þjóðverjum þótti hann óþýður og skuggalegur, og leizt eigi á þá ýglibrún. Keisarinn sá, að hann mundi eigi fá vilja sínum fram komið og sendi Filippus til Spánar. Að því búnu fór keisarinn sjálfur um haustið 1551 til borgar þeirrar, í Tyról, er *Innsbruck* heitir og ætlaði sér að dveljast þar um stundarsakir, því að bæði gat hann verið þar í næði, og þess þurfti hann við sökum veikinda sinna, og svo var hann þar í nánd við Trídent, og gat haft stöðugar gætur á öllu því, er gjörðist bæði þar og á Þýzkalandi. En alt um það, hann mátti eigi við öllu sjá, og brögð og svik komu yfir hann úr þeirri átt, sem hann sízt hugði.

Landgreifinn af Hessen var enn í varðhaldi keisarans og haldinn hart. Móríz kjörfursti hafði margbeðið keisarann veita tengdaföður sínum lausn, en það var ekki nærri slíku komandi. Þessi harka keisarans sveið mörgum, og Mórizi eigi hvað minst. Annars vegar hafði Móríz á sér ámæli trúarbræðra sinna (prótestantanna), því að hann hafði sölgað undir sig lönd frænda síns, Jóhanns kjörfursta; þessu ámæli vildi Móríz hrinda af sér. Í þriðja lagi gátu prótestantar við öllu búizt af keisaranum, að

endudu þingi í Trídent. Alt þetta til samans knúði Móríz, hinn metnaðargjarna og hugstóra mann, áfram að vinna sér til frægðar, kúga keisarann sjálfan, en hjálpa tengdaföður sínum og trúarbræðrum. Þegar Móríz var búinn að afráða þetta með sjálfum sér, gjörir hann samband við *Hinrik annan* Frakkakonung, er til ríkis var kominn eptir föður sinn Franz fyrsta. Og alt fór þetta fram með svo megnu snarræði og mikilli leynd, að keisarinn varð einskis vís fyr en Móríz var kominn með liði því, er hann hafði haft til umsáturs við Magdeborg, á leið til Tyrólar. Keisarinn var þar næsta faliðaður fyrir og varð að flýja frá Innsbruck og suður að sjó, en hinir katólsku þingmenn frá Trídent tvístruðust víðsvegar, ella hefði Móríz handsamað þá alla. Um sama leyti brauzt frakkneskur her inn í Lothringen og lagði undir sig hinar þýzku borgir *Mez*, *Toul* og *Verdun*. Þessi óvænti atburður krepti svo mjög að Karli keisara, að hann varð að ganga að svo feldri sætt (1552) í borg þeirri sem *Passau* heitir: að prótestantar sem fylgdu Augsborgarjárnungunni, skyldu hafa trúarbragðafrelsi, landgreifinn af Hessen verða laus af varðhaldi, og allur ágreiníngur um trúarbrögðin leiðast til lykta á almennum ríkisdegi, og því var viðbætt, að þó mönnum gæti eigi í málefnum trúarinnar komið saman á þeim fyrirheltna ríkisdegi, þá skyldi samt sú sætt standa óhögguð sem gjörð var í Passau. Þau afdrif málanna sem nú voru orðin, voru að vísu prótestöntum í hag, og miklu betri en á horfðist, því að eptir orustuna við Muhlberg var eigi annað fyrir að sjá, en að prótestantar og trú þeirra yrði alsendis ofurliða borin á Þýzkalandi. Lúther var dáinn, en Melankthon og hinir helztu læriföður siðabótamanna fóru huldu höfði land af landi og máttu við öllu illu búast, nema einhver bjargaði. Þessi bjargvættur siðabótanna, að því sinni, varð Móríz kjörfursti, því verður als eigi neitað, hvert sem áform hans að öðru leyti hefir verið. Þegar nú þessi stundarfriður var fenginn á Þýzkalandi, bjóst keisarinn, þótt hann væri þá sjúkur, að hefna sín á Frökkum og reka þá burt af Lothringen. Hann hélt her sínum til borgarinnar Mez og settist um hana, en árstíminn var illa valinn, og *Frans* hertogi af *Guise* varði borgina af mikilli hreysti, svo að keisarinn fékk eigi unnið hana, en beið hið mesta manntjón og varð frá að hverfa við svo búð. »Hamíngjan er eins og kona» sagði hann,

•meðan vér erum úngir, þá brosir hún við oss, en þegar vér eldumst, þá snýr hún við oss bakinu». Á Þýzkalandi hefði nú verið góður friður, ef *Albrekt* markgreifi af Brandenburg (er menn gáfu viðurnefnið *Alkibiádes*) hefði viljað láta af óspektum. Hann var hinn mesti óeirðamaður og sagði, að sættin í Passau kæmi sér ekkert við, og *Móriz* hefði illa gjört að ganga að henni. *Albrekt* hafði sem *Móriz* tekið *Lúthers* trú, og ásamt *Móriz* gengið í samband við *Hinrik* Frakkakonung. En sá var munur þeirra, að *Móriz* vildi friðinn með vissum skildögum, en *Albrekt* vildi als eigi frið. Hann fór sveit úr sveit með ránum og manndrápum og gjörði hinn mesta skaða. Menn söfnuðu liði í móti þessum óaldarflokki, en varð lítið ágengt áður *Móriz* kjörfursti kom til sögunnar. Hann lagði til orustu við *Albrekt* á *Lüneborgarheiði* (1553) og fékk sigur, en varð sár til ólífis og andaðist tveim dögum síðar, rúmlega þrítugur. Þótti mönnum það hinn mesti skaði, því að enginn var líklegri til mikilla framkvæmda en hann um þær mundir. Það er mælt að *Karli* keisara hafi eigi þótt það nein gleðifrætt, er hann heyrði lát *Mórizar*, en *Granvella*, ráðgjafi *Karls*, hélt dýrðlega veizlu af miklum fögnuði. Á því sama ári sem *Móriz* féll fór keisarinn af nýju með her á hendur Frökkum, en fékk litlu til leiðar komið, og skömmu síðar gjörði hann vopnablá við þá í bæ þeim er *Vaucelles* heitir; höldu Frakkar borgum þeim, er þeir höfðu unnið; seinna komst algjörður friður á milli landanna.

Það var eitt í Passanar-sættinni, að almennur þjóðfundur (eða ríkisdagur) skyldi haldinn sem fyrst, til þess að leiða til lykta ágreining manna í trúarefnum á Þýzkalandi. Árið 1555 var sá ríkisdagur settur í Augsborg af *Ferdínandi* keisarabróður, og sama ár var saminn svofeldur friður: að þeir *þjóðhöfðingjar* og þær *hinar frjálsu borgir* á Þýzkalandi, er fylgdu Augsborgar-játningunni, skyldu njóta fullkomins trúarbragðafrelsis til jafns við katólska menn; en um þegnana var það til skilið, að þeir skyldu fylgja þeirri trú, sem *landshöfðinginn* fylgdi¹; en vildu þeir eigi að þeim kostum ganga, skyldi þeim heimilt að fara í friði af landi burt. Það atriði sem lengst var um þrátt að

1) Menn orðuðu það þannig: *cujus est regio, illius quoque religio*, þ. e. þess sem landið er, þess hins sama er einnig trúin. Lengra náði eigi trúarfrelsið á þeim tímum.

ríkisdeginum var það, hvort að þeir biskupar, eða andlegrar stéttar höfðingjar, sem síðar meir tækju trú prótestanta, skyldu halda tekjum sínum og stöðum eins eptir sem áður, eða missa af þeim. Prótestantar kröfðust hins fyrra, en katólskir menn hins síðara, og niðurstaðan varð sú, að menn urðu eigi ásáttir um það atriði. Páfatrúarmenn helmtuðu að þetta skilyrði (*reservatum ecclesiasticum*) yrði sett með berum orðum í friðarsamninginn, og svo var gjört, en af því spunnust síðan mikil vandræði.

Þannig höfðu menn um síðir náð því takmarki, er um hafði verið deilt fullan mannsaldur, margur ágætismaður látið lífið fyrir, og tveir hinir helztu landshöfðingjar orðið að sæta afar-kostum og brakningum. Annar þeirra, Jóhann Friðrik kjörfursti, dó ári fyr en Augsborgarfriðurinn komst á, en Filippus landgreifi lifði enn nokkur ár, og þótti hinn nýtasti þjóðhöfðingi.

Nú var svo komið, að prótestantar höfðu náð einskonar jafnrétti við páfatrúarmenn á Þýzkalandi, en veldi og viðgáangur Frakklands fór vaxandi. En hvorugt þetta var að skapi Karls keisara, eins og gefur að skilja, af því sem áður er sagt. Þar við bættist og það, að hann var orðinn svo hníginn að heilsu, að hann var naumast fær um að gegna margbrotnum stjórnarstörfum. Eljunarmaður hinn mesti hafði hann verið, og mátti með sannni segja „að hann hefði haft meira starf og ófrið og vandræði í ríkinu en hóglífi“. Nú var hann orðinn þreyttur og vildi hvílast; þess vegna ræð hann það af, að láta af ríkisstjórn, og lifa í næði það sem eptir var æfinnar, eins og Dióklezianus keisari hafði forðum gjört. Karl keisari sat um þetta leyti í borg þeirri á Niðurlöndum, er Brüssel heitir. Þangað lét hann um haustið 1555 Filippus son sinn koma til fundar við sig, og gaf honum vald yfir Niðurlöndum (litlu áður var Filippus orðinn konungur í Neapel); en ári síðar (1556) fékk keisarinn Filippusi öll yfirráð yfir Spáni og öllum þeim þjóðlöndum, er lutu því ríki. Keisarinn leiddi syni sínum fyrir sjónir, að hann fengi konum til forráða mörg og mikil lönd, og lagði ríkt á við hann, að stýra þeim með réttvísi og mildi. En keisaradóm og erfðalönd Habsborgarmanna á Þýzkalandi fékk Karl í hendur Ferdínand bróður sínum, er áður var orðinn konungur í Ungarn og Böhmen. Á því

sama ári (1556) fór Karl keisari alfari af Niðurlöndum suður á Spán, og settist þar að í húsi einu, er hann lét gjöra sér hjá St. Just klaustri við Plasenzia í Estremadura. Þar var hann 2 ár og hafði sér ýms störf, einkum þó garðyrkju, til dægrastytt-íngar, en þess á milli iðkaði hann mjög föstur og bænahald. Hann andaðist á ofanverðu ári 1558. Karl keisari var umfram aðra þjóðhöfðingja, er uppi voru honum samtíða, og í mörgum greinum hið mesta mikilmenni. Hann hafði yfir fleiri lönd og fleiri þjóðir að líta, en nokkur annar konungur á þeim tímum; en það hið mikla víðlendi varð honum þó eigi að meiri vand-ræðum en smáríkin mörgum þeim, er yfir minna höfðu að sjá; og þó keisarinn hefði marga ágæta menn í sinni þjónustu vildi hann sjá alt með sjálfs síns augum. Þess vegna var hann á sífeldum ferðum um ríki sitt, á Spáni, í Niðurlöndum, á Þýzka-landi, í Ítalíu, þar að auki fór hann til Englands og tvær her-ferðir til Afriku. Það sem helzt verður að honum fundið, er það, að hann var siðabótinni mótfallinn og jafnvel erfður. En þegar hins er gætt: að hann var alinn upp í katólskum sið, og var hinn mesti trúmaður; að siðabótin á Þýzkalandi hófst á hans æskuárum og við upphaf ríkisstjórnar hans, en hafði í för með sér sundurlyndi og óeirðir og tvískiptingu á ríkinu, og það einmitt voru Þjóðverjar, sem þessar óspektir gjörðu, þeir menn, er hann hafði miklu minni mætur á en Niðurlendingum eða Spánverjum, þá má það alleðlilegt virðast, að Karl fimmsti liti ómildum augum á siðabótina og væri henni mótfallinn. Þótt hann væri hinn mesti aðkvæðamaður, var honum eigi það veitt, að geta hafð sig yfir aldarháttinn, eða skilja til fulls teikn tím-anna, því að hefði svo verið, mundi hann hafa tekið siðabótina sér í hönd og beint braut hennar, hver veit hvað langt út yfir löndin. En það má telja Karli keisara til gildis, að miklu var hann mildari siðabótamönnum, en flestir aðrir katólskir þjóð-höfðingjar um hans daga, og lengi þar á eftir.

Karl fimmsti var fríður maður sýnum og hreystimaður mikill á yngri árum, herði og heilsu sína og líkams afl við dýraveiðar og riddaralegar íþróttir; þegar ellin færðist yfir hann, þjáðist hann mjög af iktsýki, en hlífði sér þó aldrei meðan hann gat við vosi og vökum. Fram á hans daga völdu menn keisurum og konungum það tignarávarp, að kalla þá «náðugi herra», eða

«háí herra», en á hans dögum var fyrst tekið upp «hátignar» nafnið (*majestas*) og hefir það haldizt síðan.

Páfatrúin gegn siðabótinni. Kristmúncar.

Kirkjupíngið í Trídent.

Siðabótin ruddi sér braut til flestra landa í Norðurálfunni. Að minsta kosti var hinn nýi siður boðaður því nær í öllum löndum, og í sumum þeirra festi hann rætur. Það var ekki þar með búið, að hin nýja trú gengi um Þýzkaaland og Norðurlönd, austur á Póilverjaland og Úngarn, Böhmen og Mären, heldur sneru menn einnig ritum Lúthers, Melankthons og Zvínglis á ítalska túngu, og lásu þau suður um alla Ítalíu; vestur á Frakkland, Spán og Portúgal, kom einnig hin nýja trú, og ekki var annað fyrir að sjá, en að páfatrúin mundi eyðast og líða alveg undir lok. Páfinn og hin katólska kirkja neyttu allra bragða til að sporna við slíkum ófögnuði; og þessi viðleitni páfadómsins hafði þann árángur, að útbreiðsla siðabótarinnar stöðvaðist, og í sumum löndum varð henni algjörlega útrýmt. Eigi verður því neitað, að margt breyttist til hins betra í katólsku kirkjunni á þeim tímum, því að árásir siðabótamanna knúðu hina katólsku klerka til að bæta ráð sitt í ýmsum greinum, og þess vegna geta menn með gildum ástæðum sagt, að Lúther og aðfarir hans hafi unnið katólsku kirkjunni mikið gagn. En það sem mest studdi páfadóminn í þessu stímabraki, það var sú hin öfluga liðveizla, er *kristsmúnka félagið* (*Jesuiternes Orden*) veitti honum.

Ignatíus Loyóla er maður nefndur, hann var spánskur að ætt og uppruna. Þegar Frakkar héldu liði sínu suður á Spán (árið 1521) og settust um borg þá, er Pampelona heitir, var Loyóla einn af þeim er verja áttu borgina, og gjörði hann það af mestu breysti, en fékk þar þau sár, að hann varð óvígur og komst undir lækna hendur um lángan tíma. Sér til dægurstyttingar las hann þá ýmsar helgra manna sögur, en allur sá lestur hafði þau áhrif á hugarfar hans, að hann einsetti sér að leggja af hernaðaríþróttina, en helga það sem eptir var æfningar guði til þjónustu. Það tjáðu engar úrtölur, mótmæli né torfærur, það varð fram að ganga sem Loyóla vildi. Þessu næst fór hann pílagrímsferð til landsins helga, og þar kom honum fyrst

til hugar að stofnsetja *nýtt félag* hinna katólsku trú til eflingar. En af því að hann sá, að hann gæti litlu komið til leiðar nema hann aflaði sér meiri mentunar en hann hafði, þá settist hann við — og var þá kominn yfir þrítugt — og las guðfræðibækur af öllum þeim mikla ákafa og öllu því mikla þreki og þolgæði, sem honum var gefið, fyrst við háskólann í París og síðan í Salamanka á Spáni, og þar komst hann í kunningskap við nokkra aðra námsmenn, sem honum voru skaplíkir. Árið 1534 unnu þessir menn eiða að því, að þeir skyldu allir bindast í eitt félag og játast undir allar binar almennu klaustrareglur, fátækt, skírlífi og hlýðni, og þar á ofan heita páfanum sérstaklegri hlýðni og hollustu, og í öllum greinum fylgja hans boðum og banni skilyrðislaust. Tóku nú félagsbræður þessir til starfa, fóru um lönd og borgir, fræddu menn og prédikuðu og snëru ýmsum til katólskrar trúar, sem frá voru fallnir; af öllusaman þessu fekk Loyóla á sig svo mikið orð, að Páll páfi hinn þriðji með því nafni, er sá að félag þetta gæti orðið páfastólnum til hins mesta liðs, gaf því fullkomið samþykki sitt og staðfestingu, árið 1540. Síðan eru þeir, sem í félag þetta gánga, nefndir *kristmúnkar* (*Jesúítar*). Þessi hin nýja múnkaregla var að miklu leyti löguð að hermannasið. Aðalforingi, eða æðsti yfirmaður hennar, var nefndur «General», og hafði aðsetu í Rómaborg og ráðuneyti hans með honum; kristnum löndum var skipt í fylki, og í hverju fylki setti «generalinn» forstöðumann, er hafði tilsjón með öllum þeim félagsbræðrum, sem þar áttu störfum að gegna; þessir félagsbræður skiptust í flokka, er sumir höfðu æðri störf á bændi, sumir óæðri, og gat það gengið svo fleiri stig niður; en það var stöðug regla þessa félags, að hinn óæðri félagsbróðir skyldi hlýðnast hinum æðra skilmálalaust, eins og tíðkast meðal hermanna; mjög fáir komust til hinna æðri valda í múnkafélagi þessu, allur fjöldinn gegndi störfum sínum í blindni eins og hvert annað verkfæri, án þess að hafa ljósa hugmynd um aðalstefnu og aðal-framkvæmdir félagsins. Ignatíus Loyóla var hinn fyrsti aðalforingi (General) þessa múnkafélags; þó kom hann ekki fullu eða föstu skipulagi á félagið, heldur sá sem eptir hann kom og hét *Lainez*. Ignatíus Loyóla dó 1558. Sá var tilgangur kristmúnkafélagsins: að efla og útbreiða hina katólsku trú og einveldi páfans meðal heiðinna þjóða og meðal þeirra, sem

eptir félagsins skoðun fóru með villulærdóma. Þessum tilgáangi félagsins reyndu kristmúnkar til að ná með þrennu móti: með því að gjörast *kennendur* ungna manna, *trúarboðendur* meðal heiðinna þjóða, og *skriptafeður* þeirra sem til varð náð. Sem *kennendur* leituðust þeir helst við að fræða sem flesta unga menn, einkum heldri manna börn og prótestanta, sömuleiðis að stofna skóla og kenna þar ymsa fræði, sérílagi þá sem snerti daglega atvinnu manna; múnkum þessum var um það eitt hugað, að gefa anda hinnar uppvaxandi kynslóðar þá stefnu, sem þeim sjálfum gat að gagni komið, en hitt forðuðust þeir sem heitan eld, að innræta ungum mönnum andlegt frelsi eða háleytar hugmyndir; þeir gjörðu hvað þeir kunnu til að halda lærisveinum sínum í andlegum þrældómi og ánauð. Síðufræði kristmúnkanna er viðbrugðið. Það var í þeirra skólum að hin-
ar alræmdu lærdómssetningar mynduðust, er síðan gengu út um víða veröld, t. a. m. þessar: að áformið réttlætti eða helgaði meðalið, að eiðar og loforð hefðu ekkert gildi þegar hugur fylgði eigi máli o. fl. Þannig gátu hinir verstu glæpir t. a. m. morð réttlæzt, þegar áformið var að vinna kirkjunni eitthvað í hagin. Þeir, sem voru *kristniðendur*, fóru ótrauðir um ýms lönd meðal heiðinna þjóða, til Indlands, Kínverjalands, suður á Afríku og vestr á Ameríku, og settu jafnvel ríki eitt á stofn þar sem Paraguay heitir í Suðurameríku. Viðast varð kristniðendum þessum vel framgengt, því þá skorti hvorki hug eða dug til síns ætlunarverks. Þeir sem voru *skriptafeður* veittu mönnum syndafyrirgefningu, eða neituðu því, eptir því sem bezt þótti viðeiga; þeir kyntust þannig leyndarmálum manna, og fengu hin mestu áhrif á hugi þeirra og hjörtu; þeir urðu skriptafeður konunga og annara þjóðhöfðingja og sátu einatt í ráðaneyti þeirra; er því auðskilið, að þeir hafa getað komið miklu til leiðar, og orðið hinir skæðustu mótstöðumenn siðabótarinnar og als andlegs frelsis. Svo liðu tvö hundruð ára, að múnkafelag þetta náði miklum vexti og viðgáangi, og hélt óskertu áliti sínu í hinum katólsku löndum Norðurálfunnar¹, jafnvel þótt önnur múnkafélög sæu ofsjónum yfir upp-

1) Árið 1540 þegar Loyóla fekk staðfestingu páfa til að stofna kristmúnka félagið, voru lærisveinar Loyólu að eins 10; þegar Loyóla dó voru yfir 1000 manna gengnir í félag hans, og öndverðlega á 18. öld voru kristmúnkar að tölu frekar 20 þúsundir manna.

hefð þess, þjóðirnar hötuðust við það, og sumir þjóðhöfðingjar væru því alt annað en vinveittir. Þegar mentunin fór að lifna á átjándu öldinni, var kristmúnkum að sönnu vísað á braut úr flestum löndum, en menjar þeirra urðu samt þar eptir, og á vorri öld hafa þeir jafnvel komið aptur til sögunnar.

Þegar kristmúnkafélagið hafði fengi staðfestingu páfans, hófst jafnskjótt ofsóknir á Ítalíu gegn siðabótarmönnum. Páll páfi sá sem fyr var nefndur, kvaddi menn í dóm (1542) og lagði ríkt á við þá, að eyða og uppræta hinn nýja villulærdóm, hvar sem vart yrði við hann. Þessu boði var fylgt af alefli; ofsóknir, sakargiptir, dómar og dauði gengu um endilánga Ítalíu, og svo fór, að siðabótin leið þar algjörlega undir lok.

Á kirkjufínginu í Trídent, sem Páll páfi hinn þriðji, eptir ýmsra manna áeggjun, setti árið 1545, en sem öðru hverju hafði orðið að hætta störfum sínum vegna óeirða, reyndu að vísu spániskir og frakkneskir biskupar að koma á nokkurri endurbót, og eyða ýmsum ósiðum og óstjórn páfaveldisins, en það gat eigi tekizt, því að flokkur hinna ítölsku biskupa var langfjölmennastur á þíngi, og vildi enga tilslökun gjöra, enda studdu kristmúnkar þann flokkinn rækilega. Þíngi þessu var loks slitið 1563, og urðu þar þau málalok, að banni var lýst yfir öllum trúargreinum siðabótarinnar, er eigi væru samkvæmar kenningu katólskra klerka; páfatrúin, eins og hún var orðin afbökuð á miðöldunum, var staðfest í aðalatriðum sínum, og páfinn sagður sá eini, er eigi getur skjátlazt í því efni. Margir höfðu búizt við að þíngi þessu mundi heppnast að þoka mönnum saman í trúarefnum, en því fór svo fjærri, að ágreiníngurinn milli prótestanta og páfatrúarmanna varð öllu meiri eptir en áður.

Filippus annar Spánarkonungur (1556—1598).

Það er skýrt frá því hér að framan, að páfinn og klerkalýður hans og einkum kristmúnkar hafi gjört alt, er þeir gátu, til þess að eyða siðabótinni. En nú kemur sá maður til sögunnar, er beitti hinu mikla valdi, er honum hafði hlotnast, allveg í sömu stefnu, að sama marki og miði. Sá maður er *Filippus annar*, sonur Karls keisara fimmta, og eptirmaður hans á Spáni og í fleirum erfðalöndum hans. Þegar Karl keisari lét

af ríkisstjórn, skiptist ríki hans þannig: að Ferdínand bróðir hans fékk keisaratign og hin þýzku lönd, þar við bættist alt Bæheimsríki (Böhmen, Mähren og Slesía), og sá hluti Ungarns, sem Tyrkir höfðu eigi brotið undir sig. En Filippus sonur Karls fékk hin mestu og beztu löndin: Spán, Niðurlönd, ítölsku löndin, og öll hin afarmiklu nýfundnu lönd í Ameríku. Filippus annar var þannig víðlendastur og voldugastur allra þeirra konunga, er honum voru samtíða, en alt um það fór hann svo illa að ráði sínu, að alt andlegt fjör og frelsi, allur líkamlegur þroski og þrifnaður hinnar spánversku þjóðar, veslaðist upp og varð að óþrifum undir hans harðstjórnar hendi. Filippus konungur var grimmur maður og ákaflega dulur, og allra manna tortrygnastur, starfsmaður hinn mesti, og vildi sjá alt með sjálfs síns augum, ekkert var honum jafnríkt í skapi sem það, að uppræta siðabótina með öllu, auka veldi sitt á allar lundir, en brjóta á bak aptur alt mannfrelsi og öll þjóðrættindi, hann hélt fram með hinum mesta trúarofsa öllum hindurvitnum katólskra klerka, og einkum lærdómssetningum kristsmúnka. Karl keisari faðir hans var að vísu enginn þjóðfrelsis vinur, en hann var bæði hinn mesti stjórnvitríngur og ágætur hermaður; Filippus þar á móti hafði hvorigan þann kost til að bera, og þess vegna beitti hann mest og bezt undirferli og grimd í stjórn sinni; ávextirnir urðu eins og við mátti búast: ótti, fyrirleitning, apturför og missir lýðs og landa. Filippus var fjórkvæntur, og átti fyrst (1543) Maríu dóttur Jóhanns konungs 3. af Portúgal; þeirra son var *Don Carlos*, er Filippus að sumra manna sögn lét taka af lífi. Önnur kona hans (1554) var María Englands drottning; þau áttu ekki barna. Þriðja konan (1562) var Ísabella eða Elísabet, dóttir Hinriks annars Frakkakonungs, og fjórða konan (1570) Anna, dóttir Maximilians keisara annars. Þeirra son Filippus 3. Spánarkonungur.

Þegar Filippus konungur kvæntist Maríu Englands drottningu, hugðist hann mundu ná yfirráðum á Englandi, og hafði að vísu þann styrk af því kvonfángi, að Englendingar gengu í lið með honum móti Frökkum, en María drottning lifði skamma stund og dó barnlaus (1558). En ófriðurinn milli Frakka og Filippusar var svo undir kominn, að Póll páfi hinn fjórði þess nafns, var svarinn óvinur Spánverja, og blæddi mjög í augum

hve mikil landráð þeir höfðu á Ítalíu. Hann var að sonnu átt-ræður er hér var komið, en veraldarhyggja og áræði jafnt sem áður. Hann gjörði samband við Hinrik annan Frakkakonung og jafnvel við Tyrki, og Frakkar reðust á Neapel. Þar hafði Filippus konungur öruggan landstjóra, hertogann af *Alba*. Hertoginn var hinn mesti kappi og rak Frakka af höndum sér, og hélt alla leið til Rómaborgar, varð þar lítil vörn fyrir og tók *Alba* borgina; en fyrir þá sök að Filippus konungur var eins mikill vinur katólskunnar, eins og páfinn, ef eigi meiri, þá fékk páfinn grið og frið með góðum kostum. En ófriður stóð enn um hríð milli Frakka og Filippusar, og veitti Filippusi betur, því að hann hafði ágæta hershöfðingja fyrir liði sínu, *Filibert* hertoga af *Savoyen* og *Egmont* greifa úr Niðurlöndum; liðið var bæði af Spáni og af Niðurlöndum. Þeir *Filibert* og *Egmont* unnu algjörðan sigur á Frökkum í orustunni við *St. Quentin* (1557) og *Egmont* einn við *Gravelingen* eða *Gravelines* (1558). Englendingum þar á móti veitti allerfitt og mistu *Calais*; þá borg áttu Englar síðasta á meginlandinu og höfðu haft umráð yfir um 200 ára tíma¹, en hershöfðinginn *Franx Guise* vann hana nú aptur undir Frakkakonung. Nú var saminn friður í *Chateau Cambresis* (1559); hélt Frakkland þá *Calais*, en varð að láta lausa við Spánverja nokkra víggirta staði á landamærum sínum, og setja *Filibert* af *Savoyen* aptur til ríkis í löndum þeim er Frakkar höfðu frá honum tekið. Það gjörðist og á þessum friðarsamningi, að Filippus skyldi fá dóttur Frakkakonungs.

Þegar þessum ófriði var lokið einsetti Filippus konungur sér fyrir fult og fast að eyða öllum trúvillumönnum í ríki sínu. Hinn óttalegi ransóknarréttur (*Inquisitionen*)² tók nú til starfa, og á stuttum tíma (hér um bil á 10 árum) tókst honum með dæmalausri grimd og ofsóknum, að uppræta allar menjar siðabótarinnar á Spáni. Filippus vildi einnig setja spánskan ransóknarrétt í löndum sínum á Ítalíu (*Neapel* og *Milanó*), en Ítalirildu það eigi; þó er það eigi svo að skilja, að siðabótamönnum væri hlíft þar fremur en á Spáni, munurinn var einungis sá, að ransóknarréttur páfans hafði öll hin sömu störf á hendi á Ítalíu, sem ransóknarréttur konungs hafði á Spáni. Hinn

1) Miðaldasaga bls. 159.

2) Miðaldasaga bls. 198.

stjórnlausí trúarofsi Filippusar, og annara hans líka, varð yfirsterkari og tókst að eyða siðabótinni og framförum mannkynsins á Spáni og á Ítallu; en þær hinar sömu óguðlegu aðfarir Filippusar, er hann vildi beita á Niðurlöndum, þær ollu því, að hin auðugustu og beztu skattlönd hans og þegnar gengu undan honum, eins og síðar mun sagt verða.

Ferdínand katólski og Ísabella drottning hans höfðu brotið undir sig ríki Móranna á Spáni, eins og frá hefir verið skýrt í Miðaldasögunni, lofað þeim öllu fögru, en svikið þá síðan í trygðum, og kúgað þá til að skírast. Þessi nauðungartrú Móranna var, einsog nærri má geta, helzt á vörunum en lítil í hjartanu; undir niðri og í pukri fylgdu þeir trú feðra sinna, sem allir voru Mahómets dýrkendur. Um daga Karls keisara fimmta áttu þeir við all sæmileg kjör að búa, og lítil gángskör var að því gjörð, hverjum trúarbrögðum þeir fylgdu. En þegar Filippus annar var kominn til ríkis, þá kvað bráðum við önnur bjalla. Klerkarnir katólsku spöruðu eigi umkvartanir við Filippus um þessa niðja Móranna — er menn kölluðu *Móriskos* —. Klerkarnir sögðu, að þeir tryðu á Mahómet og væru verri en drep-sótt í landinu. Þessu trúði Filippus, sendi lið á hendur þeim, krafðist að þeir seldi af hendi vopn sín og tæki upp aðra tungu og aðra siðu en þeir og feður þeirra hefðu haft. Þetta vildu og gátu Móriskar eigi gjört svo í skyndi; það urðu síðan orustur með þeim. Móriskar vörðust af mestu prýði um tveggja ára tíma, þangað til að *Don Júan* af Austurríki, sonur Karls fimmta og hálfbróðir Filippusar, hinn mesti garpur, gat yfirbugað þá. Voru þeir, sem þá lifðu eptir, teknir og fluttir burt úr Granadabygðum, og settir niður sem ófrjálsir menn annarstaðar um ríkið (1568).

Um þessar mundir var það, að *Don Carlos*, sonur Filippusar konungs, lét líf sitt. Sagnaritendum ber eigi alveg saman um æfi-atrúði konúngssonar þessa. En það þykir sönnu næst, að hann hafi enginn atgjörflimaður verið, hvorki til sálar eða líkama, en grimmur og ófyrirleitinn í lund, og eigi þolað yfirdrottan föður síns, og varð af því öllu saman fullur sjandskapur með þeim feðgum. Filippus hafði hann grunaðan um samband við óvini sína á Spáni og í Niðurlöndum, og jafnvel um samsæri, gegn sér, og bjóst við öllu illu af honum; lét því taka hann

höndum og setja í varðhald, og ransóknarréttinn dæma hann til dauða. Í því varðhaldi dó Don Carlos 23 vetra gamall. Honum hafði með fyrsta verið ætluð Ísabella af Frakklandi, en Filippus tók hana frá syni sínum og gekk sjálfur að eiga hana, eins og fyr er sagt.

Filippus annar átti um mikinn hluta æfi sinnar í ófriði við Tyrki, og víkinga á Norðurafríku ströndum. Meðan Sólíman annar Tyrkjasoldán var á dögum, áttu kristnir menn á Miðjarðarhafsströndum og á Miðjarðarhafseyjum einatt þúngum búsigum að mæta, bæði af Tyrkjum, og af víkingum þeim, er nú voru nefndir. Ári áður en Sólíman dó (1566) ræðst hann með miklu liði á Maltey, þar sem Jóhannesriddarar höfðu aðsetu, en foringi (*stórmeistari*) þeirra, sem þá var, hét *Jóhann de Valette*, og varði hann eyuna svo rösklega, að Tyrkir fengu eigi náð henni. Um síðir komu herskip frá Spáni til liðs við riddarana, og urðu Tyrkir þá frá að hverfa. Eptir Sólíman kom *Selím annar*, sonur hans, til ríkis. Hann var, eins og Tyrkjasoldánar alment síðan, enginn hreystimaður, en mjög hneigður til munaðar; en þó að Tyrkjaveldi upp frá því færi hnignandi, voru þeir samt sem áður allskæðir óvinir kristinna manna. Á árunum 1570—1571 tóku þeir þannig Kýprus-ey frá Venezíumönnum; leituðu Venezíumenn sér liðs hjá páfa og hjá Filippusi öðrum; sendi Filippus mikinn flota móti Tyrkjum, og var *Don Júan* af Austurríki, hálfbróðir Filippusar, yfirforingi þess leiðángurs; fundur þeirra varð við *Lepantó*, utarlega í Korintuborgarflóa (1571), og vann Don Júan þar hinn frægasta sigur á Tyrkjum. Þó varð minna gagn af þeim sigri en verða mátti, ef höfðingjar hefðu orðið vel ásáttir, og höldu Tyrkir Kýprus-ey eptir sem áður. Það er og mælt, að Filippusi hafi þótt nóg um afreksverk og frægð frænda síns, og þess vegna lét hann Don Júan hætta aðförum við Tyrki, en fékk honum yfirráð nokkur í Niðurlöndum — en þar var þá ófriður sem mestur —; gekk Don Júan þar vel fram og vann konungi mikið gagn. Þó lét Filippus hann að síðustu skorta þar bæði fé og fólksafla, og setti menn til höfuðs honum, og þar dó Don Júan (1578).

Nú víkur sögunni til Portúgalsmanna. Þeir höfðu, eins og fyr er ritað¹, unnið mikil og auðug lönd austur á Indlandi og

1) Sjá Miðaldasögu bls. 221—223.

haft þaðan alsnægtir og verið í miklum uppgáangi, en sú gullöld þeirra stóð skamma stund. Á dögum *Jóhans* konungs þriðja, *Emanúelssonar mikla* (1521—1557), komu kristmúnkar til Portúgals og náðu þar fótfestu; fengu þeir þar síðan hin mestu yfirráð í landi, og mátti kalla að þeir legði þjóðina í andlega fjötra og ófrelsi, og öllu hnignaði þar á stuttum tíma. Eptir *Jóhann* kom sonar sonur hans *Sebastian* til ríkis (1557—1578); hann var ungur að aldri og reðu kristmúnkar þá öllu. Bæði þeir og *Filippus annar* á Spáni eggjuðu *Sebastian* á að fara herferð til Afríku og herja á Múhamedsmenn í Marokkó; hét *Filippus* liðveizlu sinni, en sveikst um það alt þegar til kom. *Sebastian* fór með fríðu liði yfir til Marokkó (1578); komu landsmenn þar í móti honum og áttu við hann orustu hjá *Alkassar*, og fengu þeir sigur. Þar féllu 12000 Portúgalsmanna, en konungur þeirra hvarf í mannþrönginni og sást aldrei síðan. Sögðu sumir hann hefði fallið, en aðrir sögðu hann handtekinn og í varðhaldi í Marokkó. En það varð tilefni til þess, að löngu síðar komu þrír menn, hver eptir annan, og þóttust vera *Sebastian* konungur, sloppinn úr varðhaldi. Var einkum einn þeirra mjög líkur honum og færði ýmsar líkur til síns máls. En enginn þeirra komst til ríkis á Portúgal. Eptir ófarir Portúgalsmanna í Marokkó kom *Hinrik*, sonur *Emanúels mikla* og föðurbróðir *Sebastians*, til ríkis á Portúgal. Hann var þá kominn hátt á átttræðisaldur og ekki til frambúðar. Það varð því helzt umtalsmál fyrir honum og þjóðinni, að fá því til lykta ráðið, hver til ríkis skyldi koma af konungs frændum að honum látnum. En áður það mál væri útkljáð andaðist *Hinrik* konungur (1580). *Filippus annar*, Spánar konungur, var dótturson *Emanúels mikla*, og því einn af þessum konungsfrændum. Hann gjörði þegar tilkall til ríkiserfða á Portúgal, en landsmönnum þar gæzt eigi vel að *Filippusi*, og kusu þann til konungs yfir sig, er *Antónius* hét, og var kominn af *Emanúel mikla*. *Filippus* undi eigi við svo búið; gjörði hann nú bæði að bera fê á ýmsa höfðingja og heldri menn í Portúgal, og fá þá þannig til fylgis við sig, og í annan stað sendi hann hertogann af *Alba*, sem áður er nefndur, með miklu liði þángað, til þess að fram fylgja kröfum sínum. *Alba* átti orustu við landsmenn og vann sigur, og litlu síðar gafst höfuðborgin *Lissabon* upp og gekk á vald hans, en *Antónius* flýði til Frakk-

lands og dó þar í volæði. Filippus lagði nú alt Portúgals ríki undir sig, og var það síðan undir Spánar konungi um sex tugi ára (1580—1640); undu Portúgalsmenn illa sínum hag, enda fór þeim þá stórum aptur á því tímabili, því bæði voru þeir kúgaðir af hinum illu og óvitru konungum, og svo mistu þeir því nær allar nýlendur sínar, er Niðurlandamenn — óvinir Spánverja — unnu af þeim. Hefðu Spánarkonungar kunnað að stýra lýðum og löndum, gat það orðið hvorritveggja þjóðinni, Spánverjum og Portúgalsmönnum, til góðs, að einn var konungur yfir báðum; það hefði og verið innanhandar hverri viturri og góðri stjórn í þá daga að sameina þessar tvær þjóðir, því að þær voru í flestum greinum engu síður samrýndar hvor annari, en Kastilíu- og Arragoníu menn hvorir öðrum. En fyrir því að hin skammsýna spánverska stjórn kúgaði Portúgalsmenn á allar lundir, þá óx óvild þeirra til Spánverja þangað til þeir um síðir brutust undan Spánarkonungi (1640) og tóku *Jóhann* af Braganza til konungs yfir sig.

Filippus annar hafði lengi haft illan augastað á Englandi og *Elisabetu* drotningu, er þar sat þá að ríkjum. Filippus hafði beðið Elísabetar en fengið afsvör; hún hafði styrkt Niðurlendinga í frelsisstríði þeirra móti Filippusi, því að hún hafði tekið prótestanta trú eins og meiri hluti Englendinga; þar á ofan bættist það, að Elísabet hafði látið taka af lífi *Maríu Stúart*, Skotadrotningu. En María fylgdi katólskum sið. Allt þetta var meira en svo að Filippus gæti borið það, og fyrir því varð hann manna fegnastur, er pásin bannfærði Elísabetu, og fól Filippusi á hendur, að vinna England úr villutrúar höndum, og koma því aptur á réttan (katólskan) veg. Það var árið 1588 að Filippus bjóst að vinna England, tækist honum að vinna það, þá voru prótestantar sviptir einni hinni helztu stoð, og Niðurlendingar auðunnir á eptir. Þess vegna lagði konungur allan hug á þetta fyrirtæki og sparaði til þess engan kostnað. Filippus átti yfir miklum flota að ráða, einkum síðan Portúgal sameinaðist Spáni. Þenna flota jók Filippus sem mest hann mátti, og bjó að öllu sem bezt. Síðast í maí-mánuði 1588 lagði þessi mikli floti út frá Lissabon. Herskipin voru samtals 130 með 20,000 manns og 2600 fallbyssum. Slíkan flota höfðu menn aldrei séð, og þótti konungi flotinn svo mikill og fríður, að hann

kallaði hann *«ósigrandi»* (*«den uovervindelige Armada»*). Hertoginn af *Medína Sídónia* hafði yfirstjórn, en þó hann væri hreystimaður og vanur orustum, var hann enginn sjógarður sagður. Þegar flotinn var lagður út, gjörði á veður mikil, og komst hann með illan leik norður með Frakklands ströndum, enda voru Englendingar og Niðurlendingar úti á herskipum sínum, og gerðu Spánverjum alloft mikinn skaða. Loksins komst floti þessi til hafnar við *Calais*, en þar komu Englendingar, og brendu fyrir Spánverjum mörg skip. Svo hafði verið til ætlað, að flotinn skyldi taka um 30 þúsundir manna í Niðurlöndum undir herstjórn *Alexanders Farnese af Parma*, og hleypa því liði á land í Englandi, til þess að ná Lundúnaborg og síðan landinu öllu, en sú fyrirætlun varð að engu, því að Englendingar og Niðurlendingar voru alstaðar fyrir og höfðu hinar frægustu sjóhetjur fyrir skipum sínum, t. a. m. *Franz Drake, Hawkins* og fl. Týndi nú floti Spánverja mjög tölunni, og svo fór, að aðalforingi hans sá sér ófært að leggja nokkurstaðar að Englandi; eigi þorði hann heldur að snúa hina sömu leið heim aptur til Spánar, sem hann var kominn, en í þess stað ræð hann af, að halda norður fyrir England og Skotland, og síðan djúpleið suður og fyrir vestan öll lönd. En er flotinn var kominn norður að Orkneyjum, hrepti hann veður mikið, fórust þá enn mörg skip, og sum bröktust undan til Norvegs. Í leiðángri þessum urðu Spánverjar fyrir ógurlegu tjóni á skipum og mönnum, því að sagt er, að 72 stórskip hafi týnt auk margra smáskipa, og yfir 10 þúsundir manna. Hertoginn komst loksins heim til Spánar með nokkrum skipum og sagði sínar farir eigi sléttar. Filippus varð vel við skaða sinn og sagði: *«eg sendi flota minn móti mönnum, en eigi móti stormi og sjáfarhömrum»*. En aldrei varð Spánn samur og jafn eptir þessar miklu ófarir. Englendingar gjörðust nú miklu áleitnari og nærgöngulli Spánverjum, en áður hafði verið, og létu sér eigi nægja að eyða fyrir þeim mörgum kaupförum, einkum vestur við Ameríku, og spilla verzlun þeirra, heldur herjuðu þeir á Spán sjálfan og tóku þar borgir með sjó fram, og gekk svo um nokkur ár, þangað til friður komst á milli landanna (1604).

Litlu betur gekk Filippusi öðrum, er hann nokkrum árum síðar vasaðist í málum manna á Frakklandi, bæði trúarbragða-

deilum og ríkiserfðum, áður en Hinrik fjórði komst þar til valda. Filippus vildi koma dóttur sinni þar til ríkis (því að hún var dótturdóttir Hinriks annars Frakkakonungs), en fór halloka í viðureign sinni við Hinrik fjórða, og varð loks að semja frið í Vervíns, hið síðasta ár sem hann lifði, og hafði enga sæmd af.

Þegar hér var komið, var Filippus annar rúmlega sjötugur að aldri, og hafði konungur verið 42 ár. Nú var hann þrotinn að heilsu og þreyttur af margskonar andstreymi; en þetta andstreymi hafði hann bakað sér sjálfur. Hann hafði tekið við blómlegu ríki og svo víðlendu, að hann gat með sannni sagt: «að sólin gengi aldrei undir í ríki sínu». Hið spanska einveldi hafði þá mikið orð og álit á sér meðal allra annara þjóða. En þegar Filippus skildi við, þá var alt komið í annað horf; hið mesta óorð var komið á hina spánversku stjórn, því að hún var kunn að undirferli, harðýðgi og trúarofsa; marga af sínum beztu þegnum hafði Filippus látið af lífi taka, margir, sem ríkir höfðu verið, voru snauðir orðnir, og margir flúnir af landi burtu, alt af hans völdum; atvinnuvegir voru lagstir í dá, verzlun komin í hendur annara þjóða; ríkisskuldarnar voru um 140 millíónir «dúkata», og námurnar í Mexíkó og Perú gjörðu eigi betur en gjalda vextina af svo fáheyrðum skuldum í þá daga. Filippus gjörði borgina *Madrid* að aðseturstað Spánarkonunga. Ferdínand og Ísabella höfðu setið í Valladolid. Skamt frá *Madrid* lét Filippus reisa höll þá, er *Eskorial* heitir, og er hún eitthvert hið skrautlegasta stórhýsi á jörðu. Í þeirri höll sat Filippus löngum, og þar andaðist þessi járnharði maður eptir miklar og langar þjáningar 13. sept. 1598.

Eptir Filippus annan kom sonur hans *Filippus þriðji* til ríkis á Spáni (1598—1621). Hann var föður sínum næsta ólíkur um flesta hluti: meinlaus maður og gagnslaus, og lét ráðgjafa sinn, hertogann af *Lerma*, ráða öllu eptir sinni vild. Hertoginn var enginn stjórnvitríngur, og hugsaði mest um að auðga sig og ættmenn sína, hvað sem öðru leið. Árið 1609 fengu klerkarnir konung til að reka alla *Moriskos* burt úr landi, og misti Spánn þannig um 800 þúsundir af hinum þörfustu akuryrkju- og iðnaðarmönnum, og var það landinu óbætanlegur skaði, enda fór nú mörgu aptur, en klerkavaldið stóð með miklum blóma. Þar voru um 1000 klaustur í

landi, og múnkasægurinn óteljandi. En þó má það allmerkilegt virðast, að um þessar mundir voru uppi allmiklir vísindamenn á Spáni, og eru tveir af þeim lángfrægastir: *Cervantes*, sem ritað hefir riddarasögu þá, er nefnist *Don Quixote*, og er í sinni tegund talin óviðjafnanlegt snildarverk. Cervantes var einn af liðsmönnum Don Júans í orustunni við Lepanto, fékk þar þau örkumsl, að hann var einhentur síðan, eptir það var hann handtekinn af Serkjum, og sat í varðhaldi 5 ár, komst þó til Spánar, en lifði þar við fátækt alla æfi og dó 1616. Hinn afbragðsmaðurinn er *Lope de Vega*. Hann var fyrst hermaður og var á flotanum mikla, er vinna átti England, síðan varð hann klerkur. Hann hefir ritað meira en flestir, ef eigi allir aðrir, rithöfundar, er sögur ganga af. Og er svo sagt, að hann hafi ort um 2000 leikrita, og þar að auki mjög margt annað, og flest af hinni mestu snild; menn undrast hið óþrjótanda yrkisefni, sem þetta hið mikla skáld hafði jafnan á reiðum höndum, og dáðst að liðugleik og málfeegurð í kvæðum hans. Hann dó 1635. Því nær samtíða þessum tveimur mönnum, sem nú voru nefndir, lifði *Luis Camoens*, höfuðskáld Portúgalsmanna; hann var lengi í Austindíum, þar orti hann sitt nafnfræga kvæði «*Os Lusíades*» (þ. e. Lúsitanar eða öðru nafni Portúgalsmenn). Kvæði þetta er í 10 bókum eða kviðum, og skýrir frá afreksverkum Portúgalsmanna á Indlandi og frá ýmsu úr fornsögu þeirra. Camoens átti alla æfi mjög erfitt uppdráttar, og dó í Portúgal bláfátækur 1579.

Ítalía. Sixtus páfi hinn 5.

Það er kunnugt af því sem fyr er ritað, að Ítalía hafði um langan aldur verið sundurskipt meðal ýmissra þjóðhöfðingja. Eptir friðargjörðina í Chateau Cambresis (1559)¹, réðu Spánverjar mestu á Ítalíu. Þeir áttu þar, eins og menn vita, hertoga-dæmið Milano, Neapelsríki, Sikiley og Sardiníu, og héldu þeim löndum öllum í harðri ánauð, og hin önnur ríki á Ítalíu þorðu hvorki né gátu fylgt, svo teljandi sè, öðrum stjórnarreglum en Spánarkonungur. En þó að nú stæði friður um mörg ár á Ítalíu, þá var hagur manna og ástand alt þar í landi engan veginn ákjósanlegt. Hinar ítölsku þjóðir höfðu orðið að þola mikið og

1) Sjá bls. 51 hér að framan.

margt ílt af ófriði og ásælni útlendra konunga alt í frá dögum Karls 8. Frakkakonungs, og ekki sízt meðan þeir voru uppi Karl 5. og Franz 1. og börðust um yfirráðin; slíkur ófriður lamaði stórum lífsafl þjóðarinnar. Þar á ofan bættist andlegt ófrelsi með öllum þess ókostum.

Venezía, er áður átti hina blómlegustu verzlun, fékk bana-sárið þegar Ameríka var fundin og sjóleiðin austur til Indlands. Nú var svo komið, að Venezía gat eigi varizt árásum Tyrkja. Þeir náðu ýmsum eyjum í Miðjarðarhafi og ýmsum bæjum og borgum á Grikklandi, sem Venezíumenn höfðu áður átt, og kreptu nú að þeim á allar lundir ár eptir ár.

Þegar Milánó og Venezía eru talin, voru hertogarnir af Savoyen, sem einnig réðu fyrir Piemont, þeir einu, sem teljandi sé að nokkur völd hefðu á Norður-Ítalíu. En ríki þetta var ýmist í höndum Frakka eða Spánarkonungs, meðan þeir Franz 1. og Karl 5. áttust við. Emanúel Filibert (Savoyu-hertogi 1553—1580) nafnkendur meðal hershöfðingja Karls 5. og Filippusar annars, fékk mestan part ríkis síns aptur eptir friðinn í Chateau-Cambresis.

Cosmus af Medici réð fyrir Flórenz og Siena um þessar mundir, og var ríki hans árið 1569 af Píusi páfa hinum 5. gjört að stórhertogadæmi og síðan kallað *Toskana*. Stórhertogar þeir, sem þar réðu fyrir, fylgdu lengi síðum forfedra sinna, og gáfu sig mjög við verzlun, og voru vellauðugir, og því að eins gátu þeir eflt fagar listir svo ríkmannlega eins og þeir einatt gjörðu.

Að páfastóli sátu þeir hver á eptir öðrum *Píus fjórði* (1559—1565), og *Píus fimmti* (1565—1572). Píus fjórði sleit hinu nafnkunna kirkjupingi í Trident. Píus fimmti var harður maður og óvæginn, lét ofsækja prótestanta og bannfærði Elísabetu Englands drotningu. Eptir hann varð páfi *Gregoríus* hinn þrettándi; hann var mýkri maður í lund heldur en Píus, en þó var stjórn hans eigi góð, og stórum efldi hann kristmúnka gegn siðabótamönnum. Hann er nafnkendur fyrir þá sök, að hann lét leiðrétta tímatalið. Menn höfðu fram á hans daga fylgt tímatali því, sem kent hefir verið við Júlíus Cæsar (*Julianske Calender*), og voru eptir þeim reikningi 365 dagar og 6 stundir í árinu. Á kirkjupinginu í *Nicea* (325) var kveðið á, að halda skyldi páska fyrsta sunnudag eptir fyrstu túnglyfllingu eptir vorjafndægur.

Það ár, sem nú var nefnt (325), voru jafndægur 21. dag marz-mánaðar. En þegar aldir liðu fram fundu stjörnufróðir menn, að jafndægrið færðust frá 21. marz, og þokuðust aptur á bak að árs upphafi; þeir fundu, að orsökkin var sú, að sólárið, eða sá tími, sem jörðin þarf til þess að ganga í kring um sólina, er lítið eitt styttri en 365 dagar og 6 stundir, semsè: 365 dagar, 5 stundir, 48 mínútur og 48 sekúndur. Árið 1582 var villa þessi eða mismunur orðinn svo mikill, að munaði 10 dögum, og eptir því urðu jafndægur 11. marz það ár. Sáu menn að svo búið mátti eigi standa, og fyrir því gjörði Gregoríus pá fyrirskipun: 1, að blaupa skyldi yfir þá 10 daga, sem menn voru orðnir á eptir réttu tímatali, og telja (þá þegar um haustið 1582) 15. dag októbr-mánaðar (en eigi 5.) næstan eptir 4. október; og 2, að á hverjum 400 ára mótum skyldi hleypa úr almanakinu 3 dögum, því að á þann hátt gætu vorjafndægur verið óhöggð 21. dag marz-mán. Þetta tímatal er síðan kent við Gregoríus (*Gregorianske Calender*). Katólskir menn fylgdu því þá þegar, en prótestantar á Þýzkalandi eigi fyr en árið 1700, og varð þá, í þess árs almanaki, 1. marz næsti dagur eptir 18. febrúar. Rússar og Grikkir fylgja enn hinu eldra tímatali.

Á dögum Gregoríuss páfa hófst sá ósiður á Ítalíu, er síðan hefir legið þar í landi, að margir af þeim mönnum, er gengið höfðu á mála meðan ófriðaröldin stóð, en nú voru alvinnulausir, lögðust út og gjörðust ránsmenn, og létu greipar sópa um eignir manna, en drápu suma; var að slíku hinn mesti ófögnuður. Urðu stigamenn þessir því skæðari og verri viðureignar sem ýmsir heldri menn, er látið höfðu eignir sínar og óðöl fyrir páfanum, gengu í sveit með þeim og gjörðust foringjar þeirra. Varð af þessu öllu saman hin mesta óöld í landinu, en ríkisstjórnin eptirgángslítill og lín í refsingum: Gregoríus páfi andaðist 1585. Kom þá í hans stað *Sixtus* hinn 5. með því nafni, hinn merkasti maður. Hann var borinn og barnfæddur í þorpi því, er Montaldó heitir, og skírður *Felix*. Faðir hans hét Peretti og var af slafneskum ættstofni; hafði einn af forfeðrum hans flúið fyrir Tyrkjum vestur á Ítalíu og sezt þar að. Peretti var fátækur maður, og varð að koma Felix syni sínum 9 vetra gömlum í vist hjá bónda einum. Þar gætti Felix svína, og liðu svo nokkur ár. Þá bar það til einhverju sinni, að múnkur nokk-

ur, af Fransiskusar reglu, var á ferð og viltist, hittir sveininn Felix og biður hann fylgja sér á rétta leið. Felix gjörir svo, en segir sér leiki mjög hugur á, að komast til góðra manna og geta numið eitthvað fróðlegt. Verður það þá úr, að múnkur þessi tekur hann og kemur honum í klaustur. Það var þá siður, er menn gengu í klaustur, að taka sér nýtt nafn og leggja hitt niður, er þeir áður hétu. Eigi vildi Felix gjöra það, því að honum þótti það nafn gott, er hann hafði. Skamma stund hafði hann verið í klaustrinu áður hann skaraði fram úr öllum þeim, er þar voru, að námsgáfum, og svo var hann kostgæfinn og reglufastur í öllu sem fyrir hann var lagt, að enginn komst til jafns við hann, en mjög var hann vandlátur við aðra og ráðríkur, og þoldu menn honum það allmisjafnt; gjarnt var honum og að gefa sig í kappræður við menn, og gat enginn við hann jafnast í þeirri list. Af öllu þessu varð hann svo óvinsæll í klaustrinu, að hann varð að fara þaðan. Hann var síðan í ýmsum klaustum á Ítalíu; alstaðar þótti hann vera afbragð annara manna að vitsmunum og dugnaði, en mörgum varð kalt í geði til hans sökum vandlætínga hans og drotnunargirni. Hann varð brátt svo nafngetinn, að honum voru falin ýms vandaverk á hendur, og leysti hann þau öll vel af hendi. Þegar Píus 5. settist að stóli, gjörði hann Felix að yfirmanni allra Fransiskusmúnka, litlu síðar veitti hann honum biskupsdæmi og 1570 kardinálstign. Þegar Felix var orðinn kardináli, breytti hann fyrst nafni sínu og nefndi sig *Montaldó*, eptir bæ þeim er hann var borinn í. En úr því hann hafði komizt til þeirrar upphefðar, var allur hans hugur sá, að geta orðið páfi. En til þess að geta orðið það, breytti hann öllu ráði sínu og dagfari. Alt til þess tíma hafði hann verið mjög vandlátur við sjálfan sig og aðra, starfsmaður hinn mesti og ákaflega ráðríkur. Nú þar á móti lét hann sig litlu skipta, hvað aðrir höfðust að, sýndi öllum hið mesta umburðarlyndi og læzt vera mjög heilsutæpur. Eptir að Gregoríus 13. kom til ríkis, breytti Montaldó eigi frá uppteknum hætti, ráðfærði sig einatt við aðra og skoraðist undan ýmsum störfum, sem honum voru á hendur falin. Meðal annars sagði hann þá einhverju sinni, að auk þeirra þriggja heityrða, sem hann hefði giört, hefði hann bætt hinu fjórða við, og væri það: þakklátsemin; með því lét hann skilja á sér, að hann

mundi reyna að endurgjalda þeim er styddu sig, þegar að því kæmi. Það er og mælt, að hann hafi í allri framgöngu sinni verið sem gamalmenni, heilulaus, með sífeldu hóstakjölttri, og einatt talað um það, að hver dagurinn mundi verða sinn síðasti.

Þegar Gregoríus 13. andaðist, voru kardínálar á ýmsum áttum, hvern kjósa skyldi til páfatignar. Menn gátu eigi orðið sammála og komið sér niður á neinum af hinum ríku og ættgöfugu kardínálum, og það þótti þá best fallið að kjósa Montaldó; hann var fátækur í samanburði við flesta hina, hann var heilsulaus og kominn að fótum fram, og allar líkur til, að hver mundi geta farið sínu fram fyrir honum. En þegar búið var að kjósa hann, þá var heilsuleysið horfið, stafprikinu var kastað, sem hann áður hafði stúzt við, og hinn nýkjörni páfi stóð mitt á meðal þeirra, líkur styrkri hetju sem treystir bæði hreysti sinni og hamíngju. Fólkkið horfði á og undraðist, hve tignarlegur páfinn var, er hann gekk meðal kardínálanna til Péturskirkjunnar, og einn af þeim sagði við hann: «að mjög væri hann nú orðinn breyttur frá því sem verið hefði». Sixtus¹ leit við honum og mælti: «meðan eg var kardínáli gekk eg boginn og niðurlútur og leitaði að lyklum himnaríkis á jörðunni, en nú síðan eg fann þá, lít eg upp til himins, því að eg sakna nú einskis framar á jörðunni». Jafnskjótt sem Sixtus var seztur að völdum, varð mönnum það ljóst, að hann vildi einn ráða öllu, og mörgu breyta frá því sem verið hafði á dögum fyrirrennara hans. Það hafði áður verið venja þann dag, er páfar voru krýndir, að kasta peningum út meðal lýðsins; Sixtusi þótti slíkt hinn mesti ósiður, og bauð í þess stað að færa fátækum þá peninga heim í hús þeirra og spítala; eigi lét hann heldur veizhu halda sem áður var títt, og lagði blátt bann fyrir, að nokkur bandíngi væri laus látinn, er í varðhaldi hafði setið frá dögum hinna fyrri páfa. En hvorttveggja hafði þó jafnan verið gjört við hver páfaskipti. Ýmsir óhlutvandar menn, sem lög og landstjórn hafði látið óhegnda, eða eigi getað hönd á fest, gengu sjálfviljugir á vald Sixtusar í von um uppgjöf á sekt sinni, en sú von brást þeim með öllu. Sixtus svaraði: «nægir mönnum eigi að dómendur hafa verið aðgjörðalaansir um undanfarin 13 ár? Hér er eigi um miskun að ræða heldur um réttlæti, og til þess að sýna mönn-

1) Þetta nafn tók Montaldó sér þegar hann varð páfi.

um, að guð hefir sett oss í postullegt sæti til þess að endurgjalda hverjum eptir hans verkum, þá bjóðum vör, að fjórir hinir verstu illræðismenn verði af lífi teknir á krýningardegi vorum. Hann kvaðst mundi ríkt eptir því gánga, að öllum þeim mönnum yrði þúnglega refsað, er skýlt hefðu eða skýla vildu skálkum og illvirkjum. Enda var þess og öll þörf, að hér væri tekið í taumana. Ránsmenn höfðu vaðið að ósekju um landið, siðaspillíng var mikil í Rómaborg; embætti voru seld og keypt, menn og feður létu konur sínar og dætur falar, ef se var í móti boðið, atvinnuskortur og örbyrgð gátu af sér ótal lesti.

Gregoríus 13. hafði allmikið lið í sinni þjónustu og dreifði því víðsvega út um landið, til þess að halda ránsmönnum og öðru illþýði í skefjum; þó kom það alt að litlu haldi, en kostaði ærið fæ. Þegar Sixtus var tekinn við stjórn, lét hann alt það lið fá heimfararleyfi, og fækkaði löggæzlumönnum til helminga. Hann vildi sýna mönnum, að hann ætti mest undir sjálfum sér, en eigi hinum mörgu þjónustusveinum. Eigi vildi hann heldur hafa mörg lög eða margbrotna, en um hitt sá hann, að *lögnum væri rækilega hlýtt*. Ungmenni nokkurt tók einhverju sinni konu eina og hljóp á burt með hana. Frændi þess, er konuna nam, var góðkunníngi Sixtusar og þótti sem auðsótt mundu griðin hjá páfa til handa hinum únga manni; en Sixtus svaraði: «eigi hefi eg enn gleymt vináttu okkarri, en það kemur als eigi til frænda þíns. Viljir þú leita honum líknar, þá bið þú guð að varðveita sálu hans». Litlu síðar var hinn úngi maður festur á gálga fyrir húsdýrum konu þeirrar, er hann rænti. Stundum bar það til, að ýmsir ríkir menn eður annað stórmenni út um landið skaut skjólshúsi yfir ránsmenn og spillvirkja; kæmist Sixtus að slíku, tók hann hallir og eignir slíkra manna, en rak þá sjálfa af landi burt. Það bar til einn dag, að Sixtus var á strætum úti í Rómaborg, og mætti yfirforíngja þeirra manna, er gæta skyldu friðar og góðrar reglu á landsbyggðinni. «Hver ert þú?» mælti páinn. Maðurinn sagði til nafns síns. «Þú lýgur því!» svaraði Sixtus. «Hverníg getur þú átt embætti að gegna úti á landi og verið aðgjörðalaus hér inni á strætum? Leggið hann samstundis í fjötra!» Þegar kveld var komið lét Sixtus kalla þenna mann á sinn fund, og hét að láta

hann lausan og gefa honum upp sakir, ef hann næði 6 stigamönnum, og sendi sér þá áður vika væri liðin. Hinn varð glaður við, fór sem skjótast til sýslu sinnar, og hafði allar klær úti, og fékk handsamað 7 ræninga og sent páfa áður fresturinn var liðinn. Varð Sixtus þá hinn blíðasti og gaf honum góðar gjafir.

«Nýir vendir sópa bezt», segir máltækið, og margir höfðu því hugsað, að Sixtus mundi fara sér hægra þegar frá liði, og ganga þá eigi jafnríkt eptir í öllum greinum eins og fyrst, en þeim brást sú von. Alla þá stund sem hann sat að stóli, var hann sjálfum sér líkur og óþreytandi, og friðaði ríki sitt á svo stuttum tíma að furðu gegndi. Áður en ár var liðið frá því hann settist í völdin, mátti kalla að ræningjar væru allir horfnir í ríki hans. Þegar konungar í næstu löndum við páfaríkið kvörtuðu yfir því, að ránsmenn og alskonar illþýði flyktust inn í sín lönd og hefðust þar ílt eitt að, þá segja menn að Sixtus hafi mælt: «fylgi þeir mínum ráðum, eða fáir þeir mér lönd sín, þá skal eg hreinsa þau af öllum stigamönnum».

Af allri hinni miklu röggsemi Sixtusar páfa og jafnvel hörku, sem hann opt beitti, stóð mörgum hinn mesti ótti, svo það varð að orðtaki manna, þegar einhver sagði eitthvað tvírætt: «Sixtus stýrir!» Þegar úngbörn voru óhlýðin mæðrum sínum, sögðu þær við þau: «nú kemur Sixtus!» þá urðu börnin góð. Sixtus vissi að menn óttuðust hann, og þótti honum það eigi miður. Hann hafði og sína menn úti um ríkið, er sögðu honum flest það er gjörðist. Hann lét og hegna mörgum glæpamönnum fyrir illverk þau, er þeir höfðu unnið löngu áður en hann kom til ríkis. Því var það, að einn morgun í Rómaborg sáu menn, að líkneskja Péturs postula, er þar stóð á torgi einu, var komin í fót og búin sem til brottferðar. Þar gagnvart stóð líkneskja Páls postula, og í munni hennar var seðill með þeirri spurningu: hvort Pétur ætlaði að fara úr borginni? «já, var svarið, til þess að komast úr höndum Sixtusar, áður en hann lætur höfða sök á hendur mér fyrir eyrað, sem eg hjó forðum af manninum í Getsemane».

Þó Sixtus þætti ærið harður og refsingasamur, þá urðu menn að játa, að hann var stórvitur maður, og bar hina mestu umhyggju fyrir framförum og velliðan þegna sinna; hann var hinn mesti bjargvættur allra íþróttamanna, als iðnaðar og bú-

sýslu. Þegar óáran var í landi og harðrètti milli manna, lét hann snauða menn fá korn sem þeir við þurftu úr forðabúrum sínum. Silkivefnaður og ullarvinna var að mestu leiti horfin og hætt í ríkinu þegar Sixtus tók við stjórn; hann kom hvoru-
tveggju aptur á fót, með því að setja atvinnulausa menn og iðju-
leysingja til þeirra starfa. Og þegar hann frétti, að fjöldi kaup-
manna ætti þröngt í búi fyrir því, að aðalsmenn voru í stór-
skuldum við þá, en guldu þeim ílt eitt í staðinn, og jafnvel
lömdu á þeim, ef þeir kröfðust fjárins, þá bauð hann kaup-
mönnum eitt sinn, að þeir skyldu senda sér allar skuldabækur
sínar. En jafnskjótt sem aðalsmenn heyrðu það, hröðuðu þeir
sér hver sem betur gat, og greiddu kaupmönnum alt það þeir
voru þeim um skyldir, því að það vildu þeir sízt af öllu, að
Sixtus færi að krefja sig um skuldir. Af þessu fékk páfinn hið
mesta lof. Það þótti og fagurt í fari hans, að hann gleymdi
engum þeirra, er verið höfðu honum vel áður hann komst til
upphesðar og valda; öllum þeim veitti hann ríkuglega umbun.

Sixtus lét sér mjög ant um, að efla og prýða Rómaborg. Hann lét reisa þar mörg hús af nýju; gaf út ýms lög, er mið-
uðu til að auka þrifnað og hreinlæti í borginni og bæta heilsu-
far manna; hann lét veita vatni um 30 mílur vegar utan úr
landi og leiða um ræsi inn í borgina; var það hið mesta þrek-
virki og hin þarfasta bæarbót; hann jók og prýddi páfagarðinn
stórum; hann lét og setja húfuna (*Kuppel*) miklu á Péturskirkj-
una í Rómaborg, og flytja steinsúlu (*Obelisk*) þá hina miklu, —
er Kaligúla keisari forðum hafði látið sækja til Egyptalands, en
um margar aldir legið í hirðuleysi í Rómaborg — fram á torgið
fyrir framan Péturskirkju og reisa hana þar upp, sem hún nú
stendur. Súla þessi er um 150 feta á hæð, og svo þúng, að
undrum gegnir að mannlegt afl hafi orkað að færa hana úr stað.
Það er sagt að Sixtus hefði 800 manns og 150 hesta til þess
að flytja súlu þessa.

Þegar Sixtus tók við stjórn, voru allar fjárhirzlar ríkisins
tómar. Á stuttum tíma hafði hann safnað ærnu fé, og hafði
hann til þess mörg ráð, en, ef til vill, eigi öll sem bezt. Að
vísu var hann hinn mesti hófs- og sparnaðarmaður, og fyrir-
hyggjan framúrskarandi, en hann seldi líka embætti eins og aðrir
páfar höfðu gjört, og safnaðist ríkinu þannig mikill auður.

Það ræður að líkindum, að slíkt mikilmenni sem Sixtus hafði, að því er unt var, haldið við hefð valdi og virðingu páfadómsins, enda skarst hann mjög í þjóðmálefni sína samtímismanna. Þess vegna studdi hann með fyrsta Filippus annan Spánverjakonung gegn Elísabetu Englandsdrotningu, og bannfærði hana; en þegar Sixtus þóttist sjá fyrir, að Filippus mundi einn vilja öllu ráða, og einungis hafa gagn af páfanum eins og verkfæri í sinni hendi, þá tók vináttan að kólna milli þeirra, og var þá eigi trútt um, að páfinn legði tálsnörur fyrir konung, og kæmi honum í enn meiri vafninga við Engla og Frakka en áður var. Það segja menn, að Sixtus hafi haft allan hug á að minnast á fornar kröfur og ná Neapelsríki undan Spánverjum, þegar Filippus konungur félli frá, en það átti eigi að auðnast. Sixtus dó á ofanverðu ári 1590, eptir 5 ára ríkisstjórn, og er það sögn sumra manna, að Filippus annar hafi stýtt honum aldur, og látið gefa honum eitur. Ráðið rómverska hafði látið reisa súlu til virðingar við Sixtus páfa og þar á mynd hans kostuglega gjörða. Jafnskjótt sem Sixtus var liðinn, reif lýðurinn í Rómaborg þann minnisvarða niður til grunna. Þannig mintist hin rómverska alþýða einhvers hins mesta manns, er setið hafði að páfastóli.

Viðureign Filippusar annars og Niðurlendínga.

Þess er áður getið¹ hvernig það atvikaðist, að *Niðurlöndin* komust í hendur Habsborgarmönnum undir endalok fimtándu aldar. Karl keisari hinn 5. var einn af þeim ættmönnum, og ræð bæði fyrir Spáni og Niðurlöndum, sem fyr er ritað. Þó er það eigi þannig að skilja, að Niðurlendíngar væru í nokkru háðir Spánverjum; hvortveggja þjóðin hafði að eins einn og hinn sama konung yfir sér (*personal Union*). Niðurlöndin greindust í 17 fylki. Hvert fylki var sjálfu sér ráðandi. Án þess fylkja-stjórnin leyfði, gat landshöfðinginn (Spánverjakonungur) hvorki lagt skatta á landið, eða sent þangað útlent herlið, eða komið þar útlendum mönnum til valda. Frelsi og friður hafði náð bólfestu á Niðurlöndum, og í skjóli þeirra þróaðist verzlun og iðnaður, vísindi og fagrar listir; þjóðin var í miklum uppgangi. Calvíns trú (*reformeraða trúin*) hafði náð þar fótfestu í hinum norðlægu fylkjum, einkum meðal bænda og borgalýðsins, og

1) Miðaldasagan bls. 186.

landsfólkinu geðjaðist vel að hinum nýja sið. Karl keisari var enginn vinur siðabótanna, eins og fyr er sagt, og varð þeim að vísu allsárbeittur, er hinn nýja sið tóku, en þó fór hann að öllu með gætni, og hlífðist við að brjóta lög á mönnum, því að honum var gott í þeli til Niðurlendinga, og þeim til hans.

En það skipti fljótt um, er Filippus annar, sonur Karls, settist að völdum. Hann var *alspánskur* í buga og hjarta, og Niðurlendingar urðu þess skjótt varir, að hann setti þá skör lægra en Spánverja, og vildi í öllu fara með þá eins og skattlendinga. Hann setti spánska menn til hinna æztu valda í Niðurlöndum beint á móti lögum þeirra. Og þó þeim þætti Karl verið hafa harður við siðabótamenn, þá komst sú harka í engan samjöfnuð við þá, sem Filippus beitti, því að Filippus ofsótti alla siðabótamenn með báli og brandi. Áður hann fór frá Niðurlöndum 1559, setti hann hálsystur sína, *Margrètu*¹ af Parma þar til landstjórnar, og fékk henni nokkra menn til ráðaneytis, en æztur þeirra ráðgjafa var sá maður, er *Granvella* het; hann var biskup, útlendur maður, harður og slægvitur, og þótti hann þar öllu spilla. Filippus lét og eptir í Niðurlöndum 4000 spánskra hermanna, til þess að styrkja stjórn sína; það var útlendur her, og fyrir því var það lagabrot. Enn fremur setti Filippus, að páfans ráði, 14 biskupsstóla katólska í Niðurlöndum, en Granvella var gjörður að erkibiskupi; síðan skipaði konungur ransóknarmenn og ransóknarnefnd í landinu, til þess að útrýma algjörlega hinum nýja sið. Varð nú af þessu öllu saman hinn mesti kurr meðal landsmanna, hverrar trúar sem þeir voru. Menntu kendu Granvella um allan þann ójöfnuð, og alt það ofríki, er nú dundi yfir, en-hins vegar byggðu menn allar vonir sínar á þessum þremur mönnum: *Vilhjálm*², prinzi af Nassau-Oranía, og greifunum *Egmont* og *Horn*. Vilhjálmur prinzi hafði alizt upp við hirð Karls fimmta, og verið í engu minni kærleikum

1) Margrèt var óskilgetin dóttir Karls keisara, og gípt sonarsyni Páls páfa hins þriðja. Frá henni er Farnese-ættin komin, er ræð fyrir hertogadæminu Parma á Ítalíu. Karlleggur þeirrar ættar var aldaða 1731.

2) Hann var kominn af höfðingjaætt þeirri, er ræð fyrir Nassau á Þýskalandi, og hann átti fylki eitt á Suður-Frakklandi, er hét Orange (Oranía).

við keisarann en Filippus sjálfur sonur hans. Vilhjálmur var stórvitur maður og allra manna þrautbeztur, stiltur vel og fámálugur. Hann var kallaður hinn þögli. Hann fylgdi trú prótestanta, og var svarinn óvinur als andlegs ófrelsis. Filippus annar bældi frelsið niður, hvar sem hann gat því við komið. Það þarf því eigi að undra, þó þessum tveimur mönnum lenti saman, og að viðureign þeirra yrði bæði löng og hörð. Egmont og Horn voru hinir mestu ágætismenn, þótt eigi væru þeir Vilhjálms makar; einkum var Egmont frægur af sigri þeim, er hann vann á Frökkum við Gravelines (1558), eins og fyr er ritað (sjá bls. 51). Horn var admirall og hafði yfirstjórn herskipaflotans. Nú var Egmont landstjóri í Flandern, er hér var komið, en Vilhjálmur hafði landstjórn á hendi í Hollandi, Zeelandi og Útrekt.

Þegar þeir Vilhjálmur, Egmont og Horn sáu hvað verða vildi, að öllu þjóðfrelsi Niðurlandanna var háski búinn, hættu þeir komum sínum í ríkisráðið, og rituðu Margrētu konúngssystur bréf, og kváðust eigi vilja sitja í ráðinu sem einberir skuggar. Margrētu leizt eigi á blikuna, þótti enda nóg um ráðríki og uppgang Granvelli, og beiddi Filippus konúng bróður sinn, að kveðja ráðgjafann heim aptur til Spánar, og gjörði Filippus það um síðir (1564). En þó svo væri, urðu þeir helzt of margir eptir við hirð Margrétar, er fylgdu fram uppteknum hætti Granvelli: siðabótarmenn sættu ofsóknum, aðalsmönnum sumum hélzt uppi ein eður önnur ósvinna, svo lögin gengu eigi jafnt yfir alla, og óánægjan var megn. Eptir ráðum Vilhjálms sendi Margrét Egmont greifa suður á Spán, til þess að beiðast réttingar á málum manna, en einkum til þess, að vægt yrði til í ýmsu við siðabótamenn, og hætt hinum grimmustu ofsóknum gegn þeim. Filippus konúngur svaraði því máli svo: að fyr vildi hann láta líf sitt þúsundsinnu, en slaka til hið minsta í trúarbragðæfnum. Hann bauð og að fylgja skyldi fastlega öllum þeim reglum, er þingið í Trident hafði þá sett fyrir skemmstu. Egmont sneri heim við svo búíð. Ófrelsi og ofsóknir fóru vaxandi á Niðurlöndum; ótti og harmur fyllti hugi manna. Margir hinir helztu og huguðustu af höfðingjum Niðurlendinga, hvort sem þeir fylgdu katólskri trú eða ekki, gjörðu nú samtök sín í millum og unnu eiða að því (1565), að þeir skyldu verja fjör og frelsi

ættjarðar sinnar og þjóðar gegn ransóknarnefndinni (*Inkvisitionen*) og ofsóknum hennar, og á næsta vori (1566) fóru þeir fjölmennir til Brussel, höfuðborgarinnar, þar sem Margrèt sat, og var *Hinrik* greið af *Brederode* fyrir þeim. Þeir færðu Margrétu bænarskrá þess efnis, að lögin um ofsóknir gegn siðabótarmönnum yrðu numin úr gildi. Margrétu varð hverft við komu þeirra og gaf þeim tvíræð svör, en einn af ráðgjöfum hennar sagði, að ekkert væri að óttast, það væru einungis nokkrir ölmusumenn (*Gueux, Geuser, Góisar*). Tóku bandamenn sér síðan það kenníngarnafn, og þótti lengi eptir það sæmdarnafn á Niðurlöndum.

Meðan þessu fór fram fjölguðu siðabótamenn drjúgum í landinu. Útlendir klerkar komu þángað og fluttu kenníngar sínar fyrir landsmönnum, hvar sem því varð við komið, úti á torgum og strætum, jafnvel á víðum völlum utanborga. Dag af degi óx óvildin gegn páfadómi, lýðurinn ætist, og hér fór sem optar, að menn gættu eigi stillíngar og hófs. Þeir réðust fyrst á krossa og heilög tákn katólskra manna, þar sem þau stóðu við þjóvegi um landið, og brutu þau, síðan fóru menn í þorp-in og loksins í borgir, og spilltu og eyddu kapellum, klaustrum og kirkjum og ýmsum dýrum dómum. Það er mælt, að á 3 dögum hafi þá verið brotin 400 kirkna.

Margrétu þótti nú vandast málið og gjörði samníng við bandamenn þá, sem áður eru nefndir, hét að gefa mönnum upp sakir, og slaka til í ýmsu frá því, sem verið hefði. En Filippus konúngur var als annars hugar. Hann safnaði liði, setti her-togann af *Alba*, hinn grimmasta mann, yfir það lið og sendi til Niðurlanda. Þegar Niðurlendingar heyrðu að hans væri von, bjuggust þeir við öllu illu; gátu þó eigi orðið á eitt sáttir, svo að margir tóku það þá til bragðs, að flýja af landi burt, og er sagt að tala þeirra hafi numið 100 þúsundum manna. Vilhjálmur af Óraníu fór til Þýzkalands, en Egmont og Horn urðu eptir. Alba kom til Niðurlanda með herinn á áliðnu sumri 1567, en Margrèt lagði skömmu síðar niður völdin, og réð Alba þar nú einn öllu og tók þegar til óspiltra mála. Eitt hið fyrsta sem Alba gjörði var að kveðja menn í dóm til þess að prófa mál allra þeirra manna, er ransóknarnefndin hafði grunaða, einkum í trúarbragðaesnum. Þessi dómur hét uppblaupsmannadómur, en Niðurlendingar kölluðu hann *blóðdóm*, og svo var hann rétt

nefndur. Um það leyti fékk Alba á sinn fund greifana Egmont og Horn. Hann þóttist þurfa að ráðfæra sig við þá um ýms vandamál; en jafnskjótt sem þeir komu greifarnir, var þeim varpað í dýflissu, og síðan voru þeir báðir dæmdir til dauða og teknir af lífi. Þetta hafði Vilhjálmur séð fyrir, og þess vegna farið af landi burt. En þegar nú þjóðin þannig var svipt þremur sínum helztu forvígismönnum, þá tók Alba fyrst algjörlega að sýna Niðurlendingum í tvo heimana. Nú gekk eigi á öðru en ofsóknum, stefnum, dómum og dauða. Aldrei kom sá dagur, að eigi væru margir menn brendir, hengdir eða hálshöggdir, og allar eigur þeirra gjörðar upptækar. Það var jafnvel dauðasök, að beiðast vægðar á ofsóknum og ransóknardómum, eða hlýða á ræðu, er prestar prótestanta fluttu. Svo hefir Alba sagt sjálfur, að hann lèti boddulinn taka 18 þúsundir manna af lífi þau ár, sem hann var í Niðurlöndum, og þóttist meiri maður eptir en áður; enda fékk hann virðulegar gjafir af páfanum, Píusi hinum 5., svo sem forvígismaður katólsku trúarinnar. Eignir manna og óðöl, sem Alba gjörði upptækar á ári hverju, lagði hann sjálfur til jafns við 500 þúsundir »dúkata«. Undir þessum ókjörum máttu Niðurlöndin búa, og þar er als enginn efi á, að þau hefðu skjótt örmagnast og beygt sig undir harðstjórn Filippusar, ef bjargvættur þeirra hefði eigi lifað, og verið slíkt mikilmenni sem hann reyndist. Vilhjálmur af Oraníu var að vísu farinn af landi burt, eins og fyr er ritað, en hann var eigi aðgjörðalaus. Hann lagði jafnan ráðin á, hvað gjöra skyldi í Niðurlöndum, til þess að verjast kúgun Spánverja; hann hafði sína sendisveina í öllum áttum, jafnvel í Róm og við hirð Filippusar á Spáni, og vissi þannig hvað gjörðist; alstaðar reyndi hann að tesja fyrir og eyða framkvæmdum Filippusar og ransóknarnefndarinnar; hann komst einatt yfir bréf konungs; fékk telda frá honum trúnaðarmenn hans með fægjöfum; gjörði svik hans og undirferli og leyndarmál opinber. Að öllu þessu fór hann með hinni mestu hægð og spekt, eins og hann kæmi hvergi nærri. Hann fékk *Loðvík af Nassau*, bróður sinn, til að taka að sér herstjórn og ráðast á katólska menn í Niðurlöndum, og sjálfur kom Vilhjálmur þangað með sveitir manna, er hann hafði dregið að sér á Þýzkalandi. Varð þeim með fyrsta lítið framgengt, og fór Loðvík halloka fyrir Alba, er bæði hafði meira og röskara

lið, en síðan unnu þeir Loðvík meira á. Í annan stað kom Vilhjálmur því til leiðar, að fjöldi manna, er farið höfðu landflóttu af Niðurlöndum fyrir Alba, lögðust út á herskipum sem víkingar, og tóku kaupför Spánverja, og gjörðu verzlun þeirra og atvinnu hinn mesta skaða. Víkinga þessa kölluðu menn „*hafgöjsa* (*Havgeuser*). Urðu þeir Spánverjum á marga vegu hinir skæðustu og eldust að skipum og liði; loks náðu þeir sjáfarborg þeirri, er *Briel* heitir, og gjörðu þar sterkar varnir; gengu þá ýmsar borgir á Hollandi og í norðurfylkjum landsins í félag með þeim, og gátu Spánverjar eigi við gjört. Allar þessar borgir lutu Vilhjálmi. Kom hann nú aptur til Niðurlanda, og á þingi einu í *Dortrecht* (1572) var hann tekinn til landstjóra í þeim þremur fylkjum: *Hollandi*, *Zeelandi* og *Útrekt*. Það voru fyrstu tildrög til ríkis þess, er seinna var nefnt *hin sameinuðu Niðurlönd*, eða *Holland*, eptir helzta og auðugasta fylkinu. Ári síðar (1573) lagði Alba niður völdin eptir boði Filippusar og fór burt af Niðurlöndum; hafði Vilhjálmur komið því til leiðar sem öðru.

Þegar Alba var farinn setti Filippus þann til landstjórnar í Niðurlöndum, er *Requesens* hét. Hann hafði verið landstjóri í *Mílanó*, og var sagður vitur maður og dugandi hershöfðingi og miklu mýkri í lund en Alba, enda hafði honum jafnan þótt Alba beita ofmikilli hörku við Niðurlendínga. Nú ætlaði *Requesens* að vinna það með góðu, sem Alba gat eigi með illu, en sú góðmenska kom um seinan. Niðurlendíngum var orðið svo gramt í geði við Filippus og Spánverja, að þeir tráðu engu orði sem úr þeirri átt kom; ófriður stóð því enn sem fyr með mönnum. *Requesens* vann að vísu sigur á Vilhjálms mönnum (1574) í orustunni á *Mokerheiði* skamt frá *Nímvegen*, og féllu þá tveir af bræðrum Vilhjálms, en Spánverjum varð lítið gagn að þeim sigri. Því næst settust þeir um borg þá, er *Leyden* heitir, og höfðu mikið lið. Borgarmenn vörðust bæði vel og lengi; varnir og vistir voru að þrotum komnar, um 6000 manna voru dauðir af sulti og seyru, þó vildu borgarmenn eigi gefast upp. Þá gaf Vilhjálmur það ráð, að brjóta skyldi skörð í flóðgarða þá hina miklu, er Niðurlendíngar hafa fyrir öndverðu sett landi sínu til varnar móti sjáfar- og vatnaflóðum. Svo var gjört; vatnið streymdi inn yfir akra og aldingarða; Spánverjum hélt við druknun og flýðu sem fætur toguðu, og urðu að hætta við

svo búld. Fyrir þessa ágætu vörn fékk Leyden þá sæmd, að þar var árið eptir settur háskóli, sem þar er enn, og varð mjög nafnfrægur. Er það eitt til marks um það, að Niðurlendingar vildu eigi slíta trygðir við Filippus konung sinn að raunarlausu, að öll þau skjöl og skilríki, er snertu stofnsetningu háskóla þessa, voru samin og sett í konungs nafni. En Reqvesens hélt fram ófriðnum af miklu kappi, og krepti mjög að landsmönnum. Lagði Vilhjálmur það þá til (1575), að menn skyldu segjast undan hlýðni og hollustu við Spánverjakonung, og bjóða öðrum konungum sína þjónustu. En hvorki Englendingar nè Frakkar vildu taka við Niðurlöndum. Meðan á þessu stóð dó Reqvesens á öndverðu ári 1576 en, þángað til nýr landstjóri yrði settur af konungi, gætti ríkisráðið allra stjórnarmálefna og fór þá alt í ólestri. Ráðherrarnir urðu eigi vel ásáttir, herliðið vantaði mála, og reis af því bæði agaleysi og óspektir. Þá var það, að spánverskir hermenn ræðust á ýmsar borgir, helzt þær sem auðugar voru, t. d. *Mastrikt* og *Antwerpen*, og drápu þar fjölda manna og ræntu þaðan stórmiklu fè. Leiddi það til þess, að Vilhjálmur fékk öll fylki í Niðurlöndum, bæði hin *syðri* (*Belgi* eða *Vallóna*), er fylgdu katólskum sið, og hin *nyrðri* (*Batavia* eða *Holland*, *Zeeland* o. s. fl.) er fylgdu prótestanta sið, til þess að bindast í eitt félag og verja réttindi sín. Þessi samtök gjörðust 1576 í borg þeirri, er *Gent* heitir (*Pacification i Gent*). Alt til þessa höfðu Niðurlandamenn mestmegnis barizt fyrir trú sinni, en eptir þessi samtök fékk uppreisn þeirra annan blæ á sig; nú var barizt fyrir lands- og þjóðrættindum, og nú tóku katólskir menn fullan þátt í ófriðnum gegn Spánverjum, eins og Lúthers-eða Calvinstrúar menn.

Þegar hér var komið sendi Filippus hálfbróður sinn, *Don Júan af Austurríki*, til Niðurlanda, og setur hann þar til landstjórnar. Don Júan var fullhugi mikill og hinn framgjarnasti, og frægur mjög af herferðum sínum og sigri á Tyrkjum við Lepantó. Hugðu Spánverjar gott til framkvæmda af hans hálfu, en það ræðst nokkuð á annan veg. Don Júan hafði lengi haft hugfast, að eignast ríki og verða einvaldur yfir; fyrst vildi hann koma fótum undir ríki eitt á Norðurafríku, en Filippus konungur vildi það eigi, og fórst það þá fyrir; þar næst kom honum til hugar, að leysa Maríu Stúart úr varðhaldi, kvongast henni og

vinna bæði Skotland og England, og að þeirri fyrirætlan styrkti bæði páfinn í Róm og Guisarnir á Frakklandi. En sem Filippusi komu njósnir af þessu áformi bróður síns, mislíkaði honum það stórlega. Það var fjærri hans skapi, að Don Júan kæmist til slíkrar upphéðar. Filippus vildi hafa hann sem aðra, einungis að vopni eða verkfæri í sinni hendi, og ekki til annars eða meira. Filippus beitti þess vegna, sem hann var vanur, undirferli og svikum gegn hugrekki og ákefð bróður síns; lét hann vanta fê og liðsafla heiman af Spáni, og gjörði honum alt til skapraunar. Don Júan sýndi í ýmsum viðskiptum við Niðurlendinga bæði vit og hreysti, en er minst varði sýktist hann og dó (1578) rúmlega þrítugur, af sorg og gremju, að því sem sagt er.

Áður en Don Júan lézt, hafði hann æskt þess, að *Alexander Farnese*, frændi hans, og sonur Margrétar þeirrar, sem fyr er nefnd, yrði eptirmaður sinn í landstjórn á Niðurlöndum. Svo varð og. Tók Alexander Farnesi þar við stjórn 1578, og varð hann Niðurlendingum hinn hættulegasti mótstöðumaður, því að bæði var hann afbragðs hershöfðingi og hinn slægvittrasti maður. Alexander sá þegar, að hin sundurskiptu trúarbrögð, suður og norður í landinu, ollu ágreiningi og sundurþykkju milli hinna norðlægu og suðlægu fylkna. Þessa sundurþykkju notaði hann með mikilli kænsku, og gjörði hvað hann kunni til þess að ala og æsa trúarofsa katólskra manna í suður fylkjunum, og vekja óbeit aðalsmanna þar í landi gegn Vilhjálmi og öllum hans yfirráðum. Það segja menn, að Alexander Farnesi hefði langt komið að ná aptur öllum Niðurlöndum undir yfirráð Filippusar, ef konungur hefði látið sefast og lægt hatur sitt og ofsóknir móti prótestöntum. En þess var engi kostur. Alexander kom því til leiðar, að nokkur af suðurfylkjunum gjörðu samband sín í millum (1579) til þess að vernda katólska trú, og það kom Vilhjálmi til þess, að sameina fyrir fult og fast hin norðlægu fylki (þar sem siðabótin hafði náð fótfestu), *Holland, Zeeland, Útrekt, Gröningen, Frísland* og *Overysse*. Var sá samningur gjörður í Útrekt 1579, og telja menn hann sem grundvöll að bandaríki Niðurlanda. Fulltrúapíng (*Generalstaterne*) þessa hins nýja bandaríkis tókst landsstjórnina á hendur, og sýndi þannig í verki, að þjóðin viðurkendi eigi konungdóm Filippusar. Þetta þótti hon-

um allótrúlegt; hann hafði reyndar búizt við, að óeirðirnar í Niðurlöndum gætu staðið lengur eða skemur, en við hinu var hann eigi búinn, að þau mundu nokkurn tíma dírfast að neita „guðdómlegum yfirráðum“ konungdómsins. Honum hafði lengi staðið stuggur af Vilhjálmi, en nú fyrst fékk hann geig af honum, eptir 20 ára viðskipti. Hann tók það nú til bragðs, að bjóða Vilhjálmi góð boð. Vilbjálmur hafði eytt öllum sínum eigum í þarfir fósturjarðar sinnar, og var kominn í stórskuldir; sonur hans var búinn að sitja um 13 ár í varðhaldi suður á Spáni. Filippus bauð að gjalda fyrir hann allar hans skuldir, og láta hann fá allar jarðeignir sínar aptur, og sleppa syni hans úr varðhaldi og setja til valda á Hollandi. En Vilbjálmur vildi fyrir engan mun skiljast við Niðurlöndin, hann vildi verja þau gegn andlegu og líkamlegu ófrélsi og sjá þeim borgið úr klóm hins gamla dreka í Eskúrial; þess vegna vildi hann engum þeim kostum taka, er Filippus konungur bauð. Þegar þetta brást lagði Filippus 30,000 krónudala til höfuðs Vilhjálmi, og þá fyrst var það (1580), að þing bandaríkjanna á Niðurlöndum lýsti yfir því hátiðlega, að Filippus væri settur frá öllum yfirráðum þar í landi, en bandaríkin sjálfum sér ráðandi og með öllu óháð útlendri stjórn.

Þegar hér var komið, hefði Vilhjálmi veitt allhægt að gjörast konungur eptir Filippus annan í fylkjum þeim, er frá honum voru horfin, en það kom Vilhjálmi als eigi til hugar. Það sem hann vann, það vann hann ættjörð sinni og þjóð, og þess vegna studdi hann að því af alefli, að hertoginn af *Anjou*, frakkneskur prinz, var kjörinn til landstjórnar. Vilbjálmur var svo framsýnn, að hann sá, að slíkt mundi ala óvild milli Frakka og Spánverja, en sú óvild var Niðurlöndum einmitt til hagnaðar; tækist hann þar á móti sjálfur hin æztu völd á hendur, þá máttu aðrar þjóðir ætla, að hann hefði unnið mest fyrir sjálfan sig, og þá var velvild þeirra og hlutdeild í málefnum Niðurlanda á förum. En þóttannar hefði í orði kveðnu hin æztu völd í bandafylkjunum, þá lá eigi Vilbjálmur á liði sínu fyrir það; ráð og framkvæmdir allar voru honum að þakka eptir sem áður.

Alexander Farnese varð vel framgengt suður í landi, og vann þar nokkur fylki, en Vilbjálmur bjóst sem best um í norðurfylkunum. Svo fór, að mönnum þótti hertoginn af *Anjou* til einsk-

is nýtur nema til þess að seilast eptir auði og veldi. Á þingi bandafylkjanna 1582 var því Vilhjálmi fengin í hendur öll hin sömu yfirráð, yfir lýð og landi, sem Filippus annar hafði haft, og nefndur Vilhjálmur hinn fyrsti. Hertoginn af Ánjou fór síðan af landi burt. Eins og áður er sagt, hafði Filippus annar lagt stórfé til höfuðs Vilhjálmi. Fyrir því urðu margir til að sitja um líf hans; einn þeirra veitti honum mikinn áverka á öndverðu ári 1582, en Vilhjálmur varð þó græddur af því sári. Tveim árum síðar tókst loksins manni þeim, er *Baltazar Gerard* hét, að myrða Vilhjálmi. Sá maður var frakkneskur að ætt og uppruna, en gekst fyrir fé því, er Filippus hafði heitið þeim, er yrði banamaður Vilhjálms; enda höfðu tveir múnkar eggjað hann til þessa verks, og Alexander Farnese verið því samþykkur. Vilhjálmur var staddur í borg þeirri, er *Delft* heitir. Þangað kom maður þessi og sat um hann, og bar á sér tvær pistólur blaðnar. Einn dag (7. júlímán. 1584), er Vilhjálmur gekk frá borðum, stóð þessi maður þar fyrir dyrum úti og sendi Vilhjálmi skotið í því er hann gekk út úr dyrunum. Skotið gekk gegnum Vilhjálmi. Hann mælti þetta er hann féll: „guð hjálpi mér og mínum fátæka lýð!“ Þá var Vilhjálmur 52 ára, er hann var veginn. Flestum ber saman um, að hann hafi verið einhver hinn merkilegasti maður allra þeirra, er honum voru samtíða, og að trauðlega muni finnst staðfastari maður eða þrekmeiri en hann var. Vilhjálmur var fjórvæntur, og hét ein af konum hans *Anna*, dóttir *Móriz* kjörfursta af Saksen; þeirra son var *Móriz*, er enn mun getið. Hin fjórða og síðasta kona Vilhjálms hét *Lovísa*, dóttir *Colignýs* aðmiráls af Frakklandi, hins ágætasta manns. Þeirra son var *Friðrik Hinrik*, og segir síðar frá honum. Hollendingurinn *van Lennep* hefir lýst Vilhjálmi á þessa leið: „Hann ólst upp við hirð og í herbúðum Karls fimmta og varð snemma vel að sér í stjórnvísi og hernaðaríprótt. Enginn var hans jafnangi í þeirri list, að dylja áform sín og hugsanir fyrir öðrum, og þess vegna var hann kallaður *hinn þögli*. Þó mega menn eigi halda, að hann hafi verið fámálugur í þeim skilningi að leiðindi væru að; það var öðru nær: hann var skemtinn og fjörugur í viðræðum og viðmóti, og einkum höfðu konur miklar mætur á honum, enda var maðurinn friður sínum, hermannlegur mjög, og hinn háttprúðasti. Í því var snild hans

fólginn, að öllum fanst hann vera ódulur og bersögull í sömu andránni sem hann alveg daldi þá þess, er honum bjó þá ríkast í skapi, en fékk þá til að segja sér sín trúnaðarmál. Minni hans var dæmafátt — sem margra í þeirri ætt — ekki einungis til þess að muna hluti og viðburði, heldr einnig menn og staði. Hann var vel máli farinn, og var einatt gjörður góður rómur að orðum hans, ekki af því, að hann beitti sérlegri orðgnótt eða skrautyrðum, heldur af hinu, að ræður hans voru jafnan efnisríkar og kjarkurinn mikill í málinu. Fáir þjóðhöfðingjar hafa jafnast við hann að vitsmunum og hyggindum, og því færri að ástsæld og starfsemi. Hann var að vísu eigi fraskilinn mannlegum breiskleika, og framán af æfinni eigi laus við slægð í stjórnarathöfn sinni, en eptir því sem hann reyndist, varð hugurinn hreinni, og á fullorðinsárum sínum var hann réttnefnd fyrirmynd annara í þolinmæði, umburðarlyndi og kristilegu lítilæti.

Vilhjálmur var nú dáinn, en hugur hans lifði hjá þjóðinni, og hafði tekið sér þar bólfestu. Um þessar mundir var landið í miklum vanda eins og að líkindum ræður. Alexander Farnese hafði lagt undir sig suðurfylkin — sem nú tilsamans heita Belgía —; hann hafði 18 þúsundir einvalaliðs, og vofði á hverri stundu yfir norðurfylkjunum. Þau höfðu þar í móti um 5000 vígra manna, og engan fyrirliða; í sumum þeim fylkjum var sundurþykkja með mönnum og jafnvel flokkadrættir; í sumum var hin mesta örbyrgð og volæði, því að óvinir höfðu ruplað þar og rænt. Frá þeim fylkjum var því lítillar liðveizlu að vænta; allur kostnaður og útgjöld lögðust þannig á Holland og Zeeland. En Vilhjátmur hafði þar vel um búið meðan til vanst; hann hafði komið þar fótum undir blómlega verzlun, er færði landinu mikinn auð. En það rættist hér sem optar, að «þegar neyðin er stærst, þá er hjálpin næst». Menn gjörðust sáttir og sammála í norðurfylkjunum; þjóðþingi þeirra kaus nefnd manna, eða ríkisráð, til að stýra þeim 7 fylkjum: Brabant, Flandern, Hollandi, Zeelandi, Útrekt, Mecheln og Fríslandi, og setti Móriz son Vilhjálms til forseta í ráðinu. Hann var þá 17 vetra og til læríngar í háskólanum í Leyden. Hann varð því að hætta náminu og taka til annara starfa. Að vísu var hann eigi þá þegar vaxinn því, að mæta viturleika Alexanders Farnese og vél-

um Filippusar annars, þó hann yrði það seinna; en nú lét forsjónin önnur atvik bera að hendi, sem stöðvuðu um hríð yfirgáng Spánverja á Niðurlöndum. Sixtus 5. settist á páfastól 1585 — eins og áður er sagt — og var þá úti með vináttu hans og Filippusar. Páfunum hafði lengi þótt Filippus taka sér meiri völd í kirkjunnar málefnum á Spáni, en hófi gegndi, og þá batnaði ekki þegar jafn ráðríkur maður og umfangsmikill sem Sixtus 5. gjörðist yfirmaður kirkjunnar. Filippus var óvinur Elíabetar drotníngar á Englandi. Sixtusi var það vel kunnugt, og kom hann því til leiðar svo lítið bar á, að Elísabet sendi jarlinn af *Leicester* með liði nokkru til Niðurlanda. Þetta enska lið gjörði reyndar Niðurlendingum minna gagn en margur hafði ætlað, en það varð þó til þess, að Filippus stóðst eigi lengur mótgjörðir Elíabetar og sneri reiði sinni gegn henni. Var það þá áform hans að vinna England, og þegar það væri unnið, þóttist hann eiga als kostar við Niðurlendinga. Hann hafði því viðbúnað mikinn bæði á sjó og landi, og sendi (1588) hinn mikla flota (*armada*), sem áður er um getið, til Englands. En meðan Filippus hafði hugann á Englandi, varð hlé nokkurt á viðureign hans við Niðurlendinga, og kom það þeim í góðar þarfir, enda launuðu þeir nú Englendingum liðveizluna og gjörðu út fjölda herskipa. Voru sum af þeim í flota með Englendingum og börðust við Spánverja og eyddu skipum þeirra, en sum höfðu gætur á Alexander Farnese, og bönnuðu honum að koma landhernum af meginlandinu yfir á England. Það er nú kunnugt af því, sem fyr er ritað, að floti Spánverja eyddist að mestu leyti í för þessari bæði fyrir vopnum og veðrum; beið Filippus konungur og ríki hans þar af hinn mesta skaða. En af skaða Spánverja höfðu Niðurlendingar gagn. Um þessar mundir var það og, að Filippus vildi koma *Isabellu* dóttur sinni (dótturdóttur Hinriks 2. Frakkakonungs) til ríkis á Frakklandi, og drógst svo hugur hans þangað en frá Niðurlöndum. Og ofan á alt þetta bættist það, að Alexander Farnese andaðist undir árslokin 1592. Hann var búinn að vinna undir Spánverja öll suðurfylki Niðurlandanna og bæla þar niður trú prótestanta, en norðurfylkin héldu enn frelsi sínu og trú; og nú þegar Alexander var frá, slíkur hershöfðingi sem hann hafði verið, var það eigi á annara færi að sigrast á Móríz og hans hersveitum. Filippus sá,

að hann mundi eigi geta brotið norðurfylkin undir sig, og tók það til bragðs, hið sama ár sem hann dó, að hann afsalaði sér öllum yfirráðum á Niðurlöndum og fékk þau í hendur dóttur sinni þeirri, er áður var nefnd, og sem var gipt Albrekt erkihertoga af Austurríki. Hin norðlægu fylki vildu hvorki heyra nè sjá Ísabellu; en hinum syðri fylkjum stýrði hún til dauðadags (1633); komust þau þá aptur undir Spán, því að Ísabella dó barnlaus.

Þegar Spánverjar höfðu farið ófarirnar til Englands og mist megnið af flota sínum, gjörðust Niðurlendingar djarnir og víðförlir um sjóinn. Til þeirra tíma höfðu Spánverjar og Portúgalsmenn einir setið yfir allri verzlun vestur á Ameríku og austur á Indlandi, og dulið aðrar þjóðir leiðar þangað. Varníng þann, sem þaðan fluttist hingað til álfunnar, urðu Niðurlendingar að sækja til Lissabonar, og selja hann síðan til Norðurlanda. Nú hugðist Filippus að eyða þeim atvinnuvegi Niðurlendinga, og bannaði þeim allar hafnir í ríki sínu; en bannið varð þeim til auðs og upphefðar. Þeir freistuðu sjálfir að finna leið til Indlands og það tókst. Árið 1595 komst *Cornelius Houtmann*, hollenzkur maður, alla leið til Austindía, og má för hans heita ný landnámsferð til Indlands; það var hér um bil einni öld eptir að Vaskó da Gama kom þar fyrst við land. Þegar Niðurlendingar höfðu fundið leið til Indlands og náð þar fótfestu, urðu skjót umskipti. Verzlun Portúgalsmanna og Spánverja hnignaði, því að þeir kunnu eigi með að fara, en Niðurlendingar voru bæði ótulli menn og starfsamari, og þar að auki miklu siðprúðari í öllum viðskiptum við landsmenn þar austur. Náðu Niðurlendingar þannig undir sig allri verzlun á *Ceylon*, *Malakka*, *Japan* og *Mólúkkæyjum*, og safnaðist þeim nú mikill auður¹. En auðurinn hafði í för með sér alskonar gæði, bæði andleg og líkamleg; atvinna og iðnaður Niðurlendinga varð fjölbreyttur og arðsamur, vísindi og ípróttir tóku miklum framförum, landher og herskipafloti varð mikill og geigvænlegur.

Ófriður stóð enn milli Spánverja og Niðurlendinga um nokk-

1) Höfuðból Niðurlendinga í Austindíum varð borgin *Batavia* á ey þeirri, er *Java* heitir, mikil borg og auðug. Eiga Niðurlendingar alt til þessa dags mikið ríki þar austur um eyjar, eins og sjá má í landafræða bókum.

ur ár, og veitti Spánverjum miður, enda skortí þá hershöfðingja, og gjörðust linir í sóknum, en Móríz hinsvegar öruggur fyrirliði, framgjarn og harðdrægur. Loksins var sett vopnahlæ milli landanna (1609), er standa skyldi um 12 ár, og viðurkendu þá Spánverja að nokkru leyti sjálfsforræði Niðurlendinga.

Meðan á þessum styrjöldum stóð var þjóðveldi Niðurlendinga komið á fastan fót, og hafði sá maður er *Olden Barneveld* hét, unnið þar mest og bezt að, hann var ráðherraforingi þar í landi, og góðgjarn maður og vitur. Hvert fylki átti sér þing (stéttapíng, fylkispíng) og ræð til lykta sérstaklegum málefnum sínum, en aðallöggjöf og skattálögurættur voru lögð til *fulltrúapíngsins* eða *þjóðpíngsins* (*Generalstaterne*); á því þíngi sátu fulltrúar úr hverju fylki. Landstjórinn ásamt *ráðinu* hafði framkvæmdarvaldið í höndum, en hermálefnum stýrði landstjórinn al-einn. Snemma bryddi á ósamlyndi milli þeirra, er halda vildu fram þjóðstjórn, og hinna er drógu taum landstjórans. Kom sá flokkadráttur einkum fram í trúarbragðadeilum þeim, er risu upp í Niðurlöndum, jafnskjótt sem af léttri ófriðnum við Spánverja. Þeir sem fylgdu Zvinglis kenningu deildu við hina, sem Calvíns trú höfðu (út af frjálsræði manna og ákvörðun guðs frá öndverðu um eilífa glötun þeirra eða eilífa sælu). Háskólakennari í Leiden *Gomarus* að heiti, fylgdi fast fram kenningu Calvíns. Með honum stóð hart nær allur klerkalýðurinn, er hafði fengið mentun sína í Genf, og sömuleiðis allur þorri manna, er hafði lært fræðin af klerkunum. Móríz landstjóri fylgdi einnig þeim flokki, því að hann var fjölmennastur og líklegastur til að styðja Móríz til þeirra hluta, sem hann vildi hafa fram. En hinsvegar hélt annar háskólakennari í Leiden, *Arminíus* að nafni, fram lærdómsgreinum Zvinglis, og var flokkur hans við hann kendur og kallaður: *Arminíanar* og Remonstrantar. Að þessum flokki hneigðist Olden Barneveld og hinn nafnkendi lærði maður *Húgo Grotíus*. Á kirkjuþíngi í *Dortrekt* (1618) urðu Arminíuss menn undir og kenning þeirra fordæmd. Olden Barneveld og Húgó Grotíns voru handteknir; hinn fyrnefndi dæmdur til dauða og tekinn af lífi, en hinn síðarnefndi slapp úr varðhaldi fyrir snjallræði konu sinnar¹, og komst undan til Frakk-

1) Henni var leyft að senda honum bækur til lesturs þar sem hann sat í varðhaldinu, og voru þær bornar þangað í kistu;

lands. Síðan gekk hann í þjónustu Kristínar Svíadrottningar, og varð hinn frægasti maður af ritum sínum.

Vopnahlæð milli Spánar og Niðurlanda var á enda árið 1621, og hófst þá ófriður að nýju; en þess ófriðar gætti eigi sérstaklega, því að hann rann saman við þrjátígi ára stríðið, er þá var nýbyrjað. Móríz dó 1625 og þótti mikið hafa að honum kveðið, þótt honum færist illa við Olden Barneveld. Gjörðist þá *Friðrik Hinrik*, hálfbróðir Mórizar, landstjóri Niðurlendinga (1625—1647). Hann var ágætur hershöfðingi sem bróðir hans hafði verið, en frjálsslyndari maður og mildari. Á hans ríkisstjórnarárum gjörðu Niðurlendingar samband við Frakka gegn Spánverjum, og unnu þeim margt ógagn. Þannig vann hinn hollenzki aðmíráll *Marteinn Tromp* mikinn sigur á Spánverjum (1639) og gjöreyddi fyrir þeim flota þeirra. Höfðu Spánverjar aldrei beðið slíkt tjón, síðan þeir mistu «*flotann mikla*» á dögum Filippusar annars. Þegar þrjátígi ára stríðinu var lokið, og *vestfalski friðurinn* saminn, var Spánn að þrotum kominn, og varð að játa sjálfsforræði Niðurlanda, og jafnvel láta lausan við þau nokkurn hluta af Flandern, og Brabant og Limbúrg, sem Hollendingar höfðu unnið af þeim (menn kölluðu þá landshluta *Generalitets-lönd*). Spánverjar urðu einnig að samþykkjast því, að öll sigling yrði bönnuð á *Schelde-fljóti*, og var það beinlínis til þess að eyða allri verzlun í Antwerpen; en sú borg var einhver hin helzta í þeim hluta Niðurlanda, sem lá undir Spán. Þannig lauk hinni löngu og merkilegu viðureign Spánverja og Niðurlendinga. Hin litla þjóð gekk sigri hrósandi burt að leikslukum, og hafði stórum vaxið í augum allra þjóða. Hinn víðlendi og voldugi Spánn, er flestir hugðu ósigrandi, hafði mist ógrynni fjár og manna, og þar á ofan látið frægð sína og hamíngju.

England um daga Hinriks áttunda (1509—1547).

Hinrik sjöundi varð konungur á Englandi árið 1485, eins og fyr er ritað¹, og stýrði því ríki til dauðadags (1509). Hann

þegar þær voru lesnar, og skyldu á brott bornar fyrir aðrar nýjar, lét hún mann sinn leggjast í kistuna í stað bókana, og þannig komst hann á burt.

1) Miðaldasagan bls. 171.

var ráðríkur í stjórn sinni og hélt ríkt fram konúngsvaldinu, fékk hann og litla mótstöðu, því að flest stórmenni og ribbaldar voru undir lok liðnir í ófriðnum mikla (*rósastríðinu*), en landsfólkið þráði hvíld og næði, og hugði mest á friðsamleg störf; var því allgóður friður og framför í landi um hans daga. Hinrik konúngur átti tvo sonu; hét hinn eldri *Arthúr*, en hinn yngri *Hinrik*. Það var í ráði, að Arthúr tæki konúngdóm eftir föður sinn, en Hinrik skyldi verða erkibiskup, og fyrir því var hann settur til bókmenta, og nam þau fræði, er þá voru mönnum kend. Arthúr var kvæntur, og átti *Katrínu* af Arragoníu, dóttur Ferdínands katólska og Ísabellu; en Arthúr lifði skamma stund og dó á undan föður sínum (1502). Hinrik varð því konúngur yfir Englandi og Írlandi þá er faðir hans dó, og gekk að eiga Katrínu ekkju bróður síns. Hann var nefndur *Hinrik áttundi*. Á hinum fyrstu ríkisstjórnarárum sínum, gaf hann sig mjög lítið við alþjóðlegum málefnum, en lét ráðgjafa sína sjá fyrir þeim, og hugði sjálfur mest á glaum og gleði, hirðveizlur, turnreiðir og dýraveiðar. Hinrik konúngur faðir hans hafði verið fægjarn maður og naumur, og safnað saman miklum auð. Sonur hans fylgdi öðrum sið, og lét fæð óspart af höndum rakna, eins og svall hans og geðfrekja kallaði eftir. Um þetta leiti var greifinn af *Súrrey* (hertogarnir af Norfolk eru af þeirri ætt) í mestum metum hjá Hinriki. Þótti mörgum það um of, og lögðu batur á greifann, og fengu komið þeim manni í kærleika við konúng, er *Wolsey* hét. Hann var klerkur, úngur að aldri, af láguum stigum, en afbragðsmaður að vitsmunum og snilli. Hann komst brátt til mikilla valda, varð erkibiskup í York (*Jórvík*), og ráðgjafi konúnga, en páfinn veitti honum kardínals tign. Wolsey varð stórauðugur maður; hann var hið mesta skrautmenni, og hinn fyrsti af klerkalýðnum á Englandi, er bar klæðnað af silki og gullofinn; opt hafði hann 800 manna í för með sér, og þegar hann gekk um strætin, gengu jafnan tveir klerkar fyrir honum, bar annar þeirra kardínals kross, en hinn erkibiskups kross, og þegar hann söng messu í Pálskirkjunni, þjónuðu honum biskupar og ábótar. Karl fimmti og Franz fyrsti höfðu Wolsey í miklum hávegum og keyptu vinfengi hans dýrum dómum.

Þess er áður getið, að Hinrik konúngur átti hlut að málum

útlendra þjóðhöfðingja, og gaf sig fram í ófrið þann, er þeir áttu saman, en hafði litla sæmd af liðveizlu sinni sökum ótrygðar og þrekleysis, þegar mest lá við. Fyrst vildi hann hefna páfans og kirkjunnar á Loðvíki tólfta; þar næst gekk hann í lið með Karli fimmta gegn Franz fyrsta, og fyllti keisarans flokk, þángað til Franz konungur beið ósigurinn við Pavía, þá skipti Hinrik um skildi og gekk í lið með Frökkum, og að síðustu varð hann af nýju með keisara og í móti Frökkum. Til allra þeirra leiðangra eyddi Hinrik bæði fè ríkisins og fjöri manna sinna, án þess að koma nokkru, sem teljandi sè, til leiðar. Þegar fè það, sem *«parlamentið»* veitti konungi, hrökk eigi til kostnaðarins, lagði Hinrik konungur skatta á landið eptir sjálfs síns geðþótta, og kúgaði þannig fè út hjá mönnum, hlífði eigi heldur klerkum í þeirri grein, þegar svo bar undir, jafnvel þó klerkalýðurinn væri þá enn í miklu gengi á Englandi, og páf-inn hældi þar allri sinni tign og yfirráðum, enda sagði hann: »að England væri hinn fegursti gimsteinninn í kórónu sinni«, því að frá engu landi kom jafnmikið fè í páfagarð sem frá Englandi. Siðabótin fluttist yfir á England og fekk þar marga áhángendur, eins og við mátti búast í því landi, þar sem Jóhann Wycliffe¹ hafði lifað og kent; en Hinrik stóð fast á móti allri siðabót, og til þess að sýna mönnum, að hann kynni nokkuð í fræðunum, ritaði hann bækling móti kenningu Lúthers (*de septem sacramentis*, þ. e. um þau sjö sakramenti); geðjaðist páfa svo vel að því riti, að hann gaf konungi nafnbót og kallaði hann *«verndarmann trúarinnar»* (*defensor fidei*). En vinátta stóð aldrei lengi þar sem Hinrik áttundi var öðrum þræði. Hann varð litlu síðar hinn mesti óvinur páfans, og kom það svo til. Hinrik átti Katrínu, ekkju bróður síns, eins og áður var sagt, og hafði fengið leyfi hjá páfa til þess að kvongast henni, því að kirkjurétturinn bannaði. Þau konungur og drotníng áttu eina dóttur barna, er *María* hét, og segir síðar af henni. Nú höfðu þau búið svo saman nokkur ár, að allt fór slysalítið. Þá fekk konungur ástarhúg til einnar af hirðmeyjum drotníngar; sú hét *Anna Boleyn*, dottur dóttir Súrreys greifa, þess er fyr var nefndur, hin fríðasta mæð og þezti kvennkostur. Hún vildi með engu móti þýðast konúnginn, og kom honum þá til hugar að segja

1) Miðaldarsaga bls. 168—169.

skilið við drotníngu sína, kvongast Önnu og setja hana í drotníngar sess. Katrín drotníng vildi eigi gefa samþykki sitt til skilnaðar, en konúngur, er vildi fara að þessu öllu sem bezt fyrir manna sjónum, leitar páfans, kveðst eigi lengur geta búið saman við Katrínu fyrir samvizkunnar sakir, og beiðist skilnaðar við hana. Nú var páfinn (Klemenz VII.) í allmiklum vanda staddur. Hinrik konúngur, hlífiskjöldur trúarinnar, var annarsvegar, en hinsvegar Karl keisari fimmti. Karl var systursonur Katrínar drotníngar, og allra konunga voldugastur; það var ískyggilegt að styggja hann, og það því fremur, sem þeir voru fyrir skemstu orðnir sáttir, páfinn¹ og keisarinn, og Karl hafði beinlínis mælt til þess, að Klemenz legði eigi samþykki sitt á hjónaskilnað Hinriks án sinnar vitundar. Klemenz vildi hvorugan styggja og tók það ráð, að hann fól Wolsey kardinála á hendur, að ransaka málið, og sendi þar að auk legáta sinn litlu síðar (í október 1528) til Englands í þeim erindum; en það sagði páfinn þeim einslega, að fresta sökinni það þeir frekast kynnu; þeir reyndu fyrst kardinálarnir, að fá drotníngu til þess góðmótlega, að skilja við konúng og ganga í klaustur, en þegar hún setti þar þvert nei fyrir, þá létu þeir sökina koma í dóm. Drotníng undi eigi við svo búið og skaut máli sínu til páfans.

Nú þótti konúngi vandast málið; verður hann ákaflega reiður, og kennir Wolsey um alt hvernig farið hafði, og rekur hann úr völdum. Litlu síðar lætur konúngur taka Wolsey höndum, og býður að flytja hann til Lundúna, og höfða sök á hendur honum fyrir drottinssvik. Fekk þetta alt Wolsey svo mikillar áhyggju, að hann lagðist veikur og dó skömmu síðar. Á bana-sænginni mælti Wolsey: «hefði eg þjónað guði eins dyggilega og konúngi, þá mundi hann eigi hafa rekið mig frá sér á elliárum».

Meðan verið var að velta því fyrir sér, hver ráð mundu líklegust til þess að samþykki páfa fengist til hjónaskilnaðarins, lagði klerkur einn, er *Cranmer* hét, það til ráðs, að leita skyldi atkvæða hinna nafnfrægustu háskóla, og vita hvað þeir segðu um málið. Svo var gjört, og urðu fleiri á því, að skilnaður skyldi fram fara. Þetta lét Hinrik sér nægja hvað sem páfinn sagði;

1) Páfinn var þá nýlosnaður úr varðhaldinu á Engilsborg (sjá að framan bls. 32).

hjúskapur konúnga og drotníngar var dæmdur ógildur. Hinrik kvæntist Önnu (1532), og Cranmer varð erkibiskup í Kantaraborg.

Öll þessi hjúskapar umsvif Hinriks konúnga leiddu eftir sig önnur og meiri tíðindi. Honum var orðið svo gramt í geði við páfann, að hann vildi hvorki heyra hann eða sjá. Þess vegna lét hann «parlamentið» — er um þær mundir var að eins verkfæri í hans hendi — lýsa yfir því, að hin enska kirkja væri að fullu og öllu laus af páfans valdi og afskiptum, en *konúngur einn hennar æðsti biskup og yfirráðandi*. Konúngur kastaði eign sinni á margt og mikið kirknagóz, og tók undir sig öll klaustur í landinu, og skiptu þau hundruðum; misti páfastóllinn þar miklar tekjur. En fyrir þá sök, að konúngi var jafnilla til Lúthers sem til páfans, þá breyttist trúin lítið til hins betra fyrir allar þessar aðfarir konúnga. Hann brauzt miklu fremur í móti páfa en katólskum sið; honum var alt um að gjöra, að verða sem einráðastur í öllu. Hann krafðist af þegnum sínum, að þeir skyldu sverja sér, sem yfirráðanda kirkjunnar, nýja hollustu-eiða (Suprematseið), og fylgja í öllu þeim 6 trúargreinum, sem hann sjálfur fyrirskipaði, og hvort sem það voru katólskir menn eða prótestantar, sem skoruðust undan þeim eiðum, þá lét hann refsa þeim vægðarlaust, eða taka af lífi. Á meðal hinna mörgu, sem þannig létu líf sitt, má hér nefna *Fisher* biskup og *Tómas Mórus*, kansellera, hina lærðustu menn og merkustu.

Samvístir þeirra Hinriks og Önnu Boleyn urðu skammvinnar. Honum leizt vel á mey þá, er hét *Jóhanna Seymour*, og sem var þar við hirðina. Óvinir Önnu drotníngar urðu þess vísari og báru skjótt óhróður á drotníngu, og trúði konúngur rógi þeirra gjarnsamlega, lét síðan dæma hana til dauða og hálshöggva (1536). Dóttir þeirra Hinriks og Önnu var *Elísabet*, er síðan varð drotníng á Englandi og mjög fræg. Degi síðar en Anna drotníng lézt, gjörði Hinrik brúðkaup sitt til Jóhönnu Seymour, og var þá hinn kátasti. Litlu síðar hélt hann ræðu í parlamentinu, og gat þess meðal annars, að áður tvívegis hefði hann átt litlu láni að fagna í hjúskapnum, en þó hefði hann nú ráðizt í, að kvongast í þriðja sinn, af einberri umhyggju fyrir þegnum sínum. Var gjörður mikill rómur að ræðu hans, og einn af þíngmönnum svaraði máli konúnga svo: að hann ætti engan sinn líka, að speki væri hann sem Salómon, að afli og

hreysti sem Samson, og að fegurð sem Absalon. Þannig töluðu menn á Englandi í þær mundir. Hinrik konungur gat son við Jóhönnu drotningu sinni (1537); hann var nefndur *Játvarður*, og varð síðan konungur, en móðir hans andaðist af þeim barnburði. Konungur undi illa einlífi og kvæntist hið fjórða sinn, og fekk, eptir tillögum ráðgjafa síns, er *Cromwell* hét, Önnu, systur Vilhjálms hertoga af Cleve. En er konungur sá hana, þóttist hann gabbður af ráðgjafanum, því að Anna var miklu ófriðari sýnum en mynd sú, er konungur hafði séð. Lét konungur slíta þeim samvistum sem fyrst hann kunni, og taka ráðgjafann af lífi. Fáum vikum síðar fékk konungur fimmtu konunnar; hún hét *Katrín Hóward*, frændkona hertogans af Norfolk. En það fór sem fyr, hún varð ekki ellidauð í drotningar sessi; henni var gefið að sök, að hún væri ótrú manni sínum, og lét konungur stytta henni aldur eptir tveggja ára sambúð (1542). Í sjötta og síðasta sinni kvæntist konungur og átti *Katrínu Parr*, ekkju lávarðar eins í ríki sínu. Það lá við sjálft, að drotning þessi fengi sömu afdrif sem Anna Boleyn eða Katrín Hóward, en með vitsmunum sínum og stillingu fékk hún afstýrt þeim óföllum. Hinrik 8. dó 1547, og var þá 56 ára að aldri, en konungur hafði hann verið 38 vetur. Harmaði engi maður hans lát, því að hann hafði beitt hinu mesta ofríki við þegna sína, bæði í trúarefnum og öðrum greinum, og látið margan saklausan af lífi taka, en sóað burt fé ríkisins, og rýrt sæmd þess í augum annara þjóða, enda er enginn vafi á því, að England hefði miklu getað til vegar komið á þeim tímum, meðan þeir Karl fimmti og Franz fyrsti deildu um völdin, ef konungur þess hefði verið meiri og betri maður en Hinrik áttundi var.

Játvarður sjötti (1547—1553). María (1553—1558).

Þegar Hinrik áttundi var látinn, var *Játvarður* sonur hans til konungs tekinn, *hin sjötti* með því nafni (1547—1553). En með því að hann var þá barn að aldri, voru nefndir til menn að hafa öll ríkisforráð á hendi, og var móðurbróðir konungs, *Játvarður Seymour* hertogi af *Sommerset*, þeirra fyrstur og fremstur. Hertoginn var vinveittur siðabótinni og náði hún því skjótt miklum vexti og viðgangi á Englandi, einkum fyrir viturleg ráð og framgöngu *Cranmers*, erkibiskups af Kantaraborg, er telja

má höfund siðabótarinnar á Englandi. En Játvarður konungur var heilsulaus og andaðist 16 vetra gamall 1553. Kom þá hálsystir hans *María*, dóttir Hinriks áttunda og Katrínar af Arragoníu, til ríkis (1553—1558). María var allra kvenna grimmust og ramkatólsk, og hugðu margir hið versta til hennar. Játvarður sjötti, sem einnig fylgdi hinum nýja sið og hafði óbeit á Maríu, vildi að Elísabet systir sín tæki ríki að sér látnum, en hertoginn af *Northumberland* (Norðymbraland), er öllu ræð eptir að Sommerset var dáinn, kom því til leiðar, að *Jóhanna Grey*, er komin var í kvennlegg af Hinriki sjöunda, var kjörin til drotníngar. Jóhanna var gipt syni hertogans, úng að aldri og öllum kvennkostum búin. Hún tók nauðug við þeirri tign, sem tengdafaðir hennar hafði sett hana í, og hélt henni líka stutta stund, því að María safnaði liði og varð fjölmenn; hertoginn var tekinn höndum og hálshögginn, og litlu síðar fékk Jóhanna og maður hennar sömu afdrif. María settist að ríkisstjórn og kom skaplyndi hennar þegar í ljós. Hún lét sér mest um það hugað, að bæla siðabótina niður og eyða því öllu, er gjört hafði verið henni til eflíngar, meðan Játvarður bróðir hennar bar konungs nafn; en parlamentið var svo duglaust og leiðitamt, að það ónýtti öll þau lög um kirkna og trúarbragða málefni, sem sett höfðu verið á dögum Játvarðar; dirfðist nokkur að mæla í móti var hann drepinn, en margir létu eignir sínar og óðöl, og flýðu af landi burt til Þýskalands eða Sveizalands. Elísabetu systur sína lét María setja í varðhald, og lét hana gjalda þess saklausa, að móðir sín hefði orðið að víkja úr sessi fyrir Önnu Boleyn móður Elisabetar. Cranmer erkibiskup var tekinn, og sat lengi í dýflissu áður hann var brendur á báli 1556. Sömu æflok fengu ýmsir ágætismenn á Englandi á þeim árum, sem þessi blóðþyrsta drotníng sat þar að völdum; enda var hún kölluð *Blóð-María*.

Árið 1554 giptist María Filippusi öðrum Spánarkonungi, og jók það eigi á vinsældir hennar í Englandi, því að landsmönnum leizt illa á hann, og þóttust vita fyrir víst, að sá ráðahagur mundi alls eigi vera stofnaður af umbyggju fyrir Englandi, heldur miklu fremur af ábatavon, til þess að efla Filippus konung og ríki hans á Spáni. Að vísu var svo á kveðið, að Filippus skyldi að eins bera konungs nafn á Englandi, en als engi ráð

hafa á rikismálefnum, spánverskir menn eigi hafa þar embætti á hendi, og engu skyldi breytt í landslögum fyrir konungs sakir eða kvenfánga hans. En þó nú svo væri, þá vissu menn samt, að slíkur maður sem Filippus mundi engin góð áhrif hafa á Maríu drotningu sína, eða hennar ríkisstjórn. Filippus sá, að Englendingum var kalt í geði til sín, enda galt hann þeim líkt í móti, og var við þá fátalaður, reigingslegur og stirður. Hann hafði litla viðdvöl á Englandi, og þótti Maríu það þungur kostur, því að hún unni honum mjög, og mátti eigi af honum sjá, og í engu móti honum láta. Þegar hann hafði tekið við ríki, kom hann aptur til Englands (1557), en einungis í þeim erindum að fá þar liðveizlu, og koma Englandi í ófriðinn með sér gegn Hinriki öðrum Frakkakonungi. Hann sagði drotningu, að hann kæmi eigi optar til Englands, ef hún yrði elgi við þessari bön hans. María gjörði alt, sem í hennar valdi stóð, til þess að sjá honum fyrir fæ og liðveizlu. Ríkisráðið synjaði í fyrstu, en lét um síðir að vilja drotningar. Lét hún þá kúga fæ út hjá landsmönnum, og, ef þeir tregðuðust við að gjalda, var þeim varpað í dýflissur. Eins og landsmenn grunaði, hafði England ekki annað af sambandi þessu og fylgd sinni við Filippus annan, en mínkun og manntjón. Englendingar mistu *Calais*-borg (1558), sem *Franz hertogi af Guise*, frakkneskur hershöfðingi, vann af þeim. Þá borg höfðu Englendingar átt framan úr miðöldum, eins og fyr er ritað. Maríu drotningu fólst svo mjög um þenna missi, að hún dó á ofanverðu því sama ári (1558). Þau Filippus áttu ekki barna, og þótti flestum það betur farið.

Elísabet (1558—1603), og María Stúart.

Þegar María var dáið, og Elísabet kemur til sögunnar, þá er sem sorta dragi af Englandi og birti yfir landi og lýð. Hin enska þjóð hafði verið þjáð og þungt haldin; hún þurfti læknaar við, og fékk hana. Það er sagt, að hið enska «parlament» hafi setið á ráðstefnu, þá er því barst fregnin um lát Maríu drotningar, og hafi allur þíngheimur svarað þeim boðskap einum rómi og sagt: «guð varðveiti Elísabetu drotningu, lifi hún og ríki lengi og vel!» Kom hún þá skjótt til Lundúna, þaðan sem hún hafði setið í varðhaldi, féll á knè fyrir allra sjónum og þakkaði guði, er svo dásamlega hefði varðveitt hana

frá öllum ofsóknum. Elísabet hafði reynt mikið og margt; móðir hennar verið hálshöggvin, stjúpmaður hennar verið henni harðar, og systir hennar þessa verst. Í einveru sinni hafði hún stundað vísindi og fagrar listir af miklu kappi; hún talaði og ritaði vel latínska túngu, og var vel að sér í mörgum fornum fræðum, og mælti á margar hinar nýjari túngur. Þó að hún hefði setið í dyflissu og verið opt harðlega haldin, var hún samt hraust og heilsugóð; hún var vel vaxin og höfðingleg á velli, svipfögur, og sómdi sér hverri konu betur á hestbaki; hugurinn frábærlega kjarkmikill; hún var stórvitur og vel stilt, og því var það eðlilegt, að henni væri vel lagið að stjórna öðrum. Jafn-skjótt sem Filippus konungur annar frétti, að Elísabet væri sezt að ríkjum, var hann eigi seinn á sér að biðja hennar. En Elísabet vissi, að landsfólkinu var illa til hans, enda kveið hún því, að bæði sá ráðahagur og hver annar mundi hepta frelsi sitt og leggja fjötur á framkvæmdir sínar í ýmsum greinum ríkisstjórnarinnar; þess vegna neitaði hún þeim ráðahag. Ýmsir göfugir menn og konungasynir urðu til að biðja hennar — einn af þeim var *Eiríkur fjórtándi*, Svíakonungur, — en hún neitaði þeim öllum. Þjóðþingið (parlamentið) vildi að hún giptist, í þeirri von, að ríkiserfðum mundi þá betur borgið, en hún svaraði: «England er maðurinn minn, og hin enska þjóð börnin mín, allur sá mikli barnahópur liggur mér ríkt í skapi, eg má eigi skipta hug eður hjarta til annara út í frá, eg æski helst að á legsteini mínum standi þessi orð: »hér hvílir Elísabet sem lifði og dó meydrotning« (*Here lies Elisabeth, who lived and died a maiden queen*). En þó að Elísabet vildi eigi giptast, var henni samt einkar kært, og það fram á elliár, að heyra sér hælt fyrir fegurð og ýmsa þá kosti, er menn segja að konum þyki alment ljúft að heyra að þær hafi.

Eitt hið fyrsta, sem Elísabet sá að lagfæringar þurfti við í ríkinu, voru trúarbrögðin. Sjálf var hún fædd og alin upp í trú prótestanta; henni var því mjög ant um að viðrétta siðabótina (sem stórum hafði eyðst á Englandi fyrir ofsóknum Maríu systur hennar), og hafði í því efni góðan ráðanaut þar sem var ráðgjafi hennar, *Burleigh* lávarður, hinn vitrasti maður, og hinn ótrauðasti talsmaður siðabótarinnar. Það leið eigi á löngu, áður drotning staðfesti lög þau um trúarbrögð og kirkjumálefni, er

Játvarður sjötti hafði sett, og lét hún varða hegníngu, ef nokkur mælti í gegn yfirráðum krúnunnar yfir kirkju og kirkjunnar málefnum. Þótti katólskum mönnum, sem við var að búast, sér allmjög misboðið í þessu, og varð gramt í geði til drotningar. Hún lét semja trúarjárníngu í 39 greinum, og gilda þær enn í hinni ensku kirkju, er menn nefna „*biskuplega eða episkópalkirkju*“, því að auk þess sem konungur hefir þar æztu stjórn kirkjunnar, þá hafa biskupar þar meiri yfirráð en í öðrum siðabótarlöndum; að öðru leyti er trúarregla ensku kirkjunnar líkust kenningu Calvins, jafnvel þó sumu væri haldið af síðum katólskra manna. Hin enska kirkja er þessvegna nokkuð sérstakleg í eðli sínu. Sumir af þegnum drotningar, þótt prótestantar væru, undu ílla þessum setningum og fyrirskipunum, og sögðu skilið við þjóðkirkjuna, og mynduðu söfnuði fyrir sig; fengu þeir ýms nöfn og hafa verið kallaðir „*Dissentar*“ og „*Non-conformistar*“; en að því leyti sem þeir vildu hreinsa guðspjónustugjörð sína af öllum þeim kirkjusiðum, af allri þeirri viðhöfn, er líktist síðum pápískra manna, voru þeir nefndir „*Púrítanar*“, en „*Presbyterianar*“ að því leyti sem þeir vildu, að hinir elztu í söfnuðunum stýrðu kirkjunnar málefnum. Hin enska þjóðkirkja átti þannig við tvennskonar mótstöðumenn að stríða, annars vegar *katólska flokkinn*, hins vegar *Dissentar* eða *Púrítanaflokkinn*; þjóðkirkjan sjálf hélt einskonar meðalveg millum beggja hinna flokkanna.

Katólski flokkurinn var fjölmennur á Englandi, og taldi marga gðfuga menn og málsmetandi; sá flokkur gat því orðið Elísabetu allgeigvænlegur, og það því fremur, sem hann neitaði því, að hjónaband Hinriks áttunda og Önnu Boleyn hefði verið lögmætt, og þar af leiddi þá beinlínis, að Elísabet var eigi borin til ríkiserfða, heldur *María Stúart* sem komin var af Hinriki sjöunda Engla konungi*.

Skotar koma mjög við Englands sögu á dögum Elísabetar. *Stúarta-ættin* hafði ráðið ríkjum á Skotlandi frá því á ofanverðri 14. öld (1371) og hétu nokkrir konungar af þeirri ætt Jakobar. Einn þeirra var Jakob 3., sem kvæntist Margrètu, dóttur Kristjáns fyrsta Danakonungs, og fékk í stað heimanmundar með henni Hjaltland og Orkneyjar¹ er síðan hafa fylgt Skotlandi.

1) Sjá Miðaldasögu bls. 276.

*) *Hinrik 7. (af Tudor)*
Englands konungur, † 1509

Arthúr † 1502.	<i>Hinrik 8.</i> Engl. konungur, † 1547.	<i>Margræt</i> gipt Jacobi 4. Skota konungi
<i>María</i> gipt Filipp. 2. Engladrotning † 1558.	<i>Elísabet</i> Engladrotning † 1603.	<i>Jacob 6.</i> Skota konungur † 1542, átti Maríu af Guise
		<i>María Stúart</i> † 1587 gipt Hinriki Darnley † 1567
		<i>Jacob 1. (6.)</i> konungur Stórbretalands og Írlands † 1625, giptur Önnu af Danmörku
		Karl 1. † 1649.

Siðabótin fluttist einnig til Skotlands, en *Jakob konungur fimmti* hélt fast við fornan sið, og vildi fyrir engan mun missa yfirráð páfans, og flæktist fyrir þá sök í ófrið við Hinrik áttunda móðurbróður sinn, en hafði ógagn af og dó litlu síðar 1542. Hann lét eptir sig eina dóttur nýfædda, er *María* hét. Drotning Jakobs fimmta hét *María af Guise* (systir Franz hertoga þess er vann Calais, og þeirra bræðra hans). Hún stýrði Skotlandi fyrir hönd dóttur sinnar meðan hún var í bernsku, og spornaði hvað hún kunni, eins og ættmenn hennar á Frakklandi, móti siðabótinni, og fékk til þess styrk af hinni frakknesku stjórn. Drotning sendi og Maríu dóttur sína til Frakklands, og ólst hún þar upp við hirðina, en hirðlífið í París var um þær mundir mjög blendið. Nú þótt siðabótamenn væru ofsóttir á Skotlandi, fjölguðu þeir þar óðum, einkum eptir að Elísabet kom til ríkis á Englandi. Þjóðþing Skota setti þau lög (1560), að Calvins trú skyldi fylgt verða þar í landi, og kirkjumálum öllum skipað á þá leið, sem siður var til í Genf., enda hafði *Jón Knox*, hinn mikli og merki forvígismaður siðabótarinnar á Skotlandi, lært í Calvins skóla.

María Stúart ólst upp á Frakklandi, eins og fyr var sagt, og var allra kvenna fríðust sýnum. Hún giptist á unga aldri Franzi, elzta syni Hinriks Frakka konungs annars, og varð hann konungur eptir föður sinn (1559—1560) og nefndur *Franz annar*. Var nú Frakkland og Skotland nákvæmlega sameinað, er María var drotning beggja landanna; en sú sameining stóð að eins stutta stund, því að Franz konungur andaðist eptir eins árs ríkisstjórn. Þau María áttu eigi börn saman, og fór hún þá burt af Frakklandi, þó henni væri það mjög á móti skapi, og til ríkis síns á Skotlandi; þá var hún 19 vetra að aldri. Um þær mundir dó þar drotningin, móðir hennar. María Stúart hafði numið katólska trú á Frakklandi og hélt fast við hana, en varð að láta sér lynda, að Calvins trú, eða, sem hún alment nefndist á Skotlandi, *presbyterianska* trúin, heldist sem þjóðtrú á Skotlandi. Skamma stund hafði María verið á Skotlandi og stýrt ríki sínu, áður kólna tók vináttan með henni og Skotum. Þeir undu því flá, að drotning gjörði meiri veg og virðingu frakkneskra manna þar í landi heldur en þegna sinna, að hún hugði fremur á alskonar munaðarlíf heldur en alvarleg störf; en Skotar voru al-

vörumenn miklir og siðavandir; en það sem þeim einkum mislíkaði var það, að drotningin var katólsk, og katólskum sið var fylgt við hirðina. Landsmenn bjuggust á hverri stundu við, að drotningin, með tilstyrk Frakka og annara pápískra manna, mundi bæla niður eða eyða trú þeirra. Ástandið var því engan veginn skemtilegt á Skotlandi. En alt um það urðu þó margir menn til þess að eggja drotningu á að giptast; voru þá tilnefndir ýmsir, er líklegir þóttu til þess ráðahags, og varð sá maður hlutskarpastur í kjörinu, er *Hinrik Darnley* hét, tvítugur að aldri og hinn friðasti sýnum, en þá er líka alt upp talið. Hann var sonur greifans af *Lenox*, frænda Stúartanna, en þar að auki náskyldur Maríu drotningu í móðurætt, því að *Margrèt*, móðir Darnleys, var systurdóttir Hinriks áttunda.

María Stúart þóttist borin til ríkis á Englandi og hafði gjört tilkall til þess; frændur hennar Guisarnir studdu fast að því, og katólski flokkurinn á Englandi, eins og fyr var getið; þess vegna vakti Elísabet drotning nákvæmlega yfir áformum og fyrirtækjum Maríu. Elísabet vildi helst, að María giptist aldrei, allra sízt útlendum manni; hún lét það svo vera, að hún ætlaði að eiga Darnley, henni var ekki um það, en hún hugðist þó hafa ráð hans í hendi sér, því að þeir feðgar áttu lendur miklar á Englandi. Nú þegar hér var komið, lét María hana vita, að hún ætlaði sér að giptast Darnley. Elísabet bar þetta undir ráðgjafa sína og leizt þeim illa á; þeim þótti landstjórninni á Englandi meiri hætta búin en áður, af því að Darnley var líka kominn af Hinriki sjöunda, og prótestantatrúnni hætta búinn, af því að Darnley var katólskur. Elísabet gat eigi annað gjört, til að aptra þessu hjónabandi, en að boða þá báða *Lenox* greifa og son hans heim í ríki sitt, þar sem jarðeignir þeirra voru; en hvorugur þeirra kom, og gjörði drotning þá upptækar eignir þeirra og lagði til krúnunnar. María giptist Darnley 1565 um miðsumarsleiti og gaf honum konungsnafn. En það, sem margan hafði grunað, kom nú brátt í ljós og varð að fullri vissu. Samfarir þeirra Darnleys og drotningar urðu hinar verstu. Hvorugt hafði annað þekt, en hrapað að hjúskapnum eins og börn. María var munaðargjörn og léttynd og gat sér um fátt neitað það er hugurinn girntist; Darnley var drambsamur og drotnunargjarn, svallsamur og ósiðlátur. Þar við bættist og, að þar var söng-

maður einn við hirðina, ítalskur að kyni, er *Rizió* hét. Þann mann hafði María drotning í hinum mestu hávegum, og fékk jafnvel óorð af. Landsmenn undu því mjög illa og það því fremur, sem menn vissu, að bréf fóru milli Riziós og páfans; trúarbrögðum Skota gat verið hætta búin. Þar kom að nokkrir menn gjörðu samsæri gegn Rizió, en Darnley var sjálfur oddviti þeirra. Einn aptan (9. marz 1566) sat drotning að kveldverði ásamt Rizió og fleiri mönnum. Þá var hrundið upp hurð að herbergi drotningar; var þar Darnley kominn og þeir félagar hans. Drotningu varð hverft við og spurði hvað um væri að vera; þeir kváðu hana skyldu eigi saka, en Rizió hafa makleg málagjöld; veittu honum þegar í stað aðgöngu og drápu hann þar, hvað sem drotning sagði; varð hún nú ákaflega reið og hét að hefna slíkrar skapraunar, og efndi þau hótunaryrði á nokkrum þeirra, er hún lét af lífi taka; þótti Darnley illa skiljast við félaga sína, er hann kom þeim eigi undan, og fékk hann ámæli mikið af öllum, og þó að Maríu væri illa við hann áður, þá varð það nú hálfu ver eptir morðið á Rizió. Skömmum tíma þar á eptir varð drotning lættari og ól sveinbarn. Sá sveinn var nefndur *Jakob*, og varð seinna konungur. Eigi þótti Elísabetu það góðar fréttir.

Þegar Rizió var dauður, komst maður sá í mikla kærleika við Maríu, er *Bothwell* hét, hann var af göfugum ættum á Skotlandi, djارفur maður og hugrakkur, en ójafnaðar maður hinn mesti og óhlutvandar í flestu. Á öndverðu ári 1567 varð Darnley mjög sjúkur þar sem hann var staddur í Glasgow, og grundaði marga, að af eitri mundi vera; þó batnaði honum, og kom drotning til hans og var þá allblíð; varð hann henni samferða til Edinborgar, og settist að í garði einum skamt fyrir utan borgina; var drotning þar nokkra daga hjá honum. Eitt kveld fór hún til borgarinnar og kvaðst mundu verða þar um nóttina. En þá sömu nótt urðu þau tíðindi á garði þeim, er Darnley var í, að húsin flugu í lopt upp; lét Darnley þar líf sitt (1567).

Það var ætlun margra, að drotning mundi vera í vitorði um vígið Darnleys, en að Bothwell hefði verkið nnnið. Þó þorðu menn eigi að hafa slíkt í hámmælum. *Lenox* höfðaði sök á hendur honum, en veitti þó allerfitt, því að drotning breytti í engu til um upptekna hætti, og var Bothwell vinur hennar fullkominn

eptir sem áður; dæmdu dómendur hann sýknan, og varð nú eigi aðgjört. Nokkrum dögum síðar fékk Bothwell skjal eitt, og var hann þar beðinn að kvongast og eiga Maríu drotningu. Læk það orð á, að þeir menn, sem skjalið sömdu, hefðu gjört það fyrir beiðni hans og fögur loforð og jafnvel hótanir. Um þetta leyti fór drotning úr borginni og til bæar þess er Stirlíng heitir. Þangað kom Bothwell með 1000 manna, tók drotningu og hafði hana á brott þaðan og kvongaðist henni, hvað sem hver sagði, og þvert á móti ráðum Elísabetar og frænda hennar á Frakklandi. Eigi er þess getið, að drotningin lèti sér mislíka slíkar aðfarir. Þá voru liðnir 3 mánuðir frá vígi Darnleys. Bothwell var kvæntur annari konu fyrir sex mánuðum, og sagði samstundis skilið við þá konu. Alt þetta bendir til þess, að drotning hafi eigi látið sér alt í augum vaxa. En þó að það verði eigi varið, að Maríu Stúart hafi í mörgu yfirsèzt, þá er hitt engu síður satt, að fáar konur hafa sárari bótum svarað fyrir yfirsjónir sínar en hún.

Mikið þótti nú aðgjört. Konúngur verið drepinn, og sá kominn í hans stað, er allir grunuðu um morðið. Það var meira en þjóðin gæti borið. Alt stórmenni landsins gjörði uppreisn og ætlaði að taka Bothwell höndum, en hann komst undan og til Orkneyja, og gjörðist þar víkingur um nokkra hrið; þó varð honum þar eigi viðvært, og flýði þá til Norvegs, og þaðan til Danmerkur; var hann settur þar í dýflissu, og sat þar nokkur ár áður hann misti vitið, og dó þannig í eynd og volæði. En það er frá Maríu drotningu að segja, að hún gafst upp fyrir móttstöðumönnum sínum og gekk á vald þeirra; fluttu þeir hana fyrst til Edinborgar, og síðan settu þeir hana í varðhald í höll þeirri, er *Lochleven* heitir, og höfðu sterkar gætur á henni. Þar varð hún að afsala sér ríkisstjórn og öllum rétti til hennar, en Skotar tóku til konúngs yfir sig Jakob, son hennar og Darnleys, var hann þá ársgamall, og nefndur *Jakob sjötti* (1567). Jarlinn af *Murray*, hálfbróðir Maríu, tókst á hendur að hafa ríkisforráð meðan Jakob var í bernsku.

En María lét eigi hugfallast fyrir þetta, og vildi freista hamingjunnar. Hún slapp úr varðhaldinu, safnaði liði og vildi brjótast til ríkis, en Murray jarl varð þar yfirsterkari og varð drotn-

ing að flýja. Til Frakklands gat hún eigi komizt, og var þá enginn annar kostur en leita til Englands á náðir Elísabetar (1568). En er Elísabetu kom sá boðskapur, kallaði hún saman ráðgjafa sína og ræðst um við þá hvað gjöra skyldi. Hér var um þrent að gjöra: leyfa Maríu óhindraða för til Frakklands; veita henni landsvist með fullu frelsi á Englandi, eða í þriðja lagi: styrkja hana aptur til ríkis á Skotlandi. Ráðgjöfum þótti allir þessir vegir ófærir, því að katólskan var megn og hafði augastað á Maríu, og vildi koma henni til ríkis á Englandi; þeir sögðu, að ríkstjórn Elísabetar og þjóðtrú Englands væri hætta búin, og þannig væri eina ráðið, að hafa Maríu Stúart í varðhaldi, og geyma hennar vandlega þangað til útgjört væri um málefni milli hennar og landsmanna á Skotlandi. Elísabet hét Maríu að hún skyldi ransaka sakargiptir þær, er Skotar báru á hana, og reyndist það þá, að hún væri laus af öllu vitorði um dráp Darnleys, þá kvaðst Elísabet mundu styrkja hana aptur til ríkis á Skotlandi. Að þessum kostum gekk María; var hún nú flutt til hallar einnar á Englandi, og hafðar á henni sterkar gætur; menn voru nefndir í gjörð, og María kvaddi þá til, er halda skyldu svörum og vörn uppi af hennar hendi fyrir gjörðarmönnum. Murray jarl gekk sjálfur að dómum, og bar sakir á drotningu um vitorðið, og sýndi ýms bréf og skilríki til þess að færa sönnur á sitt mál. Nú bjuggust allir við, að talsmenn Maríu mundu færa fram vörn og sýna sýknu hennar af málinu, en í þess stað fóru þeir fram á, að allri ransókn væri þegar hætt, og síðan skyldi samið og sætt á málið. Það vildu hinir ensku gjörðarmenn als eigi; var þá hætt við svo búið. Elísabet lýsti yfir því, að hún vildi eigi sjá Maríu fyr en hún hefði hreinsað sig algjört undan ámæli því, er á hana var borið. Fór það svo, að þær sáu aldrei.

Um þessar mundir varð órói nokkur á Englandi af katólskum mönnum, er leysa vildu Maríu úr varðhaldi og bjarga síðan trú sinni; en þeir fóru ráðlauslega, og fekk Elísabet eytt flokki þeirra. Nú kom páfinn til sögunnar, og lét það boð út ganga, að Elísabet hefði fyrirgjört drotníngartign og ríki sínu, en þegnar hennar lausir allra mála við hana. Elísabet lét hart mæta hörðu, og gaf út snarpari lög en áður gegn katólskum mönnum í ríki sínu.

Á Skotlandi var hin mesta óöld og flokkadrættir. Murray var drepinn, og drotníngarmenn börðust við mótstöðumenn sína. Elísabet gjörði hvað hún kunni til að koma þar friði á, og kvaðst mundi gefa Maríu lausa, ef Skotar vildu ganga að þeim skilmálum, er hún setti þeim. En Skotum var mörgum svo illa við Maríu, að eigi var nærri því komandi, og fórst það þá fyrir. Árið 1571 var nýr samblástur á Englandi til þess að ná Maríu úr varðhaldi, en það samsæri komst upp, og voru oddvitar teknir af lífi. Svo var þíngmönnum í alþýðuhúsinu — neðri málstofu hins enska parlaments — gramt í geði við Maríu, að þeir báðu drotníngu, að María væri tekin og þínd til sagna; en það vildi Elísabet með engu móti. Hefir sú harka þíngmanna að líkindum komið af því, að um það leiti (1572) barst fregnin af hinum miklu níðingsverkum, sem katólskir menn unnu *blóðveizlunóttina* á prótestöntum í París, og urðu siðabótamenn á Englandi og annarstaðar bæði hryggir og reiðir við þau hörmulegu tíðindi, og bjuggust við öllu illu af katólskum mönnum. Filippus annar og kardinallinn af Lóthringen höfðu, hvor um sig, stofnað skóla á Frakklandi; í þeim skólum kendu kristmúnkar enskum mönnum katólskum, er farið höfðu af landi burt, og sendu þá síðan, þegar þeir voru fullnuma, heim á ættjörðu sína, til þess að styrkja hina fornu trú og kirkju, og æsa sem flesta gegn Elísabetu. Komu þessir katólsku klerkar á hverju ári til Englands, og ráku djarflega sitt erindi. Það leiddi til þess, að einn þeirra, er *Mayne* hét, var hengdur árið 1577, og stjórnin enska tók að ofsækja katólska menn þar í landi. María hafði nú setið 13 ár í varðhaldi og verið hart haldin; hún ritaði þá (1582) Elísabetu bréf og taldi henni raunir sínar og beiddist vægðar á þeim, gat þess og, að hún vildi afsala sér stjórn í hendur Jakobi syni sínum, en vera sjálf kyr á Englandi, undir tilsjón þeirra manna, sem til þess yrðu settir. Elísabet trúði henni eigi, og varð því ekki við tilmælum hennar. Jakob konungur, sonur Maríu, gjörði als engar tilraunir til þess að hjálpa móður sinni, þó honum stæði það til boða. Alltaf var öðru hverju verið að gjöra samtök og samsæri til þess að ráða Elísabetu af dögum, en ná Maríu úr varðhaldi; menn þóttust því vita, að María mundi vera í ráði með þessum samsærismönnum, og því var það að lögum gjört árið 1584, að hver sá skyldi tekinn undir ransókn, sem vekti

ófrið til að styrkja þann til ríkis, er tilkall gjörði til konungdóms. Árið eptir varð sá atburður, er ræð því til lykta, hver endir varð á kjörum Maríu. Einn úngur og ættgöfugur maður að nafni *Babington*, og fleiri menn með honum, tóku ráð sín saman til þess að myrða Elísabetu, en frelsa Maríu. *Walsingham* ráðgjafi Elísabetar fekk komizt að fyrirætlan þeirra, og voru þeir teknir og hafðar af þeim sannar sögur; fundust þá hjá þeim bréf frá Maríu Stúart, er sýndu, að henni hafði verið kunnugt um ráðagjörð þeirra. Voru þeir síðan teknir af lífi, en rannsókn höfðuð gegn Maríu; hún neitaði að hafa nokkra vitneskju um eða þátt í samsæri þeirra *Babingtons*, en alt um það var hún dæmd til dauða, og parlamentið samþykkti þann dóm fáum dögum síðar; beiddi Elísabet þjóðþingið enn að nýju, að athuga þetta vandamál sem best og finna til ráð, ef kostur væri, að hún sjálf mætti vera óhult um líf sitt, og í annan stað, að Maríu yrði svo gætt, að hún skaðaði engan en haldi þó lífi. Þingið svaraði einum rómi, að það sæi engin úrræði til þess. Elísabet lét nú kunngjöra dóminn, en hikaði við að láta framkvæma hann. Þó kom þar að þetta var gjört, og var María hálshöggvin 8. febr. 1587. Lét María Stúart þannig líf sitt á 46. aldurs ári, og hafði setið 19 ár í varðhaldi, og stundum verið hart leikin.

Um það leyti sem María Stúart andaðist var hagur prótestanta mjög misjafnlega staddur. Í Frakklandi ræðu hinir katólsku bandamenn (*Ligue*) öllu, á Niðurlöndum fór veldi Filippusar annars vaxandi sökum sigursælda Alexanders Farnese. Elísabet hafði að vísu styrkt prótestanta, trúarbræður sína, bæði á Frakklandi og á Niðurlöndum, en farið þó hægt og gætilega að öllu. Það voru að vísu orðnar dylgjur miklar með Spánverjum og Englendingum, en ekki fullur fjandskapur. En hans var eigi langt að bíða. Spánverjar og Portúgalsmenn höfðu verzlun alla í Ameríku og á Indlandi, og öfluðu þar bæði fjár og frama. Þetta fréttu Englendingar sem aðrar þjóðir. Elísabet kom fótum undir sjómensku Englendinga. Þeir tóku sig nú til, og höldu út í heim þángað sem Spánverjar höfðu áður farið, og urðu þeim þar óþarfir gestir. Þegar einhverjum gekk vel, vaknaði hugur hjá öðrum til slíkra ferða og framkvæmda og gekk svo koll af kolli. Náðu þá ýmsir enskir menn allmiklum auði og

frama, en lángfrægastir urðu þeir *Franz Drake* og *Cavendish*. Drake varð fyrstur manna af Englandi til þess, að sigla alla leið umhverfis jörðina, og komast heim aptur heilu og höldnu og með offjár. Það var 1580 er hann kom heim úr langferð þessari; var þá mikið um dýrðir í Englandi, og bauð hann drotníngu til ríkuglegrar veizlu á skipi sínu. Hann fór síðan fleiri ferðir vestur um haf, og varð Spánverjum hinn óþarfasti maður. Hann varð aðmíráll og andaðist 1596. Cavendish fór víða með Afríkuströndum, og ónáðaði Spánverja þar sem hann hitti þá. Þegar hann kom heim aptur til Englands, og lagði skipum sínum inn í Themsljótið, lét hann menn sjá, að hann hefði auðgæzt, og hafði segl öll af «damaski», en allir sjóliðar hans gengu á silkiklæðum. Það var um þessar mundir að enskur farmaður, að nafni *Valter Raleigh*, nam land í Norðurameríku (í bandaríkjunum þeim sem nú eru) og kallaði landnám sitt *Virginíu* (þ. e. meýjarland) til heiðurs við drotníngu sína, er var meýkonungur. Hann var síðan herskipaforingi, og barðist við Spánverja, og jafnan í förum, en átti marga ófundarmenn, og var loks tekinn af lífi á dögum Jakobs fyrsta (1618). Virginía varð enskt skattland undir krúnuna.

Enskir farmenn gjörðu Spánverjum mikinn skaða bæði fyrir vestan haf og hér í Norðurálfunni. Filippus annar lét það í móti koma, að hann styrkti fjendur Elísabetar hvar sem þeir voru, en ekki kvað hann upp úr með fjandskapinn fyrir en Elísabet hafði sent Leicester til Niðurlanda, og látið taka Maríu Stúart af lífi. Þá þótti Filippusi eigi lengur viðvært, og sagði Elísabetu stríð á hendur. Það var ráð hans, að vinna England í einni ferð og einu vetfángi, og sjá svo um, að þjóð sú, er þar byggði, gjörði sér engan skaða framar; og til þess að eigi skyldi undan draga, þá bjó hann árið 1588 flota þann hinn mikla, er slíkur hafði aldrei fyrir sézt, og sendi hann til Englands. Flotinn var ógurlega mikill; Filippus sjálfur kallaði hann «hinn ósigranda», og hættan vofði yfir Englandi. En Elísabet og þegnarnar hennar sýndu þá, að dugur var í þeim. Drotníng fór um landið og eggjaði menn sína til drengilegrar viðtöku; varnir voru settar með sjó fram alstaðar þar sem búizt varð við landgöngu; skip voru búin og mönnuð sem best varð; allir vildu verja fóst-

urjörð sína og fjör og frelsi, og mátti heita, að vopn væri þá í hvers manns hendi á Englandi.

«Hinn ósigrandi floti» varð sigraður, eins og fyr er ritað, og Englendingar glöddust og styrktust af sigri þessum; þeir fundu, að þeim var vísað til atvinnu og auðs á hafinu, og hinn starfsami þjóðarandi þeirra vaknaði nú algjörlega. Nú hófst sigling þeirra og verzlun af alefli; enskir kaupmenn ráku sumir verzlun inn um Eystrasalts strendur, sumir austur á Tyrkland og um Miðjarðarhaf, og enn aðrir út á Indland; enskir víkingar sátu fyrir Spánverjum, þar sem þeirra var von, og tóku fjölda skipa fyrir þeim. Einhverju sinni náðu enskir víkingar 2 spánverskum skipum, er höfðu meðferðis meðal annara gersema 2 millíónir af syndakvittunarbréfum. Víkingar höfðu þeirra að vísu engin not, en Filippus annar hafði keypt þau í Rómaborg fyrir 300 þúsundir «gyllina», og hefði að minsta kosti fengið 5 millíónir fyrir þau á Indlandi, ef þau hefðu komizt alla leið og öll til skila. Auk þessa gjörði Elísabet Filippusi og öðrum fjandmönnum sínum mikinn skaða, með því að styrkja Niðurlöndin og Hinrik af Navarra. Árið 1596 unnu Englendingar *Cadix*, mikla og auðuga borg á Spáni, og fengu þar ógrynni fjár. Þannig varð Elísabet Filippusi öðrum alstaðar til fyrirstöðu; dagnaði hennar og hamíngju er það að þakka, að ráð og fyrirætlan Filippusar urðu að engu, en það var, að Spánn skyldi ná yfirráðum allrar Norðurálfunnar, og þau yfirráð byggð á katólsku trúnni.

Þegar hér var komið, var Filippus eigi fjarlægur því, að semja frið, en Elísabet vildi eigi, því að henni þótti gott, að menn sínir hefðu nokkuð að starfa meðan þeir vildu, og meðan alt gekk að óskum; þeim var framför að því. Búrleigh, ráðgjafi hennar, er þá var maður gamall, eggjaði mjög til friðarins, en annar maður var þar, sem *Essex* hét, úngur greifi og framgjarn, og mesta eptirlætisgoð drotningar; hann stóð fast í móti hinum gamla ráðgjafa, og vildi engan frið hafa. Búrleigh dó 1598 og hafði þjónað drotningu sinni og Englandi bæði vel og lengi.

Essex greifi er nafnkendur orðinn af afdrifum þeim, er hann hrepti. Hann var stjúpsonur Leicesters, þess er sendur var til hjálpar Niðurlendingum; var Essex þar í förinni með stjúpa sínum, og þótti vera hinn vaskasti maður; hann var skrautmenni mikið, manna gjörfilegastur og vinsælastur, og svo mikill ást-

vinur drotningar, að sagt var að hún gæti fát á móti honum látíð.

Á ofanverðum dögum Elísabetar var róstusamt á Írlandi, eins og löngum hefir þar við brunnið. Síðan um daga Hinriks annars¹ hafði Írland, í orði kveðnu, legið undir England, en það var þó í raun rétttri ekki nema austurhluti landsins, er Englendingar höfðu yfirráð yfir. Þegar Elísabet reyndi að fá Íra til þess að taka við siðabótinni, gjörðu þeir uppreisn, og gátu drotningarmenn eigi við ráðið; sendi hún þá allmikið lið til eyjarinnar, gjörði Essex greifa að landstjóra á Írlandi, og setti hann yfir herinn. Hann var því starfi eigi vaxinn, og fór halloka fyrir Írum, og varð að gjöra vopnahlæ og samninga við þá, og þótti verða undir. Þessi óhöpp hans færðu öfundarmenn sér í nyt, og rægðu hann á allar lundir við drotningu; barst honum það til eyrna, og af því að hann bjóst við engu góðu, brá hann við, og fór að fornspurðri drotningu frá liði sínu til Lundúna á fund Elísabetar; tók hún honum að vísu betur en við mátti búast, en lét þó ransaka málstað hans. Lauk þeirri ransókn þannig, að landstjóra embættið var af honum tekið, og honum var bannað að láta sjá sig við hirðina. Þá reiddist Essex og leitaðist við að hefna sín bæði á mótstöðumönnum sínum og drotningunni; varð hann um það sannur að sök, og var dæmdur til dauða og höggvinn 1601; var hann þá 33 ára gamall. Margur harmaði forlög þessa manns, og drotning eigi minst, þó að hún fengi eigi viðráðið. Eigi mjög löngu þar á eftir andaðist Elísabet drotning, sjötug að aldri (24. marz 1603); hafði hún litlu fyrir andlát sitt lýst yfir því, að *Jakob sjötti*, Skotakonungur, og sonur Maríu Stúart, skyldi erfa ríki eftir sig á Englandi. Ýmsir sagnaritendur hafa ásakað Elísabetu um hörku og jafnvel grimd í stjórn sinni; verður því að vísu eigi neitað, að hún beitti hörðu við Maríu Stúart, og marga katólska menn í ríki sínu, sem af lífi voru teknir á stjórnarárum hennar. En þess ber þó að gæta, að hún lifði á þeim tímum, er aldarháttur var miklum mun harðari en nú á sér stað; og hvað komst hennar harka í samjöfnuð við þá grimd, er katólskir menn sýndu í öðrum löndum t. a. m. á Frakklandi og á Spáni? Elísabet átti og alla jafna í vök að verjast móti páfanum, Filippusi öðr-

1) Samanber Miðaldasögu, bls. 129—130.

um og hinni frakknesku stjórn, er höfðu sína erindisreka víðs-vegar um England, til þess að æsa óeirðir gegn henni, og reka hana frá völdum, eða deyða að öðrum kosti; hún átti því löngum bæði fjör og fê að verja. En hennar framúrskarandi dugnaður og vitsmunir urðu hér sigursælli. Englandi fór stórum fram í öllum greinum um hennar daga. Siðabótin náði þar fullkominni fótfestu, siglingar og verzlun, og allir atvinnuvegir tóku stórkostlegum framförum. Vísindi og bókmentir þróuðust allvel, og að minsta kosti voru á þessu tímabili uppi tveir hinir frægustu vísindamenn Englendinga: *Vilhjálmur Shakespeare* (1564—1616), ef til vill hið mesta skáld, sem nokkru sinni hefur uppi verið, og *Franz Baco af Verulam* (1561—1626), stjórnvitríngur og heimsspekíngur öllum meiri á sinni tíð; hafa báðir þessir afbragðsmenn haft mikil áhrif á mentalíf þjóðar sinnar. Elísabet var ráðrík í stjórn sinni, eins og þeim Túdorsmönnum var gjarnt, þó gætti hún sanngirni við parlamentið, þegar því þótti hún kreppa að réttindum þess, og það kvartaði undan því; þess vegna var hún jafnan vinsæl af þegnum sínum, og allir gátu séð, að England var í miklum uppgangi, og óx að virðingu í augum annara þjóða.

Stúarta-ættin hefst til ríkis. England og Skotland sameinast. Jakob fyrsti (1603—1625).

Ríkisstjórn Túdors-ættarinnar á Englandi var lokið þegar Elísabet dó, og komu þá Stúartar þar til ríkis; var Jakob (6.) Skota konúngur viðstöðulaust til konúngs tekinn á Englandi og nefndur þar *Jakob fyrsti*. Hann hafði setið aðgjörðalaus og látið sig litlu varða, þó móðir hans væri dæmd til dauða og líflátin, því að bæði hafði honum verið innrættur frá barnsbeini viðbjóður á páfatrúnni, og fældi sá viðbjóður hann frá móður sinni, og í annan stað vildi hann forðast að styggja Elísabetu, til þess að missa eigi tilvonandi konúngdóm á Englandi eptir hennar dag.

Þannig sameinaðist England og Skotland undir einum konúngi, en þó var sú sameining engan veginn náin, því að Skotland hafði þjóðþing og löggjöf fyrir sig þángað til 1707, en af því að England var meira og andugra land, og konúngur hafði þar aðsetu, þá ræð England mestu, þegar um útlend málefni var að ræða.

Uppreisn sú, sem átti sér stað á Írlandi, og áður var um getið, var niðurbæld og landið friðað um stund; það var því alllíklegt, að þessi þrjú þjóðlönd, England, Skotland og Írland, væru öll til samans mikið og völdugt ríki, en það reyndist þó eigi svo, meðan Jakob fyrsti lifði og réð fyrir þeim (1603—1625), því að hann var ónýtur konungur, og vegur Englands þótti mínka en eigi vaxa meðan hann sat uppi. Hann var allvel lærður, en þóttist vera stórvitur; hann var ákaflega drambsamur og drotnunargjarn, og lét ýmsa menn, sem engan veginn voru þjóðhollir, ráða mestu í stjórnarstörfum sínum. Af þeim mönnum er hertoginn af *Buckingham* nafnkendastur. En það er til marks um drotnunargirni Jakobs, að hann, sem var alinn upp í *presbýtera-trúnni* á Skotlandi, vildi þó þröngva Skotum til að taka *biskupa-trúna* ensku, af því að konungar höfðu miklu meira vald yfir kirkju og klerkalýð eptir hinni ensku þjóðtrú, en eptir hinni skozku. Katólskir menn á Englandi höfðu húizt við góðu af syni Maríu Stúart, og Jakob var þeim undir niðri engan veginn móthverfur, en hann vildi með engu móti, að páfinn fengi yfirráð í ríki sínu; hann vildi hafa þau sjálfur. Þess vegna brást hann katólskum mönnum algjörlega. Fengu þeir nú hið stækasta hatur á honum, og því var það, að þeir ásamt einum erindsreka kristmúnkanna stofnuðu hið voðalega samband, sem menn hafa nefnt *«púðursamsærið»*, og laut að því, að sprengja konung og parlamentið í loft upp, þegar hann og þingið sæti á ráðstefnu í einu og sama húsi. Í því skyni höfðu samsærismenn komið púðri í kjallara einn undir þinghúsinu, og ætluðu svo að bera eld að og kveikja í öllu saman, en svo heppilega vildi til, að einn af þingmönnum fékk njósnir af og gat varað menn við í tíma, og afstýrt miklum vandræðum (1605). Urðu nú allir katólskir menn á Englandi að vinna konungi trúnaðareiða af nýju, og heita honum æfinlegri trú og hollustu, enda þótt páfinn segði og byði hið gagnstæða.

Á dögum Jakobs fyrsta byrjar hið merkilega stríð milli konungdóms og parlaments á Englandi, sem alt af átti sér stað, meðan Stúartar sátu þar að ríkjum. Jakob reyndi hvað hann gat, að skerða réttindi þingsins (*parlamentisins*); en þó að menn hefðu þolað Elísabetu slíkt, þá var það sök sér, því alþjóð manna virði hana, en um Jakob var alt öðru máli að gegna. Elísabet

hafði við haft hinn mesta sparnað, og þurfti einatt á minna fæ að halda, en þingið vildi veita, og fyrir þá sök var hún þinginu miklu óháðari en ella hefði verið, en Jakob var eyðslumaður og opt í fjárprotum, og varð svo löngum að beiðast leyfis af þinginu til að leggja nýja skatta og skyldur á landið. Þingið var eigi ljúft á það, og þegar konungur vildi beita stórmensku og sagði, að sá réttur, sem þingið hefði, væri veittur því af einberri miskun konúnganna, þá lét þingið ekki á sig gánga, en gætti réttinda sinna með greind og manndómi. Í viðskiptum sínum við útlendar þjóðir var Jakob konungur bæði hræddur og huglaus; hann samdi frið við Spánverja þegar er hann var kominn til ríkis; hann sagðist úr sambandi við Niðurlendinga, og leitaði jafnvel kvonfánga á Spáni til handa syni sínum, og var Englendingum að öllu þessu hin mesta skapraun. En þó ekkert yrði úr þessu spánska kvonfángi, þá kvæntist þó *Karl* konungsefni (sonur Jakobs fyrsta) litlu síðar *Henriettu* af Frakklandi, systur Loðvíks konúnga þrettánda; var konungsdóttir katólsk og hafði um sig katólska menn, og líkaði Englendingum það illa. Jakob konungur átti dóttur eina, er Elísabet hét, hana gipti konungur *Friðriki* kjörfursta af Falz, og gjörðu prótestantar í Böhmen *Friðrik* að konungi sínum, en eigi hafði Jakob lund eða þrek til þess að styðja *Friðrik* tengdason sinn eða prótestanta, er stórum þurftu þá liðveizlu við, og var hin enska þjóð þó allfús til liðveizlu við þá. Jakob fyrsti dó 1625, og kom þá *Karl fyrsti* sonur hans til ríkis.

Frakkland um daga Hinriks annars og sona hans (1547—1589).

Nú víkur sögunni til Frakklands og þar að, sem Franz konungur fyrsti var dáinn (1547), en sonur hans *Hinrik annar* kominn til ríkis (1547—1559). Franz fyrsti hafði verið nýtur konungur í mörgu, og margt vel gefið, þó sumt megi að honum finna, en *Hinrik annar* var lítt nýtur konungur, og vildi helst ekki koma nærri stjórnarstörfum, heldur fela þau öðrum á hendur. Drotníng hans hét *Katrín* af Medicea-ættinni í Flórenz, og optast nefnd *Katrín af Medicis*; hún var grimm í skapi, slægivitur og illgjörn í ráðum, og vildi eiga sem mestan þátt í ríkisstjórninni, þó hún kæmi sér eigi algjörlega við meðan *Hinrik*

lifði og frilla hans, *Díana af Pottiers*, sem hafði alt vald yfir konungi. Það var fyrst þegar Hinrik var dáiinn, en synir hans og Katrínar komnir til ríkis, að Katrín drotníng ræð mestu á Frakklandi og sýndi hver hún var.

Franz konungur hafði ráðið Hinriki syni sínum ýms heilræði á banasænginni; eitt var það, að láta eigi *Guisana* fá ofmikil völd í hendur. Hinrik fylgdi eigi þeim ráðum. En það er að segja frá *Guisum*, að þá eru helzt nefndir til bræður tveir, *Franz* hertogi af *Guise*, hinn hraustasti maður og herkænasti, og *Karl* erkibiskup og kardináli, og jafnan nefndur „*kardínállinn af Lothringen*“¹. Þeir voru komnir af *Renatus* hertoga af *Lothringen*, sem forðum átti í höggi við *Karl* djarfa. Kardínállinn var vitur maður og kænna við ríkisstjórn. Þeir bræður voru ákaflega drotnunargjarnir, og hafði Franz konungur sæð það fyrir, að þeir gætu orðið konungi ofjarlar ef svo bæri undir, og fyrir því varað son sinn við þeim. Þeir bræður höfðu báðir komið sér svo í mjúkinn hjá drotníngu og konungsfrillunni, að þeir ræðu manna mest við hirðina og alloptast til hins verra.

Þess er áður getið, að Hinrik annar gekk í ófriðinn milli Mórizar af Saxen og Karls keisara hins fimmta, og brautzt inn í *Lothringen*, sem þá lá undir Þýzkaland, og lagði þar undir sig 3 biskupsdæmi: *Mez*, *Toul* og *Verdun*, hin ágætustu hérðð. Styrjöldinni milli Frakka og keisarans lauk að sönnu með vopnablið því, er þá var sett, en ófriður tókst af nýju milli Frakklands og Spáns, þegar Filippus annar var tekinn þar við ríki. Í þeim ófriði vann Franz af *Guise* borgina *Calais* af Englendíngum, sem legið hafði 210 ár undir England. Sá ófriður endaði með friðnum í *Chateau Cambresis* (1559), og hallaðist á Frakka í þeim viðskiptum þeirra við Filippus konung.

Á dögum Franz fyrsta kom *Calvínstrú* („*reformeraða trúin*“) til Frakklands, og fékk þar marga áhángendur, þó konungur væri mótsnúinn. Þegar Hinrik annar var kominn til ríkis hélt hinu sama fram. Siðabótamenn fjölguðu óðum á Frakklandi, einkum suður í landi. En þó að þeir feðgar Franz og Hinrik styrktu siðabótamenn á Þýzkalandi gegn keisaranum og þeim Habsborgarmönnum, þá ofsóttu þeir engu að síður siðabótamenn heima á Frakklandi, og það stundum af svo mikilli grimð, að

1) María, systir þeirra bræðra, var móðir Maríu Stúárt.

bryllilegt er til frásagna. Guisarnir og Diana af Poitiers voru hinir ótrauðustu hvatamenn til ofsókna þessara. En allt um það, mikill fjöldi mentaðra manna, og margir aðalsmenn á Frakklandi tóku við Calvíns trú, og voru þeir allir, sem þeirri trú fylgdu þar í landi, nefndir *Hugenottar*. Konúngur og hirð hans, og alþýðumenn, sem enga mentun höfðu, höldu katólskum sið. Á kirkjupingi einu í París (1559) settu Hugenottar fastar reglur um trú sína og kirkjuleg málefni. Á hinu sama ári andaðist Hinrik konúngur með þeim atvikum: Það var glaumur mikill og gleði í konungsgarði og mikið um dýrðir, því að hann gipti þá dóttur sína Filippusi öðrum; var það þá eitt til skemtunar haft, að ríða turnreiðar eða burtreiðar. Hinrik var hverjum manni fræknari í þeim leik og braut burtstengur fyrir mörgum manni. Loks skoraði konúngur á einn úngan riddara, *Montgomery* greifa, að þreyta þenna leik við sig; ríðust þeir síðan á og brotnaði burtstöng greifans á járnhlífum konunga, en oddurinn hrökk í auga konungi og snerti heilann; þjáðist konúngur af sárinu nokkra daga og dó síðan (10. júlí 1559). Var nú Franz sonur hans til konungs tekinn og nefndur *Franz annar* (1559—1560). Hann var elztur þeirra Hinriks sona, og þó að eins 16 vetra, veikur á sál og líkama og lítt fallinn til ríkistjórnar. Hann var nýkvæntur Maríu Stúart. Komust nú Guisarnir, móðurbræður drotningar, í enn meira gengi en áður, og Katrín ekkjudrottning var aldavinur þeirra; stóð mörgum manni stuggur af því sambandi, en þó engum meir en *Bourbona-ættinni*. Sú ætt var komin af Loðvíki konungi níunda¹, og stóð næst ríkiserfðum á Frakklandi eptir Hinrik annan og hans niðja. Af Bourbonaættinni voru, þegar hér var komið, þessir tveir hinir helztu: *Anton*, er hafði fengið með konu sinni hérað eitt, er *Bearn* hét, og sem var nokkur hluti af hinu forna konungsríki *Navarra*; var Anton nefndur konúngur af Navarra. Hinn var *Loðvík* prinz af *Conde*, bróðir Antons. Bræður þessir voru all-ólíkir, því að Anton var kjarklíttill og vissi stundum elgi hvern flokkinn hann skyldi fylla, en Loðvík af Conde var framkvæmdarmaður hinn mesti, og þar á ofan góður drengur. Guisarnir höfðu geyg af honum. Hann fékk í fylgi með sér ýmsa menn af Hugenottum, er mikils var um vert t. d. *Caspar Coligny*, aðmiral, einn hinn mesta ágætis-

1) Sbr. Miðaldasögu, bls. 158.

mann á Frakklandi. Bourbonar höldu þessu næst fund í Verdun og réðu ráðum sínum. Urðu allir fundarmenn á það sáttir, að nauðsyn bæri til að Guisum væri steypt úr völdum, en menn greindi nokkuð á um hitt, hver ráð skyldi til þess hafa. Coligny lagði það til, að farið skyldi með spekt að öllu, og drjúgast mundi að fá komið Katrínu drotningu á sitt mál. Var þá Anton konungur sendur af hendi fundarmanna til drotningar; var honum tekið heldur fálega við hirðina; Katrín svaraði engu góðu, en Franz konung fékk hann hvorki að heyra nè sjá. Prinzingum af Conde hafði áður verið gramt í geði til konungs og Guisanna, en nú vesnaði um allan helmíng. Coligny gaf það ráð, að Bourbonar skyldu sameina sig Huguenottum og gjöra þeirra málefni að sínu. Var þetta viturlegt og hvorumtveggja hinn mesti styrkur, enda líkaði öllum það vel. Huguenottar voru orðnir svo fjölmennir, að sagt var um þær mundir, að kirkjur þeirra á Frakklandi væru frekar 2000 að tölu. Nú vildi stjórnin fyrir hvern mun eyða þessum flokki sem fyrst, og lét það boð út ganga, að rífa skyldi til grunna allar kirkjur og samkunduhús Huguenotta, en ef þeir dirfðust að halda helgar tíðir, þá skyldu þeir engu fyr týna nema lífinu. Menn voru sendir í allar áttir til að njósna um athafnir þeirra; var þá margur góður maður tekinn, fyrir litlar eða engar sakir, og vægðarlaust ráðinn af dögum. Þá urðu til nokkrir menn af Huguenottum og réðu aðför við Guisana, en þeim bárust njósnir af ráðagerðinni og drápu þá flesta, er í því sambandi höfðu verið, en Conde var eignað, að hann væri upphafsmaður sambandsins. Guísarnir náðu honum með svikum á sitt vald og var hann dæmdur til dauða. En þá bar svo til, að Franz konungur andaðist (1560). Kom þá bróðir hans *Karl 9.* til ríkis; hann var 10 vetra gamall og gat engu stjórnað, en móðir hans Katrín af Medicis, hafði öll landráð hans vegna, og gekk svo meðan konungur lifði. Það er sagt, að Katrín hafi hvatt en eigi latt sonu sína til als þess munaðar og allrar þeirrar óhæfu, er þá átti sér stað við hirðina í París, til þess að þeir sneru huganum frá öllum stjórnarstörfum, en að hún gæti ein öllu ráðið. En hina helztu og gófugustu menn í landinu, sem hún hafði einhvern beyg af, þá rægði hún saman, til þess að þeir ættust ílt við og dræpu hvorir aðra; þannig tókst Katrínu að byggja upphéð sína á niðurlægingu annara. Hún

gaf þess vegna Loðvík af Conde lausan af varðhaldi, til þess að hann skyldi halda Guísunum í skefjum, því að þeirra ofurvald óttaðist hún nú mest. Hún vissi sem var, að Conde og allir Hugennottar hötuðust við Guisa og allan þann flokk, er þeim fylgdi. Þessu næst fékk hún því til leiðar komið, að í janúar-mánuði 1562 var það nýmæli gjört, að Hugennottum var leyfð guðspjónustugjörð á landsbygðinni fyrir utan borgir og bæi; var það leyfi einkum að þakka góðgirni og viturlegum ráðum *L' Hospítals*, er þá var kanselleri, og hinn mesti ágætismaður. Þá var það einhverju sinni, að Franz Guise var á ferð og flokkur manna með honum, og komu að þorpi einu í Champagne, er Vassy hét. Þar voru fyrir nokkrir af Hugennottum og fluttu helgar tíðir; veittu þeir Guise þeim þegar aðgöngu og drápu þar marga menn, bæði konur og karla; þótti katólskum mönnum þetta karlmannlega gjört af Guise, og tóku honum tveim höndum, er hann kom til Parísar.

Um þessar mundir (1562) gjörðu Guisarnir hvað þeir kunnu til þess að fá Anton af Navarra til að skiljast við Hugennotta og þeirra málefni, og tókst þeim það með tilstyrk tveggja sendiherra, er þá voru í París; var annar frá páfa en hinn frá Filippusi öðrum; Filippus bauð Anton konungi Sardiníu til forráða, ef hann vildi skerast úr sambandi við Hugennotta; gekst Anton fyrir því tilboði og sagði skilið við bandamenn sína. Katrín drottning læzt vera vinur Hugennotta um þessar mundir og beiddi Conde að láta eigi hugfallast, enda var henni ríkt í skapi, að Guisarnir næðu eigi meiri völdum en þeir þá þegar höfðu. Nú var byrjað *trúarstríð* það hið mikla, er stóð því nær um mannsaldur á Frakklandi (frá 1562 til 1593), og var háð af hinni mestu grimd. Hugennottar brutu krossa fyrir katólskum mönnum og heilög tákn, en hinir gjörðu alt ílt í móti; og til þess, að auka enn meir á eymdir Frakklands, leituðu hvorirtveggja sér liðs hjá útlendum konungum, og fengu þaðan bæði fólk og fè. Filippus var jafnan til taks þá er hans var leitað um hjálp gegn siðabótamönnum, en Englendingar og prótestantar á Þýzkalandi vildu eigi að trúarbræður þeirra á Frakklandi yrðu undirokaðir eða drepnir niður. Eigi hafði ófriður lengi staðið, áður mjög tók að hallast á Hugennotta, því að katólskir menn höfðu ofur-efli liðs. Franz Guise vann af þeim ýmsar borgir, þar á meðal

Rouen (*Rúðu*); þar féll Anton af Navarra. Því næst settist Franz Guise um *Orleans*, hinn helzta aðseturstað Hugennotta; en er að því var komið, að katólskir menn ynnu þá borg, var Guise myrtur af einum þeirra Hugennottanna. Varð Katrínu þá hughægra, og tók að miðla málum með mönnum; samdist þá friður með þeim (katólskum mönnum og Hugennottum) í borg þeirri, er *Amboise* heitir (1563). Hinir helztu og auðugustu lénsherrar fengu fullkomið trúarfrelsi fyrir sig og sína undirmenn, bæði heima á búgörðum sínum og á leigulöndum, aðrir aðalsmenn á heimilum sínum, en borgarar á einum tilteknum stað í hverju héraði. París og nágrenni borgarinnar var undanskilið þessari friðargjörð. Coligný hafði eigi viljað ganga að þessum friðarkostum, því að hann grunaði að Katrín mundi eigi trygg, og vildi hann að haldið væri fram ófriðnum fyrir því að líkindi voru til, að Hugennottar yrðu sigursælli en áður, eptir að Franz Guise var fallinn. En þeir urðu færri sem fylgja vildu ráði Colignýs, og fórst það svo fyrir. Franz Guise átti 3 sonu á lífi, er hann var veginn, en þeir voru enn þá svo úngir, að eigi þurfti þá að óttast. En kardinállinn af Lothringen og *Montmorency* marskálkur, gamall hershöfðingi, voru nú oddvitar katólskra manna, og hinir áköfustu; og þó að nú hétu friður í landinu um þessar mundir, þá var sá friður eigi tryggari en svo, að samsæri var gjört, og átti að myrða í einu 300 Hugennotta í París, en Katrín komst að því og lét grípa samsærimenn og hengja þá framan á húsum þeirra, og sluppu Hugennottar í það skipti. Konungurinn Karl níundi var nú kominn til lögaldurs; þótti hann allvel viti borinn, en grimmur og ótryggur, og væntu menn eigi góðs af honum. Hann var þessi árin á ferð um ríki sitt og Katrín móðir hans með honum. Þá var það einhverju sinni, að þau hittu hertogann af Alba, sem áður er nefndur, og áttu tal við hann um ýmsa hluti. Alba var svarinn óvinur siðabótamanna, og gaf það ráð, að drepnir væru allir Hugennottar. Katrín kvaðst hlífa vilja foringjunum. „Sízt þeim“ mælti Alba, „tíu þúsundir froska eru margfalt minna verðir en eitt *laxhöfuð*“. En laxhöfuð var markað á skjöld Colignýs. Katrín festi þessi orð í huga sér eins og síðar kom fram.

Fáleikar voru miklir með mönnum, og fyrirsjáanlegt, að til vandræða horfði, þó Katrín reyndi, eða létu sem hún reyndi, að

afstýra þeim. Hugennottar kváðu kosti sínum þröngvað á ýmsá vegu, og skilmála við sig rofna, og byrgðu sig að vopnum og vistum sem bezt þeir kunnu, því að árása væntu þeir á hverri stund; katólskir menn sögðu hinsvegar, að Hugennottar væru miklu heimtufrekari en lög og samningar leyfðu þeim, og þættust hafa öll hin sömu réttlindi sem þeir er væru réttrar trúar (þ. e. katólskir menn). Konungur vildi láta beita hörðu við Hugennotta, og það tjáði eigi, þó L'Hospital kanselleri hans reyndi að telja hann af því. Konungur hafði liðsafnað, og lét í veðri vaka, að svo væri gjört vegna ófriðarins á Niðurlöndum. En Conde og hans menn vissu vel, hvað konungur ætlaði sér, og beið þessvegna ekki boðanna, heldur bjó liðsmenn sína sem skjótast, og, fyrir en konungur vissi, höfðu þeir Conde og Coligný tekið 50 borgir, og voru komnir með herinn í nánd við þann stað, sem konungur var þá með hirð sinni (í sept. 1567). Skömmu síðar varð orusta hjá bæ þeim er heitir *St. Denis*; höfðu þeir Conde miklu færra lið en konungur, og urðu að láta undan síga. Montmorency var fyrir konungsmönnum, og varð sár til ólífis, og andaðist litlu síðar. Það er mælt, að klerkur einn kæmi til hans og vildi hughreysta hann og búa undir andlátid, en Montmorency beiddi hann verða á burt og mælti: „það er illa þá, ef eg kann eigi að deyja stutta stund, þegar eg hef kunnad að lifa því nær 80 ár.“ Eigi lét Katrín drottning sér það miður líka þó Montmorency félli, og mælti, er hún frétti lát hans: „eg á forsjóninni fyrir tvent að þakka: það fyrst, að Montmorency hefir hefnt konungs á óvinum hans, og það annað, að óvinir konungs hafa frelsað hann frá Montmorency.“

Um vorið eptir (1568) voru grið sett með mönnum og samid um frið, en af því að hvorirtveggja sátu á svikráðum við aðra, þá gat enginn friður á komizt. Hugennottar náðu borg þeirri, er heitir *La Rochelle*; hún stendur við sjó fram og er sterk borg og víggirt; höfðu þeir þar örugt athvarf og sitt hið helzta aðsetur; urðu nú margar orustur og smáar og veitti ýmsum betur, en þá er til höfuðorustu kom, urðu Hugennottar jafnan undan að láta, því að við ofurefli liðs var að etja. Árið 1569 féll Conde, og mistu Hugennottar þar annan sinn mesta og bezta fyrirliða, en öldungurinn Coligný var enn á lífi, og þó hann biði stundum ósigur, þá þreyttist hann ekki og varð aldrei ráða fátt; var hann

Katrínu og katólskum mönnum að sínu leiti eins erfður, eins og Vilbjálmur af Óraníu var Filippusi öðrum, enda lagði parlamentið í París fê til höfuðs Coligný, alt að 50 þúsundum ríkisdala. Um þessar mundir var það, að *Jóhanna* drotning af Navarra, ekkja Antons konungs, sem fyr er nefndur, kom til Colignýs og hafði með sér *Hinrik* son sinn 16 vetra gamlan, hinn mann-vænlegasta. Jóhanna var dóttir Margrêtar, systur Franz konungs fyrsta, vitur kona og góðgjörn, eins og móðir hennar hafði verið, og styrkti Hugennotta af öllum mætti. Þrem árum síðar en hér var komið dó Jóhanna, af völdum Katrínar af Medicis, að því sem sagt hefir verið. Hugennottar tóku nú Hinrik af Navarra til höfðingja yfir sig, þótt úngur væri, en Coligný hafði herstjórn alla á hendi af hans hálfu og í hans nafni. *Hinrik* hertogi af *Anjou*, bróðir Karls 9. og sonur Katrínar af Medicis, hafði yfirstjórn konungsmanna, en helzti sigurinn, sem þeir unnu á Hugennottum við *Moncontour*, var þó eigi honum að þakka, heldur einum af undirforingjum hans, er Tavannes hét. En þó Coligný biði þann ósigur, þá var enn sem fyrri, að hann rétti skjótt við aptur, og var jafnvel geygvænlegri konungsmönnum eptir en áður. Leiddi það til þess, að friður komst á í *Sz. Germain en Laye* (1570), og náðu Hugennottar þar betri kostum en að undanfögnu. Þeir fengu fult trúarfrelsi á landsbygðinni og í mörgum borgum, og þar á ofan til tryggingar. því, að trygðir og friður skyldi haldast, 4 borgir, sem þeir máttu hafa setulið í; ein af þeim borgum var La Rochelle.

Nú var friður orðinn á Frakklandi; Karl konungur, Katrín drotning móðir hans, og hirðin öll, var Hugennottum mjög viggjarnleg, og margir hinna betri manna hugðu, að nú mundi öllum ófriðar stormi lokið, en friður og ársæld fyrir hendi. En sú var enganveginn fyrirætlan Katrínar drotningar. Hún sá að Hugennottar urðu eigi unnir í vopnaviðskiptum með hreysti og drengskap; hér varð því annað til bragðs að taka, og þess vegna kostaði hún kapps um, að gjöra sig í öllu sem blíðasta við þá, og þegar þeir væru orðnir grunlausir, þá að láta hefndina dynja yfir þá eins og reiðarþrumu, og ráða svo marga þeirra af dögum sem auðið yrði. Um þessar mundir kvæntist Karl konungur Elísabetu dóttur Maximilians keisara annars, og Katrín band *Hinriki* af Navarra, hinum unga konungi og foringja Hugennott-

anna, Margrètu (af Valois) dóttur sína til eigin konu. Jóhönnu móður Hinriks leizt miðlúngi vel á þenna ráðabag, og grunaði að eitthvað slíkt mundi undir búa, þó gaf hún samþykki til þess um síðir og fór til Parísar; tók Katrín henni með mikilli blíðu. Coligný var einnig þangað boðið; var hann lengi tregur, en fór þó, er konungur lét segja honum, að hann hefði í huga, að hefja ófrið gegn Spánverjum, og veita Niðurlendingum móti Filppusi öðrum; því að sá hlutur var Coligný kærastur, að geta styrkt trúarbræður sína á Niðurlöndum, er um þær mundir vörðu fjór sitt og frelsi gegn Spánarkonungi. Karl konungur hafði Coligný í miklum hávegum, gaf honum góðar gjafir, og tók hann í sitt ráðaneyti; hirðmenn keptust hver við annan að sýna hinum ágæta öldungi allan sóma, svo að eigi var trútt um, að Katrínu og Hinriki af Anjou, syni hennar, þætti nóg um. Þau óttuðust mest af öllu, að Coligný og hans flokkur fengi um of yfirráð yfir Karli konungi; en kæmi þar að, þá voru yfirráð Katrínar á enda. Við því vildi hún sporna og það sem allrafyrst, enda bar nú vel til veiða, því að hæði Coligný og fjöldi manna af Hugennottum var kominn til Parísar, og dvöldust þar meðan stóð á brúðkaupi konungs og Hinriks af Navarra; voru þar þá veizlur stórar og mikið um dýrðir. Meðan á þessu stóð hafði Katrín og þau Hinrik fengið til mann einn að myrða Coligný, því að í honum þótti þeim veiðurin mest. Það var einn dag (22. ágúst 1572), er Coligný kom frá konungi og gekk um stræti borgarinnar, að skotið var á hann úr húsi einu þar sem leið hans lá fram hjá; tók kúlan einn fingur af hægri hendi hans og særði hann á vinstra handleggi; morðinginn náðist ekki; sló nú miklum ótta á Hugennotta, og kváðu eigi annað fært, en leita sem fyrst á burt úr borginni, því að nú væri mönnum sýnt, að setið væri á svikráðum við þá. En konungur sór og sárt við lagði, að tilræði þetta væri með öllu á móti vilja sínum og vitund, og gjörði hvað hann kunni til að friða Coligný og hans menn; létu þeir þá sefzt og fóru hvergi. Þegar nú tilræðið við Coligný hafði mistekizt, sá Katrín drotning, að eigi mundi svo búið duga, tekur því það ráðs, að hún gengur til fundar við Karl konung son sinn, og nokkrir af hinum æztu tignarmönnum með henni, og skýrir honum frá og leiðir honum fyrir sjónir á marga vegu, að Hugennottar sitji allir á svikráðum við hann, og til þess

að afstýra slíkum vandræðum, sæu þau ein úrræði, að verða fyrri til taks, og drepa alla fyrirliða þeirra, og svo marga menn af þeim flokki, sem til verði náð. Varð sá endir á viðræðum þeirra, að Karl konungur lagði fult samþykki sitt á, að hvert mannsbarn af Hugennottum í ríki sínu yrði drep-
ið. Nú tóku þau Katrín ráð sín saman hversu öllu skyldi til-
haga um manndrápin. Menn skiptu störfum með sér. Tavann-
es hershöfðingi skyldi skýra katólskum hermönnum í borginni frá fyrirætlan þessari, og segja þeim síðan fyrir verkum; en Hinriki hertoga, syni Franz af Guise, sem fyr er nefndur, var ætlað að sjá um, að Coligný yrði veginn; nóttina milli 24. og 25. ágúst (næsta eptir Bartólómeusmessu) skyldu morðvíg þessi byrja, á þeirri stundu, er konungur lét hringja klukkum í höll sinni; þá skyldu blys kveikt víðsvegar um borgina, og járnrek-
endur settar um þver stræti; katólskir menn bera hvítt kross-
mark á höttum, og hvítan dúk um handlegg sér, til aðgreining-
ar frá Hugennottum. Ráðagjörð þessi fór svo dult, að Hugenottum kom engiun pati af. Nú kom hin voðalega *Bartólómeus-nótt*¹. Hugennottar gengu til hvíldar, og áttu einskis ílls von; óvinir þeirra sátu með vopnum búnir til einhvers hins versta illvirkis, sem unnið hefir verið af kristnum mönnum. Þegar klukkan kvað við í höllinni, þustu morðingjar þessir út á stræt-
in. Guise og hans flokkur stefndi að húsi Colignýs, brutust þar inn, veittu honum bana, og köstuðu líki hans út um glugg-
ann. Þegar harkinu og óhljóðunum laust upp úti á strætum borgarinnar, vöknudú Hugennottar við vandan draum, og hlupu þá margir út og vildu flýja húsinn. Sumir leytuðu þangað sem Coligný átti heima, en þar var Guise fyrir og drap hvern sem að kom; sumir fóru til hallarinnar og vildu leyta sér hælís hjá konungi, en þeir voru allir höggðir niður af varðmönnum hans, og suma skaut konungurinn sjálfur til bana. Nú kom Tavann-
es með sínar sveitir og gjörði bæði, að drepa þá sem náð varð á flóttu um strætin, og að brjóta upp húsinn þar sem von var Hugennotta inni fyrir, og drepa þar hvert mannsbarn; gekk svo alt til morguns. Þegar birti af degi komu næturverkin í ljós; manna búkarnir lágu þúsundum saman; úti og inni var borgin

1) Öðru nafni kalla menn það *blóðhátíðar*- eða *blóðveislunótt*, af því að brúðkaupin voru þá nýlega um garð gengin í París.

blóðug. Katrín drottning og hirðmeyjar hennar gengu um stræti til að skignast um, lofaði drottning mjög þessi verk og var hin kátasta. En þessum morðvígum var eigi þar með lokið. Þau stóðu enn í fulla 3 daga, bæði í París og alstaðar um Frakkland þar sem Huguenottar voru; því til þess var leikurinn gjörður, að enginn þeirra skyldi eptir verða lífs á Frakklandi. Mönnum hefir eigi borið saman um það, hve margir menn hafi látið lífið í þessu syndaflóði sem gekk yfir Frakkland. Sumir segja það hafi verið frekar 30000 manna, sumir alt að 100 þúsundum. En hvað sem um það er, þá er þessi atburður einn hinn svartasti blettur í sögu kristinna þjóða. Hins vegar er þó skylt að geta þess, að þeir menn fundust meðal katólskra manna, er hrylti við slíkum niðföngsverkum, og neituðu að vinna þau þótt konungur byði. Greifinn af *Tende*, landshöfðingi í Provençe, reif þannig í sundur bréf þau, er konungur sendi honum þess erindis, að taka alla Huguenotta þar í sveitum af lífi; og greifinn af *Orthe*, höfuðsmaður í Bayonne, ritaði konungi og segir þar svo: „Eg hef herra, kunngjört skipun yðar bæði hermönnum og öðrum bæarbúum, og hitt hvervetna fyrir bæði hrausta drengi og góða þegna, en ekki einn einasta böðul. Þeir og eg biðjum því yðar hátign, að yður mætti þóknast að láta oss vinna þau störf, sem *unnin verða*, hversu mikil hætta sem þeim fylgir. Báðir þessir góðfuglyndu menn dóu skömmu síðar, og sögðu margir, að óhlýðni þeirra hefði verið þeim goldin með eitri.

Það hafði komið til umtals, að þeir nafnar væru báðir af lífi teknir, Hinrik af Navarra og Hinrik Conde (sonur Loðvíks Conde sem fyr er nefndur), en það þótti ógjörandi, að konungur lèti drepa konungborna menn, og fyrir því héldu þeir lífi; en þó með því skilyrði, að þeir köstuðu Calvins trú og tækju upp katólskan sið.

Þegar tíðindi þessi, sem nú voru sögð, spurðust til annara landa, var þeim sem von var mjög misjafnlega tekið; flestum þóttu þau ill, en Filippus annar Spánarkonungur og páfinn, Gregorius þrettándi, urðu stórum glaðir; páfinn lét í því skyni halda dýrðlega þakkarhátið og slá kostulegan minnispening til merkis um afreksverkin á Frakklandi.

Huguenottar þeir, sem lifðu eptir morðvigin á Frakklandi, forðuðu sér hvað þeir kunnu, og leituðu sumir þeirra til trúar-

bræðra sinna á Englandi og í Sveiz, en sumir til þeirra fjögra gríðastaða á Frakklandi, sem áður er getið, einkum til Rochelle-borgar, því að þar voru vígi allsterk og lið til varnar. Það var því alt öðru nær, en að hinni grimmu Frakkastjórn hefði tekist að uppræta þenna trúarbragðaflokk og eyða honum með öllu, að hann þvert á móti efldist að nýju, þar sem Huguenottar höldu nú sem fastast saman, og gjörðu stött og stöðugt með sér, að verjast allir sem einn maður, og láta eitt yfir alla gánga, hvað sem að höndum bæri, því að þeir þóttust vita fyrir víst, að skamma stund mundi þeim til setunnar boðið. Þess var eigi heldur langt að bíða, áður Hinrik hertogi af Anjou var sendur með her manns á hendur þeim og settist um Rochelle-borg; en borgar menn vörðust svo vel, að Hinrik fékk eigi tekið borgina, og að 5 mánuðum liðnum leiddist honum þótt og gjörði frið við þá (1573) með líkum skilmálum, og þeim, er gjörðir höfðu verið við Huguenotta árið 1570 í St. Germain en Laye. Um þessar mundir var Hinrik hertogi kjörinn til konungs á Pólverjalandi, og fór nú þangað til að gæta ríkis síns.

Katrín af Medicis átti son þann, er *Franz* hét; hann var hertogi af *Alencon*, og hefir hans eigi verið getið til þessa. Hann var yngstur þeirra bræðra Katrínar sona, óeirðarmaður mikill og metorðagjarn. Nú er Hinrik bróðir hans var orðinn konungur¹, og af landi farinn, vildi Franz fá meiri völd í hendur á Frakklandi, en hann hafði haft til þessa, en móðir hans og bróðir vildu eigi veita honum þá bæn, einkum fyrir þá sök, að þau óttuðust, að slíkt mundi verða Húgenottum til eflingar, því að hertoginn hafði aldrei viljað fylla þann flokk, er ofsótti menn sökum trúarbragða. Hertoganum þótti sér óréttur gjör í þessu, og leiddi það til þess, að flokkur sá reis upp í Frakklandi, er *stjórnsmanna flokkur* („Politikere“) nefndist²; var hertoginn oddviti þeirra manna, en margir þeirra voru hinir göfugustu menn, þar á meðal Hinrik af Navarra, Hinrik af Conde og ýmsir aðrir, þótt því nær allir þeirra fylgdu katólskum sið. Það

1) Eptir að Hinrik var orðinn konungur Pólverja, var Franz nefndur hertogi af Anjou.

2) Svo voru þeir nefndir, af því þeir létu sig miklu meir um það varða, hverjir landinu stýrðu, og hvernig stjórnin fór fram, heldur en um hitt, hver trúin það var sem drótnaði.

var mark og mið þessa flokks, að sýna Húgenottum alla sanngirni, og koma því til leiðar, þá er Karl 9. væri dáiinn, að Hinrik bróðir hans, Pólverja konungur, kæmist elgi til ríkisstjórnar á Frakklandi, að Katrínu drotningu yrði vikið frá völdum, en Franz hertogi af Anjou tekinn þar til konungs. Karl 9. var, þegar hér var komið, þrotinn að heilsu bæði af svalli og sællífi, og þar á ofan bættust andlegar þjáningar af illri samvizku, er ofsóttu hann allt í frá Bartolómeusnóttunni. Hann dó barnlaus 1574, vart 24 ára gamall, og kvað svo á litlu fyrir andlát sitt, að móðir sín skyldi stýra ríkinu, þángað til Hinrik bróðir sinn gæti komið til Frakklands og tekið þar við ríkisstjórn.

Þá er Hinrik fréttir, að Karl bróðir hans er andaður, bregður hann við sem skjótast, fer á næturþell burt af Pólverjalandi, eins og flóttamaður, og kveður þar engan mann. Þó er það eigi þann veg að skilja, að hann hraðaði ferð sinni til Frakklands, heldur fór hann krók á sig til Vínarborgar og Venezíu, dvaldist þar um hríð og skemti sér hvað hann kunni. En Katrín móðir hans stýrði Frakklandi á meðan; flokkadrættir voru miklir í landi, og það var með naumindum að friðurinn hélzt. Þegar Hinrik konungur var seztur að völdum var hann nefndur *Hinrik þriðji* (1574—1589). Margir hugðu allgott til hans ríkisstjórnar, því að hann hafði að undanförunu verið allötull í sumum greinum, og margt var hopum af ósjálfráðu vel gefið, en hann var sem bræður hans af illu foreldri kominn, og uppeldið undir handleiðslu Katrínar móður hans verra, en orðum verði að komið. Það var því engin furða, þótt góðar vonir um ríkisstjórn hans brigðust mönnum algjörlega; enda var eigi við góðu að búast af þeim konungi, er verið hafði einn af hvatamönnum að Bartolómeus-vígum.

Það var enn sem fyr grunt á því góða milli katólskra manna og Hugenotta. Nokkrir góðgjarnir menn gáfu Hinriki það ráð, að heita eigi hörðu við Hugenotta, en hinir urðu þó miklu fleiri, og þar á meðal var Katrín móðir hans, sem réðu konungi að kúga þá og útrýma þeim á allar lundir, og því ráði fylgdi hann. Hinrik af Conde hafði farið burt af Frakklandi og safnað liði norður á Þýzkalandi, og hélt þeim hersveitum til Frakklands; Franz hertogi, konungsbróðir, hafði flúið hirðina og gengið í lið með Hugenoottum; slíkt hið sama gjörði Hinrik af Navarra.

Höfðu Hugennottar nú mikið líf og örugga foringja. Nú, þegar ófriðnum laust upp, sá Hinrik þriðji eigi annað ráð vænna, en að semja frið (1576), og þannig náðu Hugennottar mikla betri friðarkostum nú, en þeir höfðu nokkra sinni áður fengið. Ná var þeim leyft að halda trú sinni leynt og ljóst alstaðar á Frakklandi nema í París, eiga setu á þjóðþingum öllum til jafns við katólska menn, og komast til allra valda án alls greinarmunar, og gríðastöðum þeirra, sem áður höfðu að eins verið 4, var nú fjölgað um 8. Franz hertogi af Anjou fékk ríki mikið til forráða vestur í landi og settist þar um kyrt.

Katólskir menn undu illa þessum málalokum, og tóku ráð sín saman. Varð það þá úr, að þeir stofnuðu félag með sér, er magnaðist dag frá degi og náði yfir allt Frakkland. Allir sem í það félag gengu, og voru þeir ærið margir, urðu að vinna eiða að því, að vernda katólska trú með lífi og gózi, en eyða óvinum hennar, og af því að þetta þótti gjört guðs og kirkjunnar vegna, þá kölluðu þeir flokkinn: *hið helga félag* (*den hellige Ligue*). Formaður félagsins var Hinrik hertogi af Guise. Hann var þá hálfprítugur og hinn mesti afreksmaður, eins og faðir hans hafði verið, hraustur, slægvitur, grimmur og ákaflega drotnunargjarn. Það hét svo í orði kveðnu, að félagið vildi styrkja konúnginn og stjórn hans, en undir niðri var þó áformið, að eyða öllum Hugennottum, draga hertogann af Anjou fyrir lög og dóm, fyrir því að hann efldi flokk Hugennotta, setja Hinrik konúng þriðja í klaustur, en taka Hinrik af Guise til konúngs yfir Frakkland, því að hann væri kominn af Karlamagnúsi í beinar ættir. Þetta fréttir nú Hinrik konúngur, og þótti mikil tíðindi og ill. Tók hann þá það ráðs, er félagsmenn grunaði sízt, og það var, að hann gekk sjálfur í félagið og gjörðist oddviti þess. Nú bar lítið til tíðinda á Frakklandi um nokkur ár; fjárhagur ríkisins var að þrotum kominn, sökum ófriðarins í landinu og einkum sökum hinnar óhóflegu fjáreyðslu stjórnarinnar; engum nytsamlegum fyrirtækjum varð til leiðar komið; konúngur og gæðingar hans hugðu mest á skemtunir; þeir sem helzt var dugur í, voru blindaðir af trúarófsa, eins og Katrín drotníng og Guisarnir; félagið helga vann lítið á Hugennottum, því að fyrirliðar þeirra, Hinrik af Navara og Hinrik Conde, voru bæði vitrir og starfsamir, enda styrkti konúngur félagið ekki svo teljandi sé, því að öðrum þræði

óttast hann yfirráð þess og Guisanna, ef það magnaðist stórum; hinn helzta styrk, sem félagið hafði um þessar mundir, veitfi Filippus annar því, eins og við var að búast af slíkum manni. Árið 1584 dó Frans hertogi af Anjou; voru þá dauðir 3 af sonum Katrínar, allir barnlausir og á unga aldri. Hinrik 3. var nú einn eftir af þeim bræðrum, en hann átti ekki börn, og var því eigi annað sýna, en að Valois-ættin væri þegar aldauða. Þá stóðu Bourbonar næstir til ríkiserfða; en Hinrik af Navarra, helzti maðurinn af þeim frændum, fylgdi Calvíns trú (Hugenottum), og var fyrir þá sök trúvillumadur í augum katólskra manna og óhæfur til konungstignar á Frakklandi. Nú vaknaði nýr hugur og dugur í Hinriki af Guise og félaginu helga; gripu þeir nú til vopna, unnu ýmsar borgir og settust þar að og létu allólmlega. Konungi varð hverft við, og beiddi Katrínu móður sína að semja við Guise og þá félaga. Hún gjörði svo, og kröfðust þeir þá, að konungur skyldi harðlega banna aðra trú og önnur helgihöld en hin katólsku, svipta Hugennotta öllum embættum, og taka af þeim alla þeirra griðastaði. Konungur þorði eigi annað en gjöra þeim Guise til hæfis. Þannig hófst ófriðurinn að nýju, og hafa menn kallað hann *«Hinrika stríðið»*, eftir þeim þremur nöfnum: Hinriki af Guise, Hinriki þriðja, og Hinriki af Navarra. En meðan hinir börðust kom Hinrik þriðji hvergi nærri, heldur sat hann heima um kyrt og læk sér að hundum sínum, apaköttum og páfagaukum. Af öllu sínu athæfi varð nú Hinrik þriðji svo fyrirlitinn af þegnum sínum, og það engu síður hinum katólsku, að þeir höfðu við orð, að taka hann höndum, og gjöra Hinrik Guise að konungi. Nú urðu margar orustur með mönnum; stóð ein hin helzta af þeim við borg þá, er *Coutras* heitir, vestur á Frakklandi (í októbr. 1587). Þar börðust Hugennottar við ofurefli liðs af «félaginu helga». Hertoginn af *Joyeuse* stýrði félagsmönnum, en Hinrik af Navarra Hugennottum. Þar sýndi Hinrik fyrst að hann var afbragðs hershöfðingi. Áður en orustan tókst mælti Hinrik við þá frændur sína, Hinrik prins af Conde og Karl (af Bourbon) greifa af Soissons, er báðir voru í liði hans: «minnst þess, að þið eruð Bourbona-ættar! hvað mig sjálfan snertir skal eg, svo sannlega sem guð er til, sýna að eg er ykkar elztur!» hann efndi orð sín og vann frægan sigur þann dag. Hertoginn af Joyeuse féll, og margar þúsundir af katólsk-

um mönnum, en margir urðu sárir og handteknir. Hinrik var þeim eins og þeir væru bræður hans, og gaf þeim öllum, sem ferðafærir voru, heimfarar leyfi án nokkurs lausnargjalds. Nokkru síðar en þessi orusta varð dó prinzinn af Conde, rúmlega þrítugur að aldri, til mikils harms fyrir alla Hugenoтта, því að hann var hinn vaskasti maður og góður drengur; það var altalað, að hann hefði dáið af eitri.

Viða var róstudamt á Frakklandi um þessar mundir, en þó hvergi fremur en í París, enda var þar manngrúinn mestur, og Hinrik Guise sparaði ekki að blása eldi að þeim kolum. Konúngur hélzt þar ekki við og flýði burt, en Hinrik Guise ræð þar einn öllu sem hann væri konúngur; það fanst því nær enginn sá maður, er dirfðist að mæla í móti honum. Þó er þess getið, að einhverju sinni gekk hann til fundar við þann mann, er *Akilles Harlay* hét, og var forseti «parlamentsins». Akilles var staddur í aldingarði sínum, er Hinrik hertogi kom; hertoginn mælti til hans vingjarnlegum orðum, en hinn svaraði, «það er sárt til þess að vita, að þjónninn skuli reka húsbóndann á brott; en að öðru leyti er sál mín á drottins valdi, hjartað á konungsins valdi, og líkaminn á valdi hvers þess illmennis, er á hann vill hendur leggja». Eigi er þess getið, að honum yrði meint af þessari bersögli.

Katrín af Medicis varð eptir í París, til þess að miðla málum af hendi Hinriks konungs sonars síns við hertogann af Guise, en svo fór, að konúngur varð að ganga að öllum þeim skilmálum, er Guise setti. Einn af þeim skilmálum var sá, að konúngur hetti að eyða öllum Hugenoттum á Frakklandi, á hvern þann hátt sem orðið gæti. En nú var svo komið, að konúngi þótti eigi lengur viðvært, og hugði á hefndir. Hann greip þá til þeirra úrræða, sem almenn voru um hans daga á Frakklandi: hann fékk 8 af hirðmönnum sínum til þess að myrða Hinrik hertoga. Það er mælt, að hertoginn fyndi einn dag, er hann settist að matborði, seðil undir diskum sínum, er á voru rituð þessi orð: «menn vilja myrða yður»; hann ritaði þar neðanundir: «það þorir enginn að gjöra». Daginn eptir ætlaði Hinrik hertogi að ganga á ráðsstefnu, en þeir átta, sem til þess voru settir, ræðu þá á hann og veittu honum bana (23. desember 1588. Bróðir hans *Lodvík af Guise* kardináli, var einnig

teknun af lífi, en hinn þriðji bróðirinn, Karl hertogi af *Mayenne*, leitaði undan og forðaði svo fjörvi. Hinrik konungur þóttist nú vel hafa veitt, og var hinn kátasti, en Katrín móðir hans kvað það mundu kosta hann konungdóminn. Hún var sjúk um þessar mundir og dó litlu síðar (5. jan. 1589).

Spá Katrínar rættist fyr en varði. Flestum katólskum mönnum þótti víg þeirra bræðra svo illt verk, að þeir sögðu Hinriki konungi upp hlýðni og hollustu; gengu nú undan honum bæði borgir og hëruð, en Karl af *Mayenne* gjörðist foringi «félagsins helga» og ríkisforseti. Hinrik þriðji hafði nú eigi önnur úrræði en að flýja á náðir Hugennotta, og heita þeim öllu fögru. Bar þá brátt saman fundum þeirra nafna, Hinriks þriðja og Hinriks af Navarra. Hældu þeir síðan báðir til Parísar, höfðu allmikið lið og settust um borgina, en Karl af *Mayenne* var þar fyrir og varði hana.

Frá því er Guisarnir voru drepnir, og Hinrik þriðji var kominn á náðir Hugennotta, æstu klerkarnir lýðinn hvað þeir kunnu til hefnda gegn honum; þeir sögðu, að sá maður ynni sér til mikillar frægðar og mikilla launa, bæði þessa heims og annars, er dræpi slíkan konung, er á ofan allt annað hefði skillzt við heilaga kirkju. Þessi kenning bar sína ávexti. Múnkur einn af *Dominíkusar* reglu, *Jakob Klement* að nafni, varð svo hrifinn af slíkri kenningu, að hann einsetti sér, að ráða konung af dögum. Með þeim huga fór hann til *St. Cloud*, þar sem Hinrik þriðji hafði þá aðsetu, og náði hans fundi og veitti honum banasár (1. aug. 1589). Konungur andaðist degi síðar, en lýsti yfir því áður hann lézt, að Hinrik af Navarra skyldi erfa ríkið eptir sinn dag. Þannig leið *Valois-ættin* undir lok, eptir að hafa setið að ríkjum á Frakklandi rúma 260 vetra. En þó að nú Hinrik af Navarra ætti tilkall til konungdóms, þá var alt um það mjög óvíst að hann næði honum, því að katólskir menn hötuðust við hann, sökum þess að hann fylgdi Calvíns trú; París var í höndum Karls af *Mayenne* og félagsins helga, og Filippus annar á Spáni var sjálfsagður að styðja og styrkja pápiska menn móti Hinriki. Hann hlaut því að berjast og vinna sigur, ef hann vildi konungur verða á Frakklandi.

Bourbona-ættin hefst til ríkis á Frakklandi með
Hinriki fjórða.

Valois-ættin, sem lengi hafði ráðið ríkjum á Frakklandi, var liðin undir lok með Hinriki þriðja. Hinir síðustu konungar af þeirri ætt — Franz annar, Karl níundi og Hinrik þriðji — höfðu verið hver öðrum verri og ónýtari; þeir voru rættnefndir voðaverkfæri Katrínar móður sinnar af Medicis, og vandræðamenn þjóðarinnar; við hirðina drotnaði saurlífnaður, trúarofsi og grimd, og dreifðist þaðan víðsvegar út um landið; slík óöld sem þá gekk yfir Frakkland, truflaði öll friðsamleg störf og framfarir þjóðarinnar; velmegun manna hnignaði, ríkisskuldirnar gengu fram úr hófi. Það var ekki eitt, heldur alt, sem þurfti lækningar við á Frakklandi; en til þess að græða slík þjóðarmein þurfti einhvern afbragðsmann ef duga skyldi. Frakkar áttu ráð á slíkum manni, en svo voru þeir þá orðnir frábverfir — eins og hent hefir fleiri þjóðir — að þeir brutust í móti honum með oddi og eggju. Þessi maður var Hinrik af Navarra, sem getið hefir verið hér að framan. Hann var einn af Bourbona-ættinni, eins og fyr er ritað, og hafði verið höfðingi hennar síðan Anton konung leið föður hans; var Hinrik þá að eins 16 vetra, en nú voru síðan liðin 20 ár; hann hafði á þeim tíma komizt í miklar mannraunir, en jafnan sýnt ágæta breysti, góðgirni og viturleik, svo að Coligný sjálfum, er kunni að meta mikla mannkosti, fanst mikið um hann og unni honum hugástum. Eptir víg Colignýs var Hinrik foringi Hugenotta, og það var eflaust einkum hans ráðum og framgöngu að þakka, að eigi var búið að kúga þá að fullu og öllu. Það er sagt, að Hinrik hafi haft flesta þá kosti til að bera, er konung mega prýða, bæði andlega og líkamlega; hann var íþróttamaður umfram aðra menn, manna hugprúðastur, og sögðu menn, að hann væri á vígvellinum sem örn meðal annara fugla, en svo var hann þó mildur óvinum sínum, er þeir komust á hans vald, að vinir hans töldu sumir á hann fyrir þá sök; hann var hinn mesti starfsmaður. Það var venja hans að rísa úr rekkju 2 stundum fyrir miðjan morgun, og sögðu menn því, að svefnstund hans væri styttri en matnálsstund Karls af Mayenne. Til þessa bendir einnig svar það, er Hinrik gaf eitt sinn, er menn høfdu Karli hertoga, og sögðu hann vera dugandi

hershöfðingja: „hertoginn er það að sönnu; en eg vinn af honum 5 standir dag hvern.“

Jafnskjótt sem Hinrik þriðji var látinn, var Hinrik af Navarra tekinn til konungs yfir Frakkland af öllum Hugennottum og liði því, er honum fylgdi, og nefndur *Hinrik fjórði*, og þó að konungstign hans væri eigi viðurkend um alt ríkið fyr en fjórum árum síðar, þá eru þó ríkisstjórnar ár hans alment talin frá 1589 til 1610. Það var Hinriki konungi mjög í móti skapi, að þurfa að berjast við þegna sína, og fyrir þá sök reyndi hann að gjöra sátt og samninga við Karl hertoga af Mayenne, sem var oddviti „félagsins helga“, sat í Parísarborg og hafði þar miklar varnir; en það var ekki nærri því komandi. Hinrik varð því að treysta hamingjunni og vopnum sínum, þó að þeir stæðu mjög ójafnt að vígi hann og Karl hertogi. Allur meginþorri landsmanna stóð enn sem komið var með hertoganum, og klerkalýðurinn pápiski gjörði hvað hann gat, að æsa menn til ófriðar gegn konungi. Hertoginn var vitur maður og hinn herkænasti. Hann kom því til leiðar, að katólskir menn tóku til konungs yfir sig föðurbróður Hinriks fjórða, Karl kardínála af Bourbon, og nefndu hann Karl 10., en hertogann sjálfan gjörðu þeir að ríkisforseta, og voru ráðin öll þar sem hann var, því að Karl af Bourbon var gamall maður og aðkvæðalítill. Katólskir menn höfðu miklar áhyggjur af því, hver verða mundi konungur þeirra að Karli 10. dauðum. Hertoginn hafði reyndar beztu vonir um, að geta þá náð í konungstignina, en Filippus annar á Spáni þóttist, engu síður en hann, eiga tilkall til ríkiserfða á Frakklandi fyrir hönd dóttur sinnar, því að hún var systurdóttir Hinriks þriðja og þeirra bræðra; hafði Filippus konungur, eptir beiðni félagsins helga, sent her manns til Parísar til liðs við félagið og aðra óvini Hinriks fjórða. Nú urðu lítil tíðindi með mönnum til þess er fundum þeirra Hinriks konungs og Karls af Mayenne bar saman hjá borg þeirri, er *Ivry* heitir, og er þar vestur í landi. Snemma morguns þann dag, er orustan stóð (14. marz 1590), fylkti Hinrik konungur liði sínu, féll síðan á kné og bað guð að láta sig fá að deyja þar, ef hann sæi fyrir að hann mundi verða illur og ónýtur konungur, en að öðrum kosti vinna sigur. Liðsmönnum hans fanst mikið um þenna atburð, og varð þeim það hin mesta hvöt til drengilegrar framgöngu. Því næst

talaði konungur fyrir liðinu og lauk svo sínu máli: «en fari svo að þér látið merki yðar, þá missið eigi sjónar á hinum hvíta fjaðraskúfi á hattí mínum; þar sem þér sjáið hann, þar er vegurinn til sigurs og sæmdar». Þar vann konungur frægan sigur, þótt hann hefði lið miklu minna en hertoginn. Konungur sýndi öllum þeim mönnum, sem hann handtók í orustu þessari, hina mestu mildi, og gjörðust þeir allir hans menn upp frá því.

Eptir þenna ósigur fór Karl af Mayenne til Niðurlanda til fundar við Alexander Farnese (sem fyr er nefndur), og réðu þeir ráðum sínum, en Hinrik konungur hélt til Parísar, og skoraði á borgina að gefast upp, en þess var enginn kostur; settist konungur þá um borgina og bannaði alla aðflutninga, létust þá margir af sulti og seyr, en borgin gafst eigi upp að heldur, og varð konungur frá að hverfa, því að Karl af Mayenne var þá á leiðinni þangað með sínar sveitir, og Alexander Farnese kom á eptir með miklu liði, eptir boðum Filippusar annars. Um þessar mundir var hið mesta stjórnsleysi í landinu, og var eigi annað sýnna, en að ríkið mundi alt leysast sundur og tvístrast í mörg smáríki.

Hinrik 4. var nú í miklum vanda staddur; hann sá, að hér voru að eins tveir kostir fyrir höndum, annaðhvort að taka katólska trú, ellegar sleppa allri von um konungdóm á Frakklandi; honum gekk nærri að skiljast við trúarbræður sína, en bæði var það, að sumir þeirra leiddu honum fyrir sjónir, að þeir fengju því að eins að halda trú sinni í friði að hann yrði konungur, og mörgum katólskum manni var vel til Hinriks, þó þeim væri illa við trú hans (Calvíns trú), og þessir kváðust gjarnan vilja honum þjóna, ef hann tæki þeirra trú. Hinrik hugsaði þetta mál vel og vandlega, og loks réð hann það af að taka katólska trú (1593). Nú var aðalástæðan til mótstöðu gegn Hinriki konungi horfin; París, höfuðborg landsins, lauk upp fyrir honum borgarhliðum sínum; slíkt hið sama gjörðu margar aðrar borgir. Þegar herflokkar þeir sem Filippus annar hafði sent til styrktar við Karl af Mayenne, fóru burt úr París, kvaddi Hinrik konungur fyrirliðana með þessum orðum: «Berið konungi yðar kveðju mína og segið honum, að eg vilji feginn eiga hann að, farið svo í friði, en komið aldrei hingað aptur». Sumir menn urðu til þess, að eggja konung á að hefna sín rækilega á hinum helztu

óvinum sínum, sem nú voru komnir á hans vald. En Hinrik svaraði þeim þessu: „Nei, það sè fjærri mér; eg vil gleyma öllu, og þar eð guð fyrirgefur mér, þótt eigi hafi eg til þess unnið, þá vil eg einnig fyrirgefa þegnum mínum“.

Eptir að París var gengin undir Hinrik fjórða, batnaði hans hlutur stórum, þó var enn margt og mikið eptir. Karl af Mayenne hafði allmikinn liðsafnað, og allir hinir ákðfustu páfatrúarmenn fyltu þann flokk. Hinriki miðaði þó drjúgum áfram að takmarki sínu; mörg hærð gengu nú undir hann; hertoginn af Guise — sonur þess, er Hinrik þriðji lét myrða — skildist við Karl af Mayenne föðurbróður sinn, með sínu liði og gekk konungi til handa. En meðan þessu fór fram, veitti einn ungur maður, *Jean Chatel*, af Jesúíta flokki, konungi banatilræði, og særði hann (1594). Sá maður var tekinn og drepinn. Voru Jesúítar þá gjörðir útlægir af Frakklandi, þó höldust þeir við suður í landi, og náðu síðan fótfestu á Frakklandi. En þó innanlands ófriður færi nú minnkandi á Frakklandi, hélzt enn ófriður milli Hinriks konungs og Filippusar annars. Spánverskur her brauzt inn á Frakkland árið 1595; en Hinrik fjórði vann sigur á honum, og hafði þó lítið lið. Eptir þann sigur beiddist Karl af Mayenne griða, og varð síðan fullur friður milli hans og Hinriks fjórða. Loks leiddist Filippusi öðrum sá ófriður, enda færðist nú bæði elli og vanheilsa á þann gamla segg; komst því friður á milli landanna í Vervíns-borg 1598; litlu síðar andaðist Filippus annar, eins og fyr er ritað.

Nú hafði Hinrik fjórði friðað ríki sitt, og gat nú fyrst algjörlega tekið til friðsamlegra starfa, og þó hann væri frægur orðinn sem hetja og hershöfðingi, þá eru það hans miklu afreksverk á friðarárunum, eptir að hér var komið, sem hafa gjört hann frægastan. Hin frakkneska þjóð var orðin lánþjáð, og lá að kalla mátti í sárum eptir undanfarna öld og innanlands óeirðir. Hinrik fjórði varði öllum stundum eptir þetta meðan æfi hans entist, til að græða þessi sár, og honum tókst með vitsmunum sínum og mildi, að bæta kjör þjóðar sinnar í flestum greinum. Eitt af því fyrsta, sem hann gjörði, var, að veita hinum fœrnu trúarbræðrum sínum, Huguenottum, fullt trúarfrelsi og ýms réttindi, sem þeir áður höfðu orðið án að vera, verið einatt heitið, en eins opt sviknir um það af hinum fyrri konung-

um. Þessi nafnbót réttarbót um réttindi Huguenottanna var út gefin í borg þeirri, er *Nantes* heitir (13. Apríl 1598), og er síðan kend við þá borg (*Nantes-Edictet*). Hinrik konungur gaf meiri þorra af liðsmönnum sínum heimfararleyfi, og lagði ríkt á við þá að leggja stund á jarðyrkju; hann styrkti á allar lundir bændalýðinn, sem kominn var í örbyrgð; gaf honum upp skatta og skyldur, studdi iðnaðarmenn og hvatti til frámkvæmda, efldi vísindi og allar nytsamar mentir. Ávextirnir komu bráðum í ljós; landinu fór fram, og lýðurinn auðgaðist ár frá ári. Einhverju sinni spurði Karl Emanúel, hertogi í Savoyen, konung, hversu miklar tekjur hann hefði af Frakklandi: «eins miklar og eg vil — mælti Hinrik —, þegar mínir unna mér allir hugástum og neita mér einskis, sem eg bið þá um. En, ef guði þóknast að láta mig enn lifa nokkur ár, hefi eg þá von, að eg fái komið því til leiðar, að hver bóndi í ríki mínu geti að minsta kosti hvern sunnudag soðið sér hænu til matar». Eftir það þagnaði konungur litla stund, og sagði svo: «en þar á ofan hygg eg, að eg muni þó eiga ráð á svo miklu, að eg geti haldið nægan her til þess að krefjast þá til reiknings, sem sýna vilja mér mótþróa sem konungi». Hertoginn hafði verið einn á meðal þeirra, og gjörði enda óspektir litlu síðar, en konungur jafnaði á honum, svo hertoginn beiddist friðar.

Afbragðsmenn eru vanir að hafa ágæta þjóna. Svo var um Hinrik fjórða. Hann hafði þann ráðgjafa er *Sully* hét, og var hertogi að nafnbót. *Sully* var 7 vetrum yngri en konungur, og hafði verið með honum frá því hann var á 12. ári, orðið frægur í orustum, en eftir að Hinrik fékk frið og settist um kyrt í ríki sínu, gjörði hann *Sully* að fjárstjóra ríkisins, og varð víst eigi til þess fundinn eins vel hæfur maður, því síður annar betri. Þegar *Sully* tók við fjárstjórn, voru ríkisskuldirnar orðnar svo miklar, að sagt er að numið hafi 1000 millíónum ríkisdala í vorum peningum; en þegar hann lagði niður völdin, voru eigi að eins allar þær skuldir goldnar að fullu, heldur þar á ofan búið að safna í sjóð 60 millíónum ríkisdala, og þó voru skattar aldrei mjög þungbærir á landsfólkinu um daga Hinriks fjórða. En *Sully* var ekki einungis hinn bezti ráðgjafi Hinriks, heldur einnig hans bezti vinur, og konungi þótti ekkert ráð ráðið, nema hann ræðist áður um við *Sully*. Þessir tveir menn voru svo

samvaldir, að ef það bar við, að konungur sýndi ofmikinn hla-leika í mákum, eður hann lèti tauminn slakan um of við þann breiskleika, sem að honum hefir verið fundinn, en það var hvik-lyndi hans í kvenna ástum, þá var Sully honum til annarar hánd-ár með kjarklunf og siðvendið, og kipti öllu í lag; en ef Sully ætlaði að verða ofharður og ónærgætinn, þá var konungur þar og mýkti málin, svo allt jafnaði sig. Þó að illir menn gengi á milli og reyndu að spilla vinfengi þeirra, var þess enginn kost-ur, og stóð það óhaggað meðan þeir lifðu báðir. Það var ein-hverju sinni að Sully vildi bæta búgarð sinn. Þá rífaði kon-ungur honum bréf og segir þar svo: «Eg hef heyrt, kæri Sully, að þér látið um þessar mundir planta yður skemtiskóg á búgarði yðar. Svo sem vinur allra þeirra, er gaman hafa af húsasmíði og jarðabótum, og svo sem yðar góði konungur sendi eg yður hér með 6000 ríkisdala, til þess að styðja að því, að þetta, sem þér hafið í smíðum, geti orðið allsnóturt».

Hinrik konungur átti Margrétu af Valois, dóttur Hinriks annars og Katrínar af Medicis, eins og áður er sagt, en sam-farir þeirra urðu eigi góðar og skilin voru þau að samvistum fyrir löngu; en árið 1599 gjörði páfinn skilnað með þeim að fullu og öllu, og kvæntist konungur árið eptir, Maríu af Medi-cis, dóttur Franz hertoga af Toskana. Börn þeirra Hinriks og Maríu voru *Loðvik*, (er síðan varð konungur), *Gaston* og *Henriette*; hún giptist Karli fyrsta á Englandi.

Á ofanverðum árum Hinriks fjórða, þá er allt var komið á fastan fót í ríki hans, snéri hann huga sínum til útlendra þjóða. Hinn háfleygi andi þessa afbragðsmanns lét sér eigi nægja það sem heima fyrir var að starfa. Eins og hann, með aðstoð Sully vinar síns, hafði viðrætt Frakkland, eins vildi hann viðrætta það og laga, sem honum þótti ábótavant í öðrum löndum Norðurálf-unnar; hann vildi efla frið og framfarir mannkynsins; hann vildi koma á þeim jöfnuði meðal þjóðanna, að hver mætti sitja ó-hultur að sínu. Þess vegna vildi hann umfram allt minka ofur-veldi og yfirgang þeirra Habsborgarmanna, þ. e. keisarans af Austurríki og konungsins á Spáni, enda hafði mörg ill alda runnið þaðan yfir Frakkland. Til þess að koma þessu öllu í það horf, er hann hafði hugsað sér, vildi hann skipta allri Norð-urálfunni í mörg ríki og svo jöfn, að ekkert þeirra væri vold-

ugra en annað; þá þótti honum sem almennur friður og alment trúarbragðafrelsi mundi geta haldizt um lánga æfi. Til þess að skerast í þessi stórræði, bauðst nú hið besta færi. Á Þýzka-landi voru óeirðir kviknaðar milli katólskra manna og prótestanta, þar sem hvorirtveggja vildu ná til arfs eptir Jóhann hertoga af Cleve, er dó barnlaus árið 1609, og lét eptir sig lönd og lausa aura. Hinrik fjórði bjó hið sitt og ætlaði að halda því til Þýzka-lands og hjálpa prótestöntum, sem voru hans bandamenn. Um vorið 1610 bjóst konungur til burtfarar af ríki sínu, en það tafði hann, að drotning hans vildi krýnast áður hann færi, ef svo kynni fara, að hann kæmi eigi aptur. Konungi var það mjög móti skapi, því að honum þótti það valda sér töf og ríkinu kostnað. Hann hafði orð á því við Sully, á þessa leið: „Eg veit eigi hvað það er, vinur minn, en hugur minn spáir mér einhverri ógæfu. Eg dey í þessari borg og kemst aldrei hédan lifandi. Þeir myrða mig, því eg sé glögt, að það eru þau einu úrræði sem þeir hafa“. Sully brá í brún, er hann heyrði þessi orð, og gaf það ráð, að fresta skyldi krýningunni, en drotningu mislíkaði stórum, og lét konungur það þá eptir benni; var hún því næst krýnd 13. dag maímánaðar. Daginn eptir (14. maí 1610) um nónbil lét konungur leiða fram hesta sína og beita fyrir vagn, og steig þar á sjálfur og nokkrir af hirðmönnum hans með honum. Ökumaður spurði hvert halda skyldi. Konungur svaraði og heldur stutt: „komdu mér einungis burt hédan!“ Þar varð á stræti einu, er konungur ók um, þröng mikil af vögnum og mönnum, svo að konungur nam staðar, meðan sveinar hans hlupu af vagninum til þess að rýma því úr vegi, er fyrir var. Meðan á þessu stóð, hljóp maður upp á vagnhjólið aptara, þeim megin sem konungur sat, beygði sig yfir hann fram og lagði knífi á brjósti honum, og kom í hjartað. Konungur æpti við, er hann fékk lagið: „eg er særður!“ og dó samstundis. Þessi atburður varð með svo skjótri svipan, að enginn veitti því eptirtekt fyr en þeir heyrðu konunginn kalla. Vegandinn stóð kyr í sömu sporum og lét taka sig höndum. Hann hét *Franz Ravillac*, hafði áður verið múnkur, en var, þá er þetta gjörðist, skólameistari í Angouleme. Hann fékst eigi til að játa, að aðrir væru í vitorði með honum, og var síðan af lífi tekinn eptir

bryllilegar kvalir, eins og þá var tíðska. Þannig dó Hinrik fjórði, hinn bezti konungur, er verið hefir á Frakklandi.

Eldri sonur Hinriks fjórða, *Loðvík* hinn 13. með því nafni, var til konungs tekinn eptir föður sinn (1610—1643). Hann var í bernsku, er faðir hans dó, og stýrði því María drottning móðir hans ríkinu fyrst um sinn. Skipti þá stórum um til hins lakara í allri ríkisstjórn á Frakklandi. Sullý lagði niður völdin; öðrum stjórnarháttum var fylgt en þeim, er verið höfðu um daga Hinriks fjórða; kosti Hugenotta var þröngvað; katólskir menn voru heldur ekki ánægðir, því að margt færðist nú úr lagi; sjár-sjóðir ríkisins eyddust, og ítalskur maður, *Concini* að nafni, ræð mestu með drottningu, og varð mjög óþokkaður af Frökkum. *Prinzinn* af Conde var oddviti fyrir þeim flokki, er helzt stóðu í móti stjórninni; fengu þeir því til leiðar komið, að allar 3 ríkisstéttir (þ. a. aðalsmenn, klerkar, borgarar) voru kvaddar til þings (1614). Þjóðþing þetta var sjálfu sér sundurþykt, málin lentu þar öll í vafningum, og svo var því slitið. Eptir það var slíkt alsherjarþing aldrei háð á Frakklandi fyr en stjórnarbyhtiingin mikla hófst þar 1789. Árið 1615 kvongaðist Loðvík 13. og átti Önnu, dóttur Filippuss þriðja Spánarkonungs. Hafði þá um nokkur ár verið mikil vinátta með stjórnendum á Frakklandi og Spáni. Við þeim mægðum hafði Hinrik fjórði vist eigi búizt.

Árið 1617 varð sú breyting í stjórninni á Frakklandi, að *Concini* var steyppt úr völdum og tekinn af lífi, en Maríu drottningu vikið burtu. Komst sá maður þar þá til æðstu valda, er *Luynes* hét, og stóð svo til þess er hann dó 1624. En þá kom *Richelieu* kardináli til sögunnar. Hann varð ráðgjafi Loðvíks, og er einhver hinn merkilegasti maður sem verið hefir á Frakklandi. Frá því er *Richelieu* settist að stjórn, og til þess, er hann dó 1642, var hann einvaldur, en Loðvík 13. bar að eins konungs nafnið; gjörði konungur bæði að hata hann og hræðast, en mátti þó eigi án hans vera, því að konungur var sjálfur dáðlaus til allra framkvæmda, kaldlyndur, tortryggur, og vildi helzt fara einförum. Loðvík konungur átti 2 sonu með drottningu sinni, Loðvík (14.) og Filippus (af Orleans), og dó 1643 sama mánaðar dag sem faðir hans.

Rússland.

Þess hefir verið getið í miðaldasögunnu (bls. 236), að Rússland var um lánga æfi undir yfirráðum Mongóla, þangað til *Ivan* stórfursta *Vasilieviz* I., á ofánverðri 15. öld (1480), tókzt að losa ríki sitt undan þeirra valdi. Hann tók sér fyrstur einvaldsnafn yfir öllum Rússum. Sonur hans *Vasilis Ivanóviz* (1505—1533) var sá fyrsti af einvöldum Rússa er nefndi sig *Czar* (þ. e. *Cæsar*, eða *Reisari*), og jók ríki sitt um nokkur lönd og borgir, er hann vann. Sonur hans *Ivan Vasilieviz* II. (1533—1584), var kallaður „*hinn óttalegi*“, og var sá, er fyrst og fremst lagði grundvöllinn til hins geysistöra Rússaveldis. Ívan sat um 50 ár að völdum, og hafði sverðið jafnan á lopti, og átti í höggi við allar þjóðir, sem hann gat til náð, t. d. við ýmsar Tartara þjóðir, Pólland, Svíþjóð, Lífland og Tyrkland; stóð öllum af honum hinn mesti ótti, bæði utanlands og innan. Hörðust var viðureign hans við Lífendinga (1577—1583). Það var um Lífland, að hinar norðlægu þjóðir börðust að sínu leiti eins og hinar suðrænu um Mailand (Milanó) á Ítalíu. Ívan vann meiri hluta Líflands, og þegar landsmenn sán, að þeir fengu eigi varizt Rússum, leituðu þeir liðs hjá Pólverjum, og landið varð pólverskt lénsríki. Pólverjar vörðu þetta nýfengna land svo braustlega, að Ívan varð að láta það laust. Seinna á tímum börðust Svíar og Pólverjar um Lífland, og lauk þeirra viðskiptum þannig, að Svíar náðu landinu, þegar friðurinn var saminn í *Olíva* 1660. *Kasan* og *Astrakan*, sem voru leifar af ríki Mongóla (*Kaptschak*), lagði Ívan undir sig, og sömuleiðis mikinn hluta af Síberíu. En þótt Ívan annar væri lengstum í hernaði, studdi hann þó mentir og friðsamleg störf í ríki sínu; hann setti yms lög í landi, efdi verzlun, og setti hina fyrstu prentsmiðju á stofn í Rússlandi (1564). Hann hafði aðsetu í Moskva. Í Rússlandi drotnaði um þessar mundir, og lengi frameptir öldum, hin mesta harðstjórn. Lýðurinn sem bygði landið (segja ýmsir sagnaritarar), mátti eigi heita þjóð, heldur þrælahjörð. Aðallinn (Bojarar), sem á Pólverjalandi réð öllu, kúgaði að sönnu þá, sem honum voru undirgefnir, en stórfurstinn eða Czarinn gjörði slíku stórmenni í ríki sínu jafnhátt undir höfði sem bændalýðnum. Klerkastéttnin orkaði litlu, jafnvel þó erkibiskupinn í Rússlandi hætti að leita staðfestingar „*patriarkans*“ í Konstantínópel, eptir að sú borg var unnin af

Tyrkjum, og hin rússneska kirkja væri þannig laus við útlend yfirráð. Þau yfirráð urðu nú innlend og í höndum Czarsins.

Eptir Ívan kom *Fedór* (eða *Feódór*) yngri sonur hans til ríkis (1584—1598), aðgjörðalítill maður, og sumir segja geðveikur, og fékk mági sínum *Bóris Gúdonow* ríkisstjórnina í hendur. Bóris var dugandi maður og var tekinn til Czars, þegar Fedór dó 1598. Fedór dó barnlaus og var þá Rúriks-ætt aldaða á Rússlandi, er þar hafði setið að völdum rúm 700 ár. Þegar Bóris Gúdonow hafði verið Czar um nokkur ár, kom sá maður þar í land, er *Gregorius Otrepiew* hét; hann var múnkur, en kvaðst vera *Demetríus* bróðir Fedórs Czars. Sá Demetríus hafði horfið nokkrum árum fyrir lát Fedórs, og sögðu sumir að Bóris hefði látið ráða honum bana. Þessi Svika-Demetríus brauzt til valda á Rússlandi, en Bóris féll (1605). Ári síðar var sá Demetríus drepinn. Eptir það komu þrír hver eptir annan, með því nafni, og gjörðu tilkall til ríkiserfða á Rússlandi. Pólverjar studdu þessa menn að málum, og loksins þröngvuðu þeir Rússum til að kjósa til Czars *Vladislav*, son Sigmundar Pólverjakonungs. Um sama leyti höfðu Svíar hönd í með á Rússlandi, og komu svo sínu máli, að Karl Filippus, bróðir Gustafs Adolfs, en sonur Karls 9. Svíakonungs, var kosinn til Czars á Rússlandi.

Um síðir létu Rússar til sín taka. Þeim sveið það mest, að Sigmundur konungur vildi þrista þeim til að taka katólska trú í stað hinnar grísku, er þeir fylgdu. Söfnuðu þeir nú liði og ráku Pólverja af höndum sér. Síðan stefndu þeir alsherjarþing hjá sér, og kusu til Czars úngan mann að nafni *Mikael Fedóroviz Rómanów*. Faðir hans var erkibiskup, en móðirin dóttir Ívans annars. Með Mikael kom þannig nýr ættleggur til ríkis á Rússlandi 1613. Rússland var eptir þessar óeirðir í miklum kröggum og gat eigi reist rönd við óvinum sínum, Svíum og Pólverjum; þessvegna samdi Czarinn frið við þá hvoratveggju: Svía í *Stolbóva* (1617), og lét laust við þá Ingermannland; en Pólverja í *Divilína* (1618), er fengu Smolensk og fleiri hærð. Fékk Mikael þannig næði til að færa margt í lag hjá sér innanlands. Mikael Rómanów dó 1645.

Pólverjaland.

Konungar af *Jagiellons*-ætt réðu fyrir Pólverjalandi er þetta

tímabil hefst og fram að 1572, er karlleggur þeirrar ættar leið undir lok. Þessir tveir voru síðastir konungar af þeirri ætt: *Sigmundur fyrsti* (1506—1548), og sonur hans *Sigmundur annar* (1548—1572). Siðabótin kom til Pólverjaland, en vann þar lítið á, því að konungar höldu fast við hinn forna sið; þar á móti færðu þeir sér í nyt byltíngar þær, er siðabótin hafði í för með sér, og juku ríki sitt á tvo vegu. Sigmundur fyrsti náði (1525) undir sig Vestur-Prússlandi og lénaréttindum yfir Austur-Prússlandi, þá er Albrekt af Brandenburg, yfirmeistari (Stormester) hinna þýzku riddara, tók Lúthers trú og gjörðist hertogi yfir Austur-Prússlandi. En Sigmundur annar hafði einnig hag af því, þegar sverðriddarafélagið leið undir lok, einum mannsaldri síðar (1561). Valter af Plettenberg, foringi riddaranna, hafði lengi varizt óvinum sínum, en þegar eptirmaður hans Gotharð Kettler gat eigi lengur varizt Ívani öðrum af Rússlandi, þá sundruðust lönd þau, sem riddararnir áttu, og þá komst Lífland undir Pólverjakonung, en Gotharð Kettler hélt eptir að eins Kúrlandi fyrir sig og sína niðja.

Þegar Sigmundur annar dó, var *Hinrik af Anjou*, frakkneskur konungsson, kjörinn til konungs yfir Pólverjum, eins og fyr er ritað, en hafði þar enga viðdvöl, er bróðir hans var dæinn á Frakklandi, og hann sjálfur varð þar konungur. Fengu Pólverjar því næst þann konung yfir sig, er *Stefán Bathory* hét; hann var höfðingi yfir Siebenbürgen, og átti Önnu dóttur Sigmundar fyrsta. Hann stýrði Pólverjum frá 1575—1586, og þótti hinn nýtasti maður; hann setti háskólann í Vilna og var vægur við siðabótarmenn (er þar í landi voru nefndir *Dissidentar*). Þegar Stefán konungur dó, kusu Pólverjar þann konung yfir sig, er *Sigmundur* hét (1587). Hann var sonur Jóhanns þriðja, Svíakonungs, og Katrínar dóttur Sigmundar fyrsta, Pólverjakonungs. Hann er nefndur Sigmundur hinn þriðji. Þegar Jóhann konungur faðir hans dó (1592), erfði Sigmundur einnig konungdóm yfir Svíum, og reð þannig fyrir flestum þeim löndum, er liggja að Eystrasalti. Hann hefði því vel getað verið einn með ríkustu konungum Norðurálfunnar, ef hann hefði kunn- að á að halda sinni tign. En hann var ramkatólskur, og fyrir þá sök gekk Svíþjóð undan honum; átti hann síðan, og synir hans, í löngum og hörðum ófriði við Svía, er um síðir varð til

lykta leiddur við friðinn í Oliva (1660). Urðu þá Pólverjakonungar að afsala sér öllu tilkalli til ríkiserfða í Svíþjóð, og láta Lífland laust við Svíakonung. Sigmundur þriðji dó 1632, sama árið sem frændi hans Gustaf Adolf féll á Þýzkalandi. Við hann hafði Sigmundur átt langvinnan öfrið, en lotið jafnan í lægra hald, eins og við var að búast, þar sem slíkt mikilmenni var í móti sem Gustaf Adolf. Eptir Sigmund komu synir hans til ríkis, fyrst *Ladislás fjórði* (1632 – 1648), og þar næst *Jóhann Casimír*. Þegar Jóhann hafði setið að ríkjum 20 vetur, lét hann af konungdómi (1668), gekk í klanstur og dó 1672. Með honum var aldaða Vasa-ættin á Pólverjalandi. Þótt Pólverjaland væri um þessar mundir mjög víðlent ríki — það náði austur að Rússlandi og Dniepr-fljóti, suður að Karpatafjöllum, vestur að Slesíu og Pommern og norður að Austursjónum¹ — og landið væri víða hvar vel frjótt, mátti það alt um það heita óstyrkt ríki, lét ekkert til sín taka í utanríkismálefnum, og eigi fært um að verja sig fyrir öðrum. Var það því að kenna, að stjórnarskipun landsins var mjög illa og óhönduglega fyrir komið. Konungsvaldið var því nær sem ekkert; ríkið var jafnvel kallað lýðveldi eða þjóðveldi; aðallinn hafði alt vald í höndum; bændalýðurinn í þrældómi, og öll atvinna í höndum Gyðinga. Aðalsmenn kusu konunginn, og þegar þær kosningar bar að hendi, þá brugðust þar aldrei flokkadrættir, og öll sú óhamingja, er samtakaleysi og sundurlyndi hefir í för með sér.

Danmörk og Norvegur frá 1523 til 1648.

Þar lukum vör síðast frásögu vorri um Norðurlönd (Miðaldasaga bls. 281), er Kristján annar flýði ríki sitt í Danmörku (1523), og hélt til Niðurlanda í von um liðsafla hjá Karli keisara 5. mági sínum. Norvegsmenn höfðu engan hlut átt í með Dönum að uppreist þessari gegn konunginum, og það er eigi ólíklegt, að honum hefði farnast betur, ef hann hefði farið til Norvegs og leitað þar halds og trausts.

Friðrik hertogi, föðurbróðir Kristjáns annars, hafði lengi

1) Á dögum þrjátígi ára stríðsins var hið pólska ríki því nær 18000 □ mílur á stærð; á síðari hluta 18. aldar, áður Rússar, Austurríkismenn og Prússar ræntu það löndum og lýði, var það um 13000 □ mílur með 15 millíónum manna.

litið öfundaraugum til Hans konúnga bróður síns og Kristjáns konúnga sonar hans, og óglaðzt af því, að þeir áttu yfir meiru að ráða en hann. Beið hann því ávalt þess, að tækifæri byðist til upphéðar. Nú var tíminn kominn og tækifærið bauðst. Aðallinn bauð honum konungstign, og hann tók fegins hendi í móti, en það varð hann til að vinna, að ganga að þeim kostum, að aðallinn í Danmörku, er bæði var fjölmennur og stórríkur, hefði því nær ótakmarkað vald yfir öllum undirmönnum sínum, eins og þá var títt í hertogadæmunum og suður á Þýzkalandi. Friðrik varð þannig konungur í Danmörku og nefndur *Friðrik hinn fyrsti*. En þó alt stórmenni hefði tekið Friðrik til konúnga yfir sig, þá voru hinir margir meðal borgamanna og alþýðu, er eigi vildu skiljast við Kristján annan. Borgarlýðurinn í Kaupmannahöfn og Málmey hafði heitið Kristjáni, að ganga eigi öðrum konungi til handa hina næstu 3 mánuði, því að hann kvaðst mundu koma með liði frá Niðurlöndum áður sá tími var liðinn; en Kristján kom eigi, og vörðust borgir þessar aðra 3 mánuði, áður þær gengi Friðriki konungi á vald (1524). Á því sama ári gekk Norvegur undir Friðrik konung, því að Kristján annar hafði enga vísbendingu gjört Norðmönnum. Þó varð Friðrik konungur að heita þeim því: að nefna sig eigi erfingja að Norvegsríki; að landið skyldi vera kjörríki; lénin eigi ganga til útlendra manna, og Orkneyjar hverfa aptur undir Norveg. Sá maður, sem aldrei vildi ganga Friðriki fyrsta til handa, var *Sören Norby* (*Söfren Norðby*¹); hann hafði verið herskipaforingi Kristjáns annars, og var hinn mesti kappi. Hann hafði haft Gotlands-eyju að lèni af Kristjáni öðrum, en nú, er hann gat eigi lengur við það verið, lá hann öllum stundum úti á herskipum og herjaði bæði á Dani og Svía, en varð um síðir að hrökkva fyrir og leyta burt af Norðurlöndum, gekk síðan í lið hjá Karli keisara fimmta og féll suður við Flórenz-borg á Ítalíu 1530.

Friðrik fyrsti var nú orðinn einvaldur yfir hertogadæmunum (Holsetalandi og Slesvík) og Danmörku, en þó fór fjærri því, að sambandið milli þeirra og Danmerkur yrði nánara fyrir það. Konungur hafði jafnan aðsetu á Gottorp í Slesvík, eins og áður, því að hann undi sèr þar bezt, og var aldavinur riddaranna þar í landi. Siðabótin kom um þær mundir til hertogadæmanna, og

1) Sjá Ísl. Árbækur, ár 1515.

breiddist þar viðstöðulítið út meðal manna; og litlu þar á eftir tók danskur maður, *Hans Tausen*, að boða Lúthers trú í Vebjörgum á Jótlandi og varð vel framgengt, því að konungur sá sinn hag og varð honum liðsinnandi. Ýmsir menn gengu í lið með Hans Tausen og gjörðu bæði í ræðum og ritum að boða hinn nýja sið. Hans Mikkelsen og litlu síðar Kristján Pedersen urðu fyrstir til að snúa Nýjatestamentinu á danska túngu. Hinir katólsku biskupar risu reyndar í móti siðabótinni, sem við mátti búast, og sögðn, sem satt var, að konungur hefði lofað þeim, að hann skyldi standa í móti Lúthers trú, en konungur færðist undan með hægð, og kvaðst vilja hafa trúarfrelsi í ríki sínu. Á þingi í Ódense 1527 var það lögleitt; að hinn nýi og hinn forni siður skyldu njóta jafnréttis, og að klerkar mættu kvongast, og að biskupar skyldu þaðanaf hafa staðfestingu konungs en eigi páfans til embætta sinna. Þó fór alt með kyrð og spekt fram í þessum efnum þangað til 1530; þá tóku siðabótamenn að gjöra óspektir og brutu kirkjur og helga dóma fyrir katólskum mönnum, bæði í Kaupmannaböfn og annarstaðar í Danmörku, og ráku víða múnka af klaustrum. Í þessum óspektum áttu aðalsmenn mikinn þátt, því að þeir vildu sem fyrst hafa hinn katólska klerkalýð flatan, til þess að geta náð í hin afarmiklu auðæfi, bæði í löndum og lausum aurum, sem lágu undir klaustur og kirkjur.

Í Norvegi hafði Lúthers trú alt til þessa miðað lítið áleiðis, og Norðmenn undu því illa, er danskir aðalsmenn, sem slæddust inní landið, brutu þar kirkjur og köstaðu eign sinni á klausturin. Biskupar höfðu þar enn mjög mikil völd. Fyrir þá sök tóku þeir sig til, og *Ólafur Engilbertsson* erkibiskup í broddi fylkingar, og leituðu uppi Kristján annan, til þess að koma honum aptur til ríkis. En það er af honum að segja, að hann hafði reikað um þurra staði í útlöndum, ýmist í Niðurlöndum eða á Þýzkalandi, og alstaðar orðið illa til liðs. Karl keisari mágur hans var honum afundinn, einkum fyrir þá sök, að Kristján hafði tekið Lúthers trú, en Kristján hugsaði með sér, að láta það eigi í vegi standa, og kastaði trúnni jafnharðan; þá safnaðist honum lið; hélt hann þvínæst til Norvegs 25 skipum (1531), en hreppir storma mikla og missir mörg skip; tekur þó um síðir land í Norvegi á öndverðum vetri það ár. Ríkisráðið í Norvegi gekk honum til handa, og alt gengur vel með fyrsta, en bráðum kem-

ur herskipafloði mikill frá Danmörku og Lybek (Lybiku), og Kristján sýr þann kost beztan, að semja við skipaforingjann Knút Gyldenstjerne. Verður það þá úr, að Kristján fari til Kaupmannahafnar og semji við föðurbróður sinn, Friðrik fyrsta; er Kristjáni jafnframt heitið því, að honum skuli engin hætta búin, en allt um það lét Friðrik taka hann höndum og setja í dýflissu á Suðurborg á Alsey 1532. Erkibiskup og nokkrir aðrir með honum urðu að svara þúngum sektum, og Norvegur gekk aptur undir Friðrik konúng. Litlu síðar en hér var komið, dó Friðrik fyrsti á skírdag 1533. Hann hafði verið tvíkvæntur, og átti fyrst Önnu af Brandenburg; þeirra son var Kristján þriðji. Seinni kona Friðriks hét Sofía frá Pommern; þeirra synir voru hertogarnir: Hans hinn eldri og Adolf af Slesvík og Holstein, og Friðrik biskup af Slesvík. Friðrik fyrsti hélt alla æfi frið við nágranna sinn Gustaf Vasa Svíakonúng, og við Lybikumenn, því að honum var um það mest hugað, að geta varið óskiptu afli sínu gegn Kristjáni öðrum og yfirstígið hann, sem honum og auðnaðist. Jóhann Ranzau var hans helzti hershöfðingi; hann vann Kaupmannahöfn, og fyrir honum varð Sören Norby að hrökkva úr landi.

Kristján þriðji, sonur Friðriks fyrsta, var þrítugur að aldri þá er faðir hans dó. Hann hafði aðsetu í Slesvík eins og faðir hans hafði haft, og var jarl hans eða landstjóri í hertogadæmunum, og þótt hann væri allvel mentaður maður, og hefði verið í Wittenberg og tekið Lúthers trú, lærði hann aldrei danska tungu fremur en faðir hans eða sonur (Friðrik annar). Litlu síðar en faðir hans dó, tókst hann á hendur stjórn hertogadæmanna sem «erfðahertogi», bæði í sjálfs síns nafni og hálfbræðra sinna, er þá voru enn eigi komnir til lögaldurs. En í konúngsríkjunum, bæði Danmörku og Norvegi, varð bið á því að hann næði konúngdómi. Aðallinn danski vildi reyndar kjósa Kristján hertoga til konúngs, því að hann var þeirra vinur, eins og faðir hans hafði verið, en hinir katólsku biskupar og klerkar, sem vissu, að Kristján hafði tekið Lúthers trú og eftir hana í hertogadæmunum, voru því mjög mótfallnir, og vildu hafa til konúngs Hans hálfbróður Kristjáns, 12 vetra gamlan úngling þegar hér var komið, því að þeir hugsuðu sér, að ala hann upp í katólskum sið. Alþýðan og borgmannastéttin, bæði í Danmörku og Nor-

vegi, vildi helst hafa Kristján annan til konúngs yfir sig, en hann sat fastur í Suðurborg, og eigi auðgefið að ná honum þaðan. Nú var stefnt þing í Kaupmannahöfn (slik þing voru á þeim tímum nefnd: *«herra dagar»*, því að höfðingjar einir áttu þar setu), til konúngskosningar; áttu þángað að koma nokkrir menn úr hinu norska ríkisráði til þess að taka þátt í kosningunni af hendi Norvegsmanna. En þeir komu eigi, og var fyrir þá sök kosningunni slegið á frest til næsta árs. En það komst eigi svo langt að af því þingi yrði. Á meðan á þessu stóð, hafði ríkisráðið landstjórn á hendi í Danmörku, en í Norvegi erkibiskup og ríkisráðið norska. Til þingsins (*«herradagsins»*) í Kaupmannahöfn sendi bæði Kristján hertogi og Lybika sendimenn. Hertogans menn og Danir komu sér allvel saman og urðu ásáttir um samband sín í millum á þá leið, að hvorirtveggja skyldu öðrum veita ef ófrið bæri að höndum, sömuleiðis gjörðu hvorirtveggja samband við Niðurlendinga, og veittu þeim mikið verzlunarfrelsi í Danmörku. Þetta þótti Lybikumönnum ískyggilegt, því að verzlun þeirra var með þessu hinn mesti háski búinn. Fyrir því tóku þeir það ráðs, að hæna að sér borgamenn og alþýðu Dana, og létu í veðri vaka, að áform sitt væri að koma Kristjáni öðrum aptur til ríkis. Það þótti alþýðunni óskarad, því að hún þráði alt af apturkomudag Kristjáns. Urðu af þessu full og föst samtök millum hennar og Lybikumanna, er því næst leiddu til hins megnasta ófriðar í Danmörku.

Þessi ófriður hófst 1534, og hafa menn nefnt hann *Greifastríðið* (*«Grevens Fejde»*), fyrir þá sök, að Lybikumenn sendu *Kristófer greifa af Aldinborg* með her manns til Danmerkur til liðs við bandamenn sína þar. Fyr en nokkurn varði var greifinn kominn með liðu sínu til Sjálands í nánd við Kaupmannahöfn, og lýsti yfir því, að hann væri þángað kominn til þess, að leysa Kristján konúng frænda sinn úr varðhaldi, hjálpa lægri stéttar mönnum undan kúgunarvaldi höfðingjanna, og vernda trúna. Bændur og borgamenn urðu fegnir komu hans og gengu þegar í lið með honum, en aðalsmenn þorðu eigi að veita mótstöðu. Á skömmum tíma hafði greifinn þannig fengið yfirráð í öllum þeim hluta Danmerkur, sem lá fyrir austan Beltissund (Storebelt).

Í annan stað átti nú ríkisráðið og aðallinn fund með sér

vestur á Jótlandi, og þó að biskupar væru tregir til, var Kristjáni hertoga á þeim fundi gefið konungsnafn yfir Danmörku. En það var minstur hluti hennar, er hann þá þegar fékk yfirráð yfir, því að greifinn náði undir sig Fjóni auk þess, sem hann áður hafði náð á sitt vald; og mikill hluti Norður-Jótlands gekk einnig undan hinum unga konungi, svo að um haustið 1534, var flokkur greifans og Kristjáns annars ráðandi fyrir mestum hluta Danmerkur, en herskip Lybikumanna höfðu þar á ofan yfirráðin um alt Eystrasalt. Meðan þetta gjörðist sat Kristján annar í ströngu varðhaldi í Suðurborg, og vissi eigi, að menn voru að berjast til ríkis í hans nafni.

En Kristófer greifi og hans flokkur átti skamma stund þessu láni að fagna. Jóhann Ranzau, hershöfðingi Kristjáns þriðja, vann sigur á bændalýðnum á Norður-Jótlandi og braut þar undir sig, með hinni mestu grimd, allar þær sveitir, er gjört höfðu uppreisn móti konunginum, og vorið eptir (1535) hélt hann yfir á Fjón og vann þar algjörðan sigur á bændum, þar sem heitir Öxnaberg (Öxnebjerg). Meðan Jóhann Ranzau þannig vann Jótland og Fjón til handa Kristjáni þriðja, styrkti Gustaf Vasa Svíakonungur hann einnig til þess að vinna hin eystri fylkin (Skán, Halland og Bleking, sem Danir þá áttu). Svíakonungur óttaðist veldi Lybikumanna, og í annan stað vildi hann með engu móti, að Kristján annar kæmist aptur á frjálsan fót; þess vegna veitti hann Kristjáni þriðja mági sínum¹. Um sama leyti vann *Pétur Skram*, sjóforingi Kristjáns þriðja, sigur á Lýbikumönnum, og sömdu þeir síðan frið við Danakonung, en þó var eigi þessu greifastriði lokið fyr en árið eptir (1536), er Kaupmannahöfn, höfuðborg ríkisins, gafst upp fyrir Jóhanni Ranzau og Pètri Skram, og gekk konungi til handa.

Lúterskur konungur hafði þannig unnið sigur fyrir tilstyrk aðalsmanna. Afleiðing sigursins varð því sú, að Lúthers trú varð drotnandi í Danmörku og að aðallinn magnaðist í völdum. Jafn-skjótt sem Kaupmannahöfn var unnin, urðu konungur og hinir verzlegu ríkisráðherrar ásáttir um, að svipta biskupana því mikla valdi, er þeir höfðu haft alt til þessa. Lét konungur því næst taka biskupa höndum; en er þeir afsöluðu sér embættin og gengu að þeim kostum, er konungur setti, lét hann þá flesta lausa apt-

1) Gustaf Vasa og Kristján þriðji áttu sína systirina hvor.

ur. Þessu næst var stefnt fjölment þing (ríkisdagur) í Kaupmannahöfn, og var þá Lúthers trú lögleidd í landi, en biskupaveldið afmáð, og aðrir biskupar settir af nýju, er ekkert verzlegt vald skyldu hafa; hið mikla jarðagóz, er biskupstólunum hafði áður fylgt, var lagt til krúnunnar, eður til skólanna og annara stofnana; Friðrik var kjörinn til ríkiserfingja, sonur Kristjáns þriðja, og var þá tvævetur; í ríkisráðinu fengu nú eigi aðrir setu en aðalsmenn, og nú er klerkaveldið var úr sögunni, urðu aðalsmenn hartnær einráðir í landinu, og jók það eigi lítið metnað þeirra og auð, að þeim var leyft að eignast aptur þær jarðir, er forfeður þeirra höfðu gefið til kirkna; urðu þá sumir aðalsmenn stórríkir, og höfuðból þeirra sem konúngasetur.

Þegar greifa-styrjöldin hófst í Danmörku, vildu hvorir tveggja, bæði greifa flokkurinn og konúngsmenn, fá liðsafla af Norvegi, en Ólafur erkibiskup gaf það ráð, að menn skyldu láta Dani eigast eina við og sjá hverju fram færi í málum þeirra; fylgdu Norðmenn því ráði að mestu leyti. Þegar Kristján konúngur hafði borið hærra hlut í Danmörku, gekk Norvegur svo að segja tregðulaust undir hann, en erkibiskup fór af landi burt og dó litlu síðar í Niðurlöndum. En ríkisráðið og aðallinn í Danmörku, hugði að konúngurinn mundi verða um of einvaldur yfir Norvegi, og fyrir því varð konúngur í skuldbindingarskrá sinni, að lofa því, að Norvegur skyldi ekki vera lengur sem ríki út af fyrir sig, heldur skyldi honum stýrt sem dönsku skattlandi. Hið norka ríkisráð var afnumið, og öll lèn og æðri embætti þar í landi voru fengin dönskum aðalsmönnum í hendur. Þó var landið kallað konúngsríki, og hélt að nokkru leyti hinum eldri landslögum og innlendu stjórnarfyriřkomulagi.

Til þess að koma málefnum kirkjunnar á fastan fót, fekk Kristján þriðji nafnfrægan guðfræðing frá Wittenberg, að nafni *Jóhannes Bugenhagen*, vin og aðstoðarmann Lúthers. Hann krýndi bæði konúng og drotníngu og vígði þá 7 biskupa, er settir voru í stað hinna katólsku, sem frá urðu að fara; hann samdi *kirkju-ordínanzíu* þá (1537), sem síðan var lögleidd bæði í Danmörku og Norvegi; hann átti og mikinn þátt í þeirri endurbót, sem háskólinn í Kaupmannahöfn þá fékk, og að latinuskólar voru settir víðsvegar um landið.

Í Norvegi gekk miklu miður en í Danmörku að koma síða-

bótinni fram, en Danir gengu að því starfi með hörðu, og rændu víða klaustur og kirkjur, ráku frá stöðum hina katólsku klerka og settu lútherska í staðinn. Bar það þá stundum við, að alþýðan ýfðist í móti, og annaðhvort drap hina lúthersku klerka, eða rak þá burtu með harðri hendi; liðu svo nokkur ár, þangað til Norvegsmenn sáu, að breytt var til hins betra, og sættu sig við hinn nýja sið.

Á dögum Kristjáns þriðja tók innlend verzlun í Danmörku talsverðum framforum, en yfirgángur og einokun Hansastaðanna minkaði að því skapi, og margt var það, sem Kristján konungur bætti í ríki sínu, en þá þótti hann sjá helzt til illa fyrir Danmörku, er hann skipti hertogadæmunum (1544) með bræðrum sínum, þvert á móti tillögum Jóhanns Ranzaus, þannig: að *Hans* (hinn eldri) fékk konungsgarð í Haderslev, Norður-Slèsvík og vestri hluta Mið-Slèsvíkur; konungur sjálfur áskildi sér konungsgarð í Suðurborg og allan eystri hluta Mið-Slèsvíkur, en *Adolf* fékk konungsgarð á Gottorp og Suður-Slèsvík; á líkan hátt skiptu þeir með sér Holsetalandi. Riddararnir í hertogadæmunum fengu klaustrin, og fylgdu þeim mikill hlynnindi. Þannig voru hertogadæmin fjórskipt, og í litlu sambandi við Danmörku, og fyrir því var það eðlilegt, að illa vildi saman gróa Danmerkurríki, þá er fram liðu stundir.

Það var um tíma, að til ófriðar horfði með Karli keisara 5. og Kristjáni þriðja, en þeir sömdu svo með sér í *Speier* (1544), að friður raskaðist eigi; hét konungur þá keisara því, að mykja skyldi til um varðhald á Kristjáni öðrum.

Alt til þessa hafði Kristján annar verið hart haldinn; hann sat í litlu herbergi í turni einum á Suðurborg; jafnskjótt sem hann var kominn þar inn, var grjóti hlaðið vandlega í dyrnar og veggjalím dregið yfir; gluggi lítill með járnstöngum í efst á einum veggnum; matur var honum réttur um smugu eina á múrnum. Í þeirri dýflissu hafði Kristján setið rúm 12 ár og aldrei komið undir beran himin. Nú var skipt um herbergi, og var honum leyft að koma út, og eptir að hann hafði afsalað sér öllu tilkalli til konungdóms í Danmörku, og sömuleiðis dætur hans og tengdasynir¹, þá var hann (1550) fluttur til Kallund-

1) Kristján annar átti 4 sonu, er allir dóu úngir, og 2 dætur: *Dórótheu*, er giptist Friðriki 2. kjörfursta af Pfalz, og

borgar og fengin sæmileg höll til íbúðar, nægilegur forlagseyrir og þjónustumenn að því skapi, farið gat hann og á dýraveiðar ef hann vildi. Var konungur vel til hans upp frá því, og þá er Kristján þriðji dó, á nýársdag 1559, er sagt hinn gamli konungur hafi grátið, en 3 vikum síðar andaðist hann sjálfur, 78 ára gamall.

Friðrik annar (1559—1588) tók við ríkisstjórn eptir föður sinn, Kristján þriðja, og fór þegar á fyrsta ári síns konungdóms herferð vestur á Þéttmerski (Ditmarsken), með þeim föðurbræðrum sínum, Hans og Adolfi, en Jóhann Ranzau var fyrir liðinu. Höfðu þeir frændur ofurefli liðs, áttu þar harðar orustur, en drápu margar þúsundir manna og lögðu landið undir sig, og skiptu því síðan með sér. Þegar konungur kom heim eptir sigurför þessa var hann krýndur, en ganga varð hann að harðri skilmálaskrá aðalsmönnum í vil.

Á öndverðum ríkisstjórnarárum Friðriks annars gekk hið grimma *sjö ára stríð* (*den nordiske Syvaarskrig*) yfir Norðurlönd (1563—1570). Meðan þeir lifðu Kristján þriðji í Danmörku og Gustaf Vasa í Svíþjóð, lá stundum nærri að kólnaði vináttan milli landanna. Danir gátu eigi gleymt því, að þeir höfðu mist yfirráðin á Norðurlöndum, og til þess, að miuna menn á þau fornu yfirráð og sýna hvað þeim bjó í brjósti, settu Danakonungar í skjaldarmerki sitt 3 kórónur, en það var einmitt hið sama mark sem Svíar höfðu, hinsvegar gjörðu Svíar altaf tilkall til Gotlands.

Ári síðar en Kristján þriðji dó, andaðist Gústaf Vasa, og Eiríkur fjórtándi, sonur hans, varð konungur í Svíþjóð. En þá var líka friðurinn úti. Dönum og Svíum hafði einnig lent saman austur á Líflandi og Estlandi; þar voru Sverðriddarar í það mund að detta úr sögunni, en bæði Pólverjar, Rússar, Danir og Svíar vildu ná í þau lönd. Ófriður þessi byrjaði fyr á sjó en á landi. Svíar áttu fleiri og stærri herskip en Danir, þó unnu hvorugir á öðrum fyrst framan af. *Pétur Skram* var yfirforingi danska flotans fyrsta árið; hann var þá gamall og lagði niður herstjórn; tóku þeir þá við *Herlúf Trolle* og *Ottó Rúd* og þóttu dugandi menn. Þeir unnu sigur á Svíum undir Eylandi, en ári

Kristínu, er átti Franz hertoga af Lothringen, af henni er kominn Franz Jósef Austurríkiskeisari, og þeir frændur hans.

síðar varð Herlúf Trolle sár til ólífs, og skömmu þar á eftir varð Ottó Rúd handtekinn og settur í varðhald í Svíþjóð og haldinn hart. Gekk þá Dönum miður á sjónum úr því, einkum eftir að þeir liðu mikið tjón á skipum og mönnum í ófsaveðri undir Gotlandi (1566). Er sagt að þar færust 16 skip og 7000 manna.

Á landi gekk Dönum betur, einkum eftir að *Daníel Ranzau* varð yfirforingi þeirra; hann var ágætur hershöfðingi, en honum næstur í herstjórninni gekk sá maður, er Franz Brokkenhús hét, binn vaskasti maður. Árið 1565 vann Daníel Ranzau mikinn sigur á Svíum við Svartá á Falkenbergshéiði í Hallandi, og voru þó Svíar fjölmennari. Tveim árum síðar höldu þeir Daníel Ranzau og Franz Brokkenhús liði sínu austur á Svíþjóð og alt fram á Eystra-Gotland, háðu þeir margar orustur á þeirri leið, og einatt við ofurefli liðs, en höfðu jafnan sigur, og komust heilu og höldnu aptur til Danmerkur með offjár og marga menn hertekna. Þótti sú fór orðin hin frægasta. Litlu eftir þetta var Eiríkur fjórtándi rekinn úr völdum (1568), og var þá vopnahlæ samið milli landanna. En Jóhann þriðji, bróðir Eiríks, er þá kom til ríkis í Svíþjóð, vildi eigi samþykkjast vopnahlæð, þá er hann þóttist orðinn fastur í völdum, og laust þá aptur upp ófriðnum (1569); settust Danir þá um kastalann á Varbergi, er Svíar höfðu unnið, en í þeirri umsát féllu þeir báðir Daníel Ranzau og Franz Brokkenhús.

Norvegur fór heldur eigi varhluta af ófriði þessum, því að Svíar herjuðu þangað bæði suður og norður í landi, og gjörðu mörg spellvirki, brunnu þar á þeim árum þrjár borgir, Hamar, Osló og Sarpsborg.

Þegar Danir höfðu náð Varbergi voru hvorirtveggja mjög að þrotum komnir, og var þá loks friður saminn í *Stettín* (1570) með svo feldum skilmálum: að báðum skyldi heimilt, Svíakonungingi og Dana, að hafa 3 kórónur í merki sínu; Danakonungur sleppa öllu tilkalli til konungdóms í Svíþjóð, og Svíakonungur öllu tilkalli til Jamtlands, Herdala (Herjadals), Skánar, Hallands, Blekíngs og Gotlands; því skyldi aptur skilað, sem hvorir höfðu af öðrum unnið, en Elfsborg, er Danir höfðu tekið, fengu Svíar móti nokkru fægjaldi.

Þetta sjö ára stríð hafði valdið miklu tjóni á Norðurlöndum

og eigi hvað minnst í Norvegi, enda var þar í landi eigi góð stjórn, um þessar mundir; bæði lénsherrar og fógetar, sem því nær allir voru danskir, voru sérplægir og harðdrægir við bændalýðinn; þá var settur jarl eða landstjóri (Statholder) yfir landið, er hafa skyldi þar af konungs hendi æðstu tilsjón allra þjóðmálefna.

Friðrik konungur annar hafði um nokkur ár stýrt sínum hluta hertogadæmanna svo að ekki bar til tíðinda, en þegar bræður hans *Magnús* og *Hans* (hinn yngri) komust á legg, þóttust þeir báðir eiga erfðarétt hvor til síns hluta af konungsparti hertogadæmanna. Konungur miðlaði svo málum, að Magnús fékk Eysýslu (Ösel) og lönd hið eystra við Líflandsflóa, en Hans fékk nokkuð af áðurnefndum konungsparti, þar á meðal Suðurborg með Als og Erri (Ærø), samt Plöen en þó að eins sem lén af konungi. Hans (hinn eldri) í Haðerslev dó ókvæntur (1580), og skiptu þeir þá löndum hans, konungur og Adolf hertogi. Upp frá því var yfirráðum hertogadæmanna sundurskipt milli tveggja ættkvísla: konungs-ættkvíslarinnar og Gottorps-ættkvíslarinnar. En þá er Hans yngri dó, skiptist sá hlutinn, er hann hafði ráðið fyrir milli sona hans, og komu þannig upp 4 ættkvíslir, er tóku nafn af: *Suðurborg*, *Norðborg*, *Glukksborg* og *Plöen*; síðan hafa ættir þessar liðið undir lok, svo að nú eru að eins tvær eptir af þeim, en það eru þessar: *Ágústemborgar-ættin* og *Glukksborgar-ættin*, er báðar koma við sögu vorra daga.

Fjárhagur Dana var kominn á fallanda fót fyrstu árin fram-
an af sjö ára stríðinu, en þá gjörðist *Peder Oxe* fjárvörður ríkisins, og kom góðu lagi á alla ríkisreikninga, bæði með sparnaði í ýmsum útgjöldum, og með því að gánga ríkt eptir gjöldum þeim, er lénsmenn krúnunnar áttu að svara, svo var og Eyrarsundstollurinn hækkaður; þann toll guldu útlendar þjóðir, er um Eyrarsund sigldu. Safnaðist þá svo í sjóð, að konungur lét reisa Krónuborg og Friðriksborgar höll, og hýsa betur en áður ýmsa konungsgarða; hann lagði og fè til háskólans og studdi á ýmsan veg vísindi í landinu; voru og um þær mundir margir aðalsmenn allmiklir fróðleiks og menta vinir, og má eflaust telja gullöld aðalsmanna í Danmörku á því tímabil, sem hér er um að ræða.

Á dögum Friðriks annars voru hinir helztu vísindamenn í

Danmörku þessir þrír: *Tycho Brahe* stjörnuspekingur, *Anders Sørensen Vedel* sagnafræðingur og *Niels Hemmingsen* guðfræðingur. En er Friðrik leið, og komin var önnur stjórn í landi, varð Tycho Brahe að fara af landi burt suður á Þýzkaland, og dó í Prag hjá Rúdólfi keisara öðrum; hinir tveir Anders Vedel og Niels Hemmingsen komust einnig í óvild við stjórnina og mistu báðir embætti sín.

Friðrik konungur annar dó 1588, á fjórða ári hins sjötta tugar. Anders Vedel sagði í líkræðunni eptir hann: «Ef hans náð hefði getað neitað sér um nautn skaðsamlegra drykkja, sem nú keyrir langt úr hófi alstaðar um heiminn meðal konunga, aðalsmanna og alþýðu, þá virðist svo fyrir mannasjónum, sem hann hefði getað lifað margan glaðan dag lengur, en nú er reynd á orðin».

Elzti sonur Friðriks, *Kristján fjórði*, var kjörinn til konungs meðan faðir hans lifði, en var nú að eins 11 vetra er faðir hans lézt. Hann gat fyrir því eigi þá þegar tekið við stjórn, en ríkisráðið kaus 4 menn af sínum flokki til þess starfa: *Niels Kaas* kansallera, *Peder Múnk* admiral, *Jörgen Rósenkranz* og *Kristófer Valkendorf*. Hinn úngi konungur fékk gott uppeldi, og varð vel að sér í ýmsum vísindagreinum og ípróttum, en einkum lagði hann svo mikla stund á stærðafræði og allskonar stórsmíði, bæði húsasmíði og skipasmíði, að hann seinna, þegar hann var seztur við stjórn, gat sjálfur sagt fyrir um slík störf betur en flestir aðrir. Honum var einkar vel lagin öll sjómennska og sjómannastörf, og kom það honum síðan að miklu liði. Árið 1596 var hann kominn til lögaldurs, ritaði þá undir harða skilmálaskrá, eins og faðir hans hafði orðið að gjöra, og tók sjálfur við ríkisstjórn, og stýrði ríki sínu upp frá því með miklum skörúngskap, eljan og atorku; hann vildi helst sjá alt með sjálfs síns augum; hefði hann í smíðum herskip, eða hallir, eða önnur stórhýsi, þá var hann þar kominn og sagði fyrir verkum eins og yfirsmiður. Öft var hann á ferð í ríki sínu, til að sjá hversu alt færi fram, og til Norvegs fór hann því nær á hverju ári og stundum tvisvar. Enda var honum mjög umhugað um það land, og átti þar, ef til vill, hægra um hönd í sumu, því að aðalsmanna veldið var þar minna og óstyrkara en í Danmörku, og gat því síður haldið því aptur, er konungur vildi láta hafa fram.

Norvegur bar hans og miklar menjar; hann breytti þar lögum, og samdi nýja lögbók handa Norðmönnum (1604); kom fótum undir silfurnáma á Kongsbergi, og koparnáma á Reyrási, og lét reisa tvær nafnkendar borgir: *Kristjánú* (1624) í stað Oslóar sem brann, og *Kristjánssand*.

A öðrum stöðum í ríki sínn lét hann reisa borgir og hallir og stórhýsi: Kristjánssstað á Skáni, Kristjanópel í Bleking, Gluckstadt á Holsetalandi, Kristjánshöfn á Amager og tengja við Kaupmannahöfn; hann lét og gjöra þar í höfuðborginni, Hólmskirkju, Trínitátskirkju með sívalaturni, Frelsaranskirkju, Rósenborgarhöll, Regentsen (þar er bústaður handa 100 stúdentum) og fl. Um verzlunina lét hann sèr mjög ant. Hann kom því á, að stofnuð voru ýms verzlunarfélög, þar á meðal eitt til Austindía-verzlunar, voru þangað send skip, og verzlun sett á fót í Trankebar, er stóð um lángan aldur; hann braust og í því, að láta finna leið norðanum Ameríku til Asíu, og leyta Austurbyggðar á Grænlandi, en hvorugt hepnadist; hann lét setja á stofn ótal verksmiðjur, bætti póstgöngur í ríkinu, og á öllu hafði hann hug og alt fyrir stafni. En þó mikið og margt liggi eptir Kristján fjórða, þá hefði hann komið enn meiru áleiðis, ef aðallinn í Danmörku hefði eigi svo stórum bundið hendur hans.

Kristján konungur átti þrisvar í ófriði, og þótt hann væri sjálfur hin mesta helja og hinn ótrauðasti í öllum greinum, þá bar hann eigi sigursæld úr bítum að leikslokum, nema í eitt skipti. Hinn fyrsti ófriðurinn var við Svía, og stóð frá 1611—1613, og er kallað *Kalmar-stríð*, af því að ófriðurinn hófst með því, að berjast um Kalmar. Þá var konungur í Svíþjóð, *Karl hinn níundi*. Svo stóð á, að Karl vildi heita konungur yfir Lapplendingum, og heimti þaðan skatta; í annan stað hafði hann reist bæ þann, er *Götaborg* heitir, vestur við sjó á litlum landsgeira, er Svíar áttu þar milli landamæra Dana og Norðmanna. Hvorugt þetta vildi Kristján 4. láta viðgángast umtalslaust, vopnar því lið sitt og ræðst á *Kalmar*, og fær tekið borgina (1611). Varð Karl 9. þá svo reiður, að hann bauð Kristjáni til einvígis og var þó kominn að fótum fram, Kristján svaraði því máli miður en vera skyldi. Á því sama ári dó Karl konungur, en sonur hans Gustaf Adolf tók við stjórn. Kristján var þá 34 ára gamall en Gustaf Adolf 17 ára. Danir gjörðu harðar árásir á

Svíþjóð, brendu Götaborg og unnu Elfsborgar kastala og fleiri vígi. Þó gjörði Svía konungur allt hvað gjört varð í móti, en hann átti þá í mörg horn að líta, því að þá áttu Svíar einnig ófrið við Rússa og Pólverja. Fyrir þá sök vildi Gustaf Adolf friðast við Dani sem fyrst, og var þá friður saminn í *Knæröð* á Hallandi (1613). Slepti Gustaf Adolf tilkalli til konúngsnafns yfir Lapplöndum, skilaði aptur Jamtalandi, er Svíar höfðu unnið meðan ófriður stóð, og galt 1 million ríkisdala til þess að fá aptur Elfsborg og bygðina þar um kríng. Þóttu það þung gjöld á þeim tímum, en Gustaf Adolf vildi mikið til vinna, að hafa greiða götu til sjáfar þar vestra. Það var verzlunin og Eyrarsundstollurinn, sem hann hafði fyrir augum.

Í annað sinn átti Kristján fjórði í ófriði, og var sá við Ferdínand keisara annan og páfatrúarmenn á Þýzkalandi. Þar geysaði um þær mundir þrjátígi ára stríðið, og hallaðist mjög á prótestanta. Leituðu þeir þá liðs hjá Kristjáni fjórða, en Hollendingar, Frakkar og Englismenn hétu fjárstyrk nokkrum. Kristján konungur hafði allmikið lið, og flest þýðverska menn; en hamíngjan fylgdi honum eigi á þeirri leið. Hann hélt hernum suður á Saxland (1625) en vildi það óhapp til, að hann féll með bestu sínum niður af girðingunum umhverfis *Hamelns*-kastala, í diki það, er þar var grafið til varnar; varð fallið svo mikið, að menn hugðu konungi eigi líf. Árið eptir (1626) beið hann ósigur, í orustunni við *Lütter am Barenberg* í Brúnsvík, fyrir *Tilly* hershöfðingja. Þjóðverjar brugðust Kristjáni og voru honum óhlýðnir, og fjárstyrkurinn brást frá Englum og Frökkum, og þar á ofan bættust fleiri óhöpp, svo að Kristján konungur varð að halda heim og verja ríki sitt. Árin tvö hin næstu þar á eptir, herjuðu þeir *Tilly* og *Wallenstein* norður í Danmörku, lögðu Holsetaland, Slesvík og Jótland undir sig, og gjörðu þar ógurlegan skaða á fólki og fjármunum. Konungur gat eigi varið land sitt sem hann vildi, því að ríkisráðið (aðallinn) vildi ekki leggja fê í sölnurnar, en eyjarnar gat hann varið með herskipum sínum, og komust þeir *Wallenstein* eigi þangað. Keisarinn hafði beyg af því, að Svíar mundu skerast í leikinn móti sér, og samdi því frið við Kristján í *Lýbeck* (1629); fékk Dana konungur aptur öll sín lönd, en varð að lofa því, að hjálpa eigi optar prótestöntum á Þýzkalandi. Þessi ófriður við þjóðverja gaf tilefni

til þess, að frændsemi og vinátta kólnaði milli Danakonunga og hertoganna á Gottorp. Friðrik, er nefndi sig hinn þriðja, sem þá var þar hertogi, sonarsonur Adolfs sem áður er getið, lét árið 1627 Wallenstein fá til umráða alla kastala í ríki sínu, en það mislíkaði Kristjáni fjórða sem vonlegt var, og seinna meir, þá er ófriðaðist með Svíum og Dönum, gjörði sá hertogi samband við Svía, og jafnan voru hertogar þessir síðan í óvinaflokki Dana.

Efnabagur Danmerkur eptir Lýbiku-friðinn var mjög erfiður. Aðallinn var eigi sömu kostum búinn sem fyr, en drambið og stórmenskan hin sama. Alþýðan tók að kvarta undan kúgun þeirri, sem hún lengi hafði orðið að bera með þögn og þolinmæði. Konungur sá og heyrði hvað fram fór, en gat þó eigi viðráðið, því að aðallinn ónýtti allar tilraunir hans, er miðuðu til að bæta kjör hinna óæðri manna. Aðalsmenn voru margir stórauðugir, en vildu lítið láta af hendi rakna í landsins þarfir; alþýðan gat eigi einsömul risið undir þeim útgjöldum, sem við þurfti, og fyrir því greip Kristján konungur til þeirra óyndis úrræða, að hækka Eyrarsundstollinn meir en hófi gegndi; þótti Niðurlendingum og öðrum siglínghöfðingjum slík tollheimta óþolandi, og varð Dönum að því ógagn mikið seinna, þegar kólnaði með þeim og Svíum. En þess var eigi lengi að bíða.

Svíar voru orðnir víðfrægir af framgöngu sinni á Þýzkalandi; læk Kristjáni næsta öfund á um frægð þeirra, og reyndi að miðla málum svo að friður kæmist á og lokið væri sigurvinnslum þeirra. *Axel Oxenstierna*, er þá stýrði Svíþjóð, var vel kunnugt um atferli og áform Danakonungs, og fyrir því býður hann *Lennart Torstensson*, er þá var höfðingi fyrir hinu sænska liði á Þýzkalandi, að halda því liði norður á Danmörk. Torstensson brá þegar við, og fyr en nokkurn varði var hann kominn á Holsetaland (í desembermán. 1643) og lagði á svipstundu undir sig bæði hertogadæmin og Jótland allt norður á Skaga. Um sama leyti ræðst annar sænskur hershöfðingi, *Gustaf Horn*, suður á Skán, og var það ráðagjörð þeirra Svíanna, að hvorutveggja herinn skyldi síðan halda yfir á hinar dönsku eyjar og mætast þar. Til þess að flytja herinn út á eyjarnar, var bæði gjörður út sænski herskipaflotinn, og þar að auki fjöldi skipa frá Hollandi, sem Svíar höfðu fengið þar á leigu. En hinsvegar var nú Kristj-

án fjórði eigi aðgjörðalaus, þótt hann væri kominn hált á sjötugs aldur. Fyrst vann hann sigur á hollenzka flotanum í *List-erdjúpi* við eyna Sylt, og þarnaest hitti hann sænska flotann 6 vikum síðar austur undir Femern þar sem heitir *Kolbergerheide* (í júlímán. 1644). Tókst þar orusta hæði hörð og löng; varð Kristján konungur sár og misti annað augað, en barðist eigi að síður meðan dagur til vanst; voru herskip Svía þá orðin illa til reika og lögðu inn á Kílarfjörð þá er skyggja tók; setti konungur sjóforingja þann, er *Peder Galt* hét, til að varna þeim brottkomu þaðan, en þó sluppu Svíarnir út hjá honum um nóttina; enda misti Galti lífið fyrir það glappaskot. Litlu síðar komu herskip af nýju frá Hollandi til móts við sænska flotann í Eysstrasalti. *Pros Mund* danskur aðmíráll barðist þar við þá, en beið ósigur og féll sjálfur (1644). Nú var illa komið fyrir Dönum. Hertogadæmin og Jótland voru í hershöndum; í hinum eystri fylkjum: Skáni, Hallandi og Bleking, báru Svíar einnig herra hlut, og á sjónum voru þeir og Hollendingar einráðir. Kristján beiddist því friðar, og komst hann á í *Brömsebro* (1645) fyrir milligöngu Frakka. Þeir sömdu friðinn, Axel Oxenstjerna af hendi Svía, og Korfiz Úlfeld af hendi Dana. Urðu Danir að láta Herjedal og Jamtaland, og eyjarnar Ösel (Eysýslu) og Gotland, og auk þessa fengu Svíar tollfrelsi fyrir öll sín skip í báðum Beltum og Eyrarsundi, og Halland um 30 ár að veði fyrir þessu tollfrelsi. Hollendingar fengu og stórum lækkuð tollgjöld af sínum skipum. Það er sagt að tekjur Dana af skipatollinum hafi árlega verið 300 þúsundir ríkisdala á undan þessari friðargjörð, en aðeins 80 þúsundir eptir friðinn. Þannig lauk þessum þriðja og síðasta ófriði Kristjáns fjórða, og varð hann mjög undir í þessum viðskiptum. Á öndverðum ríkisárum Kristjáns, höfðu Danir haft á sér mikið orð og staðið fremstir þjóða á Norðurlöndum, en nú var svo komið, að Svíar höfðu rutt sér til rúms og náð þar öndvegissæti. Danmörk var sárt leikin eptir þenna ófrið, fjárhagurinn að þrotum kominn, en óánægjan megn í landinu gegn ofríki og sérplægni aðalsmanna, en hvorki konungur eða alþýða fengu viðráðið. Þrem árum síðar en hér var komið andaðist Kristján fjórði vetri meir en sjötugur (1648). Hann hafði verið tvíkvæntur, og átti fyrst Önnu Katrínu af Brandenburg. Þeirra synir voru *Kristján*, er fyrir mörgum árum hafði

verið kjörinn til konungs eptir föður sinn, en dó rúmlega fertugur missiri á undan honum — og *Friðrik*, er síðan varð konungur. Seinni kona Kristjáns fjórða hét *Kirsten Munk*, og var vígð honum til vinstri handar. Þeirra börn voru mörg, og er *Eleonore Kristine* þeirra nafnkendust; hún átti *Korfs Úlfeld*, hinn göfgasta mann og ríkasta í Danmörku, og þó urðu afdrif hans hin verstu, en Eleónóra hafði enga sök aðra en þá, að hún unni manni sínum og var honum trú, og fyrir þá sök sat hún harðlega haldin 22 ár í «Bláturni» í Kaupmannahöfn, hinni verstu dýflissu. En það var nokkru síðar en hér er komið sögunni.

Svíaríki (1523—1630).

Þar er þá til að taka, að Svíar höfðu eptir Stokkhólmsvigin (1520) gripið til vopna, gengið undir merki *Gustafs Eiríkssonar Vasa*, og rekið Dani af höndum sér og öll þeirra yfirráð. En úr því að svo var komið, og eigi annað umtalsmál, en að Svíar tækju sér innlenda stjórn, þá þótti Gustaf Vasa maklegastur til þeirrar vegsemdar. Hann var því fyrst kjörinn til landsstjóra, og tveim árum síðar á ríkisdeginum í Strengnesi (1523) tekinn til konungs yfir Svíþjóð. En svo mikill vandi fylgdi þeirri vegsemd, að eigi gátu þá Svíar betur valið en þeir gjörðu. Landið var af stjórnleysi og langvinnnum óeirðum fátækt og í alskonar ólagi; skattarnir brukku hvergi nærri til ríkisnaðsynja, en að leggja nýja skatta á bændur var ógjörlegt; meir en þriðjungur landsins var í höndum aðalsmanna og klerka, og af þeim hluta var als ekki goldið til almennings þarfa. Borgarar gátu heldur ekki goldið, því að verzlun þeirra var lítil og í höndum Lýbiku-kaupmanna. Aðallinn átti að vísu talsverðar eignir og auð, en það var einkum klerkastéttin sem var stórrík, hana skorti hvorki lönd né lausa aura. Þaðan varð því fæð að koma, ef nokkuð skyldi framgengt verða í Svíaríki. En að fá fæ bjá klerkum og kirkjum í þá tíð til landsins þarfa, það þótti óvinnandi verk. Sumir af stjórnendum Svía hófðu áður freistað þess, en það hafði orðið þeim að fótakefli. Stúrnir, slíkir sem þeir höfðu verið á sinni tíð, þorðu eigi að reyna slíkt. Gustaf Vasa þorði það. Og að honum tókst það sýnir eitt með öðru hvílíkt mikilmenni hann var.

Þegar Gustaf Vasa slapp forðum úr varðhaldi í Danmörku,

komst hann til Lýbiku, dvaldist þar um hríð og kyntist þar ritum Lúthers og siðabótinni. Hann hugleiddi vandlega hið mikilvæga efni. Þegar hann nú var seztur að völdum í Svíþjóð og sá, að því nær alt þurfti þar breytingar við og endurbótar, en hvergi fæ til nema hjá klerkunum, og að þeir lifðu í alsnægtum og óhófi, og hældu landslýðnum í villu og vanþekkingu, þá setti hann sér það mark og mið, að minka veldi þeirra, og verja því fæ til þarfa lands og lýðs, sem þeir höfðu misjafnlega aflað og eyddu með ósóma; hann einsetti sér að koma siðabótinni á í ríki sínu, en hann gjörði það eins og annað með viturleik og stillingu, en þó með þeim kjark og manndómi, sem eigi varð í móti staðið.

Bræður tveir eru nefndir til sögunnar, hét annar *Ólafur*, en annar *Lárus*¹. Faðir þeirra hét *Pétur*, og bjó í borg þeirri á Svíþjóð, er Örebro heitir; hann var smiður mikill og góður hjargálnamaður. Þeir bræður voru námngjarnir mjög þegar á unga aldri, og kom faðir þeirra þeim til læringar í klaustur eitt skammt þaðan. En sem þeir höfðu verið þar um hríð, fóru þeir utan, eins og þá var alltítt, til frekari menningar með útlendum þjóðum. Þeir komu til Wittenbergs og heyrðu þar kenningu Lúthers, sannfærðust um ágæti hennar og fylgdu henni síðan dyggilega. Ólafur var ákafamaður mikill og framgjarn og manna bezt máli farinn, Lárus var spaklyndari, minni mælskumaður en bróðir hans, en rithöfundur öllu meiri; báðir voru þeir bræður vel lærðir.

Þegar þeir komu heim aptur til Svíþjóðar, tóku þeir til starfa. En þá var hið mesta herhlaup og vopnabrák í landinu, og allur þorri manna gaf kenningu þeirra lítinn gaum; en meðan á ríkisdeginum í Strengnesi (1523) stóð, kom Ólafur Pétursson þar fram, og fór að boða þingmönnum hinn nýja sið. Alt varð í nppnámi og kom fyrir konungs eyru; lét hann kalla Ólaf á sinn fund, og gjörði hann konungi grein á aðalinntaki fræða sinna. Gustaf lét sér það vel líka, en hafði eigi orð á við aðra. Litlu síðar setti hann Lárus til kennaraembættis í guðfræði að Uppsölum, en Ólaf til prestsembættis í Stokkhólmi. Með aðstoð þessara tveggja manna, og svo hins þriðja, er hét *Lárus*

1) Bræður þessir eru í bókum optast nefndir latínskum nöfnum: *Olaus Petri* og *Laurentius Petri*.

Andrèsson (Laurentius Andreæ), og sem varð kanselleri Gustafs, tókst honum að greiða götu Lúthers trúar út um landið. Ólafur prestur flutti orðið af mikilli djörfúng og mikilli mælsku í Stokkhólmi. Hinir katólsku klerkar höfðu jafnan verið vanir að halda guðspjónustu sína á latínska tungu, sem lýðurinn hlustaði á, en skildi ekki orð í. Ólafur prædikaði á sænsku og hvert mannsbarn skildi það er hann sagði. Streymdi nú til hans múgur og margmenni. Sumum fèll vel í geð hin nýja kenning, sumir urðu á báðum áttum hverju trúa skyldi, sumir reiddust og kölluðu slíkt hin mestu býsn og undur. Múnkarnir urðu óvægir, áttu orðakast við hann, en urðu þar undir, því að hann var þeim miklu lærðari og betur máli farinn. Þar kom að Ólafur mætti ofsóknum, og var grjóti barður, og einatt í lífsháska, þó lét hann eigi af að prædika öllum stundum, er hann komst höndum undan. Hinir katólsku biskupar beiddu konúng gjöra meistara Ólaf landrækan, en konúngur gaf þeim það svar, að þeir beiddu þess eigi optar.

Nú stóð svo á um þetta leyti, að penínga vantaði til þess að gjalda nokkrum útlendum hersveitum mála, er verið höfðu í Gustafs þjónustu; aðalsmenn, borgamenn og bændur skutu fè saman til þeirra útgjalda, en það hrökk eigi til. Þá beiddi Gustaf klerkana láta nokkuð af hendi rakna; þeir kváðust alt annað vilja fyrir hann gjöra, en eignir heilagrar kirkju mættu þeir með engu móti skerða. Þá setti Gustaf þeim aðra kosti, og þorðu þeir þá eigi lengur að skorast undan gjaldinu.

Nú batnaði ekki í biskupunum. Einn af þeim hét *Pètur Sunnanväder* og var biskup í Vesturási; hafði þjónað Steini Stúre hinum ýngra, og gefizt þá eigi vel, en nú vildi hann steypa Gustaf Vasa úr völdum og hefja Níels Steínsson Stúre til ríkis, og komast svo sjálfur til upphesðar. Hann tók það ráðs, að æsa Dalakarla upp til ófriðar og leiða þeim fyrir sjónir, að Gustaf væri ránglega orðinn konúngur, þar á ofan væri hann óbærilegur harðstjóri, og enginn ætti annar konúngur að vera í Svíþjóð en Níels Stúre. Þessu líkt ritaði hann norður um alla Dali. En vinir Gustafs konúngs sáu þessi bréf og sendu honum. Konúngur sýndi bréfin og setti dómendur til að dæma orð og gjörðir biskups; hann misti embætti en hélt lífi. Knútur erkibiskup vefengdi þann dóm, og kvað klerkum einum leyflegt eptir kirkju-

rættinum að dæma biskup, en als eigi öðrum. Þá svaraði konungur: «Sá sem vill skjóta þeim manni undan dómi, er sannur er að landráðum, hann er sjálfur um landráð sekur, og fyrir þá sök eru þér og öllu valdi sviptur». Þá sló þögn og ófögnuði á alla er viðstaddir voru. Konungur bauð samstundis að kjósa annan biskup í stað Péturs í Vesturási. Svo var gjört. Því næst fór hann til Stokkhólms og bauð kanokum í Uppsölum að kjósa annan erkibiskup. Og var það einnig gjört. Konungur átti um þessar mundir við mörgu að snúast í ríki sínu. Áhángendur Kristjáns annars, einkum Sören Norðby, gjörðu óspektir suður í landi; Friðrik fyrsti Danakonungur vildi vera yfirkonungur allra Norðurlanda, — því að Danir gátu eigi gleymt Kalmarsambandinu, — og sendi í þeim erindum menn og bréf til Svíþjóðar. Fór Gustaf Vasa þá suður á Skán til fundar við Danakonung, og áttu þar tal saman; sagði Gustaf svo: að Dönum hefði aldrei tekizt til fulls að vinna Svíþjóð, og nú væru minni líkur til þess en nokkru sinni áður, sjálfur kvaðst hann skyldu vera vinur Danakonungs, ef konungur svo vildi, en undirmaður hans vildi hann aldrei verða. Var því máli síðan aldrei hreift.

Meðan Gustaf konungur var í suðurför þessari, höfðu katólsku klerkarnir vakið óspektir norður í landi, einkum biskup sá er *Hans Brask* hét, slúnginn maður og voldugur; þeir bræður Ólafur og Lárus höfðu verið bannfærðir, og meðal alþýðunnar var víða hinn mesti kurr. Konungur fór um landið, talaði við bændur, og friðaði þá með málsnild sinni. Norður í Dölum höfðu þeir Pétur Sunnavæder og Knútur, er fyr var erkibiskup, æst lýðinn svo að þar varð upphlaup, en konungur kom þar og sefaði menn. Hinn nýi erkibiskup, sem kom í stað Knúts, hét Jóhannes Magnús, var gæflynður maður, og hafði eigi kjark í sér til þess að sýna konungi beinan mótþróa, en mjög var honum illa við það, að konungur hélt verndarhendi yfir siðabótarmönnum, og heimtaði fé af kirkjum og klerkum til ríkisparfa. Erkibiskup hélt sig mjög ríkmannlega, og fór aldrei svo um biskupsdæmi sitt, að hann hefði eigi 200 vopnaðra manna í för með sér. Einhverju sinni kom Gustaf konungur til hans, og tók erkibiskup honum með miklum virktum og lét búa til veizlu dýrðlegrar; voru þar hásæti tvö, sat konungur í öðru en erki-

biskup í öðru; að veizlulokum tók erkibiskup bikarinn sér í hönd, sneri sér að konungi og mælti: «Vor náð drekkur yðar náð til». Gustaf var fljótur til svars og mælti: «Þín náð og vor náð komast eigi báðar fyrir undir sama þaki». Litlu síðar varð erkibiskup að víkja af stóli, hélt eptir það af landi burt og andaðist suður í Róm. Því meir sem konungur þrengdi að klerkunum, því meiri varð óánægjan í landinu, því að þeir gjörðu alt sem þeir gátu til að ófrægja konung, og sá hann að svo búið mundi eigi duga, ef siðabótinni ætti að verða framgengt, og landið taka nokkrum framsörum. Hann tók það ráðs, að kveðja menn til þings að *Vesturási*, og skyldu þar saman koma kjörnir menn af öllum stöttum rikisins (1527). Katólsku klerkunum sagði illa hugur um fund þenna, því að þeir vildu eigi, að talað væri margt um trúarbrögðin í viðurvist alþýðu, og því síður, að konungi gæfist færi á að tala til allra stétta um það efni; þeir óttuðust mælsku hans og þau áhrif, sem hún hefði á lýðinn. Þeir tóku þess vegna ráð sín saman og hétu hver öðrum, að vernda eignir sínar og einkaréttindi gegn konungi. Og þegar er þingið var sett, lýsti Brask biskup yfir því af hendi klerkastéttarinnar, að það var vilji hennar að halda réttindum sínum og eignum óskertum í alla staði, eins og að fornu hefði verið. Konungur spurði því næst ráðherrana, hvernig þeim geðjaðist að orðum biskups. Þeir svöruðu, að hann hefði mikið til síns máls. «Fyrst svo er», mælti Gustaf, «þá lystir oss eigi lengur að vera konungur; annara andsvara áttum vér von af yðar hendi en þessara. Nú þykir oss það engi furða, þótt alþýða manna sé orðin ær og sýni oss óhlýðni og baki oss áhyggjur, er hún hefir slíka leiðtoga. Fáir menn eigi regn, þá er oss um kent; fáir menn eigi sólskin, þá er oss einnig gefið það að sök. Komi harðæri, húngur eða sóttir, eða hvað annað, sem að getur amað, þá er sökin vor. Slíkar þakkir fáum vér fyrir alt það ónæði og allar þær áhyggjur, er vér megum á oss taka fyrir land og lýð og yður alla til samans. Vér vinnum eptir megni yður til gagns og góða, en eigum engi önnur laun í væntum en þau, að þér sæuð gjarnsamlega að exin stæði föst í höfði voru, þó að engi yðar sé sá fullhugi, að hann þyrði um skaptið að halda. Slíkra launa getum vér fult eins vel án verið eins og hver yðar. Vér verðum daglega að gegna meiri störfum og standa í

meiri vanda bæði í innlendum málum og útlendum, en þér viljið og getið skilið, til þess að vér getum heitið höfðingi yðar og konungur. Þó viljið þér nú setja yfir oss bæði klerka og múnka, og alt páfans endemi. Í einu orði að segja, allir viljið þér dæma oss og yfir oss drotna, þótt vér sèum rétt kjörinn konungur yðar og herra. En hver getur með þeim kosti verið yðar konungur? Vér ætlum, að hinn versti þúki í helvíti vilji hafa sig undan þeginn slíkri tign, og því fremur allir mennskir menn. Fyrir því skuluð þér vita, að vér afsegjum að fullu og öllu að vera konungur yðar, og megið þér nú kjósa hvern þann í vörn stað, er yður gott þykir. Þó skuluð þér vera við því búnir, að gjöra oss full skil á foreldra arfi vorum, er vér höfum öllum orðið til að kosta í ríkisins þarfir. Og ef þér gjörið svo, þá lofum vér yður því, að fara hëðan af landi burt og koma hér aldrei síðan. «Að svo mæltu gekk konungur af þingi og til hallar sinnar, en þingheimur sat hljóður og sem agudofa eptir, og mælti engi maður orð.

Nú liðu svo nokkrir dagar. Þingmenn gátu eigi orðið á eitt sáttir, en því lengur sem þeir ræddu þetta vandamál, því ljósara varð þeim, að ríkið mátti eigi án Gustafs vera. Það var því til bragðs tekið, að senda menn á hans fund og biðja hann, að taka aptur að sèr ríkis stjórn og konungdóm. Gustaf var lengi tregur en þó kom þar, að hann kvaðst mundu gjöra að ósk þeirra og vilja, ef þeir játuðu honum hlýðni og hollustu, og var nú svo gjört. Var nú aptur tekið til þingstarfa og að síðustu með lögum ákveðið; 1. að öllum eignum og tekjum biskupa, kirkna og klaustra, sem fram yfir það væri er nauðsyn krefði, skyldi verið í ríkisins og krúnunnar þarfir, og biskupar skyldu lausar láta við konung allar hinar víggirtu hallir sínar; 2. að alt sem gefið hefði verið til kirkna eður klaustra fyrir daga Karls Knútssonar, skyldi falla aptur til krúnunnar; 3. að alt sem gefið hefði verið, selt eður veðsett kirkjum eða klaustum eptir daga Karls Knútssonar, skyldi hver sá mega leysa til sín aptur, er sannað gæti erfðarétt siun; 4. að guðsorð skyldi breint og óbrjáláð upp þaðan í frá prèdikað í öllum kirkjum ríkisins. Þá var og leitt í lög, að konungur skyldi skipa biskupa, kanúka o. s. frv. en páfinn koma þar hvergi nærri; biskupar skyldu eigi erfa presta, eins og áður hafði verið, heldur réttir erfingjar;

guðsorð skyldi kenna úngum mönnum í skólunum o. s. frv. Undir alt þetta urðu klerkarnir að játast, með höndum og innsiglum. Þannig lauk þessu merkilega Vesturáss-þingi (ríkisdegi). Svíar héldu svo miklu sem frekast varð af kirkjusiðum katólskra manna, og talsvert meiru en Danir, er litlu síðar en hér var komið leiddu í lög hjá sér siðabót Lúthers. Hinir fyrstu biskupar í Svíþjóð, eptir að siðabótin var þar lögleidd, voru vígðir af biskupi þeim, er sjálfur hafði verið vígður biskupsvígslu í Róm. Lárus Pétursson (*Laurentius Petri*) varð fyrstur erkibiskup í lútherskum sið í Svíþjóð, og vann af viti og stillingu stórum að útbreiðslu siðabótarinnar þar í landi; hann á og mestan þátt í hinni fyrstu þýðingu biblíunnar á sænska túngu, og bæði hann og Ólafur bróðir hans rituðu margt og mikið til þess að fræða landsfólkið um guðs orð og góða siði.

Eptir að Gustaf Vasa hafði þannig brotið klerkavalðið á bak aptur, og lagt mikinn hluta eigna þess og auðæfa undir krúnuna, magnaðist að því skapi konungsvaldið í Svíþjóð. Aðallinn hafði að sönnu ráðið þar miklu að undanfögnu, en hann hafði orðið fyrir stórmiklu skakkafalli af Kristjáni öðrum; nú fékk hann reyndar nokkuð af þeim auði sem klerkarnir mistu, en eigi náði hann slíku einveldi sem aðallinn í Danmörku, og ríkisráðið varð nú að eins ráðaneyti konungs. Af alþýðunni mætti konungur þegar fram í sótti talsverðri mótspyrnu, því að hún hafði löngum átt hendur sínar að verja móti konungum meðan Kalmar-sambandið stóð, og hafði fyrir þá sök til að bera miklu meiri dug og djörfúng en t. a m. alþýðan í Danmörku. Alþýðan í Svíþjóð sá að Gustaf Vasa var ráðríkur og afskiptasamur um öll málefni, og þótti hann ganga of nærri fornu frelsi og fornum réttindum sínum. Konungur gat að vísu opt sefað lýðinn með orðum einum, er hann kom sjálfur til viðtals, en alt um það urðu þó stundum upphlaup þar í landi, svo að til vopna kom og vandræða. Skal hér nú getið hinna helztu óspekta. Pétur Sunnanväder, sá sem fyr var nefndur, lét eigi af að æsa menn til ófriðar móti konungi. Hann hitti norður í Dölum einn úngan bóndason, er líkur var í sjón Stúra-ættinni. Pétur gaf honum það ráð, að hann skyldi segjast vera sonur Steins Stúra hins ýngra, og freista svo ef hann gæti brotizt til ríkis, því að Gustaf hefði hrifsað ránglega undir sig þau völd, er Stúarnir

ættu með öllum rétti. Og sem Pétur hafði komið þeirri flugu í munn hinum unga manni, þá fór hann um byggðina og beiddi sér liðs, og urðu margir til, er ginnast létu af hans fortölum. Síðan fór hann vestur í Þrándheim og kom þar svo ár sinni fyrir borð, að Ólafur erkibiskup og ýmsir meiri háttar menn trúðu honum og létu talsvert fæ af hendi rakna honum til styrktar. Með þeim fjárafla hélt hann aptur austur í Dali og efldi flokk sinn móti konungi, en sá varð endir þess máls, að konungur bældi ófriðinn niður, og exin stytta hvorumtveggja aldur, bæði Péttri Sunnanvæder og hinum unga manni, er svo hafði rasað fyrir ráð fram. Öðru sinni kviknaði ófriður í Dölum fyrir þá sök, að konungur hafði boðið, að hver sú kirkja, er ætti tvær klukkur, skyldi láta aðra til þess að goldnar yrðu ríkisskuldir. Um það leyti kom Kristján annar til Norvegs (1531), og vildi brjótast aptur til ríkja sinna á Norðurlöndum, og gat Gustaf því eigi snúizt við Dala-uppreist þessari fyr en Kristján var handsamaður og settur í varðhald, eins og fyr er ritað; en þá sefaði Gustaf þenna klukknahtljóm Dalamanna. Skæðastar urðu þær óspektirnar, sem kviknuðu í Smálandi (1542), og kalla má *Dakka-hríð*. Bændum og borgamönnum var víða gramt í geði til aðalsins og fógetanna, því að þeir sættu opt afarkostum af þeim, og þó konungur rétti einatt hluta bændanna, þá gat hann eigi vitað alt, sem fram fór í ríki hans. Það sat og í bændum og borgamönnum, að höfðingjar einir höfðu á þingi í Örebro (1540) ráðið því með konungi, að Svíþjóð þaðan af skyldi vera *erfðaríki*, en eigi kjörríki, eins og áður, en bændur höfðu als eigi verið til þess þings kvaddir. Ýms lög hafði og konungur sett, er að vísu miðuðu bændalýðnum til góðs, en bændum líkuðu ekki lög-in, og þóttu þau skerða frelsi sitt. En þó Svíar væru harðfengir og hneigðir til sjálfræðis og óspekta, þá voru hvergi meiri brögð að því en í Dölum, og einkum í Smálandi¹. Smálendingar höfðu tíðum stýtt fógetum konungsins aldur, og sætt í staðinn þungum hegníngum og sektum af konungi; hlupu þá sumir frá hús-um og heimilum og lögðust út, og drógu slíkir menn að sér alskonar illþýði, og urðu að lokum margir saman og unnu ýms fólkuverk.

1) Smálendingar voru eins og *Tegnér* segir á einum stað: „Männer för sig, en vikingastam, med styrkan till lagbalk.“

Niels Dakki er maður nefndur; hann bjó á Dakkamúla; hann var auðigur að fè, harðfengur og ódæll; hann deildi við annan mann um land, og dæmdi fógeti af honum landið. Þá reiddist Dakki og drap fógetann; var hann þá tekinn og settur í varðhald, en leyndist þaðan á brott og komst til skógar; hitti Dakki þar brátt stigamenn og gjörðist foringi þeirra. Bændur, þeir sem óeirnastir voru, gengu til liðs við þá Dakka, reðust því næst í bygðina og drápu hvern fógeta og aðalsmann, er fyrir þeim varð, en brendu þorp þeirra og bústaði; færðist þessi óalдарstraumur bygð úr bygð yfir landið, og horfði til hinna mestu þjóðvandræða. Konúngur sendi lið í móti, og gekk svo lengi, að bændur urðu eigi sigraðir, og eigi var óspektum þessum lokið fyrir en að tveim árum liðnum.

Eftir það bryddi eigi á óeirðum í Svíþjóð, og Gustaf stýrði ríki sínu í friði. Tóku Svíar þá mjög miklum framförum í öllum greinum undir handleiðslu hins vitra og stjórnsama konúngs. Hann hafði, eins og fyrir er ritað (bls. 136), tekið þátt í greifastríðinu og styrkt til ríkis Kristján Danakonúng, mág sinn, og bæði þá og síðan varpað af Svíum einokunarverzlun Lýbikumannanna, og fóru Svíar nú að eignast skip, og á síðustu árum Gustafs konúngs voru þeir orðnir allmiklir kaupmenn og farmenn, og fluttu vörur á skipum sjálfrá sín til annara landa. Herskip lét konúngur gjöra mörg, og kom fótum undir fastalið í landinu, sem eigi hafði áður átt sér stað. En þó konúngur legði mikið í kostnaðinn, þá var nóg fè í öllum fjárhirzlum ríkisins, er hann skildi við.

Gustaf Vasa var þríkvæntur, og átti fyrst *Katrinu af Saxen-Lauenborg*; þeirra son var Eiríkur, er síðan varð konúngur. Önnur kona Gustafs var sænsk og hét *Margræt Lejonhufvud*, vitur kona og góð, og unni konúngur henni mjög; þau áttu mörg börn, og voru þeir Jóhann og Karl þeirra synir, og urðu báðir konúngar. Þriðja kona Gustafs hét *Katrín Stenbock*, og var systurdóttir Margrëtar drotníngar. Stóð því Laurentius erkebiskup og klerkarnir með honum fast á móti því, að konúngur ætti hana; en það varð fram að ganga í þessu sem öðru, er konúngur vildi. Eigi er þess getið, að Gustaf konúngi yrði barna auðið í þessu þriðja hjónabandi. Þeir synir Gustafs uxu nú upp og voru allir hinir mannvænlegustu. Var Eiríkur þeirra elztur

og borinn til ríkis eftir föður sinn, en fyrir þá sök að Eiríkur var ódæll mjög í uppvexti, hafði hann lítið ástríki af föður sínum, en Jóhanni unni Gustaf hugástum. Þeir móðurfrændur Jóhanns bættu heldur eigi samlyndið milli bræðra þessara; og þannig var margt er að því studdi, að þeirra í millum gjörðist síðan fullur fjandskapur. Til þess að sporna við því, að Eiríkur stofnaði öllu ríkinu í vandræði, fékk Gustaf konungur hinum yngri sonum sínum mikil lönd til forráða, og gaf þeim hertoga nafnbót; þannig fékk hann Jóhanni Finnland, en Karli Suðurmanneland, Nerike og Vermaland. Að Gustaf hafi séð fyrir, að róstusamt mundi verða í ríkinu eftir sinn dag, má ráða af því, er honum varð að orði, þá er hann talaði til fulltrúa þjóðarinnar í síðasta sinni. Hann sagði svo meðal annars: «það er kunnugt, að mörgum hefir þótt eg vera ærið harður konungur. En þeir tímar munu koma, að Svíar mundu kjósa að ná mér aptur upp úr moldunni, ef þess væri nokkur kostur». Litlu síðar andaðist Gustaf Vasa (1560) hátt á sjötugs aldri, og hafði stýrt Svíþjóð hartnær um 40 ár með hinum mesta skörúngskap.

Eiríkur sonur hans, hinn 14. með því nafni, tók því næst konungdóm yfir Svíum. Eiríkur var námsmaður mikill og vel að íþróttum búinn, og hafði margt til þess að geta orðið hinn nýtasti þjóðhöfðingi, en hann var tortryggur og hviklyndur, og hafði svo litla stjórn á geði sínu, að þegar því var að skipta, mátti heita að hann væri eigi með öllu ráði. Faðir hans hafði verið hinn mesti sparnaðarmaður, og safnað miklu fé í sjóð. Eiríkur eyddi stórfé bæði til hirðar sinnar og í allar þær mörgu kvenbænaferðir, er hann sendi til ýmsra landa. Hann beiddi margra kvenna og það um sama leiti: Elisabetar drotningar á Englandi, Maríu Stúart á Skotlandi, hertogadóttur af Lothringen, og landgreifadóttur af Hessen; en alstaðar var honum synjað ráðahags. Þá er hann lét kryna sig, gjörði hann nokkra af vildarmönnum sínum að *greifum* og *fríherrum*, og fékk þeim sýslur miklar að lèni, er að erfðum skyldu ganga. Þau tignarnöfn koma þá fyrst fyrir í Svíþjóð. En sá var tilgangur Eíríks með þessu, að fá eitthvert jafnvægi móti bræðrum sínum, Jóhanni og Karli, því að hann óttaðist þá jafnan. Hin fyrstu árin, sem Eiríkur sat að ríkjum, gjörði hann ýmsa hluti, er til gagns máttu verða. Hann setti yfirdóm í ríkinu; hann setti gestaherbergi með öll-

um þjóðvegum, tók of marga óþarfa helgidaga, er loðað höfðu við frá páfadómi, og veitti Kalvínstrúarmönnum hæli í ríki sínu, er í það mund flýðu fyrir ofsóknum af Frakklandi. En óvildin og hatrið milli Eiríks konungs og Jóhanns hertoga bróður hans á Finnlandi fór dagvaxandi. Jóhann kvongaðist og átti Katrínu Jagellonika af Póllandi um sama leiti sem ófriður hófst milli Svía og Pólverja. En undirrót ófriðarins var sú, að Reval-borg og Estland, er *sverðriddarar* höfðu ásamt með Líflandi afhent Pólverjum, hafði gefizt á vald Svíum, til þess að verða eigi Rússum að bráð. Vildu svo hvorirtveggja bæði Svíar og Pólverjar ná Estlandi. Nú sem Eiríkur frétti kvonfang Jóhanns bróður síns og það með, að hann hefði lánað Sigmundi Pólverja konungi stórfé, þá sendir Eiríkur her manns austur á Finnland, lætur taka Jóhann höndum og setja í varðhald í Gripshólma; sat Jóhann þar 4 ár. Þá hófst um sama leyti hið *norræna stjóra stríð* við Dani og Norðmenn; fékk allur sá ófriður Eiríki svo mikillar áhyggju, að skapsmunir hans urðu hálfu verri en áður; það spilti honum og stórum, að hann átti illa ráðgjafa, og er Göran eða *Jöran Persson* þeirra nafnkendastur; hann rægði aðalinn á allar lundir við konúnginn. Eiríki þótti mönnum sínum ganga illa á landi í ófriðnum við Dani, og kendi hershöfðingjum sínum um ófarir þær, er þeir fóru fyrir Danieli Ranzau, og eptir Svartárorustuna lét konúngur misþirma einum þeirra, er *Niels Sture* hét, hinum göfugasta manni, sonarsyni Steins ýngra, og litlu síðar lét konúngur varpa Nielsi í fángelsi, lagði þar sjálfur hönd á hann og lét drepa hann, og nokkra fleiri af hinum beztu og tignustu mönnum. Varð Eiríkur þá með öllu vitstola, og hljóp út á skóg og fanst eigi fyr en að nokkrum dögum liðnum. En nú kom að honum hræðsla og hugarvél, og vildi friðmælast við ættíngja þeirra manna, er hann hafði látið drepa, og þá lét hann Jóhann bróður sinn lausan. En þá var svo komið, að margir þóttust eiga um sárt að binda, og Jóhann þorði eigi að treysta friðarorðum bróður síns; þar til kom og, að Eiríkur hafði kvongast og tekið sér til drotníngar konu eina *Karínu Monsdóttur* að nafni, af lágum stigum, er áður hafði verið frilla hans — en var að öðru leiti góð kona — og lýst yfir því, að Gustaf sonur þeirra Karínar skyldi erfa ríkið eptir sinn dag. Það þótti Jóhanni hertoga óþolandi og þá laust

upp ófriðnum; gjörðust þeir bræður Jóhann og Karl foringjar uppreistarmanna, og lauk svo, að Eiríkur varð handtekinn og settur í dýflissu (1568), en Jóhann tók við ríkisstjórn. Hann var krýndur að Uppsölum og nefndur *Jóhann þriðji*. Litlu síðar stefndi Jóhann konungur mönnum til þings í Stokkhólmi til þess að dæma Eirík frá konungstign og völdum. Eiríkur var færður á þing til að svara máli sínu. Hann gjörði það svo vel og sköruglega, að mörgum tók að blandast hugur. Þá mælti Jóhann: «þú ert alsendis frá vitinu!» Eiríkur svaraði. «Als einu sinni var eg frá vitinu, og það var þá, er eg lét þig lausan af varðhaldi». Málið datt niður, en Eiríkur var dæmdur af krúnunni og til æflánga varðhalds, en þó skyldi fángelsið vera þannig, að konungbörnum manni hæfði. En mjög var síðan út af því brugðið. Beitti Jóhann konungur hinni mestu hörku við bróður sinn, og lét hrekja hann úr einni dýflissunni í aðra, og að síðustu eptir 9 ára varðhald, lét hann drepa Eirík á eitri (1576)¹. Jóhann ætlaði einnig að láta taka af lífi Gustaf son Eiríks, en sveinninn komst undan og af landi burt, varð frægur af lærdómi sínum, en lifði við fátækt og dó í Rússlandi 1607. Karínu Monsdóttur, ekkju Eiríks konungs, var Jóhann þar á móti hinn bezt, og sá svo um, að hún lifði engan skort. Hún staðnæmdist síðan austur á Finnlandi, og andaðist þar 1612.

Jóhann 3. var þannig orðinn konungur yfir Svíþjóð, en Karl hertogi bróðir hans ræð þeim fylkjum, sem hann var yfirskipaður, hartnær sem einvaldur konungur, og margt fór þá fram í Svíþjóð að hans ráðum og vilja, því að Karl var vitur maður og manna harðfylgnastur, er því var að skipta; var því löngum lítil vinátta með þeim bræðrum. Jóhann veitti aðlinum ýms rættindi, og hafði þaðan styrk móti bróður sínum.

Þess er áður getið, að ófriður (sjö ára stríðið) stóð milli Dana og Svía meðan Eiríkur 14. sat að ríkjum. Þegar Eiríkur var sviptur völdum, stöðvaðist sá ófriður um stund. En síðan lét Jóhann konungur hefja þann ófrið að nýju, og halda honum fram, þangað til fullur friður komst á í Stettin 1570. Það sem

1) Eiríkur var lærður maður og skáld gott, og eru til eptir hann sálmar, er hann orkti í fángelsinu. Hann fékk stundum að hafa hljóðfæri og ritföng þar hjá sér, til þess að styttta sér stundir, en stundum var hvorttveggja tekið frá honum.

þá einkum knúði Jóhann til friðar við Dani, var geigur sá, er honum stóð af Rússum. Þá reð fyrir Rússlandi Ívan Vasilviz, hinn annar með því nafni, og er hans áður getið. Ívan vildi brjóta undir sig Estland og Liðland, en Svíar höfðu þar þá yfirráð; vildi Jóhann eigt laust láta, og varð af því hinn mesti ófriður. Framan af veitti Svíum miður, en þegar fram í sótti tím-ann, varð Svíum þar vel framgengt, einkum eptir að *Pontus de la Gardie* varð yfirforingi hersins. Hann var ættaður af Frakklandi, og er af honum kominn mikill og frægur ættbálkur í Svíþjóð. Svíar náðu aptur löndum þeim, er Rússar höfðu tekið, og þar á ofan unnu þeir Ingermannland (þar er nú Pétursborg) og Kexholm. Lauk óeirðum þessum eigi fyr en 3 árum eptir dauða Jóhanns 3. með Teusinar-friðnum 1595¹. Rússar sleptu tilkalli til Estlands og Narva, en fengu Ingermannland og Kexholm aptur.

Meðan Jóhann sat í fángelsi sem fyr er ritað, hafði hann fengizt mikið við guðfræði, og hugfest að koma á sátt og samlyndi í ríki sínu í trúarefnum, því að enn var þar eigi um heilt gróið milli hins nýja siðar og hins forna, milli katólskunnar og lútherskunnar. Katrín drottning Jóhanns fylgdi katólskum sið, og með henni slæddust Jesúítar til Svíþjóðar; hafði bæði hún og þeir mikil áhrif á konúng í trúarefnum, og svo fór, að konúngur tók katólska trú, og fór að semja við páfann um að leiða aptur í lög katólska trú í Svíþjóð með vissum skilyrðum. Og til þess að koma því í kríng lét hannn búa til nýja *kirkju-ordinanzíu* eða reglu um guðspjónustugjörð og helgihöld (*Liturgi*); voru í hana teknir margir af siðum katólskra manna, og klerkar þeir, sem eigi vildu þeim sið fylgja, voru reknir frá embættum. En þegar eigi gekk saman með konúngi og páfa um skilyrðin, Katrín drottning dáin, og Jóhann konúngur kvæntur annað sinn, og sú drottning (*Gunilla Bjelke*) hélt fast við Lúthers trú, þá snerist Jóhanni hugur, og hætti þá við katólskuna en hélt fast við ordinanzíu þá er hann hafði sett, og sem átti að þræða einskonar meðalveg milli páfatrúar og Lútherstrúar. Karl hertogi bróðir Jóhanns var athvarf lútherskra manna í Svíþjóð

1) *Teusin* er skamt frá Narva, hinní nafnkendu borg, þar sem fundur þeirra Karls 12. og Péturs Czars varð árið 1700.

um þessar mundir, og þurfti engi maður að hugsa til að þoka honum af réttum vegi í þeim efnum.

Gustaf Vasa hafði kent sonum sínum mörg heilræði og þar á meðal þessi: «eitt sinn segja og þar við láta sitja, er betra en hundrað sinnum tala», og, «hafð dugandi menn um yður og hreina í lífernisháttum, menn trúa því um yður, er menn vita um þá». Hvorigu þessu heilræði fylgdi Jóhann; hann var reikull í ráði, mikill í loforðum, en lítill í efndum, og sýndi það sig eigi sízt í trúarefnum, þó var hann maður vel viti borinn og lærður vel; hann hafði misjafna menn sér við hönd, er eigi bættu heldur spiltu mörgu fyrir honum; urðu mest brögð að því eptir að Katrín drottning hans var dáin, því að hún hafði jafnan komið þar fram, er til hins betra mátti vera, þótt hún katólsk væri. Jóhann konungur átti óskilgetin börn á hinum yngri árum sínum; eitt af þeim hét Sofía, hennar fékk hershöfðinginn *Pontus de la Gardie*, sem fyr er nefndur. Jóhann þriðji varð sótt dauður 1592.

Sigmundur sonur Jóhanns þriðja og Katrínar erfði ríki í Svíþjóð eptir föður sinn, en áður var hann orðinn konungur á Póllandi; hafði hann alizt þar upp með móðurfrændum sínum og numið þar katólska trú, og fylgdi hann henni rækilega meðan hann lifði. Einhverju sinni á hans yngri árum höfðu ráðherrarnir sænsku sagt við hann, að hann gæti eigi orðið konungur þeirra Svíanna nema því að eins, að hann tæki Lúthers trú. Þá svaraði Sigmundur: «heldur kys eg hina sönnu trú án krúnunnar, en krúnuna án sannrar trúar». Sigmundur konungur var suður á Póllandi þá er Jóhann faðir hans dó, og gat eigi við snúizt þá þegar að vitja ríkis síns í Svíþjóð. Hafði Karl hertogi þar landstjórn á hendi í fjærvist Sigmundar, og lét þegar halda þing fjölmengt að Uppsölum (1593); var á því þingi hrundið kirkjureglu Jóhanns þriðja, en Lúthers trú lögtekinn sem þjóðtrú yfir allt ríkið. Þessu næst kom Sigmundur til Svíþjóðar, og varð styggur við, er hann heyrði hvað gjörzt hefði að Uppsölum; kvað hann það alt ógilt vera, er þannig væri undirkomid án vilja síns og vitundar; urðu af því hinir mestu vafningar, en svo lauk, að Sigmundur varð að samþykkjast Uppsala-gjörðinni, og að því búnu var hann krýndur til konungs yfir Svíþjóð. En er frá leið efndi hann orð sín miðlúngi vel og

reyndi á ýmsar lundir að koma á katólskum sið; líkaði Svíum það stórfilla. Litlu síðar fór Sigmundur suður á Pólland, en Karl hertogi tók þá alla ríkisstjórn sér í hendur í Svíþjóð; þótti ráðherrunum hann ærið afskiptasamur og ráðríkur og undu því illa, hneigðust þeir þá fremur en áður að Sigmundi, því að þeir vissu, að hann var gæflyndur, og, að þeir gætu meiru ráðið undir hans ríkistjórn. Fór þá svo, að ráðherrarnir flestir brukku af landi burt og leituðu til Sigmundar. Nokkrum tíma þar eftir kom Sigmundur að sunnan með her manns, og voru ráðherrarnir í för með honum; ætlaði konungur nú með valdi að þröngva Karli hertoga og landsmönnum til hlýðni við sig; varð fundur þeirra þar sem heitir *Stångabru* (1598), skamt frá *Linköping*, og vann Karl hertogi þar fullan sigur. Síðan varð sættum komið á með þeim frændum, og þeir skilmálar settir, að Sigmundur skyldi láta alt standa óbreytt, er Karl hafði fyrirskipað, og þar á ofan selja Karli í hendur alla þá ráðherra, er til hans höfðu flúið, en síðar skyldi á almennu ríkisþingi ræða öll þau málefni til lykta. Að því búnu eirði Sigmundur eigi lengur í Svíþjóð, en hélt sem hraðast, eða strauk, suður á Pólland. Svíar kröfðust, að konungur gjörði annað tveggja, vera þar kyr í landinu, eða senda Ladislás son sinn þangað og láta hann alast þar upp í lúterskum sið. Sigmundur vildi hvorugt gjöra. Áttu Svíar þá þing í *Linköping* (1600) og var þar lýst yfir því, að Sigmundur og niðjar hans hefðu fyrirgjört konungdómi í Svíþjóð. Var Karl hertogi nú einvaldur orðinn yfir Svíum, og hófust þá harðar ofsóknir gegn öllum þeim, er fylgt höfðu flokki Sigmundar konungs; voru flestir af ráðherrum þeim, sem áður eru nefndir, af lífi teknir, (Linköþings vígin) og margur fékk þá að kenna á ráðriki Karls og hörku. Fjórum árum síðar, þegar Jóhann, bróðir Sigmundar, hafði afsalað sér konungstign, tók Karl hertogi sér konungsnafn og var nefndur *Karl níundi*. Hann hafði að vísu farið fram með mikilli hörku, og margan mann hafði hann lífi svipt fyrir litlar sakir, en hann stýrði ávalt ríki sínu með frábærum viturleik og dugnaði, og var Svíum hinn þarfasti konungur. Höfðu Svíar átt fremur illri stjórn og ónýtri að venjast síðan Gústaf Vasa leið, þar til nú að Karl sonur hans kom til ríkis. Hann efldi stórum alla atvinnuvegi landsmanna; hann lét reisa *Gautaborg*, og var það eitt hið mesta nauðsynjaverk; þar

en hvergi annarstaðar, lá Svíþjóð að Jótlandshafi (Kattegat) um þær mundir; hann lét reisa borgina *Karlstad* á Vermalandi, en alt fram á þá daga var það fylki mönnum lítt kunnugt og að kalla óyrkt. Háskólann að Uppsölum hafði Steinn Stúre hinn eldri sett á stofn, og var sá skóli á fallanda fæti þar til er Karl níundi rétti hann við aptur; og svo var um fleira, er hann leiðrétti og umbætti aptur í ríkinu. Iðnaður, akuryrkja, verzlun og vísindi tóku þannig miklum framförum í Svíþjóð á hans ríkisstjórnarárum. Við nágranna sína: Póllendinga, Rússa og Dani átti Karl 9. lengstum í ófriði. Þegar Sigmundur konungur frétti, að Svíar hefðu sagt honum upp hlýðni og hollustu, lagði hann Estland undir ríki sitt á Póllandi, því að Sigmundur þóttist eptir sem áður vera konungur í Svíþjóð, og fyrir því eiga full umráð yfir Estlandi. Í annan stað vildi Karl Svíakonungur eigi láta rænast, og af þessu reis hinn mikli og lángvinni ófriður milli Svíþjóðar og Póllands, er stóð um hálfa öld; kom sá ófriður ákaflega hart niður á Póllandi. Um þessar mundir voru innanlands óeirðir miklar á Rússlandi (Demetriusarnir). Karl níundi tók þátt í þeim óeirðum, því að hann hafði von um, að geta komið Karli Filippusi, yngra syni sínum, þar til valda, þótt eigi ætti það að auðnast. Og á hinum síðustu árum Karls konungs hófst ófriður milli hans og Dana (Kalmarstríðið), eins og fyr er ritað. Svíar áttu þannig ófriði að gegna á allar hendur, þá er Karl 9. andaðist 1611. Karl konungur var tvíkvæntur, og átti fyrst *Mariu*, kjörfurstadóttur af Pfalz, þeirra dóttir var *Katrín*, móðir Karls 10. Svíakonungs, er síðar mun getið. Seinni kona Karls níunda hét *Kristín*, dóttir Adolfs hertoga af Holsetalandi og Kristínar af Hessen, þeirrar er Eiríkur 14. forðum hafði beðið. Synir þeirra Karls og Kristínar voru þeir *Gustaf Adolf* og *Karl Filippus*. Það lá nærri að Karl Filippus yrði Czar á Rússlandi, en hann andaðist áður það yrði, rúmlega tvítugur, en Gustaf Adolf varð konungur í Svíþjóð eptir föður sinn, og verður nú frá honum sagt.

Gustaf Adolf var borinn og barnfæddur í Stokkhólmi 9. dag december-mánaðar 1594. Það kom þegar í ljós, að hann var vel gjörður bæði til lífs og sálar; líkaminn var hraustur og fríður sýnum, skilningurinn hvass, hugurinn þrúður og kjarkmikill, hjartað viðkvæmt, en hreint og hneigt til alla þess, sem var gott og

fagurt og háleitt; uppeldi fékk hann eitt hið bezta og að því skapi, er slíku úngmenni hæfði. Karl konungur faðir hans var einatt á ferðum og leit eptir hversu alt fór fram í ríkinu, hann var og stundum í hernaði; en á flestum þeim ferðum hafði hann son sinn með sér, til þess að herða hann og venja við ýmsa hluti. Þá var það einhverju sinni, er konungur var kominn að borg þeirri, er Nýkaupángur heitir, og var staddur hjá skógarnefi einu. Þar var þá Gustaf Adolf sonur hans í för með honum, og eigi eldri en fjöggra eður fimm vetra gamall; vildi sveinninn í skóginn, en þar var kona ein gömul og mælti: «farðu eigi inn í runnana barn, þar eru höggormar sem bíta þig» «fá mér þá barefli» mælti Gustaf Adolf, «eg skal rota þá». «Hann er óhræddur sá litli», mælti konungur og brosti við, og var því tali svo lokið. Þegar konungur var í hernaði yfrá Finnlandi, var Gustaf Adolf þar með honum, og er sagt, að honum hafi snemma þótt gaman að sjá hermannafylkingar, og því fremur sem þær höfðust meira að. Þá sögðu menn: «þar er hinn gamli örn floginn úr heiðrinnu og hefir úngann með sér til þess að kenna honum flugið og venja hann við að hremma». Þegar Gustaf Adolf var heima, var hann sjaldan að leikum sem önnur úngmenni, en sat þá við bóknám eða heyrði á viðræður föður síns og hinna vitrustu manna, og lærði þannig bæði margt og mikið í fornum og nýjum fræðum; hann var eigi eldri en 9 vetra, er faðir hans lét hann sitja á ráðssamkomum og kynnast stjórnarstörfum, sýndi hann þá þegar svo mikla eptirtekt og svo frábæra greind, að öllum fannst mikið um, og sagði faðir hans einhverju sinni, er hann fann, að hann sjálfur eltist og þreyttist og mundi eigi endast til að koma því fram, er honum bjó í skapi: «*ille faciet*» (þ. e. hann mun gjöra það) og klappaði hendiinni á koll syni sínum. Það var eigi faðirinn einn, heldur allir sem til þektu, er gjörðu sér miklar og fagrar vonir um Gustaf Adolf.

Karl níundi dó, eins og áður er sagt, á ofanverðu ári 1611. Þá var Gustaf Adolf eigi fullra 17 vetra gamall, og til konungs tekinn, og fengin öll ríkisforráð í hendur, þótt hann hefði eigi náð lögaldri. Ríkið var þá í miklum vanda, því að ófriður var við útlendar þjóðir á þrjár hendur: við Dani, við Rússa og við Pólverja, en innanlands skorti bæði fólk og fê, og það sem lakast var, samlyndið og samtökin voru eigi hin bezta. Þeir voru

margir, er ógjarnan vildu þjóna syni Karls níunda, er svo hart hefði leikið þá eða þeirra frændur, og kváðu Sigmund einan og engan annan rétt kjörinn konung í Svíþjóð; aptur voru aðrir, er vildu til konungs taka Kristján fjórða Danakonung; hann var þá á bezta skeiði, reyndur að vitsmunum og hinn röskasti til allrar framgöngu, hafði og mikinn hluta Suður-Svíþjóðar í sínu valdi, og eigi annað líklegra, en að hann mundi vinna allt landið undir sig, þótti þeim því sá kostur bestur, að ganga sjálfviljugir á hans vald, heldur en veita mótstöðu, og þola högg og hernað af Dönum, en fá þó eigi með úngum og óreyndum konungi varizt ofurefli Kristjáns Danakonungs. Af fjandmönnum Gustafs Adolfs voru Danir næstir og voðalegastir; þeir höfðu unnið Kalmar, eitt hið helzta og sterkasta vígið í landinu, og þar að auki margar borgir, en bygðir víða komnar í auðn, og var eigi annað fyrir að sjá, en að þeir mundu taka Stokkhólm, höfuðborgina; var ríkið þá alt komið í útlendra manna hendur, eins og fyrrum. Svíakonungur sá hættuna og vildi komast hjá henni með góðu móti. Hann sendi því Danakonungi orð, kvaðst vilja sættast og bauð honum góða friðarkosti. Kristján svaraði engu. Sá Gustaf Adolf þá eigi annað ráð, en verja sig og ríki sitt meðan auðið yrði. Um þessar mundir var hann svo félítill, að hann varð að selja borðsilfur sitt og ýmsa dýrgripi til bráðustu nauðsynja. Ríkisdagurinn var konungi samhuga; mörgum var illa við Dani, og vildu alt leggja í sölurnar til þess að komast eigi aptur í það sambyli. Þannig safnaðist Svíum nokkurt fé og mannaflí; urðu nú orustur með mönnum og veitti ýmsum betur. Danir höfðu meira lið og betur búið og varð þeim víða vel framgengt; en hins vegar var Gustaf Adolf ópreylandi; hann var alstaðar þar sem hættan var mest, og hitti jafnan þau úrræði og veitti jafnan þá hjálp, er best átti við. Þjóðin sá hvílskur afbragðsmaður í honum bjó; vakti það hjá henni bæði ást og traust til hans, og við það óx Svíum hugur og dugur, enda varð nú vörn þeirra meiri og sterkari eptir því sem lengra leið. Danir sáu, að þeir mundu eigi fá unnið Svíþjóð, og urðu fúsari til friðar. Loksins komst friður á í *Knæröð* á öndverðu ári 1613, en þúngir urðu friðarkostirnir Svíum, og eigi batnaði vináttan milli þeirra og Dana, þó þeir væru nú sáttnir að kalla. Konúngarnir efndu vel þenna frið meðan þeir lifðu báðir, og vör-

uðust alt er til nýrra vandræða gæti orðið, sýndu enda hvor öðrum öll hin ytri virðingar og vináttu merki, en þó voru þeir engir vinir. Kristjáni þótti nóg um sigursæld og frægð Gustafs Adolfs, þegar fram í sótti. Og Gustaf Adolf sagði svo, að honum þætti meira kveða að Kristjáni Danakonungi en nokkrum öðrum þjóðhöfðingja í Norðurálfu, «en hitt vildi eg gjarna» — bætti hann við — «að lengra væri á milli okkar Kristjáns heldur en er».

Á síðustu árum Karls konungs níunda og fyrstu árum Gustafs Adolfs stóð hin mesta óöld á Rússlandi. Í þá daga voru Rússar ekkert á veg komnir, kunnu enga manna siði, og voru fyrir þá sök eigi sjálfbjarga. Meðan þessi innanlands ófriður og flokkadrættir lágu þar í landi, leituðu Rússar hjálpar hjá nábum sínum, Svíum og Pólverjum; en þessir nábúar voru, eins og vant er að vera, sjálfum sér næstir og hugðu mest á það, að hafa gagn af bágingum og stjórnleysi Rússa. Pólverjar vildu koma einum af sínum mönnum þar til ríkis; Svíar vildu eigi verða minni. Þess er áður getið, að Svíar höfðu átt vopnaviðskipti við Rússa, og borið af þeim, en þó kvað mest að framgöngu Svía og sigursæld á Rússlandi eptir að Pontus de la Gardie og Karl Horn fengu þar herstjórn. Þegar þeir tveir voru liðnir undir lok gengu synir þeirra *Jakob de la Gardie*¹ og *Evert Horn* í fótspor feðra sinna; voru báðir hinir mestu kappar og unnu mörg hærð og margar borgir vestan á Rússlandi. Evert Horn féll þar, en Jakob de la Gardie kom því að síðustu svo fyrir, að Rússar kusu Karl Filippus hertoga, bróður Gustafs Adolfs, til stórfursta (eða Czars) yfir sig (1611). En heima í Svíþjóð vildu menn heldur vinna sem mest af Rússlandi og leggja undir Svíþjóð sem skattland, en senda hertogann þangað og láta hann koma þar fótum undir mikið ríki, er í engu væri Svíum háð. Af þessum rökum drógst það, að hertoginn færi þangað austur, og loksins þegar að því kom, að hann færi (1613), sáu Rússar hvað Svíum bjó í brjósti og tóku þá innlendan mann *Mikael Fedoróvitz Romanow* til höfðingja yfir sig, eins og fyr er ritað. Nú laust ófriðnum upp að nýju milli Rússa og Svía; urðu Svíar drjúgari eins og vant var, og Gustaf Adolf, er þá var orðinn konungur, fór sjálfur þangað austur og vann þar

1) Jakob de la Gardie lærði hernaðariþrótt í Niðurlöndum hjá Móríz af Oraníu.

nokkrar borgir. En er honum þótti þar nóg aðgjört, þá samdi hann (1617) frið við Rússa í *Stolbóva*, litlum bæ, skamt í landsuður frá Ladóga-vatni. Eignuðust Svíar þá lönd öll fyrir vestan Ladóga, og að sunnanverðu við Finnlandsflóa; voru það bæði mikil lönd að viðáttu og landkostir hinir beztu. Höfðu Svíar stórum vaxið og auðgast í þessum viðskiptum þeirra við Rússa, og var nú mikill fögnuður í landi eptir þenna friðarsamning. Sagði Gustaf Adolf svo, er hann skýrði ríkisdeginum frá friðargjörðinni: «að nú hefðu Svíar eignast margar bygðir og frjóvsamar, flskríkar stórar og vel lagaðar til flutninga; nú hefðu Svíar greiðan veg um Neva- og Narvafljót fyrir verzlun sína, sem þeir gætu bannað Rússum hve nær sem vildi; Rússum væri svo algjörlega fyrirmunað Eystrasalt (Austursjórinn), að þeir gætu eigi komið þar einni kænu á flot, þótt þeir vildu. Þar á ofan væru nú landamerkin miklum mun skipulegri og hægri til varnar heldur en áður: Ingermannland væri varið af Peipus-vatni og Narva-fljóti; Finnland, fordyri Svíþjóðar, af Neva-fljóti og hinu breiða Ladóga-vatni¹, og yfir það diki yrði Rússum erfitt að hlaupa». Gustaf Adolf var svo framsýnn, að hann sá hvílíkur háski Svíum var búinn af Rússum, ef þeir næðu föstum fæti við Eystrasalt, enda kom það fram seinna. Öðru sinni sagði konungur, «fái sá grimdarseggur (Rússinn) að eins stígið fæti sínum inn í fordyrið (Finnland) þá er hann fyr en varir kominn í húsið sjálft».

Þannig var Gustaf Adolf nú laus orðinn við þá tvo óvini, Dani og Rússa, er hann hafði að erfðum tekið eptir föður sinn. Hinn þriðji var eptir, það voru Pólverjar, og víkur nú sögunni þangað.

Sigmundur Pólverja konungur, sem fyr er nefndur, var ófáanlegur til að sleppa tilkalli til ríkis í Svíþjóð. Hann nefndi sjálfan sig jafnan Svíakonung, en Gustaf Adolf, frænda sinn, aldrei annað en hertoga af Suðurmannalandi. Þar að auki gjörði hann hvað hann kunni til þess að æsa menn í Svíþjóð til ófriðar móti Gustaf Adolf konungi þeirra. Svíar höfðu nú átt í ófriði því nær um 60 ár, þegar hér var komið og óeirðunum

1) *Ladoga*-vatn er allra stöðuvatna mest í Europu, yfir 300 ferh.mílur á stærð, og litlu minna en alt konungsríkið Würtemberg.

við Rússa var lokið, þóttust því þurfa hvíldar við og næðis, og það vildi konungur þeirra einnig. Þess vegna bauð hann Sigmundi sættir og fullan frið og gjörði honum góða kosti, en Sigmundur vildi engum sáttum taka nema því að eins, að Gustaf Adolf legði niður konungstign og fengi sér hana í hendur, en læti sér nægja með hertoga nafnbót, og þau fylki til forráða, er Karl hafði haft faðir hans, áður en hann varð konungur. Slíka afurkosti þoldu hvorki Svíar né Gustaf Adolf, og urðu á það sáttir, að láta vopnin skera úr málum. Þannig hófst að nýju ófriður milli Svía og Pólverja (1617), og stóð öðru hverju um 12 ár, framan af einkum á Liflandi en seinni árin barst leikurinn vestur í löndin, um sveitirnar meðfram Weikselfjóti neðanverðu. Þau árin sem þessi pólski ófriður stóð, var Gustaf Adolf vanur að fara á vorin suður á Pólland og berjast þar sumarlángt, en er hausta tók, hélt hann heim til Svíþjóðar, sat þar á vetrum og gætti ríkis síns; herinn skildi hann eptir á Póllandi og lét hershöfðingja sína stýra honum. Skulu hér nú nefndir nokkrir af þeim.

Gustaf Horn, var bróðir Everts Horns, þess sem áður er nefndur. Þeir frændur voru ættaðir af Finnlandi. Gustaf Horn var fæddur 1592, stundaði fyrst bóknám í ýmsum háskólum á Þýskalandi, síðan gekk hann í herþjónustu hjá Móríz af Oraníu, er þá þótti einna mestur hershöfðingi, og þegar hann kom heim aptur, gjörðist hann hirðmaður Gustafs Adolfs. Gustaf Horn var vitur maður og vel stiltur, en þó hinn mesti fullhugi. Konungur setti hann löngum til landstjórnar í ýmsum fylkjum, stundum hafði hanu æðstu herstjórn á hendi, þegar konungur var eigi við staddur, og einatt var hann sendur til annara þjóðhöfðingja þegar semja skyldi vopnablæ, eður einhverja þá samninga gjöra, er vandasamir þóttu. Konungi þótti svo mikið til Gustafs Horns koma, að hann kallaði hann *sína hægri hönd*. Gustaf Horn átti Kristínu dóttur Axels Oxenstjerna.

Jóhann Banér, fæddur 1596, var af góðri og göfugri ætt í Svíþjóð. Faðir hans hét Gustaf og var einn af ráðherrum þeim, sem Karl 9. lét höggva í Linköping (1600). Jóhann var snemma kvikur, mikill fyrir sér og einarður. Það er sagt að einhverju sinni kom Karl níundi á bæ þann, er Jóhann var að uppsóstri. Konungi leizt vel á sveininn, setti hann í knè sér og mælti:

«Viltu eigi sjá hirðina og fara til mín?» Jóhann lét sér eigi bilt við verða og svaraði: «Sá gamli má fara til þín, þú sem læzt hálshöggva föður minn». Þegar hann var á áttunda ári var hann staddur í höll einni í Svíþjóð, það var suður við sjó; sveinninn sat í glugga einum og horfði á skipin, er þau sigldu frá landi og suður á hafið; glugginn var opinn og þetta var á þriðja lopti; en er minst varði, föll Jóhann út um gluggann og niður á stræti, en sakaði þó als eigi. «Það er auðsèð að þú ert ætlaður til einhvers mikils», sagði Gustaf Adolf, er hann frétti þetta löngu síðar, þá er Jóhann var genginn í hans þjónustu. Fylgdi Jóhann síðan konungi trúlega meðan til vanst, og varð stórfrægur maður.

Lennart Torstensson fæddist 1603 og ólst upp með ömmu sinni í Svíþjóð, en faðir hans hafði fylgt Sigmundi konungi og var lengi síðan í útlegð. Lennart kom 15 vetra gamall til Gustafs Adolfs og gjörðist hirðsveinn hans. Konungur sá skjótt, að þar var mannsefni bæði mikið og gott, og hafði hann með sér á herferðum sínum. Í einni orustu sendi konungur Lennart með skilaboð til eins af hershöfðingjum sínum. Þegar Lennart var kominn á leiðina sá hann, að óvinirnir breyttu fylkingaskipun sinni, skildist honum þá, að það ráð konungs mundi eigi að haldi koma, er hann átti að flytja; tekur því ráðið hjá sjálfum sér og segir hershöfðingjanum, að svo hafi konungurinn fyrir mælt, og við það ríður hann aptur til konungs. En þá hafði konungur sèð hvað óvinir hans höfðust að, býður því Lennarti að fara um hæl aptur, og segir hvað gjöra skuli; en það var alt hið sama sem Lennart var búinn að segja. Lætur hann nú konunginn vita, að þetta hafi hann þegar sagt hershöfðingjanum, og biður konung fyrirgefa sér. Gustaf Adolf leit til hans og mælti: «Það á betur við að þú sèrt hershöfðingi en hirðsveinn». Að átta árum liðnum var Lennart orðinn hershöfðingi og stýrði öllu fallbyssuliði í hernum, og þótti vel stýrt. Einhverju sinni áttu menn tal við konung, og barst talið á hershöfðingja hans; sögðu sem satt var, að þar var saman komið mikið mannval og margir ágætir foringjar, sitt lagði til hver, og taldi einn öðrum þetta til gyldis, og annar hinum. Þá svaraði Gustaf Adolf: «Hann Lennart minn verður bezta hershöfðingjaefnið þegar til

als kemur. Það sýndi sig og síðar hvíllkur hershöfðingi Lennart Torstensson var.

Niels Brahe, fæddur 1604; hann var frændi Gustafs Adolfs, því að Margrét lánamma Niels Brahes, var alsystir Gustafs Vasa. Niels hafði mikið orð á sér fyrir vit og hreysti og var hinn beztu drengur. Svo sagði Gustaf Adolf, að þegar Lennart Torstensson væri undanskilinn, þá vissi hann eigi annan líklegri til herstjórnar en Niels Brahe. En hann féll úngur í orustunni við Lüzen.

Áki Tott, dótturson Eiríks fjórtánda, ofstopamaður mikill í skapi, manna vopndjarfastur og hraustastur; hann var foringi fyrir riddaraliði Gustafs Adolfs, og vann margt frægðarverk; kallaði konungur hann *snjóplóg* sinn, er hann hefði til að ryðja brant fyrir liði sínu. Áki átti Kristínu systur Niels Brahes.

Hermann Wrangel var einn af hinum nafnkendustu foringjum Gustafs Adolfs í pólska stríðinu; hann var faðir Karls Gustafs Wrangels, þess er seinna varð einn af hinum frægustu hershöfðingjum Svía í þrjátígi ára stríðinu. Hermann Wrangel var mjög skaplíkur Áka Tott, og áttust þeir einatt ílt við, og var það engum fært nema konungi einum að sefa slíka ofstopamenn, sem þeir voru. Einu sinni sem optar höfðu þeir Áki og Hermann orðið missáttir og buðu hvor öðrum hólmgöngu. Þetta fréttir Gustaf Adolf, en hann hafði sett þau lög, að sá skyldi lífinu týna, er öðrum byði einvígi. Þegar þeir Áki komu á hólminn, eru þar vopnaðir menn fyrir. Sjá þeir að það eru konungsmenn og spyrja þá að erindi. Foringinn segir þeim, að þeir viti hvað við liggi, ef þeir ætli sér að brjóta lögin; konungur hafði sagt, að þeir mættu berjast ef þá lysti, en samt hafði hann sent hingað böðul, til þess að taka þann þeirra af lífi, er sigur fengi í hólmgöngunni; í því gengur böðullinn fram úr hópnum þröðubúinn, og nemur þar staðar sem þeir Áki standa. En þeir létu hendur síga, og varð eigi af hólmgöngu í það sinni. Lét konungur þá Áka og Hermann sitja nokkrar vikur í fángelsi, þangað til reiðin rann af þeim.

Margir voru fleiri hershöfðingjar í liði Gustafs Adolfs um þessar mundir, þótt eigi sé þeirra hér getið.

Það yrði oflángt að telja öll þau hreystiverk og allar þær orustur, sem Svíakonungur og menn hans unnu á Póllandi öll

Þessi ár meðan ófriður stóð milli landanna, en geta skal þess, að þegar Gustaf Adolf vann Ríga-borg (1621) af Pólverjum, sem bæði var mikil borg og auðug og sterklega víggirt, þá fyrst fóru útlendar þjóðir að veita honum eptirtekt; þótti sá sigur hið mesta þrekvirki og vottur þess, að konungur mundi vera frábær hershöfðingi, því að það vissu menn, að hann hafði lagt öll ráðin á, hversu borgina skyldi vinna. Pólverjar voru þá, eins og þeir hafa jafnan reynzt, braustir menn og harðfengir í orustum, þó fengu þeir eigi rönd við reist, og biðu ósigur því nær í hverri orustu. Helzti foringi þeirra um þær mundir hét *Koniekpolsky*, hreystimaður mikill og hinn herkænasti.

Gustaf Adolf var allra manna vopndjarfastur og hætti sér mjög í orustum, var og auðkendur meir en flestir menn aðrir; hann var mikill vexti, frekar þrjár álnir á hæð og þrekinn að því skapi, eins og verið höfðu margir föðurfrændur hans; hann varð einatt sár í orustum, og við bar það, að hann varð handtekinn, en komst þó jafnan úr höndum óvina sinna. Í orustunni við *Dirschau* (1627) var hann skotinn byssuskoti í öxlina hægri, kom kúlan undir viðbeinið lítið eitt fyrir utan hálsinn og nam staðar inn við herðarblað og sat þar föst meðan hann lifði, varð honum höndin jafnan stirðari eptir en áður. Þegar menn hans báðu hann hafa sig eigi svo mjög í hættu, sem hann gjörði, svaraði hann meðal annars þessu: „liðsmenn fylgja dæmi hershöfðingja síns, sá foringi, sem hlífir sér, vinnur hvorki til frægðar eða sigurs; Cæsar var jafnan í broddi fylkingar, og Alexander kom aldrei á þann vígvöll, að hann vökvaði hann eigi með blóði sínu. Með því nú að guð hefir gjört mig að konungi, og lagt mér þessa byrði á herðar, þá má eg hvorki af ótta eða leti láta hræðast eður guggna, eða líta á sjálfs míns hag; en verði það hlutskipti mitt, að deyja í orustu, hvernig getur þá nokkur konungur fallið við fegri orðstír, en í stríði fyrir guð og sína þjóð?“

Þess var áður getið, að Pólverjum urðu ærið erfið öll viðskipti við Gustaf Adolf, en þó vildi Sigmundur konungur þeirra eigi sættast, því að bæði var hann manna þrástur, og í annan stað þóttist hann jafnan eiga vísa liðveizlu af Spáni og Austurríki, er honum hafði verið heitið, en sú liðveizla drógst ár frá ári, því að hvorirtveggja, bæði Spánarkonungur og Austurríkis

keisari, höfðu um þær mundir í mörg horn að líta, og máttu eigi af sínum mönnum sjá. En þegar hér var komið hafði keisarinn sigrazt á Dönum og kúgað Kristján konúng þeirra (hin 4). til friðar, en smárikinn á Þýzkalandi voru flest að þrotum komin og þorðu sig hvergi að hreifa fyrir ofurveldi keisarans. Þess vegna gat hann nú efnt loforð sitt við Sigmund konúng og sent honum lið. Sumir menn réðu keisara, að senda 20000 manna til Póllands, en aðrir kváðu þess enga þörf, því að minna mundi gagn gjöra, og eigi mundi erfitt verða að reka *snækonúnginn*¹ og Svía hans út af Póllandi; voru því sendar að eins 10000 manna til liðs við Sigmund konúng (1629). Forínginn fyrir því liði hét Arnheim, hraustur maður og slægvitur. En sem Gustaf Adólf fréttir þetta, lætur hann spyrjast fyrir, hverju það sæti að keisarinn sendi herlið móti sér, þar sem hann hafi honum ekki illt gjört. Konúngur fær aptur það svar: að keisarinn hafi nú meira herlið en hann þurfi sjálfur á að halda; hann hafi því gefið nokkrum hersveitum sínum heimfararleyfi, en sagt, að þær mættu ganga í þjónustu Pólverjakonúngs vinar síns; sjálfur hafi hann nú als engin yfirráð yfir þeim lengur. Sá Gustaf Adólf nú hvað verða vildi og hafði viðbúning skjótan og góðan. Þá var það einhverju sinni um sumarið í júnímánuði (1629), að hann hélt með nokkrar riddarsveitir fram til borgar þeirrar, er Marienverder heitir, og er fyrir austan Weixelfljót neðarlega; konúngur var heldur liðsár, því að meginherinn var annarstaðar. Þetta vissu þeir Koniekpolsky og Arnheim, og gjörðu konúngi fyrirsát. Konúngur fékk njósnir af fyrirætlan þeirra og sneri aptur; þar var um skóga að fara, og á einum stað var vegurinn bæði þröngur og ógreiður yfirferðar. Þeim stað vildi konúngur ná sem fyrst, og sendir því einn af foríngjum sínum með tveimur herflokkum þángað, og leggur ríkt á við hann, að verða kominn þar á undan fjandmönnum sínum, en ráðast þó eigi á þá, ef þeir verði komnir þar fyrir. Forínginn heldur af stað, og flýtir ferðinni sem hann kann; en er hann kemur að þrengslunum, þá eru þeir Koniekpólsky þar fyrir með ofurefli liðs. Alt um það gleymir forínginn varúðarorðum konúngs og veitir þeim þegar aðgöngu; tekst þar hörð orusta,

1) Ýmsir oflátúngar í hirð keisarans nefndu Gustaf Adólf þessu nafni.

liðsmunur var ærinn og falla Svíar drjúgum; en þá kemur konungur að með því liði, er honum fylgdi; er nú barizt af miklum ákafa af hvorumtveggja, og gekk svo lengi, að eigi mátti á milli sjá hvorir sigrazt mundu. Koniekpolsky barðist sem helja og hætti sér mjög; varð hann eitt sinn höndum tekinn, en menn hans náðu honum aptur, að lítilli stundu liðinni. Gustaf Adolf var í þessari orustu sem endrarnær jafnan þar er mest þurfti; varð hann þá einhverju sinni, er bardaginn stóð sem harðast, umkríngdur af *Króötum*¹ og tekinn höndum. Einn af mönnum hans fékk sæð þetta, réttir konungi byssu sína og segir: «taktu við henni kunníngi». Konungur tók við byssunni, skaut þann, er höndur hafði á honum fest, og sleit sig lausan af hinum með aðstoð félaga síns. Litlu síðar náði annar maður höndum í belti konungs og dróg hann með sér; konungur fékk þó losazt við hann á þann hátt, að hann smeygði beltinu fram yfir höfuð sér og lét það laust og misti af sér hattinn. Hið þriðja sinni varð konungur handtekinn af óvinum sínum, en höfðingi einn í liði hans, er hét Eiríkur Sóp, hinn mesti garpur, kom þá að með sveit manna og varð konungurinn þá laus. Bardaginn stóð allan dag til kvölds. Þar heitir *Stúm*, er fundurinn varð. Þegar nótt var komin, hélt Gustaf Adolf til Maríuborgar. Þar hafði hann lið mikið, er Hermann Wrangel stýrði; þóttust menn hafa heimt konung sinn úr helju. Svo sagði Gustaf Adolf um þenna fund: «aldrei hefi eg áður komið í jafnheitt bað, sem þetta, en það hlægir mig, að nú hefi eg kynzt við keisarans menn».

Eptir þetta hélt Gustaf Adolf kyrru fyrir um hríð í Maríuborg, og víggirti þann stað sem bezt. Gjörðu þeir Koniekpolský og Arnheim margar árásir á borgina, en fengu eigi aðgjört, og svo fóru leikar, að þeim leiddist þófið, enda höfðu þeir í þeim viðskiptum mist 4000 manna. Arnheim sá, að hann gat engu til leiðar komið, og þar á ofan samdi honum eigi sem bezt við Pólverja, og þar kom að hann lagði niður völdin og gekk í þjónustu kjörfurstans af Saxen. Því næst gjörðist *Júlíus Hinrik*, hertogi af Saxen Lauenborg, foringi keisarans manna í stað Arn-

1) *Króatar* voru úngverskir riddarar; manna snarastir í orustum og illvígastir, en lausir voru þeir einatt á velli, ef í fylkingum skyldi berjast. Þaðan er dregið orðið *Krabat*.

heims, en þá tók eigi betra við. Með Pólverjum og keisarans mönnum varð hin mesta úlfbúð, og þar á ofan bættist vista-skortur, sótt og óstjórn; liðið hélzt eigi við í herbúðunum og sá varð endir þar á, að alt hið mikla lið tvístraðist, en Svíaher þar sem hann sat, sakaði eigi, því að þar skorti engan hlut, þann er hafa þurfti, og allir voru sem einn maður, eins og að líkindum ræður, er slíkur maður, sem Gustaf Adolf, átti yfir að segja.

Nú þegar hér var komið og margt þrengdi að Pólverjum, urðu ýmsir til að eggja Sigmund konúng til sátta og friðar við Gustaf Adolf. Sigmundur færðist undan og var lengi tregur, þángað til loksins að einn frakkueskur sendiboði við hirð hans, fékk svo talið um fyrir honum, að hann læzt mundi taka sættum. Settu þeir Gustaf Adolf og Sigmundur þá, það hið sama ár (1629), vopnablé með sér í bæ þeim, er *Stúmsdorf* heitir, og skyldu þau grið haldast um 6 ára tíma. Sigmundur fékk að heita erfðakonúngur að Svíþjóð, því að það þótti honum miklu skipta, en Gustaf Adolf hélt bæði konúngstign og yfirráðum öllum í Svíþjóð eins og verið hafði, þar að auki fékk hann umráð yfir nokkrum sjávarborgum (Memel, Pillau, Elbingen o. fl.) á Póllandi; var Svíum það hinn mesti hagar, því að þeir áttu þar arðsama verzlun.

Híngað til hefir verið minzt á viðureign Gustafs Adolfs við útlendar þjóðir, og sagt frá herferðum hans og vopnaviðskiptum við þær. Hann hafði, þegar hér var komið, fengið það orð á sig, að hann væri hinn mesti hershöfðingi; menn vissu og, að hann hafði í hernaðarípróttinni eigi látið staðar nema við þá venju, sem fyrir hans daga hafði tíðkæzt, heldur breytt í mörgu og miklu út af henni, bæði hvað snerti herstjórn, og vopnabúnað manna, og þótti það alt horfa til mikilla framfara í þeirri grein; en hitt var engu síður merkilegt, að hann hafði með hermannaálögum þeim er hann setti, og tilsjón á því að lögunum væri hlýtt, komið því orði á liðsmenn sína, æðri sem lægri, að þeir tæki öllum öðrum hermönnum fram á þeim tímum að mentun, mannúð og hvers konar siðprýði. Og þó átti Gustaf Adolf enn eptir óunnin þau hin miklu afreksverk, er hann síðar vann, og sem halda munu orðstír hans á lopti um ókomnar aldir.

En eins og Gustaf Adolf var mikill hershöfðingi, eins var hann mikill og merkilegur í öllum friðsamlegum störfum, hvort sem þau lutu að lagasetningu, landstjórn, eða hverju öðru sem vera skyldi; hann lét sig um alt varða í ríki sínu, sem orðið gat þegnum hans til þroska og frama í andlegum og líkamlegum efnum, enda var það flest sem á einhvern hátt bar menjar um hans afbragðs vitsmuni og óþreytandi starfsemi. Þegar nú þar á ofan bættist, að hann var bæði réttlátur og mildur konungur, þá þarf eigi að undra, þó að til hans veldust margir ágætir menn, og kostuðu kapps um að þjóna honum sem best þeir kunnu. Fram að hans dögum hafði lítið verið skeytt um vísindi og mentir í Svíþjóð, en hann bætti úr þeim skorti, með því að setja og endurbæta marga skóla, æðri og lægri, víðsvegar um ríkið; þá fyrst gat alþýða manna fengið þá tilsógn og mentun, sem hún áður hafði farið á mis við, og sem eingöngu hafði átt sér stað hjá aðlinum; konungur hafði vakandi auga á prestastéttinni, að hún gætti skyldu sinnar, kendi hreina trú og vandaði líferni sitt; hann efldi stórum háskólann að Uppsölum, með því að leggja til hans 350 jarðir, er hann sjálfur hafði átt og að erfðum tekið eftir forfedur sína, hefir sá háskóli síðan staðið með miklum blóma; konungur efldi og jók á marga vegu akuryrkju, iðnað og innlenda verzlun, og þá komust ýmsir kaupstaðir á fót, er áður hafði að engu verið getið.

Af þeim mörgu ágætis mönnum Svía, er samtíða voru Gustaf Adolf og ásamt honum unnu að framförum lands og þjóðar, er enginn eins nafnfrægur og *Axel Oxenstjerna*. Hann var af gamalli ætt og góðugri þar í landi, fæddur 1583. Á æsku árum sínum iðkaði hann allskonar vísindi, en þó einkum guðfræði, og þótti hið mesta afbragð sinna jafnaldra. Hann komst snemma í þjónustu Karls níunda, og fanst konungi svo mikils vert um dagnað hans og vitsmuni, að hann var einn meðal þeirra, er konungur á deyjanda degi fól á hendur að hafa tilsjón með ríkisstjórn sonar síns. Báðir voru þá ungir: Gustaf Adolf var 17 ára, en Axel Oxenstjerna 28 ára; en vart mun í sögunni finnast konungur og ráðgjafi, er samvaldari og samhentari hafi verið en þessir tveir menn: báðir voru gæddir frábærum vitsmunum, báðir höfðu hinn bezta og einlægasta vilja til þess að vinna sem mest þjóð sinni til frægðar og frama,

báðir höfðu þeir hyggindi og þrek til að framkvæma það sem þurfti. Og það, sem mest prýddi þá, var hrein og sterk trú og sannur guðsótti; á þeirri undirstöðu voru verk þeirra byggð, og þess vegna urðu þau svo heilladrjúg fyrir margar þjóðir. Gustaf Adolf var að lunderni skapbráðari og ákafa maður meiri en Axel Oxenstjerna, og við bar það, einkum framan af æfni, að konungi þótti ráðgjafinn telja helzt of mörg tormeiki á sumu því, er hann þá vildi hafa framgengt; sagði konungur þá einhverju sinni: «ef að hitinn í mér kveikti eigi líf í yðrum kulda, þá stirðnaði það allt og frysi». Axel Oxenstjerna mælti: «ef að kuldinn í mér kældi eigi þenna hita, þá væri yðar hátign þegar brunnin». Konungur brosti, og varð þeim eigi slíkt að ágreiningsi. Því lengur sem þeir kyntust hvor öðrum og unnu saman, því meiri ástvinir urðu þeir, og hélzt sú vinátta meðan þeir lifðu. Einatt bar það til, að þeir sátu tveir einir saman frá morgni til kvölds og réðu ráðum sínum, en næðu þeir eigi að talast við, þá gengu boðin og bréfin á milli þeirra. Meðan konungur átti ófrið við Pólverja, setti hann jafnan Axel Oxenstjerna á vetrin til yfir stjórnar í þeim fylkjum, er hann hafði unnið þar suður, en var sjálfur í Svíþjóð. Þar sem konungur var eigi sjálfur, þar varð Axel Oxenstjerna að vera; og þó bar konungur undir hann öll vandamál sem að var unnið heima í Svíþjóð. Gegnir það allri furðu, hve miklu sá maður fékk afkastað, en það er svo að sjá, sem honum hafði engin störf verið ofvaxin; heilsan var óbilug og hugarrósemin að því skapi. «Þegar eg legg af mér klæðin», sagði hann, «legg eg einnig af mér allar áhyggjur». Það var einungis tvisvar, að honum varð eigi svefnsamt: nóttina næstu eptir að hann frétti lát Gustafs Adolfs, og nóttina eptir að hann frétti ósigur Svía við Nördlingen. Axel Oxenstjerna hafði það sameiginlegt með öðrum stóráttuðum mönnum þeirra tíma, að honum þóttu aðalsmenn einir vera sjálfkosnir til hinna æzta embætta og stjórnar starfa, og réttkjörnir forráðamenn og oddvitar hinnar fáfróðu og fátæku alþýðu. En móti þessum réttindum höfðingjanna heimtaði hann af þeim skyldur að því skapi. Fyrst og fremst heimtaði hann af þeim, að þeir tækju hinum óæðri mönnum fram að alskonar mentun, og þar næst, að þeir gengju á undan þeim með góðu eptirdæmi, og væru manna fúsastir til að takast útgjöld á hendur og leggja á sig allar þær

kvaðir, sem fósturjörðin kallaði til þegar að þrengdi. Þegar Gustaf Adolf átti í höggi við Pólverja og hafði orðið vel framgengt, en skorti fólk og fæ til að geta sem þurfti yfirbugað fjandmenn sína og náð fullum friði, þá (1626) ritar Axel Oxenstjerna bróður sínum Gabriel, er var einn í ríkisráðinu, á þessa leið: »guð hefir gefið náð sína og hamingju til fyrirtækja vorra; vèr höfum krept svo að óvinum vorum, að þeir verða til neyddir að beiðast friðar, ef vèr spillum eigi vorum málum af sjálfskaparvítum. Hèr vantar styrk bæði fjár og manna, en frá Svíþjóð ætti það lið að koma, því að illa treysti eg útlendum mönnum. En þú veizt sjálfur, að þegar til útboðs skyldunnar kemur, þá eru mörg undanbrögðin. Fyrir því virðist mér, að aðalsmenn ættu nú að þessu sinni, að láta laus réttindi sín og undanþágur, og leyfa að bændur á jörðum þeirra væru kvaddir til herþjónustu sem aðrir. Krúnunni væri það ómetanlegt gagn, en aðlinum lítill skaði. Ef að þér því með góðum vilja og nokkrum dugnaði styðjið konúnginn, í stað þess að vefjast í smámunum, þá hafið þér fyrst og fremst sýnt mönnum, að almennings velferð liggur yður ríkast á hjarta, og þar næst munuð þér fyrir guðs hjálp koma því til leiðar, að fósturjörð vor nái skjótum og góðum endir á ófriðnum, svo að vèr sjálfir og aðrir landar vorir í Svíþjóð geti setið í friði með konum og börnum undir eikilundum vorum og linditrjám, eins og Ísraels börn forðum undir fíkju-trjánum». Ári síðar (1627) ritar Axel Oxenstjerna frá Póllandi þeim sama bróður sínum og segir svo meðal annars, eptir að hafa minzt á pólska stríðið: «en hér er því næst á fleira að minnast, sem eykur hug óvinanna en eyðir vorum ef til vill. Það er hið mikla samband, sem keisarinn, konúngarnir á Spáni og Póllandi, og hinir katólsku bandamenn (*katólska Ligaen*) hafa gjört sín í millum, og þar á ofan hinn mikli sigur, er hershöfðingjar keisarans hafa unnið, og því nær brotið undir sig bæði Danmörku og alt Þýzkaland. Það er enginn efi á því, að eldurinn kviknar hjá oss, þegar hann er útkulnaður í Danmörku. Það kemur hrollur í mig, er eg hugsa til þeirrar hættu, sem þetta voðalega samband hefir í för með sér. Eg bygg og, að hættan sé nú meiri, en hún nokkru sinni hefir áður verið, bæði í tíð feðra vorra og um vora daga, og gæti vel svo farið, að vèr yrðum hneptir í ánauð andar og lík-

ama, nema guð gjöri þar á meiri miskun. En með því nú hræðsla og harmatölur spilla málum en bæta þau als eigi, og slíkt er eðlilegra konum en karlmönnum, sízt þeim mönnum er landsstjórn hafa á hendi, þá sæmir oss engan veginn að örvænta og leggja árar í bát, eins og Danir hafa gjört, eður ásaka hver annan um orðinn hlut. En hver og einn hlýtur að gjöra það hann megnar, og leggja nokkuð af sínu í sölurnar til þess að geta bjargað hinu. Ef að þér sýnið hug og dug, þá efast eg als eigi um góðan enda, vona miklu fremur, að guð muni hjálpa ættjörðu vorri, og halda fornu frelsi og fornum orðstír hennar við líði, og gefa það, að vèr getum lækkað drambið í Austurríkis keisara. En dragi hver og einn sig í hlè, og hugsí eigi um annað en sjálfs síns hag, þá er úti um fósturjörð vora, og þá er eigi annað fyrir mig og aðra ættjarðar vini að gjöra, en að berjast og vinna sem mest áður en vèr föllum».

Aðallinn skipaðist við orð Axels Oxenstjerna, og lagði fram bæði menn og fè, svo að konúngur gat haldið áfram herstörfum sínum á Póllandi, þángað til vopnablè það, sem fyr var nefnt, gjörði enda á viðureign hans og Pólverja.

Áður en sagt er frá hinum síðustu og merkustu afrekverkum Gustafs Adolfs, verður að skýra frá því í stuttu máli, er helzt hafði til tíðinda orðið á Þýzkalandi, frá dögum Karls fimmta til þess er hér var komið sögunni.

Þýzkaland frá dögum Karls fimmta fram að þrjátígi ára stríðinu (1556—1618).

Þar var fyr frá horfið, er Karl keisari 5. lagði völdin niður (1556), bjó ferð sína af Þýzkalandi, og settist að suður á Spáni til þess að enda þar æfl sína og deyja (1558). *Ferdinand* bróðir hans fékk þó eigi keisaratign á Þýzkalandi fyrir fult og fast fyr en 1558, er kjórfurstarnir kusu hann á kjörþingi í Frakkafurðu. Hann er nefndur *Ferdinand hinn fyrsti*. Hann var að vísu enginn aðkvæðamaður, en hann var vel látinn af þegnum sínum, bæði katólskum og prótestöntum, og þótti allnýtur þjóðhöfðingi. Þó hann sjálfur fylgdi katólskum sið, lagði hann ekki bann fyrir útbreiðslu siðabótarinnar í ríki sínu; var það nú orðinn fjöldi manna, er tekið hafði hinn nýja sið, bæði á Þýzkalandi og í erfðalöndum keisarans (Böhmen og Austurríki

og jafnvel austur á Ungverjalandi). En þó það hét svo, að friður væri milli katólskra manna og prótestanta, þá var samlyndið hvergi nærri gott milli þessara tveggja trúarbragða flokka; þeir fyrirlitu hvor annan, engu síður en kristnir menn og Gyðingar hvorir aðra. Þeir aðgreindu sig jafnvel í klæðaburði hvorir frá öðrum, til þess að vera sem ólíkastir. Trúarbrögðin skiptu landslýðnum þannig í tvo gagnstæða flokka. En svo illt sem þetta var, þá var þó hitt hálfu verra, að prótestantar voru sín í milli mjög sundurlyndir, og deildu með ofsa en engri stillingu um ýms atriði trúarinnar; landshöfðingjar á Þýzzkalandi tóku flestir þátt í þeim trúardeilum, er fyltu svo hugi manna bæði æðri stéttar og lægri, að önnur þjóðmálefni urðu útundan, landi og lýð til hins mesta skaða. Að þessi mikli ágreiníngur og flokkadrættir milli siðabótarmanna hafi gengið Melankthon mjög til hjarta, má ráða af orðum hans, er hann ritaði á blað fáum dögum áður hann dó (1560), þar sem hann segir um sjálfan sig: „þú kemur til ljóssins og munt fá guð að sjá og son hans; þú færð að skilja þá undarlegu leyndardóma, er þú fækst eigi skilið hér í heimi: hví vör erum þann veg skapaðir sem vör erum, og eigi á annan hátt; hvernig hið guðdómlega og hið manndómlega eðli Krists er sameinað. Þú losnar við syndina; þú leysist af öllu andstreymi, og frá æði guðfræðinganna“. Lúther var dáinn fyrir 14 árum þegar hér var komið.

Ferdínand keisari gaf sig lítið við þessum trúarbragðadeilum, og lét menn að mestu sjálfráða í þeim efnum. Keisarinn átti jafnan í vök að verjast móti Tyrkjum, og varð því að eiga þegna sína sér liðsinnandi gegn þeim. Ferdínand keisari var kvæntur Önnu, systur Loðvíks konungs af Böhmen og Ungarn, og áttu þau margt barna. Maximilian var elztur sona hans; hann varð konungur á Ungverjalandi og í Böhmen, og litlu síðar kjörinn til keisaratignar, og krýndur áður faðir hans andaðist. Ferdínand keisari dó 1564 og hafði þá tvo um sextugt.

Maximilian, hinn annar með því nafni, sat að ríkjum frá 1564 til 1576, og þótti bæði vitur og góður í stjórn sinni. Áður hann kom til ríkis, var hann siðabótinni svo meðmæltur, að margir hugðu, að hann mundi taka Lúthers trú, er hann kæmist til keisaradóms, en það varð þó eigi, því að honum mislíkaði stórum ósamlyndi og deilur prótestanta. En þó hann

sjálfur tæki eigi trú þeirra, þá var hann þeim vel í mörgu, og leyfði öllu stórmenni í Austurríki — er alment fylgdu hinum nýja sið — að haga guðspjónustugjörð og allri trúarbragðafræðslu samkvæmt Augsborgarjátningunni; hið sama átti sér stað í Böhmen. Hafði þetta þann árángur, að um þessar mundir var það að eins einn tíundi hluti af öllum Þjóðverjum, er hélt fast við katólskan sið. Það voru því litlar líkur til, að meiri hluti Þjóðverja mundi hverfa aptur til páfatrúar, og þó kom það síðar fram; áttu kristmúnkar mestan þátt í því, að svo fór. Það var, eins og menn vita, aðal mark þeirra og mið, að sporna í móti siðabótinni og eyða henni með öllu, ef kostur væri á. Meðan Ferdínand fyrsti ræð ríkjum, höfðu múnkar þessir dreifzt víðsvegar út um Þýzkaland, Austurríki, Böhmen og Baiern, stofnað þar skóla og haft úti allar klær til þess að efla páfatrú, en eyða Lúthers; veitti þeim þetta því hægra, sem þeir urðu allir samtaka, en sundurlyndið spilti fyrir hinum.

Maximilian annar átti eigi í ófriði um sína daga svo teljandi sé, nema við Tyrki; hafði hann erft þann ófrið frá föður sínum, en eigi urðu nein stórtíðindi í þeirra viðskiptum, og lyktaði þeim svo, að friður komst á (1567); hélt keisarinn öllum þeim hærðum á Úngverjalandi, er hann hafði eignast eptir föður sinn, en hét að gjalda Tyrkjasoldáni 30 þúsundir úngverskra dúkata á ári hverju.

Þegar Maximilian keisari andaðist 1576, kom elzti sonur hans *Rúðolf*, hinn *annar* þess nafns, til ríkis. Hann hafði alizt upp á Spáni við hirð Filippusar annars, móðurbróður síns, og hafði íllan hug til prótestanta, sem við var að búast eptir þá uppfærðslu, er hann hafði fengið. Eitt hið fyrsta, sem Rúðolf gjörði, var, að hann bannaði lútersk helgihöld í Wínborg, og öðrum stöðum í Austurríki, og rak lúterska presta þaðan af landi burt. Hann veitti og katólskum mönnum öll hin æðstu embætti, en setti hina hjá, sem voru prótestantar. Vakti þetta, sem við var að búast, megna óánægju í ríkinu. Að öðru leyti var Rúðolf keisari afskiptalaus af allri ríkisstjórn, og einhver hinn ónýtasti landstjóri. Hann lét Kristmúnka og ýmsa vildarmenn sína ráða öllu, en gaf sig allan við gullgjörð (*Alchymi*) og stjörnufræði, eða þó öllu heldur stjörnuþýðingum (*Astrologi*),¹ og þess

1) *Alchymi* eða *Alchemi* var upphaflega sömu þýðingar sem

á milli var hann í hesthúsum sínum, því að hann var hinn hestglöggasti maður í ríkinu. Keisarin sat í Prag og gaf því lítinn gaum, þó Tyrkir herjuðu á Úngverjalandi, og þó prótestantar kvörtuðu yfir rángindum katólskra manna. Það lá nærri, að keisarinn misti Úngverjaland, en bróðir hans *Mathias*, er var næstur Rúdolfi að aldri, og sem óttaðist, að ríkið mundi alt fara úr höndum þeirra Habsborgarmanna, skarst þá í leikinn og lét þá frændur sína kjósa sig til yfirmanns ættarinnar (1606). *Mathias* lét Lúthers- og Calvinstrúarmenn á Úngverjalandi fá trúarbragðafrelsi, og samdi frið við Tyrki, er þá afsöluðu sér öllum kröfum til hins fyrnefnda skattgjalds af keisaranum. Þó vildi Rúdolf eigi samþykkjast þessu eður öðru, sem *Mathias* hafði gjört; safnaði þá *Matthias* liði og kúgaði Rúdolf til að gefa upp við sig öll yfirráð yfir Úngverjalandi, Mähren og Austurríki (1608). Þegar Rúdolf hugði, að hitt sem eptir var af ríki hans (Böhmen, Slesía, Lausiz) mundi fara á sömu leið, þá gaf hann prótestöntum í Böhmen þá réttarbót, að þeir fengu sult trúarbragðafrelsi (1609). En sú réttarbót kom um seinan, og gagnaði Rúdolf ekki, því að *Mathias* brautzt litlu síðar til valda í Böhmen og Slesíu, (1611), svo að Rúdolf hafði ekkert eptir nema keisaranafnið eitt. Ári síðar andaðist Rúdolf annar, en *Mathias* var gefið keisaranafn.

Á Þýzkalandi (eður í hinu þýzka ríki), sem Rúdolf keisari hafði látið alveg afskiptalaust, var tvídrægnin engu minni en í erfðalöndum keisarans (Austurríki, Böhmen og Ungarn). Það lutu allar líkur að því, að þar mundi innan skams tíma koma

Chemi (þ. e. efnafræði), en er frá leið, varð sú hjátrú almenn meðal efnafræðinga, að menn gætu af rýrum og ódýrum efnum og málum framleitt, eða myndað aðra kostulegrí og dýrari, t. a. m. gull o. s. frv. Slíkar tilraunir, er leiddu á afvegum og í vísindalegar ógöngur, nefndu menn *Alchymi*. Nú er það úrelt orð, síðan efnafræðin komst á réttari og betri leið. *Astrologia* þýðir reyndar stjörnufræði, en er ætíð viðhaft í þrengri merkingu um þess konar stjörnufróðleik, er, af ýmislegri afstöðu og sambandi himinhnattanna, þóttist geta sýnt og sagt fyrir óorðna hluti, og einkum forlög manna. Slíkur stjörnufróðleikur eða stjörnuþýðingar voru mjög almennar, þángað til hinir nafnfrægu spekingar *Nikulás Kópernikus* († 1543), *Jóhannes Kepler* (1630) og *Ísak Newton* († 1727) komu stjörnufræðinni í annað og réttara horf.

til vopnaviðskipta með mönnum, til þess að fá fullkominn enda og úrslit á trúarbragða ágreiningi manna. Aðalgallinn við Augsborgarfriðinn var sá, að illa hafði verið séð fyrir þegnrettindum alþýðunnar, að eigi hafði verið fastákveðið um kirkna og klerkagózin (klerkaskilyrðið, sjá bls. 44), og, að Calvinstrúarmenn höfðu verið undanskildir friðargjörðinni. Þessir gallar komu æ betur í ljós. Kristmúnkar ræru alstaðar undir og knúðu katólska menn áfram til að heimta allt það jarðagóz aptur undir kirkjurnar, sem prótestantar höfðu dregið undir sig allt í frá þeim tíma, er Passáar-sættin var gjörð (1552).

Nú verður að nefna tvo menn til sögunnar, er mikinn þátt eiga í tíðindum þeim, er gjörðust á Þýzkalandi um þessar mundir. Annar þeirra er *Maximilian* hertogi í Baiern, hinn er *Ferdínand* hertogi í Steyermörk. Ferdínand var sonur Karls hertoga af Steyermörk Ferdínandssonar keisara hins fyrsta. Hertogar þessir voru aldavinir og í mægðum saman; báðir uppaldir í skólum kristsmúnka og hötuðust við alla siðabótarmenn, hverju nafni sem hétu; þeir voru þar að auki vitsmunamenn miklir, ákafir, og kjarkmenn hinir mestu. Þeir settu sér það mark og mið, að eyða siðabótinni á allar lundir bæði nær og fjær. Í Baiern var búið að útrýma siðabótinni að mestu, þegar Maximilian hertogi settist þar að völdum, en í Steyermörk áttu margir prótestantar heima. Ferdínand hertogi setti þeim tvo kosti, annaðhvort að taka katólska trú eða rýma landið; ef þeir sýndu nokkra tregðu, voru þeir teknir höndum og hengdir á gálga. Að litlum tíma liðnum var siðabótin horfin af Steyermörk. Maximilian, sem við enga siðabótamenn átti að stríða heima hjá sér, seildist til þeirra í næstu lönd, til þess að ónáða þá og eyða þeim. Þá fóru um síðir að opnast augun á prótestöntum, þeim kom til hugar, að hætta þarfleysu kriti sín í millum, þoka sér saman í anda og aðgjörðum, og verjast sameiginlegum óvinum. Þessvegna gengu ýmsir höfðingjar og ýmsar borgir prótestanta og Calvinstrúarmanna í félag, — og nefndu þeir sig: *evangeliska union*, eða *bandamenn prótestanta* — til þess að vernda trú sína (1608), og var *Friðrik kjörfursti af Falz* formaður þeirra. En sem Maximilian af Baiern varð þess vísari, að siðabótarmenn höfðu gjört þessi samtök, þá kom hann því til leiðar, að ýmsir katólskir biskupar og þjóðhöfðingjar bundust í félag gegn siða-

bótarmönnum (1609). Maximilian var foringi þessa félags, er menn nefndu hina *katólsku bandamenn* (*den katolske Liga*). Nú mátti kalla, að Þýzkaland væri gengið í tvær sveitir, og biði þess, að færi gæfist til vopnaviðskipta. Þá bar svo til, að hertogi sá, er ræð fyrir *Jülich, Kleve* og *Berg* (þau hærðð er niður með Rín-fljóti), dó barnlaus. Margir vildu ná í lönd hans, og gáfu sig fram ýmsir þjóðhöfðingjar, bæði katólskir, og af prótestanta flokki; vildu þar engir fyrir öðrum vægja, og var gripið til vopna. Öðrumegin voru hinir *katólsku bandamenn* og keisarinn, og áttu þeir von liðveizlu af Spáni; hinumegin voru *bandamenn prótestanta* (*hin evangeliska Union*); þeim ætluðu Niðurlendingar að veita, og, það sem mest var í varið, Hinrik fjórði, Frakkakonungur. En Hinrik féll af morðingja völdum (1610), eins og fyr er ritað, og datt svo ófriðurinn niður að sinni. Menn urðu ásáttir um, að skipta löndum hertogans milli tveggja þeirra, er næstir stóðu til arfs, en það var Falzgreifinn af Neuburg, sem tók katólska trú, til þess að ná í arfinn, og Jóhann Sigmundur kjörfursti af Brandenburg, sem áður var lútherskur, en gjörðist Calvíns trúar maður, til þess að geta náð í arfinn. En þó að þessu erfðamáli lyki betur en á horfðist, og menn væru sáttir að kalla, þá var eldkveykjuefnið alstaðar, og ekki þurfti nema lítið atvik, lítinn neista, til að hleypa öllu Þýzkalandi í bál og brand.

Þrjátigi ára stríðið (1618—1648).

Mathias keisari var nú settur að völdum, en hann var kominn hátt á sextugs aldur og farinn að þreytast, og þó hann væri í sumu betur fallinn til ríkisstjórnar en Rúdolf keisari bróðir hans hafði verið, var það samt langt yfir hans megn, að stýra ríki sínu eins og við þurfti, einkum eins og þá var komið úlfúð og flokkadráttum, bæði í erfðalöndum keisarans og á Þýzkalandi. Mathias var barnlaus eins og Rúdolf bróðir hans. Það varð því að velja einhyrn honum til eptirmanns, til þess að konungdómurinn á Ungverjalandi og í Böhmen færi eigi á ringulreið, og lenti valið á Ferdínand hertoga af Steyermark (1617). Var Ferdínand því næst krýndur til konungs yfir Ungverjalandi og Böhmen, og vann eiða að því, að landsmenn skyldu halda óskertum öllum sínum fornu einkaréttindum, og öllu því trúar-

bragðafrelsi, er rjettarbætur hinna fyrri konunga höfðu veitt þeim. Það sást bráðum hvernig hann efndi þá eiða. Katólskir menn fögnuðu ríkisstjórn Ferdínands, en siðabótarmönnum sagði þunglega hugur um. Þó svo væri til skilið, að Mathías keisari skyldi öllu ráða meðan hann lifði, leið eigi á löngu áður Ferdínand gjörðist afskiptasamur um flesta hluti, og fór með engri vægð eða jöfnuði. Þar sem því varð við komið, setti hann katólska menn til valda, en bægði prótestöntum frá, og, fyr en nokkurn varði, voru að hans undirlagi tvær kirkjur prótestanta í Böhmen lagðar í eyði. Mathías keisara þótti frændi sinn of mikið að gjöra, og ýmsir málsmetandi menn, sem voru Habsborgarættinni velviljaðir, ræðu Ferdínandi, að fara gætilega. Það kom fyrir ekki, Ferdínand fór sínu fram eptir sem áður. Bæheimsmenn, einkum aðallinn og jafnvel katólskir menn, undu illa slíkum yfirgangi og rángindum, og áttu fund með sér í Prag (það er höfuðborgin í Böhmen) í maí-mánuði 1618. Gengu þeir síðan fjölmennir í konungsgarð, og til hallar þeirrar, er ráðgjafarnir sátu í. Mathías og Ferdínand voru þá austur á Úngverjalandi og eigi heima. Greifinn af Thúrn var foringi fundarmanna. Þegar í höllina var komið, báru þeir Thúrn upp erindi sín, og beiddust leiðrjettningar á málum sínum; ráðherrarnir færðust undan og hétu þeim engri ásjá. «Skiptum eigi orðum við menn þessa», sagði einn af fælögum Thúrns, «fylgjum fornri venju og vörpum þeim út um gluggana». Óðar en orðið var mælt, lögðu þeir hendur á ráðgjafana, og tveir þeirra, er helzt þóttu hvetja Ferdínand til ójafnaðar, fóru á höfuðið út um hallargluggann. En þó þetta væri á þriðja lopti sem leikurinn gjörðist, og allhátt (um 30 álnir) niður að jörðu, varð þó minna tjón af en til var stofnað, því að sagan segir, að þar hafði mykjuhaugur verið undir, er þeir komu niður. Slík hægindi urðu ráðherrunum til lífs. Eptir þenna viðburð gripu allir Bæheimsmenn til vopna, bæði katólskir menn og prótestantar, og ráku alla Austurríkismenn af höndum sér. Þannig hófst þrjátígi ára stríðið.

Mathías keisari vildi slaka til við uppreistarmenn, en Ferdínand tók því fjærri, og þótti þetta vel hafa að borið, því að nú gafst honum gott færi á, að svipta prótestanta öllum þeirra réttindum, og bæla þá algjörlega undir sig, ef svo vildi verkast. Hann tók helzta ráðgjafa Mathíasar, Klesel kardinála, og lét setja

í varðhald, því hann óttaðist, að hann mundi telja menn til friðar, og fá miklu til vegar komið, því að kardínállinn var mikils metinn af mörgum. Alt þetta gekk Mathíasi keisara svo nærri, að hann andaðist á næsta vori (1619).

Fyrirliði Bæheimsmanna var Thúrn greifi, er fyr var nefndur, braustur maður og vel að sèr um marga hluti. Til liðs við hann kom *Ernst* greifi af *Mansfeld* með sínar sveitir, hér um bil 4000 manns. Mansfeld var hin mesta hetja, og lét aldrei hugfallast, þó hann biði ósigur. Dreif nú til þeirra lið úr ýmsum áttum, svo að þeir höfðu allmikinn her. Ráku þeir því næst alla Austurríkismenn út af Slesíu og Mähren, og nærri lá, að Thúrn hefði með sínum sveitum tekið Wínarborg, þar sem Ferdínand hafði aðsetu, en honum kom hjálp þegar sem harðast stóð, og varð Thúrn þá frá að hverfa. Þessu næst var þing stefnt í Prag, og var Ferdínandi á því þingi sögð upp blýðni og hollusta, en til konungs tekinn yfir Böhmen og Slesíu, *Friðrik kjörfursti af Falz*. Kjörfurstinn átti Elísabetu, dóttur Jakobs fyrsta á Englandi¹, var í frændsemi og mægðum við Móríz af Oraníu og Kristján 4. Danakonung, og sjálfur einn af hinum ríkustu höfðingjum á Þýzkalandi; töldu því Bæheimsmenn sèr vissa von liðveizlu, bæði frá þessum útlendu þjóðhöfðingjum, og frá öllum prótestöntum á Þýzkalandi. Þar á ofan bættist, að fjöldi manna í Austurríki og á Ungverjalandi fylgdi hinum nýja sið, og bjóst til liðs við Bæheimsmenn, hvenær sem á þyrfti að halda. Alt þetta til samans var ískyggilegt fyrir Ferdínand. En hinsvegar stóð hann eigi einn uppi síns liðs. Hann gat vænt liðveizlu bæði af Spáni, Pólverjalandi, meiri hluta Austurríkis, og einkum frá aldavini sínum Maximilian af Baiern, er var yfirmaður hinna katólsku bandamanna á Þýzkalandi; en bandamenn þessir höfðu mikið lið og harðsnúið. Frakklandi var þau árin illa stjórnað, og þurftu prótestantar þaðan engrar hjálpar að vænta; heldur eigi frá Englandi, því að Jakob fyrsta skorti til þess hug og dug. Prótestantar voru innbyrðis ósamþykkir;

1) Það er mælt, að Friðrik hafi verið í vafa um, hvort hann ætti að þekkjast tilboð Bæheimsmanna, og gjörast konungur þeirra eða eigi, en þá hafi Elísabet kona hans sagt við hann: «fyrst að þú hafðir hug til að biðja konungsdóttur, þá áttu líka að hafa hug til þess að þyggja konungs tign». Af Elísabetu fór mikið orð og gott.

lútherskir menn vildu eigi verða til að styrkja Friðrik Bæheims konung fyrir þá sök, að hann var Calvíns trúar. Jóhann Georg kjörfursti af Saxen brást algjörlega, því að hann sá ofsjónum yfir því, að Friðrik varð konungur og helzti oddviti allra siðabótamanna á Þýzkalandi. En málefnum prótestanta hafði áður verið stýrt hvað helzt af Saxlands kjörfurstum. Alt þetta færði Ferdínand sér í nyt með mestu kænsku, og kom því svo fyrir, að hann var kjörinn til keisara eptir Mathías, litlu síðar en Friðrik af Falz mótstöðumaður hans varð konungur í Böhmen. Ferdínand var hinn *annar* keisari með því nafni á Þýzkalandi. Nú höfðu hvorirtveggja mikinn liðsafnað, og vildu að til skarar skyldi skríða. Keisarinn hafði miklu meira lið, langt yfir 100 þúsundir manna, og marga og reynda hershöfðingja, þó þeirra sé eigi allra hér getið. Nafnkendastur þeirra um þessar mundir var *Tilly*. Hann var borinn og barnfæddur í Niðurlöndum (1560), ólst í æskunni upp hjá Kristmúnkum, og fylgdi síðan alla æfi hinni katólsku trú, en bataði siðabótamenn; því næst varð hann hirðsveinn hertogans af Baiern, en leiddist langar borðsetur og hóglífi og kom sér í hernað. Var hann þá fyrst í liði hertogans af Alba á Niðurlöndum, síðan í Ungarn, og þótti alstaðar afbragðsmaður til allrar framgöngu. Loksins gjörðist hann foringi fyrir liði hertogans af Baiern, og af þeirri forustu varð hann svo frægur, að fáir þóttu hans jafningjar, og ekkert lið þótti eins vel að vopnum búið, eða eins örugt í orustum, á þeim tímum, eins og það lið, er *Tilly* stýrði. Maximilian hertogi hafði hann í miklum hávegum, og setti hann yfir herlið hinna katólsku bandamanna; átti hann eptir það miklar orustur og hafði jafnan sigur. *Tilly* var margt vel gefið; hann var hugprúður maður, og þó forsjáll vel og gætinn, orðheldinn og ósérplæginn og manna siðprúðastur. Hann sagði um sjálfan sig, að hann hefði aldrei drukkíð vín, aldrei þekt kvennaástir, og aldrei beðið ósigur. Hann var hár maður vexti og grannur, ennibreiður og inneygður, kinnbeinaber, nefið bæði langt og hátt, brukkur miklar í andliti, hár og skegg stuttvaxið. Hann var vanur að bera spánskan riddarabúning grænan á lit, með lítinn uppbrettan hatt á höfði, og hékk úr honum rauð strútsfjóður á herðar niður. Lið keisarans stefndi til Böhmen úr ýmsum áttum, en Friðrik konungur bjóst til varnar í móti. Hann hafði rúmar 20 þúsundir

vígna manna, og margt af því liði lítt reynt í orustum. Helztu liðsforingjar hans voru þeir Thurn og Mansfeld. Í nóvembermánuði 1620, varð fundur þeirra skamt frá Prag, þar sem heitir á *fjallinu hvíta*, og unnu keisarans menn þar algjörðan sigur, eigi sízt fyrir ráð og framgöngu Tillys. Friðrik flýði undan með drotníngu sína, og nam eigi staðar fyr en vestur á Niðurlöndum og lét þar fyrir berast; en keisarinn lagði undir sig alla Böhmen og öll þau hærð, sem uppreisn höfðu gjört í móti honum, og refsaði mönnum þunglega. Það er mælt, að 30,000 heimili prótestanta hafi þá farið landflótta úr Böhmen, kirkjur þeirra voru rifnar niður til grunna, eignir manna og óðul voru tekin, og fjöldi hinna helztu aðalsmanna af lífi teknir. Siðabótinni var gjöreytt, og landslýðurinn svo sárt leikinn í Böhmen, að landið hefir þess aldrei bætur beðið síðan. Líkar þessu voru aðfarir Ferdínands í Slesiu, Mähren, Austurríki og Ungarn, og þannig bældi hann með grimd og hershöndum undir sig í erfðalöndum sínum alla þá menn, sem risið höfðu í móti honum.

Þegar þessum störfum var lokið, skarst keisarinn í mál manna á Þýzkalandi, og beitti þar hvervetna hinu mesta ráðríki og yfirgangi. Lönd þau, sem kjörfurstinn af Falz hafði átt, voru tekin og skipt milli manna; fengu Spánverjar hinn vestari hlutann við Rín, en Maximilían af Baiern hinn eystri hluta, og kjörfurstatignina í þokkabót. Slíkar aðfarir þóttu ólög á Þýzkalandi, því að keisarinn hafði enga heimild til eptir sjálfs síns þóttu, að setja þjóðhöfðingja þannig frá völdum, og fá lönd þeirra öðrum í hendur; til þess urðu hinir aðrir «ríkisfurstar» eða þjóðhöfðingjar landsins að gefa sitt samþykki. Óánægjan varð megn um alt land, bæði meðal prótestanta og páfatrúarmanna. Ýmsir hershöfðingjar, sem unnu þjóðfrelsi, söfnuðu liði og bjuggust til varna. Einna helztir á meðal þeirra, voru þeir Ernst Mansfeld og Kristján hertogi af Brúnsvík¹ — Thurn var farinn af landi burt og genginn í lið Svíakonungs. — Bandamannaherinn (kátólska sambandið) sem Tilly stýrði, kom skjótt og átti við þá ýmsar orustur; fóru þeir Mansfeld einatt halloka fyrir ofurefli hinna, en bæði af því, að landslýðurinn var þeim víða vel, og af því, að þeir Mansfeld og Kristján voru óþreytandi, þá gekk

1) Það var orðtak Kristjáns: «Vinur guðs, en óvinur allra klerka».

lengi í þessu þófi; herinn rakst fram og aptur um Þýzkaland, ruplaði víða og rændi, og var að öllu þessu hinn mesti ófögnuður. Þar kom þó um síðir, að Tilly varð alstaðar yfirsterkari, og þeir Mansfeld urðu að flýja landið. Mátti nú svo kalla, að Þýzkaland lægi alt varnarlaust fyrir fótum keisarans.

Nú hugðu menn, að Ferdínand keisari mundi veita landinu frið og næði; allir æsktu þess, og allir þurftu þess við. En keisarinn fækkaði ekki liði sínu; hann hafði enn mikinn her og vígbúinn, þó að óvinir hans væru niðurbældir og horfnir. Mönn-um leizt eigi á blikuna. Bæði katólskir menn og prótestantar þóttust sjá fyrir, að keisarinn mundi ætla sér, að brjóta undir sig Þýzkaland og gjörast þar einvaldur yfir. Danir og Svíar urðu eigi ugglausir um sig og sín lönd. Jakob fyrsti Englands konungur hafði alt af búizt við, að keisarinn mundi taka aptur Friðrik af Falz í sátt við sig, en er sú von brást, læzt hann loksins mundi hjálpa Friðriki tengdasyni sínum. Þannig fjölguðu mótstöðumenn keisarans, en — það vantaði fyrirliða.

Frakkland hafði lengi haft ílt auga á Austurríki. Franz fyrsti, Hinrik annar og Hinrik fjórði höfðu fyrir þá sök styrkt prótestanta á Þýzkalandi, þó að þeir tveir fyrstnefndu væru alt annað en prótestanta vinir heima fyrir. Eptir lát Hinriks fjórða var aðgjörðalítil stjórn á Frakklandi, þángað til að Richelieu kardináli fekk þar taumhaldið, þá skipti skjótt um. Hann sá þegar hver háski Frakklandi og jafnvel allri Norðurálfunni var búinn, ef Austurríkis keisari magnaðist svo, að hann næði að bola undir sig alt Þýzkaland. Niðurlöndunum var þá hættan vís, og þau brotin aptur fyr en síðar undir Spánverja. Var þá Spánar konungur að sunnan, Austurríkis keisari að norðan, en Frakkland komið í úlfakreppu á milli þeirra. Slíkt mátti eigi svo til ganga. En hvernig varð því afstýrt? Richelieu fann ráðið, og það var, að hjálpa prótestöntum á Þýzkalandi. En þetta sýndist eigi svo auðgjört. Hann var kardináli, ráðgjafi hjá katólskum konungi, og fann sjer skylt að kúga prótestanta á Frakklandi, en vildi hjálpa prótestöntum á Þýzkalandi. Richelieu setti það eigi fyrir sig, og hafði allar klær úti, til þess að koma fram áformi sínu: hann veitti Niðurlendingum talsverðan fjárstyrk (1624), til þess að þeir gætu varizt Spánverjum; hann sendi Mansfeld fè, til þess hann gæti af nýju safnað liði móti keisara; hann fekk því til

leiðar komið, að Henrietta, systir Loðvíks þrettánda, giptist Karli (prinzinum af Wales) konúngsefni Englendinga o. s. frv. Richelieu sagði, að Ferdinand keisari lèti það í veðri vaka, að hann berðist til þess að bjarga páfatrúnni, en það væri ekki annað en yfirvarp, því að undir niðri væri allur hans hugur sá, að kúga alt Þýzkaland, og verða þar einvaldur yfir, en þeirri hættu yrðu menn að afstýra í tíma. Nú var einúngis spurn, hvern kjósa skyldi til herstjórnar móti keisaranum. Hér var um tvo að velja, Gustaf Adolf og Kristján fjórða; báðir fylgdu Lúthers trú, voru konúngar, afreksmenn hinir mestu, og báðir óttuðust aðfarir keisarans. Frakkar vildu kjósa Gustaf Adolf; Englendingar Kristján fjórða, enda voru þar mægðir í millum. Gustaf Adolf átti þá í stríði við Pólverja, um þær mundir, og varð miklu til að kosta; hann gjörði kost á sér, en fyrir dýra dóma, eins og vonlegt var. Kristján fjórði hafði setið í friði um 12 ár, og safnað talsverðu fè allan þann tíma. Honum læk hugur á að reyna mátt sinn og megin, og vinna nokkuð til frægðar sér sem Svíakonungur; það var þarft verk og fagurt til frásagnar, að hjálpa prótestöntum, og mesta nauðsyn að stöðva yfirgáng og aðfarir keisarans; hann var kominn í nágrenni við Danmörku, og slíkt nágrenni var geigvænlegt. Kristján konungur var því allfús til að takast á hendur yfirstjórn hersins og berjast í móti keisara. Skilmálar þeir, sem hann setti, urðu fyrir þessar sakir allir vægari en af Svíakonúngs hálfu. Kristján varð því fyrri til að semja við Englendinga, en Gustaf Adolf við Frakka, með því líka, að ýmsar borgir og þjóðhöfðingjar á Neðra-Saxlandi kusu Kristján til foringja síns (*Kredsoberst*)¹. Gustaf Adolf lét sér það vel líka, kvað þá, er Kristján höfðu kosið, hafa fengið öruggan fyrirliða, og spáði vel fyrir þeim.

Sumarið 1625 hófst ófriðurinn. Hertogarnir af Meklenborg og höfuðsmaðurinn í Magdeborg gengu í lið með Kristjáni konúngi. Mansfeld og Kristján af Brúnsvík höfðu liðsafnað af nýju og lögðu á stað. Kristján fjórði hélt liði sínu suður á Saxland og Vestfalen, vann á leiðinni nokkra kastala og stefndi suður á Hessen. Þar kom Tilly í móti honum með allan *bandamanna*-herinn; sá Kristján konungur sér eigi fært að svo stöddu með lítt vönu liði, að leggja til orustu við slíkan garp sem Tilly, og

1) Sjá Miðaldasögu, bls. 187.

með lángefðum hersveitum, fór því kænlega undan, og kom sér hjá bardögum. Það var konungi hið mesta mein, að margir þjóðhöfðingjar og helztu menn meðal prótestanta á Þýzkalandi, voru dáðlausir og jafnvel ótryggir; fekk hann því einar 7000 manna hjá þeim til liðs við sig, og fjárstyrkur sá, sem koma átti af Englandi og Frakklandi, brást að mestu leyti. Kristján af Brúnsvík færði honum að vísu nokkuð lið, en það var bæði fátt talsins, eigi vel búið, og þar að auki laust við konungsherinn. Mansfeld hafði farið með sínar sveitir austur í Brandenburg til móts við keisarans lið, er þángað var von. Her prótestanta var þannig hvergi nærri svo sterkur, sem vera þurfti, og dreifði sér meira en ráðlegt var. Loksins bar fundum þeirra Tillys og Kristjáns konungs saman (27. ágúst 1626) hjá Lutter am Barenberg — það er í Brúnsvík —; barðist konungur af mikilli hreysti, en beið þar þó ósigur, og varð að hörfa undan og heim aptur í ríki sitt.

Alt til þessa hafði *bandamanna herinn* mest megnis átt í höggi við prótestanta; en sá her var miklu fremur háður Maximilian af Baiern — sem var formaður hinna katólsku bandamanna, eins og áður er sagt — heldur en keisaranum. Ferdinandi keisara var eigi geðfelt, að Maximilian reði svo miklu á Þýzkalandi, þess vegna var honum mjög ant um, að koma fótum undir herlið, er engum væri háð nema honum sjálfum. En hann skorti bæði efni til þess, og líka þann hershöfðingja, er yfirstjórn gæti tekizt á hendur yfir miklu liði¹. En keisarinn þurfti eigi lengi að vera í þeim vandræðum; honum bauðst sá hershöfðingi, er eigi voru þá á öðrum betri vól í Austurríki. Sá maður var *Albrekt Wallenstein*.

Hann var fæddur í Prag í Böhmen 1583 — og þannig jafngamall Axel Oxenstjerna — af göfugu foreldri. Þótti mjög ódæll í uppvexti, var í ýmsum stöðum til sósturs og fræðslu, en enginn gat stýrt honum; var hann þvínæst sendur til háskólans í Nürnberg, en það fór á sömu leið; hann var þar öllum stund-

1) Af hinum nafnkendustu hershöfðingjum keisarans, voru báðir hinir eldri menn, *Dampierre* og *Boucquoi*, fallnir í ófriðnum á Ungverjalandi móti *Bethlem Gabor*, Siebenborgar höfðingja, en hinir yngri: *Pappenheim*, *Piccolomini*, *Gallas* og *Montecuculi* og fl. voru þá lítt komnir til sögunnar.

um í drabbi og áflogum, og var vísað burt úr borginni. Þar á eftir gekk hann í þjónustu hjá markgreifa einum, og er hann hafði verið þar um hríð, bar svo til einhverju sinni, að hann sat í opnum glugga og sofnaði þar, en vaknaði við það, að hann hraut út um gluggann, og niður á stræti; var það geysihátt fall, en hann var jafnheill eftir sem áður. Þessi viðburður breytti honum með öllu; hann varð alvörugesinn, þögull og þungbúinn; hann taldi það víst, að einhver æðri hönd leiddi sig, og að sér væri fyrir sett eitthvert mikið og merkilegt ætíunarverk; tók katólska trú, og hóf því næst ferð sína til útlanda og fór víða um lönd, nam þá margt og þar á meðal stjörnuspáfræði (Astrologi), og stundaði þá list alla æfi síðan af miklum áhuga. Þegar Wallenstein kom aptur af ferðum sínum, gekk hann í herþjónustu á Ungverjalandi gegn Tyrkjum, og þótti hinn mesti fullhugi. Eftir að friður komst þar á, hélt hann heim á Böhmen; þar vildu menn hvorki heyra hann né sjá, af því að hann hafði kastað feðra trú sinni og var orðinn katólskur. Þó kvongaðist hann þar í landi, og átti ekkju eina, gamla og flugríka; en hún lifði skamma stund, og lét honum eftir ógrynni fjár. Engan þátt tók hann í óeirðunum milli þeirra bræðra Rúdolfs og Mathiasar, og þegar ófriður kviknaði í Böhmen 1618, vildu landar hans þar gjöra hann að æzta fyrirliða, en hann var meiri vinur Ferdínands en þeirra, og gekk í lið með honum, og vann honum mikið gagn bæði þar og á Ungverjalandi. Hafði Ferdínand hann í miklum hávegum, og gaf honum hérað eitt í Böhmen til forráða, er kent er við Friedland, og hertoga nafnbót. Wallenstein vildi eigi heima sitja, er hann vissi af ófriðnum annarstaðar; bauð því Maximilian kjörfursta af Baiern þjónustu sína, en Tilly, sem var æzti hershöfðingi Maximilians, réð kjörfurstanum að hafna því tilboði, og það ráð hafði Maximilian. Þaðan var sprottin óvildin öll milli Wallensteins og Maximilians. Nú var svo komið, að Ferdínand keisara vantaði bæði lið og hershöfðingja. Þá bauðst Wallenstein að safna liði og gjöra út á sjálfs síns kostnað — eða réttara sagt þeirra þjóða, sem hann herjaði á meðal — 40000 manna, og berjast með þeim fyrir keisarann. Keisara þótti það vel boðið, en kvað 20 þúsundir nægja. „Tuttugu þúsundir manna deyja úr húngri“, mælti Wallenstein, „en fimmtígi þúsundir geta sjálfar aflað sér

matar; og þar við sat. En sem það fréttist, að Wallenstein safnaði liði, streymdi múgur og margmenni til hans úr öllum áttum, og fékk hann á lítilli stundu 60 þúsundir manna. Með þessu liði hélt hann norður í land (1625), og settist á fastar stöðvar upp og niður með Elfunni. Vorið eptir elti hann Mansfeld sveit úr sveit og alt suður á Úngverjaland. Var Mansfeld þá þrotinn að mönnum og fè, sýktist sjálfur og dó. Það er sagt, að þá er Mansfeld fann að dauðinn nálgadist, herklæddist hann, lét tvo menn styðja sig fram á gólfð og mælti: „hershöfðingi á að deyja standandi“; og það varð.

Nú var Mansfeld dáinn; Kristján Brúnsvíkur hertogi dó á því sama ári, og Kristján Danakonungur var flúinn heim í ríki sitt. Tilly veitti honum eptirför norður á Holsetaland. Þangað kom og Wallenstein með liði sínu sunnan af Úngverjalandi, eptir viðureign þeirra Mansfelds. En þeir Tilly og Wallenstein gátu aldrei til lengdar saman verið. Hélt Tilly þá vestur á Niðurlönd, en Wallenstein lagði undir sig Norður-Þýzkaland, Holsetaland og Jótland alt á Skaga norður; en yfir á eyjar komst hann ekki, því að Kristján konungur varði honum öll sund.

Höfðingjar prótestanta á Þýzkalandi höfðu lítið samheldi og litla ráðdeild sýnt í þessum viðskiptum þeirra við keisarann; þeir höfðu varið andlegt og líkamlegt frelsi sitt með hálfvelgju, og sumir jafnvel brugðizt sínum trúarbræðrum og fyllt keisarans flokk; hjálp sú, er þeir höfðu fengið frá útlendum höfðingjum, verið ónóg, og gjört reyndar eigi annað, en að flýta fyrir niðurlægingu þeirra og yfirgangi keisarans. Eptir hinar mörgu og miklu sigurvinníngar, var Ferdínand annar miklu voðalegri Þjóðverjum nú, en Karl fimmti afabróðir hans í Smalkaldar-stríðinu forðum, eptir sigurinn við Mühlberg (bls. 40). Þegar hér var komið, má svo að orði kveða, að veldissól keisarans væri gengin í hádegisstað, en Þýzkaland varnarlaust fyrir fótum hans. En hefndargirni Ferdínands og trúarofsi kunni sèr ekki hóf, þess vegna fór veldi hans hnignandi úr þessu. Hann hafði rekið hertogana í Meklenborg frá ríkjum, af því þeir höfðu liðsint Dana konungi, en gefið Wallenstein lönd þeirra, hvað sem aðrir þjóðhöfðingjar sögðu; hann hafði gjört Wallenstein að yfirforingja (*Storadmiral*) yfir Eystrasalti, og falið honum á hendur að

taka þar allar borgir með sjó fram, og efna þar til skipaflota. Norðurlöndum var háski búinn.

Ein af borgunum nyrðst á Þýzkalandi, en að sunnanverðu við Eystrasalt, heitir Stralsund (Stræla). Sú borg var ein af Hansastöðum, og í þá daga bæði fjölmenn og auðug. Þar var höfn ágæt, og vildi því keisarinn og Wallenstein fyrir hvern mun ná borginni, og hafa þar herskipastöðvar; en borgarmenn vildu eigi gefast upp. Settist Wallenstein þá um hana með ógrynni liðs og gjörði harða skothríf. Bæarmenn vörðust af mestu prýði, enda voru þar allir sem einn maður, og það, sem mestu skipti, var, að bæði Danir og Svíar sendu þeim lið til styrktar, og ágæta fyrirliða. Einn þeirra var Níls Brahe. Lauk svo þeirra viðskiptum, að Wallenstein fékk eigi tekið borgina, misti þar 12000 manns, og varð frá að hverfa eptir 10 vikna umsátur. En skipum þeim, sem hann setti á flot, eyddi Danakonungur öllum, svo að Wallenstein hafði «admirals»-nafnið eptir, en ekki eitt einasta skip.

Keisarinn sá, að hann gat engu áorkað við Dani og Svía í sameiningu, vildi því sundra þeim, og bauð Kristjáni Danakonungi sættir. Neyðin þrængdi að Kristjáni, og fyrir því gekk hann að þeim kostum, er keisarinn bauð. Komst þannig friður á milli þeirra í Lybek (1629) með því skilyrði: að Kristján konungur fékk öll lönd sín aptur, en varð að heita því, að slíta allan félagsskap við bandamenn sína, Svíakonung og hertogana af Meklenborg, og berjast aldrei í móti keisaranum.

Nú var svo komið, að Ferdínand keisari gat aðhafzt hvað hann vildi um endilángt Þýzkaland. Honum var og án als efa hugfast, að verða þar einráður, og hefja þar keisaratignina til fornrar vegsemdar, enda sagði Wallenstein, að á Þýzkalandi ætti að vera einn einvaldur, eins og á Frakklandi og Spáni. Um þær mundir, sem friðurinn í Lybek var saminn, kvað keisarinn svo á, í boðorði því, er menn hafa nefnt *Restitutions-edikt*, að alt kirknagóz, sem gengið var undan katólskum síðan *Passár*-sættin var gjörð 1552, og komið í hendur prótestöntum, skyldi nú tekið af þeim, og hverfa aptur til katólsku kirkjuðnar. Með þessu móti komust mörg hærð og margar þúsundir prótestanta í hendur katólskra klerka; en þar var ekki undanfæri, hersveitir keisarans voru alstaðar; prótestantar áttu að eins um þrent að

velja: dauðann, páfatrúna, landflóttann. Allur sá mikli sægur hermannna, sem keisarinn hélt á Þýzkalandi, felfletti landslýðinn vægðarlaust, og enginn þorði í móti að mæla. Þó var þar ein borg, sem ekki vildi láta kúgast, og hvorki taka við katólskum erkibiskupi, nè gjalda Wallenstein þann þunga skatt, sem hann lagði á. Það var Magdeborg á Saxlandi við Elfunu, stór borg og auðug. Þegar borgin vildi eigi undan láta, settist Pappenheim um hana með miklu liði; setti hann þá hergirðingar stórar um borgina, og hafði til þeirra starfa bændur úr næstu sveitum, þó nauðugir væru; því að um rétt og sanngirni var þá eigi spurt.

En það voru eigi prótestantar einir, sem ójafnaður keisarans, og yfirgángur Wallensteins og manna hans kom niður á; katólskir menn á Þýzkalandi voru litlu betur staddir. Margir auðugir menn og stórhöfðingjar mistu eigur sínar og komust á vonarvöl, en því fátækari sem þeir urðu, því meir auðgaðist Wallenstein og margir af hans mönnum. Þetta keyrði svo úr hófi, að menn foru að taka ráð sín saman þó í hægðum færi. Maximilian af Baiern, sem löngum var fremstur í flokki sinna samtíðarmanna, fékk því komið til leiðar, að *bandamenn* skoruðust undan að fækka liði sínu, þá er keisarinn hafði svo boðið, fyr en þeir fengju kostnað þann endurgoldinn, er þeir höfðu lagt til stríðsins. Enn fremur krafðist Maximilian, og þeir fleiri með honum þjóðhöfðingjarnir, á ríkisdeginum í Regensborg (1630), að keisarinn setti Wallenstein frá völdum, því að ofsi hans og yfirgángur væri meiri en svo, að nokkur gæti undir risið. Á þeim ríkisdegi vildi keisarinn láta velja son sinn til síns eptirmanns; en kjörfurstarnir gjörðu það að skilyrði, að Wallenstein væri sviptur völdum, og þó að keisarinn færðist undan því, þá lét hann um síðir að orðum þeirra. Wallenstein hlýðnaðist boði keisarans, settist að á búgarði sínum í Böhmen, og hafði þar hirð um sig og rausn svo mikla, að fáir konungar komust til jafns við hann.

Svíar taka þátt í þrjátigi ára stríðinu (1630—1648).

Nú er að segja frá Svíum og Gustaf Adolf konungi þeirra. Sætt sú, sem þeir gjörðu (1629) milli sín Gustaf Adolf og Sigmundur Pólverja konungur frændi hans, og sem getið er hér að

framan (bls. 173), var að miklu leyti orðin af ráðum og framgöngu Richelieu kardinála. Honum var mest um að gjöra, að vaka yfir keisaranum á Þýzkalandi, og takmarka sigursæld hans og yfirgang, til þess hann yrði eigi ofurefli Frakklands. Þess vegna vildi Richelieu sætta Gustaf Adolf og Pólverja, svo að Svíakonungur hefði lausar hendur, og gæti snúizt að keisaranum, hvenær sem á þyrfti að halda. Og nú þurfti þess sannlega við. Prótestantar á Þýzkalandi voru uppgefnir og að þrotum komnir; það var eigi annað sýnna, en að siðabótin og ávextir hennar munda algjörlega undir lok líða, að alt andlegt frelsi og andlegar framfarir yrðu hnept aptur í fjötra páfavillunnar. Prótestantar á Norður-Þýzkalandi höfðu lengi haft augastað á Gustaf Adolf og leitað hans hjálpar. Hann hafði eigi getað við snúizt fyrir en nú að hér var komið. Þó hugsaði hann sig vel um, áður hann hét þeim sinni liðveizlu, því að hann var ofvitur til þess, að rasa í nokkru fyrir ráð fram; en hann hafði margar ástæður til ófriðar gegn keisaranum. Keisarinn hafði kúgað Danmörku og mikið kapp á lagt, að ná yfirráðum yfir Eystrasalti, og þá var Svíaríki hættan vís fyrir eður síðar; keisarinn hafði án allra saka sent Pólverja konungi lið móti Gustaf Adolf, eins og fyrir er sagt, og sýnt honum þá óvirðing, að leyfa eigi sendiboða hans að koma á sáttafundinn í Lybek, heldur vísað honum með fyrirliðningu á burt þaðan. En þar að auki knúði æðri köllun Gustaf Adolf til að ganga í þenna ófrið. Siðabótinni var við falli búið, og öllu andlegu frelsi lokið um stundarsakir, ekki einungis á Þýzkalandi heldur um mestan hluta Norðurláfu, nema því að eins, að keisarans veldi yrði takmarkað. Það var Gustafs Adolfs fagra köllun að ráða bót á slíkum vandræðum; þeirri köllun varð hann að fylgja. Því sagði Axel Oxenstjerna: «konungurinn er knúinn til þessa af voldugum anda, sem enginn fær í móti staðið».

Hér var um það vandamál að ræða, að Gustaf Adolf vildi bera það undir beztu menn þjóðarinnar, áður hann afreði að fullu og öllu, að hefja ófrið móti keisaranum. Hann stefndi því fjölmennan fund í Stokkhólmi (í maímán. 1630), og bar þar upp þetta mál, og mælti engi maður í móti; hin sænska þjóð var svo veglynd og svo framgjörn, að hún vildi eigi teljast undan að fylgja konungi sínum, þó að í mikið væri ráðizt. Herförin

móli keisara var þannig ráðin. Gustaf Adolf talaði langt erindi og snjalt að skilnaði, og sagði meðal annars: „Nú legg eg út í miklu erfiðara og merkilegra stríð en áður. Eg gjöri það ekki af léttúð, þar um er guð til vitnis, eigi heldur fyrir sjálfs míns hagnað eða aflöngun til hernaðar. Keisarinn hefir á marga vegu neytt mig til þess. Hann hefir gjört mér ýmislegt til vanvirðu, veitt óvinum vorum, ofsótt bandamenn vora og trúarbræður, er nú þjást undir andlegu og líkamlegu þrældómsoki og þreyja frelsið, en þeir skulu með guðs hjálp ekki þreyja til einskis. Hvað sjálfan mig snertir, veit eg vel hvað að höndum getur borið. Eg hef margan blóðdropa mist fyrir Svíþjóð, er og undir það búinn, að missa lífið sjálft í hennar þarsir; þángað til fer skjólan til vatns, að hún brotnar. Þess vegna vil eg nú, áður en eg skil við fósturjörð vora, fela yður alla, sænskir menn, sem hér eruð eða annarstaðar, guði hinum allrahæzta á vald, bæði til lífs og sálar, og æski þess, að vèr megum allir hittast á síðan til æfinlegs friðar og fagnaðar. Eg kveð yður alla af hjarta, og vera má í síðasta sinn“.

Áður en Gustaf Adolf fór úr landi, var *Kristínu* dóttur hans heitið ríkiserfðum eptir föður sinn, og sóru menn henni hollustu eiða. Hún var þá fjöggra vetra. Drotningin, móðir hennar, hét *María Eleonóra*, systir Georgs Vilhjálms kjörfursta af Brandenburg. Nokkrir ráðherrar voru settir til landgæzlu í fjärvist konungs, og skyldi Axel Oxenstjerna vera forseti þeirra. En er konungur var búinn og byr gaf sigldi hann út á haf öllum flotanum, og stefndi til Vindlands (Pommern). Liðsmenn hans voru 15000 manna. Konungur tók land skamt frá Stralsund á jónsmessudegi (24. jún. 1630). Og jafnskjótt sem hann steig fæti á land, féll hann á knè og baðst fyrir með þessum orðum, svo hátt að menn hans heyrðu: „Þú drottinn guð, sem ræður yfir vindum og haf, eins og yfir jörð og himni! Hvernig get eg vegsamað þig og þína gæzkuríku vernd á þeirri háska leið, sem nú er farsællega á enda farin? Eg þakka þér! Af instu hjartans rótum þakka eg þér! Þú veizt, að eg hef tekizt þessa ferð á hendur, ekki mér heldur þér til vegsemdar og þinni aðþrengdu kirkju til hjálpar! Veittu oss hamíngju til að vinna þetta þitt heilaga verk, á þeim tíma, og að því takmarki, sem þú hefir sett“. Þegar konungur stóð upp aptur og sá, að menn

hans tárfeldu, mælti hann: «Grátið eigi vinir mínir, en biðið guð af hjarta! Vel beðið er hálfur sigur». Með slíku hugarfari tók Gustaf Adolf til starfa á Þýzkalandi. Þá ræð fyrir Pommern Búgislás hertogi, gamall og barnlaus og enginn styrjaldarmaður. Kjörfurstinn af Brandenburg stóð þar næstur til ríkiserfða, en fleiri höfðu þó augastað á landinu. Keisarinn hafði að nokkru leyti kastað eign sinni á það, og hafði þar liðsafla mikinn í flestum borgum, þegar hær var komið. Hertoginn þorði sig hvergi að hræra móti slíku ofurefli, en þá batnaði eigi sagan, þegar Gustaf Adolf bættist þar ofan á, og skoraði á hertogann, að leyfa liði sínu inngöngu í Stettín, aðalborg landsins og aðsetursstað hertogans; kvaðst Svíakonungur kominn í ríki hans, eigi sem óvinur heldur sem vinur, er hefði þessa fœr farið til liðs við hann og aðra trúarbræður sína á Þýzkalandi gegn ofrski keisarans. Hertoginn þorði eigi þegar í stað að verða við beiðni konungs, þó að hann feginn vildi, en Gustaf Adolf bað hann skjótt segja, hvað honum byggði í skapi, því að erindi sitt þildi enga bið. Hertoginn sá sér ekki undanfæri; konungur settist að í borginni með nokkru af liðinu og víggirti hana á stuttum tíma, svo ramlega, að hertoginn og hans menn undruðust. Litlu síðar gjörði hertoginn samband við konung, og að nokkrum vikum liðnum hafði Gustaf Adolf unnið Pommern alla af keisarans mönnum, þó að þeir væru liðfleiri en Svíar. Þótti landsmönnum mikil umskipti orðin þar, síðan Svíar settust í landið, því að keisarans menn höfðu farið þar með ránum og manndrápum og öllu illu athæfi, en Svíar voru siðprúðir og létu hvern mann í friði, sem eigi gjörði á hluta þeirra, en bæri svo við að út af brigði, þá refsaði konungur sínum mönnum þunglega. En þó að höfðingjar prótestanta á Þýzkalandi mættu sjá, að Gustaf Adolf var þangað kominn þeim til hjálpar, og þó þeir yrðu að játa, að hann einn var þeim störfum vaxinn, þá þorðu þeir eigi þá hjálp að þyggja, og færðust undan öllu sambandi og allri liðveizlu við hann; þeir óttuðust reiði keisarans, og vantreystu því, að nokkurt það afl væri til, ersigrað gæti veldi hans og hamíngju. Þessi tregða þeirra, einkum kjörfurstanna af Brandenburg og Saxen, gjörði Gustaf Adolf miklar taflr, og seinkaði svo ferðum hans, að hann gat eigi bjargað Magdeborg meðan tími var til.

Tilly var orðinn æztur höfðingi yfir liði keisarans, eptir að Wallenstein lagði völdin niður, hann stýrði og öllum hersveitum hinna katólsku bándamanna, eins og fyr er sagt, og var það mikið lið og geygvænlegt þegar allt var saman komið. Hann hafði sent herflokkka í ýmsar áttir móti Svíakonungi, er hanna skyldu honum leiðina um Pommern og Meklenborg, en þeir höfðu alstaðar farið halloka fyrir Svíum. En Tilly og Pappenheim höldu Magdeborg í umsátri, og sóttu hana með öllum þeim vopnum og vígvælum, er menn þektu um þær mundir. Höfðu þeir 40 þúsundir hermanna, en borgarmenn vart meira en 8000 manna til varnar. Gustaf Adolf hafði sent þeim einn af herforingjum sínum, er Falkenberg hét, og varði hann borgina bæði vel og lengi móti slíku ofurefli sem við var að eiga, og féll þar við bezta orðstír, þann dag, er þeir Tilly unnu hana (í maímánuði 1631). Aðfarir keisarans manna, þá er þeir brutu og brendu Magdeborg, eru orðlagðar, og er sagt, að fáar borgir hafi nokkru sinni verið eyddar af meiri grimd. Af bæjarbúum höldu að eins fimm þúsundir manna lífi eptir, en frekar þrjátígi þúsundir dóu þar hörmulegum dauða.

Skömmu áður en Magdeborg hrundi, hafði Gustaf Adolf sagt við kjörfurstann af Brandenburg: „Því verður als eigi neitað, að eg hefi tekizt mikið í fang og teflt mjög á tvær hættur, en það er eigi mér til gagns, heldur yður, landi yðar og lýð, já, meira að segja, allri kristninni. Ef enginn vill styrkja mig, þá fer eg heim aptur, sættist við keisarann og setzt um kyrt í Stokkhólmi, og gjöri það með góðri samvizku; en á efsta degi verðið þér kvaddir til reiknings fyrir ragmensku yðar, að þér þorðuð eigi að taka málstað evangelií. Og jafnvel hér í lífi mun lítilmennska yðar fá sitt endurgjald, því að, þegar Magdeborg er fallin, og eg er farinn hððan með mína menn, hvað mun þá taka við fyrir yður og landi yðar?“ Kjörfurstinn gjörði loksins samband við Svíakonung, er hann sá sér ekki undanfæri.

Þá er Magdeborg var unnin, bjuggust allir við, að Tilly mundi þegar halda öllu liðinu til móts við Gústaf Adolf og ráðast á hann, og það því fremur, sem hann hafði lið miklu meira en konungur. En Tilly gjörði það eigi, heldur lét hann Pappenheim eptir í Magdeborg með nokkrar sveitir manna, en sjálfur hélt hann meginhernum suður á Hessen til þess að vinna það

land undir sig; en þá komu þegar á hæla honum boð frá Pappenheim, að Svíar væru komnir vestur yfir Elfunna; hann hefði ekki liðsmagn í móti þeim, nema hann fengi hjálp. Sneri Tilly þá norður aptur. En það er frá Gustaf Adolf að segja, að þegar hann var kominn vestur yfir ána, bjóst hann um í bæ þeim, sem heitir *Werben*, og er á vesturbakka Elfunnar rétt þar á móti, sem Hawel rennur í hana að austan. Þann stað víggirti konungur ramlega, hafði 150 fallbyssur, en ekki nema 12000 manna, því að hann hafði orðið að skipta liði sínu í marga staði, og hafa herflokka til varnar móti keisarans mönnum bæði í Pommern, í Meklenborg og Brandenburg. Þegar konungur hefir dvalizt á þessum stað um hríð, er honum sagt, að Tilly komi ofan með ánni og hafi 25 þúsundir manna; hann fær og vitneskju um, að þeir menn séu nokkrir í herbúðum hans, er Tilly hafi gefið fé til að leggja eld í Werben, og reka nagla í púðurholið á öllum fallbyssum Svía, svo að eigi verði af þeim hleypt í því vetfáangi, er Tilly komi og ráðist á herbúðirnar. Konungur fann hér skjótt ráð í móti. Hann setur menn til að hafa gát á fallbyssum sínum, lætur hlaða þær með ótal smákúlum (*Kartescher*), draga að við og setja í kesti á ýmsum stöðum í bænum fyrir innan girðingarnar, bíður svo þess, að Tilly komi. Þess var og eigi lengi að bíða. Þegar Tilly var kominn í skotmál við Werben, voru 32 fallbyssur settar í öndvert fylkingarbrjóst, og skotið af miklum ákafa á herbúðir Svía. Konungur lét að eins svara með einstöku skotum, og jafnframt sást eldur koma upp í herbúðunum hér og hvar. Tilly þóttist nú vita, að þau ráð hefðu tekizt, er hann hafði tilsett, og skipar liði sínu til atgöngu; er nú svo gjört, og ganga menn hans fylktu liði og stefna á víggarðana. Svíar láta ekki til sín heyra nema skot á stángli. En er minst varði, og Tillys menn eru komnir svo nærri sem konungi þykir nægja, lætur hann skotin skella; flugu þá kúlur svo þykt og dundu á Þjóðverjum eins og haglæl gengi yfir sem svartast, en mannfallið var ógurlegt; varð Tilly þá frá að hverfa í þúngu skapi, og þótti eigi ráðlegt að sækja konunginn heim að sinni. Þetta var seinast í júlímánuði 1631.

Gustaf Adolf hafði sett herbúðir sínar í Werben, og valið þann stað fremur öðrum, af ýmsum rökum: þar var fljótið honum til góðrar varnar einu megin; hann gat bæði eptir því og

eptir Hawel dregið vístir að sér með hægu móti; hann gat þaðan skjótt komið til liðs við bandamenn sína í Pommern, Meklenborg og Brandenburg, og þar að auki var hann á þessum stað í nánd við kjörfursta *Jóhann Georg* af Saxen, og gat á hverri stundu vitað, hvað hann tæki sér fyrir hendur. Kjörfurstinn var hinn voldugasti meðal höfðingja prótestantanna á Þýzkalandi; en hann var ótryggur, og ýmist með keisara ýmist móti honum, eptir því sem honum þótti sér best haga.

Nú hafði Gustaf Adolf marga tilraun gjört, að fá hann í lið með sér, til að hjálpa sínum trúarbræðrum, en kjörfurstinn sá sér það engan hag að svo stöddu og færðist því undan. Aðferð hans átti mikinn þátt í því, að Magdeborg varð eigi bjargað í tíma. En tryði Gustaf Adolf honum illa, þá trúði keisarinn honum heldur ekki vel. Gustaf Adolf vissi það gjörla, og sá fyrir, að þar mundi koma, að fullur fjandskapur gjörðist milli þeirra, keisarans og kjörfurstans, og þá hlaut kjörfurstinn að leita hjálpar hjá Svíum. Þetta kom alt fram sem Svíakonungur hafði fyrir séð. Keisarinn, sem alt af grunaði kjörfurstann um græsku, bauð Tilly að halda hernum inn á Saxland og kúga kjörfurstann til fylgis við sig, ef hann vildi eigi með góðu. Tilly brá við þegar og fór með 40000 manna til Saxlands, og setti kjörfurstanum ýmsa kosti; kjörfurstinn gaf tvíræð andsvör og góðar vonir, sem hans var venja, en Tilly vildi eigi vera vonblíðill hans, og tók að herja landið. Þá sá kjörfurstinn eigi önnur úrræði, en beiðast hjálpar af Svíum, og sendi Arnheim hershöfðingja sinn til Gustafs Adolfs í þelm erindum. Sögðu þá ýmsir meðal Svíanna: «um síðir hefir kjörfurstinn lært, eins og hinir aðrir trúarbræður hans á Þýzkalandi, að lesa fyrir konungi vorum þessa bæn þeirra: «allra augu vona til þín drottinn!». Konungur setti kjörfurstanum þá kosti, sem honum þótti við eiga, og var sá einn af þeim, að kjörfurstinn lèti alt sitt lið sameinast Svíum, og að konungur hefði æztu yfirstjórn þess, eins og sinna manna. Kjörfurstinn tók þeim kostum gjarnsamlega; bættust nú 20,000 vopnaðra manna við Svíaher, og hafði Gustaf Adolf þannig frekar 40 þúsundir manna undir vopnum. Tilly hafði viðlíka margt lið; hann hafði tekið borgina Leipzig, og sat þar með allan sinn her. Þar er sléttlendi mikið fyrir norðan Leipzig, og liggja eptir því skurðir hær og hvar, og

sumstaðar eru þar smáþorp og bæir. Milli bæanna Breitenfeld og Seehausen gengur lág hæð eða ás frá vestri til austurs, norðan undir ásnum rennur lækur einn, eigi mikill, en ógreiður yfirferðar sökum bleytu, tveir bæir eru niður við lækinn og nokkurt bil á milli, og brýr á læknum sín undan hvorum bæ. Að morgni 7. sept (1631) kom Tilly, og fylkti liði sínu norðan í ásnum, fótgönguliðinu í miðið en riddurum til beggja hliða; fallbyssuliðið stóð að baki hinna upp á ásbrúninni og gat skotið yfir höfuð fótgönguliðsins og riddaraliðsins, er neðar stóð í brekkunni; horfðu Tillys menn allir til norðurs og höfðu sól og vind á baki sér, og þykir það eigi lítil hagur í orustum; Tilly var sjálfur fyrir fylkingarbrjósti, Furstenberg fyrir hægri en Pappenheim fyrir vinstra fylkingararmi; vildi hann sjálfur þar helst vera, því að hann vissi, að Gustaf Adolf var vanur að vera í hægri fylkingararm sinna manna, en við konúnginn vildi Pappenheim reyna sig.

Þenna sama dag lögðu Svíar og Saxar upp snemma morguns, og stefndu á Breitenfeld, bæ þann, sem áður var nefndur; sáu þeir þá brátt, hvar alt liðið Tillys stóð norðan í ásnum. Konúngur hafði skipað allan Saxaher í vinstra fylkingararm, og var Arnheim og kjörfurstinn fyrir því liði. Fyrir hægri fylkingararmi var konúngur sjálfur, þar sem Pappenheim var í móti. Fyrir miðjum hernum voru þeir Teuffel og Gustaf Horn og ýmsir aðrir höfðingjar. Að baki þessum stóðu hinar aptari fylkingar Svíakonúngs; þeim stýrðu og ýmsir foringjar, og þar var Jóhann Banér helstur á meðal þeirra. Frammi fyrir miðjum hernum var Torstensson með fallbyssuliðið stórt og smátt. Þegar að læknum var komið, gekk konúngur með sínu liði yfrum á annari brúnni, en Arnheim með sínar sveitir á hinni, og fylktu liðinu eptir því sem yfrum var komið. Það undraðist Tilly mest, hve skipulega Svíum fórst að fara yfir lækinn og ganga í fylkingar, og er mælt hann hafi þagað um stund, og eigi gætt þess, að svara hershöfðingjum þeim, er hjá honum voru og töluðu til hans. Konúngur sat á hesti og reið um fylkingar sinna manna, og sagði svo: „skjótið eigi drengir fyr en þér sjáið hið hvíta í augum óvina yðar“; og við riddarana mælti hann: „berjið eigi sverð yðar sljó á járnhlífum Austurríkismanna, fellið hestana undir þeim, þá verður hægri að sjá fyrir manninum á eptir“.

Þegar fylkingum var þannig skipað, sem konungur vildi, reið hann fram fyrir miðjan herinn, og nam þar staðar, tók af sér hattinn annari hendi, en lét sverðið síga með hinni; slíkt hið sama gjörðu allir hans menn þeir er næstir stóðu, og ósjálfrátt án þess nokkur skipaði. Þá talaði konungur þessum orðum svo hátt, að langt heyrðist um herinn til beggja handa. „algóðiguð, sem hefir sigur og ósigur þér í hendi. Snú þinni mildu ásjónu til vor þinna þjóna. Af fjarlægum löndum, úr kyrrlátum heimkynnum, erum vér hingað komnir til að berjast fyrir frelsi, fyrir sannleika, fyrir þitt evangelíum. Gef oss sigur fyrir sakir þíns heilaga nafns, amen!“. Þessi orð flugu um allan herinn, og vermdu og styrktu hugi manna. Enginn efaðist um sigur.

Nú var komið að hádegi. Svíar sóttu upp undir á sinn, og jafnskjótt dundi yfir þá skothríðin úr fallbyssum Tillys. Torstensson var þá eigi heldur seinn til svars, og sendi þeim kveðjur í móti. Skutust þeir svo á um hríð; höfðu Svíar fleiri fallbyssur og minni, en Tilly hafði færri og stærri, og stóð betur að vígi; reykinn lagði í andlit Svíum og var þeim það ógagn; fyrir því lét konungur liðið alt þoka sér lítið eitt til hægri handar, til þess að reykinn bæri af þeim. Tilly og Pappenheim sáu þegar, hvað konungur ætlaði sér: beiddi Pappenheim þá, að mega fara með sínar sveitir, og ráðast á hægri fylkingararm Svía. Tilly leyfði það um síðir, og Pappenheim þaut af stað sem eldíngr og alt hans riddaralið með honum. Hann var einhver hinn vopndjarfasti maður á Þýzkalandi um þær mundir og hafði einvala lið. Áhlaupið sem hann gjörði á Svía var ógnarlegt, en kallmannlega var í móti tekið. Konungur lét Jóhann Baner koma með sínar sveitir; voru þeir konungur og hann jafnan þar sem hættan var mest, skipuðu fyrir og eggjuðu til framgöngu. Varð það Pappenheim mest til meins, að konungur hafði fótgöngulið með hverjum riddaraflokki, og beitti hvorumtveggja jafnframt; þá fylkingaskipun þektu eða tíðkuðu eigi Þjóðverjar; fellu Pappenheims menn unnvörpum, og sár bárust á hann sjálfan, eins og hann átti jafnan venju til; en þó hann berðist sem hetja, og þó hann gjörði sjó atreiðar að konungslíðinu, þá vann hann ekki á, og varð loks undan að flýja og allir hans menn, sem eptir lifðu.

Um sama leyti sem Pappenheim réðst í móti konungi, hófst á hinum eystra fylkingararmi viðureign þeirra Saxanna og

Króatanna, sem þar voru í móti, og leið eigi lengi áður Saxar tóku að svigna fyrir. Nú vildi Tilly eigi að fylkingararmarnir skyldu lengur eigast við einir saman, og sendir fram allan miðherinn. Torstensson var þar fyrir og gjörði harða skothríð í móti. Tilly leizt eigi að ráðast þar lengra fram, á meginher Svíanna, en hélt til hægri handar, þar sem Gustaf Horn var með sínar sveitir og Saxa-herinn út í frá honum. Tilly grunaði að Saxar mundu eigi lengi standa fastir fyrir, en er þeir væru flúnir, þá ætlaði hann sér að ráðast á Svía með öllum sínum mannafla. Það sýndist eins og þetta mundi ætla að takast. Þeir Tilly og Furstenberg réðust báðir í senn á Saxa með ofurefli liðs. Arnheim og hans sveitir tóku vasklega í móti, en riddararnir saxnesku höldust eigi við og snerust á flóttu, og riðu undan hvað þeir kunnu, og rændu á flóttanum bæði farángri Svía og sinna landa. Meðal hinna fyrstu, sem flýðu, var kjörfurstinn Jóhann Georg, og nam eigi staðar fyr en í þorpi einu, 2 mílur þaðan á burt; þangað kom hann uppgefnu og berhöfðaður, taldi ósigurinn sjálfsgödan, og settist að drykkju; það var sagt, að honum þætti ölið gott.

Sumar af hersveitum Tillys eltu Saxa og ráku flóttann og tóku að ræna ýmsu, er fyrir varð. Tilly hannaði þeim það harðlega og sagði: «látum Saxa renna, en ráðumst allir á Svía, annars höfum vér ekki unnið». Svo var nú gjört. Gjörðu þeir Tilly og Furstenberg þá harða aðsókn að vinstra fylkingararmi Svía. En þar var Gustaf Horn fyrir, hinn ágæti hershöfðingi. Hann var miklum mun liðsærri en Tilly; en alt um það tók hann svo hreystilega í móti, og skipaði svo vel og viturlega fyrir sínum sveitum, að enginn hans manna ryðlaðist í fylkingum.

Konungur varð þessa skjótt vísari; setti Jóhann Banér yfir hægra fylkingararminn, en reið sjálfur þangað sem þeir Horn áttust við. Þar lá fjöldi manna fallinn, og Gustaf Horn átti sem mest að vinna, lét þokast fyrir ofureðinu, en enginn maður hugði á flóttu. Konungur bar þar að, er Kallenbakk hershöfðingi hans var með nokkrar riddarasveitir, svo sem til vara og í viðlögum á baki hinna, sem þá börðust, en hafðist ekki að ne hans menn. «Í guðs bænum, högðu fram, Kallenbakk! högðu fram!» mælti konungur, og bentu þar á, sem honum þótti viðþurfa. Riddararnir þustu fram, og réðust á þá er fyrir stóðu.

En er saman laust fylkingum féll Kallenbakk dauður til jarðar. Konungur sá, að sínir menn mundu eigi fá staðizt slíkt ofur-
efli, því að margir voru þá um einn, og mælti: »verjist hraustlega
drengir, eg skal senda yður hjálp»; segir þá einum af hers-
höfðingjum sínum, að ríða sem skjótast til hinna eptri fylkinga,
og koma þaðan með nokkra herflokka, en í því sama vetfángi
var sá maður skotinn til bana. Varð konungur sá sjálfur að
fara, og kom aptur að lítilli stundu liðinni með allmarga riddara
og fótgöngulið. Varð nú hinn grimmasti bardagi og þúðurreyk-
urinn svo mikill, að vart þektust vinir frá óvinum. Þegar kon-
ungur sá, að Gustaf Horn mundi borgið, hélt hann aptur til
hins hægri fylkingararms þar sem Jóhann Banér var og barð-
ist; var Pappenheim þá allur í burt þaðan. Þá lét konungur
allan þann fylkingararm þoka sér af stöðvum, upp og austur á
ásinn, eins og áform hans hafði verið með fyrstu, til þess að
komast úr reyknunum. Þá er orustan tókst stóðu hvorirtveggja,
Tillys menn og konungs, frá vestri til austurs; en nú, þegar
hér var komið, hafði vinstri herarmur konungs þokazt aptur á
bak, en hinn hægri gengið áfram, svo að nú stóðu herfylking-
arnar frá suðvestri til norðausturs, og vindur og reykur hér um
bil jafn á hvorumtveggja. Konungur var nú kominn þar á ás-
inn, er fallbyssur Tillys voru; eptir stutta hríð fékk konungur
tekið þær og snéri þeim móti fylkingum Tillys þar neðanundir.
Pappenheim kom með því liði, er hann gat fengið, og vildi ná
aptur fallbyssunum, en þess var enginn kostur; það var eigi
laust sem Gustaf Adolf hélt; fór Pappenheim þá þaðan og ofan
á völlum til liða við Tilly þar sem allur meginherinn barðist.
Þessu næst hélt konungur með sínar sveitir niður af ásnum,
þángað sem Tillys menn horfðu hliðum við, og sótti að þeim
sem fastast; varð þá enn hin harðasta orusta; lauk svo, að kon-
ungur fékk sigur, en Tilly og hans menn lögðu á flóttu. Á
vígvellinum lágu dauðar 9000 manna. Af þeim voru 6800 keis-
arans menn, 2000 Saxar, 700 Svíar; en fjöldi manna sár af hin-
um sem undan komust. Svíar fengu þar svo mikið herfáng í
gulli, silfri og alskonar dýrgripum, að margur hafði nóg fyrir
sig að leggja upp frá því. Þannig lauk hinni nafnfrægu orustu,
sem síðan er kend við borgina Leipzig. Eptir þenna mikla
sigur flaug frægðarorð Gustafs Adolfs um alla Norðurálfu, og

prótestantar urðu glaðari en frá verði sagt, enda breyttist hagur þeirra til batnaðar. Daginn eptir orustuna, kom kjörfurstinn af Saxen til Gustafs Adolfs, og bjóst við þúngum átölum af honum. «Við skulum nú tala um alt annað», mælti konungur, og var hinn blíðasti; «þér hafið áður sýnt hugrekki yðar, er þér genguð í lið með mér og hvöttuð til orustu, svo að mínum mönnum gafst færi á að vinna sigur í gær». Þjóðverjar voru eigi eins vingjarnlegir við kjörfurstann og kváðu flim um hann.

Eptir þessi tíðindi, sem nú voru sögð, voru flestir á því, að kjörfurstinn með Saxaher skyldi elta Tilly og Pappenheim, er flúið höfðu með það lið, er afkomst, vestur í land, en Svíakonungur heldi sínum her suður á Böhmen og þaðan skemstu leið til Wínarborgar og kúgaði keisarann til friðar. En Gustaf Adolf þótti það óráðlegt, því að hann kvaðst enga vissu fyrir því hafa, að Ferdínand keisari lèti kúgast til friðar, þó Wínarborg yrði unnin, en til hins miklar líkur, að þeir Tilly og Pappenheim yrðu kjörfurstanum yfirsterkari, og þá væri viðsjárvert, að eiga þá Tilly með fjölmennu liði fyrir norðan sig og að baki sér. Þess vegna lét konungur þá Arnheim og kjörfurstann halda hinu saxneska liði suður á Böhmen og Slesíu, til þess að reka keisarans menn úr þeim löndum, en sjálfur lagði hann með meginher Svía vestur og suður á sveitir, til þess að hjálpa prótestöntum, sem þar bjuggu, og sem alstaðar höfðu verið harðlega kúgaðir af katólskum mönnum. Vetur fór í hönd og veður einatt stíð, þó var konungur optast á ferðum og átti ótal orustur, og alstaðar vann hann sigur og tók hverja borgina eptir aðra, en, hvar sem hann kom, lofuðu allir hans herstjórn og mildi; hann fékk prótestöntum þau völd og réttindi aptur í hendur, sem þeir höfðu mist, en þó hann lèti katólska menn greiða sér ferðakostnaðinn ríflega, þá þröngvaði hann aldrei trúarfrelsi þeirra.

Meðan Gustaf Adolf vann af katólskum mönnum allan suðvesturhluta Þýskalands, ráku Saxar keisaransmenn burt af Böhmen og Slesíu, en Jóhann Baner og Bernhard hertogi af Weimar (er litlu áður var genginn í þjónustu Gustafs Adolfs), börðust við þá Pappenheim og Tilly norður og vestur í landi, og báru hærra hlut í þeim viðskiptum.

Nú var Ferdínand keisari í nauðum staddur: liðsmenn hans voru fallnir eða flúnir á Leipzigar-völlum, Gustaf Adolf og

bandamenn hans ræðu mestu á Þýzkalandi, Tilly var lamaður og langt í burtu, Saxar höfðu unnið Böhmen og sátu í Prag, erfðalönd keisarans og aðsetursstaður hans Wínarborg, voru í hershöndum er minst varði. Í þessum vandræðum sáu menn engin önnur úrræði, en leyta Wallensteins; hann var sá eini maður er hjálpað gat, og gaf um síðir kost á liðveizlu sinni, en með svo hörðum kjörum, að heita mátti að keisarinn heldi eigi eptir nema nafni einu. En jafnskjótt sem það spurðist, að Wallenstein hefði tekið að sér herstjórn, þá safnaðist að honum múgur og margmenni, svo að á skömmum tíma hafði hann 40 þúsundir vígra manna, og á svipstundu rak hann Saxa gjörsamlega út af Böhmen; því að kjörfurstinn og Arnheim höfðu illa fylgt ráðum Gustafs Adolfs, og búizt þar löðurmannlega um meðan tími var til.

Þegar Gustaf Adolf hafði lagt undir sig lönd öll vestan á Þýzkalandi beggja megin við Rhínfljótið, hélt hann liði sínu austur á Baiern, og segir eigi af ferðum hans, fyr en hann kom að á þeirri, er *Lech* heitir; hún er vestan til á Baiern og allmikið vatnsfall, kemur sunnan af fjöllum og rennur norður í Donau. Þar var Tilly fyrir austan ána með miklu liði og vildi verja konungi yfirferðina; en konungur komst það eigi að síður með brögðum og harðfylgi. Þar var Tilly særður til ólífis og dó litlu síðar, en konungur lagði landið undir sig. En sem Maximilian kjörfursti sá sitt óvænna, og varð að flýja ríki sitt (Baiern), beiddi hann Wallenstein hjálpar, þó eigi væru þeir vinir, og fékk honum alt sitt lið til forráða. Hafði Wallenstein þá um 60 þúsundir manna, og eptir það stefnir hann öllum hernum suður í lönd Maximilians og býst að taka borg þá, er *Nürnberg* heitir, en Gustaf Adolf vildi það fyrir engan mun; borgin var honum vinveitt, og beiddi hann hjálpar, er menn fréttu til ferða Wallensteins. Konungur varð skjótari, og kom liði sínu til borgarinnar á undan Wallenstein og bjóst þar um sem bezt hann kunni. Þar sátu þeir lengi sumars (1632), Gustaf Adolf í borginni innan traustra girðinga, og Wallenstein á bröttum hæðum skamt fyrir utan borgina, og beittust brögðum; en hvarigur vann á öðrum, og fengu þó mikinn skaða á mönnum sínum, og margir urðu handteknir af hvorumtveggja, þar á meðal var Torstensson einn. Þegar komið var fram í miðjan sept-

ember-mánuð, var Svíakonungur þrotinn að vistum, og varð að leita á brott þaðan, en lét þar þó nægilegt varnarlið eftir í borginni; hélt hann nú liði sínu suður og austur í leið, og stefndi til Austurríkis. Wallenstein fór litlu síðar burt frá Nürnberg, en eigi veitti hann Svíum eftirför, þó bæði keisarinn og Maximilian beiddu hann þess á allar lundir, heldur hélt hann liði sínu norður í land. Skildu þeir þá Wallenstein og kjörfurstinn, því að kjörfurstinn vildi eigi láta ríki sitt varnarlaust eftir. Það var áform Wallensteins, að hefna sín fyrst á Saxlendingum, og síðan leggja undir sig allt Norður-Þýzkaland, taka borgir þær allar þar nyrðra, er Svía konungur hafði setulið í, og verja honum þannig allar leiðir til sjávar, og allar samgöngur við Svíþjóð. Í löndum þeim (Franken og Thüringen), sem leið Wallensteins lá um sunnan frá Nürnberg og norður á Saxen, var Bernhard af Weimar með liði sínu, og varði þau svo hreystilega, að Wallenstein fékk litlu áorkað; beygði hann þá til austurs og norður yfir Erzsjöllin og ofan á Saxen og herjaði landið; brukku landsmenn alstaðar fyrir, en Wallenstein tók hverja borg af annari.

Nú var Jóhann Georg kjörfursti engu betur staddur, en árið áður, þá er Tilly var á ferðum; sendi því hver boðin á fætur öðrum til Svía konungs, og beiddi hann koma sér til hjálpar. Konungur var á leiðinni til Austurríkis, eins og áður var sagt, og er als enginn efi á, að hann hefði lagt landið undir sig og tekið Wínarborg, ef hann hefði viljað halda svo fram stefnunni. En hann vildi það eigi; hann vildi hjálpa bæði kjörfurstanum, þó hann væri þess ómaklegur, og trúarbræðrum sínum norður á Þýzkalandi, sem nú voru í háska staddir; fórst Gustaf Adolf í þessu sem öðru betur en Wallenstein hafði farizt, er hann vildi eigi hjálpa Maximilian af Baiern, sem þó var hans bandamaður. Konungur brá því við og hélt norður í land. Á þeirri leið hittust þeir Gustaf Adolf og Axel Oxenstjerna í síðasta sinn. En svo stóð á ferðum Axels þar syðra, að konungur hafði falið honum á hendur, að koma reglu á stjórnarskipun í þeim löndum vestan á Þýzkalandi, er Svíar höfðu unnið; öðrum en honum varð eigi fyrir slíkum störfum trúað. Þegar konungur kom norður á Thüringasveitir, lét hann Bernhard af Weimar koma til fylgdar við sig með nokkru af því liði, er hann var yfir skipaður; var konungsherinn þá samtals um 20 þúsundir manna,

eptir að hersveitir Bernharðs hertoga bættust við. Konunginn vantaði þrjá af hinum helztu hershöfðingjum sínum að þessu sinni: Jóhann Banér, Gustaf Horn og Lennart Torstensson; Jóhann Banér var vestur í Schwaben (þar heitir nú Württemberg), en Gustaf Horn í Elsas, og höfðu þar herstjórn á hendi, en Torstensson sat í varðhaldi suður á Baiern.

Hinn fyrsta dag nóvembermánaðar (1632) var Gustaf Adolf kominn að bæ þeim er Naumburg heitir; sá bær er suður og vestur af Leipzig, og eigi alllángt í milli. Hér um bil mílu vegar frá Naumburg er annar bær, sem heitir Weissenfels; þar voru þeir Wallenstein og Pappenheim með allan sinn her, því nær 40 þúsundir manna. Það kom til orða með þeim, að ráðast þegar á Svía, en þó þeir Wallenstein hefðu ofurefli liðs, þótti flestum það óráð, því að Gustaf Adolf hafði víggirt Naumburg svo ramlega, að ófært þótti til aðsóknar; vetur fór í hönd, og voru allar líkur til, að Svíar mundu láta fyrirberast í herbúðum sínum vetrarlángt, og var þá svo ráð fyrir gjört, að Wallenstein settist að í Leipzig; en Pappenheim, sem hvorki vildi halda kyrru fyrir, nè heldur vera lengur hjá Wallenstein en nauðsynlegt var, fékk leyfi hans, að mega halda hersveitum sínum, hér um bil 12000 manns, vestur í land, til liðs við borgina Köln. Heldur nú Pappenheim með sína menn af stað frá Weissenfels 4. dag nóvembers, en Wallenstein fylgir honum með allan sinn her að bæ þeim, er *Lützen* heitir; þar skilja þeir. Þetta fréttir Gustaf Adolf samdægurs; ræður hann þegar í stað atfór að Wallenstein, og leggur upp frá Naumburg hina næstu nótt, en þó vegurinn væri eigi langur þaðan og norður að Lützen, varð konungslíðinu seinfarið, því að torfærur miklar voru á leiðinni, og náði herinn eigi fyr, en undir kveld (5. nov.) á völlum fyrir sunnan Lützen. Þar hagar svo til, að þjóðvegur mikill gengur frá Lützen austur til Leipzigar; fram með veginum voru skurðir djúplir, en sléttlendi báðu megin; vegurinn var hlaðinn upp, og allur hærri en landið til beggja handa. Þegar Wallenstein frétti til ferða konungs, bjóst hann um fyrir norðan veginn, lét um nóttina dýpka skurðina, og, með því þeir voru þurrir, hafði hann skotmenn þar niðri til þess að skjóta á Svía, er þeir vildu þar yfir fara, en fyrir aftan eða norðan skurðina stóð meginher Wallensteins undir vopnum; áttu Svíar þannig

yfir marga elda að sækja; í hægra fylkingararminn næst Lützen var hið fræknasta riddaralið Wallensteins, og Colloredo hershöfðingi fyrir því; í miðið fótgönguherinn, þar var Wallenstein sjálfur og *Piccolomini*; í hinn vinstra fylkingararm Króatar og fleiri riddarasveitir, sá hét *Isolani*, er þar var helztur höfðingi fyrir. Fyrir framan herinn, en aptan skurðina, var fallbyssuliðið. Herinn var allur um 28000 manns; boð höfðu verið send til Pappenheims, að koma sem skjótast. Þessa fylkingaskipun, sem nú var sögð, hafði Wallenstein látið gjöra um nóttina eptir því sem fong voru fyrir; nóttin var bæði köld og dimm, og biðn menn nú þess að lýsti af degi.

Nú er að segja frá Gustaf Adolf. Honum þótti það illa farið, að hann gat eigi þegar um kveldið ráðizt á óvini sína, áður Wallenstein gat um búizt, en hinsvegar allar líkur til, að Pappenheim mundi koma með sínar sveitir, annaðhvort um nóttina, eður snemma morguns hinn næsta dag, og var þá liðsmunur helzt til mikill. Konúngur ráðgaðist um við hershöfðingja sína. *Kniephausen*, einn af hinum elztu og helztu, gætinn maður og ótrauður til allrar framgöngu þegar á herti, ræð frá því að barizt væri, en Bernhard hertogi, eldfjörugur maður, áfýsti konúnginn þess mjög; konúngur var því og samþykkur. «Það er bezt», mælti hann, «að þvo sig vel breinan, fyrst maður er á annað borð kominn í baðið». Það var því ráðgjört, að veita óvinunum aðgöngu fyrir dögum, svo að alt gæti verið úti áður en Pappenheim kæmi. Konúngur sat á vagni um nóttina, og þeir *Kniephausen* og Bernhard hertogi hjá honum; hann vildi eigi á annan veg taka náðir á sig, úr því að liðsmenn hans allir stóðu undir vopnum og höfðu litla hvíld. Undir morgun lét konúngur fylkja liðinu þannig: í hægra fylkingararm voru riddarar: Stálhandski yztur með Finnlandínga, þar næst Eiríkur Soop með Vestgauta, þá ýmsir, og Stenbökk næstur miðhernum með Smálendínga; þar var konúngur sjálfur. Í miðið var fótgönguliðið í mörgum sveitum og ýmsir fyrirliðar, en Niels Brahe yfirhöfðingi þeirra. Fyrir hinum vinstra fylkingararmi var Bernhard hertogi; það var flest þjóðverskt riddaralið, er hann var yfirskipaður. Á bak við allar þessar fremri fylkingar stóðu hinar eptri, og nokkurt bil á milli. *Kniephausen* stýrði öllum hinum aptari her; fallbyssuliðið var skipað fyrir framan fylkingar, á

sama hátt sem hjá Wallenstein. Nóttin var óvenjulega dimm og birti lítið þó að dagur rynni upp, því að þokan var svo mikil, að hvergi nærri var vígljóst. Það þótti konungi mikið mein; lét þó söðla hest sinn og reið um fylkingar til þess að líta eptir, hvort öllu væri svo til hagað sem hann hafði fyrir skipað. Konungur var í kyrtli af elgsdýrsskinni og þar utan yfir í gráum stakki. Sögðu menn honum, að það væri óvarlegt, að vera hlíf- arlaus þenna dag. «Nei», mælti konungur, «guð er mín hlíf!» Þegar herinn allur hafði lesið morgunbæn sína og sungið á eptir þenna sálm: *Óvinnanleg borg er vor guð*, talaði konungur fyrir liðinu, sem venja hans var til; fyrst talaði hann til Svía og sagði meðal annars: «ef þér í þetta sinn látið sigrazt af óvin- um yðar, sem góður guð forði yður frá, þá vitið fyrir víst, að úti er um allar bjargir, og að ekki eitt bein af oss kemur aptur til Svíþjóðar». Síðan reið hann þangað sem Þjóðverjar stóðu, talaði fyrir því liði og lauk svo sinni ræðu: «fylgið mér, því að eg skal vísa yður veg til baráttu, til sigurs, til ævarandi sæmd- ar; og þér og afkomendur yðar skulu um ókomnar aldir njóta ríkuglegra ávaxta þessa dags».

Einni stundu fyrir hádegi létti af þokunni og sá til sólar; herinn hvorratveggja kom í auglýn. Þá kallaði konungur hátt: «fram nú í drottins nafni!» og síðan sagði hann: «hjálpa mér Jesú, að berjast í dag, þínu heilaga nafni til dýrðar!» Fallbyssu- liðið byrjaði skothríðina, og Svía her sótti fram djarflega; komst Niels Brahe þegar með nokkrar sveitir fótgönguliðs yfir skurð- ina og fékk tekið fallbyssur Austurríkismanna og hrakið það fót- göngulið, er fyrir stóð, en riddaraliðinu sænska gekk miður; skurðirnir voru bæði breiðir og djúpir og skothríðin ógurleg, voru því hestarnir tregir til framgöngu. Wallenstein lét ridd- aralið koma sínum mönnum til hjálpar, er undan hopuðu, og rétti við bardagann. Konungur fékk sæð það og eggjar til fram- göngu riddara sína, keyrir hestinn sporum og kemst yfir skurð- ina. Konungur var fremstur sinna manna og reið svo hart, að fáir gátu fylgt honum. Þar var Piccolomini fyrir með sínar sveitir og bardagi hinn harðasti. Konungur gaf því engan gaum, hve margir voru í móti, eða hve fáir honum fylgdu. Í þeirri svipan fékk konungur skot í vinstra handlegginn. Þeir af hans mönnum, er næstir voru, sáu að hann var blóðugur og hand-

leggsbrotinn. „Ekki sakar“; sagði konungur, „áfram börn mín!“ En blóðrenslíð var svo mikið, að konungur fann að máttur þverraði, og beiddi því Albert hertoga af Lauenborg, er þar var með honum, að ríða með sér, svo lítið bæri á, burt af vígvellinum. En skamt voru þeir komnir áður nýjar hersveitir riðu að þeim, og hét sá Falkenberg, er fyrir þeim var. Hann þekti konunginn og mælti: „Þig hefi eg lengi viljað finna!“ og í því sama vetfangi skaut hann; kom skotið á konung miðjan og gekk í gegnum hann. Konungur féll þó eigi af hestinum, en mælti: „frelsaðu þig bróðir, eg hefi fengið sem mér nægir!“ Falkenberg var þegar skotinn til bana. Hertoginn reyndi að styðja konung á hestinum og komast þannig á brott, en þess var engin kostur fyrir mannþrönginni. Hertoginn gat með naumindum flúið undan og borgið lífi sínu, en konungur féll af hestinum; voru þá allir hans menn fallnir, er þar voru nærstaddir, nema einn ungur maður, er *Leubelfingen* hét; hann leitaðist við að setja konung á bak, en skorti afl, enda var konungur þá með öllu máttprotinn. Í þessu bar þar að nokkra riddara, er spurðu hverjir þar væru. En hvort sem þeim var svarað nokkru eður engu, þá skaut einn þeirra konunginn til bana, og annar lagði spjóti í gegnum *Leubelfingen*; flettu þeir þá síðan klæðum og létu svo liggja. *Leubelfingen* lifði nokkra daga, og er þessi sögn eptir honum tekin. Aðrir segja lítið eitt öðruvísi frá síðustu augnablikum Gustafs Adolfs. Þjóðverskur maður, er *Truchsess* hét, og hafði fylgt konungi, komst með lífi undan og sagði *Bernhard* hertoga, að konungur væri fallinn. *Bernhard* sagði *Kniephausen*. Það er sagt, að *Kniephausen* hafi viljað halda undan, og mælt að hann skyldi ábyrgjast hernum andanomu, en *Bernhard* svarað, að hér væri als eigi um undanhald að tala, heldur um hefnd, sigur eða dauða; hann tók til sinna ráða og skipaði fyrir til nýrrar atlögu. Herinn vissi nú, eða grunaði, að konungur mundi fallinn; harmur og reiði fyllti hvers manns brjóst. Gjörðu Svíar nú svo harða atlögu að Austurríkismönnum, að ekki stóðst fyrir; fallbyssur voru teknar, riddarar flýðu, þúðurvagnar flugu í lopt upp, herinn ryðlaðist í höndum *Wallensteins*, orustan var því nær úti og unnin af Svíum. Í þeirri svipan kom *Pappenheim* og riddaralið hans. „Hvar er Svía konungur?“ sagði hann, og réðst á hægri fylkingararm

Svíá. Ein hetjan vildi aðra finna, en — þess var eigi frammar kostur. Þar var Stálhandski fyrir og hans menn, og svaraði með skothríð. Pappenheim varð fyrir tveim skotum, og varð sár til ólífis. «Eg dey glaður, er eg veit að Gustaf Adolf er fallinn», mælti hann, og dó síðan. Við komu Pappenheims fékk Wallenstein stöðvað herinn og fylkt liðinu, og tókst nú af nýju hin grimmasta orusta. Wallensteins menn náðu aptur fallbyssum sínum; Niels Brahe féll og fleiri af höfðingjum Svía; hinar fremri fylkingar hopuðu á hæl aptur að hinum eptri, en þar stóð Kniephausen fyrir sem múrveggur, og þar fengu Svíar fótfestu. Þeir Bernhard og Kniephausen eggjuðu til nýrrar framgöngu, og nú sótti fram allur herinn. Við því áhlaupi máttu Wallensteins menn eigi, og lögðu á flóttu undan til Leipzigar. Þannig endaði orustan við Lützen; hafði hún staðið alt að níu stundum. Svíar létu fyrirberast á vígvellinum til næsta dags. Um morguninn eptir komu nokkrar sveitir af Króötum til að sækja fallbyssur Wallensteins, en Svíar tóku altsaman, bæði Króata og fallbyssurnar; níu þúsundir manna láu fallnar á orustustaðnum. Svíar fundu lík konungs, illa til reika af sárum, og veittu því umbúnað; var það síðan flutt til Stokkhólms í þann legstað, er konungur hafði sjálfur til tekið áður hann fór heiman.

Wallenstein treystist eigi að nema staðar á Saxlandi eptir tíðindi þau, sem nú voru orðin, og hélt fyrir því viðstöðulaust suður á Böhmen og settist þar að. Það er mælt, að lið það, er honum fylgdi þangað, hafði verið einar tíu þúsundir manna; hitt alt var annaðhvort fallið, eða tvístrað í ýmsar áttir. En þó Wallenstein sýndi þannig í verki, að hann þættist undir orðinn í viðskiptum þessum, þá litu katólskir menn öðrum augum á ornstuna við Lützen. Þeir töldu hana hinn mesta sigur, úr því að Gustaf Adolf var fallinn. Svo mikið þótti þeim að honum einum kveða. Í Wíenborg, Brüssel og Madrid var sungið *Te Deum*, og það eigi ástæðulaust, því að allur sá eindrægnis og samheldis andi, sem Gustaf Adolf hafði skapað meðal prótestanta, og sem hann einn var fær um að halda vakandi, var nú frá þeim vikinn og fallinn í dá. En þó þessu væri svo varið á Þýzkalandi, þá var hamingja Svía eigi liðin undir lok með konungi þeirra; þó Gustaf Adolf væri dáinn, þá var Axel Oxenstjerna enn á lífi, og hann var það mikilmenni er stýrt gat

málefnum Svíþjóðar bæði innanlands og utan. Allir bjuggust nú við, að lokið mundi störfum Svía og framgöngu á Þýzkalandi, þeir mundu sem hraðast halda þaðan heim aptur og þakka fyrir að komast það klakklaust. En sú von brást. Það var enganveginn ætlan eða áform Axels Oxenstjerna, að hætta við svo búíð. Hann vildi eigi að þau störf, er Gustaf Adolf hafði með svo mikilli frægð og hamingju byrjað, skyldu verða svo endaslepp, og falla niður sem hálfkveðin vísa; hann hafði og sjálfur átt svo mikinn þátt í þeim, að hann vildi eigi sín vegna hætta að óreyndu við svo búíð, og hann vildi að minsta kosti, að Svíar hefðu nokkuð í aðra hönd hjá Þjóðverjum fyrir kostnað sinn og liðveizlu. Eins og áður er sagt, var Axel Oxenstjerna á Þýzkalandi þegar hér var komið; hann fór um landið og fann ýmsa þjóðhöfðingja að máli; þeir reyndust marglyndir og þreklausir eins og kúguðum mönnum er tamt; fæstir voru á því, að Svíar hefðu frekari afskipti af málefnum Þýzkalands, en flestir vildu þá þaðan á brott sem fyrst. Kjörfurstinn á Saxlandi þótti ist einfær til als, og sjálfkjörinn foringi prótestanta á Þýzkalandi, enda gjörði alt hvað í hans valdi stóð til að spilla fyrir Svíum, og launaði þeim þannig liðveizluna sem hann var maður til. Frakkar, Englendingar og Hollendingar skárust einnig í þessi mál, og vildu allir hafa gagn af, en Axel Oxenstjerna fékk sæð við öllum þeirra brögðum og sigrað öll þessi vandræði. Það er líka sannast að segja, að hin sænska þjóð sýndi þrek og samlyndi, og hinir sænsku ráðherrar, er heima sátu og höfðu ríkisstjórnina á hendi, studdu mál hans og ættjarðar sinnar í orði og verki¹. Axel Oxenstjerna vildi, að höfðingjar prótestanta á Þýzkalandi gengju allir í félag og berðust móti keisara fyrir þjóðfrelsi sínu og trú, og með því, að þeir höfðu engan hershöfðingja, er gæti jafnast við Gustaf Horn, Jóhann Banér eða Lennart Torstensson, þegar Bernhard af Weimar var undan skilinn, en hann var með Svíum og þeirra maður, þá vildi Axel, að herstjórnin væri Svíum á hendur falin. Sú varð og niðurstaðan. Nokkrir höfðingjar prótestanta gengu því í félag, og lögðu til fæ og menn, og það var afráðið, að halda stríðinu fram og að Axel hefði alla æztu og helztu handleiðslu þess og yfirstjórn þjóð-

1) Nafnkendastir voru þessir: Jakob de la Gardie, Gabriel Oxenstjerna (bróðir Axels), Pétur Brahe og Klas Fleming.

verskra málefna þángað til friður kæmist á. Gustaf Horn átti reyndar að hafa yfirstjórn hersins, því að hann var elztur hershöfðingi, en Bernhard hertogi vildi engum hlýða nema Gustaf Adolf einum, og urðu þeir því jafnir í hervöldum Bernhard og Gustaf Horn. Nú gekk sú samvinna þeirra allvel, því að hvor-igan skorti vit eður hugrekki, en ólíkir menn voru þeir þó í mörgu. Horn var stillingarmaður mikill, ósérplæginn og siðvandur. Bernhard hertogi var manna ákafastur, ágjarn til fjár og landa, og það var auðsèð á öllu hans ráðlagi, að hann vildi engum vera háður, heldur brjótast til valda og eignast ríki eitt eður annað á Þýzkalandi, þar sem hann gæti orðið einvaldur yfir. Að því leyti var hann líkur Wallenstein. En það er frá Wallenstein að segja, að hann sat aðgjörðaltill í Böhmen, og þó hann hefði allmargt lið, og þó keisarinn skoraði á hann, að taka aptur til starfa, þá hafðist hann ekki að, það teljandi sè, heldur lutu allir hans aðgjörðir miklu fremur að því, að hann ætlaði sèr, að verða konúngur í Böhmen og, ef til vildi, taka fleiri lönd frá keisaranum. Í því skyni gengu menn á milli hans og Axels Oxenstjerna og Bernhards af Weimar. En þegar að því var komið, að þetta yrði framgengt, þá lét keisarinn sviksamlega taka Wallenstein af lífi (í febrúarmán. 1634). Ferdínand, elzti sonur keisarans, varð nú æzti höfðingi liðsins, en Gallas, sem áður er nefndur, var settur honum til aðstoðar, sem eldri og reyndari hershöfðingi. Nýtt fjör og nýjar framkvæmdir komu í ljós. Herinn hélt af stað frá Böhmen og vestur á Baiern; náðu þeir Ferdínand þar ýmsum borgum, sem Bernhard hertogi hafði setulið í til varna, og loksins um haustið 1634 mættust hvorirtveggja við borg þá, er *Nördlingen* heitir. Sú borg er í Baiern vestarlega og fyrir norðan Dóná; borgin var vinveitt Svíum, og fyrir því vildu þeir Bernhard og Horn verja Ansturríkismönnum að ná henni. Liðsmunur var mikill, því að Ferdínand og Gallas höfðu um 35 þúsundir manna, en þeir Bernhard og Horn ekki nema frekar 20 þúsundir. Þess vegna vildi Horn eigi berjast fyr en þeir hefðu dregið til sín meira lið, sem von var á, en Bernhard vildi þá þegar ráðast á keisarans menn; jafnvel nokkrir af hertogans mönnum brugðu Horn um ragmensku, og sögðu að hann þirði eigi að berjast. „Eg skal berjast, mælti Horn, en að því mun koma, er eg segi, að ílt eitt

mun af hljótask. Orustan var bæði hörð og löng, og lyktaði svo, að þeir Ferdínand unnu þar fullan sigur. Bernhard hertogi flýði, en Horn vildi eigi flýja og varð handtekinn; af Svíum féllu þar 8 þúsundir manna, en 6 þúsundir handteknar, 80 fallbyssur og um 4000 vagna með ýmsum hernaðar áhöldum komust í hendur Austurríkismanna.

Bardaginn við Nördlingen breytti mjög kjörum manna á Þýzkalandi. Alt til þessa höfðu Svíar haft þar mikinn framgáng og mikil yfirráð. Nú voru þau yfirráð á enda; Svíum varð eigi viðvært á Suður-Þýzkalandi og urðu að brekjast þaðan á burt; Bernhard hertogi hörfaði vestur yfir Rínfljótið með herleifar þær, er honum fylgdu, og gekk í þjónustu Frakkakonúnga, er hét að fá honum ríki það til forráða, er Elsas hét, — það er fyrir vestan Rínfljótið, en Baden er að austan. — Voru þetta reyndar svik af hertoganum við Svía, því að hann var í þeirra þjónustu og sá her, er honum fylgdi. Kjörfurstinn af Saxen sá, að hann mundi nú eigi lengur hafa hag af sambandi við Svía, og samdi því frið við keisarann (í Prag 1635), og hét honum sinni liðveizlu til að reka Svía alveg burt af Þýzkalandi. Og þessum manni höfðu Svíar hjálpað, og Gustaf Adolf látið lífið til þess að verja hann og ríki hans. Nú fór svo, eins og við mátti búast, er hinn voldugasti allra þjóðhöfðingja meðal protestanta var genginn úr sambandinu, að hinir smærri höfðingjar og borgir protestanta gáfust upp og gengu til hlýðni við keisarann. Svíar áttu ekki annað eptir á Þýzkalandi en Pommern. Ríkisráðið í Stokkhólmi lét Axel Oxenstjerna vita, að hann gæti eigi búið við mikilli hjálp þaðan, því að harðæri hafði á undan gengið þar í landi. En alt um það, Axel Oxenstjerna lét eigi hugfallast, heldur tók hann sér nú ferð á hendur til Frakklands og til fundar við Richelieu og Loðvík konúng þrettánda. Axel vissi það vel, að Richelieu mundi alt annað heldur vilja, en að keisarinn og Spánarkonúngur yrðu einráðir á Þýzkalandi og á Niðurlöndum; á því bygði hann von sína um liðveizlu af Frakklandi. Og honum skeikaði eigi. Richelieu gjörði samband í öðru lagi við Niðurlöndin, og í öðru lagi við Svíþjóð, og sagði bæði Spánverjum og keisara stríð á hendur. Við þetta færðist ófriðurinn út, og tók nú yfir margfalt stærra svæði en áður; nú var barizt eigi einungis á Þýzkalandi, heldur einnig í Niður-

löndum, á Ítalíu, suður við Pyreneafjöll, og úti á hafi. Nú var eigi lengur barizt um trúarbrögðin, því nú voru prótestantar sumir með katólskum mönnum (t. a. m. Saxen og Brandenburg með keisara, Niðurlendingar og Svíar með Frökkum), heldur var ná barizt um yfirráð yfir löndum og lýðum.

Þegar hér var komið, fór Svíum að vegna betur. Jóhann Banér var orðinn yfirhershöfðingi þeirra á Þýzkalandi; Torstensson var laus úr fangelsi og kominn til liðs við hann; vopnahlæ, er standa skyldi um 26 ár, var að nýju samið við Pólverja; Axel Oxenstjerna var farinn heim til Svíþjóðar. Kjörfurstinn af Saxen, Jóhann Georg, sem ætlaði að binda enda á loforð sitt við keisara, og reka í samfélagi með honum Svía burt af Þýzkalandi, setti fyrst Jóhann Banér þá skilmála, er hann eigi gat gengið að, og því næst hélt hann liði sínu í móti honum; urðu með þeim ýmsar orustur, og veitti Svíum optast betur. Um síðir áttu þeir Jóhann Banér og Torstensson orustu við Saxa og Austurríkismenn hjá *Wittstokk* í Brandenburg (í sept. 1636), og unnu þar mikinn og frægan sigur. Hefndu Svíar sín þá grimmilega á kjörfurstanum og ríki hans, og fóru með bál og brandi yfir Saxland. Aðfarir þeirra voru nú orðnar engu betri en keisarans manna, og mjög ólíkar því, er tíðkæzt hafði meðan Gustaf Adolf var uppi og átti yfir að ráða. Ófriður hafði nú staðið í mörg ár á Þýzkalandi; ýmsir herflokkar farið aptur og fram um bygðina, ruplað og rænt eignum manna, og brent borgir og bæi; mörg hærð, sem áður voru blómleg, voru nú í eyði, svo að engu kvikindi var þar lífvænt, mannfólkið víða dáið af sulti og drepsóttum, eða flúið undan til annara landa. Jóhann Banér kemst svo að orði í bréfi einu, er hann (1638) ritar borgarmönnum í Erfurt, sem Saxar höldu þá í umsát: «eg væri fyrir löngu kominn til hjálpar við yður, ef allar sveitir milli Oderfljóts og Elfar væru eigi komnar í þá auðn, að hvorki hundum eða köttum, því síður mönnum og hestum, er þar lífvænt. Um slík lönd, er óvinir vorir hafa orðið að rýma fyrir sulti og seyru, get eg als eigi farið með mína menn, nema þeir bíði meira tjón en af orustu og ósigri».

Þegar Ferdínand keisari var búinn að semja friðinn í Prag við kjörfurstann af Saxen, og eptir að hann hafði fengið sigur yfir Svíum í bardaganum við Nördlingen, gat hann fyrst komið

því til leiðar, að Ferdínand sonur hans var kjörinn til keisara eptir hans dag, og litlu síðar, er keisarinn hafði þannig ráðstafað sínu húsi, þá andaðist Ferdínand annar (í febr. 1637). Hann hafði stýrt ríki sínu með mikilli staðfestu, og aldrei látið hugfallast þó á móti blèsi, en hann hafði að fullu og öllu eytt prótestanta trú í erfðalöndum sínum, og því verður eigi móti mælt, að trúarofsi hans hafði leitt lángvint stríð yfir landið, og svipt margar þúsundir manna lífi og efnum. Það er sagt, að þá er hann tók við ríkisstjórn væru íbúar í Böhmen um 3 millíónir manna, en vart 800 þúsundir, er hann dó. Klerkar og kristmúnkar réðu helst of miklu hjá honum; þeir voru í hans augum æðri öllum mönnum, og hann kvað eitt sinn hafa látið sér þau orð um munn fara, að ef hann mætti á leið sinni engli og klerki, þá ætlaði hann að láta klerkinn sitja í fyrirrúmi, og heilsa honum fyr en hinum.

Keisaraskiptin gjörðu litla sem enga breytingu á ófriðnum. Suður og vestur í Rínar-löndum barðist Bernharð hertogi við Gallas og ýmsa aðra af hershöfðingjum keisarans, og varð þeim öllum yfirsterkari eptir að hann hafði fengið liðveizlu nóga af Frakklandi, svo að í árslok 1638 hafði hann unnið af Austurríkismönnum allt Elsass. Þar ætlaði hann að setja ríki á stofn handa sér beggja megin við Rín-fljótið, en þá dó hann snögglega (í júlí 1639) á 35. aldurs ári. Þau lönd, sem hann hafði unnið, tók Richelieu, en lið það, er hertoganum hafði fylgt, gekk á mála hjá Frökkum.

Norður á Þýzkalandi átti Jóhann Banér í höggi við herlið keisarans og þá bandamenn hans. Var Gallas kominn þangað norður með miklu liði og hafði þar yfirstjórn, en Banér veitti þó betur, og hrakti mótstöðumenn sína suður á Slesíu og suður í Böhmen. Því næst var það áform hans að halda suður á Baiern til móts við Bernhard hertoga og vera í fèlagi með honum, en þá dó hertoginn, svo að sú fyrirætlun varð að engu. Nú var svo komið, að ýmsir æsktu friðar, og lét keisarinn (Ferdínand þriðji) þá tilleiðast og stefndi fund í Regensburg (1640); komu þangað kjörfurstar nokkrir og fleiri þjóðhöfðingjar og settust á ráðstefnu. Þá kom Jóhann Banér til hugar, að gjöra þeim grikk, og taka þá alla höndum. Um þetta leyti hafði hann aðsetu í Brúnsvík; það var um hávetur (í janúar 1641), og engan

grunaði neitt. Þá er minnst varði var Jóhann Banér kominn með her manns suður að Regensborg, og eigi annað í milli hans og borgarinnar en Dóná. En þá vildi svo til, að alt í einu kom bláka og leysti allan ís af fljótinu. Var þá þeirri ráðagjörð lokið. Banér varð að halda undan og norður aptur, en Piccolomini og Leopold erkibertogi bróðir keisarans, eltu hann með ofurefli liðs; þó fengu þeir honum lítið mein gjört, og varð hann þeim hvað skæðastur, er að honum krepti sem mest. Á þessari vetarferð sinni varð hann sjúkur, en gaf sér enga hvíld, því að nóg var til starfa. Hann dó í maí-mán. 1641, og hafði lifað 44 ár. Hann þótti ágætur hershöfðingi á sinni tíð, og hafði aldrei beðið ósigur í orustum. Eigi var það við skap hans að sækja eður verja víggirða staði, en hitt átti við hann, að fást við óvini sína á víðavangi; þó hann væri ákafamaður mikill, djarfur og framgjarn, þá rasaði hann aldrei fyrir ráð fram, og hafði gát á hverju einu, áður hann lagði til orustu; honum var mjög ant um liðsmenn sína, og vildi aldrei stofna þeim í hættu að óþörfu, en óvinum sínum var hann hinn sárbeittasti; það er sagt, að þau ár sem hann hafði herstjórn á hendi, hafi fyrir honum fallið af Saxlendíngum 30 þúsundir. og af keisarans mönnum 60 þúsundir. Hann var eigi ósvipaður Gustaf Adolf í andliti, en svo líkur honum á vöxt, að sumir viltust á því.

Litlu áður en Jóhann Banér dó, hafði hann falið yfirstjórn hersins á hendur þremur af liðsforingjum sínum, þangað til hin sænska stjórn gjörði þar á aðra skipun. Einn af þessum þremur var *Karl Gustaf Wrangel*, er síðan varð mjög nafnfrægur. Foringjum þessum fórst herstjórnin allvel, og höfðu sigur í viðskiptum við Austurríkismenn, en þeim samdi sjálfum eigi sem bezt, og var þá við illu einu að búast. Stjórnin sænska hraðaði því sem mest, að nýr yfirforingi yrði settur til herstjórnar. Lennart Torstensson var reyndar sjálfkjörinn til þeirrar sýslu, en hann var þrotinn að heilsu, síðan hann sat í varðhaldi Austurríkismanna, og var nú heima í Svíþjóð, og hafði einsett sér að lifa þar í kyrd og næði það eptir væri. Fyrir bænastað *Axels Oxenstjerna*, tókst hann þó á hendur yfirstjórn hersins, og þótti það þjóðhamíngja, því að aldrei var herstjórn Svía í betri höndum en Lennarts, síðan Gustaf Adolf leið. Þó hann tæki sjaldnast á heilum sér, og gæti sökum fótaveiki hvorki riðið

eða gengið, og þó hann yrði löngum að láta þera sig í rúmi, eða aka sér á vagni, þá var hann eins og eldíngr aptur og fram um alt Þýzkaland; og rættist það fyllilega sem Gustaf Adolf hafði sagt, að í Lennart byggi sitt bezta hershöfðingja efni. Það brá og undir eins við, er hann var tekinn við æztu herstjórn; öll regla og siðprýði batnaði meðal liðsmanna, rán og rupl leyfðist als eigi, og brá í mörgu til þess sem verið hafði meðan Gustaf Adolf hafði sjálfur herstjórn. Torstensson kom til hersins á öndverðum vetri 1641, og tók þá við yfirráðum; ætlaði hann þá þegar að veita óvinum sínum atgöngu, en hersveitir þær, er Frakkar höfðu sent til liðs við Svía, urðu þá að hverfa heim aptur, því að Richelieu kallaði og kvaðst þurfa þeirra við annarstaðar; þóttist Torstensson þá of liðfár. Þá er komið var fram í marzmánuð og dag tók að lengja, lagði hann af stað úr vetrarbúðum sínum og hélt til Slesíu. Þar kom Franz Albert hertogi (sem áður hafði verið með Gustaf Adolf), í móti honum með her manns og barðist við hann; lauk þeirra viðskiptum svo, að Torstensson fékk sigur, en hertoginn féll. Eftir það lögðu Svíar undir sig alla Slesíu, og héldu þaðan suður á Mähren, tóku þar ýmsar borgir, þar á meðal kastalaborgina Olmütz, og létu þar eptir setulið. Í Olmütz höfðu Svíar hið öruggasta vígi, og gjörðu þaðan árásir á landið víðvegar í kring; þótti Austurríkismönnum mikið meia að því, en gátu þó eigi viðgjört, og sátu Svíar þar alla stund síðan þangað til friður komst á.

Nú ætlaði Torstensson sér að halda til Wínarborgar, því að skamt var orðið þangað, og kúga keisarann til friðar, en til þess vantaði hann bæði nógan liðsafla, og honum tókst heldur eigi að ná tveimur víggirtum borgum í Mähren, er hann þóttist viðþurfa til þess að geta verið óhultur svo langt suður í löndum, sem hann nú var kominn. Þess vegna hélt hann aptur norður í leið, þá er úthallaði sumri; en nú hafði Piccolomini safnað miklu liði og veitti Svíum þegar eptirför; beittust þeir síðan brögðum langt á haust fram, og leikurinn barst norður á Saxland; vildu hvorugir á aðra ráða, þangað til um síðir (23. Okt. 1642) að til orustu kom skamt frá Leipzig (við Breitenfeld), þar sem Gustaf Adolf og Tilly höfðu barizt fyrir ellefu árum. Liðsmunur var lítill. Svíar höfðu hér um bil sömu stöðvar sem Tilly hafði haft, en þeir Piccolomini sótu norðan að eins og

Gustaf Adolf. Torstensson fylkti liði sínu þannig: í hægri fylkingararmi ræð Wittenberg hershöfðingi fyrir hinum fremri sveitum, en Stálhandski fyrir hinum aptari, og stóðu þar tvennar fylkingar Austurríkismanna í móti. Fylkingarbrjóstinu stýrðu þeir Liljehök og Karl Gustaf Wrangel, en á baki þeim stóð Axel Lilje með sínar sveitir. Í vinstra fylkingararmi var Slange fyrir framfylkingum, en Konigsmark fyrir hinum aptari. Bæði í móti brjóstfylkingum Svía og hinum vinstra fylkingararmi höfðu Austurríkismenn skipað tvennar fylkingar, eins og síður var þá til. Fallbyssuliðið byrjaði orustuna; gengu hvorirtveggja vel fram og börðust lengi dags, þar til um síðir að flótti brast í liði Austurríkismanna. Fellu þar af þeim um 5000 manna, og viðlíka margir urðu handteknir. Svíar mistu um 2000, og tvo af sínum efnilegustu hershöfðingjum: Liljehök og Slange. Hinn fyrnefndi átti að verða eptirmaður Torstenssons, ef hann hefði lifað, hinn síðarnefndi var nefndur Svíaríkis Leonídas; hann hafði einkum sýnt afbragðs hreysti hinn síðasta vetur sem Jóhann Banér lifði, þá er Piccolomini veitti þeim eptirförlina. Í þessari orustu var Karl Gustaf, er síðan varð konungur í Svíþjóð; hann var þá sveitarforingi og þótti vel duga. Eptir þenna mikla sigur gafst Leipzig upp, og lagði Torstensson þar þunggjöld á þegna kjörfurstans. Þessu næst héldu Svíar aptur austur yfir fjöll og Suður á Mähren, því að Torstensson hafði fast í huga að taka Wítnarborg. Piccolomini var sendur til Niðurlanda móti Frökkum, en Gallas tók aptur við yfirstjórn hins austurríkiska herliðs; þótti Svíum það enginn skaði, því að Gallas var að vísu seldur hershöfðingi og gætinn, en hann skorti bæði dugnað og hreysti á við Piccolomini.

Af því, sem áður hefur verið sagt, vita menn, að einatt hafði ófriður verið milli Svía og Dana. Og þó að þeir væru sáttir að kalla, síðan þeir sömdu friðinn í Knæröð 1613, vildi þó aldrei um heilt gróa með þeim. Þegar Gustaf Adolf var farinn að vinna lönd af Pólverjum með Eystrasalti, og einkum eptir að hann hafði náð fótfestu í Pommern, og frægð hans og framganga jókst á þýzkalandi, þá fór Kristjáni fjórða að þykja nóg um uppgang Svía, og þóttist sjá fyrir, að þeirra veldi yrði sér og Danmörku engu hættu minna en keisarans. Við þessu vildi Kristján sporna; þannig reyndi hann til á ýmsa vegu að stöðva sigursæld

þeirra á Þýzkalandi, og í annan stað gjörði hann verzlun Svía hið mesta ógagn með ýmsum kröfum og ýmsum tollum, er hann lagði á skip þeirra þau, er leið áttu um Eyrarsund. En verzlun Svía var þá á miklum framfaravegi. Mundi Kristján fjórði hafa gjört í þessu efni margt og mikið, ef ríkisráðið hefði eigi dregið allan dug úr framkvæmdum hans. Eptir því sem fram liðu tímar magnaðist óvildin hjá hvorumtveggja, þángað til 1643, er hér var komið, að Axel Oxenstjerna, eða, með öðrum orðum, hin sænska stjórn, bauð Torstensson að sleppa keisara um stundarsakir, en snúast við Dönum og jafna á þeim. Torstensson var staddur suður í Mähren, er honum komu þau boð (í septembermán.) frá Stokkhólmi, að hann skyldi halda liði sínu til Danmerkur og gjalda Kristjáni fjórða makleg málagjöld. Þessi ráðagjörð Svía fór svo leynt, að Dönum kom engin njósn fyr en um seinan. Torstensson hagaði ferð sinni svo kænlega, að Austurríkismenn hugðu, að hann mundi ætla vestur á Falz og láta þar fyrirberast vetrarlángt, og svo var hann þá fljótur í förum, þótt aldrei tæki á heilum sèr, að hann fór 100 mílur vegar á hálfum mánuði og það um vetur. Þrettánda dag desembermánaðar hélt hann liði sínu inn á Holsetaland, og tók þar hverja borg á fætur annari. Í annan stað söfnuðu Svíar liði heima hjá sèr, og sendu það suður í land til að ráðast á Skán, Halland Bleking, sem Danir þá áttu; yfir þann her var settur Gustaf Horn, er þá var nýkominn heim úr varðhaldi á Þýzkalandi. Þar hafði hann setið 10 ár, og þorðu Austurríkismenn eigi að láta hann lausan alla þá stund; svo mikið þótti í hann varið; en um síðir létu þeir þó tilleiðast með því skilyrði, að þeir fengu í móti þrjá af sínum hershöfðingjum úr varðhaldi Svía. Í þriðja lagi bjuggu Svíar herflota sinn; voru skip þeirra bæði mörg og vel búin; en Klas Fleming hafði þar yfirstjórn. Hann var einn í stjórnarráðinu og í öllu hinn merkasti maður. Auk þessa hafði maður einn í Svíþjóð, en ættaður af Niðurlöndum, að nafni *Ludvig de Geer*, á sjálfs síns kostnað gjört út herskipaflota í Niðurlöndum til liðs við Svía. Þannig var afráðið, að sækja Dani bæði á sjó og landi, bæði að sunnan og að norðan. Við þessu ofurefli máttu Danir eigi, enda lagði Torstensson undir sig alt meginlandið: hertogadæmin og Jótland norður á Skaga; en Gustaf Horn vann því nær alt það land, er honum var ætlað að

vinna; en eyjunum náðu þeir ekki, því að Kristján fjórði varði þær svo harðfengilega á skipum sínum, að Svíar komust aldrei þangað. Hefir áður verið sagt af hans framgöngu í ófriði þessum (sjá bls. 145 og 146). Í þessum vandræðum leituðu Danir liðs hjá ýmsum þjóðum, en engin vildi verða við bón þeirra, nema Austurríkiskeisari, hann sendi um síðir Gallas með liði nokkru til Holsetalands; en Gallas var þar næsta aðgjörðalítill. Um þessar mundir lá Klas Fleming með sænska flotann á Kílarfirði, og komst eigi út, því að bæði hamlaði vindur og svo lágu herskip Dana þar í fjarðarmynninu og vörðu hinum útsiglingu. Kristján konungur hafði komið þar á land hersveitum nokkrum, er skjóta skyldu á sænska flotann og eyða honum þannig ef kostur væri, en skipin lágu svo langt undan landi, að skotin náðu þeim eigi til skemda, og þó fengu Svíar hið mesta tjón, því að ein af þeim fáu kúllum, sem náðu skipunum, hitti sjálfan admiralinn Klas Fleming, og fékk hann bana af. Litlu síðar kom Torstensson þangað, og ræð þegar á hersveitir Dana og drap þar hvert mannsbarn, og hefndi þannig Flemings. Þessu næst var Karl Gustaf Wrangel (sá hinn sami sem áður er nefndur), settur yfir flotann; kom þá litlu síðar hagstæður byr, en flotinn lagði út og hélt til hafs, og þá var það, að Galte flotaforingi Dana lét Svía sleppa undan. Um haustið það hið sama ár (13. okt.), þá er skip Ludvigs Geers voru komin til móts við Wrangel, bardist hann við Pros Mund og vann sigur á honum. Torstensson hafði um þessar mundir komið Gallas út úr Holsetalandi, barizt við hann suður í Brandenburg hjá bæ þeim, er heitir *Jüterbock*, og fengið sigur, svo að nú var Dönum eigi framar liðsvon úr þeirri átt. Þrengdi þá svo að þeim, að þeir urðu að semja frið við Svía í Brömsebro (13. ágúst 1645), og ganga að hörðum kostum, eins og áður er sagt.

Þegar Torstensson hafði lokið erindum sínum við Dani, og unnið sigur á Gallas, eins og nú var sagt, hélt hann liði sínu viðstöðulaust suður á Böhmen, og ætlaði til Wínar. Keisarinn var liðfár og í vandræðum, sendi því út um allar jarðir til að safna að sér fè og mönnum, og varð heldur vel til, svo að hann gat þó fengið um 16000 vopnaðra manna, en nú var eigi Gallas settur til yfirstjórnar, heldur sá maður, er *Hatzfeld* hét, og þótti nýtur hershöfðingi, en næstir honum gengu að völd-

um hershöfðingjarnir *Götz* og *Jóhann de Werth*; hinn síðarnefndi var orðlagður fyrir breysti og harðfengi. Svíar voru komnir suður hjá Prag, er þeir Hatzfeld mættu þeim hjá bæ þeim, er *Jankówitz* heitir (24. febr. 1645); tókst þar hin harðasta orusta og lauk svo, að Torstensson vann sigur; féllu 4000 af keisarans mönnum, en aðrar fjórar voru höndum teknar. Aðalforinginn Hatzfeld var handtekinn og fimm aðrir hershöfðingjar með honum, og undir 200 sveitaforingja, en *Götz* fékk bana; þeir, sem af komust, flýðu alslausir; allur farángur og allar fallbyssur komust í hendur Svía. Var þessi einn hinn frægasti sigur sem Svíar unnu í þrjátigi ára stríðinu. Nú var eigi annað sýnna, en að Torstensson mundi taka Wínarborg, og það því heldur, sem Ragokzý Siebenborgar jarl, kom til liðs við hann. En er á skyldi herða, hafði Torstensson fremur ógagn af því sambandi: því bæði reyndust menn Ragokzýs lausir í vistinni og struku heim til sín hópum saman, og þar að auki fluttu þeir sótt með sér, svo að fjöldi Svía sýktist og dó; en er minst varði, sættist Ragokzý við keisarann, og sá Torstensson sér þá eigi fært, með því liði er hann hafði eptir, að taka Wínarborg; þar til kom og, að honum vesnaði iksýkin, svo að hann var als eigi ferðafær. Af öllu saman þessu réð hann af, að halda norður aptur í Böhmen, og láta herliðið hafa þar vetursetu; en sjálfur lagði hann niður hervöldin; tók þá Karl Gustaf Wrangel við yfirstjórn í hans stað. Wrangel hafði mikið orð á sér fyrir viturleik sinn og breysti, og gefzt hafði hann vel bæði á sjó og landi; en af því að hann var enn á unga aldri, þá var Torstensson beðinn, að vera í nánd við hann fyrst um sinn og sjá á með honum, og svo varð. Það ber öllum saman um, að af öllum lærisveinum Gustafs Adolfs, hafði Torsteinsson gengið honum næst, að allri hermennsku og hernaðar kannáttu, og svo sögðu óvinir Svía, að heldur vildu þeir 10000 manna í móti sér, en Torstensson einan. Hinn nafnfrægi frakkneski hershöfðingi *Turenne* kvaðst mikið og margt hafa lært af Torstensson, en Karl tíundi alt sem hann kynni.

Vestur í Rínarlöndum höfðu Frakkar þau árin, sem liðin voru frá dauða Bernharðs af Weimar, barizt bæði við lið keisarans og við lið Maximilians kjörfursta af Baiern, en haft í fullu fangi; og margar borgir og hérað, sem Bernharð hafði unnið,

voru Frakkar búnir að missa þar, árið 1644, þegar *Mazarín* kardináli, er kominn var eptir *Richelieu* til stjórnarforráða á Frakklandi, sendi tvo ágæta hershöfðingja, *Turenne* og hertogann af *Enghien* (er seinna var alment nefndur prinz af *Condé*) til Þýskalands; fengu Þjóðverjar þá eigi rönd við reist, og Frakkar náðu aptur þeim borgum og byggðum, er undan voru gengnar.

Þegar Karl Gustaf Wrangel hafði tekið við yfirstjórn hersins, þóttist hann sjá, að eigi mundi sér duga að komast til Wínarborgar um Böhmen og Mähren, úr því að hvorki Torstensson eða Jóhann Banér höfðu þann veg komizt fram. Hann einsetti sér því, að fara þá leið, er Gustaf Adolf hafði ætlað að fara, en það var um Baiern og þaðan ofan með Dóná; en af því hann þóttist eigi að svo stöddu hafa nógan liðsafla, þá hélt hann liði sínu vestur í leið frá Böhmen og til móts við *Turenne*. Hældu þeir síðan í sameiningu öllu liðinu inn á Baiern og kreptu svo að Maximilian kjörfursta, að hann varð að flýja austur á landamæri; en Baiern komst öll í hendur Svía og Frakka, og var nú eigi annað sýnna, en að þeim mundi þaðan greiður vegur til Austurrikis. Königsmark, einn af hershöfðingjum Svía, hafði og um þessar mundir setzt um Prag og náð öðrum hluta borgarinnar, er hét *lilla Prag*. En þá komu þau tíðindi, að friður væri saminn. Þannig endaði þetta lángvinna stríð í Prag, þar sem það hófst fyrir þrjátígi árum.

Það er sagt, að Þýskaland hafi verið eitt með blómlegri rikjum, áður en þrjátígi ára stríðið hófst; mannfjöldinn var þar mikill og velmegun að því skapi. En nú þegar hér var komið voru þar á orðin ógnarleg umskipti. Hinar mörgu hersveitir af ýmsum þjóðum, sem á ófriðarárunum fóru fram og aptur um landið, höfðu eyðilagt það með báli og brandi, og sumar þeirra af svo mikilli grimd, að þau byggðarlög voru til, að ekki sást þar kvikt eptir, hvorki menn né skepnur; íbúar voru annaðhvort dauðir eða burtu flúnir; fænaður allur höggvinn og uppjetinn; borgir sáuust eigi eður bæir, heldur rústir einar og öskuhaugar; akrar ósánir um mörg ár og komnir í órækt; stór og blómleg hærð orðin að eyðimörkum. Þess skal getið svo sem til dæmis, að einn af hershöfðingjum keisarans, er *Melander* hét, lét á herferð sinni um Hessen, árið 1647, brenna 17 borgir, 30 hallir og 300 stórbæi; þó var *Melander* eigi kallaður grimmur maður, og

Hessen mátti heita lítið land; Vürtemberg hefur hvorki fyr né síðar verið mikið ríki eður mannmargt, þó hafði þar fækkað um 58000 býli á þessum ófriðarárum. Svíar höfðu að öllu samtöldu beðið lítið tjón í samanburði við Þýzkaland, þó mistu þeir á Þýzkalandi um 83000 manna, á þeim 18 árum, sem þeir börðust þar.

Á hinum síðustu árum Jóhanns Banérs voru Þjóðverjar orðnir svo aðþrengdir, að þeir beiddu keisarann að semja frið, og gjöra endir á eymdum lands og lýða; en þó Ferdinand þriðji væri óharðari maður en faðir hans hafði verið, þá var hann, eins og fleiri af þeim Habsborgarmönnum, þéttur fyrir og vildi heldur þrúka við, og sjá hvort eigi raknaði úr fyrir sér, en sættast að svo komnu; með því og að lönd hans höfðu velflest liðið miklu minna að tiltölu en Þýzkaland. Hinir tveir málsaðilar, Frakkar og Svíar, þóttust hvorugir að svo stöddu hafa ástæðu til að semja frið. Frakkar voru hvergi nærri búnir að þröngva svo að kostum Austurríkiskeisara, sem þeim bjó í skapi, og Svíar kváðust margt eiga eptir ógjört enn á Þýzkalandi, bæði fyrir sig og aðra. Þó voru (árið 1641) kvaddir til menn¹, er reyna skyldu, að koma sér niður á aðalatriðum friðarins, og sátu þeir á ráðstefnu svo árum skipti, þar til um síðir, að friður var saminn 24. október 1648, í *Osnabrück* (milli keisarans og katólskra manna annarsvegar og Svía og siðabótar manna hins vegar) og *Münster*² (milli Þjóðverja og Frakka). Höfuðatriði friðarsamningsins voru þessi:

1. *Frakkland* fékk *Elsaz*, sem Austurríki áður hafði átt, og þar að auki biskupsdæmin *Metz*, *Toul* og *Verdun* til fult og als (sjá bls. 42). Öll þessi hærð losnuðu þannig algjörlega við Þýzkaland.

1) *Jóhann Oxenstjerna*, sonur Axels, var annar af þeim, sem sendur var af hendi Svíþjóðar til að semja friðinn. Er mælt að honum hafi þótt það vandasamt erindi, og talizt undan, en þá hafi faðir hans sagt: „*An nescis, mi fili, quantilla prudentia mundus regatur?*“ þ. e. veiztu eigi, sonur minn, hve lítilla bygginda viðþarf til að stjórna heiminum?

2) Borgirnar *Osnabrück* og *Münster* voru báðar í *Westfalen*; það er á Þýzkalandi vestarlega; dregur því friðurinn þaðan nafn og er kallaður: *hinn westfalski friður*.

2. *Svíaríki* eignaðist *Vestur-Pommern* (Forpommern) og nokkuð af *Austur-Pommern* (*Stettin* o. s. frv.), eyjuna *Rügen*, *Vismar-borg* með nokkru landi þar umhverfis, biskupsdæmin *Bremen* og *Verden*; en öll þessi lönd skyldu samt, eins og að undanfögnu, vera í þýzku þjóðsambandi, og Svíakonungur þannig hafa atkvæðisrätt á ríkisþingi (ríkisdegi) Þjóðverja. Enn fremur fengu Svíar í peningum 5 millíónir ríkisdala.
3. *Brandenburg* fékk *Austur-Pommern* (að því undanskildu sem Svíar fengu). En af því að Svíar fengu meiri hluta Pommerns, sem kjörfurstinn í *Brandenburg* að réttum erfðum átti að hafa, eptir að hertoginn í *Pommern* var dáinn, þá fékk *Brandenburg* þar að auki biskupsdæmin *Magdeborg*, *Halberstadt* og *Minden*. *Brandenburg* hafði áður (1618) fengið hertogadæmið *Eystra-Prússland*, og varð nú þannig völdugt ríki á Norður-Þýzkalandi. Um þetta leyti réð *Friðrik Vilhjálmur* kjörfursta fyrir *Brandenburg* (1640—1688), stórvitur maður, og hinn ágjarnasti til fjár og landa.
4. *Baiern* fékk að mega heita kjörfurstadæmi, en það tignarnafn hafði hertoginn í *Baiern* fengið, þá er *Friðrik* af *Falz* var gjörður útlægur. Svo var og *Efri-Falz* lögð undir *Baiern*, en *Neðri-Falz* var fengin í hendur syni *Friðriks*, og hann um leið gjörður að kjörfursta (hinn 8.; sjá *Miðaldasöguna* bls. 174).
5. *Sveizaland* (eða *Svissland*) og *Niðurlönd* skyldu hëðan í frá vera sjálfum sér ráðandi, og að öllu óháð Þjóðverjum eða Spánverjum. Það höfðu þau reyndar verið um mörg ár, en sjálfsforræði þeirra var eigi að fullu viðurkent fyr en nú, að hér var komið.
6. *Hinir þýzku þjóðhöfðingjar* urðu einvaldar hver í sínu ríki, og heimilt upp frá þessu, að gjöra samband við erlendar þjóðir og konunga. Yfirráð keisarans yfir Þýzkalandi urðu því nær engin, en öll sameiginleg þjóðmálefni landsins voru lögð til ríkisdagsins, er optast nær var haldinn í *Regens-*

borg. Höfðu þjóðhöfðingjar og lyðveldisborgirnar (hinar frjálsu borgir) þar atkvæðisrætt, en málin gengu þar einatt seint og sigalega, og samkomulagið sjaldnast hið besta.

7. Þrjátígi ára stríðið var upphaflega *stríð um trúarbrögðin*, en, eptir því sem lengra leið fram, var minna hugsað um trúna, og menn börðust eingöngu um veruleg yfirráð, einkum eptir að Frakkar komu til sögunnar. Nú var svo um samið, hvað *trúarbrögðin snerti*, að friður sá, sem gjörður hafði verið í *Augsborg* (1555, sjá bls. 43.), var staðfestur, og *skilyrði* páfatrúarmanna, sem áður er nefnt, var úr felt. Öll kirkjuleg málefni skyldu, að því leyti unt væri, látin standa við það, sem þau hefðu verið 1. janúar 1624. Calvinstrúarmönnum var veitt jafnrætti við prótestanta. Skipti landshöfðingi um trúarbrögð, var honum heimilt að haga guðsþjónustu við hirð sína samkvæmt sinni trú, en þegna sína varð hann að láta sjálfráða í þeim efnum. En eigi náði þessi friður til prótestanta í Austurríki.

Þannig endaði þessi mikli og lángvinni ófriður, er gengið hafði yfir Þýzkaland því nær um fullan mannsaldur, og haft í för með sér svo margvíslega eynd og óhamingju fyrir land og lýð, eins og áður er sagt; það ræður að líkindum, hvernig ástandið hafi verið þar í landi, og þó að nú talsvert rýmkaði um andlegt frelsi manna og trúarbrögð, þá voru Þjóðverjar orðnir svo vanmegna eptir allar hinar lángvinnu þrautir, að þjóðhöfðingjarnir gátu krept að kjörum þeirra og kostum, hver eptir því sem hann var skapi farinn. Höfðingjar þessir reyndu því, hvað þeir kunnu, að auka völd sín og yfirráð, hver í sínu ríki, bæði gegn keisaranum og yfir þegnum sínum; þeir lögðu skatt á lýðinn eptir sjálfs síns geðþótta, og, ef að því var fundið, þá höfðu þeir fastalið þegar við höndina, til þess að bæla allan mótþróa niður. Margar lýðstjórnaðborgir urðu að lúta þessum landshöfðingjum, svo að sjálfsforráð þeirra hurfu og urðu að engu. Öll innanlandsverzlun var lögzt í dá, og komin í hendur Hollendinga og Englendinga. Hansastaða-félagið var orðið að engu; það var að eins Hamborg, Lübek og Bremen, sem héldu nafninu eptir. Þýzkaland mátti heita döttið í mola, og ekkert var gjört

innanlands til þess að sameina hina sundurdreifðu parta. En hins vegar lét Frakkastjórn sér allant um, að efla sundurlyndið. Líkamleg velmegun hinna þýzku þjóða var lengi að ná sér aptur; en þjóðarandinn var fjarlægur orðinn vísindum og íþróttum; hið litla lífsmark, sem með honum var, sýndi sig helst í því, að laga hvað eina sem mest eptir frakkneskri fyrirmynd.



J. W. H. Anderson

NÝJA SAGAN

EPTIR

PÁL MELSTED.

GEFIN ÚT

AF

HINU ÍSLENZKA BÓKMENTAFÉLAGI.

II. HEPTI.

(1648—1721).

REYKJAVÍK.

Í PRENTSMIDJU ÍSLANDS. HINAR ÞÓRÐARSON.

1870.

WILLIAMS & NORCATE
LONDON &
EDINBURGH.

NÝJA SAGAN

EPTIR

PÁL MELSTED.

GEFIN ÚT

AF

HINU ÍSLENZKA BÓKMENTAFÉLAGI.

II. HEPTI.

(1648—1721).

REYKJAVÍK.

Í PRENTSMIDJU ÍSLANDS. EINAR ÞÓRDARSON.

1870.

YFIRLIT EFNISINS.

ANNAR KAFLI.

Frá vestfalska friðnum til stjórnarbyltíngarinnar á Frakklandi
(frá 1648 til 1789).

	Bla.
Inngangur	1.
Frakkland um daga Richelieu kardinála (1624—1642)	4.
Frakkland frá 1643 til 1661. Mazarin kardináli	8.
England um daga Karls fyrsta (1625—1649).....	12.
England nefnist þjóðveldi. Ríkisstjórn Cromwells	22.
Frakkland frá Pýreneafriðnum til þess er hið spánska erfða- stríð hófst (1659—1700)	30.
England um daga Karls annars (1660—1685) og Jakobs annars (1685—1688)	49.
Stjórnarbyltíngin á Englandi. Vilhjálmur þriðji (1689— 1702). Anna drottning (1702—1714).....	55.
Hið þýzka ríki. Viðureign keisarans og Tyrkja.....	59.
Hið spánska erfðastríð (1701—1713)	63.
Norðurlönd frá 1648 til 1700.	
1. Danmörk og Norvegur	79.
2. Svíaríki	97.
Ófriðurinn mikli á Norðurlöndum (1700—1721).....	129.

Annar kafli.

Frá vestfalska friðnum til stjórnarbyltingarinnar á Frakklandi.

(frá 1648 til 1789).

Inngangur.

Þar lukum vèr síðast frásögn vorri, er hinu harða og lánga þrjátígi ára stríði var lokið, og friður saminn á Vestfali 1648. Það er einkennilegt við ófrið þenna, að hann var hafinn og fram-
an af háður mestmegnis vegna trúarbragðanna. Keisarinn og þeir, sem hann studdu, börðust til þess að vernda hið forna ein-
veldi katólsku kirkjunnar, og þá jafnframt yfirráð sjálfra sinna yfir löndum og lýðum. Prótestantar gripu til vopna til þess að vernda trú sína og andlegt frelsi gegn ofríki keisarans og hinna katólsku klerka. En þessi trúarblær, sem á öndverðum árum þrjátígi ára stríðsins var yfir mönnum og aðgjörðum þeirra, hann breyttist og hvarf að mestu eftir því sem fram sókti í ófriðinn og fleiri komu til sögunnar. Einkum eftir að Frakkar skerast í leikinn og veita Svíum, kemur önnur stefna í ljós. Þá er barizt um veraldleg efni og verzleg yfirráð; trúin og hið andlega frelsi er eigi lengur hið æzta hnoss, sem um er barizt, eins og bezt sèst af því, að Frakkastjórn, sem var katólsk, veitti prótestönt-um á Þýzkalandi gegn katólskum mönnum, en kúgaði trúarbræð-ur prótestantanna heima á Frakklandi, og eyddi þeim þar á allar lundir. Það var eigi prótestanta trúin, eða andlegar framsfarir Þjóðverja, sem Frakkastjórn vildi efla, það var veldi Habsborg-armanna (keisarans á Þýzkalandi og konungsins á Spáni), sem hún vildi veikja; Frakkastjórn vildi sjálf verða sem sterkust, en í annan stað hitt, að nágrannapjóðirnar yrðu sem veikastar. En

alt um það, af hvaða rótum sem þessi liðveizla Frakkastjórnar var runnin, þá kom hún prótestöntum á Þýzkalandi í góðar þarfir, og átti sinn þátt í því, að þeir náðu viðunandi kostum í vestfalska friðnum, eins og fyrir er ritað.

Páfaveldið hafði um undanfarnar aldir drotnað yfir flestum þjóðum og þjóðhöfðingjum Norðurálfunnar. Sú yfirdrotnan hvarf að fullu og öllu í þeim löndum, er hinn nýja sið tóku. En þegar hér var komið, og þjóðhöfðingjar í löndum prótestanta leystust undan páfans valdi, og fengu frjálsari hendur og meiri yfirráð en áður, þá hugði hver þeirra helst á það, að ná sem mestu valdi yfir þegnum sínum, enda varð þeim það eigi torsótt viðast hvar, því að bæði höfðu þeir vopnað lið við að styðjast, ef á mótþróa bryddi, og hins vegar hafði alþýða manna lengstum vanizt ófrelsi og sætt yfirráðum klerka eður aðalsmanna; hún þekti eigi þjóðfrelsi, og henni þótti þá eigi skipta um til lakara þó einn ræði, í stað þess, að áður höfðu margir ráðið yfir heoni. Þannig komst valdið smásaman í hendur á þjóðhöfðingjanum einum, hvort sem hann nú hét konungur eða öðru nafni. Það er því eitt hið helst, sem einkennir það tímabil sögunnar, er hér fer í hönd, að *einveldið* ryður sér til rúms því nær í allri Norðurálfunni. Þó er það engan veginn svo að skilja, að það hafi eingöngu átt sér stað í löndum prótestanta; alt hið sama varð ofan á í katólskum löndum; þannig hafði Karl fimti og Filippus annar sonur hans náð fullu einveldi yfir Spáni, en miklu ríkast og ræmast varð þó einveldið á Frakklandi, þar sem Richelieu og síðan Loðvík fjórtándi brutu alt undir sín yfirráð og urðu fyrirmynd annara einveldismanna um lángan aldur.

Þau lönd, sem helst verður um sagt að eigi lytu einveldinu, voru Sveiz og Niðurlöndin, England og Pólland, og Úngarn og Svíþjóð að nokkru leyti.

Það voru að vísu í flestum löndum einskonar þjóðþing, eður fulltrúaping, er átt höfðu sér stað framan úr miðöldum, og ræðu lagasetningu og skattálögum ásamt með konungum sínum eða landshöfðingjum, og takmörkuðu þannig vald þeirra að nokkru leyti, — höfðu þing þessi ýms nöfn hjá þjóðunum; á Englandi hét það *parlament*, á Frakklandi *aðalstettir* (*les états généraux*), á Spáni *Cortes*, á Þýzkalandi *landstettir*, í Danmörku *Danehof* og seinna *herradagur* o. s. frv. — en alt um það gátu lands-

höfðingjarnir, eptir því sem tímar liðu fram, gjört atkvæði slíkra þínga næsta þýðingarlítil með tilstyrk hermanna sinna. Enda máttu slík þíng eigi þjóðþíng heita, því að á þeim sátu almennast einskonar umboðsmenn eða erindsrekar stéttanna, eður flokka þeirra, sem landsfólkið greindist í á þeim tímum, þ. e. aðalsmanna, klerka og borgara (bændastéttarinnar gætti als eigi), og þessir sundurgreindu flokkar þjóðfélagsins voru einatt sundurþykkir, varð því næsta auðvelt ráðríkum eða kænum landshöfðingja, að ná undir sig öllum yfirráðum.

Það, sem þessir einvöldu landshöfðingjar urðu fyrst og fremst um að hugsa, var, að hafa vígbúið herlið á reiðum höndum, en til þess þurfti ærið fè, og varð því að finna til ýms ráð, að ná sem mestum sköttum af landsfólkinu, svo að jafnan væri nóg til í ríkissjóðnum. Það var um þá daga ætlun flestra þeirra manna, er stýrðu fjárhagsmálum þjóðanna, að ekki væri annað auður en einir saman peníngar og dýrir málmar (Merkantil Systemet); menn gátu þá eigi skilið, að peníngar eru eigi annað en vara, og að sá, sem á penínga eða dýra málma, er í raun og veru eigi ríkari en hinn, sem á jafngildi þeirra í öðrum nyt-samlegum hlutum. Eptir þessari óglöggu og skökku hugmynd um eðli og þýðingu penínganna breyttu stjórnendur í öllum þeim þjóðmálefnum, er fjárhag ríkjanna snerti; þeir gjörðu sér því alt far um það, að út yrði fluttur til annara þjóða sem mestur og dýrastur varningur, en aptur á hinn bóginn, að sem minstir yrðu aðflutningar af vöru frá öðrum þjóðum, til þess að þær yrðu tilneyddar að borga sem mest í peníngum. Í því skyni var afar-hár tollur lagður á aðflutta vöru, en ýms einkaréttindi veitt sumum innlendum verksmiðjum, þó að sú vara, er frá þeim kom, yrði landsmönnum dýrkeyptari en útlenda varan. Enn fremur lögðu stjórnendur mikið kapp á, að eignast nýlendur í öðrum heimsálfum, til þess menn gætu sjálfir aflað sér þeirra hluta, er þar fengust, en þyrftu eigi að kaupa þá að öðrum þjóðum og láta þær hafa allan ábatann. Það þótti einnig óskarad, að geta eignast auðugar námur, er veitt gætu mönnum nægtir gulls og silfors.

Á einveldistímum þeim, sem hér fara í hönd, var hagar þjóðanna einatt bágborinn, einkum fyrir þá sök, að konungar og aðrir landshöfðingjar litu miklu fremur á sjálfs síns hag og

sinna ættmanna, heldur en hvað þegnum þeirra var fyrir beztu. Saga þessa tímabils sýnir mönnum, að mörg hörmuleg stríð voru háð, einungis til að seðja drotunargirnd ýmsra konunga, og að síðustu hneig þannig og féll úr sögunni eitt fornt ríki, Pólverjaland, fyrir ójöfnuði yfirgángssamra stórbokka.

Einveldisstjórnin, sem í sjálfri sér gat verið góð og gagnleg, komst á tímabili þessu á ýmsa afvegum, og gat því eigi staðizt nema um stundarsakir. Þegnunum varð að síðustu óbærilegt að rísa undir því oki, sem ófug stjórnaraðferð, takmarkalaus eyðsla, ágirnd og ójöfnuður einveldisins hafði á þá lagt. Þeir gjöra uppreist, sú uppreist verður voðaleg og kemur af stað hinn miklu *stjórnarbyllingu* á Frakklandi, sem náði meira og minna til allra þjóða Norðurálfunnar, umskapaði í mörgu hæg þjóðanna, og gaf sögu þeirra nýja stefnu. En þó margt og mikið megi finna að þessu tímabili einveldisins, þá er það engu að síður nauðsynlegur liður, nauðsynlegt stig í framrás sögunnar, því að það jafnar hinn mikla mismun sem áður var milli stétta þjóðfélagsins. Borgarastéttin tók, þó seint gengi, talsverðum framförum í þekkingu og siðgæðum, og varð þannig miklu færari um en áður, að eiga hæfilegan þátt í stjórn alþjóðlegra málefna.

Frakkland um daga Richelieu kardinála (1624—1642).

Frá því hefir áður verið sagt¹, að Loðvík þrettándi varð konungur á Frakklandi eftir föður sinn Hinrik fjórða. Loðvík konungur var mjög ólíkur föður sínum, og, þó að hann sæti lengi að völdum — frá 1610 til 1643 — þá verður hans jafnan að litlu sem engu getið. En því merkilegri er sá maður, er um meiri hluta ríkisára Loðvíks ræð Frakklandi, og það með þeim byggindum og því þreki, að fáir stjórnendur þykja verið hafa hans jafningjar. Sá maður var *Richelieu* kardináli. Hann var borinn og barnfæddur á Frakklandi, lagði fyrst stund á hernaðar íþrótt, en hætti síðan þeirri iðju og gjörðist klerkur. Þegar hann hafði tvo um tvítugt varð hann biskup, því næst kardináli, og að síðustu ætzi ráðgjafi konungs (1624) og hélt því embætti til dauðadags, og alla þá stund var hann einvaldur maður á

1) Nýja Sagan I. bls. 127.

Frakklandi. Hann hefir sjálfur lýst að nokkru leyti stjórn sinni þar sem hann segir: «eg ræðst í ekkert nema eg hugsi vandlega um það á undan, en þegar eg er búinn að koma mér niður á því, þá held eg stefnunni beint fram, og kasta því öllu um koll sem fyrir mér verður». Þegar Richelieu settist að völdum, var Frakkakonungur reyndar eigi takmarkaður í stjórn sinni af neinum sérlegum réttindum alþýðunnar, en aðallinn eða höfðingjarnir, og flokkarnir í landinu voru geigvænlegir. Það var því mark og mið Richelieus, að brjóta aðalinn og alla flokka á bak aptur, og bæla það alt undir konungsvaldið, að því miðaði öll hans innanlandsstjórn; en hvað hina útlendu stjórn snerti, þá lagði hann á það alt kapp, að veikja sem mest Habsborgarættina, bæði á Þýzkalandi (eða Austurníki) og á Spáni, og að því leyti hélt hann fram þeirri stefnu, sem Hinrik konungur fjórði hafði bent á. Richelieu var í stórum stýl það sem Loðvík ellefti hafði verið í smáum; hann vildi gjöra konúnginn alveg óbundinn í sínu einveldi og Frakkland mikið og völdugt ríki, og honum tókst hvorttveggja.

Þess hefir áður verið getið, hversu hann fyrst með fè, síðan með mannafla studdi Svía og prótestanta á Þýzkalandi í þrjátígi ára stríðinu, til þess að eyða valdi keisarans, og að Frakkar náðu á þann hátt Elsass, hinu ágæta héraði, undir sig. Á Ítalíu urðu Frakkar einnig ofan á í viðskiptum sínum við Habsborgarmenn, og komu þar frakkneskum manni til valda í Mantúa. Hollendinga og Portúgalsmenn, sem um þær mundir áttu í höggi við Spánverja, styrkti kardínállinn og á ýmsa vegu, auk þess sem hann á öðrum stöðum þröngvaði kosti þeirra, enda hnignaði nú Spánverjum stórum. Þannig voru hans viðskipti við aðrar þjóðir, en innanlands voru aðfarir þessa mikilmennis engu minni.

Hugenottar voru mann margir á Frakklandi, einkum sunnan og vestan til í landinu. Þeir bjuggu enn að þeirri réttarbót, er Hinrik fjórði hafði gefið þeim 1598, og kend er við Nantes; höfðu ýms réttindi, áttu nokkrar borgir og þær víggirtar, og höfðu herlið fyrir sig. Þeir voru því eins konar þjóðfélag fyrir sig í ríkinu, og gátu veitt stjórninni mikla mótspyrnu ef því var að skipta. Þetta vildi Richelieu með engu móti láta við gangast. Um trúarbrögð þeirra lét hann sig litlu varða, en hitt var

honum fyrir mestu, að þeir væru konungi sínum í öllu jafnháðir sem aðrir hans þegnar á Frakklandi. Stjórnin fór því að beita hörðu við Hugennotta, t. a. m. banna þeim sumstaðar opinbera guðspjónustugjörð, sálmasöng og þesskonar, smeygja inn hjá þeim katólskum valdsmönnum, láta kristsmúnka telja þá af trúnni, og fram eptir því. Hugennottar sáu nú hvað verða vildi og gripu til vopna. Það var einmitt það, sem Richelieu vildi; var hann nú skjótur til ráða og sendi her á hendur þeim, en þeir vörðust af mikilli hreysti, einkum í borg þeirri, er Rochelle heitir, enda var hún ramlega víggirt. Richelieu fór sjálfur þangað og skipaði fyrir, og sýndi þá, að hann var hinn öruggasti til allrar framgöngu, og kunni allvel til þeirra hluta. Konungslíðið var miklu fjölmennara, hinum kom engin hjálp, því að liðveizla sú, er Englendingar höfðu heitið þeim, fór öll í handaskolum, þó vörðust borgarmenn þar fulla fjórtán mánuði, og gáfust þá loks upp (1628), er húngrið þrýsti svo að þeim, að eigi stóðu uppi nema hundrað manns, en fallnar um eða yfir tuttugu þúsundir. Sá hét *Jóhann Guiton*, er lengst og best varði borgina. Richelieu svipti Hugennotta öllum þeirra einkaréttindum, en engum þeirra lét hann refsa, og leyfði þeim að hafa fult trúarbragðafrelsi eins eptir sem áður; og var það viturlega gjört, og mjög ólíkt því, sem Ferdínand keisari gjörði á Þýzkalandi, eða Filippus þriðji á Spáni.

Þá er þessu var lokið, sneri Richelieu sér að höfðingjunum. Þeir voru að vísu orðnir færri en áður, síðan Hugennottar voru kúgaðir, því að margt af stórmenni ríkisins hafði tekið trú þeirra, en nú voru þeir úr sögunni. En samt sem áður voru margir höfðingjar eptir, sem eigi vildu mykjast láta fyrir kardínála. Þenna flokk studdi María af Medicis, ekkja Hinriks fjórða, og yngri sonur hennar Gaston af Orleans, bróðir Loðvíks þrettánda. Allir töldu Gaston sjálfsagðan til ríkis eptir Loðvík, því að konungur hafði verið kvongaður í margt ár, en var barnlaus þá hér var komið. Gaston var, eins og Loðvík bróðir hans, ólíkur sínum föður, enginn garpur, en óeirðarmaður mikill og ótryggur sínum vinum, og hlutu margir af honum illt eitt. Þau María og hann reyndu á allar lundir að steypa kardínála úr völdum, bæði með því, að rógbera hann við konunginn, og leggja fyrir hann ýmsar tálsmörur, en kardínállinn sá við öllum þeirra vélabrogðum, og

koma þau eigi sínum vilja fram þann veg. Þá fengu þau lið í öðrum löndum, og ætluðu að hafa það fram með mannafla, er eigi varð með svikum unnið; en það fór á sömu leið. Richelieu bar herra blut í þeim viðskiptum. Ekkjudrotningin varð að flýja af landi burt og láta fyrirberast í Köln á Þýzkalandi, og lifði þar við fátækt það sem eftir var æfinnar. Gaston var tekinn í grið og sættir, en ýmsir merkir menn voru þá af lífi teknir, og var einn af þeim *Montmorency* hertogi; hörmuðu hann margir menn, því að hann var vinsæll.

En þó að Richelieu hefði tekizt að kúga Hugonetta og stórmenni það, sem nú var talið, og þann flokk allan, er því fylgdi, þá voru enn eftir *embættismennirnir*, og þeir voru stjórninni hinir erfðustu viðfánga. Það hafði lengi viðgengizt á Frakklandi, að embættin voru seld dýrum dómum, til þess að fá fé og auðga ríkissjóðinn, gengu síðan embættin í erfðir, en þó urðu mena að greiða konungi eftir þau nokkurt gjald á ári hverju. Það voru einkum ríkir borgarar, er embættin höfðu keypt, og myndaðist af þeim mönnum öllum saman nokkurskonar embættis — eða *valdsmanna-aðall*; treystu þeir á auð sinn og uppheld, og vildu í engu vægja fyrir kardinála, en gjörðu margt í móti hans vilja. Oddviti þessa aðals var «parlamentíð» í París, ætli dómur ríkisins. Þegar nú Richelieu lagði skatta á laudið, án þess að kveðja þjóðfulltrúa til þings og fá þeirra samþykki, beitti parlamentíð þeim rétti, sem það hafði haft frá fyrri tíð, og færðist undan að rita boðorð konungs í bækur sínar, en þessa þurfti þó við til þess að gefa þeim lagagildi. Lét Richelieu þá taka dómsforsetann og nokkra af dómendum fasta og reka í burtu um stundarsakir, og þá varð parlamentíð að láta undan og gjöra sem kardináli og konungur vildu. Stundum bar það við, að Richelieu kvaddi þá menn, er honum leizt, í dóm til þess að dæma ýms mál, er að réttu lagi lágu undir parlamentíð, og tók þannig fram fyrir hendur þess. Hann tók og það til bragðs, til þess að skerða vald og virðingu embættismanna, að hann setti aðra menn, er honum einum voru háðir, til þess að hafa á hendi fjárheimtu og ýms ónær valdsmanna störf út um ríkið.

Þannig kollvarpaði eða eyddi Richelieu öllum þeim mótspyrnum, er á leið hans urðu, bæði utanlands og innan. Hann

stóð einn og enginn studdi hann nema veikur og þreklítt konungur, er þar á ofan var enginn vinur hans; en Loðvík sá, að hann gat eigi án hans verið, og að hann einn, en enginn annar, gat stýrt Frakklandi og aukið veg þess og vald; fyrir því lét hann sér nægja að bera konungsnafnið, en vandann af þeirri vegsemd fékk hann Richelieu að öllu leyti, enda var honum sú byrði eigi um megn, og þó að flestum stæði ótti af honum, urðu allir að játa, að hann væri fárra maki að vitsmunum og dugnaði. Richelieu andaðist á ofanverðu ári 1642 og skorti þá tvo vetur á sextugann. Loðvík konungur dó nokkrum mánuðum síðar.

Frakkland frá 1643—1661. Mazarín kardináli ræður þar mestu.

Að Loðvíki þrettánda látnum var Loðvík sonur hans til konungs tekinn og nefndur hinn *fiórtándi*. Hann var þá 5 vetra gamall, og bar því konungsnafnið um 72 ár, eður frá 1643 til 1715. Meðan hann var í bernsku hafði drotníngin Anna, móðir hans, ríkisstjórnina á hendi, og 6 menn með henni, eins og Loðvík þrettándi hafði fyrirskipað áður hann lézt; einn af þeim stjórnarmönnum var sá maður, er *Mazarín* hét. Hann var ítalskur að ætt og uppruna, og fæddur 1602. Hann hafði alizt upp hjá kristmúnkum og þótti snemma frábær að vitsmunum, gekk síðan í herþjónustu páfars, en kyntist við Richelieu þau árin, sem deilurnar stóðu um völdin í Mantúa. Þótti Richelieu svo mikið að honum kveða, að hann fékk Mazarín til að fara alfarið af Ítalíu og ganga í þjónustu Loðvíks þrettánda. Árið 1641 varð Mazarín kardináli, og það var að ráðum Richelieus, að Mazarín var tekinn í tölu ríkisstjórnanna eptir lát konungs.

Nú þegar hér var komið, vildi aðallinn og parlamentið í París, sem þóttust hafa orðið undir í viðskiptum sínum við Richelieu, kollvarpa því öllu, er hann hafði á fót komið, en ná aptur því valdi, er hann hafði frá þeim tekið. Fyrir þá sök var því nú yfir lýst, að fyrirskipan konungs um ríkisforráðin skyldi vera ógild, en í þess stað skyldi drotníngin ein stýra ríkinu, og kjósa sér ráðgjafa að því skapi, er henni þætti best hlýða. En sú von, sem höfðingjar og parlamentið hafði gjört sér, brást þeim algjörlega, því að drotníngin vildi í engu slaka til, eða

skerða konúgsvaldið; hún vildi að alt skyldi sitja við sama sem verið hafði meðan maður hennar lifði; Mazarín skyldi vera fyrir öllum stjórnarstörfum, en hafa þó eigi eins mikil yfirráð, eins og Richelieu hafði haft, meðan hann var uppi.

Um þessar mundir stóð þrjátígi ára stríðið á Þýzkalandi, og alla þá stund þoldu höfðingjarnir á Frakklandi yfirráð Mazaríns. En þegar vestfalski friðurinn var fenginn (1648), og Frakkar orðnir sáttir við keisarann og Þjóðverja, þá hófst innanlands ófriður á Frakklandi. Var sá ófriður einkum til þess stofnaður að reka Mazarín úr völdum; annars vegar var stjórnin og þeir menn af hirðlýðnum er henni fylgdu, en hins vegar parlamentið og höfðingjarnir út um landið. Ófrið þenna, er stóð frá 1648 til 1653, hafa menn nefnt *Fronde-stríðið*, því að hirðmenn kölluðu mótstöðumenn sína af háði: «*frondeurs*» (þ. e. slöngumenn). En þó að margt manna félli í óeirðum þessum, snertu þær þó öllu fremur stjórnina og höfðingjana heldur en alþýðu manna í landinu. Meðan á þessum óeirðum stóð, varð Mazarín kardináli tvisvar að fara af landi burt, en ekkja Loðvíks þrettánda (Anna drottning) og Loðvík 14. sonur hennar voru vinir hans fullkomnir, og bæði fyrir þá sök, og af sjálfs síns staðfestu og slægvizku, komst kardinállinn heim aptur og settist í völdin, eins og ekki hefði í skorizt. Tveir hinir frægustu hershöfðingjar Frakka, er þá voru uppi, tóku þátt í þessum ófriði og voru hvor á móti öðrum: prinzinn af *Condé* foringi slöngumanna, en *Turenne*¹ fyrir konungsmönnum. Fóru viðskipti þeirra svo, að Condé sá sitt óvænna, bæði af því, að menn hans reyndust miður öruggir en konungslíðið, og einkum af því, að Mazarín beitti öllum brögðum til að ginna þá frá honum, enda var Condé naumast jafnangi Turennes þegar á alt er litið. Borgarmönnum í París leiddist ófriðurinn, og sáu reyndar sem var, að leikurinn var fremur til þess gjörður, að stórmenni ríkisins hefði gott af sigri, ef hann fengist, heldur en alþýða manna; þess vegna vildu þeir heldur konúgsvaldið, en höfðingjavaldið, og buðu konungi að koma til Parísar, hétu honum trú og hollustu og tóku honum fegins hendi þegar hann kom þangað (1653). Condé varð að flýja af landi burt, og gekk í lið með Spánverjum, er um þessar mundir áttu ófrið við Frakka.

1) Sjá Nýju söguna I. bls. 222 og 223.

Þannig tókst Mazarín að sigrast á mótstöðumönnum sínum og stjórnarinnar, og kom þar fram bæði ráðfesta hans og vitsmunir. Var þetta hin síðasta tilraun, er höfðingjar og heldri menn gjörðu, til að sporna móti einveldinu á Frakklandi, en þegar hún mistókst, eins og nú var sagt, þá voru einveldinu engar skorður settar úr því. Alþýðan var margkúgað og orðin sinnulaus um alt annað en daglegar lífsnaðsynjar; mikill fjöldi höfðingja og helztu manna var fallinn, bæði fyrir vélum og ofríki sumra undanfarinna konunga, og í þeim ýmsu stríðum og styrjöldum, sem Frakkar höfðu átt að mæta utanlands og innan; en hina, sem eftir lifðu, hafði Richelieu kúgað, og Mazarín tekið við af honum og haldið fram sömu stefnu. Hér var því búið að undirbúa flest í hendur á Loðvíki fjórtánda, og var honum hægt að hagnýta sér það eftir því sem hann hafði vit og vilja til. Þó konungur hét nú kominn til lögaldurs, þá er hér var komið, var hann þó elgi nema 16 vetra, og lét því Mazarín ráða hartnær öllu; en Mazarín lét eigi sitt eftir liggja að innræta þessum lærisveini sínum, hve naðsynlegt það væri, að vilji konungsins væri þegnanna fyrsta og æzta lögmál, og hans hagur það mark og mið, sem þeir ættu eftir að keppa. Þegar Mazarín þóttist fullfastur í sessi, gjörðist hann djarfari og ráðríkari í völdum en hann hafði áður verið, og þorði enginn í móti að mæla. Hann fór með æztu embættismenn ríkisins eins og þeir væru þjónar hans; hann lét þá skýra sér frá þjóðmálsefnum heima hjá sér, á meðan hann klæddist, eða rakaði sig, eða lék sér við apaketti sína, og enginn mátti sitja, heldur urðu allir að standa, meðan hann sjálfur var við staddur. Ekkjardrotningunni þótti nóg um stórmensku hans, en Mazarín gaf því lítinn gaum, en sá um hitt, að geðjast hinum unga konungi og láta eftir honum sitthvað sem honum þótti girnilegt. Þó gætti Mazarín ávallt þess, að taka í taumana, ef hann hugði að konungur mundi brjótast í eitthvað, sem orðið gæti virðingu hans eða vegsemd ríkisins að ógagni. Því var það, þegar konungur vildi eiga Maríu Mancini, systurdóttur kardinálans, að hann sagðist fara burt af Frakklandi ef sá ráðahagur tækist. «Eg er svo gjarn til metorða og allrar upphefðar, sagði Mazarín, sem réttsýnum manni hæfir, og fer ef til vill lengra í þá átt, en góðu hófi gegnir. Eg ann frændkonu minni, en þó ann

eg enn meir Frakklandskonungi, og eg met sæmd yðar og velferð ríkisins meir en alt annað í heimi þessum. Mazarín hafði ætlað Loðvíki fjórtánda alt annan ráðahag. Filippus fjórði Spánar konungur átti tvö börn: *Maríu Theresíu* og Karl, er síðan varð konungur á Spáni, og nefndur Karl annar. Karl þessi var heilsulaus, og eigi fyrir að sjá, að hann mundi verða lánglífur eða eignast afkvæmi. Gæti það nú orðið framgengt, að Loðvík kvongaðist Maríu, þá stóð hann næstur til ríkiserfða á Spáni að Karli dauðum; þá var Spánn og Frakkland komin undir einn konung, og slíku stórveldi urðu þá allar þjóðir að lúta. Með þessum hug og þessari fyrirætlan vildi því Mazarín enda hinn langvinna ófrið, sem verið hafði milli Spánar og Frakklands. Hin síðustu ár þar á undan höfðu Spánverjar farið mjög halloka norður í Niðurlöndum fyrir Turenne, og það hefði verið þar úti um þá, ef Condé hefði eigi verið í hði þeirra. Árið 1659 var farið að leita um sættir. Það sem helst varð til fyrirstöðu að saman gengi með mönnum, var það, að Spánverjar kröfðust, að Condé fengi aptur allar eigur sínar og öll sín réttindi á Frakklandi, er hann hafði þar haft. Því næst lögðu menn stefnu með sér á Fasaney í ánni Bidassóa; sú á kemur undan Pyreneafjöllum á landamærum Spánar og Frakklands og fellur norður til sjóar. Var Mazarín fyrir hönd Frakkakonungs, en Luis de Haro af hendi Filippusar fjórða. Tjald var sett á miðri eyggi, og stóð annar helmingur tjaldsins á spánskri lóð, en annar á frakkneskri, og tvídyrað tjaldið, svo þeir Mazarín gætu gengið báðir jafnsnemma í tjaldið, en hvorigur á undan eður eptir; sinn stóllinn stóð á hverri lóð í tjaldinu, og töluðust erindrekarir þannig við yfir landamerkin. Á þenna hátt þótti tign beggja konunganna borgið. Nú komst friður á þetta sama ár (1659) milli landanna, og er nefndur *Pyreneafriður*; komst þá *Artois* (það er norðan og vestan á Frakklandi) og fleiri hærð undir Frakkland, en *Rousillon* og *Perpignan* suður í landi; Loðvík Frakka konungur skyldi fá Maríu Theresíu¹, en sleppa öllu tilkalli fyrir sig og hennar hönd til ríkiserfða á Spáni. Gekk Mazarín að þeim kostum, og voru eiðar að því unnir, að þeir skilmálar skyldu allir haldnir verða. Condé fékk leyfi að koma aptur til Frakklands

1) Þau Loðvík og María voru systkinabörn, en Filippus þriðji Spánarkonungur af þeirra beggja.

og setjast að sinni eign. Eptir þetta gjörði Loðvík konungur brúðkaup sitt til Maríu Theresíu, og var nú kyrt um hríð. En það er frá Mazarín að segja, að þá er hann kom heim aptur úr för þessari, var hann sjúkur orðinn, og dróg sá sjúkleiki hann til dauða. Hann ræð konungi ýms ráð, og þar á meðal að gjöra þann mann að fêhirði ríkisins, er *Colbert* hét, en hafa engan ráðgjafaforseta (Premierminister); hann gaf mörgum stórgjafir, því að hann var vellauðigur maður, og andaðist eptir það á öndverðu ári 1661 á 59. aldursári. Loðvík konungur bauð hirðmönnum sínum að klæðast sorgarbúningi, þá er Mazarín var dáinn, en glaður varð hann þó í hjarta af því, að vera nú laus orðinn við þenna læriföður sinn, og hafa frjálsar hendur til hvers er vera skyldi.

England um daga Karls fyrsta (1625—1649).

Konúngsvaldið hafði á Englandi, eins og víða annarstaðar, stórum aukizt og magnast á 16. öldinni. Í *rósastríðinu* höfðu aðalsmenn fækkað svo mjög, að mælt er, að eigi hafi nema 27 barúnar átt þingsetu í lávarðastofunni á dögum Hinriks sjöunda. Túdorarnir kreptu að vísu að kosti aðalsmanna, ef krúnan átti annars vegar hlut að máli, en aðalsmenn undu þó allvel yfirráðum þeirrar konúngsættar. Þannig lét Hinrik áttundi þá hafa jarðir miklar að lèni, er hann hafði tekið af klerkunum, og Elísabet drotning varð svo vinsæl af stjórn sinni, að menn gleymdu því, þó hún yrði stundum ráðrík í frekara lagi. Borgarastéttin var orðin stórauðug af verzlun sinni og allskonar starfsemi. Með velmegun þjóðarinnar og því frelsi og sjöri andans, sem siðabótin hafði kveikt, óx þjóðinni hugur og dugur, og þegar Jakob var seztur að völdum, og vildi beita konúngsvaldinu eptir því sem illur andi blès honum í brjóst, þá þoldi þjóðin það ekki og gjörði honum mótspyrnu. Og það veitti henni því hægra á Englandi en annarstaðar, sem hún hafði forn réttindi fyrir sig að bera, því að þjóðrættindin á Englandi voru rótgróin framan úr miðöldum í ýmsu sérstaklegu stjórnarfyrrirkomulagi þar í landi; þannig var skattálöguvaldið eingöngu í höndum parlamentsins (þjóðþingsins), eða reyndar alþýðustofunnar¹, og bæði þjóð og þing gætti þess vandlega, að þeim réttindum yrði

1) Miðaldasagan bls. 133, 134 og 168.

eigi raskað af konúingi. Tekjur þær, sem Jakob konúngur hafði, voru í minna lagi og brukku eigi til útgjalda hans, en þegar hann leitaði fjárframlögu hjá þínginu, þá var henni neitað. Af þessu kviknaði kali milli konúngs og þíngmanna, en þó tók verra við þegar sonur hans *Karl*, hinn fyrsti með því nafni, var seztur að ríki (1625—1649), því að þá bættust þar á ofan deilur út af trúarbrögðunum.

Karli konúingi var sumt vel gefið, og hann var án alls efa meiri maður í mörgu en faðir hans, en það hafði hann erfð af honum, að honum þótti konúngstignin svo helg og háleit, að hennar réttindum mætti ekki takmark setja, og sú var lund þeirra allra *Stúartanna*. En þar á ofan hafði Karl þann ókost, að hann vantaði nægan kjark og staðfestu í viljann, hann var ótryggur í öllum sínum loforðum, og máttu menn því eigi treysta orðum hans, og hann fór einlægar krókagötur til þess að ná takmarki sínu. Alt þetta tilsamans varð honum að fótakefli og olli að síðustu hans hörmulegu afdrifum. Sama vorið sem faðir hans dó, kvongaðist Karl og átti Henriettu dóttur Hinriks fjórða Frakkakonúngs. Hún var katólsk. Englendingum geðjaðist illa að því, þegar hún kom og fjöldi katólskra manna með henni; sögðu þeir, að nú væri «antikristur» kominn yfir sundið og genginn þar á land. Þeir sáu það skjótt, að konúngur var mjög vinveittur katólskum mönnum, og að hann vildi einn öllu ráða, enda hafði hann fast í huga að verða einvaldur konúngur. Það jók heldur eigi á vinsældir hans, að Buckingham hertogi, sem áður er getið, hafði öll hin sömu völd sem áður meðan Jakob konúngur lifði, en menn kendu Buckingham um alt hið illa. Konúngur hugði að það mundi bæta samlyndið milli sín og þjóðarinnar, ef hann veitti Hugennottum á Frakklandi hjálp, sem um þær mundir voru mjög aðþrengdir af Richellieu. Sendi konúngur því skipaflota mikinn til liðs við þá í Rochelle, en sú liðveizla kom þeim að litlu haldi, og meðan á því stóð, að nýr og annar floti legði út frá Portsmouth, var Buckingham drepinn. Þessi tilraun konúngs varð honum þannig að engu gagni, óvildin gegn honum fór vaxandi. Þá tók konúngur það til bragðs, að beita hörðu, og hleypti upp þínginu hvað eptir annað, og þar kom, að hann kvaddi menn eigi til þíngs, og stóð svo um ellefu ár (1629—1640), að hann stýrði landinu einn, án þess nokkurt

parlament ætli sér stað allan þann tíma. Konungur felaði þannig í fótspor hinnar frakknesku stjórnar. Þegar Buckingham var dáinn, gjörði konungur þann mann að æðsta ráðgjafa sínum, er *Wentworth* hét, og síðan varð greifi og þá nefndur *Strafford*. Hann lagði á það alt kapp, að gjöra konungsveldið sem styrkast og auka veg þess og virðingu í augum þjóðarinnar; vildi hennar gagn að vísu, en hitt þótti honum óþarft, að hún ræði nokkru sjálf um sína hagi. Kirkjumálefnum öllum stýrði sá maður, er *Laud* hét; hann var erkibiskup í Kantaraborg, og í flestu hinn merkasti maður, en ráðríkur mjög og sannfærður um það, að engin stjórn væri rétt, eða í raun og veru þjóðinni holl, nema óbundin einvaldsstjórn. Þessvegna var honum við ekkert eins illa eins og þá trúarbragðaflokka, sem eigi fylgdu biskupakirkjunni¹, því að þeir viðurkendu eigi konungsins yfirráð í kirkjunnar málefnum, t. d. Presbyterakirkjan á Skotlandi og *Purítana*-flokkurinn á Englandi. Biskupakirkjan er, eins og menn vita, þjóðkirkja á Englandi, og hefir konungur og biskuparnir hið æzta vald kirkjunnar eptir hennar setningum, og hún nálgast í mörgu hina katólsku kirkjusiði. Presbyterakirkjan er þjóðkirkja á Skotlandi, henni stýra prestarnir og elztu menn safnaðanna, en konungur hefir þar engin umráð yfir. Purítanarnir fylgdu aðalsetningum presbyterakirkjunnar, en vildu þó vera miklu sjálfráðari en þeir í mörgum greinum. Þeir vildu engar hátíðir hafa nè helga daga, nema sunnudaginn einn; engin ölturu, enga skírnarfonta, ekki klukkur, eða orgel, eða messuklæði, heldur að öll guðspjónustugjörð þeirra væri án allrar útvortis viðhafnar og prjáls. Að kirkjan væri háð konungi eða biskupum, eða í nokkru undir ríkisstjórn gefin, það var viðurstygd í þeirra augum. Og voru þeir hinir mestu ákafamenn í trúarmálefnum. Á dögum Elísabetar drottningar voru Purítanar nýkomnir til sögunnar. Drottning vildi enga útúrdúra hafa í trúarefnum, en allir skyldu fylgja þjóðkirkjunni (biskupakirkjunni); stukku þá margir Purítanar af landi burt, og settust að á Niðurlöndum og héldu þar trú sinni í næði. Sá maður, sem Jón Robinson hét, gjörðist þar forstöðumaður þeirra og setti fastar reglur fyrir trú þeirra; var ein aðalreglan sú, að hver söfnuður, hversu fámennur sem væri, skyldi vera öllum öðrum kirkjum, eða annarlegum yfirráðum ó-

1) Sjá Nýju söguna I, bls. 89.

háður (*independens quoad alias ecclesias*). Þar af er nafnið «*Independent*» komið, er þessi trúarbragðaflokkur síðan nefndist, þá er hann kom aptur til Englands á dögum Jakobs fyrsta, hér um bil 1616. Þessir menn stóðu langtærstir þjóðkirkjunni, og þoldu engin yfirráð yfir sér í andlegum efnum, þeim var jafnilla við safnaðastjórnina (Presbyterana) á Skotlandi, eins og hina katólsku kirkjustjórn, þar sem hún átti sér stað; í veraldlegum efnum vildu þeir þjóðstjórn eina, en hvorki heyra konunginn né sjá.

Af þessu er það nú ljóst, að mikillar mótstöðu mátti vænta ef konungur og erkibiskup vildu þröngva öllum þessum frábrugðnu trúarbragðaflokkum undir vald þjóðkirkjunnar á Englandi. Það var því að eins gjörandi, að konungur hefði parlamentið með en eigi í móti sér, og væri að öðru leyti vinsæll af þjóðinni; en því fór fjarri að svo væri. Hann hafði um nokkur ár stýrt landinu sem einvaldur konungur og án þess að kveðja þjóðfolltrúana til þings; hann seldi sumum mönnum móti ærnu fæ ýms einkaleyfi; hann lagði þúngar fæsektir á aðra, og honum var fremst í huga, að koma sér upp *fastaliði*, eins og víða tíðkaðist í öðrum löndum, en hafði aldrei átt sér stað á Englandi, og með þessu liði ætlaði hann sér, að koma einveldinu á fastan fót. Fáir menn mæltu í móti þessum aðförum konungs, og gekk svo um hríð, að eigi var annað sýnna, en að hann mundi koma sínum vilja fram.

En þá kom það fyrir, er breytti málefnum manna, og gaf þeim alt aðra stefnu en að undanfögnu. Það var viðureign Karls við Skota.

Skotum var hlýtt til hans í þeli niðri, og létu hann njóta þess, að hann var af Stúarta ætt kominn. Parlamentið á Skotlandi var honum auðvelt í öllum viðskiptum; aðalsmenn ræðu mestu á því þingi, en þeir voru konungi allmjög háðir. En þjóðkirkjan þar í landi (presbýterakirkjan) var honum alveg óháð; og þegar nú konungur og erkibiskup vildu hreyfa við henni, og breyta henni, og setja á hana sama snið eins og var á hinni ensku kirkju (biskupakirkjunni), þá urðu Skotar uppvægir, þá var komið við hjartað í þeim, og varð alt í uppnámi á Skotlandi. Skotar stofnuðu hjá sér eitt mikið félag, sem þeir kölluðu «*Covenant*», til þess að verja þjóðtrú sína og þjóðfrelsi (1638), og

ári síðar varð af því fullur fjandskapur og vopna viðskipti milli Skota og konúngs. Karl var bæði liðsár og félítill, og varð því að hopa undan, en Skotar héldu liði sínu yfir landamæri og suður á England. Nú krepti svo að konúngi, að hann varð að brjóta odd af oflæti sínu og kveðja menn til þings á Englandi (1640), til þess að geta náð sköttum og skyldum af landsfólkinu, gjört út her, og jafnað á Skotum. Voru þá liðin 11 ár síðan þjóðþingið (parlamentið) hafði verið kallað saman og átt fundi með sér, og þótti mönnum nú vænkast raðið. Það var þá áform flestra þingmanna, að ráða bót á helztu vandræðum, en forðast hitt, að raska landsfriðnum og stofna þjóðinni í nokkurn ófrið eða hættu. Konúngur kvaðst þurfa 800 þúsundir punda sterlíngr (þ. e. hér um bil 7,200,000 rd.) til hersins og sinna þarfa, og mundi sú fjárbeiðsla hans að líkindum hafa fengið framgáng á þinginu, ef einn af ráðgjöfum hans hefði eigi verið svo óaðgættinn í orði, að segja: að konúngur vildi annaðhvort ekkert hafa eður alt, sem hann beiddi um. Harðnaði nú ræðan, svo að þar kom, að konúngur sagði þinginu slitið, og lét varpa þeim í dýflissur, sem harðast mæltu í móti honum. En auðvitað var, að eigi mundi samlyndið batna við slíkar aðfarir, enda varð nú gremja manna almenn, og sumstaðar í höfuðborginni (Lundúnum) uppreist og barsmíðir. Nú var eigi framar hugsandi til, að konúngur fengi fè hjá þinginu, og urðu þá sumir til af ráðgjöfum hans, hirðmönnum og klerkum, að veita honum að gjöf eður láni nokkurt fè, svo að með því gat hann safnað liði og farið í móti Skotum, en menn hans biðu ósigur, og hörfuðu undan suður í land (1640).

Þegar hér var komið, kveið konúngur því mest, að óvildarmenn hans á Englandi mundu slást í lið með Skotum, og var það meira ofurefli en að hann gæti rönd við reist, þess vegna fór hann að leita um grið og sættir við Skota. En áður þeim málum væri lokið, lögðu vinir hans á Englandi fast að honum, og beiddu hann kveðja menn til þings að nýju, og reyna hvort eigi næðist fullt samlyndi og friður með því móti. Konúngur lét að orðum þeirra og kvaddi menn á þing það sama ár. Þetta nafnkenda þing er kallað í sögunni: *Parlamentið lánga*, og auðnaðist Karli konúngi eigi að sjá fyrir endann á því (það stóð frá 1640 til 1653). Parlamentið skiptist, eins og áður er sagt,

í tvær deildir: lávarða- eða efra húsið, og alþýðu- eða neðra húsið. Þingmenn í neðra húsinu voru flestir óvinir Karls, og margir þeirra af Púrítana flokki. Þingdeild þessi gjörði þá ýms nýmæli, er öll lutu að því að takmarka konungsvaldið, var það eitt: að þjóðþing skyldi haldið þriðja hvert ár, til þess að konungur gæti eigi árum saman, eins og að undanfögnu, verið einn um ríkisstjórnina. Greifinn af Strafford var ákærður, dæmdur til dauða og tekinn af lífi (1641), og gat konungur eigi bjargað honum þó hann vildi. Laud erkibiskup var einnig settur í dýflissu og líflátinn nokkrum árum síðar. Konungur varð að ganga að þeim kostum, er undirhúsið setti honum, og voru nú miklar líkur til, að alt mundi jafna sig og friður verða í landi.

En það kom hér fram sem optar, að konungur var sviklyndur, og efndi illa orð sín, því að litlu síðar lét hann höfða landráðasök á hendur nokkrum þingmönnum úr undirhúsinu, og ætlaði jafnvel með ofríki og hershöndum að ná þeim þaðan og á sitt vald, en því varð þó afstýrt. Af öllu saman þessu æstist þingið og þjóðin svo að konungi varð eigi lengur vært í Lundúnaborg; hélt hann þá norður til Jórvíkur (York) og hafði þar liðsafnað. Parlamentið safnaði einnig liði, og þannig hófst borgarastríðið 1642. Konungi fylgdi meiri þorri aðalsmanna, klerkar þjóðkirkjunnar á Englandi og allir katólskir menn, en með parlamentinu stóð alþýðan, bæjarmenn í öllum hinum stærri borgum og presbyteraflokkurinn allur; veitti konungsmönnum í fyrstu betur, því að þeir voru vopnum vanir og höfðu allgóða fyrirliða.

En þetta breyttist alt, þegar sá maður kom til sögunnar, er *Oliver Cromwell* er nefndur. Hann var fæddur á ofanverðum dögum Elisabetar drottningar (1599) í borg þeirri á Englandi, er Huntingdon heitir; hann var af góðum ættum, en þó var faðir hans enginn auðmaður. Framan af æfni fékst Cromwell við bókmentir, en þótti ærið svallsamur og gjarn á óeirðir, og eyddi öllu því, sem hann átti. En þá tók hann sinnaskiptum, gjörðist trúmaður, og fylgdi í þeim efnum Púrítanaflokki af miklum áhuga, því að maðurinn var ákafamaður í skapi. Um þær mundir kvongaðist hann, settist um kyrt á landsbygðinni, og hugsaði þá mest um búsyслу og trúarbrögðin. Árið 1628 var hann kosinn þingmaður af sveitúngum sínum; gekk hann af miklum áhuga að öllum þingstörfum, en þar þótti mjög lítið að honum

kveða, því að bæði var hann ófríður sýnum, enginn snyrtimaður í hegðun, mælskumaður lítill, og málrómurinn mjög óþýður. En því minna sem hann hafði sér til ágætis hið ytra, því undrunarverðara er hið innra andlega afl, sem þessum sjaldgæfa manni var veitt, og allir urðu að lúta. Hann fann sjálfur, að honum var síður lagið að vera þingmaður, en sannfæring hans í trúar-efnum knúði hann þó til, að bera fram á þingi sakir á hendur ýmsum biskupum um fylgi þeirra við katólka siðu; og harðstjórn sú, er Laud erkibiskup beitti við Púrítana, þótti Cromwell svo óþolandi, að hann einsetti sér að fara af landi burt með alt sitt og seljast að í Ameríku. Hann og margir aðrir, sem með honum ætluðu að fara, voru búnir til ferðar, en konungur setti þá þvert bann fyrir útför þeirra, og við það settist Cromwell aptur, en sagði um leið: «þessa skal Karl Stúart einhvern tíma iðrast». Upp frá þessu einsetti Cromwell sér að berjast í gegn konungi og hverjum þeim, er þröngva vildi trúarfrelsi sínu og annara, er honum fylgdu; hann einsetti sér að ná því frelsi heima á Englandi með vopnum, ef annan veg gæti eigi gengið, er hann hafði ætlað sér að ná og njóta með friði og spekt vestur í Ameríku. Cromwell var kominn yfir fertugt, þegar innanlandsófriðurinn hófst á Englandi (1642), sá sem fyr var getið. Hann hafði alla þá stund, sem af var æfi hans, lifað í kyrð og friði, og þekti hvorki vopn eður vígaserli. Nú er hér var komið (1643) safnaði hann nokkrum hersveitum austan á Englandi, og bjóst að fara til liðs við þingmannaherinn (parlamentíð). Þeir menn, sem réðust í flokk með Cromwell, voru flestir ríkra manna synir, er engan mála vildu þiggja, en allir voru þeir harðsnúnir og ákafameñn miklir í trúarefnum eins og Cromwell. «Ef eg mæti konungi á vígvellinum, sagði Cromwell, veiti eg honum bana eins og hverjum öðrum, fái eg því við komið; þori einhver yðar eigi það að gjöra, getur sá hinn sami eigi verið með mér eða mínum mönnum». Bráðum komst mikið orð á herflokk þenna sökum hreysti hans og framgöngu, og sögðu menn alment, að engum hersveitum væri eins vel stýrt, eins og þeim er Cromwell réð fyrir. Nú hélt hann þessu næst með sína menn til móts við parlamentsliðið, sem þá var vestur í landi, og fyrir því sá höfðingi, er *Tómas Fairfax* hét, hraustur maður og góður drengur. En þó að Fairfax væri reyndar yfirhöfðingi alls þess

liðs, er stóð í móti konúngi, þá kom þar bráðum, að Cromwell reð mestu, því að hann var í öllu einbeittari og ákafamaður miklu meiri en Fairfax; enda tók nú meginþorri liðsins sér snið eptir Cromwell og hans mönnum; urðu nú «Independentar» (þ. e. óháðir menn) mestu ráðandi bæði í hernum og heima í parlamentinu, eins og við var að búast, þar sem Cromwell var fyrirliði þeirra; það þarf eigi að undra, þó slíkir menn yrðu sigursælir í orustum, því að þeir höfðu þá trú — er Cromwell innrætti þeim mest og bezt — að þeir berðust fyrir guðs sakir, og að þeir væru verkfæri í hendi forsýðnarinnar til þess að vernda trú og frelsi þjóðarinnar. Um þær mundir hafði konúngur tvískipt liði sínu. Var annar hlutinn norður við Jórvík, og *Newcastle* lávarður fyrir því liði, en hinn hlutinn suður við Oxford, og konúngur sjálfur fyrir því. Þeir Fairfax og Cromwell settust um Jórvík og vildu ná þeirri borg, en sem konúngur fréttir það, sendir hann *Rúpert* systurson sinn (son Friðriks af Falz þess, er ósigurinn beið á «fjallinu hvíta» 1620¹), með öllu því liði, er hann mátti missa, til hjálpar við Jórvíkur-menn. Rúpert var hinn mesti fullbugi, og hafði opt unnið konúngi mikið gagn, en hann þótti nokkuð fljótsær í ráðum. Þegar Rúpert kom norður þangað, hættu þeir Fairfax umsátinni; og þótti þá flestum hinum hygnari mönnum, að Rúpert hefði komið fram sínu erindi; en honum þótti helzt of lítið aðgjört, og fyrir því veitti hann þingliðinu þegar aðgöngu (2. júl. 1644), þar sem heitir *Marstonmoor*; varð þar hin harðasta orusta, og lauk svo, að konungsmenn flýðu. Þann sigur þökkðu menn einkum Cromwell.

Parlamentið hafði enn sem komið var mikil umráð yfir hernum, því að margir göfugir menn úr efri deild þingsins höfðu gripið til vopna og gjörzt fyrirliðar; en það var eigi að Cromwells skapi. Hann sagði, að seint mundi konúngur verða unninn, ef þingmenn reðu mestu. Þess vegna lagði einn maður það til á þingi, — eptir ráðum Cromwells, að því er menn ætla — að það yrði gjört að lögum, að enginn þingmanna mætti hafa herstjórn á hendi, og varð þeirri tillögu framgengt. Allir þingmenn, sem herstjórnarvöld höfðu á hendi, urðu nú að leggja þau niður. Fairfax var eigi þingmaður, og gat því verið yfirhöfðingi liðsins eptir sem áður. Cromwell var þingmaður, og átti að

1) Nýja Sagan I. bls. 184—186.

rétu lagi að hætta herstjórn, sem hinir aðrir, er eins stóð á fyrir; en menn sögðu, að hann mætti sízt missa frá hernum, og fyrir því var hann þar kyr, en lögin voru engu að síður brotin. Þannig hafði Cromwell fram það sem hann vildi, en það var að ná öllu framkvæmdarvaldinu úr höndum hinna gæflyndari manna og Presbýtera-flokksins, en gjöra herinn einan alsráðandi.

Þó að konungur hefði enn allmikið lið, reyndi hann um veturinn eptir orustuna á Marstonmoor, að semja frið við parlaméntið. Presbýterar og ýmsir aðrir voru eigi ófúsir til sátta, því að þeim var farinn að standa stuggur af ákefð og yfirráðum Independenta; en þessi flokkur var fjarlægur öllum samningum og sáttum, og var svo því máli lokið. Um vorið eptir bjuggu hvorirtveggja lið sitt, og tókst ófriður að nýju. Konungur var með liði sínu norður í landi, og stefndi því móti Skotum, en þeir Fairfax og Cromwell eltu hann sunnan og náðu honum (14. júní 1645) við bæ þann, er *Naseby* heitir; það er á Norðymbra-landi. Konungur var liðfærri og vildi eigi berjast þá þegar, en fékk eigi ráðið fyrir ákefð sinna manna. Unnu þeir Cromwell þar mikinn sigur, en konungur flýði. Eptir þessar ófarir krepti svo mjög að konungi, að hann varð að flýja England, og tók hann þá það til bragðs að leita á náðir Skota, því að hann hugði, að þeir mundu láta sig njóta þess, að hann var skozkur að ætt og borinn þar í landi og barnfæddur. Um vorið 1646 komst hann um síðir alla leið norður þangað sem Skotaher sat í herbúðum sínum; tók hershöfðinginn vel í móti konungi og veitti honum allan sóma. En er parlaméntið í Lundúnum varð þess vart, að konungur var undan flúinn og að Skotar höfðu tekið við honum, gjörði það heyrum kunnugt, að sá væri dauðasekur er hýsti hann. Nú báru menn ráð sín saman á Skotlandi hvað gjöra skyldi; flestir vildu að konungi yrði borgið, en í annan stað þótti ísjárvert, að óvingast við þann flokk manna, er þá ræð mestu í Lundúnum. Bæði klerkar og ýmsir af herfor-ingjum Skota leituðust við að fá konunginn til að taka Presbýtera-trúna, og sögðu að þá mundi betur fara, en konungur kvaðst eigi fyrir samvizkunnar sakir geta sagt skilið við biskupatrúna, og gat því eigi saman gengið með þeim. Hinir skozku klerkar urðu honum þá fráhverfir, og þeirra dæmi hafði áhrif á orð og gjörðir annara manna þar í landi. En sem Independentar frétu,

að eigi mundi saman ganga með konungi og Skotum, reru þeir að því öllum árum, að ná konungi á sitt vald. Þetta varð og; Skotar létu konung af hendi, og flutti enskur herflokkur hann suður á England; var það alt gjört eptir áeggjan og ráðum Cromwells.

Þannig hafði hið enska parlament unnið sigur, eða þó réttara sagt Cromwell og hans flokkur. Konungur var nú á hans valdi. En þó að eigi þyrfti nú lengur móti konungi að berjast, þá var friðurinn eigi fenginn að fullu. Þegar hér var komið, þótti parlamentinu engin þörf á vera, að herinn væri lengur undir vopnum, þar sem ætlunarverki hans var nú lokið; gekk því það boð út frá þinginu, að herliðið skyldi laust af þjónustu sinni og hver fara til síns heimkynnis. Í parlamentinu réðu Presbyterar mestu um þessar mundir, en Independentar í hernum. Þegar hernum komu þessi boð, var Cromwell skjótur til ráða. Hann hélt liðinu til Lundúna og lét reka burt úr parlamentinu alla þá þingmenn, er eigi vildu fylgja hans ráðum, svo að í undirhúsinu urðu að eins eptir um 60 eða 80 manns, og þeir voru allir af Independenta flokki. Þetta fámenna þing, sem eptir sat, hafa enskir menn kallað: *the rump-parliament*, eða einúngis: *rump* (þ. e. stúfþing eða stutthalaping). Litlu síðar gengu allir af þingi í efra húsinu, því að stúfþingið þóttist einfært um öll mál. Meðan þessu fór fram, hafði konungur reynt að flýja, og Skotar safnað liði til þess að hjálpa honum til sigurs, en Cromwell eyddi því liði öllu fyrir Skotum. Eptir ýmsar málalengingar og nokkrar árángurslausar tilraunir, sem gjörðar voru í því skyni að samningar og sættir kæmust á milli konungs og óvina hans, var sök höfðuð á hendur konungi, og hann dæmdur til dauða fyrir það, að hann hefði rofið eiða sína við þjóðina og borið vopn móti parlamentinu. Karl konungur var höggvinn í Lundúnaborg 30. janúarmán. 1649. Það er mælt, að Cromwell væri skamt eitt frá afstökustaðnum og segði, þá er hann sá að höfuðið féll frá bolnum: „nú er trúnni borgið og frelsi margra þúsunda fengið; undirstaða hins enska þjóðveldis er lögð; leggjum nú líf vort í sölurnar til þess að vinna þjóðinni frægð og tryggja frið milli manna“. Drottning var farin til Frakklands með börnum þeirra Karls, og hafðist við í París; en þó að hún væri dóttir Hinriks fjórða, þá sintu Frakkar henni

eigi meira en svo, að hana skorti stundum eldsneyti til þess að geta haft nægan hita í herbergjum sínum fyrir sig og börn sín; enda voru um þær mundir óeirðir miklar í borginni (Frondestríðið), og átti margur um sárt að binda.

England nefnist Þjóðveldi, ríkisstjórn Cromwells.

Eptir líflát Karls konungs var England nefnt *Þjóðveldi* (Republik); var nú sett *ríkisráð*, og, í því 41 maður, er hafa skyldi framkvæmdarvaldið á hendi; parlamentið hafði að nafninu yfirstjórn landsins, en það var þó reyndar herinn, eða öllu heldur Cromwell, sem ræð öllu þegar til kastanna kom, því að herinn bar óbrigðult traust til hans og fylgdi því hiklaust sem hann bauð, en að öðru leyti var hann eigi vinsæll af alþýðu manna. Nú voru þeir margir á Englandi, er hörmuðu afdrif Karls fyrsta, og vildu gjarna að alt kæmist aptur í samt horf sem áður hafði verið, og að elzti sonur hans *Karl* (hinn annar), er þá var 19 vetra gamall, yrði tekinn til konungs. En Englendingar þorðu sig ekki að breysa; þar í móti voru bæði Skotar og Írar öruggari, og gáfu Karli konungsnafn.

Um sömu mundir sem ófriðurinn hófst á Englandi milli parlamentsins og Karls fyrsta, tóku Írar, sem flestir voru katólskir, að ofsækja prótestanta þar í landi, og drápu af þeim margar þúsundir manna, og kúguðu landstjórnann, sem þar var, og varð hann að ganga að þeim kostum, er þeir settu honum. Þegar nú Karl fyrsti var úr sögunni og hér var komið, þóttist Cromwell hafa ærnar sakir við Íra, og fór þangað með miklu liði (1650). Landsmenn tóku í móti sem þeir gátu, og vörðust víða af mikilli breysti, en það kom fyrir ekki; þeir urðu alstaðar ofurliði bornir, og fengu þungar hefndir af Cromwell og mönnum hans. Hann sendi fjölda af írskum mönnum herteknum til Vestindía og seldi þá þar í þrældóm, en tók eignir þeirra og óðöl og fékk enskum mönnum, sum til eignar, en sum urðu alsherjarfé. Þegar Cromwell þóttist hafa svo mikið að gjört á Írlandi, sem honum virtist nægja, hélt hann þaðan, en setti *Ireton* dótturmann sinn þar til landstjórnar. Ireton var einn af hans helztu hershöfðingjum, skapharður maður og framgjarn. Hann var Írum hinn grimmasti, en lifði þar skamma stund og varð sótt-dauður ári síðar. Þar næst varð sá maður landetjóri á Írlandi,

er *Fletwood* hét, og hélt þar áfram sömu harðstjórn sem Cromwell og Ireton; flýðu þá margir menn burt af Írlandi og leituðu sér hælis á Spáni, Frakklandi og Austurríki. Þegar Cromwell kom frá Írlandi, hélt hann norður á Skotland. Þar var Karl fyrir, og höfðu Skotar tekið hann til konungs, og nefndu hann *Karl annan*, en áður hafði hann orðið að ganga að þeim kostum, er hinir vandlætingasömu klerkar settu honum, og var honum það þó þvert um geð, því að hann var enginn trúmaður, léttúðigur í skapi, ótryggur og sérplæginn, en höfðinglegur var hann og friður sínum, eins og faðir hans hafði verið. Sá hét *Leslie*, er stýrði liði þeirra Skotanna; voru þeir saman 32000 manna og höfðu örugt vígi skamt frá Edinborg, þegar Cromwell bar þar að, og þorði hann eigi að ráða á þá. Gekk svo um hríð, þangað til klerkarnir af ákafa töluðu svo um fyrir Leslie, að hann lét tilleiðast og lagði til orustu við Cromwell, en beið algjörðan ósigur. Það var á sléttlendinu hjá *Dunbar* er þessi orusta stóð 3. sept. 1650. Cromwell tók því næst Edinborg, höfuðstaðinn á Skotlandi, og varð þar lítið um vörn; parlamentið skozka og klerkalýðurinn flýði undan víðsvegar, en herinn sveimaði yfir landið. Karl konungsson tók það til bragðs, að hann hélt suður á England með það lið, er undan komst úr Dunbar-orustunni, og hugði að þar mundi margur koma til liðs við sig, en sú von brást honum, fremur af því, að mönnum stóð svo mikill ótti af Cromwell og hans mönnum, að þeir þorðu eigi að rísa móti honum, en af hinu að þeir vildu hans yfirráð hafa. Karl komst alt suður að Worcester á Englandi, og var þar tekinn til konungs. En sem Cromwell fréttir það, lætur hann hershöfðingja þann, er *Monk* hét, verða eptir á Skotlandi, og leggur fyrir hann, að vinna það er þá var ógjört og friða landið, og gjörði Monk það bæði fljótt og vel. En sjálfur hélt Cromwell suður á England eptir Karli, og hafði nú lið miklu meira en hann. Fundum þeirra bar saman hjá Worcester 3. sept. 1651, og fór sem fyr, að Cromwell fékk sigur en Karl flýði. Fór hann þá huldu höfði fram og aptur um landið, og komst opt í miklar mannraunir, en slapp þó að síðustu úr höndum sinna mótstöðumanna og yfir á meginland.

Eptir tíðindi þau, er nú voru sögð, treystust engir að bera vopn móti Cromwell. England, Skotland og Írland urðu nú öll

eitt ríki. Parlamentið á Skotlandi lagðist niður um stundarsakir, og árið 1654 sendu Skotar 30 þingmanna til parlamentsins í Lundínum. Parlamentið á Írlandi lagðist eigi algjörlega niður fyr en um hin síðustu aldamót (1800), að það var sameinað hinu enska parlamenti¹.

Um þessar mundir hófst ófriður milli Englendinga og Niðurlendinga, en áður hafði lengi verið vinátta milli landanna, því að Englendingar veittu Niðurlendingum móti Spánverjum, eins og fyr er ritað. Árið 1650 dó *Vilhjálmur annar*, landstjóri Niðurlendinga. Hann var sonur Friðriks Hinriks, Vilhjálmssonar hins fyrsta, og átti dóttur Karls fyrsta Englakonungs. Nokkrum dögum eptir andlát Vilhjálms annars ól kona hans sveinbarn, og var nefnt *Vilhjálmur Hinrik*; hann varð síðan mjög merki-
legur maður, og er af honum mikil saga og góð. En þegar hér var komið: landstjórinn dauður og sonur hans ómálga barn, þá vildu Niðurlendingar engan taka til landstjóra yfir sig, enda þótti þeim þjóðfrelsi sínu misboðið af þeim Óraníumönnum, einkum Mórizi og Vilhjálmi öðrum. En tildrög að ófriðnum við Englendinga voru þessi: Niðurlendingar höfðu hin síðustu árin gjörzt góðkunníngjar Frakka, en hafnað samnógi, er Englendingar buðu þeim; þeir höfðu og skotið skjólshúsi yfir marga þá, er flúið höfðu sökum óeirða af Englandi, og þar á ofan veitt Stúðrtum lið móti Cromwell. Þessa vildi hann nú hefna, og hið enska parlament gaf því út (1651) hin nafnkenndu *far-mannalög* (*Navigationsact*). Í þeim lögum var öllum bannað, að flytja nokkra *nýlendu*vöru frá öðrum heimsálfum til Englands nema á enskum skipum, en vöruaðflutningar til Englands voru því að eins leyfðir á útlendum skipum, að varan væri upprunnin heima í því landi, sam skipið var frá. Voru lög þessi beinlínis til þess gjörð, að efla verzlun Englendinga, en eyða verzlun Niðurlendinga; því að Niðurlendingar áttu um þær muudir miklu meiri og betri nýlendur í öðrum heimsálfum heldur en aðrar

1) Þingmannatala í hinu enska parlamenti var árið 1868, þessi: í yfirhúsinu 454, í undirhúsinu 658, eður til samans 1112 manns. Til skamms tíma hafa Írar sent 28 manns til yfirhússins en Skotar 16, en til undirhússins hafa Írar sent 105 en Skotar 53; og eru Írar og Skotar þannig taldir með þeim áður-nefndu 1112 þingmönnum.

þjóðir, og sátu því nær einir að öllum þeim vöruflutningum, er þaðan komu, og græddu ógrynni fjár á þeirri verzlun. Þegar þeim voru nú fyrirmunadir allir vöruflutningar á sínum skipum frá nýlendum þessum til Englands, þá þoldu þeir eigi þann skaða. Var nú reynt að fá Englendinga til að nema úr gildi farmannalögin. En meðan á því stóð, bar svo til, að enskur og hollenskur herskipafloti mættust í sundinu skamt frá Dover (í aprílmán. 1652); voru Hollendingar á 42 skipum, en hinir á 50; *Marteinn Tromp* hét foringi Hollendinga, en *Robert Blake* foringi Englendinga. Þegar flotarnir hittust, kastaði Tromp kveðju á Englendinga með nokkrum skotum, eins og siður er til, en lét eigi draga niður merkisblæju sína um leið. Þessu reiddist Blake, og þótti gjört sér til óvirðingar, og lætur þegar í stað skjóta á Hollendinga sem tíðast; var nú barizt vel og rösklega af hvorumtveggja; mistu Hollendingar þar 2 skip, en Englendingar 6, og skildu að því búnu. Eptir þetta mátti heita að hver sjóorustan ræki aðra, og urðu fundir þeirra alls tíu á 16 mánuðum. Um þær mundir féll *Marteinn Tromp*, og þótti verið hafa hinn mesti kappi. Annan sjóliðsforingja áttu Hollendingar um þetta leyti, er hét *Michael Ruyter*; hann var einhver hin mesta sjóhetja, er verið hefur með þeirri þjóð, og gjörði hann Englendingum einatt hið mesta ógagn. En þrátt fyrir það sáu Niðurlendingar, því betur sem ófriðurinn stóð lengur, að þeir mundu, jafnlítill þjóð sem þeir voru, eigi geta reist rönd við ofurefli enskra manna; þeir höfðu mist kaupskip sín, svo hundruðum skipti, en verzlun þeirra fór hnignandi; fyrir því samdi *Jóhann Witt*, er þá stýrði helzt málefnum Niðurlanda, frið við Cromwell (1654), og var þá svo um samið, að Niðurlendingar hétu að reka Stúarta af landi burt og veita þeim aldrei lið móti Englendingum, enn fremur hétu Niðurlendingar því, að láta þá Óraníumenn, sem voru frændur Stúartanna, eigi komast til æztu valda á Niðurlöndum. Það kom því hér fram sem optar, að þeir urðu að lúta, sem lægri höfðu dyrnar. Um mörg undanfarin ár höfðu Niðurlendingar verið öllum þjóðum fremri í sjóferðum og sjóverzlun allri, en dugnaður Cromwells og mannaflí Englendinga varð hinni fámennu þjóð yfirsterkari, er þeim lenti saman, og upp frá þessu komust Englendingar fram

úr öðrum þjóðum í allri sjómensku, hvort heldur í friði eður stríði.

En á meðan ófriður sá stóð, sem nú var getið, hafði á ýmsu oltið heima á Englandi. Þeir, sem þar réðu þá mestu, — en það voru annars vegar parlamentið en hins vegar herliðið — gátu eigi orðið á eitt sáttir. Parlamentinu þótti herinn vera helzt til mannmargur, og vildi því fækka liðinu um 15 þúsundir manna, eður hær um bil alt að fjórðungi, eptir þeim liðsafla sem þá var þar í landi. Við það urðu hermenn óðir og uppvægir, enda vildu þeir engum lúta nema Cromwell einum. En honum þótti í engu miður, þó í hart slægi milli þingsins og herliðsins, því að með hermanna valdi gat hann komið því fram, sem honum bjó í skapi. Eptir að hann hafði talað við liðsmenn sína og heyrt tillögur þeirra manna er hann treysti best, gekk hann á þing og nokkur hundruð vopnaðra manna með honum. Veitti hann þá þingmönnum þungar átölur og að lyktum lét hann reka þá alla út úr þingsalnum. Þannig lank hinu *«lónga parlamenti»* (20. apr. 1653). Þessu næst kvaddi Cromwell aðra menn til þings. Það þing var kent við mann þann er *Barebone* hét, en öðru nafni er það kallað: *þingið stutta*; því að þegar það vildi eigi fallast á alt sem Cromwell vildi, þá sagði hann því slitið nokkrum mánuðum seinna (12. desembr. 1653).

Nú réð herinn og Cromwell öllu, og var nú aðalatriðið hverja tilbögun skyldi hafa á landsstjórninni. Meiri hluti þjóðarinnar vildi helzt konungsstjórn eins og áður hafði verið, en herinn vildi ekkert annað en þjóðveldi (Republik), lagað líkast því sem verið hafði hjá Gyðingum, á dögum dómara. Nú þótt Cromwell hefði gjarnan þegið konungstignina, þá treystist hann samt eigi, að taka sér konungsnafn, þvert á móti geði liðsmanna sinna, og fyrir því lét hann sér lynda þá tign og það nafn, er þeir nú gáfu honum, en það var *«lord protector»*. En með þeirri tign fékk hann hartnær öll hin sömu völd í hendur, sem konungar þar í landi höfðu haft. Var nú svo kveðið á (16. desembr. 1653): að *«protectorinn»* (eða landstjórinn) ásamt með parlamentinu skyldi hafa löggjafarvaldið, — en þing skyldi haldið þriðja hvert ár; á þingi skyldu sitja 400 manns af Englandi, 30 af Skotlandi og 30 af Írlandi; þingi mátti eigi slíta fyr en það hefði setið 5 mánuði. Það, sem þingið hafði orðið ásátt um,

skyldi að lögum verða, þó landstjórinn vildi eigi samþykkjast það; landstjórinn skyldi hafa framkvæmdarvaldið á hendi, segja stríð á hendur og semja frið en þó með ráðum og samþykki ríkisráðsins; hafa æztu völd yfir land- og sjóhernum og veita öll embætti; eigi mátti hann leggja skatta á landsfólkið, eða setja lög nema með samþykki parlamentsins; katólsk trú mátti eigi lifast í landi; hafa skyldi landstjóri tekjur af öllum þjóðjörðum; fastur her skyldi hafður í landinu, 20 þúsundir fótgönguliðs og 10 þúsundir riddaraliðs, til þess að halda við friði og spekt innanlands, og skyldi þeim goldinn máli af tekjum ríkisins. Því var og seinna við bætt þessa stjórnarskrá, að Cromwell mátti sjálfur kjósa hvern er hann vildi til eptirmanns eptir sinn dag. Cromwell vann eið að því, að halda stjórnarskrá þá, er nú var sögð.

Þegar hann settist að völdum, var svo ástætt, að því nær öll ríki og útlendar þjóðir, höfðu sagt slitið öllum félagskap og afskiptum við England, sökum hins mikla ófriðar, er þar hafði lengi drotnað í landi. Öllu þessu kipti Cromwell aptur í liðinn bæði fljótt og vel; enda sýndi hann engu síður í viðskiptum sínum við aðrar þjóðir, en í innanlandsstjórn sinni, hvílikt mikilmenni hann var. Frá viðureign hans og Niðurlendinga er áður sagt. Útlendir þjóðhöfðingjar, jafnvel hinn drambláti Frakkakonungur Loðvík 14., leituðu vinfengis við Cromwell og höfðu hann í mestu hávegum. Um þessar mundir stóð ófriður milli Frakka og Spánverja. Cromwell sá að Englandi gæti orðið hagur að því, að taka þátt í þeim ófriði, og þess vegna hét hann Frökkum sinni liðveizlu móti Spánverjum. Hin mikla sjóhetja Robert Blake, er vel má heita höfundur hins enska herskipaflota og hinnar miklu frægðar er Englendingar náðu bæði þá þegar og síðar í sjóorustum við ýmsar þjóðir, var þá enn á lífi og vann um þessar mundir mörg hreystiverk. Hann barði á þeim í Algier, Tunis og Tripolis, leysti þar úr varðhaldi alla kristna menn, er ræníngjaþjóðir þessar höfðu höndum tekið, og hræddi þær svo, að þær hétu honum, að bekkjast aldrei til við enska menn. Hann eyddi mörgum skipum fyrir Spánverjum, er komu vestan um haf með ógrynni gulls og silfurs frá Perú. En eptir öll þau þrekvirki varð Blake sjúkur og dó 57 ára gamall, er skip hans lagði inn á Plymúths-höfn (1657). Auk þeirrar liðveizlu,

sem Frakkar þannig höfðu af herskipum Englendinga, lèði Cromwell þeim 6000 manna, er börðust með þeim í löndum Spánverja sunnan á Niðurlöndum, undir forustu Turennes. Unnu þeir þar ýmsar borgir af Spánverjum, og þegar Pyreneasfriðurinn komst á (1659), fengu Englendingar fyrir sína frammistöðu borgina *Dunkerque* í Flandern, og *Jamaika*, hina stærstu og landkostamestu ey, er þeir enn eiga í Vestindíum.

England náði þannig aptur í augum útlendra þjóða öllu því álit, er það hafði haft á dögum Elísabetar drottningar; en þrátt fyrir það, og þó að Englendingar fylgdu Cromwell af dug og drengskap í viðskiptum hans við erlendar þjóðir, þá geðjaðist þeim, eða mestum hluta þjóðarinnar, miklu miður að innanlandsstjórn hans og aðgjörðum. Meginþorra þjóðarinnar mislíkaði stjórn hans frá upphafi; þjóðinni þótti hann hafa með einum saman hermannaafli og ofbeldi brotízt til valda, og hún þóttist í engu hafa meira frelsi, en hún áður hafði meðan Karl fyrsti sat að ríkjum. Parlamentið reyndi því optar en í eitt skipti, að vefengja og takmarka völd Cromwells, en hann bældi niður allan mótþróa með harðri hendi, hvar sem á honum bryddi, og með tilstyrk herliðsins og trúnaðarmanna sinna, sem hann hafði víðsvegar út um landið og mátti vel treysta, tókst honum að varast árásir og samsæri óvina sinna, svo að þeir gátu aldrei séð sér fært að hrynda honum úr völdum, eða ráða honum bana. En allur sá mikli mótþrói, sem honum var vel kunnur, fékk honum megnrar áhyggju, og svo var hann var um sig, að hann bar jafnan vopn, hafði panzara undir klæðum, og marga varðmenn um sig, hvert sem hann fór; hann fór aldrei sömu leið heim til sín sem að heiman; hafði leynigöng úr herbergjum sínum; svað sjaldan nema eina nótt í sama herbergi, og fleira var þessu líkt. Þessar áhyggjur eyddu smásaman heilsu Cromwells, svo að hann lagðist og dó 3. sept. 1658.

Cromwell hafði, áður hann lèzt, mælt svo fyrir, að Ríkarðurur sonur hans skyldi verða landstjóri eftir sinn dag. Svo varð nú; en þó Ríkarðurur væri góður maður og allvel að sér um marga hluti, var hann þó eigi þeim vanda vaxinn, að stýra Englandi eins og þar var þá sundur skipt hugum manna. Þetta kom þegar í ljós. Herliðið undi því illa, að sá maður væri landstjóri, er óbeit hafði á öllum hermálefnum, og aldrei hafði

nærri þeim störfum komið. Var hershöfðingi sá, er *Lambert* hét, um þær mundir hinn helzti forsprakki liðsmanna, enda var hann ákafamaður mikill og gjörði hvað hann kunni til þess að ná í landstjórávaldið. Parlamentinu var það mjög í móti skapi, að sá maður kæmist til æztu valda, og fyrir því leitaðist þingið við að styðja Ríkarð eptir megni; en þeir Lambert og félagar hans gengu þá svo fast að Ríkarði, að þeir þröngvuðu honum til að segja þinginu slitið. Ríkarður svipti þannig sjálfan sig allri liðveizlu og öllum styrk móti ofsa herliðsins og stóð svo einn uppi, og litlu síðar (í maímán. 1659) lagði hann sjálfur niður völdin, en lifði lengi eptir það sem valdalaus maður. En þó Ríkarður væri nú úr sögunni, komst þó Lambert eigi til æztu valda að heldur, því að ríkisstjórnin var fengin nefnd manna í hendur og sátu í henni 23 menn. En landi og lýð var að litlu borgnara þó þetta væri til bragðs tekið. Óánægjan var megn um alt ríkið; allir hinir betri menn þráðu frið og festu í stjórn lands og laga. Þá var það að *Monk*, hershöfðingi sá, er fyr var nefndur, og Cromwell hafði sett til yfir-stjórnar á Skotlandi, hugfesti að reisa við aptur parlamentið í Lundúnum og koma þannig á fastri stjórn í ríkinu. Monk var hraustur maður og hygginn og mjög dulur í skapi. Hann hafði nú liðsafnað og hélt til Lundúna; gengu þá margir undan merkjum Lamberts og í lið með Monk, og mátti nú heita, að hann einn reði öllu á Englandi. Voru nú kosnir menn til þings að nýju, og voru margir þeirra óvinir lýðstjórnarmanna, en vinir konúngsættarinnar. En þegar hér var komið sendi Monk trúnaðarmenn sína til fundar við Karl konúngsson, er þá var í Nið-urlöndum, og bauð honum konúngdóm á Englandi. Lögðu margir af hinum vitrari mönnum það til, að setja skyldi Karli ýmsa þá skilmála, að frelsi þjóðarinnar væri nokkur trygging í, en Monk kvað þess enga þörf, hvernig sem því hefir verið varið. Karl tók sendimönnum með hinni mestu blíðu og þektist boðið, þó fyr hefði komið. Hélt hann síðan til Englands, en landsmenn urðu komu hans svo fegnir, að þeir þóttust bættir allra sinna meina. Settist Karl þvínæst að ríkjum fedra sinna (8. maí 1660) og var nefndur *Karl annar*. Þennna viðburð í sögu Englendinga hafa menn kallað: *restauration*.

Frakkland frá Pýrenea-friðnum til þess er hið spánska erfðastríð hófst (1659—1700).

Tímabil það, sem hér fer í hönd og tekur yfir rúm 50 ár, eða með öðrum orðum, tímabilið frá dauða Mazaríns (1661) til þess er Loðvík fjórtándi dó (1715), er alment kent við þenna nafnkenda Frakkakonung, og nefnt: *Loðvíks fjórtánda tímabil*, fyrir þá sök, að mestur hluti tíðinda þeirra, er þá gjörðust, er af hans völdum til orðinn; af hans völdum var allur sá mikli ófriðarstormur risinn, er um hálfa öld gekk yfir flestar þjóðir Norðurláfunnar, og þjáði þær meir eður minna. Þegar menn nema staðar við upphaf þess tímabils, sem hér er um að ræða, og virða fyrir sér hvernig þá stóð á í álfu vorri: að friður hafði verið saminn á Westfali, við Pýreneafjöllin og í Oliva (1648, 1659 og 1660), þá virtust allar líkur til vera, að lengi mundi haldast friður og kyrd með mönnum, þess þurftu þjóðirnar við, og þess æsktu þær allar. En það átti eigi svo til að ganga; það varð eigi nema stundarfriður.

Richelieu og Mazarín höfðu lagt alt kapp á, og varið öllum sínum vitsmunum til þess, að gjöra einveldið á Frakklandi sem styrkast. Hinn fyrnefndi hafði svipt Hugennotta öllum þeim virkisborgum og vörnum, sem þeir áður áttu; bælt niður aðalinn, svo að hann laut síðan konungsvaldinu af mikilli auðmýkt, þó alþýðan fengi löngum að kenna á stórmensku hans. Hinn síðarnefndi hafði kúgað þjóðþingið (parlamentið) og þar með landslýðinn allan. Þannig var öllum flokkadrætti eytt á Frakklandi; alt hlýddi hinum einvalda konungi, og nú var sá maður seztur í hásetið, er bæði sagði mönnum og sýndi, að engum skyldi annað duga, en að hlýða honum einum. Þegar er Mazarín var dáinn, lét Loðvík fjórtándi ráðgjafa sína vita, að þeir mættu alls eigi taka sér annað fyrir hendur, en það sem hann segði þeim; hann kvaðst einn ætla sér að stjórna öllu. Hann var þá 23 vetra að aldri og í broddi lífsins. Honum er svo lýst, að hann hafi verið höfðinglegur maður sýnum, vel viti borinn, en skort næga þekkingu í mörgum greinum, því að uppeldið hafi verið miður en skyldi. En það, sem hann eigi skorti, var dramb og drotnunargirni, ójöfnuður og ásælni; hann miðaði alt við sjálfan sig — «eg er ríkið» (*L'état c'est moi*) sagði hann — og það var hans mark og mið, að sjálfs hans vegsemd yrði sem mest,

en Frakklands þar næst á eftir; allskonar skraut og viðhöfn og munað hafði hann í mestu hávegum og sóttist mjög eftir þeim hlutum, en þó lét hann eigi slíkt aptra sér frá alvarlegum störfum, því að kjark hafði hann mikinn og honum var ljúft að standa í stórræðum. Hann hafði og þann kost, sem margan þjóðhöfðingja hefir vantað, að hann kunni vel að sjá, hvað hverjum einum var bezt lagt. Þess vegna hafði hann, að minsta kosti framan af æfi sinni, nýtlari mönnum á að skipa, en aðrir konungar honum samtíða. Af ráðgjöfum Lovíks 14. eru þeir *Colbert* og *Louvois* nafnkendastir. Mazarín hafði á deyjanda degi ráðið konungi að gjöra *Colbert* að ráðgjafa sínum, og fylgdi konungur því ráði. Stýrði *Colbert* síðan (frá 1661—1683) fjármálefnum ríkisins með frábærum viturleik og dugnaði. Hversu mikið fé sem konungur þurfti til hersins, til hirðarinnar og til alls þess, er hann þá hafði fyrir stafni, hafði *Colbert* jafnan nóg fyrir hendi, því að hann var ópreytandi starfsmaður, og leiddi fram margar nýjar auðsuppsprettur í landinu. Hann jók stórum verzlun og atvinnu hjá Frökkum, kom fótum undir nýjar verksmiðjur, greiddi allar samgöngur í landinu með stórkostlegum vegabótum. Hann lét meðal annars grafa hið mikla síki (*Languedoc*-eður suðursíki sem það er kallað), er gengur 30 mílur vegar norðan undir *Pýrenea*-fjöllum, vestan úr *Garonne*-fjóti og austur í *Miðjarðarhaf*, og tengir þannig saman tvö höfn: *Atlantshaf* og *Miðjarðarhaf*; hann lét setja á stofn margar nýlendur í *Vestindíum*, *Austindíum* og *Norðurameríku*, og hann kom fótum undir mikinn og sterkan herskipafloa, og þó er hér minnst talið af því, sem þessi mikli og merkilegi ráðgjafi lét eftir sig liggja. *Louvois* stýrði hermálefnum Frakklands frá 1666—1691. Hann var hinn mesti framkvæmdarmaður, eins og *Colbert*, en ákaflega harðgjör og jafnvel grimmur, manna ráðríkastur, og vildi fyrir engum vægja. Hann kom hinni beztu stjórn og reglu á allt það, er snerti landherinn, svo að langt bar af slíkum hlutum hjá öðrum þjóðum; en hann eggjaði einatt *Loðvík* konung til ófriðar, og honum eru eignuð ýms grimdarverk, sem hermenn Frakka unnu á þeim tímum, og þykir það mikil rýrð á orðstír þessa ráðgjafa. Af hershöfðingjum *Loðvíks* eru þeir *Condé* og *Turenne* mjög nafnfrægir, og er þeirra áður getið að nokkru. Auk þeirra má nefna *Luxemburg*, *Catinat*, *Vendome* og *Villars*, sem

allir þóttu ágætir hershöfðingjar og unnu margan sigur; af sjóforingjum Frakka um þessar mundir voru þeir *Du Quesne* og *Tourville* nafnkendastir. Þá var og *Vauban* uppi á Frakklandi, er kunni bezt allra manna að víggirða borgir, og hitt, að vinna víggirtar borgir og kastala. Það er því eigi að undra, þó Loðvík fjórtándi, með því skapi sem hann hafði, og með þeim mönnum, sem hann hafði á að skipa, yrði öllum þeim þjóðum yfirsterkari, er hann náði til, þángað til á seinni árum hans, að hamíngjan fór að bregðast honum, þeir af hans mönnum að týna tölunni, er honum hafði mestur styrkur í verið, og hjá öðrum þjóðum risu upp þeir menn, er fullkomlega gátu við Loðvík jafnast og hans menn. Það gjörði og eigi lítið til að ala ofmetnað og yfirgáng og auka veldi Loðvíks fjórtánda, að þjóðhöfðingjar þeir, er hann átti helzt við að skipta framan af ríkisstjórnarárum hans, voru flestir dáðlitlir menn og stóðu langt á baki honum, bæði að vitsmunum og framkvæmdum. Margur mundi ætla, að keisarinn á Þýzkalandi, er átti yfir mörgum og miklum ríkjum að ráða, hefði getað stémt stigu fyrir ofsa og áleitni Frakkakonúngs, og það því fremur, sem Spánarkonúngur, sökum frændsemi og margra annara hluta, var sjálfkjörinn bandamaður keisarans, og var þetta alt til samans eigi lítill liðsafi; en hér var svo ástatt, að af horigum þessara var mikillar mótstöðu að vænta. Um þessar mundir var *Leopold* fyrsti keisari á Þýzkalandi, er kom til ríkis næstur á eptir *Ferdinand* þriðja, og sat þar að völdum frá 1657 til 1705; á Spáni var *Filippus fjórði* konúngur (frá 1621 til 1665), og var tengdafaðir Loðvíks fjórtánda, eins og fyr er sagt. En Leópold keisari kunni alls eigi að stjórna lýðum og löndum, vildi helzt láta alt sitja við það sem verið hafði, og var í öllu háður misjöfnum ráðgjöfum og illum klerkum. Þýzkaland var alt í molum; hin mörgu og smáu ríki lentu í sífeldum vafningum, smámunasemi og endaleysu, ef til aðgjörða skyldi koma; um samtök og fylgi til drengilegra framkvæmda var alls eigi að tala. Einn verra var ástandið á Spáni. Hið völduga ríki, sem áður hafði þar verið, var margkvalið og kúgað af hinu rammasta klerkavaldi og af ransóknarréttinum; öllum þjóðþrifnaði fór þar hnignandi dag frá degi. Lokvíki fjórtánda var þetta vel kunnugt; hann vissi, að

apturför og niðurlægling nágrannaþjóðanna mundi verða honum sjálfum til framsara og opphefðar, og eftir því hagaði hann sér.

Mazarín hafði mikinn hug á lagt, að ná þeim hluta Niðurlanda, er Spánverjar áttu, og leggja undir Frakkland, og fyrir því hafði hann haldið ófriðnum fram gegn Spánverjum svo lengi sem unt var, þangað til Pyreneafriðurinn gjörði þar endir á. En er Filippus fjórði Spánarkonungur var dáiinn (1665), þá einsetti Loðvík fjórtándi sér, að láta nú skriða til skára og ná þessum Niðurlandaparti undir sig, hvað sem hver segði. *Karl annar* með því nafni var kominn til ríkis á Spáni eftir föður sinn, og var barn að aldri; en þó svo væri, og þó Loðvík væri mágur hans, og hefði, eins og áður er sagt, unnið eiða að því, að gjöra ekki tilkall til landa eftir tengdaföður sinn, þá skeytti Loðvík alls eigi um það, en krafðist hins áðurnefnda hluta Niðurlandanna, því að drotning hans væri þar réttur erfingi að, þar eð hún væri dóttir Filippusar fjórða af fyrra hjónabandi, en Karl var eftir seinni konu Filippusar. Mátti þetta að nokkru leyti til sanns vegar færa, ef um erfðir manna í einkamálum hefði verið að ræða, eftir því sem lög stóðu þá til sumstaðar á Niðurlöndum; en hér átti slíkt eigi við, þar sem máli var að skipta um ríkiserfðir, og þess utan afsöl og eiðar til fyrirstöðu. Loðvík konungur krafðist þannig: að Spánverjar létu af hendi við sig *Brabant, Flandern* og *Franche-Comté*, en er því var neitað, sendi hann jafnskjótt hershöfðingja sína af stað með liði miklu, Turenne norður til Niðurlanda, og Condé austur á Franche-Comté (í júní-mán. 1667). Spánverjar voru óviðbúnir, og varð því lítið um varnir af þeirra hendi, en Frakkar óðu yfir löndin og lögðu undir sig, bygðir og borgir hvar sem þeir komu. Þetta þóttu mönnum mikil tíðindi og ill, og einkum urðu Hollendingar smeikir, er þeir sáu Frakka þokast svo mjög að landamærum sínum. Um þessar mundir ræð *Jóhann Witt* mestu hjá Hollendingum, þó eigi væri hann kallaður landstjóri (Statholder), því að landstjóra-embættið lá þar niðri frá 1650 til 1674. Hann og annar göfugur maður á Englandi, *Vilhjálmur Temple*, komu því þá til leiðar, að Holland, England og Svíaríki bundust í félag, er menn hafa nefnt *Prenningarsambandið* (*Trippelalliance*), til þess að stöðva yfirgang Loðvíks fjórtánda. Við þessumsamtökum hafði Loðvík konungur eigi búizt, og með því hann hafði

þó nokkuð á unnið, en þótti við ofurefli að etja þar sem bandamenn voru, þá lét hann undan síga að sinni, og var því næst friður saminn í *Aachen* (2. maí 1668). Lét Loðvík þá laust aptur Franche-Comté, en hélt öllu því, sem hann hafði unnið af Flandern, eður af þeim hluta Niðurlanda sem Spánverjar áttu áður, og komust þannig 12 borgir og allmikið land í hendur Frakkakonungi. Flestar þær borgir víggirtu Vauban svo ágætlega, að Frakkland hafði nú öruggar varnir á þeim hluta landamæra sinna, þar sem áður höfðu litlar verið.

Loðvík 14. hafði með hægu móti eignast lönd og borgir í ófriði þeim sem gekk á undan Aachenar-friðnum; hann vildi því eigi láta þar við lenda, heldur freista, hvort hann fengi eigi meiru náð frá nábúum sínum, ef ófriður tækist að nýju; þar til kom og, að hann var ákaflega reiður Hollendingum, fyrir þá sök, að þeir hefðu komið fótum undir samband það, sem áður er nefnt, og fyrirmunað sér að ná til fulls og alls hinum spánversku Niðurlöndum. Louvois, ráðgjafi hans, svaraði eigi heldur að eggja hann til hefda við Hollendinga, og hann leiddi konungi fyrir sjónir, að það væri Frakklandi hinn mesti hagur, að leggja Holland undir sig, því að bæði væri, að þá eignuðust Frakkar allar þeirra mörgu nýlendur austur í heimi og allan þeirra mikla auð, og Frakkland yrði hið mesta verzlunarland í heimi, og þá mundu og verða auðunnin hin fáu fylki, sem Spánverjar ætlu eptir á Niðurlöndum, er Frakkar gætu krept að þeim bæði að sunnan og norðan; en er Frakkar væru búnir að leggja öll Niðurlöndin undir sig með sjónum fram, þá mundi hægðarleikur, að færa takmörk Frakklands allt austur á Rínárbakka; en þángað höfðu Frakkar lengi viljað komast. Þetta þótti Loðvíki konungi þjóðráð, og nú tók hann til sinna starfa. Hið fyrsta, sem hann þá gjörði, var, að eyða þrenningarsambandinu, og tókst honum það viðstöðulítið, bæði með fagurmælum og fægjöfum. Þá var konungur í Svíþjóð Karl ellefti, úngur og óreyndur og lítt kominn til ríkisstjórnar, en þarfnadist fjár til þess að halda uppi fornri frægð ríkisins; á Englandi var Karl annar, og honum var ljúft að fylgja Frökkum og njóta þeirra að, til þess að geta kollvarpað hinni ensku stjórnarskrá, og orðið alkatólskur og einvaldun. í ríki sínu. Þannig gekk bæði England og Svíþjóð úr sambandinu við Hollendinga, og svo ílt sem það var, þá var hitt

þó hálfu verra, að ýmsir þjóðhöfðingjar á Þýzkalandi voru svo blindir, og vissu svo lítið hvað til síns friðar heyrði, að þeir gjörðust nú bandamenn Loðvíks fjórtánda til þess að afmá með öllu og uppræta Hollendinga úr tölu lifandi þjóða. Þó ber þess að geta, að kjörfurstinn í Brandenburg, *Friðrik Vilhjálmur*¹ (alment kallaður: *hinna mikli kjörfurati*), reyndist þá sem optar byggnari en flestir aðrir þjóðhöfðingjar á þeim tímum. Hann sá, að bæði sér og öllu Þýzkalandi var hin mesta hættu búin, ef Frakkakonungur kæmi öllum sínum ráðum fram. Þess vegna hét kjörfurstinn Hollendingum liðveizlu sinni, og fékk þar að auki Danakonung (Kristján 5.), Leopold keisara og ríkisdag Þjóðverja til þess að ganga í lið með þeim. Spánverjar voru sjálf-sagðir mótstöðumenn Loðvíks og sömuleiðis hertoginn af Lothringen, því að Loðvík hafði flæmt hann úr landi. Þannig hófst almennur ófriður um Norðurálfuna (1672—1679).

Nú var eigi annað sýna, en að úti væri um Holland. Það var, eins og mönnum er konnugt, lítið land og fáment, í sam-anburði við England og Frakkland. Bandamenn þess í fjarlægð, en fjandmennirnir á næstu grösum. En hið lakasta var þó það, að flokkadráttur var í landinu sjálfu. Í öðrum flokknum voru lýðveldismenn — og Holland var þá lýðveldi kallað — og Jóhann Witt, sem fyr er nefndur, var þeirra oddviti, og hafði um mörg undanfarin ár stýrt þar öllum þjóðmálefnum með heiðri og sóma; en í hinum flokknum voru allir þeir, sem héldu með Óraníu-ættinni og vildu hafa landstjóra (Statholder) yfir sig, og að Vilhjálmur prinzi, sonur Vilhjálms annars, kæmist til þeirrar tignar. Hann var nú rúmlega tvítugur þegar hér var komið, og þótti ágætt mannsefni. Honum voru að sönnu fengin hervöld í hendur, en vinir hans heimtuðu, að honum væru fengin hin æztu hervöld, og það æflangt, en það vildi Jóhann Witt og hans flokkur með engu móti. En nú stóð svo á, að landher Hollendinga var bæði lítill að tölu — eigi nema tæpar 20 þús-

1) Hann var sonur Georgs Vilhjálms kjörfursta, en sá Georg var bróðir Maríu Eleonoru, er Gustaf Adolf átti; sögðu menn að Gustaf Adolf hefði viljað gefa þessum Friðriki Vilhjálmi Kristínu dóttur sína, en það átti eigi að verða. Þegar Friðrik Vilhjálmur kvongaðist, átti hann dóttur Friðr. Hinr. landstj. Hollendinga. Samanber Nýju sögu I. H., bls. 80, 195 og 225.

undir manns — og í engu lagi, því að Jóhann Witt hafði hugsað mest um herskip og sjólið, enda var þar vel fyrir öllu sæð. Þegar leið að sumarmálum árið 1672, kom Loðvík fjórtándi með óvígna her, 150,000 manna, að landamærum Hollands. Þar var í för með honum Louvois ráðgjafi hans, sem fyr er nefndur, og hershöfðingjarnir Condé og Turenne og Vauban, og ýmsir aðrir, þar á meðal sagnaritari einn, er rita skyldi sögu um öll þau afrekaverk, er vinna átti; liðið hafði ný vopn, er menn höfðu aldrei fyr sæð, en það voru spjót eða lágir fjaðrabroddar festir á byssur manna. Þessi byssuspjót eru nefnd: *bajonet*, eptir Bayonne-borg á Frakklandi, þar sem sagt er að þau hafi fyrst verið smíðuð árið 1640, og eru þau hin mestu voðaverkfæri, sæ þeim laglega beitt. Nú lá við sjálfst að Hollendingum fellist hugur; öllum sölubúðum var lokað, menn flyktust hópum saman í kyrkjur til að biðjast fyrir, allt varð í uppnámi. Lýðurinn kendi Jóhanni Witt um alla þessa ógæfu, og þegar hann reyndi til að semja frið við Frakka, þó með þeim skilmálum, er í engu rýrði sæmd hans nè Hollendinga, þá sögðu óvinir hans, að hann væri landráðamaður og ætlaði sér að selja Frökkum bæði fjör og frelsi landsmanna, og þar kom æði manna, að þeir drápu bæði Jóhann Witt og Cornelíus bróður hans, ágætann mann og mestu sjóhetju (í jún.-mán. 1672). Var nú Vilhjálmur prinz gjörður að landstjóra; hann er nefndur *Vilhjálmur þriðji*.

Viðburðir þessir voru að sönnu hæði illir og stórkostlegir, en þeir leiddu þó til þess, að sameina hugi landsmanna gegn hættu þeirri, er nú vofði yfir öllum. Um grið og frið var nú eigi lengur að ræða. Vilhjálmur sagði mönnum sínum, að hér mætti enginn um annað hugsa, en að verja sig og sína meðan nokkur stæði uppi, og hann sýndi það skjótt í verkum sínum, að honum var það full alvara sem hann sagði. Landsmenn sáu, að þeir áttu þann fyrirlíða, er hvorki skorti áhuga nè vitsmuni, og fylgdu honum vel og drengilega. Nú er að segja frá Frökkum, að þeir halda liði sínu inn á Niðurlönd; snerust landsmenn í móti, en urðu allsstaðar undan að láta, því að liðsmunnur var helzt til mikill; tóku Frakkar hverja borg af annari og létu þar allsstaðar setulið eptir til varna. Þannig héldu þeir norður yfir Rín og tóku Útrekt, og er þaðan skamt norður til Amsterdam,

sem var höfuðborg landsins; gaf Condé það ráð, að þángað væri haldið viðstöðulaust, því að þá væri alt unnið, er sú borg væri tekin, en hvorki Louvois eða konungur vildu fallast á ráð hans, og var því svo eigi fylgt. Þá tóku Hollendingar það til bragðs, sem þeir höfðu gjört á dögum Vilhjálms fyrsta, að þeir færðu stíflur úr flæðigörðum sínum og hleyptu vatni inn á landið úr stórárm þeim, er um það renna, en Holland er flatt og láglent mjög sem menn vita; varð þá með öllu ófært yfir að fara fyrir vatni þar sem áður mátti ganga þurrum fótum; landið var alt í kafl og sem hafsjór yfir að líta, en upp úr vatninu stóðu að eins há hús og turnar. Þessi úrræði komu Hollendingum í góðar þarfir. Um þessar mundir var Ruyter, hin nafnfræga sjóhetja Hollendinga, eigi aðgjörðalaus. Honum var falið á hendur að verja Englendingum landgöngu, og var hann með herskipum sínum allsstaðar þar fyrir, er þeirra var helzt von að landinu. Seint í maí-mánuði þetta sama vor, hitti hann herskip Englendinga og Frakka; var Jakob hertogi af York (bróðir Karls annars og sem seinna varð Englands konungur) fyrir flotanum, og hafði 130 skip, en Ruyter 91. Þar laust í bardaga með þeim mikinn, og stóð hann alt til kvelds, en þá skildu þeir svo, að hvorigur vann á öðrum. Seinna um sumarið komu Englendingar aptur á mörgum skipum, og ætluðu sér að koma her manns á land, en útfíri og stormar eyddu þeirri fyrirætlan, og urðu þeir frá að hverfa við svo búið. Loðvíki konungi þótti nú lítið verða ágengt, enda leiddist honum herbúðalífið, og sneri því aptur suður til Versailles, þar sem þá var konungssetrið, en hirðin fagnaði heimkomu hans með miklum glaumi og gleðilátum, og sagði, að hann væri lifandi eptirmynd Alexanders mikla.

Hingað til höfðu Hollendingar staðið einir móti Frökkum og bandamönnum þeirra, því að keisarinn var lengi að velta því fyrir sér, hvort hann ætti að leggja út í þennan ófrið eða eigi, og taldi sú óvissa og sá dráttur einnig fyrir liðveizlu kjörfurstans af Brandenburg. Um síðir lögðu þó hvorirtveggja af stað og héldu vestur í leið til Rínar. En förim gekk þá eigi greiðlega, því að ýmsir þjóðhöfðingjar þorðu eigi, þegar til kom, að leyfa þeim yfirferð yfir löndin, urðu þeir þá að snúa þar frá og gjöra krók mikinn á leiðina; en þó var hitt verra, er litlu síðar kom fram, að keisarans mönnum hafði í kyrþey verið bannað,

að bera vopn móti Frökkum; þeir máttu horfa á þá, en eigi snerta þá. Alt um það varð þó koma kjörfurstans og keisarans manna þangað vestur í löndin í nánd við sjálfan ófriðinn Hollendingum að nokkru liði; því að jafnskjött sem Frökkum komu njósnir af hersveitum þessum, hélt Turenne með 20,000 manna burt af Hollandi og austur í móti þeim bandamönnum, en Luxemburg hershöfðingi varð eptir í Útrekt með nokkurn hluta Frakkahers. Var sá her nú eigi orðinn svo mannmargur — þegar frá er dregið bæði alt það setulið, sem Frakkar höfðu orðið að láta eptir í hverri borg, er þeir unnu, og svo lið það, er Turenne fylgdi — að af honum stæði mjög mikill ótti, enda fór nú að verða fremur sókn en vörn af hendi Vilhjálms landstjóra og Hollendinga. Því næst kom vetur og var þá kyrt um hríð. Þegar voraði hófst ófriður að nýju, og hafði Loðvík fjórtándi nú meira lið, en hið fyrra árið. En hins vegar gengu Spánverjar nú í lið með Hollendingum; keisarinn og hið þýzka ríki sendu einnig meira lið en áður, og var *Montecuculi* hinn helzti höfðingi fyrir því liði. Hann var talinn hinn beztu hershöfðingi um þær mundir annar en Turenne. Þeir Turenne og hann hittust í Franken, og heittust þar brögðum, og fóru svo leikar, að Turenne varð að hopa á hæl vestur yfir stórárnar Nekkar og Rín. En Montecuculi hélt liði sínu vestur til Niðurlanda, og kom Vilbjálmur landstjóri þar til móts við hann með sína menn; varð Condé þá að halda burt af Niðurlöndum og láta eptir alla hertekna menn, því nær 30 þúsundir manna. Þótti nú talsvert rýmka um kjör Hollendinga, enda höfðu þeir borið hærra hlut þetta sumar í nokkrum sjóorustum við Frakka og Englendinga; var Ruyter enn sem fyrri sigursæll, og annar hollenzkur sjóforingi, er hét Cornelius Tromp, sonur Marteins þess, sem fyr er nefndur. Leiddi sá sigur þeirra til þess, að Englendingum leiddist liðveizlan við Frakka, enda neitaði parlamentið að leggja til meira fæ en þegar var komið, svo að Karl annar, konungur þeirra, varð að semja frið við Hollendinga (í febr.-mán. 1674). Stókt hið sama gjörðu nokkrir af hinum þýzku þjóðhöfðingjum. En þó bandamenn Loðvíks fjórtánda fækkuðu þannig, var hann með öllu ókvíðinn, því að hann vissi gjörka, að hinir mörgu þjóðhöfðingjar á Þýzkalandi, er nú stóðu í móti honum, voru alt annað en samtaka, og í annan stað átti hann vini við hirð Leo-

polds keisara, er lömuðu allar framkvæmdir út þeirri átt, og þetta hvorttveggja olli því, að bæði hafði orðið áður, og varð þetta árið, minna úr framgöngu Þjóðverja, en ella mundi; varð því Turenne miklu betur framgengt en Þjóðverjum, þar sem þeir áttust við. Þannig vann hann sigur á bandamönnum í tveim orustum: við *Mühlhausen* (29. des. 1674), og við *Türkheim* (5. jan. 1675). Var sá höfðingi fyrir liði keisarans og Þjóðverja, er Bournonville hét, en hins er eigi getið, að Montecuculi væri viðstaddur þær orustur. Í annan stað áttust þeir við vestur í Niðurlöndum Condé og Vilhjálmur landstjóri og bandamenn hans, Spánverjar og Þjóðverjar; en bandament þessir gjörðu fremur að spilla en bæta fyrir Vilhjálmi, og fyrir því fóru þeir heldur halloka fyrir Frökkum. Þar áttu þeir ýms vopnaviðskipti og eina orustu harða við bæ þann, er *Senef* heitir (1674), og áttu hvorugir sigri að hrósa. Árið eftir (1675) var Montecuculi skipaður yfir allt það lið, bæði Þjóðverja og Austur-ríkismenn, er berjast skyldi í móti Turenne suður í Ríndalnum, og bjuggust allir við, að eitthvað mundi þar sögulegt við bera, er tveir hinir mestu hershöfðingjar mættust. Áttust þeir þar við framan af sumri, svo að hvorugur gaf öðrum færi á sér, og eigi kom til orustu, þó að herflokkar þeirra væru á sífeldum snúningum fram og aftur um bygðina, þar sem þessi tafleikur þeirra stóð. Þegar svo hafði lengi gengið þóttist Montecuculi um síðir hafa komið sér svo fyrir, skamt frá þorpi einu er *Sasbach* heitir í nánd við Offenburg í Strazborgar biskupsdæmi, að hann bauð hinum bardaga ef hann vildi. Turenne var undir það búinn, og skipaði fyrir til atlögunnar, en í því er orustan tókst, reið hann, og annar hershöfðingi með honum, upp á hæð eina litla til að líta um og sjá hvernig fylkingar þjóðverja stæðu. En þá kom fallbyssukúla og særði hann til ólífis og hinn er með honum var. Það var 27. júlí 1675 er Turenne féll, og var hann þá á fjórða ári um sextugt. Svo er sagt, að Gustaf Adolf og Turenne hafi gjört svo mikla breytingu á ýmsu, er hernaðarípróttina snertir, að hernaðaraðferð manna á hinum síðustu öldum sé í mörgu á því byggð, er þessir tveir framúrskarandi hershöfðingjar fyrstir tóku upp og kendu öðrum.

Þegar Turenne var fallinn, urðu Frakkar að leita undan vestur yfir Rín, en Montecuculi veitti þeim eptirför og gjörði

þeim mikinn skaða á mönnum og fæ. En er Loðvíki konungi komu þessi tíðindi, lét hann Condé fara þaðan sem hann var í Niðurlöndum, og setti hann yfir það lið, sem Turenne hafði stýrt, en honum vanst lítið á, og um haustið sagði hann af sér hervöldum, enda var heilsa hans mjög á færum, og andaðist nokkrum árum síðar (1686). Montecuculi lagði og niður hervöldin um þessar mundir. Hann dó nokkrum árum síðar (1681) á þann hátt, að hann reið inn í borg eina á aðra hönd keisarans, féll þá stórtíðni niður af hási einu þar sem þeir riðu fram hjá, varð Montecuculi þar undir, og lét þannig líf sitt. Nú voru þessir þrír helztu hershöfðingjar úr sögunni, en ófriður stóð enn um nokkur ár; varð þá Luxemburg greifi frægastur af þeim hershöfðingjum Frakka, er börðust í móti Vilhjálmi landstjóra, og vann honum einatt mikinn skaða. Árið 1676 biðu Hollendingar eitt hið mesta tjón, er þeir mistu Ruyter. En því var svo varið, að Messínaborg á Sikiley, er Spánverjar réðu þá fyrir, gjörði uppreisn í móti þeim, og veitti Loðvík fjórtándi þeim að málum og sendi þeim nokkur herskip til varnar, og þann mann til forustu, er *Du Quesne* hét, hann var aðmiráll, og hinn mesti sjógarður. Spánverjar beiddu Hollendinga, bandamenn sína, að veita sér lið, og var þá Ruyter sendur; honum þótti sér fengin of fá skip til fararinnar, og beiddi um fleiri; var honum svarað, að menn treystu því, að hann lét eigi huginn bíla þó hann væri á gamals aldri. «Eigi bræðist eg dauða minn», mælti Ruyter, «þegar velferð fósturjarðar minnar er annars vegar, en mér þykir illa farið, að höfðingjar þeir, er nú ráða mestu, skuli skeyta svo lítið um sæmd sjóliðsins, sem þeir gjöra». Hann fékk eigi fleiri skipin að heldur. Þeir Du Quesne hittust undir Sikiley og börðust, og skildu að slétta í það skipti. Litlu síðar bar fundum þeirra aptur saman; í þeirri orustu fékk Ruyter skot, það er leiddi hann til bana nokkrum dögum síðar. Ruyter var sjötugur þá er hann féll, og þótti verið hafa hinn mesti afbragðsmaður. Hollendingar þeir er af komust héldu heim til sín, en Frakkar höfðu yfirráð á Sikiley alla þá stund, sem ófriðurinn stóð.

Þess var áður getið, að Svíar gjörðust bandamenn Loðvíks fjórtanda, og fyrir því eggjaði hann þá mjög að grípa til vopna og ráðast inn í lönd kjörfurstans af Brandenburg, og það gjörðu þeir. Kjörfurstinn var þá hvergi nærri, því að hann var með

liði sínu vestur í Rínarlöndum; fóru Svíar herskildi yfir landið og mættu lítilli mótstöðu. En er minst varði kom kjörfurstinn og hitti Svía (í júnímán. 1675) við *Fehrbellin*, barðist við þá, og vann sigur, og rak þá úr landinu. Danir gripu nú einnig til vopna móti Svíum, eptir áeggjan kjörfurstans, enda þótt *Griffenfeld*, hinn nafnfrægi stjórnvitríngur, reði þeim frá því. En þeir vildu, sem vitanlegt var, ná aptur þeim löndum (Skáni, Hallandi og Bleking), er þeir höfðu orðið að láta nokkrum árum áður fyrir Karli tíunda Svíakonungi. Eigi tókst þeim þó að ná löndum þessum, því að Karl ellefti og menn hans vorðu þau hreystilega, en í sjóorustum við Svía báru Danir hærra hlut frá borði; voru Hollendingar um tíma í liði með þeim, og Cornelius Tromp þeirra fyrirliði; en aðalsigurinn á Svíum vann hin danska sjóhetja *Niels Juel* í orustunni á *Kjögeflóa* (1677); voru Danir lengi eptir það einvaldir í Eystrasalti. Þegar hér var komið fóru menn að tala um sættir. Frökkum leiddist ófriðurinn; Colbert eggjaði konung fastlega á, að semja frið, því að þjóðinni veitti erfitt að rísa undir þeim þúngu álögum, er svo langvinnur ófriður legði á hana. Loðvík konungur var heldur eigi fjarlægur því; að láta hér staðar nema, því að honum hafði, þegar á alt er litið, gengið vel, og að öllu samtöldu hafði hann borið hærra hlut en óvinir hans, þó margir væru í móti. Hann vissi, að Hollendingar og Englendingar áttu mikil mök saman, og að Vilbjálmur landstjóri hafði beðið *Mariu* dóttur Jakobs hertoga af Yörk, bróður Karls Englakonungs. Frakkar gátu því átt á hættu, að fá Englendinga móti sér, er minst varði, og það því heldur sem hinni ensku þjóð var illa til þeirra. Hinsvegar hafði Loðvík á sínu valdi hinar helztu kastalaborgir, í þeim hluta Niðurlanda er Spánverjar áttu, og þaðan var Hollendingum hætta búin. Hann fór því að semja við Hollendinga um frið, leiddi þeim fyrir sjónir, að þeir skyldu eigi lengur hirða um að eyða fjöri og fê í þarfar Austurríkiskeisara og Spánakonungs; þeir skyldu ná hjá sér góðum friðarkostum, ef þeir vildu skilja við hina, og Hollendingar, sem voru búnir að fá nóg af svo löngum ófriði, létu til leiðast og sömdu frið við Loðvík í *Nímvegen* (10. ágúst 1678). Mátti segja, að hér yrði betri endir en í fyrstu áhorfðiat, því að áformið hafði verið, að taka Holland alt, eins og það var, en nú mistu Hollendingar ekki einn bæ eða eina þúfu lands. Þegar

hafið séð hér», sagði ráðgjafinn? »Að sjá mig hér á þessum stað», mælti ræðismaður.

Kalvinstrúarmenn (Hugenottar) voru enn margir á Frakklandi, því enda þó Richelieu hefði í mörgu þröngvað kostum þeirra, þá héldu þeir fullu frelsi í trúarbragðaeftnum, og létu sér lynda, lifðu síðan í næði og sættu eigi árásum svo teljandi séu. En eftir því sem tímar liðu, og lengra kom fram á ríkisstjórnarár Loðvíks fjórtánda, var af hálfu stjórnarinnar farið að beita meira ójöfnuði við þenna trúarbragðaflokk, en áður hafði viðgengist um nokkur ár. Þó reyndi Colbert alt hvað hann gat, að halda verndarhendi yfir Huguenottum, enda var honum vel kunnugt, að þeir voru alment hinir þörfustu menn í landinu, sökum starfsemi, siðprýði og margvíslegrar kunnáttu. En þegar Colbert var dáinn (1683), þá var friðurinn úti. Louvois ráðgjafi, kristmúnkar og *Madame Maintenon*¹, leiddu konungi fyrir sjónir, að það mætti eigi viðgánga, að önnur trú en hin katólska ætti sér stað í ríki hans, og konungur lét sér það að kenningu verða; hann hafði ekki skynbragð á slíkum hlutum, og lét sér í trúaræftnum nægja, að fylgja vandlega öllum fyrirskrifuðum reglum og útvortis háttsemi katólsku kirkjunnar. Mágkona Loðvíks, hertogafrúin af Orleans, kemst svo að orði í einu af bræfum sínum: »menn geta eigi verið miður að sér í trúarbragðaeftnum, en konungurinn. Það sem prestarnir segja, því trúir hann, eins og sjálfur drottinn hefði sagt það, því að hann hefir aldrei lesið eitt orð í biblíunni, og veit eigi annað en það, sem skriptaféður hans hafa sagt honum. Þeir hafa komið honum á þá trú, að það sé óleyflegt að rannsuka málefni trúarinnar, menn verði að hepta skynsemina til þess að geta orðið sálubólpar». Það var því eðlilegt þó Loðvík konungur blýddi fortölum ráðgjafa síns og klerkanna; en þeir voru avarnir óvinir alls andlegs frelsis. Nú var farið að beita allskonar ójöfnuði við Calvinstrúarmenn: börn þeirra voru tekin frá þeim, og fengin í hendur öðrum mönnum sem kendu þeim katólsk fræði; þeim voru bannaðir ýmsir atvinnuvegir; klerkar voru gjörðir út af stjórninni til þess að snúa þeim til rættar (katólskrar) trúar; hjónabönd milli þeirra og katólskra manna voru harðlega bönnuð; kirkjur þeirra voru

1) Hún var hin síðasta og nafnþendasta af frillum Loðvíks fjórtánda.

rifnar niður. Og til þess, að slíkt nauðsynjaverk, sem þetta, skyldi sem fyrst og best verða til lykta leitt, voru sendir hermenn út um landið til liðs við klerkana. Þar sem klerkar unnu eigi á með orðum, tóku hermenn þessir við og settu mönnum tvo kosti: annaðhvort að láta lífið, eða taka katólska trú. Var þá fjöldi manna er þann kost kusu, að láta trúna og fá haldið lífinu, en hinir voru og margir, er eigi létu kúgast, og voru þeir flestir meiddir eða drepnir. Að þessum ofsóknum urðu svo mikil brögð, að jafnvel páfa sjálfum þótti úr hófi keyra, og sagði hann: „að eigi hefði Kristur haft þessa aðferð þegar hann hefði verið að snúa mönnum til rétttrar trúar, það mætti leiða menn inn í kirkjurnar, en eigi draga þá þangað“; en bendíng og heilræði páfans komu að engu haldi. Það verður eigi sagt frá öllu því óguðlegu athæfi, sem í frammi var haft við Calvinstrúarmenn á Frakklandi um þessar mundir. Þeir Louvois og La Chaise, skriptafaðir konungs, fengu hann til þess árið 1685 að afmá réttarbót þá, sem Hinrik fjórði hafði gefið Hugenoittum 1598, og sem kend er við Nantes¹. Ef einhver af þessum ofsóttu mönnum reyndi til þess að flýja af landi burt, og yrði honum náð, var honum annaðhvort ásamt konu hans og börnum varpað í dýflizu æfilangt, eða tekinn af lífi, en eigur þeirra gjörðar upptækar. En þrátt fyrir alla viðleitni, að varna þeim burtfarar úr landinu, slöppu þó margir og komust til annara landa, og segja menn, að rúm hálf millíón manna hafi þannig forðað fjöri og frelsi. Settust margir þeirra síðan að í Brandenburg, á Hollandi og Englandi, og var þeim þar vel tekið og urðu þar hinir nýtustu menn fyrir land og lýð. Hin fáfróða og grimma Frakkastjórn vissi eigi, eða vildi eigi af því vita, hvílíkan skaða hún gjörði Frakklandi með þessum ofsóknum sínum. Meðal þeirra manna, sem þá urðu að flýja Frakkland, voru margir framúrskarandi menn; einn af þeim var hinn ágæti hershöfðingi *Friedrik Schomberg*, er síðan gekk í lið með óvinum Loðvíks fjórtánda, og varð honum óþarfur maður.

Ofsóknir Loðvíks fjórtánda gegn Hugenoittum juku eigi lítið á óvild þá, er allir höfðingjar prótestanta báru til hans, og Vilhjálmur af Óraníu, landstjóri Hollendinga, hinn óþreytandi mótgangsmaður Loðvíks, kom því til leiðar, að nokkrir þjóðhöfð-

ingjar bundust í fèlag móti honum (1686); þó kom eigi þá þegar til fulls fjandskapar með mönnum, en þess var eigi lengi að bíða. Loðvík hugsaði um það öllum stundum, að auka yfirráð sín og veldi; hann hafði því vakandi auga á löndum nábúa sinna, eins og vargur á bráð. Það yrði of langt, að segja hér frá öllum hans gripdeildum, en þess skal hér getið, að um þessar mundir dó *Karl kjörfursti af Falz*, og átti eigi son, er að erfðum gæti gengið. Krafðist Loðvík þá, að bæði lönd og lausafé kjörfurstans yrði fengið sér til umráða fyrir hönd mágkonu sinnar, Elísabetar konu Filippusar hertoga af Orleans, bróður Loðvíks, því að hún var systir kjörfurstans. En til þeirrar kröfu hafði Loðvík þó enga heimild, því að Falzgreifarnir af Neuburg stóðu næstir til erfða. Hér við bættist og, að Loðvík konungur vildi koma einum af sínum virktavinum, Furstenberg kardínála, til erkibiskups tignar í Köln, en það varð eigi framgengt.

Nú er þetta brást, og Falz var eigi þegar laust í hendi, þóttist Loðvík hafa nægar sakir til ófriðar. Hann hóf ófrið þennan með því öruggara geði, sem hann vissi að *Jakob annar*, Englands konungur og ramkatólskur maður, mundi fylgja sér að málum, og að því gat honum orðið góður styrkur. En um það leyti sem Loðvík sendi hersveitir sínar austur á Rínlöndin, steig Vilhjálmur af Óraníu fæti á land í Englandi. Tóku Englendingar hann til konúngs, en Jakob steptist úr völdum og flýði suður á Frakkland. Loðvík sagði Hollendingum stríð á hendur, en Vilhjálmur þriðji, sem nú átti ríkjum að ráða bæði á Englandi og Hollandi, gjörðist oddviti allra mótstöðumanna Frakkakonúngs, enda var hann manna bezt til þess kjörinu. Viktor Amadeus hertogi af Savoyen gekk einnig í lið með þeim bandamönnum. Loðvík mátti því búast við öllu meiri mótspyrnu nú en áður, alt um það var hann öruggur og treysti vel bæði sér og vopnum sínum. Frakkaher var nú kominn í Rínlöndin, og fór yfir bygðina með báli og brandi, því að Louvois hafði svo fyrir skipað. Borgirnar Heidelberg, Mannheim, Speier, Worms, og smábærir svo hundruðum skipti, voru brendar til kaldra kola. Fólkíð varð að flýja undan um hávetur, hrakið og hrjáð og allslaust, því að Frakkar rupluðu og rændu öllu því, er hönd varð á fest. Þeir hjuggu niður fjölda vopnlausra manna, og margir dóu af húngri og harð-

rætti, en hinir, sem lífi hældu, komust eitthvað til mannabygða, og lifðu þar síðan sem öreigar og ölmusumenn, þótt áður hefðu verið velesnaðir. Það mátti kalla, að allur Ríndalurinn, hið fagra og stóra hérað, legðist í kaldakol, og svo kvað mikið að landaðn þessari, að langt þótti yfir taka það sem grimmast var unnið og verst á dögum Tillys og Vallensteins í þrjátígi ára stríðinu. Keisarinn og Þýskaland gátu litla sem enga vernd veitt þessum Rínarlöndum sökum ódugnaðar og sundurlyndis, og bar þar lítið til tíðinda, er frásagna þyki vert. En ófriður þessi nam eigi staðar í Rínlöndunum einum saman; hann breiddist út til annara landa: til Niðurlandanna, Írlands, Ítalíu, Spánar, og menn börðust á hafinu og í öðrum heimsálfum. Um sama leyti sem Luxemburg hershöfðingi vann sigur á þýzku og holenzku liði við *Fleurus* í Namur (1690), hélt Jakob annar til Írlands með 5000 manns, er Loðvík 14. léði honum. Írlendingar tóku Jakobi vel, því að hann var katólskur eins og þeir, og gekk þar margt manna honum til handa. En Vilhjálmur þriðji var eigi aðgjörðalaus, og var kominn til Írlands fyr en varði. Varð fundr þeirra Jakobs við Boyne-fljótið, og fékk Vilhjálmur konungur sigur, en Jakob flýði til Frakklands. Kjörfurstinn af Brandenburg hafði sent Schomberg hershöfðingja, sem fyr er nefndur, með nokkrar þúsundir manna til liðs við Vilhjálms konung; gekk Schomberg fram í orustu þessari sem ungur maður, þó hann hefði tvo um áttætt, og féll þar við mikinn orðstír. Eftir þenna sigur refsaði Vilhjálmur konungur þunglega öllu stórmenni á Írlandi, er í móti honum hafði snúizt, en alþýðunni var hann vægur, og leyfði þeim öllum að fara úr landi, er það vildu heldur kjósa; gekk þá fjöldi Íra í lið með Frökkum, og er svo sagt, að á 50 árum hafi fallið 400 þúsundir vígra manna af Írlandi undir mærkjum Frakkakonungs.

Eftir að Vilhjálmur konungur hafði friðað Írland hélt hann til Niðurlanda, því að Frakkar áttu þar ógrynni liðs og höfðu þar sinn bezta hershöfðingja Luxemburg, er hafði lagt þar undir sig ýmsar borgir og hérað suður í landi. Vilhjálmur hélt þegar í móti Frökkum en fór öðru hverju halloka fyrir þeim, bæði í orustunni við Steinkerken 1692, og einkum í orustunni við Neervinden 1693. En skömmu síðar lagði Luxemburg niður

hervöldin og dó 1695; eftir það veitti Vilhjálmi betur en Frökkum, og gekk svo meðan ófriðurinn stóð.

Á sjó höfðu menn einnig barizt um þessar mundir og ýmsir haft sigur. Einn af sjóforingjum Loðviks fjórtánda hét Tourville, hin mesta hetja; hann vann mikinn sigur á Englum og Hollendingum árið 1690, og fyrir þá sök komst Jakob annar yfir á Írland, eins og fyr er ritað. En nú lét Loðvík stofna að nýju til leiðangurs þangað. Herskip Frakkakonungs lágu sum í höfn við Toulon en sum í Brest. Þeim sem voru í Toulon gaf eigi út að leggja, og leiddist konungi að biða þeirra, og skipaði því Tourville með þeim skipum sem hann hafði í Brest, að leggja út og eyða herskipum óvina sinna, svo að lið Jakobs yrði flutt í næði og hættulaust yfir hafð vestur á England. Tourville gjörði sem konungur bauð honum; en mætir flota Englendinga og Hollendinga fram undan höfða þeim er La Hogue heitir — það er skammt fyrir vestan Cherbourg (Skerborg); á Norðmandí — Almonde og Russel stýrðu flota bandamanna og höfðu liðsafia meiri en Tourville. Þar varð hin harðasta orusta og lauk svo, að bandamenn unnu sigur, en Tourville misti mörg skip og flýði undan. Höfðu Englendingar öll yfirráð á sjó eftir orustu þessa, en vesturför Jakobs og landganga hans á England fórst fyrir með öllu.

Þó að Frökkum gengi betur en óvinum þeirra, bæði á Þýzka-landi, Ítalíu og Spáni, þá gekk ófriður þessi mjög nærri þeim, svo að Frakkland gat naumast undir risið. Loðvík var því allfús á að taka sættum, enda var honum mjög geðfellt, að geta lifað í friði nokkur ár, til þess að auka mátt sinn og megin og búa sig í næði undir ófrið þann, er hann vissi að bráðum mundi að höndum bera þegar konúngaskipti yrðu á Spáni. Þannig lauk þessum 9 ára ófriði, og var friður saminn í *Ryswyk* (1697). Loðvík hélt því, sem hann hafði unnið í Elfaz, en slepti kröfum sínum til Falz og Cöln, og lét það laust, er hann hafði unnið í Ítalíu og á Spáni; hann viðurkendi og konúngdóm Vilhjálms þriðja á Englandi, og hét að styrkja eigi framar Jakob annan þar til ríkis. Hollendingar fengu ýmsu rýmkað til um verzlun sína. Að öðru leyti var alt látið standa við það, sem menn höfðu orðið ásáttir um í vestfalska- og Nímvegar-friðnum.

Áður en sagt verður frá hinu *spánska erfðastríði*, þykir

hlýða, að nokkrum orðum sè farið um hið helzta, er við bar á Englandi og Þýzkalandi á seinni hluta seytjándu aldar, og fram um aldamót 1700, þó að á sumt af því sè minzt hér að framan.

England um daga Karls annars (1660—1685), og Jakobs annars (1685—1688).

Þegar Stúartar komust aptur til valda á Englandi (1660), og *Karl annar* hófst þar til konungdóms, hafði parlamentið gleymt, eða eigi hirt um, að selja neinar skorður fyrir konungsvaldinu, eða ákveða fastar reglur um réttindi konungs og þjóðþingsins. Allir voru þreyttir orðnir af ófriðnum og þráðu friðinn, og menn létu sèr nægja laus loforð Karls, er hann hét mönnum almennu frelsi og, að parlamentið skyldi halda öllum sínum réttindum óskertum. Karl hafði ýmislegt til að bera, er stórum mælti með honum í augum þjóðarinnar. Hann var fríður maður sýnum og höfðinglegur, eins og margir þeir frændur, blíður og vingjarnlegur í tali við hvern mann, og hann hafði lengi lifað í útlegð og orðið margt misjafnt að þola. Það voru því allar líkur til, að hann hefði lært margt gott í þeim mótgángsskóla, og mundi verða þeirri þjóð góður konungur, sem tók honum með trausti og fögnuði. En það var skaplóstur þeirra Stúartanna, að þeir voru lættlyndir, ótryggir og vanþakklátir, og vildu aldrei láta sèr skiljast hin einföldu sannindi: að vandi fylgir vegsemd hverri; þeir hugðu, að konungur mætti gjöra alt hvað honum gott þætti. Karl annar sýndi þannig jafnskjótt sem hann var kominn til valda, eins og síðar í allri ríkisstjórn sinni, að hann hafði lítið lært sèr til gagns, bæði af afdrifum þeim sem faðir hans fékk, og af öllum þeim hrakningum, sem hann sjálfur hafði mætt á útlegðarárum sínum. Þó þótti það reyndar góðs viti, er hann gjörði *Clarendon* greifa, dugandi mann og vinsælan, að æðsta ráðgjafa sínum. En fögnuður þjóðarinnar varð ærið skammvinnur. Eitt hið fyrsta, sem nú var gjört, var, að sök var höfðuð gegn flestum af þeim mönnum, er dæmt höfðu Karl fyrsta til dauða, og voru margir þeirra af lífi teknir, þrátt fyrir það, þó Karl annar hefði heitið því, að gefa mönnum upp allar forn-ar sakir. Þar næst var það leitt í lög, að hin biskuplega kirkja (episcopal-kirkjan) skyldi ein vera þjóðkirkja á Englandi og jafnvel á Skotlandi, en allir aðrir trúarbragðaflokkar höfðu mæta;

en þegar til framkvæmdanna kom, varð það ljóst, að Karl konungur hlífði þeim, sem katólskir voru, en beitti hörðu við þá, sem aðra trú höfðu, því að hann var sjálfur ramkatólskur í anda, þó að hann þyrði eigi að hafa slíkt í hámmælum. Árið 1662 kvongaðist hann og átti konungsdóttur eina af Portúgal, og fékk í heimanmund með henni *Tanger*-kastala á Afríku norður við Gibraltarsund, þar að auki Bombay austur á Indlandi, og þar á ofan mikið lausafé. Litlu síðar (1665) hófst ófriður milli Englendinga og Niðurlendinga, en undirrót ófriðarins var bæði sú, að Englar litu ófundaraugum á verzlunaruppgang Niðurlanda, og líka sú, að Karli öðrum var gramt í geði við alt stórmenni á Niðurlöndum; honum þótti þeir hafa sýnt sér helzt til lítinn sóma, meðan hann var þar í útlegð. Hvorirtveggja áttu nokkur kauplún á Guineu-ströndum í Afríku. Englendingar þóttust fara þar halloka í verzlun sinni við landsmenn og kendu Niðurlendingum um og tóku ýmsa kastala þeirra með ofríki, áður en hinir áttu sér nokkurs ills von. Og Englar létu eigi þar með búið, heldur sendu þeir herskip til Norðurameríku, og lögðu þar undir sig nokkrar af nýlendum Hollendinga. Helzta borgin í þeim nýlendum hét Nýja-Amsterdam, þá borg tóku Englendingar, gáfu henni annað nafn og kölluðu *New-York* (Nýju-Jórvík). Þegar landstjórinn Jóhann Witt, sem áður er nefndur, frétti aðfarir Englendinga, sendi hann Ruyter admiral til Afríku. Var Ruyter þá sem optar skjótur til ferða og ótraður til framkvæmda, og urðu Englendingar að láta lanst fyrir honum það sem þeir höfðu undir sig svælt þar syðra. En eftir að Ruyter kom heim úr Afríkuför sinni, átti hann ýmsar orustur við Engla, og fóru þeir einatt halloka fyrir honum, og loksins gjörðist hann svo nærgöngull þeim, að hann hélt skipum sínum upp í ána Themis, og tók þar mörg skip fyrir þeim, þótt varnir væru þar miklar á landi, og bannaði alla aðflutninga á ánni upp að Lundúnum; slíkri heimsókn voru Englendingar óvanir, en Ruyter varð mjög frægur af þeirri hreystiför. Eftir tveggja ára ófrið sömdu menn frið milli landanna í Breda (1667); fengu þá Niðurlendingar nokkra tilslökun á ýmsum greinum í farmannalögum Cromwells, en Englendingar höldu borginni New-York, sem þeir höfðu unnið meðan ófriðurinn stóð, eins og áður var sagt.

Hin enska þjóð þóttist hafa orðið undir í viðskiptum þess-

um við Niðurlendinga, en til þess að friða hana gjörði konungur bæði að víkja Clarendon ráðgjafa sínum úr völdum, og ganga í lið með Hollendingum og Svíum (*Tripelalliancen*) gegn Frökkum, og leiddi það samband til þess, að Loðvík 14. varð að ganga að friðnum í Aachen (1668). Þegar Clarendon var vikið frá, hafði Karl konungur tekið sér nýtt ráðaneyti og valið til þess þá menn er hétu *Clifford, Ashley, Buckingham, Arlington* og *Lauderdale*, og þóttu þeir hinir óþörfustu bæði konungi og þegnum hans. Þetta ráðaneyti kölluðu menn *«the cabal»*, eptir upphafsstöfum í nöfnum þeirra. Ashley, er mestu ræð á meðal þeirra, og seinna varð greift af Shaftesbury, reri að því öllum árum, að stjórninni skyldi í öllu haga eptir því sem verið hafði á Frakklandi á dögum Richelieu og Mazarins; fyrir þá sök væri nú Loðvík fjórtándi orðinn þar einvaldur, og þyrfti í engu að vera háður þingi eður þegnum. Hér væri því eigi um annað að gjöra, en eiga vingott við Frakka og konung þeirra, og þá mundi auðgefið að hafa parlamentið enska í hendi sér. Þessar og þvísíkar fortölur þótti Karli öðrum viturlegar og góðar, og litlu síðar sagði hann slitið sambandinu við Hollendinga og Svía, en gjörðist vinur og bandamaður Loðvíks fjórtánda, og þegar ófriðaðist með Frökkum og Hollendingum (1672), styrkti Karl Loðvík vin sinn eptir mætti, þángað til parlamentið enska synjaði konungi um fjárstyrk og neyddi hann til friðar við Hollendinga (1674). En Karl hélt engu að síður vináttu og trygð við Loðvík eptir það, og seldi honum Dunkerque-borg (Dunkirchen), sem Cromwell hafði náð undir England, en mjög mislíkaði enskum mönnum sú sala. Loðvík 14. vissi gjörla, að sér var það hinn mesti hagur, að alt gengi á tréfótum í Englandi, en stjórnin þar væri sér vinveitt, þess vegna sendi hann Karli öðrum, sem jafnan var í peningapröng, drjúgum fê á hverju ári og batt hann þannig við borð. Svo auðvirðilegan gat Englands konungur gjört sig á þeim tímum. Bæði konungur og ráðgjafar hans reyndu og á allar lundir að hlynna að katólskum mönnum á Englandi. Kristmúnkar streymdu til Englands, og tók stjórnin þeim tveim höndum; drotníngin hafði katólska klerka um sig; Jakob, hertogi af York, bróðir Karls konungs, tók katólska trú og taldi menn á að gjöra slíkt hið sama; hann eggjaði og konúnginn bróður sinn á að fylgja þeim sið, en Karl þorði það eigi, þótt hann feginn

vildi. Var þá Loðvík fjórtándi spurður til ráða, en hann réð konungi frá því að svo stöddu. Karl lét sér þá nægja, að afnema öll þau lög, er sett höfðu verið gegn þeim trúarbragðaflokkum er eigi fylgdu biskupakirkjunni, því að á þann hátt gat hann stórum bætt hag katólskra manna þar í landi. Nú þótti parlamentinu úr hófi keyra, enda varð konungur að taka aptur nýmæli sín, og árið 1673 var það í lög leitt, að enginn maður skyldi til valda komast á Englandi, nema hann ynni áður eið að því, að fylgja þjóðkirkjunni (biskupakirkjunni), og neyta hinnar heilögu kveldmáltíðar einusinni á ári eptir þeim reglum, er sú kirkja fyrirskipaði. Þessi lög eru nefnd *«the test-act»*. Jafn-skjótt sem þetta varð að lögum, lagði hertoginn af York niður öll þau völd, er konungur hafði fengið honum í hendur, og sýndi þannig opinberlega, að hann játaði katólska trú; slíkt hið sama gjörðu fleiri valdamenn. Parlamentið lét eigi þar við sitja, heldur krafðist þess, að þeir af ráðgjöfum konungs, er helzt voru grunaðir um að fylgja katólskum sið, skyldu ganga úr völdum, og lét konungur það eptir þinginu. Og þeir, sem ákafastir voru af mótstöðumönnum konungs, báru fram þá tillögu (*bill of exclusion*), að hertoginn af York hefði fyrirgjört rétti til ríkiserfða af því hann væri katólskur; konungur vildi jafnvel fallast á tillögunna, en lávarðarnir í efri stofunni mæltu í móti og var því máli þá eytt. En það var önnur réttarbót, og mjög merkileg, sem parlamentið fékk til vegar komið um þessar mundir (1679), og það voru *mannhelgilög Englendinga* (*«the habeas corpus act»*). Eptir þeim lögum má engan mann taka höndum, nema hlutaðeigandi valdsmaður gjöri skriflega grein fyrir hvers vegna slíkt er gjört, og hinn sem handtekinn er hefur fulla heimting á, að sök hans verði prófuð af dómaranum sem allra fyrst. Eptir því sem leið á æfi Karls annars, versnaði samkomulagið milli hans og þjóðarinnar. Þó voru sumir er höldu með konungi og hirðinni, og voru þeir nefndir *Torymenn*, eða Torymanna flokkur, en hinir er í móti stóðu, og mæltu með þjóðfrelsi og prótestanta trú, voru nefndir *Whiggmenn*, eða Whiggmanna flokkur. Hafa þau flokkanöfn síðan haldizt á Englandi til þessa dags. Hin síðustu ár æfinnar stýrði konungur ríkinu með tilstyrk Torymanna, án þess að parlamentið væri kvatt til þingsetu. Whiggarnir reyndu til að fá þeirri lögleysu afstýrt og réðu ráðum sínum, en hinum

komu njósnir af, voru þá nokkrir af hinum helztu foringjum Whiggmanna gripnir, dæmdir til dauða og teknir af lífi. Á öndverðu ári 1685 varð Karl konungur sjúkur, og andaðist litlu síðar, eptir að hafa fengið þjónustu alla af katólskum presti. Það er sagt, að Karl annar hafi verið allvel viti borinn, en alt um það var hann lítnýtur konungur, því að hann lét sig litlu varða hvernig landi og lýðum vegnaði, en um hitt hugsaði hann mest, að eyða fê ríkisins til alls konar óparfa og munaðar.

Jakob, hertogi af York, bróðir Karls annars, varð nú konungur eptir hann, og er nefndur *Jakob annar* (1685—1688); sagði mörgum þunglega hugur um hans ríkisstjórn, því að menn vissu, að hann hafði lítinn dul dregið á það, að hann vildi einvaldur konungur vera, en hitt var augljóst alþýðu manna, að hann var katólskur og fylgdi þeim sið af miklu kappi. Það kom og bráðum í ljós, að Jakob fór í flestu að ráðum Loðvíks fjórta ánda og þá af honum fégjafir miklar, þó dult ætti að fara. Það var því hægt fyrir að sjá, að andlegu og borgaralegu frelsi þjóðarinnar var hætta búin.

Jakob hertogi af *Monmouth*, launsonur Karls annars, vildi nú freista hamingjunnar og steypa föðurbróður sínum úr völdum, en brjótast sjálfur til ríkis á Englandi; tekur sér því konungsnafn og hefir liðsafnað vestur í landi. En konungur sendir þegar herlið í móti honum, og verður sá endir þar á, að hertoginn fær ósigur og verður handtekinn og drepinn síðan. Af þessum sigri ofmetnaðist Jakob konungur svo mjög, að honum þótti sér allir vegir færir; hann lét ofsækja alla þá menn, er fylgt höfðu hertoganum af *Monmouth*, og þá sem hann grunaði um hollustu við sig, og lét taka suma af lífi, en flytja suma af landi burt; hann lagði skatta á þjóðina eptir sjálfs síns geðþótta; setti kristmúnka og katólska menn til æðstu valda, fjölgaði hermönnum og gjörði katólska menn að foringjum þeirra, því að þeim einum þóttist hann mega treysta. Það var auðsèð á öllu hans athæfi, að hann lét sér eigi nægja, að eigi væri amazt við katólskum sið þar í landi, heldur gjörði hvað hann kunni til þess að kollvarpa þjóðtrú þeirri, sem honum var skylt að vernda eptir landslögum. Alt um það hlífðust menn við að gjöra uppreisn, því að mönnum var minnisstæð öll sú barátta, eymd og óhamingja, sem gengið hafði yfir landið um daga Karls

fyrsta, föður Jakobs konungs; menn lifðu líka í þeirri von, að rætast mundi úr öllu þessu þegar konungur dæi, því að hann átti engan son, en með fyrri konu sinni hafði hann átt tvær dætur, er báðar voru uppaldar í prótestantatrú, og giptar þeim mönnum, er fylgdu sama sið. Eldri dóttir Jakobs hét *María*, og átti frænda sinn *Vilhjálm af Óraníu*, hinn ágæta landstjóra á Niðurlöndum, hin yngri hét *Anna*, og var gipt *Jörgen*, syni *Friðriks þriðja* Danakonungs. En nú bar svo til (1688) að Jakob konungur eignaðist son með drotningu sinni (hún var frá Modena á Ítalíu og katólsk), og þá þóttust mennr-vita með vissu, að þeim sveini mundi verða kend katólsk fræði, og það ræki-lega. Þótti mönnum þá, að svo búð mætti eigi lengur standa. Öllum flokkadráttum hætti; Whiggar og Torymenn gleymdu öllum deilum; þeir sem fylgdu biskupatrúnni og hinir sem fylgdu presbytera-trúnni, urðu allir sem einn maður; fjöldi hinna göf-ugustu manna fóru austur í Haag á Niðurlöndum til fundar við Vilhjálms landstjóra, og skoruðu fast á hann, að koma til Eng-lands og bjarga þar landi og lýð. Vilhjálmi var vel kunnugt alt um hagi Jakobs, tengdaföður síns, en hafði til þessa leitt hjá sér að skerast opinberlega í málefni hans, en nú var hann til þess alþúinn. Hann safnaði liði og bjó flota sinn í skyndi; hugðu margir, að hann mundi ætla að hafa úti þann leiðangur móti Frökkum, því að þaðan áttu Niðurlendingar jafnan ills von. En er Loðvík fjórtándi fékk sannar sögur af fyrirætlan Vilhjálms, gjörir hann Jaköbi konungi orð, og býður honum liðveizlu sína, en Jakob vildi eigi trúa orðsendingu Frakkakonungs, og hugði að hann mundi vilja ginna sig til ófriðar gegn Vilhjálmi, og hafði því engan viðbúnað að svo stöddu. Á öndverðum vetri (1688) hélt Vilhjálmur skipum sínum til Englands, og kom við land (5. nóvember) skamt frá borg þeirri, er Exeter heitir suð-ur í landi. Þá varð Jakob svo hræddur, að hann hét öllu fögru, en landsmenn lögðu engan trúnað á orð hans, og sá hann þá eigi annað vænna en að flýja af landi burt og leita á náðir Loðvíks fjórtánda, og fékk þar góðar viðtökur. Frakkakonungur fékk honum höll eina til íbúðar, og veitti honum árlegt fé til uppeldis sér þángað til Jakob andaðist árið 1701.

Stjórnarbyltíng á Englandi. Vilhjálmur þriðji
(1689—1702). Anna drottning 1702—1714).

Nú er að segja frá Vilhjálmi, að hann heldur austur eptir landi og stefnir til Lundúna og hraðar ferð sinni. Tóku landsmenn honum með fyrsta heldur fálega, því að þeir vissu ógjörla hvert erindi hans var, eða hver heill þeim mundi af honum standa. En er hann gjörði bert fyrir öllum, hvað Jakob konungur hefði til saka unnið, og að hann væri kominn þangað til þess, að kveðja þá menn til þings, er landsmenn vildu sjálfir kjósa, og til þess að vernda frið og frelsi og trú landsmanna, þá glaðnaði yfir Englendingum, og þá gengu allir, er á leið hans urðu, honum til handa. Útlendir þjóðhöfðingjar þeir, er óttuðust aðfarir Frakka, fögnuðu þessum tíðindum, því að þeir þóttust sjá fyrir, að Vilhjálmur mundi verða bjargvættur Norðurálfunnar gegn Loðvíki fjórtanda og öllum hans yfirgáangi. Á þingi Englendinga var því næst ákveðið, að Jakob annar hefði fyrirgjört konungdómi, og að sonur hans gæti eigi heldur til ríkis komist, en konungstignin á Englandi var fengin í hendur Vilhjálmi af Oraníu og Maríu drottningu hans. Meðan Vilhjálmur væri á lífi skyldi hann einn stýra ríkinu, en er hann væri dáinn og drottning hans, skyldi konungdómurinn ganga í erfðir til Önnu Jakobsdóttur, en enginn verða konungur yfir Stórbretalandi (Englandi og Skotlandi) og Írlandi, sem fylgdi katólskum sið. Öllu hinu sama samþykktust Skotar á þingi því, er þeir áttu með sér um þessar mundir. En af reynslunni voru Englendingar orðnir hygnari, og fyrir því settu þeir nú konungsvaldinu nokkrar skorður, sem þeir höfðu eigi áður gjört. Í skíldaga þeim (*«declaration eða bill of rights»*), sem konungdóminum nú var settur, var svo ákveðið: að konungur mætti eigi undan skorast að framkvæma það, er lögin byðu, eigi leggja skatta á þjóðina, nè hafa her manns nema parlamentið leyfði, eigi þiggja menn undan lögum, og ráðgjafar hans hafa fulla ábyrgð þess, er þeir gjörðu; «testaktinn» var látinn halda gildi sínu og biskupakirkjan öllum sínum forrættindum. Þessir atburðir, sem nú voru taldir, eru það, sem menn hafa kallað: *Stjórnarbyltínguna á Englandi.*

Þannig varð Vilhjálmur af Oraníu, konungur yfir Englandi, Skotlandi og Írlandi, og nefndur Vilhjálmur þriðji. Hann var

Þá þegar þér var komið (1689) 39 ára gamall. Þess er áður getið, hve vel og viturlega hann hafði stýrt þjóðmálefnum Niðurlendinga, og að hann hafði átt mestan og bestan þátt í mótstöðu þeirri, sem á meginlandinu var gjörð í móti ójöfnuði og yfirgáangi Loðvíks fjórtánda. En þó Vilbjálmur hefði mikið aðgjört bæði í því efni og öðrum, meðan hann ræð að eins fyrir litlu ríki á Niðurlöndum, þá ræður að líkindum, að miklu meiri mundu framkvæmdir hans verða, eptir að jafnmikið ríki bættist við sem England, með öllu er því fylgdi, og hann hafði fleiri þjóðum á að skipa en áður; enda kom það og fram. Hann gekst fyrir því, að mikið þjóðasamband var gjört móti Loðvíki fjórtánda, þegar Loðvík hóf ófriðinn út af Falz, þann er fyr er nefndur, og endaði í Rýsvíkur-friðnum 1697. Hann vann og sigur á Jakobi tengdastöður sínum (1690), er komizt hafði yfir á Írland fyrir tilstyrk Frakka og kveikt þar ófrið og reynt að brjótast aptur til ríkis. Meðan á þessum ófriði stóð við Frakka, var Vilhjálmur konungur vanur að vera við herinn yfir á meginlandi á sumrum, en sat í London á vetrinn. Parlamentið veitti honum allríflega fè til kostnaðar þess, er ófriðurinn útheimti, því að Englendingar sáu skjótt, að konungur kunni vel með að fara, og hugsaði einungis um það, að verja fènu þjóðinni til gagns og sóma, en eigi um hitt, að sóa því út til alls konar munadar, eins og þeir Stúartarnir höfðu gjört. Þess var eigi heldur langt að bíða, að ávextirnir kæmu í ljós. England tók skjóttum og miklum framförum í öllum greinum; allir atvinnuvegir lifnuðu við og blómguðust ár frá ári; fjárhagur ríkisins komst á fastan fót; herskip fjölguðu á fáum árum meir en til helminga; verzlunin náði miklum þroska og færðist út yfir flest lönd og þjóðir. Hið *«indverska kaupfélag»*, er stofnað var á ofanverðum dögum Elísabetar drottningar, fèkk nýtt og betra skipulag, og þess var eigi lengi að bíða, að nýlendur Englendinga í Hindóstan mögnuðust svo mjög, og kreptu svo mjög að nýlendum Frakka og Hollendinga þar eystra, að þeim hnignaði óðum og loks hurfu þær að fullu og öllu. Af öllu saman þessu fengu Englendingar mikið orð á sig, og urðu frægir meðal annara þjóða, og þó einstöku menn á Englandi, einkum af hinum katólska flokki, gjörðu sitt til að spilla friði og rósemi í landinu, og jafnvel sitja á svikráðum við konung, þá undu lands-

menn vel sínum kjörum, og þjóðfrelsið festi þær rætur á Englandi, að það hefir búið að því síðan.

Þegar Jakob annar dó (1701), lýsti Loðvík fjórtándi yfir því, að sonur hans, er nefndi sig *Jakob þriðja*, væri rétt kvaddur og kjörinn konungur á Englandi, og um sama leyti lét Loðvík sonarson sinn, Filippus af Anjou, setjast í konungsvöld á Spáni. Sá atburður leiddi til þess, að parlamentið á Englandi kvað skýrara á um ríkiserfðir á Englandi, en áður hafði verið. Eptir þeim lögum, er nú voru sett, skyldu engir konungsfrændur, sem fylgdu katólskum sið, koma þar til ríkis, en þegar Anna væri dáið, skyldi konungstignin ganga til niðja Fríðriks af Falz og Elísabetar dóttur Jakobs fyrsta¹. Í annan stað gjörði Vilhjálmur konungur samband við Leopold keisara í Austurríki og fleiri þjóðhöfðingja, til þess að afstýra konungdómi Filippusar af Anjou, því það var auðvitað, að ef hann festist í völdum á Spáni, þá mundi Frakkakonungur í raun rétttri hafa þar öll yfirráðin. Hin enska og niðurlenzka þjóð var sambuga Vilhjálmi í þessu, og lét honum í té fé og mannafla, eptir því sem honum þótti við þurfa. Vilhjálmur konungur bjó nú lið sitt og ætlaði til Niðurlanda og þaðan í móti Frökkum, en þá bar svo til einn dag, að hestur sá, er hann reið, féll undir honum, en konungur viðbeinsbrotnaði; hann hafði lengi verið lasinn til heilsu, en nú, er þessi meiðsl komu til, þá sýktist hann, og andaðist í marzmánuði 1702, eptir 13 ára ríkisstjórn. María drottning hans var dáið 7 árum á undan, og hafði þeim eigi orðið barna auðið. Vilhjálmi konungi er svo lýst, að hann væri vel meðalmaður á vöxt, grannvaxinn og eigi hraustur til heilsu, ennimikill, manna bezt eygður og hinn höfðinglegasti ásýndum, fáorður jafnan, alvörugefinn, dulur í skapi og vel stiltur; hann hafði hvassan skilning og minni hið bezta, eins og margir í þeirri ætt, hann var gættinn maður og hygginn í öllu ráðlagi. Loðvík fjórtándi og Vilhjálmur þriðji voru í flestum hlutum mjög ólíkir. Þar sem Loðvík vildi, eins og hinn ríki maður, lifa hvern dag í dýrðlegum fagnaði, hafa um sig fjölmenna og skrautlega hirð, þó þegar hans gætu varla risið undir kostnaðinum, þá hafði Vilhjálmur aldrei fleiri menn í sinni þjónustu, en hann nauðsynlega þurfti, og hélt bæði sig og þá með hófsemi og sparnaði; Loðvík bældi

1) Sjá Nýju sögunnar I. hepti bls. 184.

haft það land að lèni frá Pólverjakonungi. Þegar Loðvík fjortándi ætlaði að brjóta Holland undir sig, gekk kjörfurstinn í lið með óvinum Loðvíks og vann sigur á Svíum, bandamönnum Frakkakonungs, eins og fyr er ritað, og eignaðist þá nokkurn skika af Pommern. Þegar Frakkakonungur svipti Hugenotta réttarbótinni, sem kend er við Nantes, flýðu margar þúsundir manna af Frakklandi, og þá leði kjörfurstinn þeim bústaði í ríki sínu, og elfdu þeir þar síðan akuryrkju og alls konar iðnað, og urðu þar hinir þörfustu menn. Þá er Friðrik Vilhjálmur dó, var ríki hans orðið miklu stærra og blómlegra en er hann tók við því. Eptir hann kom þar til ríkis Friðrik sonur hans (1688—1713). Hann var mjög ólíkur sínum föður. Hann skeytti alls eigi um skyldur sínar, eða réttindi þegna sinna, en allur hans hugur hneigðist að skarti og skrauti og hégómlegri upphefð; ríkinu fór því eigi fram, heldur aptur ef nokkuð var, meðan hann sat að völdum; en honum vanst það á, sem hann sóttist helst eptir, og það var, að fá konungsnafnið. Árið 1701 krýndi hann sjálfan sig í Königsberg og tók sér nýtt nafn, og nefndi sig *Friðrik fyrsta, Prússakonung*. Til þeirrar upphefðar hafði hann fengið samþykki keisarans, og heitið honum í móti vináttu sinni og liðsemd.

Habsborg - Austurríki. Ferdínand keisari, hinn þriðji með því nafni, varð sótt dauður 1657 eptir 20 ára ríkisstjórn. Honum hafði margt verið vel gefið og þótti hann allnýtur höfðingi í ríki sínu. Eptir hann var Leópold yngri sonur hans, kjörinn til keisaratignar, því að hinn eldri, Ferdínand, var þá dáinn fyrir fáum árum. *Leópold*, sem nefndur er *hinn fyrsti* með því nafni, var áður orðinn konungur í Úngverjalandi og Böhmen. Hann ræð ríkjum frá 1657—1705, eður því nær hálfa öld. Hann var alinn upp af Kristmúnkum, og átti með fyrsta að verða klerkur, en er það fórst fyrir og hann hófst til verzlegrar tignar, þá sleptu þeir þó eigi hendi af honum, heldur stýrðu þeir honum mestmegnis upp frá því. Öll hans innanríkisstjórn var dáðlaus, en það sem hann vann í viðskiptum við útlendar þjóðir, var eigi honum að þakka heldur öðrum mönnum, þar á meðal hershöfðingjum hans. Í viðureign sinni við Loðvík fjórtánda, sýndi hann bezt hve ráðlaus og duglítill þjóðhöfðingi hann var, þó að

meðfram megi því um kenna, að hann varð um sama leyti að snúast við Tyrkjum.

Bæði keisarinn og Soldán vildu hafa öll yfirráð í *Siebenbürgen*; en svo heitir eitt víðlent fylki austan á Úngverjalandi. Soldán sagði því keisaranum stríð á hendur (1662) og sendi herlið sitt inn á Úngverjaland; en hershöfðingi keisarans, *Montecuculi*, sem fyr er nefndur, vann mikinn sigur á Tyrkjum (1664), skamt frá klaustri því, er heitir St. Gottharð; alt um það samdi keisarinn frið við þá, og höldu þeir öllu því, er þeir höfðu unnið. Þjóðveldið *Venezía*, er var í sambandi við keisarann, varð að láta Krítey lausa við Soldán eptir lánga og harða viðureign (1669), og Pólverjar mistu Ukraine og Podolíu.

Um þessar mundir fór Leópold illa að ráði sínu við Úngverja. Landsmenn þar höfðu framan úr öldum haft ýmisleg einkaréttindi, og voru í mörgu lítt háðir Austurríkiskeisara, þótt hann bæri yfir þeim konungsnafn. En Leópold fór ekki að því, heldur braut hann lög á Úngverjum að ráðum kristmúnka og illra ráðgjafa, og ofsótti harðlega prótestanta þá, er þar áttu heima í landi. Kom nú sem vænta mátti hinn verstikur í landsmenn. Keisarinn lét hart mæta hörðu, en landsmenn gripu til vopna (1682), og gjörðist sá foringi þeirra, er *Emmerik Tökeli* hét, gósfugur maður og ágætur um marga hluti. Tyrkir veittu Úngverjum að málum, enda reru Frakkar undir niðri, og þar kom, að Tyrkir höfðu liðsafnað, og höldu með óvígán her inn á Úngverjaland. Það er sagt að þeir hafi haft um 200 þúsundir vopnaðra manna. Móti því líku ofurefli gat það lið, er keisarinn sendi, eigi reist rönd og fór á hæli undan, en Tyrkir höldu alla leið vestur til Vínar, og settust um borgina (1683). Leópold keisari flýði vestur í borg þá, er *Passau* heitir, en sá maður, er *Stahremberg* hét, bjóst til varnar í höfuðborginni (Vínarborg) þótt liðfár væri, og varði hana fræknlega. Foringi Tyrkjahersins hét *Kara Mustafa*, og af því að hann var ónýtur hershöfðingi, þá gekk honum ærið seint að vinna borgina. Að tveim mánuðum liðnum var þó að því komið, að borgarmenn mundu gefast upp, en það varð þeim til bjargar, að þá kom *Jóhann Sobieski*, Pólverjakonungur, og Karl hertogi af Lothringen með 80 þúsundir manna, og réðu á Tyrki (12. sept. 1683); varð þar harður fundur, og lauk svo að Tyrkir flýðu víðs vegar austur á

Úngverjaland. Þannig hjörguðu Pólverjar í það skipti, eigi einasta Vínarborg, heldur ef til vill öllu Þýzkalandi, þó þeim hafi lítt verið það munað á seinhi tímum.

Sá hinn mikli ósigur, er Tyrkir biðu hjá Vínarborg 1683, gjörði þá breytingu á sögu þeirra, að síðan hefir þeim farið hnignandi. Venezía, Pólverjaland og jafnvel Rússland, sem til þessa hafði lítið gefið sig við málefnum Norðurálfumanna, gjörðu nú samband við keisarann til þess að vinna á Tyrkjum að fullu og öllu. Karl af Lothringen, hershöfðingi keisarans, vann mikinn sigur á Tyrkjum við Móhacz á Úngverjalandi (1687), og náði borginni Ofen (eða Buda), er verið hafði í höndum Tyrkja hér um bil 150 ár. Loðvík af Baden vann á þeim annan sigur við Salankemen (1691), og 1697 vann *Eugen* prinz af *Savoyen*¹ frægan sigur á þeim í orustu við Zenta. Það var hans fyrsta frægðarverk, en síðan urðu þau mörg og mikil. Um sama leyti höfðu Venezíumenn unnið Móreu (Peloponnesos), og Rússar ýms hærð fyrir norðan Svartahafið. Krepti þá svo að Tyrkjum, að þeir sömdu frið í *Karlowitz* (1699), og þá fékk keisarinn öll yfirráð á Úngverjalandi, Siebenburgen og Slavoníu, þó höldu Tyrkir borgnum Temesvar og Belgrad. Venezíumenn fengu Moreu, Pólverjar Podolíu og Kaminiek, og Rússar Asow.

Leópold keisari átti þannig dugnaði hershöfðingja sinna, og líðveizlu Jóhans Sobieskis það að þakka, að hann bar herra hlut frá borði en Tyrkir, í þessum viðskiptum þeirra, og Norðurálfumenn hafa síðan mátt vera óhræddir um lönd sín fyrir ágangi Tyrkja. Úngverjar mistu mikið af fornu frelsi, og land þeirra er síðan ekki kjörriki heldur erfðaríki, eins og hvert annað skattland Austurríkiskeisara. Tökeli flýði til Tyrklands og dó þar, en marga göfuga menn á Úngverjalandi, sem tekið höfðu þátt í uppreisninni, lét keisarinn af lífi taka.

1) Eugen var sonur hertogans af Savoyen og systurson Mazaríns kardinála, fæddur 1663, dáinn 1736. Hann bauð Loðvíki fjórtánda þjónustu sína, en það er mælt, að konungi þætti hann eigi líklegur til herþjónustu og gæfi honum snubbótt af-svar. Eugen þykir verið hafa mestur hershöfðingi á sinni tíð, ágætur stjórnvitringur og þar á ofan hinn bezti drengur.

Hið spánska erfðastríð (1701—1713).

Þar var fyr frá horfið, er Loðvík fjórtándi samdi friðinn í Rysvík við mótstöðumenn sína (1697). Þó að hann þættist þá í sumu verða undir, og hann yrði í ýmsu að brjóta odd af oflæti sínu, þá hugsaði hann sér, að vinna það alt upp aptur seinna og jafna þá betur á óvinum sínum. Hann vissi sem fleiri, að þess mundi eigi langt að bíða, að konúngaskipti yrðu á Spáni, en þá ætlaði Loðvík sér hvorki meira nè minna, en að ná öllu því ríki undir sig, og sameina þannig alt Spánarveldi við Frakkland; tækist honum þetta, þá var tími til að minnast á fornan fjandskap við nágrannabjóðirnar fyrir norðan og austan Frakkland. Þess vegna var Loðvík svo auðveldur þeim og eptirlátur, er Rysvíkur-friðurinn var saminn. En hverjar voru líkur til þess, að Loðvík mundi ná yfirráðum á Spáni? Karl annar, sem þar ræð ríkjum þegar hér var komið, var eigi nema rúmlega þrítugur að aldri, en hann var barnlaus maður og heilsulaus með öllu, og hægt fyrir að sjá, að lífdagar hans mundu bráðum á enda. Karl var sonur Filippusar fjórða, en þeir Loðvík fjórtándi og Leópold keisari fyrsti voru mágar Karls, tengdásynir Filippusar fjórða, og þess utan voru þeir báðir dætrasynir Filippusar þriðja. Leópold keisari þóttist því engu síður en Loðvík eiga tilkall til ríkiserfða á Spáni, heldur öllu fremur, með því að hann var kominn í beinan karllegg af Ferdínandi keisara, bróður Karls keisara hins fimmta, og nú var hann elztur manna og helztur í hinn *ýngra karllegg* þeirra Habsborgarmanna. Keisarinn þóttist reyndar sjá það fyrir, að stjórnendur Norðurálfunnar mundu aldrei leyfa, að einn og hinn sami maður yrði ráðandi yfir báðum, Austurríki og Spáni, og fyrir því afsalaði hann sér erfðarétt til Spánar og fékk hann í hendur ýngra syni sínum *Karli* erkihertoga. En Vilhjálmur þriðji, af Óraníu, sem nú ræð bæði fyrir Englandi og Niðurlöndum var helzt á því, að skipt yrði Spánarveldi milli manna, svo að enginn einn fengi það alt og óskipt, og yrði þannig ríkari en góðu hófi gegndi og gæti svo raskað æskilegu jafnvægi Norðurálfunnar. Vilhjálmur fékk því og komið til leiðar, að Frakkakonungur og Austurrikiskeisari létu sér lynda, að eignast lönd nokkur á Ítalíu og í Belgíu, sem lágu undir Spán, en aðalhlutinn af ríki Karls annars skyldi ganga í erfðir til *Jósefs Ferdínands*, sonar

kjörfurstans af Baiern, því að sá úngi maður var dóttursonur Leópolds keisara og Margrétar, yngri systur Karls annars¹. Þetta lét Karl Spánarkonungur sér allvel líka, en vildi þó eigi að ríkið skiptist eptir sinn dag, og arfleiddi kjörfurstasoninn að því öllu og óskiptu (1699), en til allrar óhamíngju dó hinn úngi maður nokkrum vikum síðar.

Nú komu ný vandræði að höndum, svo að til mestu vafsinga horfði. Þó urðu þeir Vilhjálmur þriðji og Loðvík fjórtándi á það sáttir, að ríkiserfinginn á Frakklandi (*Dauphin*) skyldi fá nokkuð af arðnum, en Karl erkihertogi eignast Spán, aðalríkið, og þó lönd að auki, en Leópold vildi eigi fallast á þau skipti fyrir hönd sonar síns. Karl annar vildi eigi, eins og áður er sagt, að ríkið skiptist í sundur eptir sinn dag, og ef Leópold keisari hefði haft nokkurn dug í sér, og fylgt betur fram sínu máli, þá var honum auðgefið að fá allt hið spánska ríki til handa Karli erkihertoga syni sínum, því að Karl konungur annar var því eigi fjarri og ræð keisara að senda erkihertogann gagngjört til Spánar. En Leópold færðist undan, og erindsreki hans við hirð Spánarkonungs var eigi maður til að mæta *Harcourt*, sendiherra Frakkakonungs á Spáni, er gjörði það hann kunni, bæði með fögrum orðum og fémútum, til þess að fá bæði Spánarkonung og hina göfugustu menn meðal Spánverja á sitt mál; þeir fjölguðu því með degi hverjum, er hans mál studdu. Árið 1700 (1. dag nóv.) dó Karl annar, og þá kom það í ljós, að hann hafði arfleitt *Filippus af Anjou*, sonarson Loðvíks fjórtánda, að öllu Spánarveldi eptir sinn dag.

Loðvík fjórtándi hafði nú fengið það fram, er hann vildi; þó lét hann sem sér væri það efamál, hvort hann ætti að þiggja allan hinn mikla arf fyrir hönd frænda síns, enda var honum kunnugt um, hvernig þeir Leópold keisari og Vilhjálmur þriðji mundu snúast við þessum málalokum. Alt um það lét hann Filippus taka við konungstign á Spáni, og hinn úngi konungur hélt því næst burt af Frakklandi og heim í ríki sitt á Spáni og settist að í Madrid. Hann nefndi sig *Filippus fimta*, og var þá 17 vetra gamall. Það ræður nú að líkindum, að Loðvík fjórtándi og ráðgjafar hans hafi viljað ráða og ráðið miklu á Spáni eptir að hinn úngi konungur settist þar að völdum, en hins

1) Sjá ættartöluna á bls. 65.

Filippus þriðji, Spánverja konungur † 1621.

<i>Anna</i>		<i>Filippus 4.</i>		<i>María</i>
gípt Loðvíki 13. Frakkakg.		Spánarkonungur † 1665.		gípt Ferdínandi keisara þriðja
<i>Loðvík 14.</i> Frakkakg. † 1715.		<i>María Theresía</i> <i>Karl annar</i> , gípt Loðvíki 14. Spán.kg.† 1700. gípt Leópold keis. I.		<i>Leópold</i> keisari fyrsti † 1705.
		<i>Loðvík</i> (Dauphin) † 1711.		<i>María Antonía</i> gípt Max, kjörfursta af Baiern.
		<i>Loðvík</i> , hertogi af Bourgogne, † 1712.	<i>Filippus af Anjou</i> Spánarkonungur (5.) 1700—1745.	<i>Jósef 1.</i> keis- ari, † 1711. ari ¹ † 1740.
<i>Loðvík 15.</i> Frakkakonungur.			<i>Jósef Ferdínand</i> † 1699.	

1) Þeir bræður Jósef 1. og Karl 6. voru eptir seinni konu Leópolds; hún var kjörfurstadóttir frá Falz.

til herskipa. Yfir landherinn setti konungur þann höfðingja, er hét *Jón Churchill* greifi af *Marlborough*, og síðan fékk hertoga nafnbót. *Marlborough* hafði á æskuárum sínum verið með *Turenne*, og síðan með *Vilhjálm* konungi þriðja á herferðum hans móti Frökkum, og numið af þeim hernaðarípróttina. Það er sagt, að *Marlborough* hafi verið manna fríðastur sýnum og bezt að sér gjör um flesta hluti, þá er hershöfðingja mega prýða. Í marzmánuði 1702 hélt hann til Niðurlanda, og tók þar við yfirstjórn hins enska og hollenzka landliðs, en nokkrum dögum síðar spurðist lát *Vilhjálm*s konungs, og að *Anna* dóttir *Jakobs* annars var komin til ríkis á Englandi. Hafði konungur áður hann andaðist ráðið Önnu að láta *Marlborough* halda hervöldum, því að hann einn væri sá af enskum mönnum, er því starfi væri vaxinn. *Anna* drottning fylgdi því ráði, og reynslan sýndi bezt, að *Vilhjálmur* hafði þar, sem endrarnær, verið glöggskygn.

Rúmu ári áður en *Marlborough* tók við herstjórn á Niðurlöndum, var *Eugen* kominn með sínar hersveitir suður yfir *Alpa-fjöll* og ofan á Ítalíu. Þar ræðst sá hershöfðingi í móti honum með *Frakkaher*, er *Catinat* hét; hann þótti hinn vaskasti foringi, en þó fór hann halloka fyrir *Eugen*, og varð að leggja hervöldin niður, en sá var settur í hans stað, er *Villeroi* hét; hann var marskálkur að nafnbót og aldavinur frú *Maintenons*. En þá tók eigi betra við fyrir Frökkum, því að *Eugen* vann eigi einungis sigur á þeim í fleiri orustum, heldur tók hann marskálkinn höndum og flutti hann norður til *Vínarborgar* (í febr. 1702). Þá ofbauð frú *Maintenon*, er hún heyrði slíkar ófarir.

Fregnin um þessar ófarir Frakka og um sigursæld *Eugens* kom hinum þýzku þjóðhöfðingjum loksins til að ganga í lið með keisaranum og bandamönnum hans; slíkt hið sama gjörðu litlu síðar hertoginn af *Savoyen* og konungurinn af *Portúgal*, svo að aðrir stóðu nú eigi með *Frakkakonungi* en kjörfurstarnir af *Baiern* og *Köln*, því Spánn var eigi sjálfum sér bjargandi, hvað þá fær um að veita Frökkum lið. Alt um það veitti Frökkum betur á Ítalíu eptir að *Vendome* var settur þar til herstjórnar í staðinn fyrir *Villeroi*. *Vendome* var kominn í beinan karlegg af *Hinriki* konungi fjórða og reyndist ágætur hershöfðingi. Á Þýzkalandi var *Loðvík* af *Baden* aðalforingi Þjóðverja, en þeir *Villars* og *Maximilian* kjörfursti af *Baiern* fyrir Frökkum og *Baierns*-mönn-

um; veitti Frökkum þar öllu betur en Þjóðverjum, og mundu meira hafa að gjört, ef sámkomulag hefði betra verið milli þeirra Villars og kjörfurstans; en þeim samdi svo illa, að Loðvík 14. varð að kalla Villars heim og setja aðra hershöfðingja í hans stað; var konungi það hið mesta mein, því að Villars var hans bezti hershöfðingi sem þá var uppi. Í hinum spánsku Niðurlöndum var Marlborough tekinn til starfa, og hafði unnið þar ýmsar borgir, er Frakkar höfðu lagt setulið í; þaðan hélt hann upp með Rín inn í lönd kjörfurstans af Köln, og hafði alstaðar sigur. Villeroy var aptur laus orðinn og kominn frá Vínarborg, og hafði herstjórn af hendi Frakka þar vestur frá móti Marlborough.

Með árinu 1704 fór Frökkum að ganga miður. Þá var svo ráð fyrir gjört, að Eugen skyldi hafa herstjórn á Þýzkalandi og að þeir Loðvík af Baden, Marlborough og hann skyldu allir hjálpast að, og reka þaðan brott bæði innlenda og útlenda óvini. Um vorið var Marlborough með liði sínu vestur við ána Mósél og hélt suður og upp með henni um stund, en gjörði það einúngis til þess að blekkja Frakka, því að hann ætlaði sér í alt aðra átt, enda hvarf hann þeim þá er minst varði, og vissu þeir ekki hvað af honum varð, fyr en hann var kominn austur yfir Rín og allar götur upp með Nekkarfljóti. Þar hittust þeir allir þrír hershöfðingjarnir, Loðvík af Baden, Eugen og Marlborough, í borg þeirri, er Heilbronn heitir; varð þar sagnafundur með þeim og vináttumál mikil, og réðu þeir nú ráðum sínum; kom þeim ásamt um, að Loðvík og Marlborough skyldu halda liðinu austur á Baiern móti kjörfurstanum og Frakkaher þeim er þar var, en Eugen fara vestur að Rín móti því liði, er þángað var von af Frakklandi. Þess var eigi langt að bíða, áður orusta yrði með mönnum í Baiern, og urðu þeir Marlborough þar hlutskarpari, en hinir hrukku undan til Augsborgar; var landsfólkið nú nauðulega stätt í Baiern, er allur sá mikli hermannasægur óð yfir landið, og urðu margir til að eggja kjörfurstann á að segja skilið við Frakka, en hann vildi eigi þekkjast það, því að á hverjum degi var von á hershöfðingja þeim, er *Tallard* hét, með miklu liði af Frakklandi til styrktar við kjörfurstann. Lið þetta kom og skömmu síðar, eins og ráð var fyrir gjört, og þóttust þeir þá öruggir til bardaga. En Eu-

gen hafði fengið njósnir af ferðum Tallards og haldið á eptir honum með sínar sveitir, og sameinað þær við lið Marlboroughs hjá bæ þeim, er Donauwerth heitir. Skamt eitt þaðan í austur og niður með ánni (Donau) er borgin Ingolstadt, þangað var Loðvík af Baden farinn með nokkru liði og seztur um bana, því að hún var í óvinahöndum. Kjörfurstinn og Tallard höldu þessu næst öllu liðinu norður yfir Donau, en þeir Eugen og Marlborough komu í móti þeim, og varð fundur þeirra (13. aug. 1704) við bæ þann, er *Hochstädt* er nefndur. Þar varð orusta bæði hörð og löng og lauk svo, að þeir Eugen unnu hinn frægasta sigur, en af hinum féllu margar þúsundir eða urðu handteknar; kjörfurstinn og þeir, sem af komust, flýðu suður yfir Donau, en Tallard, aðalforinginn sjálfur, varð handtekinn. Keisarans menn settust í lönd kjörfurstans og léku þau hart, en Frakkar brukkðu vestur yfir Rín og sáuust eigi á Þýzkalandi í mörg ár eptir þessar hrakningar. Var nú Þýzkaland þaðan í frá, meðan spánska erfðastríðið stóð, að miklu leyti laust við ófriðinn, er enn um nokkur ár geisaði í Niðurlöndum, á Ítalíu og á Spáni.

Það bar nú þessu næst til tíðinda á Þýzkalandi, að þar urðu höfðingjaskipti. Leópolð keisari andaðist á öndverðu sumri 1705 (5. maí), en eldri sonur hans *Jósef fyrsti* varð kelsari eptir föður sinn. Hann gjörði það þegar bert fyrir öllum, að sér væri fast í huga að styrkja Karl bróður sinn til ríkis á Spáni, og halda því stríði fram, sem faðir þeirra hefði byrjað. Eugen hafði nú fengið yfirstjórn allra hermála á Ítalíu, en skorti liðsafla til þess að geta borið af Vendome, er þar stóð í móti honum með Frakkaher. Marlborough og Loðvík af Baden voru settir í móti Villars vestur við Rín, en urðu bráðum að skilja, því að bæði var, að sitt sýndist hvorum, svo að lítið varð þar ágengt, og í annan stað voru Niðurlöndin í háska stödd, því að Villeroi var þar á næstu grösum og hafði ógrynni liðs, og var þegar tekinn að vinna þar ýmsar borgir og hêruð. Kjörfurstinn af Baiern var þar í liði með honum; þangað hélt nú Marlborough, og urðu menn fegnir komu hans. Eptir nokkur viðskipti og smáorustur, er jafnan hölluðust á Villeroi, stóð aðalorustan milli þeirra Marlboroughs á völlum við bæ þann, er *Ramillies* heitir (23. maí 1706), og fór sem fyr, að Marlborough fékk sigur, en Villeroi misti helmíng allan af sínum mönnum,

allar fallbyssur og flest það er fèmmælt var í för hans, en sjálfur komst hann á flóttu undan og kjörfurstinn með honum; veitti Marlborough þeim eptirför og létti eigi fyr, en þeir og alt þeirra lið var hrokkið suður og vestur yfir Scheldefljót. Alt Brabant og það af Flandern, sem Spánverjar áttu, komst í hendur sigurvegarans, og var Karli eckihertoga, bróður Jósefs keisara, svarið þar land og þegnar.

Nú er að segja frá Eugen. Hann hafði um veturinn haldið kyrru fyrir í Vínarborg, en þá er voraði (1706) hélt hann suður á Ítalíu þangað sem lið hans var; hafði Vendome, litlu áður en Eugen kom, veitt keisarans mönnum aðgöngu og brakið þá austur fyrir Adige (eða Etsch) fljót. Þótti Eugen það eigi góðar fréttir, en jafnframt komu honum þau tíðindi, að Vendome var þaðan á brott, og kominn til Niðurlanda, því að eptir orustuna við Ramillies var Villeroi rekinn frá völdum og Vendome settur til herstjórnar í hans stað. En nú var svo ástatt á Ítalíu, að hertoginn af Savoyen, einn af bandamönnum keisarans, var búinn að missa í hendur á Frökkum alt sitt ríki, nema höfuðborgina Túrín, og um hana sátu Frakkar með 38000 manna; hertoginn var sjálfur flúinn úr borginni til að forða lífi sínu, og hafðizt við í bæ þeim, er Asti heitir, og það lið, er honum vildi fylgja. Það var fyrirætlan Eugens, að komast þangað sem hertoginn var, sameina sitt lið við hans, og halda svo til Túrínar og ná henni úr höndum umsátursmanna. En þetta var enginn hægðarleikur. Það var löng leið og yfir margar stórar að sækja, og á öllum vegum sátu óvinir með meiri liðsafla en þeim, er Eugen hafði á að skipa. En Eugen var allra manna djarfastur og framgjarnastur þegar því var að skipta, og lét sér enga hættu í augum vaxa. Svo fór, að hann komst klaklaust þangað sem hertoginn sat með sína menn, og eptir það héldu þeir til Túrínar; en það ætluðu menn eigi, að hann mundi á-ræða að veita Frökkum þar aðgöngu, því að þeir höfðu aukið lið sitt og höfðu þar um 80 þúsundir manns, en Eugen og hertoginn að eins 37 þúsundir. Það var í septembermánuði (1706) er Eugen kom til borgarinnar, og er hann hefur um stund litið yfir fylkingar óvina sinna, mælti hann: «mér virðist að lið þetta sé þegar unnið». Lætur hann því næst blása til atlögu, en hinir snúast í móti. Eptir þriggja stunda orustu lögðu Frakkar á

flóttu, voru þá fallnar af þeim 5000 manna, en 7000 handteknar; þar fékk Eugen ógrynni herfánga og þar á meðal allar fallbyssur Frakka, yfir tvö hundruð að tölu. Eftir þenna fræga sigur brukku Frakkar burt af Ítalíu, en hertoginn af Savoyen settist aptur að ríki sínu. Eins og Austurríki, með orustunni við Ramillies, vann þann hluta Niðurlanda sem Spánverjar áttu, eins vann það nú af Spánverjum hertogadæmið Milano (Maßland) með orustunni við Túrín. Nú var hið þriðja skattland eftir, sem Spánverjar einnig áttu, og það var Neapelsríki, því vildi keisarinn einnig ná undir sig, og sendi þangað einn af hershöfðingjum sínum, er *Daun* hét; varð þar lítil fyrirstaða, og eftir nokkrar vikur hafði Daun unnið allt það land undir keisarann. Eugen hafði nú eigi meira að starfa á Ítalíu, og hélt liði sínu til Niðurlanda til móts við Marlborough.

Nú hefir um hríð verið sagt frá því, sem gjörðist með mönnum á Þýzkalandi, á Niðurlöndum og á Ítalíu. Hér skal þess í fáum orðum getið, er gjörðist um þessar mundir á Spáni; því að í öllum áttum umhverfis Frakkland var ófriður, og um yfirráðin á Spáni voru menn að berjast, eins og kunnugt er. Árið 1702 höldu Englendingar og Hollendingar flota sínum til Spánar og ætluðu að taka Kadiz; það er sjávarborg mikil og auðug, sunnan og vestantil á Spáni; borgin reyndist betur varin en þeir hugðu, og fengu þeir eigi tekið hana og urðu frá að hverfa við svo búið. En á leiðinni norður með landi tóku þeir fjölda skipa fyrir Spánverjum; voru sum þeirra nýkomin vestan frá Ameríku hlaðin dýrum dómum, og fengu þeir þar ógrynni fjár, en Spánverjar biðu hinn mezta skaða. Portúgalskonungur gekk í lið með bandamönnum, eins og fyr er sagt, og eggjaði fastlega á, að Karl erkihertogi kæmi og tækist á hendur ríkisstjórn á Spáni; þó drógst það þangað til á öndverðu ári 1704, þá kom Karl um síðir og hafði 12 þúsundir liðsmanna af Englandi og Hollandi; hafði *Pétur annar*, Portúgalskonungur, þá herlið sitt á reiðum höndum, og höldu síðan öllu liðinu austur á Spán, en hvorigur þeirra Karls kunni til herstjórnar, og urðu því framkvæmdir þeirra ærið litlar. Hið eina, sem þar gjörðist til frásagna, var, að Englendingar unnu *Gibraltar* (4. ág. (1704), því að Spánverjar höfðu þar að eins hundrað manns til varnar; annars er kastali sá óvinnandi, því að hann er allur í þver-

gníptum hömrum við sjóinn, og ófært upp að gánga nema að eins að vestanverðu, þar sem bærinn Gibraltar stendur neðanundir hömrunum; hafa Englendingar síðan setið í kastala þessum, og aldrei orðið þaðan komið, þó reynt hafi verið. Árið eftir (1705) varð Karli erkihertoga vel framgengt austur í landi, því að landsfólkið gekk honum þar fúslega til handa, af gömlu hatri sem íbúar hins forna Aragoníu-ríkis báru til Kastilíumanna¹; en mestur bluti Kastilíumanna fylgdi Filippusi konungi. Spánverjar gengu þannig í tvær sveitir, annar bluti þjóðarinnar hélt með Karli en hinn með Filippusi. Var nú hin mesta óöld á Spáni, er landsmenn börðust sín í millum, en hefði nokkuð að Karli kveðið, var honum innan handar að gjöra þar á skjótar og allgóðar málalyktir, því að hann hafði upphaflega miklu meiri mannastyrk yfir að ráða en Filippus. Það komst jafnvel svo langt, að bandamenn (Englar, Hollendingar og Portúgalsmenn) tóku Madrid, höfuðborg landsins, og Filippus varð að flýja þaðan, en Karl sat í næði austur í Barcellona og kom þar hvergi nærri; kom sá sigur honum því að litlu liði, og nokkru síðar vann *Bervick* marskálkur² mikinn sigur á bandamönnum (1707) í nánd við *Almanza-borg* í Murcia; festist Filippus þá aptur í konungdómi um stundarsakir, og að fullu og öllu eftir að Vendome tók við herstjórn Frakka á Spáni og vann sigur á bandamönnum hjá *Villa Viciosa* (1710); en það var nokkru síðar en hér var komið.

Eugen var kominn sigri hrósandi af Ítalíu, eins og áður var sagt, og þangað norður sem Marlborough sat og átti í höggi við Frakka. En þó að þeir hefðu farið ófarir miklar fyrir honum í orustunni við Ramillies, þá var Loðvík fjórtándi eigi uppgeflinn, og hafði liðsafnað mikinn um alt sitt ríki, og sendi það lið norður á landamæri, því að hann vildi fyrir hvern mun ná aptur þeim borgum og bygðum í Flandern og Brabant, er Marlborough hafði af honum unnið. Yfir þetta lið er Frakkakonungur

1) Sjá Miðaldasögu bls. 197.

2) Bervick var sonur Jakobs annars Englakonungs óskilgetinn, og Arabellu, systur Marlboroughs hertoga; hann gekk fyrst í herþjónustu Leópolds keisara, en síðan gjörðist hann maður Loðvíks fjórtanda og þótti góður hershöfðingi. Hann féll á Þýzka-landi 1734.

lèt saman koma á landamærum Frakklands og Niðurlanda, og sem voru frekar 80 þúsundir manna, setti hann hertogann af *Bourgogne*, sonarson sinn, 25 ára gamlan, líttreyndan og eigi þeim vanda vaxinn, að mæta slíkum afbragðsmönnum, sem Eugen og Marlborough; mun konungur og hafa séð að svo var, og þess vegna setti hann Vendome hertoganum til annarar handar, honum til ráðaneytis. Vendome var hinu herkænasti maður, og hafði jafnan vel gefzt hans herstjórn, en hér komu kostir hans að litlu haldi, því að hertoginn vildi sínum ráðum fram fara, og hann var yfirforingi hersins. Í júlímánuði 1708 höldu Frakkar liði sínu inn á Niðurlönd og tóku þar nokkrar kastalaborgir, en Marlborough var svo liðfár að hann gat eigi varnað því. Áður langt liði kom Eugen með sína menn, og þóttust þeir þá öruggir til framgöngu. Um þessar mundir voru Frakkar komnir að bæ þeim, er *Oudenarde* heitir, og bjuggust að taka hann. Sá bær er við Scheldefljót. Eugen vildi eigi að Frakkar tækju bæinn, og gaf það ráð, að veita þeim atgöngu þegar í stað. Vendome sá alla fyrirætlan þeirra og sagði hertoganum hvern viðbúnað skyldi hafa meðan tími væri til, en hertoginn vildi eigi þeim ráðum fylgja; þokaðist nú bandamannaherinn nær, og kaus sér þar vígstöðvar, er bezt átti við, en við því hafði Vendome einmitt viljað sporna, þó hann fengi því eigi ráðið. Tókst því næst hin harðasta orusta. Frakkar börðust af mikilli hreysti, en það kom fyrir ekki, því að fyrirskipanir Vendome og hertogans riðu í bága hvorar við aðrar meðan á bardaganum stóð. Átta þúsundir af Frökkum urðu þar handteknar, jafnmargar féllu og urðu sárar, en hitt liðið, er af komst hörfaði vestur yfir Schelde; skipaði Vendome svo vel og viturlega fyrir á flóttanum, að hann fékk af hina mestu sæmd. Árángurinn af sigrinum við Oudenarde varð sá, að Frakkar gátu eigi frekara aðhafzt það árið. Um haustið eptir og framan af vetri náðu bandamenn aptur ýmsum borgum í Flandern, er Frakkar höfðu tekið; ein af þeim var Ryssel eða Lille, er hinn nafnfrægi Vauban hafði svo ramlega víggirt, að kallað var hans mesta meistaraverk. Nú mátti heita, að þeir Eugen hefðu greiðan veg til Parísar og gætu sett Loðvíki fjórtánda þá kosti, er þeim þætta góðir, en á þeim tímum þorðu menn eigi að hætta sér langt

inn í óvina land, alla þá stund sem nokkur kastali var óunninn að baki þeim; fyrir því var nú hér látið staðar nema að sinni.

Ofan á alt hið mikla manntjón og hinn mikla fjárskaða, er Frakkar höfðu hrept um undanfarin ár, bættist það, að vetur sá, sem hér fór á eftir (1709) var einhver hinn harðasti, er um lánga tíma hafði gengið yfir Norðurálfuna¹. Dýr og fuglar féllu hrönnum saman, vínviður, korn og alls konar aldin frusu til skemda, og fjöldi bænda misti þannig áleigu sína og komust á vonarvöl; gengu þau harðindi eigi síður yfir Frakkland en önnur lönd. Þrengdi öll sú óhamingja svo mjög að Frakkakonungi, að hann leitaði á Hollendinga fastara en nokkru sinni áður, að sett væru grið og friður milli landanna; en þeir færðust undan, enda réðu þeir Eugen og Marlborough því, að tilmælum Loðvíks var enginn gamur gefinn. Konungur varð því að búa sig undir ófrið af nýju, og veitti honum það allerfitt, því að mjög var nú tekið að þverra hjá honum bæði fólk og fé. Þó fékk hann safnað svo miklum her, að frekar 100 þúsundir manna töldust undir vopnum. Yfir það lið setti konungur *Villars*; honum treystu Frakkar einum manna, að rétta hluta sinn og vinna það aptur, er aðrir höfðu mist, því að hann hafði aldrei beðið ósigur fyrir óvinum sínum. Með þessu liði hélt *Villars* til Niðurlanda. Bandamenn höfðu meira lið og betur búð en Frakkar, og héldu þegar í móti þeim; hittust þeir lítið eitt fyrir sunnan borg þá, er Mons heitir — hún er sunnarlega í Belgíu. Þar sátu Frakkar hjá þorpi einu, er *Malplaquet* heitir, og höfðu búizt þar svo vel um, að fæstum þótti árennilegt. Þó réðu þeir Eugen það af, að veita þeim þegar atgöngu. Ellefta dag septembers (1709) árla morguns hófst orustan og stóð fram yfir nófn. Eugen var í hægri fylkingararm, en Marlborough fyrir hinum vinstra; sótti Eugen svo hart fram, að Frakkar tóku að svigna fyrir, sendi *Villars* þá nokkrar sveitir manna úr miðhernum þeim til liðs. Marlborough fékk þegar sæð, að þunnskipaðri urðu miðfylkingar Frakka; gjörir þar þá áhlaup á sem harðast, og brýzt í gegnum, svo að herinn Frakka skiptist í tvent. Þannig var sigurinn unninn. *Villars* varð sár í orustunni svo að hann var borinn

1) Þann sama vetur var Karl 12. á ferð með Svíaher austur á Rússlandi og komst þar í miklar mannraunir sem segir í sögu hans.

burt af vígvellinum, og gat því eigi aðdugað sem skyldi; þó kom hann liði sínu svo kænlega undan, að eigi sáu hinir sér fært, að veita honum eptirför. Þessi orusta var mest og hörðust í öllu erfðastríðinu spánska, og er mælt að fallið hafi yfir 30000 af hvoruntveggja.

Nú mátti segja að lokin væri sund öll fyrir Loðvíki fjórta, enda lét hann þegar leita um sættir við óvini sína, en því betri kosti sem hann bauð, því harðari kröfur gjörðu þeir í móti; sýnir það bezst hve nauðulega hann þá var staddur, og hve ant honum var um að friður kæmist á, að hann bauð, að láta alt Elsas — það er allur Rínardalurinn fyrir vestan ána — af hendi, og þar að anki fleiri staði nyrðst á Frakklandi, og ganga að öllum þeim kjörum og kóstum, er bandamenn settu, nema þeim eina, að fara með liði á hendur Filippusi sonarsyni sínum og reka hann burt af Spáni, en hinu hét hann, að leggja fê til þess; það vildu þeir eigi þekkjast, og gekk þá eigi saman með þeim sættin, og ófriðurinn hófst að nýju vorið eptir (1710). En það kom hér berlega í ljós, eins og víðar í sögunni, að drottinn tekur í taumana þegar honum þykir tími til kominn og ofmetnaður manna ætlar úr hófi að keyra. Loðvík fjórtándi kunni sér ekki hóf; þá risu bandamenn í móti honum og brutu ofmetnað hans svo gjörsamlega á bak aptur, að hann sá sitt óvænna og leitaði friðarins af fullri alvöru. Við þau málalok hefðu þeir vel mátt una, en þeir þóttust hafa ráð hans og ríki í hendi sér, og vildu kúga Frakkland að fullu og öllu. En það átti eigi svo til að ganga. Á Englandi höfðu Whigmenn setið að völdum um nokkur ár og Marlborough verið fremstur í þeirra flokki; Sara kona hans var í miklum kærleikum við Önnu drotningu, var ákaflega drotnunargjörn og fékk flestu því fram komið er hún vildi; meðan sú vinátta stóð óhöggud, var það vitaskuld, að Marlborough hefði æztu hervöldin, og, að stríðinu væri alla þá stund áframhaldið. En nú bar svo til, að Sara stygði drotningu; þetta færðu Torymenn, óvinir Whigmanna og Marlboroughs sér í nyt, og töluðu svo um fyrir drotningu, að Sara var rekin frá hirðinni og maður hennar sviptur æztu hervöldum; Whigmenn sleptu stjórnarforráðum (1710) og Torymenn settust að völdum, og jafnskjótt sem það var orðið, fóru þeir að semja við Loðvík konúng um frið. *Oxford* greifi og *Boling-*

broke lávarður, nafnkendur af ritum sínum, voru helztu mennirnir í hinu nýja stjórnarráði. Litlu síðar (17. apr. 1711) andaðist Jósef keisari hinn fyrsti; hann dó úr bólunni að eins 32 ára gamall, og var sagður góður maður og vel að sér gjör um marga bluti. Hann átti engan son á lífi, og fyrir því erfði Karl erkihertogi bróðir hans, sem fyr er nefndur, ríki eptir hann, og var nefndur Karl 6. Nú var eigi við því að búast, að bandamenn vildu, að sá maður, er kominn var til ríkisstjórnar í Austurríki, Böhmen og Úngverjalandi, skyldi þar á ofan eignast Spánarveldi alt, bæði hér í álfu og fyrir vestan haf. Þess vegna voru þeir nú frá því horfnir, að reka Filippus fimta burt af Spáni, og hinir höfðu kostir, sem Loðvíki fjórtánda voru settir árið áður, hurfu nú að kalla af sjálfu sér. En er Englendingar voru gengnir úr liði bandamanna, sáu hinir sér eigi fært, að halda lengur til þrautar fram ófriðnum, og þannig komst loksins friður á, er saminn var í borg þeirri, er *Utrecht* heitir (1713) með svofeldum skilmálum:

1. Filippus fimti hélt konungdómi yfir Spáni og öllum þeim löndum, sem því ríki lutu annarstaðar en hér í álfu, en afsala varð hann sér öllum erfðarétti til Frakklands.
2. Karl keisari (hinn 6.) skyldi eignast Neapel, Sardínarey, Milanó og hin spánsku Niðurlönd (Belgíu).
3. Hertoginu af Savoyen fékk Sikiley og konungstign í þokkabót.
4. England fékk Gibraltar og eyna Minorka, og ýms verzlunarrettindi í löndum Spánarkonungs fyrir vestan haf. Af Frökkum fengu Englendingar Newfoundland, löndin við Huðsonsflóa og Akadíu (eða Nýjaskotland), «eptir hinum fornu landamerkjum». Þess utan varð Loðvík fjórtándi að samþykkjast það, að kjörfurstinn af Hannóver fengi konungstign á Englandi, vísa á burtu syni Jakobs Stúarts og afmá víggirðingar allar og höfn í Dunkerken.
5. Portúgal fékk nýlenduna St. Sakramento í Suðurameríku, er áður lá undir Spán.
6. Niðurlöndin urðu útundan, og höfðu þó lagt mikið í sölurnar. Þau fengu að eins rétt til að leggja setulið í ýmsa kastala í hinum spánsku Niðurlöndum, sem nú voru lögð undir Austurríki; átti það að vera til varnar móti Frökkum.

Keisarinn, Karl 6., vildi eigi ganga að þessum skilmálum, og hélt enn fram ófriði, en hafði nú engan liðsafla móti Frökkum; Eugen gat eigi rönd við reist, þó hann biði aldrei ósigur, en Villars vann aðra af hershöfðingjum keisarans, og ári síðar (1714) sá keisarinn sér eigi annað fært, en að samþykkjast það, er að sætt hafði orðið með mönnum í Útrecht árið áður. Algjörður friður komst því á í *Rastadt* milli keisarans og Frakka, og í *Baden* milli hins þýzka ríkis og Frakka. Eugen og Villars sömdu frið þenna af hendi málsaðila, og skildu vinir. Þannig var hinu spánska erfðastríði lokið.

Loðvík fjórtándi náði þannig miklu betri friðarkostum heldur en áhorfðist um stundarsakir. En þó hann gæti glatt sig við þau málalok sem urðu, var það þó margt sem að honum amaði hin síðustu æfjár hans, þar á meðal það, að hann varð að sjá á bak nánustu ættmönnum sínum. Þannig dó (1711) *Loðvík* ríkiserfinginn sonur hans, kominn um fimtugt. Þegar hann var dáinn stóð sonur hans, hertoginn af Bourgogne næstur til ríkiserfða, og gjörðu margir sér góðar vonir um hann, því að hann var sagður atgervimaður og átti góða konu, en ári síðar (1712) dóu þau bæði; skömmu þar á eftir dó eldri sonur þeirra Loðvík, hertogi af Bretagne, og nú var að eins eftir af niðjum hins gamla konungs eitt sveinbarn á öðru ári, er síðan varð konungur og nefndur Loðvík 15. Skömmu síðar en hér var komið andaðist Loðvík fjórtándi, (1. sept. 1715) sjötigi og sjö ára gamall, en hafði borið konungs nafn tvo vetur og sjötigi.

Af hinni löngu, umsvifamiklu og glæsilegu ríkisstjórn. Loðvíks fjórtánda, bar eigi einungis Frakkland miklar og margvíslegar menjar, heldur því nær öll Norðurálfan. Að því sleptu, sem beinlínis leiddi bæði fjær og nær af öllum hans mikla ófriði, og hér að framan er nokkuð frá skýrt, þá hafði Loðvík þar að auki svo margt fyrir stafni, er friðsamlegt mátti kalla, heima í ríki sínu, að aðrar þjóðir veittu því eptirtekt og tóku margt af því eftir. Versailles-borg, þar sem Loðvík hafði aðsetu, var fyrir hans daga lítil og allómerk, en hann lét reisa þar hina mestu og skrautlegustu konungshöll og prýða þar alt umhverfis á allar lundir, svo að þángað flyktist að múgur óg margmenni og tók sér þar bólfestu, og borgin varð á nokkrum árum margfalt stærri og skrautlegri en áður; flest stórmenni ríkisins

streymdi þángað, og kaus fremur að ala aldur sinn við hirðina í glaum og gleði og alls nægtum, heldur en í kyrð og fámenni á bógörðum sínum úti um landsbygðina; listamenn og vísindamenn skorti eigi heldur við hirðina, því að konungur var við þá hinn örlátasti. Þá komu og upp margir ágætir vísindamenn á Frakklandi — frá þeim tímum eru hin nafnfrægu skáld *Molière* † 1673, *Corneille* † 1684 og *Racine* † 1699, og ýmsir fleiri—; frakknesk rit og frakknesk túnga barst út um alla Norðrálfuna, og mönnum fanst mikið um hvorttveggja, og stældu eptir því í öðrum löndum. Við hirðir konunganna sömdu menn sig að siðum Frakka og lögðu meiri stund á frakkneska túngu en móðurmál sitt, því að hún ein þótti sæma heldri mönnum; latínsk túnga hafði til þess tíma verið viðhöfð í samningum og bréfa-gjörðum milli konunganna, en nú var því hætt og frakknesk túnga tekin í staðinn, og hefir svo víðast verið síðan. En þó að flest væri glæsilegt í nánd við Loðvík fjórtanda, þá var hagur alþýðunnar á Frakklandi alt annað en álitlegur, einkum á ofanverðum ríkisárum hans; til hins langvinna ófriðar þurfti bæði meira fé og meiri mannafla en þjóðin gat undir risið; jarðeignir voru annaðhvort í höndum höfðingjanna eða klerkanna, og hvorirtveggja hugsuðu eigi um annað en heimta sem mest af leiguliðum sínum og kúga þá á ýmsar lundir. Af þessu gjörðist svo mikil aðgreining milli hinna æðri stétta og lægri, að landsmenn allir greindust í tvær sveitir, önnur lifði í allsnægtum, hin við skort og örbirgð; í þessum mikla mismun á lífskjörum hinnar frakknesku þjóðar á hin stórkostlega byltíng, sem seinna kom þar fram, sínar rætur.

Norðurlönd (1648—1700).

1. *Danmörk og Norvegur.* Kristján fjórði, Dana og Norðmannakonungur, dó 1648 (28. febr.) eptir lánga og merkilega ríkisstjórn, eins og fyr er ritað. Kristján sonur hans, konungs-efnið, var dáinn ári áður, en *Friðrik*, er honum var næstur að aldri, og þá kominn um fertugt, var enn eigi kjörinn til ríkis, og var því konungslaust um hríð í Danmörku, þángað til *ríkisdagurinn* átti fund með sér til konungskosningar. En á meðan svo stóð höfðu 4 æztu valdsmenn ríkisins stjórnarstörfin á hendi, og var *Korff* *Úlfeldt* þeirra helztur. Til ríkisdagsins

komu aðalsmenn, klerkar og borgarastéttin, en bændur var alls eigi getið. Var Friðrik, sonur Kristjáns fjórða, því næst kjörinn til konungs og nefndur *Friðrik þriðji* (1648—1670), en vinna varð hann það til konungstignarinnar, að rita nafn sitt undir þá skilmálaskrá, er stórmenni ríkisins (eða ríkisráðið) setti honum, og voru þeir skilmálar harðari en nokkur Danakonungur hafði áður undir gengizt. Slíka skrá kölluðu Danir: *Haandfæstning*. Var þar ákveðið meðal annars, að aðallinn skyldi halda öllum sínum forrættindum óskertum; að í ríkisráðinu skyldu sitja 23 menn, og á þess valdi, en eigi konungs, að skipa þar rúm aptur, ef autt yrði; ef eitthvert af æztu embættum ríkisins¹ losnaði, skyldi ríkisráðið tiltaka þann, er það embætti fengi aptur; eigi mátti konungur fara af landi burt nema ríkisráðið leyfði, og eigi hækka gjöldin á lénsmönnum krúnunnar — en það hafði Kristján fjórði stundum gjört, meðan hann var á upprættum fótum, til þess að auka tekjur ríkisins. — Var þannig loka fyrir skotið að bæta með hægu móti fjárhag ríkisins, en því nær allur ágóði af lénshörðum krúnunnar lenti hjá þeim mönnum einum, er þær höfðu til umráða; og það voru eigi aðrir en aðalsmenn. Það mátti því segja, að ríkisstjórnin væri í höndum ríkisráðsins. Friðrik þriðji gekk að öllum þeim kostum, sem honum voru settir, en hann hugsaði sér í kyrpey að rétta hluta sinn þó seinna yrði. Hann var dulur maður í skapi og kunni vel að stilla geð sitt, og var að því leyti ólíkur Kristjáni konungi föður sínum. Hagur Danmerkur var um þær mundir mjög bágur: ríkisfjárhirzlar tómar, landher og skipalið í vanhirðingu, allur þorri landslýðsins margþjáður af sérplægnum aðalsmönnum, alt vald í höndum ríkisráðsins en því nær ekkert hjá konungi. Þannig var ástatt innanlands, en ef lengra var litið, þá voru Svíar á næstu grösum, frægir og völdugir og ágengir, og buðu Dönum af sér hinn mesta geig. Friðriki konungi var fast

1) Æztu embættismenn ríkisins voru um þessar mundir: *Rigshofmesteren*, er stóð fyrir valdstjórnarmálum ríkisins, hann hafði hirðstjórn á hendi og umsjón alla með konungstekjum og eignum krúnunnar. *Rigskantsleren* stýrði öllum dómsmálum. *Rigsmarsken* var fyrir hermálum (eins og Krigsministeren nú á dögum), og *Rigsadmiralen* hafði yfirstjórn herskipaflotans og sjóliðsmála allra (nú er sá maður nefndur: Marineminister).

í huga að ráða hér á nokkra bót, en slíkt var eigi auðgjört. *Korfits Úlfeldt* var um þessar mundir allra manna ríkastur og voldugastur í Danmörku. Kona hans hét Eleonore Kristin, dóttir Kristjáns fjórða, eins og áður er sagt, afbragðskona bæði að viti og mannkostum. Drotning Friðriks þriðja hét Sofía Amalía frá Brúnsvík-Lüneburg á Þýzkalandi. Drotningu var gramt í geði til Eleonoru, því að meðan Kristján konungur fjórði var uppi, var þessi dóttir hans í svo miklum hávegum, að við sjálft lá að hinnar gætti lítið. Það var og sagt, að Úlfeldt væri mest um að kenna, að dráttur varð nokkur á kosningu Friðriks, og, að þeir kostir voru svo harðir, sem honum voru settir í stjórnarskránni, og hann varð að gangast undir. Það ræður að líkindum, að konungi hafi eigi verið hlýtt í skapi til Úlfeldts. Ári síðar en Friðrik kom til ríkis, sendi hann Úlfeldt til Hollands, með þeim erindum, að leita þáðan vináttu og styrks, og leiddi sú sendiför til þess, að samningur var gjörður milli Dana og Hollendinga (Niðurlendinga), að hvorir skyldu öðrum veita, bæði á sjó og landi, ef aðrirhvorir þyrftu liðs við. Samningur þessi var einkum mikilsverður fyrir Dani þegar þess er gætt, hve geigvænlegir Svíar voru þeim. Meðan Úlfeldt var í erindagjörðum þessum, lét konungur meira til sín taka en áður um ýms ríkismál, og þá er Úlfeldt kom heim aptur fékk hann eigi þær viðtökur, er hann hafði búizt við og þóttist eiga skilið. En það var eigi þar með búið. Konungur bauð að rannsaka skyldi gjörðir Úlfeldts bæði að fornu og nýju, bæði það, er hann hafði aðhafzt á Hollandi, og hitt hvernig hann hefði stýrt og varið fæ ríkisins á dögum Kristjáns fjórða, því að grunur læk á, að hann hefði nokkuð af því fæ undir sig dregið. Af öllu saman þessu varð Úlfeldt bæði hryggur og reiður, hætti öllum stjórnarstörfum og hafði sig á burt frá hirðinni. En þá kom það upp, að hirðmaður einn, er Valter hét, og kona ein að nafni Dína Vinhofer, og ekki vel ræmd, báru þann óhróður á Úlfeldt og konu hans, að þau hefðu ætlað að gefa konungi eitur, og ráða hann þannig af dögum. Sá varð endir á því máli, að Dína reyndist ósannsöglismaður, og var tekin af lífi, en Valter gjörður útlægur. En alt um það, Úlfeldt þóttist eigi lengur mega óhultur vera í Danmörku, og flýði þáðan með konu og börn fyrst til Hollands og þáðan til Svíþjóðar. Þar sat þá Kristín að ríkjum,

dóttir Gústafs Adolfs, og fékk hann þar góðar viðtökur; gjörði Úlfeldt þar alt er hann kunni, bæði með fé og fortölum, til þess að æsa Svía til ófriðar gegn Dönum, og því hinu sama hélt hann fram eptir að Kristín drottning var farin úr landi, en Karl Gustaf kominn þar til ríkis. Úlfeldt var nú sviptur þeim völdum og metorðum, er hann hafði haft í Danmörku, og eigur hans allar gjörðar upptækar. *Hannibal Sehested* átti aðra dóttur Kristjáns fjórða, og var þá landstjóri (Statholder) í Norvegi. Honum var og boðið að gjöra grein fyrir gjörðum sínum, enda var hann orðinn þar stórauðigur maður. Hann kjöri heldur að leggja niður völdin og láta laust við konúng alt það jarðagóz, er hann hafði eignast í Norvegi, og er sagt, að það hafi verið 1100 stórarjarðir eða höfnuból. Að nokkrum tíma liðnum komst hann þó aptur í kærleika við Friðrik konúng, en Úlfeldt vildi í enga vægja fyrir konúngi.

Það var nú þessu næst, að ófriðaðist með Karli Gústaf og Pólverjum, eins og síðar segir. En meðan sá ófriður stóð og Svíar börðust á Póllandi, hugðu ýmsir menn í Danmörku, og meðal þeirra var konúngur, að nú mundi hið bezta færi gefast til að rétta hlut sinn á Svíum og vinna aptur þau lönd, er þeir höfðu laus látið fyrir þeim í Brömsebrúar-friðnum (1645). En þó að hinir byggnari menn teldu á því öll tormærki og segðu, að til þess skorti bæði fé og liðsafla og skipakost, þá urðu hinir yfirsterkari, er til ófriðarins fýstu; enda höfðu þeir það til síns máls, að Pólland, Brandenburg, Hollendingar og Þýzkalandskeisari hétu að veita Dönum lið, ef þeir vildu ráðast á Svíþjóð; var það að vísu álitlegt boð, en þó máttu menn vita, að fremur mundi þjóðum þessum um hugað, að hafa Svía burt af Póllandi og Þýzkalandi, en hlitt að hjálpa Dönum heima fyrir. Friðrik konúngur sagði Svíum þannig stríð á hendur (1657), og sendi Anders Bille (Rigsmarsken) með hermanns suður á Holtsetaland, og tóku Danir þar vígi þau og kastala, er Friðrik hertogi hafði umráð yfir, því að þeir þóttust vita, að hertoginn, er áður hafði reynzt þeim illa og nú var orðinn tengdafaðir Karls Gustafs, mundi þegar ganga í lið með Svíum. En er Svíakonúngi kemur sú hersaga, er hann skjótur til ráða, og er kominn með liði sínu norður á Holtsetaland fyr en Danir vissu þess nokkrar vonir. Hrukku þeir nú fyrir og norður á Jótland og settust að í Frið-

ricín-kastala, er þá var nýgjörður og allsterkur, og höfðu þar 6000 vígra manna til varnar; þó vann Karl Gústaf Wrangel — sem fyr er nefndur í þrjátígi ára stríðinu — kastalann eptir skamma sókn, og hafði að eins 3000 manna. Eptir þetta lögðu Svíar Jótland alt undir sig, og konungur þeirra lagði nú á það allan hug að komast yfir á eyjarnar. Hann hafði herskip mörg við höndina og reyndi þannig að flytja lið sitt yfir eyjasundin, en það tókst eigi að heldur, því að Henrik Bjelke, herskipaforingi Danakonúngs, ónýtti með harðfylgi miklu þá fyrirællan. Hinn næsta vetur þar á eptir (1657—58) gjörði frost mikil, svo að sjóinn lagði milli eyjanna, og litlu eptir miðjan vetur fór Karl Gústaf á ísum með herinn yfir á Fjón og þaðan ey af ey, um Långaland, Láland og Falstur, og nam eigi staðar fyr en á Sjálandi, en landsmenn gáfust upp þar sem konungur fór yfir. Korfits Úlfeldt var í þeirri för með konungi og vann honum það gagn, er hann kunni. Við þessum tíðindum höfðu menn eigi búizt í Kaupmannahöfn, enda varð þar nú ráðafátt fyrir; þar skorti bæði liðsafla og öruggar girðingar til mótvarna; þeir sem verið höfðu upphafsmenn þessa ófriðar, sáu það nú um seinan, hve ófyrirsynju friðurinn var roflinn. Hér var því eigi annað ráð vænna, en að senda menn á fund Svíakonúngs, og biðjast friðar, og fyrir milligöngu hins enska og frakkneska sendibæða var nú saminn í Hróarskeldu (26. febr. 1658) svofeldur friður: Svíar fengu Skán, Halland, Bleking, Bahúslæn, Þrándheim og Borgundarhólm, og þess utan 12 herskip og 2000 riddara, Friðrik hertogi var leystur undan allri lénsskyldu við Danakonung, og Korfits Úlfeldt skyldi fá aptur eignir sínar. Norðmenn höfðu einnig gripið til vopna og rekið Svía af höndum sér, en alt um það sneiddist þó af landi þeirra í Hróarskeldu-friðnum eins og nú var sagt, án þess þeim væri um að kenna.

Karl Gústaf þóttist nú sannfærður um, að lítillar mótstöðu var að vænta af Dönum, honum kom því til hugar, að gjöra hér skjótan endi á og leggja undir sig alt ríki Danakonúngs. Fyrir því lét hann drátt verða á ýmsu, er gjöra skyldi, eptir því sem um hafði verið samið í friðargjörðinni, en bjó lið sitt í kyrþey. Og 5 mánuðum síðar en friðurinn varð, lenti Svíakonungur við Krosseyri á Sjálandi, gekk þar á land og lýsti yfir því, að nú væri úti um friðinn. Dönum brá heldur en eigi í brún og spurðu

ínginn Gústaf Stenbökk¹ að nafni. Karl Gústaf tók honum eigi sem beztt og mælti: «úr því að fjandinn tók allar geiturnar, þá gat hann tekið bukkinn með». Eptir þann mikla mannskaða, og eptir ýms önnur óhöpp fór Karl Gústaf burt af Danmörku og til Gautaborgar í Svíþjóð og andaðist þar á öndverðu ári 1660. Ef Ruyter hefði viljað flytja bandamannaherinn yfir á Sjáland og Skán, mundu Svíar hafa beðið þar ósigur, og Danir náð aptur skattlöndum sínum (Skáni, Hallandi og Bleking), en það vildi Ruyter með engn móti, því að Englar og Hollendingarildu eigi að Danir, eða nokkur ein þjóð væri einráð yfir Eyrarsundi eða löndum þeim, sem að því liggja beggja megin. Friður komst nú á milli landanna, og var saminn í Kaupmannahöfn (í maí-mán. 1660). Fengu Danir aptur Þrándheim og Borgundarhólm, en að öðru leyti stóð alt við það, sem um hafði verið samið í Hróarskeldu-friðnum (1658).

Nú var að vísu stríðið um garð gengið og kominn friður, en Danmörk var engu að síður í miklum kröggum: nokkur hin elztu og beztu skattlönd voru gengin undan krúnunni og komin í hendur Svíum; landherinn og skipafloiti var til einskis nýtur og verzlun öll í dái; ríkið var í stórskuldum og fjárhirztlur tómar, svo að embættismönnum urðu eigi goldin laun þeirra; vinir og óvinir höfðu farið hershöndum um landið, bæir og bygðalög láu í auðn, og almenn neyð og hugleysi ríkti landshorna í millum. Hverjum var um alla þá eynd að kenna? Éngum öðrum en aðalsmönnum landsins, var svarið úr öllum áttum. Aðallinn sýgur allan merg úr landinu, hann er laus af öllum skyldum og sköttum, en dregur sig alstaðar í hlé, ef nokkuð þarf fram að leggja til landsins þarfa og almennings heilla. Þó konungur vilji eitthvað það gjöra, sem öllum má fyrir beztu verða, þá getur hann engu áorkað, því að aðallinn bindur báðar hans hendur. Þannig hugsuðu alment og þannig töluðu borgarar í Danmörku um þær mundir, en þó einkum í Kaupmannahöfn. Þeir höfðu fengið ýms einkaréttindi, er konungur veitti þeim sökum drengilegrar varnar gegn Svíum, og þóttust nú mega djarflega um tala. Konungur sá hverju fram fór og kvaddi aðalmennt, klerka og borgara til ríkisdags í Kaupmannahöfn (1660), til þess að leggja ráðin

1) Hann var faðir Magnúsar Stenbökks, nafnfrægs hershöfðingja á dögum Karls tólfta.

á hvað gjöra skyldi landi og þjóð til viðreisnar. Bændur voru eigi, heldur en vant var, kvaddir til þessa þinga. Oddviti klerkanna var Hans Svanur (Svane), Sjálands biskup, skunginn maður og mjög vel máli farinn; foringi borgaranna hét Hans Nansen, borgmeistari í Kaupmannahöfn, djarfur maður og einarður. Aðalsmenn höfðu engan dugandi forustumann, því að helztu menn úr þeim flokki, Hannibal Sehested, Hans Schack og Henrik Bjelke, voru gengnir í lið með konungi og hirdinni, og konungurinn, sem var bygginn maður, sá um, að hafa þá báða sér bliðholla, Svane og Nansen; en það var hið sama, sem að klerkar og borgarar væru honum fylgjandi. Til þess að bæta úr fjárskorti ríkissjóðsins bar stjórnin þá tillögu fram, að leggja almennt neyslugjald á landsmenn, en aðallinn vildi hafa sig undanþeginn slíku gjaldi, og bar fyrir einhættindi sín. Þó slakaði hann nokkuð til í ýmsum greinum; en eftir því sem lengra leið fram á þingið, urðu klerkar og borgarar djarfmæltari og kröfðust meiri jafnaðar, en áður hafði verið, á öllum sköttum og skyldum, og að síðustu báru þeir upp það nýmæli, að ráði þeirra Svans biskups og Nansens, að konungdómurinn skyldi að erfðum ganga í Danmörku. Ríkisráðið vildi eigi á það fallast, og leituðu hinir þá konungs aðgjörða; hann lét sem hann kæmi hvergi nærri, en gaf þó ríkisráðinu í skyn, að hann mundi eigi slá hendinni á móti slíku boði. Aðallinn reiddist og ætlaði að ganga af þingi og fara burt úr borginni, en sem hinir urðu þess vísari, þá var borgarhliðum lokað og liðsmönnum sagt að vera viðbúnum hve nær sem til þeirra yrði kallað¹. Sá nú ríkisráðið og aðallinn engan annan kost, en gjöra sem hinir vildu, og þannig var yfir því lýst, að konungstignin skyldi ganga að erfð-

1) Það var einn dag um þessar mundir, að þeir hittust á strætum úti skamt frá konungshöllinni *Otto Krag*, einn úr ríkisráðinu, og *Nansen* borgmeistari. Þess er eigi getið, að margt yrði um kveðjur með þeim, en *Krag* mælti: „þekkirðu þann sem þarna stendur?“, og bentí á *blátur*, en þar voru sekir menn settir í dýflizur. *Nansen* lét sér eigi bilt við verða, en svaraði þannig: „Sérðu hvað þar hængir?“ og bentí á tarninn á *Mariukirkju*; þar hékk „*Stormklukkan*“, er vant var að hringja, þá er ófrið bar að höndum, og kalla þurfti borgarlýðinn til vopna. Sýnir þetta dæmi hugarfar aðalsmanna og borgara hvorra til annara.

um til niðja Friðriks þriðja bæði í karlegg og kvennlegg. Þessu næst voru nokkrir af ráðinu og þingmönnum kvaddir í nefnd til þess að koma sér niður á hverju breyta þyrfti í stjórnarskrá ríkisins. Urðu menn skjótt á það sáttir, að skuldbindingarskrá sú, er konungur hafði undir ritað, þá er hann var kjörinn, skyldi ógild vera og með öllu afmáð; en um hitt komu menn sér eigi saman, hver takmörk skyldi í þess stað setja konungsvaldinu. Aðallinn vildi engu sleppa af sínum fornu réttindum, og var eigi annað fyrir að sjá, en endaleysu og vandræði; en þá tók Svanur biskup til máls, og fór um það mörgum fögrum orðum, að konungur væri alls góðs af þeim maklegur, og öllum mundi fyrir beztu, að leggja málið á hans vald; réðst það þá af, að skuldbindingarskrá sú, er áður var nefnd, var feld úr gildi, en ekkert sett aptur í hennar stað.

Á þann hátt varð Friðrik þriðji erfðakonungur, en hitt var engan veginn tilætlun eða tillaga ríkisdagsins, að afsala konungi fulla einveldisstjórn í hendur. Mennt sátu á þingi lengi eftir þetta, samþykktu ýms lög og kváðu á um skatta og skyldur þjóðarinnar, og í ýmsum réttarbótum, er konungur gjörði um þær mundir, er skýrt kveðið á, að ríkisdagurinn hafi löggjafarvald. En er ríkisdeginum var lokið, þingmenn farnir til heimila sinna, og komið var fram í janúar-mánuð 1661, þá birtist mönnum það nýmæli frá konungi, er segir: að hann hafi fallan erfðarétt og óbundið einveldi í ríki sínu, og fulla heimild til að skipa til um ríkiserfðir. Nýmæli þetta var nefnt *erfða-einveldisskrá* (Arveenevoldsakt 10. jan. 1661), og undir það ritaði hver aðalsmaður í Danmörku nafn sitt, allir klerkar, og margir af borgarastétt, en eigi þótti við þurfa að bændur rituðu undir. Annað samkynja skjal var sent til Norvegs til undirskriptar á því sama ári. En ári síðar til Íslands og Færeyja. Þannig var stjórnar-breyting þessi komin í kríng, og konungurinn orðinn erfða- og einvaldskonungur í stað þess sem hann áður var rígbundinn valkonungur. Litlu síðar lét konungur semja ný grundvallarlög fyrir Danmörk og Norveg, hin alkunnu *konúngalög*, er svo eru nefnd. Friðrik þriðji ritaði nafn sitt undir þau 14. nóv. 1665, en enginn fékk að sjá þau fyr en konungur var dáinn, og eigi voru þau prentuð fyr en á dögum Friðriks fjórða, fyrst á átjándu öld.

Með einveldinu varð breyting á allri stjórn ríkisins. Stjórnarstörfum þeim, sem ríkisráðið áður hafði haft á hendi, var nú skipt niður á 6 stjórnarráð (Kollegier), er svo voru nefnd: *Statskollegiet*, er stýrði öllum viðskiptum ríkisins við aðrar þjóðir, *Skatthammerkollegiet*, er hafði fjárvarðveislu og skattamál til forráða, *Krigskollegiet* gegndi hermálum, *Admiralitetskollegiet* sjómálum, *Kancelliet* dómsmálum að nokkru leyti og kirkjumálum, og *Justitskollegiet* eða *hæstirættur*, er varð efsti dómur ríkisins, og þaðan varð engum málum skotið. Í öll þessi stjórnarráð var skipað jafnmörgum af aðalsmönnum og af borgarastétt, og gjörði konungur það til þess að fá nokkurt jafnvægi móti aðlunum. Sjálfur var konungur forseti í hæstarætti. En forseta hinna 5 stjórnarráða kvaddi konungur alla á fundi með sér, er hann vildi ráða til lykta þeim málum, er rædd höfðu verið í hverju einstöku stjórnarráði fyrir sig. Slíkir forsetafundir voru nefndir *leyndarráð* (Geheime-Statsraad). Væru það einhver sérleg vandamál, þá voru fleiri menn kvaddir í leyndarráðið. Lénin, sem áður höfðu verið, voru lögð til krúunnar, og í stað lénsmanna komu *stiptamtmenn* og *amtmenn* með fastákveðnum launum; var ríkissjóðnum það hinn mesti ábati, svo að nú urðu tekjurnar margfaldar við það, sem áður hafði verið, meðan því nær allir skattar og skyldur lénanna runnu inn hjá lénsmönnum. En sem fjárhagurinn batnaði, kom konungur að dæmi annara þjóðhöfðingja föstu herliði á fót í ríki sínu hér um bil 24000 manna; hann lét og auka og bæta flota sinn, og gekst sjóliðsforinginn *Kort Sivertsen Adeler* fyrir því; hann var norðmaður og orðinn frægur af framgöngu sinni í þjónustu Venetlumanna gegn Tyrkjum.

Þó svo megi virðast, að sumt breyttist til hins betra í Danmörku, eptir að einveldisstjórn komst þar á, þá verður því eigi neitað, að þjóðinni brást mærgt af því, sem hún hafði gjört sér vonir um. Þannig höldu aðalsmenn flestum einkaréttindum sínum, einkum að því leyti er snerti alþýðu manna, eður bændur, og lítið var gjört til þess að bæta kjör þeirra. Kaupstaðabúar fengu að sönnu ýms ný réttindi, og sum þeirra voru bændum til einbers skaða, en það sem eptir var af fornum frelsisanda og sjálfsforræði hjá borgabúum, leið nú að mestu undir lok, því að nú komu allsstaðar valdsmenn, er konungur setti þeim. Men

urðu afhuga öllum þjóðmálefnum, og fálu stjórninni öll afskipti þeirra á hendur, en alt þjóðlíf, sem knýr lönd og lýði til framkvæmda og framfara, lagðist í dá, og í því dái lá það um marga mannsaldra. Þegar hin danska einveldisstjórn er borin saman við sumar aðrar, verður eigi annað um hana sagt, en að hún alment beitti veldi sínu með mildi og réttvísi, en þó kemur það fyrir, að hún beitti gjöræði og hörku, og til dæmis má færa Gunde Rosenkrands, einn af ríkisráðinu sem verið hafði, lærðan mann og merkan. Hann varð ósáttur við einn af gæðingum Friðriks þriðja, þjóðverakan mann að nafni Gabel, og varð að fara af landi burt. Annar aðalsmaður að nafni Kai Lykke, stórríkur maður og vel metinn, var dæmdur til dauða, en mynd hans hálsbögginn (*deyddur in effigie*), en hann komst sjálfur undan til annara landa. En sök hans var sú, að hann hafði í bréfi til konu einnar talað eitthvað ógætilega um drotninguna og það fyrir mörgum árum. Úlfeldt var að visu einkis góðs maklegur, en þó var honum lokað griðum í friðarsamningum Dana við Svía; alt um það var hann tekinn og settur í dýflizu og haldið þar lengi, en slapp þaðan, og þá var dæmt af honum mannorð, eignir og líf; en af því að hann náðist eigi, var hefnzt á mynd hans; garður hans í Kaupmannahöfn var rifinn til grunna og settur þar steinstöpull í staðinn, og þar á þessi orð: „Til evig Skam og Skjændsel for Landsforræderen Korfits Úlfeldt“, og þar stóð stöpullinn þangað til hann var tekinn burt 1841. Eigur Úlfeldts féllu allar undir krúnuna, og voru þær eigi smáar. Sjálfur fór hann með börn sín félans og huldu höfði land úr landi þar til hann dó á báti suður á Rínfljóti, en synir hans jörðuðu hann í kyrpey þar á árbakkanum. En þó sumum hafði þótt Úlfeldt sárt leikinn, var það þó ekkert hjá því, sem hin göfuga Eleónóra, kona hans, varð að líða. Hún fór til Englands á fund Karls konungs annars, til þess að krefja hann um skuldafé, er Úlfeldt átti hjá honum frá fyrri tíð; en Karl var það lítilmenni, að hann seldi Dönum Eleónóru í hendur til þess að losast við skuldina. Þegar komið var með Eleónóru til Danmerkur, var hún leidd fyrir drotningu, svipt gulli og gímsteinum og klæðum þeim sem hún bar, og færð í vondar slíkur, og því næst sett í einhverja hina verstu dýflizu í Bláturni, og þar fékk hún eigi að hafa svo mikið sem huff heldur bein til að

matast með, og er hún vildi stytta sér stundir með handyrðum, þá voru öll áhöld af henni tekin. Þar sat Eleónóra systir hins einvalda konungs, og að allra dómi saklaus, 22 ár og hart haldin alla þá stund er hin harðhjartaða drottning Sofía Amalía lifði. Loksins fékk hún lausn á dögum Kristjáns fimta (1685), og gaf hann henni garð einn á Lágalandi, og lifði hún þá enn lengi og andaðist þar 77 ára gömul árið 1698.

Árið 1665 lá nærri að ófriðaðist með Dönum og Englendingum fyrir þá sök, að nokkur hollenzk kaupför flýðu undan enskum herskipum inn til Björgvinar. Vildi hinn enski admíráll taka skipin þaðan með ofríki, en bófuðsmaðurinn varnaði honum þess. Gengu Danir þá í lið með Hollendingum, en skömmu þar á eftir var friðurinn saminn í Breda (1667), og datt svo það mál niður. Til miskliðar horfði og um stund milli Friðriks þriðja og frænda hans Kristjáns Albrekts hertoga af Holstein Gottorp, einkum út af því, hverja þýðingu ætti að leggja í einveldisstjórn þá, sem hertoganum var til skilin, þá er Danir og Svíar sömdu friðinn milli sín. Þó jöfnuðu þeir frændur þetta með sér, og konungur gipti hertoganum dóttur sína, til þess að tryggðir mæltu því betur haldast. Nokkru síðar gipti Friðrik konungur aðra dóttur sína Karli Svíakonungi ellefta, en það kom fram þó síðar yrði, að friðnum var eigi að borgnara fyrir þessar mægðir.

Friðrik þriðji var maður vellærður og unni vísindum. Hann setti á stofn hina miklu bókahlöðu í Kaupmannahöfn, sem kend er við konúnginn. Þá voru og uppi nokkrir nafnkendir fræðimenn: Ole Vorm, fornfræðingur og rúnameistari, Hans Resen og Kaspar Brochmand, biskupar, Tómas Bartholín ágætur læknir og fjölfróður maður, Íslendingarnir Brynjúlfur biskup Sveinsson († 1675) og Þormóður Torfason (Torfæus) († 1719), en Arngrímur lærði dó sama árið (1648) sem Friðrik þriðji kom til ríkis. Flestar bækur sem út komu í Danmörku, voru enn eins og fyr ritaðar á latínumáli, og Danir lögðu litla rækt við móðurmál sitt um þær mundir; alþýða manna fór því að mestu hlutlaus af þeim fróðleik. Friðrik þriðji dó 1670 hér um bil 60 ára gamall.

Eftir Friðrik þriðja kom sonur hans, *Kristján hinn 5.* til ríkis í Danmörku og Norvegi. Hann var kjarkmaður minni en

faðir hans, gæflyndur og gefinn mjög fyrir skraut og skemtunar, og hneigðist í mörgu að síðum Loðvika fjórtánda, er þá þótti vera fyrirmynd allra konunga. Kristján konungur lét trúnaðarmenn sína að miklu leyti annast stjórnarstörfin, og, hin fyrstu ríkisár hans, ræð sá maður mestu hjá honum, er *Pétur Schumacher* hét. Hann var fæddur í Kaupmannahöfn árið 1635, af lágum stigum, en vakti þegar á unga aldri sakir frábærra námsgáfna athygli lærðra manna á sér, og þar á meðal Friðriks konungs þriðja. Lét konungur hann framast erlendis, og tók hann í sína þjónustu, er hann kom heim aftur, og fal honum ýms vandamál á hendur, þar á meðal að semja konungalögin. Þegar Kristján fimti var kominn til ríkis, gjörði hann Pétur Schumacher að æðsta ráðgjafa sínum, veitti honum litlu síðar greifdign og nýtt nafn og nefndi hann *Griffensfeld*, og gaf honum jarðeignir miklar í Norvegi (greifadæmið Túnsberg, er seinna nefndist Jarlsberg). Á fyrstu ríkisárum sínum gjörði Kristján fimti margt, er einkum miðaði til þess að auka og styrkja konungsvaldið. Þannig kom hann fótum undir nýja aðalsmannastétt, sem nefndir voru *greifar* og *barónar*; áttu þeir að vera einskonar jafnvægi móti hinum fornu aðalsmönnum. Alt þetta nýja stórmenni fékk mörg og mikil einkaréttindi fyrir sig og jarðir sínar; höfðingjar þessir þurftu hvorki að svara sköttum eða tölundum af höfuðbólum sínum, eða af mörgum þeim jörðum, sem þar lágu undir, og bændur þeirra bjuggu á; þeir höfðu rétt til að skipa þá menn, sem þeir vildu, til embætta á jarðeignum sínum, hvort heldur andlegra eður veraldlegra, og slíkir valdsmenn og klerkar voru í þeirra þjónustu og þeim mjög háðir. En þó höfðingjar þessir væru lausir af flestum sköttum og skyldum, voru bændur, sem sátu á jörðum þeirra, skattskyldir, þó eigi til fjárhirzlu ríkisins heldur til þessara sinna landsdrotna. Framan úr miðöldum höfðu bændur verið skyldir að vinna dagsverk á höfuðbóli eða heimaþjórð landsdrotna sinna, en þessi skyldukvöð á bændum (Hoveri) varð þeim nú miklu tilfinnanlegri en áður, af því, að höfuðból aðalsmannanna voru orðin miklu stærri nú en áður. Má því með sanní segja, að kjör bændna í Danmörku yrðu verri nú en áður hafði verið meðan hið forna aðalsveldi stóð í blóma. Allur þorri þessara hinna nýorðnu aðalsmanna var kominn sunnan af Þýzkalandi, og unnu

eigi Danmörku eða dönsku þjóðerni meira en í meðallagi. Kristján fimti setti á stofn tvenns konar riddarastétt, eða kom fyrst algjörðri reglu á það í ríki sínu: fílsriddara- og dannebrogssriddara-stétt (Elefantordenen og Dannebrogssordenen), en þar komust eigi aðrir að en aðalsmenn, og stóð svo fram á daga Friðriks sjötta. Þar að auki setti Kristján fimti lög um *nafnbætur* (Rang), og myndaðist þannig nýr flokkur manna í ríkinu með sérstökum réttindum, því að þeir menn, sem slíkar nafnbætur hlutu, fengu réttindi til jafns við aðalsmenn fyrir sig og skilgetin börn sín, þó eigi hver og einn nafnbótamaður, heldur að eins þeir, er þegið höfðu hinar æðri nafnbætur. Þeir sem nafnbætturnar fengu þokuðust þannig nær konungdóminum, og mismunurinn milli aðalsmanna og borgarastéttarinnar minkaði á þann hátt að nokkru leyti.

A dögum Kristjáns fimta var allgóð forstaða veitt herbúnaði öllum, bæði til lands og sjávar, vísindi efldust talsvert og verzlun jókst til muna. Danir eignuðust um það leyti (1672) eyjarnar St. Thomas og St. Jan í Vestindíum. Greifadæmið Oldenburg fékk Kristján konungur með ráðum og dáð Griffenfelds. En því var svo varið, að hinn síðasti greifi, er fyrir því landi ræð, og dó litlu á undan Friðriki konungi þriðja, hafði ánafnað land sitt bæði Danakonungi og Kristjáni Albrekt hertoga af Holstein-Gottorp. En hirðrættur keisarans dæmdi hertoganum af Plön landið (greifadæmið) alt. Við þessu hafði Griffenfeld búizt, og fengið Plönar-hertoga til að sleppa kröfu sinni, og afsala sér landið til konungs móti því, að fá í þokkabót lítinn landskika og nokkuð í lausafé. Þannig komst Oldenburg í hendur Danakonungi, en hertoginn, Kristján Albrekt, reiddist Kristjáni Danakonungi mági sínum (hann átti systur Kristjáns), og leitaði vináttu og sambands við Svíakonung.

Um þessar mundir hófst ófriður mikill suður í löndum. Loðvík fjórtándi ræðst á Holland (1672), eins og fyr er ritað. Griffenfeld gaf það ráð, að Danmörk skyldi þar engan hlut í eiga, heldur sitja hjá og forðast umfram alt fjandskap við Frakka, er þá voru hvað voldugastir, og við Svía sem voru bandamenn Frakka. En Kristján fimti vildi eigi hlýða ráðum hins vitra ráðgjafa; hann vildi vinna sér eitthvað til frægðar og ná aptur með vopnum undir sig löndum þeim fyrir austan Eyrarsund, er Karl

Gústaf hafði tekið. Friðrik Vilbjálmur, kjörfursti í Brandenburg, reri og að því öllum árum, að Danir gengi í lið með sér, keisarapum, Spánverjum og Hollendingum móti Frökkum, og þannig hófst hinn *skánski ófriður* milli Dana og Svía (1675). Hertoginn af Gottorp vildi eigi fylgja Dönum sem við var að búast; lét Kristján konungur þá taka hann höndum (í Rendsborg), og kúgaði hann til sátta; varð hertoginn að láta laust við hann bæði liðsmenn sína og kastala. En sem hertoginn komst úr varðhaldi, lýsti hann yfir því, að það væri nauðungarsætt, er hann hefði gjört við konung, og tók Danakonungur þá lönd hans undir sig. Griffenfeld gaf nú það ráð, úr því hann gat eigi afstýrt ófriðnum, að Danir skyldu ráðast á Skán, því að þar var lítil vörn fyrir, en aðrir máttu sér meira hjá konungi, og að þeirra ráði héldu Danir her sínum til Þýzkalands og settust um *Vismar*, er þá lá undir Svíþjóð; varðist borgin bæði vel og lengi, svo að Dönum leiddist aðsóknin og vildu hverfa frá við svo láúið, en þó reð Griffenfeld því, að eigi var svo gjört, og nokkru síðar gafst borgin upp fyrir Dönum.

Ófriðurinn með Dönum og Svíum hafði eigi staðið fult ár, þegar sá atburður varð í Danmörku, að Griffenfeld var steypt úr völdum. En það atvikaðist þannig: Griffenfeld hafði á fáum árum komizt til æðstu metorða og valda. Friðrik þriðji hafði á deyjanda degi sagt við Kristján (5.) son sinn: „gjörðu Pétur Schumacher að miklum manni, en gjörðu það smátt og smátt“. Því ráði fylgdi Kristján konungur eigi; völd og virðing hlóðust svo á hinn unga mann, að þrem árum eptir að Kristján varð konungur, var hann kominn í aðalsmannastétt og orðinn *kanselleri* og æðsti valdsmaður í ríkinu. Yfir þessari skjótu upphefð hans sáu ýmsir menn ofsjónum, og urðu fjandmenn hans fullkomnir. Má og vera, að Griffenfeld hafði í sumu eigi farið svo gætilega sem skyldi við suma af stórmenni því, er í móti honum reis. Sofía Amalía, ekkjudrotning, var honum reið, því að hún kendi honum um, og með sanni, að hertoginn af Gottorp, tengdasonur hennar, varð svo hart leikinn í Rendsborg, eins og áður er sagt. Úlrik Gyldenlöve, óskilgetinn sonur Friðriks þriðja og hálfbróðir Kristjáns fimta, gat eigi gleymt því, að Griffenfeld hafði komið því til leiddar, að hann var sendur burt frá Kaupmannahöfn og settur til landstjórnar í Norvegi, en það gjörði Griffenfeld til

þess, að afstýra því að Gyldenløve leiddi konúnginn út í svall og saurlífnað. Jóhann Adolf hertogi af Plön vildi hefna sín, af því að Griffenfeld hafði hafnað mægðum við hann, þar sem hann hann átti kost á að kvongast prinsessu einni af Ágústemborg, frændkonu hertogans. Svo voru ýmsir þýzkir aðalsmenn við hirðina, er hver um sig þóttust betur til kjörnir, að stýra ríkinu og standa konúngi til annarar handar, heldur en Griffenfeld. Alla þessa óvildarmenn Griffenfelds studdi erindsreki kjörfurstans af Brandenburg, því að kjörfurstinn sá gjörla, að hann gat eigi fengið alt sitt fram í Danmörku meðan Griffenfeld sat við stýrið. Þessir óvildarmenn Griffenfelds fengu talað svo um fyrir konúngi, að Griffenfeld var að hans boði tekinn fastur (11. marz 1676) og bornar á hann margar og miklar sakir. Og þó að allar binar þýngstu sakargiptir gegn honum reyndust ósannar, var hann engu að síður dæmdur til að hafa fyrirgjört bæði fæ, mann-orði og lífi. Þegar komið var með hann á aftökustaðinn, gaf konúngur honum að vísu líf, en bauð að setja hann í dýflizu æflángt. Sat hann hin fyrstu 4 ár í Kaupmannahafnar kastala, en síðan var hann fluttur til Niðarhólms (Munkholmen) á Þrándbeimsfirði, og þar sat hann 18 ár. Allan þann lánga tíma var hann haldinn mjög hart, og er það til merkis, að hann fékk eigi að hafa bækur eða skrifböng nein sér við hönd til dægrastyttingar. Lausn fékk hann að sönnu úr varðhaldi þessu árið 1698, en hann var þá orðinn heilsulaus af lángvinnnum kvölum, og andaðist ári síðar 1699, sama árið sem hinn vanþakkláti konúngur.

Árin 1676 og 1677 börðust Danir og Svíar af mikum ákafa bæði á sjó og landi. Kort Adeler var dænn um það leyti, er ófriðurinn hófst, en Danir höfðu aptur fengið í hans stað ágæt-an herskipaforingja, *Niels Juel*, er lært hafði sjómensku í Hollandi eins og Kort Adeler. Árið 1676 vann Niels Juel Gotland — það er allstór ey austan undir Svíþjóð — og litlu síðar vann hann, ásamt hinum hollenzka «admiral» *Korneliusi Tromp*, mikinn sigur á Svíum við eyrna Öland. Ári síðar vann Niels Juel aptur sigur á Svíum suður undir Femern, þar sem heitir Kolbergerheide, og mánuði þar á eptir barðist hann í Kjögebugt við aðalflota Svía, og vann þar hinn frægasta sigur (1. júlí 1677); mistu Svíar þar 10 stórskip og margar þúsundir manna, en Danir

að eins nokkur hundruð manna og ekkert skip. Eptir þann sigur voru Danir einráðir á hafinu fyrir Svíum.

Eptir orustuna við Öland hélt Kristján fimti með hermanns yfir á Skán og gekk landsfólkið þar undir hann, en Tromp vann Bleking um sama leyti. Karl ellefti Svíakonungur var þá ungur að aldri, og hafði með fyrsta eigi bolmagn við Dönum, og varð að hörfa undan með sína menn; Danir sendu lið norður á Hal-land, og Gyldenlöve hélt með norðmannaherinn suður á Bohús-læn. Var svo tilætlað að herinn allur, bæði sá er að sunnan kom, og hinn er að norðan sótti, skyldi ráðast austur á Svíþjóð. En áður það yrði, safnaði Karl konungur liði um Smálönd, og ræð þegar á Dani þá, er komnir voru til Hallands, og urðu þeir að gefast upp fyrir honum. Því næst hélt konungur til móts við lið það, er Danir höfðu á Skáni, og varð fundur þeirra hjá Lundi (í des. 1676) og nokkru síðar hjá Landskrónu, og fengu Svíar sigur, og unnu aptur þau lönd, er Danir höfðu tekið.

Nú var svo komið, að hvorirtveggja vildu hætta ófriðnum, og töluðu um sættir, en Danir gjørðu harðari kröfur en Svíar vildu ganga að. Þá samdi Loðvík fjórtándi friðinn í Nimwegen við Austurríki, Spán og Holland, og þröngvaði Dönum hið sama ár (1679) til sátta við Svía. Komst þá friður á í Lundi þannig, að alt skyldi sitja við sama, sem verið hafði áður ófriðurinn hófst; þar á meðal var það, að Kristján Albrekt, Gottorps her-togi, skyldi fá alt það, er hann varð laust að láta fyrir Dönum í Rendsborgarsættinni, og varð það að lyktum svo, þó seint gengi. Kristján fimti hafði eigi annað eða meira fyrir alla sína frammi-stöðu, en nokkrar fallbyssur úr kastalaborgum þeim, er hann hafði unnið meðan ófriðurinn stóð. Eptir að þessi friður komst á millum landanna, kvongaðist Karl ellefti, og átti Úlriku Eleo-nóru, systur Kristjáns fimta.

Þau 20 ár, sem Kristján konungur sat að ríkjum eptir þetta, var friður í Danmörku, og þegar aptur ófriðaðist með Frökkum og öðrum þjóðum suður í álfunni, áttu Danir engan þátt í þeim ófriði, en lifðu í spekt og friði. Stóð verzlun Dana um þær mundir með miklum blóma, en eins og þá var alment, höfðu verzlunarfélögin mikil einkaréttindi, og öll verzlun var einokuð. En er bæði Englar og Hollendingar ónáðuðu þá verzlun og tóku

skip fyrir Dönum, er fóru kaupferðir til Frakklands, þá gjörðu Svíar og Danir þann samning með sér (eins og hér um bil 100 árum síðar) að láta herskip sín vernda kaupförin. Bar það þá einatt við, að til vopna kom með mönnum, en Danir reyndust jafnan öruggir menn á sjónum, og héldu sínum hlut óskertum. Fjárhagsstjórn Dana var í engu lagi um daga Kristjáns fimta; hver fjárhagstjórinn kom eptir annan, og hver var öðrum ónýtari, og þó til þess væri gripið, að senda menn á mála til annara þjóðkonunga, sem á hermönnum þurftu að halda, og talsvert fé rynni þannig inn í fæhirzlur Dana, þá var ríkið í stórskuldum, er konungur skildi við, og hefir það meðfram verið eignað eyðslu og óhófi, sem átti sér stað við hirðina um þessar mundir. Það var um þetta leyti, að Loðvik fjórtándi ofsótti harðlega þá af þegnum sínum, er tekið höfðu «reformeraða» trú, svo að margir mistu þá lífið, en margir flýðu til annara landa, þar á meðal til Danmerkur, en þó drottning Kristjáns, Charlotta Amalía, er þeirri trú fylgdi, vildi hjálpa þeim, þá fengu þeir eigi landsvist í Danmörku, því að biskupar og klerkar stóðu í móti, og höfðu svo önnur lönd öll notin af þeim starfsömu flóttamönnum. Árið 1683 kom út ný lögbók í Danmörku, sem kend er við Kristján fimta, og fjórum árum síðar (1687) önnur lögbók, mjög lík hinni, handa Norvegi. Að þeim lögum var byrjað að starfa á dögum Friðriks þriðja. Í Kaupmannahöfn var settur á stofn *hirð- og borgaradómur* (Hof- og Borgret), og í Norvegi *yfirhirðadómur* (Overhofret), og var málum þaðan skotið til *hæstaréttar* í Kaupmannahöfn, sem Griffenfeld hafði endurbætt að nokkru. Þá var og samið hið fyrsta almenna jarðamat í Danmörku, og talið til *harðkornstunna* (rúgur og bygg) eptir gæðum, og skattar lagðir á landið eptir því framtali. Fyrir því jarðamati stóð *Ole Römer*, nafnfrægur stjórnumeistari og stærðafræðingur. Þá var *Tomas Kingo* uppi hið mikla sálmaskáld, hann var biskup í Odense. Kristján fimti dó (1699) á 53. aldursári, eptir því nær 30 ára ríkisstjórn.

2. *Svíaríki*. Þegar Gustaf Adolf var fallinn í orustunni við Lützen (1632), voru Svíar í miklum vanda staddir. Þeir höfðu tekizt það stórræði í fang, að hjálpa prótestöntum á Þýzkalandi gegn ofurveldi keisarans og katólskra manna. Hið ógnarlega þrjátígi ára stríð stóð sem hæst; flestir af höfðingjum prótest-

anta þar í landi, vissu eigi hvað til síns friðar heyrði, voru Svíum ótryggir undir niðri, og fylgdu þeim fremur af ótta en af ást og löngun til frelsis og framfara. Þeir þorðu eigi annað, meðan Gustaf Adolf var þar í landi, en að beygja sig undir vilja og yfirráð hins mikla konungs. Nú þegar hann var fallinn, köstuðu þessir menn dularbúningnum, og sumir þeirra gjörðust fullkomnir mótstöðumenn Svía, eins og raun gaf vitni um. En, eins og áður hefir verið sagt¹, tókst Axel Oxenstjerna, og þeim ágætu mönnum sem honum fylgdu, að sigrast á flestum vandræðum og halda áfram þeirri stefnu, sem konungurinn hafði fyrstur upp tekið. Heima í Svíþjóð var einnig margt viðsjárvert. Drotningin, María Eleónóra, var mjög vanstilt í geði og erfitt að gjöra henni til hæfis, en Svíum vandfarið við hana, því hún var ekkja Gustafs Adolfs. Kristín dóttir þeirra var barn að aldri, að eins á sjötta árinu, og til engra hluta fær fyrir æsku sakir. Henni hafði að sönnu verið heitið ríkiserfðum, áður faðir hennar fór alfari úr landi, en um það efni þurfti betur að búa; það varð að tryggja betur rétt Kristínar til ríkiserfða, einkum til þess að Pólverja konungur gæti enga von haft um konungdóm í Svíþjóð fyrir sína niðja, því að þaðan var alt af von slíkrar kröfu; þar næst varð að skipa fyrir um það, hvernig haga skyldi ríkisstjórninni þangað til Kristín gæti sjálf sezt að völdum; og loksins, og sú var þrautin þýngst, varð að fá samþykki þjóðarinnar, það er að segja *ríkisdagsins*, til þess að ákveða næg skattagjöld bæði til þess, sem heima þurfti að gjöra, og til þess að halda fram hernaði suður á Þýzkalandi. Nú var þessu næst haldið þjóðþíng Svía (ríkisdagur) í Stokkhólmi (í febr.mán. 1633). Gabríel Oxenstjerna bar þá tillögu upp af hendi stjórnarmanna — því að Axel bróðir hans var á Þýzkalandi — að Kristínu yrði gefið drotningar nafn, en bændur þeir er á þíngi voru létu þá til sín heyra kur nokkurn, og einn af þeim greip fram í og sagði: »hver er þessi dóttir Gústafs konungs? vèr þekkjum hana eigi, og höfum aldrei sæð hana«. — »Þér skuluð fá að sjá hana, ef þér svo viljið«, mælti Oxenstjerna. Var þá komið með Kristínu og sýnd bændum. Bóndi sá er fyrir svörum varð horfði á hana um stund, og mælti síðan: »Já, það er hún sjálf. Lítið á, þarna er nefið, og augun og ennið konungsins sæla! Hana

1) Nýja sagan I. hepti bls. 212 o. s. frv.

viljum við hafa til drotningar! Var Kristín síðan sett í háseti og allur þingheimur tók hana til drotningar yfir Svíþjóð. Nú var það fengið, og um leið eins konar undirstaða komin undir fasta stjórn í landinu. Þar næst var um hitt að ræða, hvernig haga skyldi stjórninni þángað til drotning kæmist til lögaldurs og gæti sjálf tekið við störfum. Margir voru á því, að setja einn ríkisstjóra, eins og fyr hafði átti sér stað þar í landi; en Axel Oxenstjerna hafði ritað ráðinn um það efni, og sýnt fram á, að hitt mundi betur fara, að fimm hinir æztu embættismenn ríkisins¹ veittu stjórninni forstöðu, enda hefði sá verið vilji konungsins, ef til þess kæmi sem komið var. Á þetta féllust menn og upp frá því veitti sú fimm mannastjórn forstöðu öllum ríkismálefnum Svía, þángað til 1644, að Kristín drotning var komin til lögaldurs og tók sjálf við stjórn. Þessi fimm manna stjórn, er Svíar nefna *»förmyndare regering»*, stýrði ríkinu með miklum dugnaði og viturleik, og þykir það tímabil, er þeir sátu að völdum, eitt hið glæsilegasta í sögu Svía. Axel Oxenstjerna var alla þá stund stjórnarforseti, og nefndur *ríkiskanselleri*. Hin fyrstu árin eptir fall konungsins var Axel suður á Þýzkalandi, því að þar hafði hann ærið að starfa, eins og fyr er sagt, en engu að síður var hann viðriðinn öll vandamál heima í Svíþjóð og ræð þar jafnan mestu. Á því tímabili, sem hér ræðir um, unnu Svíar mörg afreksverk á Þýzkalandi, eins og fyr er ritað, og þar að auki var mörgu því á fót komið í Svíþjóð, er til framfara varð þjóðinni; má þar til telja: stjórnarskipun, eða tilhögun á allri innanlandsstjórn ríkisins, póstgöngur, réttarfar, umbót og aukningu á skólum, þar á meðal háskóla í Abó á Finnlandi, og einkum alt skipulag er komið varð á málmnáma og málmgröpt allan í landinu, og voru fengnir menn til þess úr öðrum löndum, einkum sunnan af Flandern; var *Louis de Geer* einn af þeim mönnum og mjög nafnkendur. Eru málmnámar Svía síðan mjög orðlagðir og arðsamir. Hins vegar hafa sumir fundið það að stjórn þeirra fimmmennínganna, að þeir hafi meir en góðu hófi gegndi dregið taum aðalsmanna í landinu, selt þeim jarðagóz undan krúnunni o. s. frv. til skaða fyrir aðrar stèttir ríkisins,

1) Þessir voru: *Ríkiskansellerinn*, *ríkisstallarin* (Rigsmarsken), *ríkisdróttsetinn* (Rigsdrosten), *ríkisadmírállinn* og *ríkisskattmeistarinn*.

en það gjörðu þeir reyndar til að fá fê til nauðsynlegra útgjalda. En hvað sem um það er, þá má með sannni segja um ríkisstjóra þessa, að þeir voru ósérplægirnir menn og litu minna á sjálfs síns hag en ríkisins, hvenær sem til þess kom; og þó að margir af aðalsmönnum í Svíþjóð, er þá voru uppi, væru sem smákon-úngar út um landið, þá reyndust þeir opt vel og drjúgir til lið-veizlu, er á þurfti að halda. Allir hinir helztu menn meðal Svía áttu góðan þátt í því að styðja Axel Oxenstjerna og stjórn hans, og því var von að vel færi málefnum þeirra bæði innanlands og utan.

Kristín drottning var á 6. ári þegar faðir hennar lézt, eins og fyr er ritað, og var hún að hans ráði fengin til uppfósturs *Katrínu* konu *Jóhanns Kasímírs Falzgreifa*. *Katrín* var hálsystir *Gústafs Adólfs* samfeðra og hið mesta kvennval. Þau hjón höfðu orðið að flýja eignir sínar og óðöl á Þýzkalandi, þá er þrjátígi ára stríðið hófst, og settust síðan að í Svíþjóð og voru þar til dauðadags. Þau áttu 5 börn, er á fót komust, og var eitt þeirra *Karl Gustaf*, er seinna varð konungur í Svíþjóð. Það er mælt að *Gústaf Adólf* hafi sagt við *Katrínu* systur sína, þá er hún giptist: «eg spái því, að þú eignist son, og að hann verði kon-ungur Svía eptir minn dag». Það var hin síðustu ár *Gústafs A-dólfs* eins og það legðist í hann, að hann mundi eigi son eign-ast, og að skamt mundi eptir æfi sinnar. Hann sagði sjálfur fyrir hverjir kenna skyldu dóttur sinni, og að öllu skyldi svo til haga í uppfóstri hennar og fræðslu, sem hún væri konungsson-ur en eigi dóttir. Þessu var fylgt, enda átti það bezt við lund-erni *Kristínar*, því að hún var af náttúrunni frábitin öllum kvenn-legum störfum, en hugurinn var allur við bóknám og vísindi, að minsta kosti framan af æfi hennar; vitsmunir hennar voru frábærir, enda nam hún svo margt og mikið að undrum gegndi. Alls kunni hún 10 túngumál, og það til hlítar, en fékst þó við fleiri, og fáar voru þær vísindagreindir, að hún bæri eigi meira eður minna skynbragð á þær. Mesta stund lagði hún á sagna-fræði og stjórnafræði, og leiðbeindi *Axel Oxenstjerna* henni framan af í þeim greinum. Sjaldan svað hún lengur en 4 stundir í sólarhring; henni var illa við alla viðhöfn og ofnautn matar og drykkjar, drakk ekki vín heldur vatn, hvort heldur til matar eða þess á milli. Þegar hún var 14 vetra gömul (1640) settu

ríkisstjórnarnir þá reglu, að henni skyldi skýrt frá öllum helztu þjóðmálefnum, jafnóðum sem þau bar að höndum, til þess að venja hana við stjórnarstörfin, og skömmum tíma þar á eftir fór hún sjálf að vera viðstödd slík mál, er þau voru rædd. Hún var því allkunnug landsmálum og landsstjórn, er hún komst til lögaldurs og tók sjálf við ríkisstjórninni (1644); var hin fyrstu árin þar á eftir mjög starfsöm og afskiptasöm af stjórnarmálum, alt gekk vel í ríkinu, og mikið frægðarorð fór af henni fjær og nær. En allar þær miklu og föguru vonir, er menn gjörðu sér um Kristínu drotníngu og ríkisstjórn hennar, brugðust eftir því sem frá leið og fram í sótti. Hún hafði að vísu erfitt mikið af vitsmunum föður síns, og ef til vill sumt annað gótt, en hans veglynda hjarta, hreina og kristilega hugarfar, hafði hún alls eigi tekið í arf eftir hann. Hún hafði lítið af kvennlegri blíðu og viðkvæmni, var ótrygg og hverflynd, og eftir því sem hún eldist varð hún óstjórnlegri í geðsmunum, og gat ekki á móti sér látið. Breytni hennar sýnir þetta og sannar. Þegar hún hafði nokkur ár haft ríkisstjórnina á hendi, gjörði hún Axel Oxenstjerna margt til skapraunar bæði á bak og brjóst, setti hann hjá, en tók aðra fram yfir hann, sem í engu gátu við hann jafn-
 . azt, og hafði þá í mestu hávegum. Hún safnaði að sér ýmsum útlendum mönnum, sumum mjög misjöfnum, gaf þeim stórgjafir, og sóaði á ýmsa vega löndum og lausum aurum, bæði til innlendra og útlendra gæðinga sinna. Það á eigi skylt við þetta, þó að slíkir menn, sem *Hugo Grotius* og *Cartesius*, kæmu til Svíþjóðar og væru í miklum metum hjá drotníngu, því að það var hverrar þjóðar sæmd, að taka slíkum spekingum sem bezt; enda mun Axel Oxenstjerna hafa átt þar mestan og beztan þáttinn í, að þessir tveir menn komu þangað norður og nutu þar nokkurs góðs.

Á fyrstu ríkisárum Kristínar drotníngar urðu margir konungbornir menn til að biðja hennar, en hún vildi engum giptast. Ráðherrarnir og hin sænska þjóð voru mjög áfram um að hún giptist, og höfðu einkum augastað á Karli Gústaf, frænda hennar og uppeldisbróður, enda æskti hann þess sjálfur, en hún sat föst við sinn keip, og synjaði bæði þeim ráðahag og öðrum. Hún vildi engum vera háð, og menn eignuðu það ofdrambi hennar og sjálfselsku. «Eg skil alls eigi, sagði hún, hvernig nokkur

kona vill gefa sig í slíkan þrældóm. Eg líð engum að farið sé með mig, eins og bóndinn fer með akur sinn. Og er menn leiddu henni fyrir sjónir, að hún gjörði vel í því, að giptast og sjá ríkinu fyrir erfingja, þá svaraði hún: «eg get alt eins vel orðið móðir Nerós eins og Ágústusar».

En eins og Kristín var einráðin í því að giptast eigi, eins fast fylgdi hún því fram, að Karl Gústaf yrði eptirmaður sinn í ríkisstjórninni og fengi erfðarétt til konungdóms í Svíþjóð. Ríkisráðið vildi með engu móti gefa samþykki sitt til þessa, nema því að eins, að drotningin giptist honum, en nærri því var eigi komandi, og svo fór, að hún hafði sitt fram. Var þá lýst yfir því (1650), að Karl Gústaf væri kjörinn ríkiserfingi eptir hennar dag, og að ríkið skyldi að erfðum ganga í karlegg til niðja hans. Ýmsir mæltu með því, að konungsefni fengi land nokkurt eða fylki til forráða, en Axel Oxenstjerna minti menn á, hve ilt hefði af hlotizt, að synir Gustafs Vasa fengu slíkt vald í hendur, og drotningin var því samþykk: «honum nægir sú sæmd — sagði hún — að vera krónprinz Svíaríkis». Þó fékk hún honum ári síðar eyjuna Öland til allra forráða, auk þess sem honum voru veittar 50,000 rd. til uppeldis sér á ári hverju.

Áður en þetta gjörðist, sem nú var sagt, var það komið í huga Kristínar drotningar, að leggja völdin niður og fara af landi burt. Hvað hana helzt hafi knúið til þessa verður eigi með vissu sagt, en margir hafa ætlað, að valdið hafi annars vegar hviklyndi hennar og nýjungagirni og hins vegar eljunarleysi við ríkisstörfin. Margur varð til að telja hana af þeirri fyrirætlan, en það kom fyrir ekki. Árið 1654 lét hún stjórnina lausa við Karl Gústaf. Hann var því næst krýndur, en hún fór af landi burt, og litlu eptir það kastaði hún Lúthers trú og tók katólska trú í staðinn, en það höfðu menn sízt ætlað dóttur Gústafs Adólfs. Hún lifði 35 ár eptir þetta og var lengstum í Rómaborg, þó eirði hún þar eigi að staðaldri en fór víða um lönd, og kom tvisvar til Svíþjóðar; vildi komast aptur til ríkis bæði þar og á Póllandi, en það gat eigi tekizt. Hvar sem hún kom sóktu lærðir menn hana heim og undruðust vit hennar og þekkingu. Meðan hún gat rétti hún vísinda og íþróttamönnum einatt hjálparhönd, enda urðu þeir helzt til að lofa hana þegar hær var komið; flestum öðrum varð hún hvímléið. Það er líka sannast að segja, að hún

var óvægin í orðum um marga, bæði í ritum og ræðum, og mætti til þess telja mörg dæmi. Þannig ritaði hún eitt sinn frá Hamborg lærðum manni er Vossius hét: «eg nøyðist til að stytta stundir mínar með bókalestri, því að þér vitið, að eg lifi nú í því landi, þar sem menn verða að leita sér huggunar í félagi hinna dauðu, í stað samfélagskapar við hina lifandi». Í bréfi til annars manns komst hún svo að orði: «af öllum skynlausum skepnum, sem komið hafa fyrir mín augu, eru það Þjóðverjar, sem sízt líkjast menskum mönnum». Svo mjög sem hún þóttist virða páfann, gat hún þó eigi stílt sig um að segja: «eg hef þekt fjóra páfa, fjóra af þessum jarðnesku stjórnendum kirkjunnar, er menn svo kalla, og enginn þeirra hefir haft heilbrigða skynsemi». Kristín drottning dó í Rómaborg 1689; lét páfinn grafa hana í Péturskirkju og reisa henni þar veglegan minnisvarða.

Karl Gústaf, eða Karl tíundi Gústaf sem hann einnig er nefndur, varð, eins og nú var sagt, konungur yfir Svíþjóð (1654), þá er Kristín drottning lét af stjórn og fór úr landi. Hann var þá 32 ára gamall. Á uppvaxtarárum sínum hafði hann notið hins bezta uppeldis, og iðkað bókmentir af miklu kappi bæði innanlands og utan, og hefir svo verið sagt, að hann hafi verið flestum konungum lærðari í Svíþjóð. En þó að hann væri bók námsmaður góður, var hernaðaríþróttin honum þó langkærust, og þángað hneigðist hugurinn þegar á barnsaldri, einkum er hann heyrði getið afreksverka Gústafs Adólfs móðurbróður síns. Árið 1642 var Karl Gústaf sendur til hersins á Þýzkalandi. Torstenson var þar þá yfirforingi Svía, og um haustið áttu þeir stórorustuna við Leipzig, og unnu þar hinn frægasta sigur. Í þeirri orustu var Karl Gústaf, og gekk þar svo vel fram, að Torstenson fékk miklar mætur á honum, enda reyndist hann, alla þá stund sem hann var í herþjónustu, hinn mesti fullhugi og eptir því sem fram leið efni í ágætan hershöfðingja. Þegar Torstenson lagði hervöldin niður (1645), fór Karl Gústaf heim aftur til Svíþjóðar og sat þar um kyrt, þángað til Kristín drottning tveim árum síðar fekk honum yfirstjórn hersins á Þýzkalandi í hendur, en þrjátígi ára stríðið lyktaði um þær mundir, svo að honum gafst eigi tækifæri að sinni til neinna afreksverka.

Þegar hann var orðinn ríkiserfingi og hafði fengið Öland

til forráða fór hann þángað, og var þar öllum stundum til þess er hann tók við ríkisstjórn 1654. Litlu síðar en hann varð konungur kvongaðist hann og átti *Hedevig Eleónoru* dóttur hertogans af Holstein-Gottorp.

Þegar hér var komið, var Axel Oxenstjerna rúmt sjötugur að aldri, en þó ern vel og átti enn mikinn þátt í stjórnarstörfum. Hann hafði verið 42 ár kanselleri ríkisins, er í þá daga var hið æzta og tignarlegasta embætti í Svíþjóð. Tvisvar hafði hann verið einn af ríkisstjórunum, og í síðara skiptið stýrt ríkinu hartnær sem konungur. Hann hafði samið friðinn í Knæröð og Brömsebro og vopnahléð í Stúmsdorf, og þó hann væri að eins sænskur embættismaður, þá gjörðu hinir þýzku þjóðhöfðingjar sæmd hans svo mikla, að þeir kjöru hann til forseta hins «evangeliska þjóðhöfðingjafélags», er þá var stofnað á Þýzka-landi, og bælt hann því embætti síðan. Hann hafði þjónað þremur konungum, Karli níunda, Gústaf Adolf og Kristínu, verið af öllum vel metinn, og mest af þeim, sem mestur þeirra var. Um tíma varð Kristín honum að sönnu ill og afundin, og þá dró hann sig í hlé frá ríkisstörfum, en hve nær sem í raunir rak, var hans ráða þó leitað, og þá var hann ætíð boðinn og búinn til ráða og dáða; enda fór svo, að Kristín sá, að hún gat eigi án hans verið, og tók hann aptur í fullkomna sátt. Karl Gústaf sýndi honum öll vináttu- og virðingarmerki bæði áður og eptir að hann varð konungur, og kallaði hann «föður sinn». Enginn má samt ætla, að þessi mikli maður hafi farið varhluta af andstreymi lífsins; slíkt hlaut að fylgja hans veglegu og vandasömu stöðu. Hann átti því löngum öfundar- og óvildarmenn, sem á ýmsa vegu reyndu að spilla fyrir honum bæði leynt og ljóst, en aldrei gat þeim tekizt að mæða hann svo, að hann þreyttist að vinna fósturjörð sinni bæði gagn og sóma. En að hann hafi fundið til alls þess mótgánga, er honum mætti, má opt ráða af orðum hans. Þannig ritar hann (1646) Jóhanni syni sínum — er þá var í Osnabrück að undirbúa vestfalska friðinn. — «Eg þekki gjörla lund og áform þeirra manna, sem nú ráða mestu í Svíþjóð, fæ og á því að kenna dag hvern. Eg sé skaða og mínkun fósturjarðar minnar fyrir augum mæ, svo að sárt er til að vita hverjum manni með ráðvöndu hjarta. Hèldi ekki guð og samvizka mín mæ uppréttum, þá væri eg fyrir löngu farinn

frá embætti. En Seneca segir: «vertu eigi of einþýkkur eða þrár við þína fyrirætlun, en láttu hamíngjuna ráða». Þegar öll fyrirhöfn reynist árángurslaus, verða menn að grípa til þolinmæðinnar og laga sig eptir tíð og þörfum. Svo langt á hygginn maður að fara, en eigi lengra. Mörgum virðist þetta erfitt, en sé þessa eigi gætt, þá hefir maður unnið fyrir gýg; það er þó betra, að hafa nokkra reglu en enga. Í öðru bréfi til sama manns kemst Axel svo að orði: «Sá, sem lengi lifir og situr í háum völdum, má búast við öfund, illvilja og mörgu öðru, og enginn dugandi maður gæti undir því risið án guðs og góðrar samvizku. Þú þekkir kjör mín undanfarin ár, þau hafa eigi batnað síðan. Þetta er mitt blutskipti; hið sama kemur fram við þig; vera má að enn taki verra við fyrir báðum okkur. En taktu guð til hjálpar og ráða og gjör hvað rétt er! Þegar þegja skal, þá þegðu! þegar fyrirlíta skal, þá fyrirlíttu. Hlæðu að því, sem eigi verðskuldar annað en athlægi! En það sem eigi er vanvirðulaust, það skaltu engum þola».

Þau árin sem Kristín lagði fæð á Axel Oxenstjerna, var hann opt úti á bugarði sínum, og gaf sig þá annaðhvort við búsyслу, eða hann las bækur, einkum biblíuna, og rit hinna fornu Rómverja, og bauð þá einatt til sín prestum þar í nágrenninu; bar þá margt á góma. Þegar Kristín var gengin úr völdum, fékk hann Eiríki¹ syni sínum kansellerastörfín, en tókst sjálfur á hendur fjármál ríkisins, er þá voru komin í mestu óskil. Vinir hans beiddu hann ætla sjálfum sér af, og gæta þess, að hann væri farinn að eldast og þreytast. Hann svaraði: «eg er vanur erfði, hefi lifað við það, og vil heldur við það deyja, en í iðjuleysi». Það hið sama sumar (1654) sýktist hann hastarlega og lagðist í rekkju. Undir andlátið spurði hann, hvað menn þá vissu um Kristínu drotníngu. Honum var sagt það. Hann mælti: «Hún iðrast þessa, það hefi eg sagt henni; en hún er ekki með öllum mjalla». «Þó», sagði hann, og varp mæðilega öndunni, «hún er þó dóttir hins mikla Gústafs Adolfs!» Þessi voru hans síðustu orð. Hann andaðist 28. Ágúst 1654. Sama daginn sem Axel Oxenstjerna var jarðaður andaðist María Eleónóra ekkja Gústafs Adolfs. Lennart Torstenson var dáinn fyrir þrem árum, en Jakob De la Gardie fyrir tveimur.

1) Eiríkur Oxenstjerna var mesta mannsefni, en dó ungur.

Hinar óæðri stéttir í Svíþjóð, bændur, borgarar og prestar, og sömuleiðis hinir lægri meðal aðalsins undu því illa, að svo margar af þjóðjörðum, eða af gózi krúnunnar, höfðu verið seldar og sumpart gefnar æztu aðalsmönnum smátt og smátt, allt í frá dögum Jóhanns þriðja. Það jarðagóz, sem aðallinn þannig fékk í hendur, var undan þegið öllum skattgjöldum. Krúnan hafði fyrir þá sök minni tekjur en áður, og á minna að taka til alþjóðlegra þarfa, en skattarnir jukust og komu því þýngra niður á alþýðu manna; þess vegna gjörði alþýðan sér von um, að Karl Gústaf mundi ráða hér á einhverjar bætur, og hugði gott til hans ríkisstjórnar. Það var og hans fullkomið áform, að verða við þeirri ósk alþýðunnar, og þess vegna var málefni þetta borið upp á ríkisdeginum 1655. Varð þar niðurstaðan sú, að aðallinn skyldi að nokkru, en eigi öllu leyti skila krúnunni aptur þeim jörðum, er hann hefði eignast að gjöfum frá dauðadegi Gústafs Adolfs 6. nóv. 1632; það er kallað Reduction. Þar við var látið sitja að sinni, annaðhvort af því, að mönnum þótti þetta sanngjarnt, eða af því, að menn óttuðust mikla reikningsvafninga og megna mótspyrnu ef lengra væri farið, eða af því, að konungur vildi sem fyrst taka til óspiltra mála við Pólverja.

Þá ræð fyrir Póllandi *Jóhann Kasimír* (1648—1668) yngri sonur Sigmundar konungs, þess, er samtíða var Gústaf Adolf, og deildi við hann illdeildum. Jóhann vildi eigi viðurkenna rétt Karls Gústafs til konungdóms í Svíþjóð, og þóttist sjálfur nær standa þeirri tign. En hann hafði það til síns máls, að Sigmundur faðir hans var sonur Jóhanns Gústafssonar Vasa. Jóhann Kasimír var því þriðji maður í beinan karllegg frá Gústaf Vasa, og af eldri syni hans kominn. En Karl Gústaf var bæði af yngri syni Gústafs Vasa (Karli 9.) kominn, og eigi í karllegg, því að hann var dóttursonur, en eigi sonarsonur Karls níunda. Pólverja konungur sendi því gagngjört mann til Svíþjóðar, nokkrum dögum áður en Kristín drottning lagði völdin niður, og sagði svo: «Pólverja konungar hafa að vísu viðurkent konungstign Gústafs Adolfs og Kristínar, en að halda hinu sama fram, er ný ætt vill hefjast til ríkis í Svíþjóð, það er hvorki vor skylda eður vilji». Kristín gaf þau svör: að Karl Gústaf frændi hennar skyldi með 30,000 vitna sanna rétt sinn til konungdóms í Svíþjóð; að öðru leyti leiddi hún þetta málefni hjá sér. En

Karl Gústaf sagði, að fyrst guð og drotningin og fulltrúar þjóðarinnar hefðu gefið sér Svíaríkis krúnu, þá mundi hann reyna að verja hana, hver sem í hlut ætti. Enginn sænskur maður lagði Pólverjakonungi liðsyrði að máli þessu, og Karl Gústaf var krýndur fyrirstöðulaust. Nú var bæði, að margir meðal Svíanna kusu heldur stríð en frið, enda var Karl Gústaf svo skapi farinn, að hann vildi heldur leita sér fjár og frægðar í hernaði en með friðsamlegum störfum; og hér þóttist hann hafa hina gildustu ástæðu til að sækja Pólverja heim, og gjalda konungi þeirra rauðan belg fyrir gráan. En eigi voru þetta nægar ástæður til að ráðast á Pólland. Þó safnar Karl Gústaf liði um ríki sitt, og sumarið þar á eftir (1655) heldur hann öllu því liði til Póllands, og er skjótt yfir að fara, að eftir nokkrar vikur hefir hann lagt því nær alt Pólland undir sig, og tekið báðar höfuðborgir landsins, Varschau og Krakau. Það kom nú hér fram sem optar í sögu Pólverja, að hver hugsaði einungis um sig, og það sem hann hugði í þann svipinn mundu verða sér að mestum hagsmunum, en alls eigi um hitt, hvað sæmd og gagn almennings og fósturjarðarinnar heimtaði af þeim. Margir af höfðingjum þeim, er Jóhann Kasimír trúði bezt, brugðust honum með öllu, og gengu með sínar sveitir Svíakonungi til handa, þegar nóg fæ og frami var í boði. Jóhann Kasimír varð því að flýja land, og láta um sinn fyrirberast í Slesíu í borg þeirri, er Oppeln heitir. En yfirráð Svía yfir Póllandi urðu skammvinn. Bæði var það, að Svíar fóru illa með sínu ráði; þeir beittu harðýðgi og ránum í landinu, er hlaut að gjöra þá óvinsæla, og æsa landslýðinn móti þeim — og svo var um þessar mundir sá maður þar í landi, er því var vaxinn, að hjálpa þegar mest þrengdi að. Sá maður hét *Stefán Czarnecki*. Hann var einn af þeim mönnum, sem aldrei bilar hugur, hvað sem að höndum ber, honum varð aldrei ráðafátt, hann var óþreytandi starfsmaður, og þar á ofan hinn veglyndasti og einlægasti ættjarðarvinur. Hann var í mörgu líkur Kosciusko (er seinna verður nefndur), einhverjum hinum bezta manni og mesta, sem uppi hefir verið á Póllandi. Stefán einsetti sér að frelsa ættjörð sína frá yfir-drotnan Svía. Hann fékk safnað liði nokkru, og þángað til var hann að, að Svíar hrukku af landi burt, og urðu að láta það laust, sem þeir höfðu lagt undir sig. Nú þegar Karl Gústaf sá

sitt óvænna, lagði hann það til við Rússa og kjörfurstann af Brandenburg, Friðrik Vilbjálm (hinn mikla, sem svo er nefndur), að þeir skyldu allir taka Pólland og skipta því með sér. Kjörfurstanum þótti boðið girnilegt, safnaði liði og heldur því til móts við Svía. Verður nú orusta mikil við Varschau í júlímánuði 1656 — sú orusta stóð í tvo daga — og vinna þeir þar sigur Karl Gústaf og kjörfurstinn, en Jóhann Kasimír leggur á flóttu. Þó hafði Svíakonungur minna gagn af sigri þessum en vænta mátti, því að kjörfurstinn vildi með engu móti veita Pólverjakonungi eptirför, eða frekara að gjöra en orðið var; en þegar kjörfurstinn var frá, þá var Svíakonungur of liðfár eptir. Rússar komu eigi, heldur gjörðu þeir samband við óvini Karls Gústafs; því að nú fór ýmsum þjóðum að standa ótti af aðförum hans. Þannig komst samband á fót gegn Svíum milli Rússa, Austurríkismanna og Pólverja. Til þess nú að mega treysta kjörfurstanum af Brandenburg, fékk Karl Gústaf honum Austur-Prússland algjörlega í hendur, en það land hafði til þessa verið háð Pólverjakonungi; á þann hátt var grundvöllurinn lagður undir hið *prússneska konungsríki*. Kjörfurstinn galt þann greiða þannig, að þegar Rússar um þessar mundir ræðust á lönd Svía fyrir austan Estrasalt (Ingermanland, Lifland o. s. frv.), þá sagði hann skilið við Svía og gekk ásamt með Dönum í óvinaflokk þeirra. Voru nú á skammri stundu fimm þjóðlönd risin upp til ófriðar móti Svíum, og öll í einu. Þegar nú svo var komið, gat Karl Gústaf með engu móti haldizt lengur við á Póllandi, og fyrir því þótti honum fremur vel en illa orðið, er Friðrik þriðji, Danakonungur, sagði honum stríð á hendur (1657); því að nú hafði Svíakonungur fengið fulla ástæðu til að fara burt af Póllandi. Hann lét þar eptir nokkurt setulið í sumum borgum, og hélt því næst landveg vestur og norður til Danmerkur. Allur hans her var hér um bil 12000 manna. Friðrik Danakonungur fór sjóveg austur að Danzig, því að hann bjóst við, að Svíakonungur mundi fara sjóleið þaðan til Svíþjóðar, og ætlaði sér svo að sitja fyrir honum og hremma hann þar á hafinu. En er Danir komu til Danzigar, fréttu þeir, að Svíar voru allir á burt, og farnir landveg vestur; sneru þá Danir sem fljótast heim aptur.

En nú er að segja frá Karli Gustaf, að hann er kominn

norður á Holtsetaland fyr en nokkurn varir. Við borg þá er Itzehoe heitir bjuggust Danir til mótvagnar; voru þeir saman nokkrar þúsundir manna og ætzi herstjóri Danakonúngs *Anders Bille* (Rigsmarsk) fyrir því liði. Þau urðu þar leikslok, að borgin brann til ósku, en Danir hörfuðu undan, og veittu hvergi viðnám, heldur settust að á Friðriksodda, eða Fridricia. Þar var þá nýgjörður kastali og sterkar varnir. Lögðu nú Svíar undir sig bæði Holtsetaland og Slèsvík, og höldu norður til Fridricia. Landsfólkið hrökk víða undan, og stóð ótti mikill af Svíum, því að sagt var að þeir hefðu í liði með sér bæði Tyrki og Tartara, er dræpu alt hvað fyrir yrði, jafnt konur sem karla. Tuttugasta og fimta dag ágúst-mán. 1657 kom Karl Gustaf til Fridricia, og gjörði þegar hart áhlaup, en víggirðingarnar voru svo traustar, að konungur varð frá að hverfa. Lét hann þá Karl Gustaf Wrangel, hershöfðingja sinn, verða þar eptir með nokkrar þúsundir manna, en hélt sjálfur suður til Wismar, og lét þar fyrirberast fyrst um sinn. Meðan Wrangel sat um Fridricia sendi hann herflokka norður á Jótland, og lagði það alt undir sig, en 24. október um haustið tók hann Fridricia í áhlaupi, og alt það sem þar var bæði lifandi og dautt, en Anders Bille varð sár til ólífis og dó litlu síðar. Þetta var nú að vísu allmikill sigur, og Svíar höfðu mikið aðgjört, er hertogadæmin og Jótland alt var komið í þeirra hendur, en alt um það gat þessi Jótlandsför þeirra orðið þeim til falls og fordjörfunar, nema þeir kæmust alla leið yfir á Sjáland, því að á baki þeim stóð Austurríki, Brandenburg og Pólland, og það var í ráði, að þaðan kæmi yfir 20000 manna, þá er úthallaði vetri, og kvíaði þá á Jótlandi, og þegar nú Danir bættust þar við, þá voru lítil líkindi til, að Svíar kæmst úr höndum þeim. Fyrir því lagði Karl Gústaf á það allan hug, að komast yfir á eyjar, áður enn voraði. Hann fór þess á leit við ýmsa þjóðhöfðingja, að þeir gengju í samband við hann, og vildi enginn til þess verða, en þá kom sá til liðs við hann, er honum varð drjúgastur, og það var veterinn. Það gjörði frost svo mikil, að ísa lagði á sund öll milli eyjanna, og á þeim ísum fór Karl Gústaf með lið sitt til Sjálands. Er áður sagt bæði frá þeirri ferð hans og þeim viðskiptum, er þá urðu með honum og Danakonúngi. Þess er og getið, að Karl Gústaf lét sér eigi nægja Hróarskeldu-friðinn, og ætlaði sér að

leggja undir sig alt Danaveldi, en sú fyrirætlun hans varð að engu. Hann hélt því heim til Svíþjóðar, stefndi þing í Gautaborg, og krafðist bæði fjár og manna til þess að geta hafið ófrið á nýjan leik. En meðan á þessu stóð sýktist konungur og dó (13. febr. 1660). Hann var þá 37 vetra gamall.

Svíar áttu litlum friði að fagna þau fáu ár, sem Karl Gústaf var konungur þeirra. Allur hans hugur var á öðrum þjóðum, að berjast við þær og leggja þær undir sig, hvort sem til þess voru litlar sakir eður miklar, eins og sýndi sig þegar hann ræðst á Pólland 1655, og á Danmörk eftir Hróarskeldufriðinn 1658. Konungur hafði því miklu minni afskipti af allri innanlandsstjórn í ríki sínu, en nauðsyn beiddi, og fyrir þá sök fór þar margt aflaga um hans daga. Kom þetta sér því ver, sem ólag var á margt komið í Svíþjóð á síðustu árum Kristínar drottningar. Þessu höfðu menn búizt við að Karl Gústaf mundi kippa í lag. Að vísu var það eitt sem breyttist til hins betra, eftir að hann kom til ríkis, og það var, að við hirð hans var miklu meiri sparnaður hafður, heldur en á ríkisárum Kristínar. En á hinn bóginn leiddi það af hans sífelda ófriði, að Svíar liðu ógurlegt manntjón; er svo sagt, að fallið hafi af þeim yfir 70,000 manna þau árin sem hann ræð ríkjum, og það flestir á bezta aldri. Auk þessa mikla tjóns varð landsfólkið mjög aðþrengt af þeim hinum þúngu sköttum og ýmsum kvðum, sem á það var lagt, til að halda úti miklum her og flota; að akuryrkja, kaupverzlun og alls konar friðsamleg störf hafi legið í dái og bæðið margvíslega hnekkíng af öllu þessu, ræður að líkindum; megn óregla átti sér og stað víða um landið, eins og við var að búast, því að þjóðin var sem höfuðlaus her, er konungurinn og margir helztu menn með honum voru lengstum utanlands. Yfir öllu þessu var mikil óánægja í landinu, en menn þorðu eigi að kvarta, því að konungur brást reiður við, og var þá ómjúkur í svörum. Enda sættu menn sig meðfram við það, að konungur var löngum sigursæll og hélt þannig uppi frægðarorði þjóðarinnar, og þeirri sigursæld var það einnig að þakka, að ríkið færðist út til eðlilegra takmarka, þar sem Skán, Halland og Blekíng bættist við það; og þá var eigi til einskis barizt. En hins vegar tóku Hollendingar á síðustu árum ófriðarins nýlendu þá, er Svíar höfðu sett á stofn við Delaware-fljótið í Norðurameríku á dög-

um Kristínar, og þeir kölluðu *Nýju Svíþjóð*, en Danir tóku það, sem Svíar áttu á Guineaströnd í Afríku.

Karl ellefti var á fimta árinu þegar Karl Gústaf faðir hans andaðist. Hafði Karl Gústaf svo ráð fyrir gjört í testamenti sínu, að drotningin Hedevig Eleónóra, fimm hinir æztu embættismenn ríkisins og Jóhann Adolf hertogi — bróðir Karls Gústafs — skyldi stýra ríkinu þangað til konungur sjálfur hefði náð lögaldri. Meðal ríkisstjóra þessara eru þeir Magnús De la Gardie, Pétur Brahe og Karl Gústaf Wrangel hinir nafnkendustu. Magnús var sonur Jakobs þess, er fyr er nefndur; hann átti systur Karls Gústafs, var um tíma í miklum kærleikum hjá Kristínu drotningu, og þá, einatt mótstöðumaður Axels Oxenstjerna, en síðan reiddist drotning honum og rak hann úr völdum. Magnús var hið mesta stórmenni og vel að sèr um marga hluti, en hann var ákaflega metorðagjarn, og komst einatt til æztu valda, og mátti þá heita allsráðandi í Svíþjóð, en honum varð aldrei haldsamt á tigninni; hann var stórauðigur maður, og þó löngum í skuldabasli; hann var mikill vinur Frakka, en sú vinátta varð Svíum til hins mesta ógagns. Pétur Brahe var vitrari og miklu ráðsettari maður en Magnús; hann hafði verið aldavinur Gústafs Adolfs, og honum mjög handgenginn bæði í friði og stríði; hann hafði verið landstjóri á Finnlandi og orðið frægur af þeirri stjórn. Hann kom þar meðal annars fótum undir háskólann í Abo. Það þótti helzt mega að honum finna, að hann leit fremur á upphefð og yfirráð aðalsins, en á réttindi krúnunnar og lægri stéttar manna. Það bar þeim opt á milli Axel Oxenstjerna og Pètri Brahe, að Pétur leit fremur á réttindi en skyldur aðalsmanna, en Axel leit á hvorttveggja og vildi halda öllu í jafnvægi. Pétur Brahe var gamall maður þegar hér var komið, en ræð þó löngum miklu, og af hans völdum var það, að Jóhann Adolf hertogi komst eigi að ríkisstjórninni, þó Karl Gústaf hefði svo fyrirmælt. Þótti það vel orðið, því að hertoginn var óeirðarmaður og illa fallinn til slíkra starfa. Pétur Brahe var einhver ríkastur maður í Svíþjóð um sína daga, og kunni miklu betur með fæð að fara en Magnús De la Gardie. Karl Gústaf Wrangel var nafnkendur frá þrjátígi ára stríðinu og frá herferðum Karls Gústafs, og er jafnan talinn einn með hinum frægustu hershöfðingjum Svía; hann

þótti nokkuð dramblátur og sérdrægur, og betur fallinn til her-stjórnar en ríkisstjórnar.

Þó að ríkisstjórar þessir væru á margan hátt dugandi menn, þá voru þeir eigi jafnþingjar hinna, er Svíþjóð stýrðu á æskuárum Kristínar, allrasízt var nú nokkur, er jafnast gæti við Axel Oxenstjerna. Það spilti og eigi alllítið fyrir störfum þeirra, að þeir voru einatt sundurþykkir, og það svo, að þeir gengu í sveitir, og vildi hvor flokkurinn annan ofan ríða, en ríkið og þjóðin galt þessa; fór því margt á þeirra dögum miður en vera skyldi.

Eitt hið fyrsta sem þeir gjörðu, eptir að þeir komu til valda, var að semja frið við þá, sem Karl Gústaf hafði átt í höggi við. Fyrst og fremst (1660) við Brandenburg, Austurríki og Pólland; Sá friður var saminn í klaustri einu, er *Oliva* heitir, skamt frá Danzig; varð það þar að sættum: að Póllands konungur slepti öllu tilkalli til Estlands og Líflands, afsalaði sér allan erfðarétt til Svíþjóðar, og viðurkendi konungdóm Karls ellefta. Þar með var þá fallin ástæðan til hins lángvinna ófriðar milli Svía og Pólverja, er staðið hafði rúm 50 ár. Þar næst sömdu Svíar frið við Dani 1660; sá friður er kendur við *Kaupmannahöfn*; eignuðust Svíar þá til fulls og alls Skán, Halland og Bleking og Bohuslèn. Loksins var friður saminn árið eptir (1661) í *Kardis* við Rússa; sú friðargjörð staðfesti alt, sem samízt hafði með mönnum í Stolbóvar-friðnum 1617.

Nú liðu svo nokkur ár, að Svíar áttu lítinn sem engan ófrið við aðrar þjóðir, en nógar voru deilur með ríkisstjórunum. Magnús De la Gardie réð mestu, en þar kom, að hann og hans flokkur varð undir, og sá maður í ríkisráðinu, er *Sten Bjelke* hét, og hans flokkur urðu yfirsterkari, og þá var það, að Svíar gengu í samband (1668) með Englum og Hollendingum móti Loðvíki fjórtanda. Það var hið nafnkenda þrenningar, eða þriggja þjóða samband (Trippelalliancen), er neyddi Loðvík til að semja friðinn í Achen, eins og áður er sagt. Móti þessu sambandi mælti Magnús De la Gardie ákaflega, og kvað mönnum hollara að vera með Frökkum, en hann kom eigi sínu máli fram að sinni, og þótti þá betur fara.

Það hefði nú mátt ætla ríkisstjórunum, að þeir mundu ráða bætur á ýmsu, er ábótavant þótti í Svíþjóð um þessar mundir, en það fór fjarri, að þeir gjörðu það, eða að þeim tækist það.

Mörgu fór fremur aptur en fram: rikisskuldir fóru vaxandi; her og skipafloti var í vanhirðingu; skattar lágu þungt á bændum; krúnunnar jörðum var fargað og fengnar í hendur hinum ríkustu aðalsmönnum, og þessir aðalsmenn sátu eins og konungar á stórbúum sínum út um landið, en alþýðan lifði við sult og seyru; og — það sem lakast var — að eigi var trútt um, að Magnús De la Gardie og aðrir fleiri af ríkisstjórunum þægju mútur af Frakkakonungi, til þess að vera honum fylgjandi, er á þurfti að halda.

Nú leið að þeim tíma, að Karl ellefti næði lögaldri, það er að skilja, að hann yrði 18 vetra, og gæti sjálfur tekizt á hendur ríkisstjórn. En af því að margir voru þá óánægðir með aðgjörðir ríkisstjórnanna, þá varð það, að konungur settist sjálfur að stjórn, þá er hann var að eins 17 vetra gamall. Það var í des.mán. 1672. Hann var þó eigi líklegur til mikilla framkvæmda þá þegar, einkum fyrir þá sök, að hann hafði helzt of litla mentun fengið. Ríkisstjórnarnir, sem fyrir slíku áttu að sjá, höfðu í þeirri grein verið mjög hirðulitlir, enda var konungur tregur til allra bókmenta, og vissi lítið; það hét svo, að hann kynni móðurmál sitt, en lítið meira. Um þær mundir hugði hann mest á dýraveiðar og þess kónar skemtarnir, sem hug og dug og jafnvel ofdírfd þurfti til, en öllu svalli og kveifarskap var hann fjarlægur; að heræfingum þótti honum hið mesta gaman; hann var snemma geðríkur, og það, sem hann vildi hafa fram, varð svo að vera. Á ráðssamkomum var hann fámæltur, og eins og hann yndi sér þar ekki, en þegar hann kom aptur í sinn hóp var hann glaður og kátur. Hin fyrstu árin eptir að hann kom til ríkis, sást því engin breyting í ríkisstjórninni frá því sem verið hafði, og Magnús De la Gardie var þá aptur kominn til valda og ræð miklu hjá konungi.

Nú bar svo til um þessar mundir, að Loðvík fjórtándi eirði illa við Achenar-friðinn og vildi hefna sín á Hollendingum. Árið 1672 sagði hann þeim strið á hendur, og hafði nú England eigi móti sér eins og áður, heldur með sér. Kjörfurstinn Friðrik Vilhjálmur af Brandenburg gjörðist einn af mótstöðumönnum Loðvíks, en til þess að draga máttinn úr honum, þótti Loðvíki bezt til fallið, að fá Svía í lið með sér. Hann hét Svíum öllu fögru, ef þeir vildu ganga í lið með sér og jafna á kjörfurstan-

um. Svíar voru á báðum áttum ; sumir vildu hafa frið og sitja hjá, aðrir vildu veita Hollendingum, en hinir urðu þó flestir, sem mintust á fornan fjandskap, er Hollendingar höfðu lagzt í móti þeim á dögum Karls Gústafs. Sú varð því niðurstaðan, að samband var gjört við Loðvík fjórtánda (1674), og Karl Gústaf Wrangel var sendur með 20000 manna suður á Pommern, til þess að banna kjörfurstanum liðveizlu við Hollendinga. Nú kom það bezt í ljós, hve lítil fyrirsjón hafði verið á öllu höfð við herinn, því að nú var þess eigi langt að bíða, að kjörfurstinn kom með lið sitt vestan úr löndum, og réð á Svía, þar sem heitir Fehrbellin (1675), og rak þá á flóttu. Svíar vörðust reyndar vel, en höfðu ónýtan fyrirliða, því að Wrangel sjálfur var eigi þar við aðalherinn, heldur annarstaðar með lítinn flokk manna; hann var þá orðinn gamall maður og kendi opt þreytu og sjúkdóms, og átti aldrei þessa fôr að fara. Er það einn vottur þess, að þá var engin styrk hönd heima fyrir í stjórn Svía, er Wrangel fékk þess ráðið að stýra hernum í það skipti, þar sem Svíar áttu þó vól á úngum en þó ágætum hershöfðingja, er hét *Otto Vilhelm Königsmark*; hann var um þessar mundir látinn vera aðgjörðalaus í Hamborg. En nokkru seinna var honum falið á hendur herstjórn í Pommern, þegar kjörfurstinn brauzt þangað með sína menn. Königsmark varðist þar lengi og vel, en átti við mikið ofurefli að stríða, og fékk aldrei liðstyrk heimán af Svíþjóð, og svo fór, að kjörfurstinn vann alla Pommern af Svíum. Königsmark fór síðan af landi burt og suður í lönd og varð þar frægur af herstjórn sinni, og þar varð hann sótt dauður 1688.

Danir undu því illa, að hafa mist Skán, Halland og Bleking. En þegar Svíar voru orðnir bandamenn Frakka og höfðu sent herlið inn í lönd kjörfurstans af Brandenburg, þá þótti Dönum tími og tækifæri bjóðast til að ráða á Svíþjóð, í þeirri von, að geta unnið aptur hin áðurnefndu hærð. Jafnvel þó margir væru þessu móthverfir meðal Dana og vildu friðinn, réðu þó hinir meiru sem til ófriðar eggjuðu. Árið 1675 komst þannig á fót samband milli Austurríkis, Spánar, Hollands og Danmerkur; Danir sögðu Svíum stríð á hendur, og hinn *skánski ófriður* hófst. Sama sumarið hélt danskur og hollenzkur herskipafloki til Eysræs til þess að varna því, að lið yrði sent frá Svíþjóð suður á

Pommern; en landher Dana hélt þángað suður og settist um borg þá, er Wismar heitir, og Svíar þá áttu. Eptir lánga umsát fengu Danir náð borginni þegar komið var fram á vetur, og sneru við það heim aptur. Nú höfðu hvorirtveggja, Svíar og Danir, viðbúnað mikinn bæði á sjó og landi. Það var ráð þeirra bandamanna, að Austurríkis- og Brandenburgarmenn skyldu ráða á Svía í Pommern; Rússar höfðu lofað að ráða á Líf-land; Gyldenløve, hálfbróðir Kristjáns fimta, átti með Norðmanna-herinn að taka Bohúslèn; nokkur hluti danska flotans leggjast fyrir Gautaborg, og banna Svíum allar siglíngrar þaðan og þángað, en meginflotinn taka Rügen og Gotland, reka sænska flotann til Stokkhólms, og síðan flytja Danaher frá Sjálandi yfir á Skán. Nú áttu Svíar í mörg horn að líta; þeir voru einir síns liðs, því að Loðvík fjórtándi var langt burtu og hafði ærið að vinna, og gat eigi sent þeim liðsafla, en fjárstyrk veitti hann þeim nokkurn. Hins vegar höfðu Danir örugga bandamenn við að styðjast, og gátu enda mikið aðgjört af sjálfs síns ramleik. Þeir höfðu skipaflota mikinn og vel búinn, og ágætan foringja fyrir, er *Niels Juel* hét, og er talinn frægastur sjóforingi með Dönum. Hann var systursonur Hannibals Sehesteds þess, er áður er nefndur, og hafði lært sjómensku í Hollandi hjá Marteini Tromp og Ruyter. Þar að auki sendu Hollendingar mörg herskip til liðs við Dani, og fyrir þeim skipum ræð *Cornelius Tromp*, sonur Marteins, hin mesta hetja. Svíar höfðu og allmikinn herskipaflota, en þá vantaði fyrirliða, er jafnast gæti við hina tvo, er nú voru nefndir, og margt af liði því, er þeir höfðu á skipin, var lítt vant sjómensku og sjóorustum. Aðalforinginn fyrir herskipum Svía hét *Creutz*, gamall maður, er sjaldan hafði á sjó komið, og kvaðst eigi fær um að takast þann vanda á hendur, þó hann gjörði það. Næstur honum að völdum gekk sá maður, er *Uggla* hét, breystimaður mikill og dugandi foringi sagður.

Á öndverðu sumri 1676 höldu þeir Tromp og Juel flotanum inn í Eystrasalt, og höfðu um 50 stórskip, en þeir Creutz og Uggla lágu inni frosnir austur í Stokkhólmsskerjum, og komust eigi á flot fyr en seint í maímánuði. Fyrsta dag júnímánaðar hittust flotarnir austan undir ey þeirri, er Öland heitir. Svíar höldu norður með eyinni og vildu komast fyrir hana, en

Hollendingar og Danir á eptir; vindur var hvass á vestan, og skriður mikill á skipunum, er hvorirtveggja sigldu sem ákafast. Nokkur af skipum bandamanna urðu á undan hinum og komust á vindborða Svíum, milli eyjarinnar og þeirra. Þegar Uggla sá það, vildi hann komast á milli þeirra og hinna skipanna sem á eptir komu, gjörir Creutz bendingu og snýr við skipi sínu. Creutz var því samþykkur, og snýr einnig skipi sínu í sömu átt. Skipið var ákaflega mikið og hátt á sjónum, seglfesta eigi nóg, en fallbyssupúnginn mikill upp á því; um leið og skipinu var snúið við, varð vindurinn sterkari í seglunum en menn hugðu og kastaði því á hliðina; féll þegar sjór inn á hléborða og skipið tók að fylla; í sama velfangi komst eldur að púðurhúsinu, svo að skipið flaug í lopt upp með ógurlegu braki og brestum. Lét yfirforinginn Creutz þar líf sitt og því nær 800 manna með honum, en fáeinum varð bjargað. Uggla vildi eigi flýja, eða gat það eigi; lagði nú Tromp að honum öðru megin, en Niels Juel á hitt borðið, og tókst þar ákaflega hörð orusta. Svíar sigldu undan og norður, og sumir af bandamönnum veittu þeim eptirför, en sumir urðu eptir og börðust með yfirforingjum sínum við Ugglu og þau þrjú skip, er honum fylgdu og eigi vildu undan leita. Við þetta ofurefli barðist Uggla þrjár stundir af mikilli líreysti, þángað til siglutrén á skipi hans voru öll fallin fyrir borð, þá fyrst beiddist hann griða. Tromp sendi bát til að sækja hann, en í þeirri svipan lagði brennuskúta¹ ein að skipi Ugglu og kveikti í því, stóð þá skipið að vörmu spori í ljósum loga; bátur sá, sem sendur var til að sækja Ugglu, þorði eigi að leggja að skipinu; ýmsir reyndu að bjarga honum og mönnum hans, en allir sneru frá við svo búð. Þar fórst Uggla og allir hans skipverjar. Í orustu þessari mistu Svíar 7 skip (sumir segja 10), rúmar 3 þúsundir manna féllu og nokkur hundruð urðu handtekin. Bandamenn biðu lítinn skaða á skipum og mönnum.

Sigurinn við Öland varð Dönum mikið gleðiefni. Nú var ekkert sem gæti aptrað Kristjáni fimta frá að halda liði sínu

1) Brennuskútur eða tundurskútur (á dönsku: Brander, á sænsku: brännare) eru smáskip, sem menn fylla púðri og ýmsum eldfimnum efnum og senda móti skipum óvina sinna, og þegar þær eru komnar fast að þeim, er kveikt í öllu saman, forða þá mennirnir sér á burt, en skúturnar springa og kveikja um leið í því skipi, sem þær hafa lagt að.

yfir á Skán og vinna aptur lönd þau, er komin voru undir Svía. Hann hafði vígbúnað 16 þúsundir manna, og með því liði hélt hann seinast í júní-mánuði austur yfir sund, og lagði á skammri stund allt Skán undir sig, nema borgirnar Málmey og Kristjánsstað; enda var landsfólkið Dönum engu síður velviljað en Svíum. Karl ellefti var þaðan skamt á burtu með einar 5000 manna og vildi leggja til orustu við Kristján, en hershöfðingjum hans þótti það óráð og fengu talið hann af því, og lét hann þá undan síga til Smálands. Nú var það þessu næst, að Kristján fímti sendi *Duncam* hershöfðingja með 4000 manna norður á Halland til þess uð taka þar borgina Halmstað, halda síðan til móts við Gyldenlöve, er kominn var með 10000 manna af Norvegi, hafði farið herskildi um Bohuslæn og var nú seztur um Gautaborg; því næst átti allur sá her að halda austur á Svíþjóð, og þar ætlaði Kristján konungur sjálfur að koma til móts við þá með sínu liði. Fengi fyrirætlan þessi framgáang, var komið í hið mesta óefni fyrir Svíum; Danir voru þá í miðju landi þeirra með 30000 manna, en Karl ellefti hafði að eins 6 eða 8 þúsundir móti slíku ofurefli. Nú var þörf á góðum ráðum. Þá bar svo til, að sá maður kom til konungs austan frá Stokkhólmi, er hét *Jóhann Gyllenstjerna*; hann var einn í ríkisráðinu, stórvitur maður, en óþýður, harðgjör og drotnunargjarn. Hann gaf Karli konungi það ráð, að halda sem fyrst til Halmstaðs, og reyna að bjarga þeirri borg úr höndum Dana. Konungur var fús til þess, og hélt þangað sem skyndilegast. Að nokkrum dögum liðnum var Karl konungur kominn þangað norður, og lagði þegar til orustu við Dani. Lauk svo þeirra viðskiptum, að Svíar fengu sigur, en Duncam varð að gefast upp með það lið, sem eigi var fallið. Með þessum sigri tókst Svíum að eyða þeirri fyrirætlun Dana, að sameina norska og danska herinn og brjótaust austur í land. Karl konungur lét nú fyrirberast á Hallandi þangað til komið var fram að veturnóttum, og hann varð þess vísari, að Gyldenlöve hélt heim í leið aptur til Norvegs. Á meðan þessu fór fram hafði Danaher lítið annað aðhafzt, en að taka borgina Kristjánsstað á Skáni, sem áður var nefnd; eptir það settust Danir í vetrarbúðir, en Kristján konungur þeirra hélt heim í ríki sitt. Nú vildi Karl eigi lengur kyr sitja á Hallandi, honum safnaðist nokkuð lið, og með því heldur hann suður á Skán. En

er Danir fá njósn af ferðum hans, taka þeir sig upp úr vetrar-búðum sínum, og halda í móti Svíum; er þá Kristján konungur kominn aptur til sinna manna. Þar beittust Svíar og Danir brögðum nokkrar vikur. Loksins höfðu Danir náð góðum stöðvum hjá Lundi, en þar réðu Svíar á þá (4. des. 1676); tókst þar hin harðasta orusta, og stóð allan dag til kvölds, og lauk svo, að Svíar unnu þar mikinn sigur, en Danir höldu undan til Landskrónu. Það skildi með þeim konúngunum í orustu þessari, að Kristján fór burt af vígvellinum þegar sem hæst stóð bardaginn, eftir áeggjan sinna manna, en Karl barðist sem hetja og eggjaði alls staðar sína menn til framgöngu. Það er sagt, að herlið hvorratveggja tilsamans hafi verið nálægt 20,000 manna, en af þeim féllu um 9000 manna, eða því nær allur helmíngur, og er það til merkis um, hve hörð þessi orusta hefir verið. Svíar tóku þar marga Dani höndum, 50 fallbyssur og herbúðir þeirra. Kristján fimti hafði gjört sér miklar og fagarar vonir um að geta náð aptur undir sig Skáni, Hallandi og Bleking, og annað var eigi fyrir að sjá, en það mundi takast, og það því heldur, sem landsfólkið í fylkjum þessum var alment vinveittara Dönum og Danakonúngi, en Svíum og konúngi þeirra; þar að auki hafði Svíakonungur með fyrsta svo fátt lið og litlar varnir, hvar sem leitað var í ríki hans, að eigi voru líkindi til, að hann mundi geta varizt ofurefli Dana. En eftir orustuna hjá Lundi breyttust hugir manna. Það kom hér fram sem optar, að «vex hugur þá vel gengur». Svíar sáu nú að konungur þeirra, þótt ungur væri, var hin mesta hetja, framgjarn og snarráður eins og faðir hans hafði verið, og ópreytandi starfsmaður. Svíar vildu eigi láta sitt eftir liggja, að fylgja vel og drengilega svo duglegum foríngja, og alls staðar kom nú í ljós hjá þeim atorka og manndómur. Hins vegar mínkaði sú von hjá Dönum, að þeir mundu fá náð aptur hinum sænsku fylkjum, er um var barizt. Þeir sáu, að Svíar stóðu fastara fyrir en þeir höfðu búizt við, og að landslýðurinn á Skáni og Bleking og Hallandi gjörðist nú Dönum fremur afhuga eftir ósigurinn og hneigðist að Svíum. Nú urðu eigi fleiri tíðindi með Dönum og Svíum á því ári, en hvorirtveggja höfðu mikinn viðbúnað til hins komanda árs (1677). Fór þá enn sem fyr, að Svíar biðu ósigur í sjóorustum við Dani. Niels Juel vann sigur á Eiríki Sjöblad,

skamt frá Femern (1. júní 1677) og annan enn meiri á Hinriki Horn í Kjögeflóa (1. júlí 1677); gátu Svíar eptir þær ófarir hvorki sent menn eða vlistir suður á Pommern til styrks við Königsmark og hans lið, og eigi heldur varið kaupskip sín og verzlun sem þurfti. Í öllum þeim sjóorustum, sem nú hafa taldar verið, höfðu Svíar mist 40 stórskipa og margar þúsundir manna, en Danir voru einvaldir á sjónum, og gátu víðast gengið á land í Svíþjóð, enda lagði Niels Juel, þau ár sem ófriðurinn stóð, ótal bæi og borgir í eyði með sjónum fram á sunnanverðu landinu.

Þegar voraði (1677) hélt Kristján fimti enn á nýjan leik yfir á Skán með allmiklu liði, og lenti við Landskrónu; sú borg var vel víggirð og í höndum Dana frá árinu á undan. Konungur hafði þann foringja fyrir liði sínu, er *Goltz* hét; hann var frá Brandenburg og sagður dugandi hershöfðingi. Litlu eptir að Danir voru lentir í Landskrónu, kom Karl Svíakonungur þangað af landi ofan; hann hafði miklu minna lið, en þó var það áform hans að ráða á Dani hve nær sem særi gæfist. Einn morgun vissu Svíar eigi fyrri til, en Danir voru komnir út úr borginni með allan sinn her, og eigi lengra frá þeim en nokkur hundruð faðma. Þeir sáu, að hér var við þann liðsmun að eiga, að eigi var sigurs að vænta; að flýja undan var engi kostur, enda áttók Karl konungur það með öllu. Hann fylkir því liði sínu sem hvallegast, og hugsar eigi um annað, en að berjast sem vasklegast og falla með sæmd; hvert augnablik bjuggust menn við, að Danir mundu á þá ráða. En er minnst varði, rjúfa Danir fylkingar sínar og slá landtjöldum. Undruðust Svíar það stórum og vissu eigi hvað valda mundi, en síðar sögðu menn, að Goltz hefði ráðið því, að Danir gengu úr borginni, því að hann hafði viljað veita Svíum aðgöngu, en nokkrir danskir hershöfðingjar hefðu fengið konung sinn til að breyta þeirri fyrirætlan, og sagt honum, að það væri hið mesta óráð; hér þurfti þó eigi það að óttast, en hitt óttuðust hershöfðingjar þessir, sögðu menn, að Goltz mundi einn hljóta alla sæmd af sigri, og þess vildu þeir eigi unna honum. Þegar nótt var komin, höldu Svíar á brott austur í land, en Kristján konungur til Málmeyjar og bjóst að taka borgina úr höndum Svía. Þá borg varði sá maður, er Fabian Fersen hét, hinn mesti kappi, og fékk konungur eigi unnið

borgina, en beið þar mikið tjón á mönnum sínum, þó hafði hann enn eptir um 13000 manna, og með því liði hélt hann aptur til Landskrónu og bjóst þar fyrir um sinn. Það er sagt, að 60 smáskútur hafi farið frá Kaupmannahöfn yfir til Málmeyjar, til þess að taka móti herfangi því, er Danir bjuggust við að fá þar, og flytja það heim til sín, en er áhlaupið mistókst, urðu skútur þessar að snúa heim aptur, tómar, eins og þær komu.

Eigi hafði Kristján konungur verið marga daga í Landskrónu, áður Karl ellefti kom þangað með sína menn, hér um bil 9 þúsundir. Danir voru lítið eitt fyrir utan borgina og höfðu valið sér þar hið bezta vígi; þótti hershöfðingjum Karls fyrir því eigi fært að veita þeim þar aðgöngu, en konungur vildi eigi annað heyra en að ráðið væri á þá þegar í stað, og varð því svo að vera. Það var um dagmál (14. júlí 1677) að orustan tókst, og var barizt hvíldarlaust til miðaptans; létu Danir þá undan síga inn í borgina, en Svíar gátu eigi veitt þeim eptirför sökum þreytu. Margir menn féllu af hvorumtveggja, en þó fleiri af Dönum. Nokkru þar á eptir hélt Kristján konungur yfir á Sjáland, og skildi svo með þeim Karli það sumar.

Árið eptir (1678) bar lítið til tíðinda, og er það helzt teljandi, að Svíar náðu þá Kristjánsstað úr höndum Dana eptir lánga umsát. Hafði þá Karl unnið aptur allt land og allar borgir í Bleking og Skáni, nema Landskrónu; hún var ein eptir í höndum Dana. Öll þau ófriðarár, sem talin eru, höfðu Svíar og Norðmenn átt vopnaviðskipti norður í landi, á Jamtalandi, í Dölum, á Vermalandi og í Bohúslæni, og ýmsum veitt betur, en þau tíðindi, er þar urðu, eru öll smærri og síður í frásögu færandi en hin, sem suður í landi gjörðust, þar sem konungarnir sjálfir áttust við, eða á sjó þar sem herflotar þeirra hittust. Það ræður að líkindum, að bæði land og lýður í Svíþjóð hafi beðið hinn mesta skaða af öllum þessum langvinna og grimma ófriði, sem yfir gekk um þessar mundir. Það var eigi þar með búið, að Danir rændu og brendu í Svíþjóð, heldur gjörðu Svíar allt hið sama, einkum fyrsta ófriðarárið, í Hallandi, Bleking og Skáni, meðan þeir höfðu litla von um, að geta haldið þeim löndum, og hugðu, að þau mundu aptur komast undir Dani. Og þar á ofan risu hér og hvar í þessum bygðarlögum upp flokkar manna,

sem fóru víðs vegar um landið með rupli og ránum, réðu stundum á menn Karls konungs, ef þeir sáu sér það fært, og drápu þá. Ránsmenn þessa kölluðu Svíar «*Snapphanarna*». Karl konungur gjörði einatt út menn til að elta spillvirkja þessa og eyða þeim, og hegndi þeim miskunarlaust er náð varð. Kristján fimti bauð að senda þeim foríngja ef þeir vildu, en þeir svörðu: «hver og einn af oss er foríngi; vèr klæðum og fæðum oss sjálfir, og viljum helst stjórna oss sjálfir». Stundum rændu þeir eins vini sem óvini; enginn var óbultur fyrir þeim. Einu sinni varð náð 20 af þessum stigamönnum og voru allir dæmdir á gálga; böðull var enginn fyrir hendi, og enginn sænskur liðsmaður vildi verða til að hengja þessa sakadólga. Einn af þeim sjálfum bauðst þá til að gjöra það, ef hann fengi líf og grið, og var boð hans þegið. Síðan hengdi hann þá alla 19 í hárri eik, og var sú lengi við þá kend og kölluð «*Snapphanaeik*». Á öðrum stað var það, að sóknarkirkja ein stóð við alfaraveg; þangað komu stigamenn þessir opt og gjörðu mönnum ónáðir, svo að þar varð eigi vært; flutti prestur því tíðir úti á skógi hjá steini einum miklum. Þetta fréttu stigamenn, komu á næturlöndum og tóku prest og höfðu hann með sér til skógar og gjörðu honum þann kost, að veita þeim þar kvöldmáltíðarsakramentið ella missa lífið. Prestur sá sér ekki undanfæri, tók til máls og hélt yfir þeim svo harða og hjartnæma ræðu, að þeir viknuðu við, tárfeldu og féllu á knè og lofuðu bót og betran. Að því búnu fylgdu þeir presti heim aptur með miklum virktum, skildust við hann í bróðerni, og létu af öllum illvirkjum og ójöfnuði upp frá þeirri stund.

Skömmum tíma eptir að ófriður sá hófst, er nú hefir um stund verið sagt frá, áttu menn fund með sér í borg þeirri á Niðurlöndum, er *Nimwegen* heitir, og fóru að tala um sættir. Danakonungur vildi þá engum sáttum taka nema því að eins, að hann fengi aptur öll þau lönd, er hann hafði laus látið í Brömsebro, Hróarskeldu og Kaupmannahöfn, og þar að auki ýmislegt annað. Kjörfurstinn af Brandenburg vildi fá alla Pommern, er Svíar þá áttu. En þetta lá eigi svo laust fyrir, sem höfðingjar þessir hugðu. Loðvík fjórtándi var því reyndar eigi fjarlægur, að Svíakonungur lèti eitthvað af hendi rakna, til þess friður kæmist á, en er Karl ellefti aftók það með öllu, lýsti Loð-

vík yfir því skýrt og skorinort, að með því að Svíar hefðu sín vegna gengið í ófrið þenna, þá þætti sér skylt, að stuðla að því eptir mætti, að þeir mistu einskis í fyrir þá skuld. Þessu reiddust mótstöðumenn hans, og hétu því, að láta Loðvík eigi einan ráða friðarkostum að svo stöddu. Varð því eigi af sættum í það sinni. En sem ófriðurinn hafði staðið nokkur ár, kom Loðvíki til hugar, að sundra fjandmönnum sínum og sigrast þannig á þeim. Fyrir því tók hann Hollendinga á eintal og bauð þeim frið og hét þeim aðgengilegum verzlunarsamningum við ríki sitt. Þetta hreif. Hollendingar sáu sér hag búinn af frjálslegum verzlunarviðskiptum við Frakka, skárust úr sambandi við liðsmenn sína og sömdu frið við Loðvík (10. ágúst 1678). Sama dag gjörðu þeir vopnahlæ við Svía, og varð af því fullur friður litlu síðar. Nú voru bandamenn liðfærri á eptir síðan Hollendingar gengu úr leik. Keisarinn þóttist nú og hafa minni ástæður eptir en áður til ófriðar við Frakka; þar til kom og, að honum stóð stuggur af uppgangi Friðriks Vilhjálms kjörfursta, og vildi fyrir hvern mun, að Pommern kæmist aldrei í hans hendur. «Magnist sá seggur — sagði keisari — þar nyrðra, þá ris upp nýr Vandalakonungur við Estrasalt, miklu geigvænlegri oss og ríki voru, en Svíar, sem eru miklu lengra burtu». Þegar kjörfurstinn heyrði að keisarinn mundi líklegur til friðar, beiddi hann keisarann lengst allra orða, að semja eigi frið við Frakka, og hét honum öflugri liðveitslu, ef hann að eins vildi halda ófriðnum fram. En keisarinn lét eigi þoka sér, og það því síður, sem honum barst til eyrna, að kjörfurstinn væri undir niðri og í kyrpey að semja um frið við Frakkakonung fyrir sjálfan sig. Keisarinn varð því fyrri til bragðs, og samdi frið við Loðvík fjórtánda og Karl ellefta 5. febr. 1679. Var í þeim samningum svo til skilið, að Svíar skyldu halda öllu því, er þeir höfðu fengið í vestfalska friðnum.

Við þessu hafði kjörfurstinn reyndar búizt, og þess vegna leitaði hann friðar við Loðvík konung, og bauð honum sína liðveizlu, ef Frakkar vildu láta sig fá Pommern. En *Colbert* svaraði því svo: «Loðvíki konungi þykir drengskapur sinn við liggja, að Svíar fái öll þau lönd aptur, er þeir nú hafa mist». Kjörfurstinn hafði um þessar mundir unnið alla Pommern af Svíum, og vildi með engu móti láta það laust, er hann hafði hönd á

fest. Hann átti tal við Kristján fimta, og gjörðu þeir með sér statt og stöðugt, að semja eigi frið að svo vöxnu máli, en berjast í sameiningu við Svía, og þröngva þeim til friðar og fjárútláta. En sem Loðvík heyrði það, og var sáttur orðinn við keisarann, gjörði hann kjörfurstanum orð og sagði: að ef hann að mánuði liðnum hefði eigi gengið að þeim skilmálum, er sér þætti Svíum boðlegir, þá kvaðst hann mundu koma sjálfur með her manns til Brandenborgar, og sækja kjörfurstann heim. Loksins varð Friðrik Vilhjálmur að láta undan, og samdi þá svofeldan frið, að hann lét Svía fá aptur öll þau lönd og borgir, sem hann hafði af þeim unnið, nema lítinn skika lands fyrir austan Oderfljót. «Eg vildi óska, að eg kynni eigi að skrifa», sagði kjörfurstinn, þá er hann ritaði nafn sitt undir þenna friðarsamning, og mælti síðan fyrir munni sér þessi orð Virgilii skálds: *Exoriare aliquis nostris ex ossibus ultor*¹. Nú var Danakonungur orðinn einn eptir síns liðs; var hann lengi tregur til sátta nema hann fengi að minsta kosti að halda Skáni, en flestallir þjóðhöfðingjar í Norðurálfu voru því mótfallnir, að Danir ættu lönd beggja megin að Eyrarsundi. Loðvík fjórtándi sagði svo, að ef Kristján fimti hefði eigi samið frið við Svía fyrir ágústmánaðar lok (1679), þá kvaðst hann mundu taka af honum Oldenborg og Delmenhorst og fá öðrum í hendur. Danakonungur vildi eigi að svo stöddu láta undan, og sendi Loðvík þá her manns til Oldenborgar og tók að herja landið. Sá varð endir þar á, að friður var saminn í Lundi 26. september það sama ár. Fengu Danir að taka 10 fallbyssur úr hverjum þeim kastala í Svíþjóð, er þeir þá höfðu, en urðu nú að láta lausa; auk þessa fengu þeir rúmar hundrað þúsundir ríkisdala í þokkabót; en að öðru leyti stóð alt við sama, sem gjört hafði verið í Brömsebrúar- og Kaupmannahafnar-friðnum.

Af hershöfðingjum Svía, er tóku þátt í Skánar-ófriðnum með Karli ellefta, eru helst nafnkendir þessir tveir: *Rutger Ascheberg* og *Eiríkur Dahlberg*. Hinn fyrnefndi var þjóðverskur að ætt og uppruna, en gekk þegar í lið með Svíum í þrjátígi ára stríðinu 1634, og var þeirra maður upp frá því; hann var vitur maður og af öllum vel metinn og hin mesta hetja; hann

1) *Æneid*: IV. 625. Rísi einhver upp af niðjum vorum sá er þessa hefni.

hafði verið í 15 stórorustum og unnið mörg breystiverk, og eptir friðarsamninginn í Lundi og lát Jóhanns Gyllenstjerna gjörði Karl ellefti hann að landstjóra í Skáni, Hallandi og Bohúsleni, og fórst honum sú stjórn mjög vel. Hann dó 1693 á áttæðisaldri. Eiríkur Dahlberg var borinn og barnfæddur í Svíþjóð 1625. Hann var í herferðum með Karli Gústaf, og átti mikinn þátt í að Wrangel gat unnið Fridricíu-kastala; hann var og það, er eggjaði konunginn á að fara á ísum yfir Beltin og Eyrarsund, þvert á móti tillögum Wrangels og fleiri hershöfðingja, og vísaði honum leið yfir ísana; í orustunni og sigrinum við Lund átti hann ásamt með Ascheberg mikinn og góðan þátt. En einna frægastur er Dahlberg orðinn fyrir ýmsa kastala, virki og víggirðingar, sem hann gjörði í Svíþjóð, því að til þeirra hluta kunni hann manna bezt á sinni tíð, og var að því leyti líkur hinum nafnfræga virkjasmið Vauban á Frakklandi, er uppi var um sömu mundir. Dahlberg hefir og eptir sig látið marga uppdrætti, er skýra eitt og annað í sögu Karls Gústafs, t. a. m. orustuna við Warschau, áhlaup Svía á Fridricíu, fór þeirra yfir sundin, o. s. frv.; sömuleiðis uppdrætti yfir ýmsar borgir, höfðingjasetur og minnisvarða í Svíþjóð, bæði að fornu og nýju, og þykir það alt til samans mjög merkilegt, og lýsa ópreytandi starfsemi þessa ágæta manns. Hann lifði fram á daga Karls tólfta og dó hátt á áttæðisaldri.

Það var í mörgu jafnt á komið með Svíum 1680, eptir friðinn í Lundi, og Dönum 1660 eptir Hróarskeldu friðinn. Svíþjóð var komin í stórskuldir og fjárhirzlur ríkisins tómar, flóttinn var að miklu leyti lagður í eyði, margar borgir og ótal margir bæir í rústum, akuryrkja, iðnaður og verzlun í dái; á ófriðarárunum höfðu fallið og farizt með ýmsu móti um 100 þúsundir verksfærra manna; í sumum sveitum sáuust eigi aðrir karlmenn en únglíngar yngri en 15 vetra, eða gamalmenni komin að fótum fram. Allir voru fátækir í landinu nema hinir helztu aðalsmenn, þeir áttu hér um bil *fimm sjöttu hluta af öllu jarðagóði landsins*. Hinn lægri aðall, bændur, borgarmenn og klerkar sáu ofsjónum yfir auðlegð ríkisráðsins og hinna æðri aðalsmanna, og hötuðust við þá í þeli niðri. Herinn hafði miklar mætur á konungi, sökum breysti hans og framgöngu í stríðinu, og var fús að fylgja honum í öllu. Karl ellefti sá glögt, hvern-

ig öllu hagaði til í ríkinu; hann sá glögt, að ríkisráðið og hinir æðri aðalsmenn (greifar og fríherrar eða barúnar), réðu því nær einir öllu; þeir bundu hendur konungsins, svo að hann gat litlu til leiðar komið öðru en því, sem þeim var ljúft; þeir kúguðu allar aðrar stéttir, svo að þær komust eigi fram sökum efnaleysis eða vankunnáttu. Á þessu vildi konungur fá meiri jöfnuð; honum þótti það óþarfi og niðurlæging, að hafa orðið að þiggja fjárstyrk af Frakklandi; slíkt gjörði Svía háða Frökkum, eða hverjum þeim útlendum þjóðhöfðingja, sem hjálp þurfti af að þiggja. Þess vegna vildi Karl ellefti lifa í friði það sem eptir var æfinnar, og verja henni til þess að bæta efnahag ríkisins, svo að það yrði sjálfu sér bjargandi, og aldrei öðrum þjóðhöfðingjum háð. En þessar endurbætur, sem hann vildi gjöra, sá hann, að hann gat eigi haft fram nema því að eins, að ríkisráðið og alt stórmenni landsins yrði svipt þeim völdum, sem það smátt og smátt hafði til sín dregið. Honum var kunnugt hvað fram hafði farið í öðrum löndum, og nú fyrir skemstu í Danmörku, þá er Friðrik þriðji kom þar á einveldisstjórn. Slíkt hið sama vildi hann nú gjöra hjá sér, og hann vissi, að allur þorri landsmanna, allar hinar óæðri stéttir mundu styrkja sig til þessa verks. Hann var þegar byrjaður á þessari breytingu í stjórnarskipun ríkisins meðan ófriðurinn stóð. Allan þann tíma kom hann aldrei til Stokkhólms, þar sem ríkisráðið sat og átti samkomur, heldur var hann suður í landi hjá hernum; lítið varð úr störfum ríkisráðsins á meðan, og jók það eigi lítið á óvinsældir þess hjá þjóðinni; en konungur skipaði fyrir um ýmsa hluti, eins og hann væri einvaldur, án þess að bera það undir ráðherrana. Allur þorri manna lét sér það vel líka, og það því heldur, sem hann var ástsæll orðinn af þegnum sínum, sökum ágætrar framgöngu og sigursældar í stríðinu.

Nú var þessu næst haldinn ríkisdagur í Stokkhólmi 1680. Konungur hafði herinn þar í nánd, og sá svo um, að hinir helztu og djörfustu af aðalsmönnum næðu eigi þingsetu, með því að setja þá í embætti eða fá þeim í hendur einhver óumflýjanleg störf í fjarvist við þingið. Honum varð því næsta auðvelt að fá ríkisdaginn til að fallast á tvær tillögur, sem fram voru bornar. Var önnur sú: að ríkisstjórnarnir — sem stýrt höfðu ríkinu áður konungur komst til lögaldurs — skyldu gjöra fulla

grein fyrir gjörðum sínum meðan þeir sátu í þeim völdum, og þó var áður búið að leysa þá af allri þess konar ábyrgð; og hin sú: að nú skyldi því haldið áfram, sem byrjað var á meðan Karl Gústaf sat að ríkjum, en síðar dottið í þagnargildi: að grafið væri eptir því, hverjar jarðir hefðu á ýmsum tímum gengið undan krúnunni, og nú skyldi ná þeim aptur undir hana. Á hinum næstu þingum þar á eptir steiptist ríkisráðið úr völdum, svo að kalla mótspyrnulaust, því að fáir urðu til að styðja. Konungi var fengið *einveldi* í hendur, eins og það frekast getur orðið; ríkisráðið og 5 hin æðstu embætti voru numin úr lögum, en í þess stað sett önnur embætti og önnur nöfn. Í stað þess að áður hét ríkisráð og ríkisráðherrar, var nú nefnt konúnglegt ráð og konúnglegir ráðgjafar. Ráðgjafar þessir máttu segja hvað þeim sýndist, en konúngur var eigi skyldur að fylgja ráðum þeirra fremur en honum sjálfum líkaði. En þó Karl ellefti væri nú orðinn einvaldur konúngur í ríki sínu, má þó segja honum það til lofs, að hann bægi eigi þjóð sinni frá allri bluttöku í landsstjórninni, eins og Friðrik konúngur þriðji gjörði í Danmörku. Karl lét ríkisdaginn haldast alt eins og áður hafði verið, og lét hann leggja á landið alla skatta, sem við þurftu til nauðsynlegra útgjalda.

Þegar Karl konúngur var orðinn einvaldur lét hann, samkvæmt því sem ríkisdagurinn hafði ákveðið, nefnd manna prófa gjörðir hinna fyrverandi ríkisstjóra, og niðurstaðan varð sú, að þeir urðu að láta af hendi margar þúsundir ríkisdala til krúnunnar. Því næst varð umtalsmál um það jarðagóz, er gengið var undan krúnunni, og var þá fyrst gengið að greifum og fríherrum (barúnum) og teknar þeirra jarðir, og síðan að öðrum jarðeigendum á sömu leið. Menn létu sér eigi nægja, að taka af eigendum þær jarðir, sem þeim höfðu verið gefnar, heldur einnig þær, sem keyptar höfðu verið af krúnunni, og þær, sem hún hafði veðsett fyrir fé, er hún hafði fengið að láni hjá einstökum mönnum. Allar slíkar jarðir voru nú vægðarlaust teknar frá eigendum og lagðar til krúnunnar móti litlu eður alls engu endurgjaldi. Aðalsmenn mistu þannig helmíng af öllu sínu jarðagózi, og margur einn, sem áður var vel fjáður, gekk nú slyppur og snauður frá öllu saman. Alt hið sama átti sér stað í skattlöndum þeim, er þá lágu undir Svíþjóð, t. d. Pommern, Estlandi, lugermannalandi og Líflandi. En öll sú harka og öll þau

rángindi, sem í þessu efni áttu sér stað, einkum í Líflandi og víðar þar eystra, urðu tildrög til þess, að þeir menn sem fyrir slíkum aðförum urðu, flýðu sumir af landi burt og austur á Rússland, og sumir sátu eptir, en hvorirtveggja urðu Svíakonungi fráhverfir. Rússar skildu teikn tímans og tóku þessi lönd frá Svíum litlu síðar en hér var komið sögunni. Þessi stórkostlegu landabrigði (Reduktion), sem Karl ellefti lét ganga yfir þegna sína, stóðu yfir um mörg ár, og gjörðu margan mann snauðan. Þegar t. a. m. Magnús de la Gardie dó, átti hann naumast fyrir útför sinni, og hafði þó áður verið stórríkur maður; svo harðlega var að mönnum gengið. Greifar og friherrar héldu litlu öðru eptir en nafni einu; lönd þeirra voru að mestu farin, því að flest voru upphaflega komin til forfeðra þeirra eður sjálfra þeirra frá krúnunni.

Á þenna hátt fékk Karl ellefti ógrynni fjár og landa í sínar hendur. En svo harðneskjulega sem fé þetta var að mestu leyti fengið, svo vel og viturlega kunni hann að verja því. Hann hugsaði eigi um að auðga sjálfan sig, eða sína niðja, heldur bitt, að ríkið auðgaðist. Hann hélt sig og hirð sína mjög spart, og mjög ólíkt því, sem með öðrum konungum tíðkaðist um þær mundir. Hann var því vanur að segja: «verði þeir, sem mér þjóna, eigi sáluhólpnir, þá verða þeir að minsta kosti ekki ríkir». Hann varði miklu fé til þess að reisa við aptur borgir og bæi, sem eyðzt höfðu í stríðinu; hann gaf fé til að rétta við alla atvinnuvegi; hann kom fótum undir alþýðuskóla, og lét sér mjög ant um alla fræðslu og mentun alþýðunnar, sem í marga staði hafði orðið út undan frá því er Gústaf Adolf var á dögum; hann hafði mörg herskip í smíðum og kom aptur fótum undir mikinn og ágætan herskipaflota; hann lét reisa borg af nýju suður í landi og nefna *Karlskróna*, og urðu þar síðan aðalstöðvar flotans, og þótti miklu betur í sveit komið en áður, meðan hann var norður í Stokkhólmi, því að þar nyrðra var hann tíðum inni frosinn þá er sízt skyldi. Konungur kom og nýrri skipan á herlið sitt; hann lét hver tvö bændabýli á friðartímum sjá einum manni vopnfærum fyrir húsnæði og fótum og fæði, og skyldi sá maður ganga í herþjónustu hve nær sem ófrið bæri að höndum; en foringjar liðsins fengu jarðir krúnunnar til ábúðar. Hafði konungur þannig vígbúinn her hve nær sem á þurfti að halda,

og sú tilhögun var bændum miklum mun hagfeldari en áður, meðan synir þeirra og húskarlar voru kvaddir til herþjónustu hvernig sem á stóð. Með hörku, fyrirbyggju, sparnaði og óþreytandi starfsemi kom Karl konungur þannig fótum undir mikinn og vel búinn landher, mikinn og vel vandaðan skipaflota; allar ríkisskuldir voru greiddar, og miklu fé safnað af nýju í ríkissjóði; og er sannast að segja, að það var nálega alls staðar, sem fyrirbyggja og stjórnsemi þessa merkilega konungs kom fram þjóðinni til gagns og frama. Hann var trúrækin maður alla æfi, og lét sér mjög annt um kirkjur og kennimenn, trúarbrögð og siðgæði í landinu, og setti um það ný lög; hann lét semja og gefa út nýja sálmabók, er höfð var í Svíþjóð fram á þessa öld.

Karl var lítt lærður, og eigi sérlega vel viti borinn, en þó greindur, ákafamaður mikill í skapi og ráðríkur, kaldlyndur og tortryggur, og átti fáa sem enga vini; opt reiddist hann bæði fljótt og illa, og hafði það þá til, að berja á mönnum, en mjög var hann sáttgjarn, ef hann sá, að hann hafði gjört einhverjum rángt. Eru til um það margar sögur, og ein þessi: einhverju sinni kom maður til hans, er átti skuld að heimta hjá krúnunni, og beiddist borgunar, en á því varð einhver fyrirstaða, og loks reiddist konungur svo, að hann greip það sem hendi var næst, en það var eldskórúngur mikill afjárni einu, og ætlaði að lemja manninn, en hann forðaði sér undan högginu og komst út um dyr og ofan á stræti. Þar mætir hann kunníngja sínum, er átti alt hið sama erindi við konúng, og ætlaði á hans fund. «Hvernig er konungurinn viðtals í dag, er hann góður heim að sækja?» segir þessi. «Já! svarar hinn, hann er sérlega góður heim að sækja, og borgar viðstöðulaust, og það með stángajárni». Maðurinn tók orðin eins og þau voru töluð, og hraðar ferð sinni til þess að hitta konúnginn og sæta lagi meðan hann sé í góðu skapi. Gengur því næst í höllina og fyrir konúng, segir honum erindi sitt og biður hann af mikilli auðmýkt, að greiða sér skuldina með stángajárni eins og hinum, sem litlu áður hafi þar komið. Konúngi þótti erindið kátlegt, og spyr hvað valdi. Maðurinn segir honum af hið sanna. Konúngi var þá runnin reiðin, og fékk bæði þessi og hinn skuld sína greidda með góðum skilum. Karl ellefti kvongaðist 1680, og hét drotning hans *Ulrika Eleonora*. Hún var dóttir Friðriks þriðja Danakonungs, og systir

Kristjáns fimta, vitur kona og góðgjörn. Svíar unnu henni hugástum, og hörmuðu mjög lát hennar, er hún andaðist 1693. Þeim konungi og drotningu hans varð 7 barna auðið, en 3 komust að eins á fullorðins aldur, dætur tvær og sonur einn, er til ríkis kom eptir föður sinn og nefndur Karl tólfti. Karl ellefti var meðalmaður á vöxt, og þó vart, limaður vel nema handstór í meira lagi, og sögðu óvinir hans, að þær hendur væru til þess gjörðar, að brísa eignir manna. Hann var upphaflega eigi heilsu-hraustur, en hafði hert sig svo á dýraveiðum, ferðalögum og heræfingum, að hann þoldi manna bezt vos og vökur. Þegar hann var á ferðum, reið hann svo mikinn, að fáir gátu fylgt, og hleypti þá einatt á stokka og steina og hvað sem fyrir varð. Hugur og harka voru meiri en svo, að hann gætti þess, að hlífa sér eður öðrum. Hann dó annan dag páska (5. apríl) 1697, á öðru ári yfir fertugt.

Ófriðurinn mikli á Norðurlöndum (1700—1721).

Um sama leyti sem hið spanska erfðastríð stóð, og Habsborgar- og Bourbonismenn börðust um yfirráð yfir löndum og lýðum í suður- og vestur hluta Norðurálfunnar, gekk langur og harður ófriður yfir Norðurlönd, eða lönd þau, er öllu megin liggja að Eystrasalti. En áður en sagt verður frá tíðindum þeim, er þá gjörðust, þykir nauðsyn til bera, að skýra í fáum orðum frá tildrögum þeim, er að sjálfum ófriðnum liggja.

Af því sem áður er sagt vita menn, að Svíar höfðu um mörg ár verið fremstir allra þjóða á Norðurlöndum, og Svíþjóð eitt af stórveldum Norðurálfunnar. Þó landið sjálft væri hvorki mjög frjótt eða mann margt, var landsfólkið bæði hraust þjóð og herská, og sumir af konungum hennar mestu afburðarmenn, stórhugaðir og sigursælir, t. a. m. Gústaf Adolf og Karl Gústaf, er lagt höfðu undir sig lönd og lýði, bæði fyrir austan haf og sunnan. Þegar hér var komið sögunni, áttu Svíar meðal annars þessar stórborgir: Bremen, Wismar, Stralsund, Stettin, Ríga og Reval; þeir réðu yfir ósum stóránna Weser, Oder, Dúna og Neva, og höfðu ærnar tekjur af tollum þaðan; þeir áttu Ingermanland, Estland og Lífland, hin kornfrjóvu lönd, og þar á ofan alt Finnland. Rússar náðu þá hvergi til sjávar nema norður í Gandvík og suður í Asóvshaf. Pétursborg, einhver hin mesta

og skrautlegasta borg á vorum dögum, var þá eigi til. Þar sem hún er nú, voru þá mýrar einar, fen og forðð, og að eins smá fiskimanna þorp og nokkur virki sænskra hermanna. Þessi fjarlægju lönd, er Svíar drotnuðu yfir, voru þeim að vísu mjög arðsöm, en sambandið við Svíþjóð var eigi eðlilegt eða trygt, og hlaut að breyta fyr eður síðar, nema því meira vit og því styrkari hönd bældi öllu saman. Nábúapjóðirnar, Rússar, Pólverjar, Prússar og Danir, höfðu einatt farið halloka fyrir Svíum. Þannig höfðu Svíar unnið Kexholms-lèn og Ingermanland af Rússum; Lífland af Pólverjum; Stettin, Vestur-Pommern og Rügen af Brandenburg, eða sem vèr nú köllum af Prússum; Wismar af Meklenborg; Bremen og Verden af Þjóðverjum, eða hinu þýzka ríki; Skán, Halland, Bleking og fleiri lönd af Dönum. Slíkar ófarir fyrir Svíum hlutu að vekja hjá nábum þeirra ófund, hatur og hefndarhug, og hver þeirra fyrir sig og allir til samans hiðu þess, að færi gæfist til að brjóta ofurvald Svía á bak aptur, og ná því aptur undir sig, er þannig var undan þeim gengið. Meðan Karl ellefti ræð ríkjum, leituðu þjóðir þessar eigi á Svía; þeim stóð geigur af honum meiri en svo, að þær þyrðu á hann að ráða; þær vissu, að hann hafði alls nægtir: marga menn og vaska og vel búna, næg forðabúr og fjárhirzlur auðugar. Karl hafði og í skánska ófriðnum sýnt, að honum fylgdi bæði hreysti og hamíngja. Þegar hann var dáinn, og sonur hans, *Karl tólfú*, tekinn við ríkisstjórn, úngur og óreyndur, þótti þeim tími til kominn að minnast á fornan fjandskap, og rétta hluta sinn á Svíum. Þá var einnig svo ástatt hjá flestum þessum nágrannaþjóðum Svíanna, að þær höfðu yfir sér unga, áleitna og framgjarna stjórnendur. Fyrir Danmörku ræð Friðrik fjórði; fyrir Póllandi Friðrik Ágúst (Ágúst 2.) af Saxlandi, og fyrir Rússlandi Pétur Czar. Skulu hér nú í stuttu máli tekin fram nokkur atriði um hvern af þessum fjórum þjóðhöfðingjum.

Friðrik fjórði (1699—1730), sonur Kristjáns fimta, er talinn með hinum nýtustu Danakonungum. Á uppvaxtarárum sínum hafði hann farið á mis við nauðsynlega tilsögn og mentun, en þegar hann var kominn til ríkis, bætti hann úr þeim bresti með lofsverðri starfsemi og afskiptum af flestum þjóðmálefnum. Hann bætti í ýmsum greinum kjör bændastéttarinnar í Danmörku, og kom því til leiðar, að alþýðumanna börn fengu miklu meiri

fræðslu en áður. Hann var sparsamur og gekk ríkt eptir, að fjárhag ríkisins væri stjórnað með reglu og ráðvendni. Hann erfði eptir föður sinn megnar misklíðir við Friðrik hertoga af Holstein-Gottorp. Sá hertogi átti systur Karls tólfta og fékk liðsafla frá honum móti Dönum. Af þessum rökum og öðrum, er áður hafa verið tilgreind, reis ófriðurinn með Dönum og Svíum. Þeir Friðrik konungur fjórði og Karl tólfti voru systkina-synir.

Friðrik Ágúst, kjörfursti af Saxlandi, var einnig náskyldur Karli tólfta, því að þeir voru systra synir¹. Kjörfursti þessi hafði það helzt sèr til ágætis, að hann var allra manna sterkastur, og er hann einatt kallaður *Ágúst hinn sterki*. Að öðru leyti er eigi hægt að segja, hvað honum verður til gildis talið. Hann var hégómagjarn og mjög hneigður til munaðar og saurlifnaðar, og eyddi til þeirra hluta bæði sínu fè og þegna sinna; hann var brigðmáll og ótryggur í viðskiptum. *Jóhann Sobieski* Póllandskonungur (1674—1696), hin ágæta hetja, sem hjálpaði Vínarborg, þá er Tyrkir sátu um hana 1683, dó 1696. Áttu Pólverjar þá að kjósa sèr nýjan konung í hans stað. Í þá konungstign vildi Ágúst sterki ná fyrir hvern mun, því að honum þótti það glæsilegra, en að vera kjörfursti. Og með fögrum lofordum og fægjöfum fékk hann því til leiðar komið, að Pólverjar, sem aldrei vissu hvað til síns friðar heyrði, kusu hann til konungs yfir sig 1697. Til þess að geta fengið konungsnafnið, kastaði Ágúst kjörfursti Lúthers trú og gjörðist katólskur, eins og landsmenn á Pólverjalandi; og nú var hann nefndur *Ágúst annar*. Þegar hann var orðinn konungur yfir Pólverjum var honum mest um það hugað, að ófriður gæti á einhvern hátt kviknað þar í landi, til þess honum gæfist færi á að flytja þangað herlið af Saxlandi; því að þá fyrst þóttist hann hafa þar nokkurn styrk til þess að efla konungdóm sinn. Svíar höfðu, eins og fyr er er ritað, unnið Lísland af Pólverjum. Því landi vildi Ágúst annar ná aptur undir sig, og lagði nú á það allan

1) Friðrik III. Danakonungur

Anna Sofía	Kristján V. D. k.	Ulrika Eleónóra
Ágúst II.	Friðrik IV. D. k.	Karl XII.

hug, að hefja ófrið gegn Svíum, og það því fremur, sem Svíakonungur (Karl 12.) var úngur að aldri og eigi líklegur til mikillar mótstöðu.

Á Rússlandi hófst nýr ættleggur til ríkis (1613) með *Mikael Rómanów*, eins og fyr er ritað¹. Hann dó 1645, og kom þá til ríkis sonur hans *Alexíus Mikaelovíx* (1645—1676). Alexíus var tvíkvæntur, og hét hin fyrri drottning hans *María*; þeirra börn voru Fedór, Ívan og Sofía. Hin síðari hét *Natalía*; þeirra sonur var Pétur (fæddur 10. júní 1672), er alment er nefndur *Pétur Czar* og *Pétur mikli*. Þegar Alexíus dó, tók Fedór, elzti sonur hans, ríki eptir hann, en sat skamma stund að völdum og dó 1682. Á dögum feðga þessara fóru litlar sögur af Rússum; þeir voru, enn sem komið var, að miklu leyti utan við alla viðburði og viðskipti manna í Norðurálfunni og höfðu sína siðu fyrir sig. Þess skal að eins getið, að á meðan Fedór ríkti, hófst hinn fyrsti ófriður milli Rússa og Tyrkja; veitti Rússum betur, og nokkuð af Kósakkalöndum komst þá í hendur Rússum.

Þegar Fedór Czar var dáinn, stóð Ívan bróðir hans næstur til ríkis, en hann þótti óhæfur til ríkisstjórnar, og fyrir því var Pétur kosinn til Czars af helztu höfðingjum þjóðarinnar. Sofía systir hans, er sjálf vildi til valda komast, reiddist þessu svo mjög, að hún hleypti hermanna flokki þeim, er Strelizar voru nefndir, upp til ófriðar. Sögðu þeir, að höfðingjarnir (Bojararnir) hefðu eigi átt með, að veita Pètri Czarstign að sèr fornspurðum, og settu síðan Ívan til þeirra valda. En Ívan beiddi þegar í stað, að Pétur bróðir sinn mætti deila völdum með sèr.

Sú varð og niðurstaðan, að þeir bræður voru báðir krýndir, en Sofía stýrði ríkinu í raun rættri, og sýndi bæði vit og dug. Það liðu eigi mörg ár þar til menn sáu það fyllilega, að Pétur var í meira lagi framgjarn og ráðríkur, og að hann undi illa yfirráðum systur sinnar. Árið 1689 sögðu menn, að Sofía hefði ætlað að hleypa Strelizum upp og láta þá myrða Pétur, en hann varð fyrri til, lét taka hana og setja í klaustur og hafa sterkan vörð á henni, en taka marga af Strelizum af lífi. Þá var sá maður við hirðina í Moskóv (þar sátu Rússlands Czarar um þessar mundir), er *Lefort* hét; hann var ættaður frá Genf, hermaður og fróður um marga hluti. Hann sagði Pètri Czar margt frá

1) Nýja sagan I. hepti bls. 129, 165.

Mikael Romanow, Czar 1613—1645

Alexíus (1645—1676)

Sofía.	Fedór (1676—1682),	Ivan 3.	Pètur mikli (1682—1725)
			∞ 1. Evdoxia
	Katrín	Anna Ívanóvna	2. Katrín (1.), røð ríkjum 1725—1727
		røð ríkjum 1730—1740	
	Anna Karlóvna		1. Alexíus
			2. Anna.
			2. Elisabet
			∞ Karl Friðrik røð ríkjum 1741—1762
	Ivan 4. (1740-1741).		Pètur 2. (1727-1730). af Holstein-Gottorp.
			Pètur 3. keisari 1762.
			∞ Katrín (2.) røð ríkjum 1762—1796.
			Páll, keisari 1796—1801.
			Alexander 1. (1801—1825). Nikulás (1825—1855)
			Alexander 2.

Athugagrein: Merkið ∞ þýðir: kvongaður eða gipt.

öðrum þjóðum; fanst hinum unga manni mikils vert um það alt, og festi það sér í huga; hann lærði útlend túngumál af Lefort, hernaðaraðferð annara þjóða, og ýmislegt annað; hann sá að Rússar stóðu langt á baki annara Norðurálfu þjóða, að þeim var ábótavant í flestum greinum, og hann einsetti sér að ráða bót á því, og reyna að menta þá á allar lundir. Hið fyrsta, sem Pétur Czar gjörði, var, að koma á fót herliði á þann hátt, sem það var hjá öðrum þjóðhöfðingjum vestur í löndum á þeim tímum. Þar næst vildi hann eignast herskip og sjólið. En hér var eigi hægðin á. Ríki hans náði þá hvergi að sjó, nema að Gandvík (Hvítahafi), og hann hafði aldrei séð enskt skip eður hollenzkt á æfi sinni. Hann fór því norður til Arkangel; þangað komu enskir menn og verzlðu þar við Rússa. Þar sá hann skip þeirra og fanst mikið til, og lét eigi þar við sitja, heldur dvaldist þar um hríð og gaf sig við skipasmíðum. Nú varð honum það fyrst ljóst, að aldrei gæti hann komið Rússum neitt áleiðis, nema því að eins, að hann fengi þokað þeim vestur að Eystrasalti og suður að Svartahafi, haft þar skip, átt þar siglíngar og verzlun. Með þeim huga og því áformi sneri hann heim aptur. Skömmu síðar (1696) tókst honum að vinna Asóvborg af Tyrkjum, og var hann þá kominn að Asóvshafi, en hitt var enn eptir að fá fótfestu við Eystrasalt.

Það var nú þessu næst (1697) að Pétur Czar hóf ferð sína vestur í lönd, og létti eigi fyr en hann kom til Amsterdam á Hollandi. Þar var margt að sjá og læra. Lét hann þar fyrir berast um hríð. Skamt þaðan er bær einn, er Zaardam eða Zaandam heitir, heldur lítil bær, en verksmíðjur voru þar margar og skipasmíð mikil og nafnkend. Þar settist Pétur að, klæddist óbreyttum búningi, og kvaðst vera rússneskur verkmaður, sendur þangað til þess að læra skipasmíð. Nú tók hann til starfa og reyndist bæði mikilvirkur og hagvirkur, og svo mikill iðjumaður, að enginn komst til jafns við hann. Þegar hann lagði frá sér exi eða sög, þá varði hann tímanum til annars náms, stundaði náttúrufræði, stærðafræði og hvað eina, er hann hugði sér gæti til gagns orðið. Mönnum varð brátt kunnugt hver maðurinn var, en hann leyfði eigi, að gjörður væri hinn minsti greinarmunur milli sín og annara, er að smíðum gengu. Þegar þessu hafði fram farið um stund, gáfu staðarbúar í Amsterdam honum skip eitt

með rá og reiða. Pétur ræð menn til skipsins og sendi það til Arkangels, og þar að auki nokkra sjómenn, smiði og ýmsa hagleiksmenn, er hann fékk í sína þjónustu á Hollandi. Sjálfur fór hann yfir til Englands og kynti sér þar alla þá hluti, er hann gat komizt yfir. Hann hafði áður á Hollandi nokkrum sinnum hitt Vilhjálmi konungi þriðja að máli. Pétur dvaldizt um hríð í London, kom þar víða, og var þá stundum klæddur sjómannabúningi, en stundum «á betri buxunum». Einhverju sinni lét Vilbjálmur konungur herskip sín berjast til málamyndar, eins og jafnan er gjört, til að venja menn við sjóorustur, og bauð Pétri að horfa á þann leik. Fanst Pétur svo mikils vert um þá sjón, að hann gat eigi orða bundizt og mælti: «væri eg eigi Czar á Rússlandi, vildi eg ekki annað vera en admírall á Englandi». Að skilnaði gaf Vilbjálmur konungur honum skip með 24 fallbyssum, og á því skipi fór Pétur til Hollands. Á Englandi ræð hann í sína þjónustu bæði sjóliðsforingja, stýrimenn, lækna og ýmsa iðnaðarmenn, og sendi alla til Rússlands. Að því búnu hélt Pétur til Vínar, skoðaði þar vopnabúr og alt sem til herskapar heyrði, og ætlaði svo að halda suður á Ítalíu, en þá komu honum þau tíðindi, að Strelizar hefðu að nýju gjört uppreisn heima í ríki hans; gaf hann þá upp suðurförina, og bjóst sem hvatlegast heim aptur. Það er sagt, að á þeirri leið hitti hann Ágúst annan, Pólverja konung, og að konungur tæki honum með mikilli viðhöfn; sýndi konungur honum afl sitt, og hjó í einu höggi höfuð af uxa einum, er fram var leiddur. Pétur bað konung gefa sér sverðilð að menjagrip, er hann bjó með uxann og mælti: «Eg ætla að reyna á rússneskum mannahálsum hvernig það bitur». Þegar Pétur kom heim í ríki sitt, var búið að sefa uppreistina, og taka marga Streliza höndum. Pétur lét rannsaka mál þeirra, og pynda þá alla til sagna, er tregir voru í svörum. Því næst lét hann af lífi taka um 5 þúsundir manna, og gekk sjálfur að því verki af miklu kappi, og reyndi þá eggjar í sverðinu konungsnaut. Hann lét prófa það vandlega, hvort Sofia systir hans hefði átt nokkurn þátt í uppreistinni, og fundust engar líkur til þess; samt sem áður lét Czarinn reisa 30 gálga hjá klaustri því, er hún sat í, og hengja þar 230 Streliza; hengu þeir, er næstir voru, úti fyrir herbergis glugga hennar,

og beinagrindirnar voru eigi niður teknar fyrir en hún var dáið (1704).

Eftir bryðjuverk þessi setti Pétur Czar á stofn sjómanna- og hermanna-skóla, og jók her sinn á allar lundir; hann lét og smíða skip mörg, og lagði fyrir hina ríkustu menn í landinu að gjöra slíkt hið sama. Þannig gjörði hann yfirbiskupi landsins (Patriarkanum) og tveimur hinum æztu höfðingjum að skyldu, að láta reisa í sameiningu 20 herskip. Á þann hátt eignaðist hann á skömmum tíma allmikinn skipaflota. En Pétur lét sér eigi einungis um það hugað, að koma upp herliði og skipaflota, og kenna þjóð sinni hernaðar aðferð bæði á sjó og landi, heldur vildi hann einnig að hún skyldi í sem flestum ytri greinum líkjast öðrum Norðurálfu þjóðum, og taka upp siði þeirra. Hann bauð Rússum að viðhafa sama klæðasnið á búningi sínum sem Þjóðverjar og Hollendingar þá höfðu; láta sér eigi vaxa skegg, heldur raka það af, o. fl. þess konar; gekk hann eftir því með harðri hendi, að í engu væri út af brugðið því er hann sagði fyrir. En þó hann að miklu leyti umskapaði hina rússnesku þjóð, þá náðu allar hans miklu og mörgu breytingar einungis til hins ytra líferniss og háttalags; um verulega mentun og siðgæði þjóðarinnar skeytti hann lítið, og hafði litla hugmynd um slíka hluti, því að hann var sjálfur alla æfi illa siðaður; hann var manna grimmastur, og refsaði manna harðast þegar því var að skipta, og í flestum greinum var hann hið mesta heljarmenni.

Karl, sonur Karls ellefta Svíakonungs og Úlriku Eleónóru drotningar hans, fæddist í Stokkhólmi 17. júní 1682. Á æsku árum sínum fékk hann hið bezta uppeldi, og var eingöngu undir höndum móður sinnar fram að sjöunda ári; hún var góð kona og guðhrædd, og kendi syni sínum guðsorð og góða siði; hún lét hann lesa kvöld- og morgun-bænir sínar á knjánun. Við hirðir flestra konunga í Norðurálfu drotnaði um þær mundir glaumur og gjálífi, eyðsla og saurlífnaður; við hirð Karls ellefta átti hið gagnstæða sér stað. Þar ríkti þögn og alvara, sparneytni og hreinlífi, og þessum siðum vándist hinn úngi konungsson. Þegar hann var sex vetra fór móðir hans að hafa minni afskipti af honum, en honum voru fengnir kennendur, og valdir til þess hinir beztu menn. Námsgáfur hafði hann góðar og tók allgóðum framförum í ýmsum vísindagreinum. Mest þótti honum til

koma, að lesa sögur Júlíusar Cæsars og Alexanders mikla, og kynnast herferðum og afreksverkum frænda sinna og forfeðra, einkum afa síns Karls tíunda. Túngumál lærði hann nokkur, þar á meðal þýzku jafnframt móðurmáli sínu, latínu allvel, en frakknesku miður; honum var eigi um þá túngu, og var mjög tregur á að tala hana. Kennarinn sagði, að það væri þó fögur túnga, og vel færi á því, að Svíakonungur gæti talað hana, ef frakkneskur sendiboði kæmi á hans fund. »Eg kann frakknesku«, sagði Karl, »og skal læra hana enn betur. Hitti eg Frakkakonung, skal eg tala við hann á hans túngu; en komi sendiboði hans hingað til mín, þá á betur við, að hann læri sænsku mín vegna, en að eg læri frakknesku hans vegna«. Og við það sat. Snemma þótti honum gaman að fara á dýraveiðar með föður sínum, og reyndist brátt ótull og óhræddur, þó djarft væri farið. Hann var sjö vetra þegar hann skaut tóu, og ellesu þegar hann skaut bjarndýr í fyrsta sinn, og þótti hvorttveggja frækilega gjört af jafnúngum sveini. En af engu hafði hann jafnmikla skemtun sem af hermannæfingum. Til þeirra funda sótti hann öllum stundum, og þegar þar gekk á sem allramest, fylkingar riðust á, skotin skullu og högginn hlumdu, og alt var í einni bendu, þá var Karl sjálfsagður í miðri þvögunni, og þó hann fengi þá skrámur eða sár, skeytti hann alls eigi um slíkt. Einu sinni, er hann sat yfir borðum, rétti hann hundi brauðbita; rakkinn tók í móti af svo mikilli græðgi, að hann beit sveininn til blóðs. Karl brá sér ekki við það, en vafði dúki einum um höndina, og mataðist sem áður, og vissi enginn að hann var særður, fyr en menn sáu blóðrenslið. Hugur og þrek kom þannig snemma í ljós hjá Karli, en hinu brá einnig fyrir, er lakara var, og það var þrályndi; það var auðsèð, að torvelt mundi að telja honum hughvarf, eða fá hann frá því, sem hann eitt sinn hafði fastráðið. Einhverju sinni setti fóstura hans hann á stól og sagði honum að fara hvergi þaðan fyrir en hún kæmi aptur. Litlu síðar kom móðir hans inn þángað sem hann sat, og sagði honum að koma með sér og hlýða prédikun. Það vildi hann eigi. Hún spurði hvað til bæri. Hann kvaðst hafa losað, að sitja þar kyr þángað til fóstura sín kæmi. Öðru sinni sagði hann, að blái liturinn væri svartur, og, að maður einn, er þar var við hirðina,

væri líkur apa; og enginn vegur var til, að hann vildi breyta því, sem hann hafði sagt, eða taka þessi orð sín aptur.

Karl var 15 vetra þá er faðir hans deyði; var honum nú gefið konungsnafn og nefndur *Karl tólfsti*. En faðir hans hafði mælt svo fyrir, að, þángað til sonur sinn næði lögaldri, skyldi drotningin Hedevig Eleónóra (ekkjja Karls tíunda en amma Karls tólfta) og 5 ráðherrar með henni stýra ríkinu. Sú ríkisstjórn stóð þó mjög stutta stund, því að allur þorri landsmanna var ráðherrum þessum mótfallinn, en vænti sér góðs af hinum unga konungi; enda lét hann á sér skilja, að hann vildi sem fyrst setjast sjálfur að stjórn. Sá maður, sem mest og best studdi konung í þessu efni, hét *Karl Píper*; hann var vitur maður og vel dugandi, og varð síðan ætíð ráðgjafi Karls og fylgði honum meðan hann gat. Þegar Karl var settur að stjórn, gaf hann sig stundum af miklum áhuga við stjórnarstörfum og lofuðu þá allir hans starfsemi, greind og réttlæti, en stundum lét hann ráðgjafana annast slíka hluti, en hugði þá eingöngu á skemtanir, og þá ætíð þær, er mest reyndu á hugrekki og karlmensku og jafnvel ofdirfsku.

Nágrannakonungarnir höfðu vakandi auga á öllu því, er fram fór í Svíþjóð um þessar mundir, og þegar hér var komið þótti þeim tækifærið bjóðast til þess að jafna hlut sinn á Svíum. Maður hét *Patkull*; hann var borinn og barnfæddur á Líslandi, af góðum ættum og vel að sér um marga hluti, herðimaður mikill. Þá er Karl ellefti tók jarðir af mönnum á Líslandi, eins og annarstaðar, og lagði undir krúnuna, hafði Patkull helzt þor til að tala máli landa sinna gegn þeim aðförum. En er það tjáði elgi, gjörðist hann fullkominn óvinur konungs og þar kom, að hann var dreginn fyrir lög og dóm, og er hann sá sitt óvænna flýði hann af landi burt, og var ýmist við hirð Ágúst annars eða Péturs Czars, og eggjaði þá á allar lundir til ófriðar móti Svíum. Hann átti því mikinn þátt í, að Rússar, Pólverjar og Danir bundust í félag (1699), og sömdu þannig með sér: að Rússar skyldu taka Ingermanland og Narva, Kexholmslèn og svo mikið af Finnlandi sem auðið yrði; Ágúst annar Lísland og Estland, og Danir kúga hertogann af Holtsetalandi og vinna aptur þau lönd, er þeir höfðu látið fyrir Svíum.

Hertogarnir af Holtsetalandi og Danakonungar höfðu löngum

eldað grátt silfur, en Svíar veitt hertogunum að málum, til þess að eiga þaðan liðs von móti Dönun, hve nær sem á þurfti að halda. Nú voru nýorðin hertogaskipti á Holtsetalandi, og kominn þar til valda hertogi sá, er Friðrik hét, frændi Karls tólfta og mágur hans. Hertoginn lét gjöra kastala á landamærum sínum og flytja setulið þangað. Danir komu og brutu kastalana, en hertoginn lét jafnharðan bæta þá aptur. Þetta var eitt með öðru, er flýtti fyrir því, að Danir gengu í sambandið með Rússum og Pólverjum, eins og áður var sagt, og höfðu liðsafnað. Hertoginn sá, að hér var við ofurefli að etja, og leitaði liðs hjá mági sínum í Svíþjóð, en Karl hét honum liðveizlu sinni. Englendíngar og Hollendíngar vildu koma sættum á, en Friðrik Danakonúngur, hinn fjórði, er þá kom til ríkis, vildi engum sættum taka, og er hann frétti að Ágúst Pólverjakonúngur hefði ráðið á Lífland, hélt hann liði sínu til Holtsetalands.

Það er sagt, að Karl tólfti væri á bjarndýraveiðum, er honum kom hersagan af Líflandi; brá hann sér eigi við þau tíðindi, en sagði svo: «Ágúst skal bráðum fara sama veginn heim aptur, sem hann kom». Frá þeirri stundu varð Karl tólfti sem annar maður; allur únglíngsbragur hvarf af honum; skemtarnir, gleðileikar, dýraveiðar og alt þess konar hætti með öllu; það var eins og hann fyndi á sér, að nú væri stundin komin, sagan biði eptir sér, hann yrði nú að taka til starfa. Frá þeirri stundu varð hann fyrirmynd þjóðar sinnar að hugrekki, starfsemi og dugnaði, alveg á sama hátt sem faðir hans hafði verið árið 1675. Sumir af ráðgjöfum Karls tólfta vildu til lengstra laga komast hjá ófriði, og ræðu konúngi, að sættast við Dani og bandamenn þeirra, en það vildi hann með engu móti. «Eg hef ráðið það af», sagði hann, «að byrja aldrei ránlegga ófrið, en einnig hitt, að hætta eigi við réttlegan, fyr en eg hef sigrazt á fjandmönnum mínum». Öðru sinni sagði hann: «Það er merkilegt, að báðir þessir frændur mínir vilja ófrið fyrir hvern mun. Það verður svo að vera. En Ágúst hefir rofið orð og eiða. Mitt mál er þess vegna réttvíst, og guð mun hjálpa oss. Eg ætla fyrst að jafna ágreinínginn við annan þeirra; síðan verður alt af tóm til að tala við hina».

Flestar þjóðir Norðurálfunnar bjuggust um þessar mundir við, að hið mikla spánska erfðastríð mundi byrja þá er minst

varði, og vildu því, að friður gæti haldizt norður í álfunni. Hvorirtveggja málsaðila þar syðra vildu fá Svía eða Dani í lið með sér. Einkum gjörðu Englar og Hollendingar sér mikið far um að koma sættum á milli Dana og hertogans; enda höfðu þjóðir þessar að nokkru leyti tekið að sér ábyrgð á því, að þar skyldi friður haldast. En sem það var bert, að Dönum var full alvara að ráða á hertogann, og öll friðarvon var þannig úti, þá sendu bæði Englar og Hollendingar herskip inn í Eyrarsund móti Dönum. Í annan stað hafði Karl tólfli liðsafnað mikinn um ríki sitt, og sendi nokkuð af því liði til Estlands og Liflands móti Ágúst konungi, sumt sendi hann suður á Pommern, sumt vestur á landamæri Norvegs og Svíþjóðar, en meginherinn hélt suður á Skán. Sjálfur lagði konungur af stað frá Stokkhólmi (13. apr. 1700) suður í land, og sá þá borg aldrei síðan. En er hann kom til Karlskrónu, var floti hans þar fyrir og búinn til brottsiglingar, og hélt hann honum því næst til Eyrarsunds, og hafði 40 herskipa. Danir höfðu lagt flota sínum við Helsíngjaeyri og höfðu 54 skip. En nú kom enski og hollenzki flotinn að norðan um þessar mundir; létu þá Danir undan síga inn til Kaupmannahafnar. Hinir veittu þeim eptirför, en Englendingar og Hollendingar vildu eigi skjóta á herskip Dana nè á borgina, heldur að eins halda Dönum þar í herkvíum, sem þeir voru komnir. Sá Karl þá að hann með sínum mönnum gat þar ekki á unnið, og fyrir því tók hann það ráðs, að leggja skipum sínum frá, og ganga þar á land sem líklegast þótti milli Kaupmannahafnar og Helsíngjaeyrar. Danir voru þar fyrir, er Svíar komu að landi, höfðu hlaðið skotgarða og bjuggust til varna. Útgrynni var þar nokkurt, og flutu bátarnir eigi alla leið, en Svíar hlupu þegar fyrir borð, er bátar þeirra kendu grunns. Var Karl konungur þar einna fremstur sinna manna, og óð sjóinn undir hendur; skothríðin var áköf, bæði utan af skipum Svía, og af landi ofan, og þutu kúlurnar um eyru manna. «Hvaða þytur er þetta í loptinu, sem eg heyri?» segir Karl. «Það er þyturinn af kúlunum», svaraði gamall maður, er þar var nærstaddur. «Það er vel þá», mælti Karl, «sá skal verða minn skemtihljómur hëðan í frá». Svo fóru þar leikar, að Danir hrukku fyrir og námu eigi staðar fyr en við Kaupmannahöfn, en Svíar komu hernum á land, hër um bil 14000 manna, og mistu

að eins nokkra menn. Því næst stefndi Karl liðinu til Kaupmannahafnar, og settist að þar á næstu grösum. Var það fyrirætlan hans, að setjast um borgina og freista hvort hún yrði eigi unnin með áhlaupi; en Englendingar og Hollendingar stóðu fast í móti þeirri ráðagerð, og fáum dögum síðar kom sú fregn, að friður væri á kominn milli Danakonungs og hertogans; varð þá Karl að hætta við svo búð, og búast til heimferðar. Meðan hann var á Sjálandi, hafði hann strángan vörð á, að menn hans gerðu þar engar óspektir, og galt hverjum ríflega sitt, er honum færðu nokkuð, hvort heldur vistir eður aðra hluti. Við því höfðu landsmenn eigi búizt; lofuðu þeir hann mjög og beiddu guð að blessa hann, og sögðu að slíks væri von af honum, því að hann væri sonur Úlriku, hinnar góðu drottningar.

En það er frá viðskiptum manna suður á Holtsetalandi að segja, að Friðrik Danakonungur settist um Tönníngen; sá staður var bezt víggirtur í löndum hertogans. Borgarmenn vörðust vel og höfðu foríngja þann, er *Banèr* hét, af ætt hins nafnfræga hershöfðingja, sem fyr er nefndur. En að nokkrum tíma liðnum kom þangað her manns af Svíum, Hollendingum og fleiri þjóðum, til liðs við hertogann. Sáu Danir þá sitt óvænna og höldu undan. Var því næst leitað um sættir með mönnum, og 8. ágústmán. 1700, komst friður á í *Travendal* milli Dana og Holtsetalandsmanna. Varð Danakonungur að láta við það sitja, sem hertoginn hafði gjört, og greiða honum 200,000 rd. að auki, samt lofa því, að ganga eigi í lið með óvinum Svía. Að öðru leyti kröfðust Svíar einskis og fengu eigi heldur neitt fyrir sinn kostnað.

Þannig var hinum fyrsta óvini úr götu rutt, og Danir úr sögunni að sinni. En Karl tólsti fékk hið mesta frægðarorð af hvatleik þeim og framgöngu, er hann hefði sýnt, jafnúngur maður og óreyndur. Nú víkur sögunni til Rússlands. Svíar áttu ýms lönd þar fyrir austan hafð, eins og menn vita af því, sem áður hefir verið sagt. Þeim löndum vildu Rússar ná undir sig, því að alla þá stund, sem Svíar höfðu þar yfirráð, var Rússum alveg bægt frá Eystrasalti; þeir gátu þar engin skip haft, og enga verzlun átt þann veg við Vesturlönd. Eptir að Pétur Czar kom til ríkis reyndi hann, að fá löndin keypt af Svíum; en það fékst með engu móti. Þá hugsaði hann sér að vinna þau með

vopnum, og því var það, að hann gekk í sambandið við Ágúst annan, og Friðrik fjórða, eins og fyr er ritað. Þó reyndi Pétur til lengstra laga að dylja Karl tólfta þeirrar ráðagerðar, og beitti þá allri þeirri slægð, sem honum var gefin, og öllu því undirferli og ósannsögli, sem honum var svo tamt. Til þess að draga Svía sem mest á talar, gjörði Pétur nýjan samning (8. nóv. 1699) við sendiherra þann, er Karl tólfti sendi til Moskóv og segir Pétur þar og sárt við leggur, að hann skuli halda öll sín orð og eiða við Svíakonúng, og vera vinur hans fullkominn. En einmitt þá hina sömu daga gjörði hann í laumi samband við Ágúst annan, þess efnis, að þeir skuli í sameiníngu ráða sem fyrst á fyrnefnd lönd Svíakonúngs. Jafnvel eftir að Ágúst var seztur um Ríga, og Pétur kominn með liði sínu fast að Ingermanlandi, og menn tók að gruna margt, lét Pétur sendiboða sína á Hollandi og Englandi lýsa yfir því, að sér kæmi eigi til hugar að rjúfa trygðir og frið við Svía. Hann ritaði Karli tólfta vinsamlegt bréf, og þakkaði honum gjafir þær, er Karl hafði fyrir skemstu sent honum. En um sama leyti ritar Pétur Ágústi og segir svo: «kæri bróðir og granni! treysta máttu því fyllilega, að eg mun efna það alt, sem við höfum ráðgjört með okkur. Með því nú að þrjátígi ára friður er á kominn milli mín og Tyrkja, þá ætla eg, að nokkrum dögum liðnum, að boða Svíum stríð, og halda liði mínu inn á Ingermanland». Sömu dagana sem þetta var ritað, kom sendimaður frá Pètri til Karls tólfta og hitti hann á Sjálandi og bar honum vinakveðjur og trygðamál Péturs. Í öndverðum sept.mánuði 1700 hélt Pétur Czar liði sínu til Ingermanlands og Estlands, og hafði óflýjandi her; fóru Rússar yfir landið með hinni mestu grimd, rændu öllu sem þeir náðu, og brendu bygðina, eins og þeirra var siður til, en landsfólkið, sem eftir lifði, hrökk undan víðs vegar, eða gekk á vald Rússa. Fyrstu daga októb.mán. settust Rússar um *Narva*. Svíar höfðu setulið í borginni hér um bil 1000 manna, og höfðingja yfir því þann er Horn hét. Pétur var sjálfur með hernum, og þóttist hafa sigurinn í hendi sér. Þar hagar svo til, að úr Peipusvatni rennur fljót eitt norður í Finnlandsflóa, er *Naróva* heitir. Vestanvert við fljótið stendur *Narva* framantil á nesi því, er þar gengur út í fljótið. Rússar höfðu farið yfir fljótið á einhverjum stað, og komu vestan að borginni, hlóðu skotgarða yfir um

nesið þvert, og skutu þaðan á borgina, en annan skotgarð og varnarvirki hlóðu þeir fyrir vestan sig, til varnar móti þeim, er koma kynnu til liðs við borgarmenn; sátu Rússar þannig milli garðanna og sóttu borgina af miklum ákafa; en hinir vörðust drengilega og gekk svo viku eptir viku.

Nú er að segja frá Karli tólfta, að hann fer af Sjálandi yfir á Skán og austur til Karlskrónu, fær þar sannar sögur af aðförum Péturs Czars, og býst sem skjótast til liðs við menn sína og eignir þar austur. Vetur fór í hönd, og allra veðra von, margir töldu konúng af förinni á þeim árstíma, og kváðu betra, að hann sjálfur biði næstu vordaga, þó liðið legði af stað að haustinu. En það tjáði eigi. «Í guðs nafni fer eg af stað, sagði Karl, hann mun verja mitt réttvísa málefni». Fyrstu dagana í októbermánuði, er konúngur var búinn og byr gaf, sigldi hann út á haf öllum flotanum; hann hafði tvö hundruð skipa og 8 þúsundir manna; ferðin gekk slysalítið, og var lagt að landi við Pernau-borg; hún er á Líflandi norðarlega. Er langur vegur þaðan austur að Narva, eða suður að Ríga. Karl ætlaði sér í fyrstu til Ríga og reka Ágúst konúng þaðan, en frétti nú, að Ágúst var allur á burt, og þá einsetti Karl sér, að halda sem fyrst til Narva og hjálpa mönnum sínum þeim er þar vörðust gegn ofurefli Péturs Czars. Þegar Svíar voru komnir á land, héldu skipin aptur til Svíþjóðar og sóttu þángað meira lið, og fyrst þegar það var komið, lagði Karl af stað frá Líflandi með 8 þúsundir manna, en lét 5 þúsundir vera þar eptir til landvarnar. Það var 13. dag nóvembermán. er Karl fór af stað og stefndi til Narva; urðu Rússar brátt á leið hans, en Svíar gengu djarflega að, og brukku hinir þá undan. Veður gjörðist nú kalt og vegir hinir vestu, hvergi fékst hæli eður matbjörg, hvorki fyrir menn né skepnur, því að Rússar höfðu lagt allt í auðn. Níttjándi dag nóv. voru Svíar komnir svo í nánd við Narva, að eigi var lengra eptir en frek míla vegar; herinn var mjög dasaður eptir ferðina, og vildu flestir nema þar staðar um stundarsakir og hvílast, áður en til orustu væri lagt. Konúngur vildi það eigi, og sagði að hér væri alt undir því komið, að grípa færið meðan það gæfist: Rússum hefði orðið mjög bilt við komu þeirra Svíanna og væri skelkaðir og hvergi nærri viðbúnir að berjast nú þegar, en, ef frestað væri að ráða á þá, mundu Rússar jafna

sig, draga meira lið að sér og komast að því, hve fámennir Svíar væru; hér yrði og á það að líta, að Svíar hefði eigi vistir nema til fárra daga; annað væri því eigi fyrir hendi, en orusta nú þegar eða húngurdaði. Það var því af ráðið að berjast næsta dag. Konúngur lét halda guðspjónustu um allan herinn, því næst reið hann um fylkingar og talaði fyrir liðinu; menn sáu að foringinn var öruggur og biðu ókvíðnir næsta dags. *Rehnskjöld* hét einn af fyrirliðum Svía, vitur maður og vanur orustum; hann hafði barizt með Karli ellefta í orustunum við Halmstad, Lund og Landskrónu, og eptir það með Vilhjálmi af Óraníu í Niðurlöndum. Konúngur fal *Rehnskjöld* á hendur, að skipa fyrir um það, hvernig atlögunni að Rússum skyldi til haga. Um morguninn eptir (20. nóvember) var Karl konúngur snemma á fótum og reið svo langt fram að skotgörðum Rússa sem fært var, til að skygnast þar um hvað eina. Um dagmála leytið gengu Svíar fylktu liði fram í nesið og stefndu á skotgarðana miðja; lét konúngur skjóta nokkur skot, bæði til þess, að láta menn sína í Narva vita, að Svíar væru þar komnir, og líka til þess, að bjóða Rússum til orustu, en Rússar voru kyrrir fyrir innan girðingarnar, því að, þó þeir hefðu um 70 þúsundir manna, þorðu þeir eigi að ráða á Svía. Bæði liðsmönnum Rússa og foringjum þeirra stóð hinn mesti geigur af Svíum. Þetta vissi Pétur Czar, og þess vegna treysti hann hershöfðingjum sínum miðlúngi vel, og fékk frakkneskan mann, er þar var þá staddur hjá honum, *De Croi* að nafni, til þess að takast á hendur yfirstjórn hersins; var hinum frakkneska manni það þvernauðugt, en svo varð þó að vera sem Czarinn vildi. Að því búnu lét Pétur sððla hest sinn og reið af stað austur í land um nóttina áður orustan varð. Girðingar Rússa, hinar ytri eða vestari, gengu, eins og fyr er sagt, þvert yfir nesið, og Rússar stóðu fyrir innan þær; hinn nyrðri fylkingararmur þeirra náði þar að fljótinu sem *Vepsekyle* heitir, hinn syðri þar að fljótinu sem *Jóala* heitir; *Dolgorúky* hét sá, er stýrði hinum nyrðra fylkingararmi, en *Veide* sá er stýrði hinum syðra. Svíar voru svo fámennir, að þeir gátu eigi ráðið nema á einn lítinn hluta girðinganna í einu, en skipuðu þannig til atlögunnar, að í syðra fylkingararm gengu þeir *Otto Vellingk* og *Knútur Posse* með sínar sveitir, en fyrir nyrðra fylkingararminum var *Rehnskjöld* og *Maidel*, voru *Vermlending-*

ar og Dalakarlar þar í broddi fylkingar; nyrðst, og laust við meginherinn, var Magnús Stenbökk með Finna og Dalakarla. Þar í nánd var Kárl konungur og kappar hans (*«Karl den tolfte Drabanter»*); þeir voru 150 að tölu, og eigi aðrir valdir í þann flokk en afreksmenn að afli og hreysti og alls konar atgervi, líkast því sem átt hafði sér stað hjá Hrólfi kraka, Haraldi hárfagra og fleiri fornkonungum.

Tveim stundum eptir hádegi lét Karl konungur blása til atlögu. Veður hafði verið bjart framan af degi, en í því er herinn gekk fram móti girðingum Rússa laust á ðli svo myrku, að varla sást handa skil; vildu þá sumir af höfðingjum Svía bíða af sér ðlið, en konungur kvað nei við, og mælti: «Þlið gjörir oss engan skaða, en Rússar hafa það í fangið og geta því eigi sæð, hvað oss líður, eður hve fámennir vör erum. Látum oss halda áfram og neyta færisins!» Svo var gjört. Rússar urðu einskis varir fyr en Svíar stóðu við girðingar þeirra; létti þá ðlinu og gjörði bjartviðri sem áður. Hlupu Svíar þá á girðingarnar og inn yfir þær í einni svipan, en fallbyssulið þeirra og riddarar þegar á hæla þeim. Við þessu áhlaupi máttu Rússar eigi, og rofnuðu fylkingar þeirra fyrir og brukku undan til beggja handa. De Croi og aðrir fyrirliðar Rússa gjörðu hvað þeir kunnu til þess að eggja þá til framgöngu, en það kom fyrir ekki. Sumir hlupu á girðingarnar beggja megin Svía, og vildu þannig leita sér lífs til skógar, en konungur var þar jafnan fyrir, sem þeir komu að, og keyrði þá aptur inn fyrir garðana. Nú leitaði hinn nyrðri fylkingaramur Rússa undan til brúarinnar hjá Vopsekyle, og vildi komast þar yfir; varð þar svo mikil þröng á brúnni, að hún brotnaði, og er svo sagt, að þar hafi druknað þrjár þúsundir manna í fljótinu. Mestur hluti þess liðs, er þángað hörfaði, varð því að nema þar staðar, milli fljótsins annars vegar og Svía hins vegar; urðu viðskipti þar hin hörðustu, og þá bar það til, að einhverjir sögðu í liði Rússa, að óhamíngja þessi væri öll komin yfir þá af völdum útlendinga þeirra, er í hernum væru. Við þetta urðu Rússar óðir, og drápu hvern útlending, sem þeir gátu augum á komið, hvort heldur yfirmann eður undirgefinn. Sjálfur yfirforinginn, De Croi, og nokkrir útlendir hershöfðingjar sáu eigi annað ráð vænna, til þess að umflýja bráðan bana, en að leita á náðir Svía. Komu þeir þar að, er

fyrir var Magnús Stenbökk, og gáfust honum á vald. En það er að segja frá Karli konungi, að hann heyrir skothríð ákafa norður við fljótið hjá Vepsekyle. Ríður hann þangað sem hvatlegast; þar urðu mannabúkar margir fyrir honum á einum stað; ríður konungur úr vegi fyrir þeim, en fer hart og gáir þess eigi, að þar eru fen og pyttir á leiðinni; veit hann eigi fyr, en hann fer þar ofan í og sökku með hestinum svo djúpt, að eigi stóð upp úr nema höfuðið; mátti hann þaðan hvergi hrærast, en menn hans bar þar brátt að, og drógu þeir konunginn upp, en hestinn misti hann og sverð sitt og stígvél af öðrum fæti. Konungur lét eigi slíkt á sér festa, en hleypur á bak öðrum hesti, og holdvotur sem hann var, og ríður alt hvað af tekur; en litlu síðar var sá hestur skotinn undir honum; fékk konungur þá enn að nýju reiðskjóta, og mælti: «eg sé að fjandmenn vorir vilja kenna mér að ríða». Við Vepsekyle börðust menn fram í myrkur. Svía tók að þrjóta púður og kúlur, því að hver maður hafði að eins hjá sér 40 skot, en sumir þeirra fundu hvorttveggja, bæði púður og kúlur, í töskum Rússa, er fallnir voru og lágu þar víðs vegar um völlum; sumir gengu í höggorustu við Rússa og hjuggu þá niður sem hráviði. Þar féll fjöldi manna, en hinir, sem uppi stóðu, vildu þó eigi beiðast griða. Konungur hugði, að þeim mundi koma styrkur nokkur frá hinum syðra fylkingararmi við Jóala, og fyrir því skipar hann Magnúsi Stenbökk, að taka fallbyssur nokkrar, er Rússar höfðu á hólum einum miðja vega milli fylkingararmanna. Magnús gjörði svo sem fyrir hann var lagt; setti konungur sveit manna á hólinn, og vann þá tvent í einu, bæði það, að hafa samgöngu við menn sína í Narva, og líka hitt, að varna fylkingarörmum Rússa, suður og norður við fljótið, að ná saman, svo að hvorigur gat öðrum lið veitt þó vildi. En sem það lið Rússa, er stóð í kvínni við Vepsekyle, sá, að engrar hjálpar var að vænta, misti það huginn og sendi tvo menn til að beiðast griða, en annar þeirra var skotinn, og hinn komst eigi alla leið sökum myrkurs.

Skömmu síðar varð myrkrið svo svart, að Karl lét hætta orustunni. Gjörðu Svíar þá varðelda hér og hvar, en stóðu þó allir undir vopnum. Konungur tók sér hvíld við einn af varðeldunum; breiddu menn kápu á jörðina undir hann, og lagðist hann þar niður, en eigi fór hann af fötum, þó vot væru. Svíar

höfðu að vísu borið hærri blut í viðskiptum þessum, en þó var eigi enn fullsæð, hvernig fara mundi. Sá hluti Rússa, sem stóð við Vepsekyle, var að sönnu kominn í bendu eina, og margt þar í hinni mestu óreiðu, en mannfjöldinn var svo mikill, að langt var umfram allan Svíaher, og gátu þeir því orðið mjög skeinu-
hættir Svíum, ef aptur kæmi til orustu; hinn syðri fylkingar-
armur þeirra við Jóala var mannmargur, og þar hafði orustan verið vægari og mannfallið minna. Sjálfir voru Svíar eigi sem bezt til reika. Um daginn, meðan orustan stóð, höfðu þeir gengið fram hjá tjöldum Rússa, og eigi tekið hendi til matar eða drykkjar, þó þeir vissu, að nóg var af hvorutveggja þar inni fyrir, — fanst útlendum mönnum, er þar voru viðstaddir, mikið um þann aga, er konungur hafði á sínum mönnum — en er bardaganum var lokið og komið myrkur, þá gengu Svíar hóp-
um saman í tjöldin og gjörðu sér óspart til góða, enda var þar gott til vista og nægð brennivíns. Drukku margir þá ómælt, og urðu svo út úr, að ófærir voru með öllu, og gátu eigi svo mikið sem gætt þeirra manna, er herteknir voru. Ef Rússar hefðu þá ráðið á Svía, er ósagt hver orðin mundu leikslök. En þeir vissu eigi hvernig á stóð. Þeir hugðu þvert á móti, að Svíar mundu ráða á sig að nýju þegar er vígljóst yrði, og vega hvern um annan þveran. Seint um kveldið sendi Dolgorúky menn til konungs þess erindis, að semja um vopnablö. Menn urðu elgi ásáttir, og fóru Rússar við svo búid; en að vörmu spori kom Dolgorúky sjálfur. Var Karli sagt, að hershöfðingi Rússa væri þar kominn og beiddist viðtals. «Leiðið fram best minn», mælti konungur, «að eg megi taka svo ríkmannlega móti honum, sem nú eru föng til». Að lítilli stundu liðinni sat konungur á hesti, og hershöfðingjar hans stóðu honum til beggja handa. Rússar gengu fyrir hann berhöfðaðir, lögðu sverðin fyrir fætur honum og beiddast griða. Konungur var greiður í svörum og gjörði skjótan úrskurð þeirra mála. Rússar vissu eigi hvernig á stóð, og þóttust eigi komast svo skjótt á burt frá Svíum sem þeir vildu. Svíar vissu hvernig á stóð, og þóttust eigi svo skjótt, sem þeir vildu, geta komið Rússum á burt. En engi maður sá á konungi, hvað honum bjó í brjósti. Hann setti Rússum þá kosti, að liðsmenn allir mættu fara í friði og hafa vopn sín með sér, en hershöfðingjar þeirra og yfirmenn allir skyldu

eptir verða á sínu valdi, fallbyssur allar og merki og fánar. Því næst bættu Svíar brúna á fljótinu, en Rússar bjuggust til ferðar og höldu norður yfir brúna áður en lýsti af degi.

Nú hefir um hrið verið sagt frá því, sem gjörðist í hinn nyrðra fylkingararm við Vepsekyle. Í hinn syðra fylkingararm, við Jóala, áttust þeir við af Svía hálfu Vellingh og Posse, og af Rússa hálfu Veide og Scheremetiev; hinn síðast nefndi var næstur fljótinu og fyrir riddaraliði Rússa. Þegar í öndverðri orustu flýðu riddarar þessir, og hleypu út á fljótið sem mest máttu þeir, og létu synda yfir, en fótgöngulið Rússa veitti viðnám og barðist fræknlega; stóð orustan þar alt til kvölds og unnu hvorugir á öðrum. Veide hershöfðingi varð mjög sár, og margir aðrir af foringjum Rússa, en sumir féllu. Þegar kvöld var komið, áttu foringjar Rússa ráðstefnu með sér, hvern viðbúning hafa skyldi til næsta dags, því að eigi vissu þeir, hvað gjörzt hafði við Vepsekyle. En um nóttina kom maður frá Dolgorúky og sú orðsending, að Veide skyldi gefa upp vörnina og ná sömu friðarkostum fyrir sína menn, sem þeir Dolgorúky þegar höfðu fengið. Veide bar mál þetta undir sína menn; vildu þá allir hinir útlendu höfðingjar í liðinu berjast, og alls eigi gefast upp að svo stöddu, þar sem þeir væru miklu liðfleiri en Svíar. En Veide og hinir Rússnesku hershöfðingjar vildu eigi þeim ráðum fylgja. Var því næst talað um friðarkosti. Karl konungur var nú laus orðinn við Dolgorúky og alt hans lið, þóttist því öruggari en áður, og setti því þessum mönnum harðari kosti en hinum. Nokkrir gáfu það ráð, að taka allan þenna her höndum. En konungur mælti: »látum hrotta þessa hlaupa»¹⁾ Þeim var því leyft að fara, en vopn sín öll urðu þeir að leggja af hendi. Lið þetta var að tölum um 12 þúsundir manna. Svíar voru tæpar 6 þúsundir, og margir þeirra ýmsra orsaka vegna naumast vopnfærir; suma vantaði kúlur og púður. Svo sagði Magnús Stenbökk, að af þeim 600 Dalakarla, er hann ræð fyrir, hefði enginn haft skot eptir í byssu sína; það hann þá vera sem vígmannlegasta og láta engan bilbug á sér sjá, meðan Rússar gengi fram hjá; og það gjörðu þeir, sem þeir best kunnu. Foringjar allir voru höndum teknir, en hitt liðið gekk leiðar sinnar berhöfðað og niðurlútt fram hjá fylkingum Svía, er stóðu

1) »Låt de bondlurkarna löpa!»

undir vopnum meðan þetta gjörðist. En svo voru Rússar skelkadir, að þegar þeir komu að fljótsbrúnni við Vepsekyle, þá ruddist hver sem búinn var út á brúna, svo að fjöldi manna hrökk í vatnið og druknaði. Rússar mistu í orustunni við Narva 12 þúsundir manna, sumir segja yfir 20 þúsundir. Svíar tóku höndum 9 „Generala“, 11 „ofursta“ og marga fleiri foringja æðri stéttar og lægri, og það ógrynna af vopnum (þar á meðal 180 fallbyssur) og vistum og ýmsum aurum, að varla varð tölu á komið; hesta fengu Svíar þar svo marga, að þeir seldu hvern þeirra sín í milli fyrir einn dal silfurs.

Rússar þeir, er af komust, fóru það sem fætur toguðu austur í land og hittu þar Pétur Czar og sögðu honum sínar ófarir. Honum þóttu það þung tíðindi, en barst þó vel af og sagði: „eg veit að Svíar munu enn sigrast á oss mörgum sinnum; en koma mun þar, að vér munum læra að sigrast á þeim“. Af Svíum féllu í orusta þessari hálft sjöunda hundrað manns, en rúm 12 hundruð urðu sárir.

Karl tólfsti fékk þannig við Narva einn hinn frægasta sigur, sem unninn hefur verið á Norðurlöndum, og orðstír hans og Svía flaug land af landi. Það var nýtt og óheyrt í sögunni, að 18 vetra unglingur — eins og Karl var þá — ynni þvllík afreksverk, sem hann hafði nú unnið á einu missiri: þröngvað Dönum til friðar í Travendal, og unnið Rússa við Narva, og átt þó við ofurefli að etja. Þar til kom og, að hann hafði eigi upp-tökin að ófriðnum, heldur þeir, svo að hann átti hendur sínar að verja; og svo vissu allir, að hann var trúnaður mikill og siðavandur, en þeir mótstöðumenn hans óhlutvandar í mörgu. Frá dögum Karls Gústafs lá það orð alment á Svíum, að þeir væru ójafnaðarmenn, sem vildu brjóta undir sig aðrar þjóðir. Nú breyttist sá orðrómur til hins betra, og Svíar og konungur þeirra fengu hið bezta orð á sig, þóttu manna hraustastir og sigursælastir og þó mildir og sanngjarnir við óvini sína; flestir óskuðu þeim góðrar hamingju. Ýmsra þjóða skáld ortu lof um Karl konung; aðrir gjörðu minnispeninga með ýmsum myndum og málsgreinum. Á einum þeirra sáu menn sigurgyðjuna og þrjá menn fyrir fótum hennar, og þar yfir þessi orð: „*tandem bona causa triumphat*“ (þ. e. loksins sigrar hið góða málefni). Á öðrum peningi sást Pétur Czar, þar sem hann sat í tjaldi

sínu við eld og fallbyssur, og skaut sprengikúlum inn í Narva-borg, en yfir mynd hans stóðu þessi orð: «og Pétur sat og vermdi sér». Á hinni hlið peningsins sáuust Rússar á flóttu og Pétur þar fremstur í flokki og illa til reika, og þar yfir þessi orð: «og Pétur gekk burt og grét beisklega».

En — það þarf sterk bein til að þola góða daga. Til þessa hafði Karli konungi gengið allt að óskum; sigurinn fylgdi honum land af landi; allir dáðust að hreysti hans og maunkostum; hann vildi berjast við Narva, og lagði til orustu þvert á móti ráðum flestra hershöfðingja sinna, og vann sigur. Alt þetta kom honum á þá trú, að hamíngjan fylgdi sér, og gæti eigi brugðizt, hér væri eigi um annað að gjöra, en að fylgja því, sem andinn blési sér í brjóst; allir vegir væru sér færir. Það kom því í ljós, og því meir sem frá leið, að hann birti alla eigi um það, sem hershöfðingjar hans sögðu, eða réðu honum, en fór eingöngu eftir því, sem honum sjálfum kom til hugar; það var eins og hann væri tilflinníngarlaus fyrir öllu öðru. Ósigurinn og skaðinn gjörði Pétur Czar hygginn, og þó djarfari en áður. Sigurinn og það, sem sigrinum fylgdi, sneri hreysti Karls í ofdirfð, og þreki hans í þrályndi og einræði. Honum þótti svo lítið til Péturs og Rússa koma, að hann fyrirleit þá, og þótti eigi ómaksins vert, að skipta sér af þeim framar. Pétur gat því í næði aðhafzt það, er hann vildi, í löndum þeim, er hann hafði bugfest að ná undir sig, vestur við Eystrasalt.

Nú var sú spurníngin þessu næst, sem Svíar áttu úr að leysa, hvernig þeir best gætu neytt sigursins við Narva? Hershöfðingjar Karls voru flestir á því, að réttast væri, að taka sáttabæðum þeim, er Ágúst konungur bauð, eita síðan Rússa meðan þeir væru hræddir og áður en þeir gætu náð sér eftir flóttann, og láta svo fyrir berast vetravíllt í löndum þeirra og búa við þeirra kost, en ala á allar lundir óvild þá og kala, sem víða bryddi á í Rússlandi gegn Péttri og öllum hans nýbreytingum. Gæti þá svo farið, að þar í landi kæmist allt í upphot og ófrið, Svíum til gagns eins og fyr, meðan Demetriuss-óeirðirnar áttu sér stað, og Rússar ef til vildi flæmdir suður í land allt að Svartahafi. Þetta óttaðist Pétur Czar mest af öllu, og það því fremur, sem Karl tólfði var í fyrstunni eigi fjarlægur slíkum tillögum. En er til kom, gjörði hann það þó eigi, bæði fyrir þá sök, að

honum var ákaflega gramt í geði til Ágústs annars, og líka hins vegna, sem áður var getið, að honum þóttu Rússar eigi þess verðir, að veita þeim eptirför; hann þóttist eiga alls kosti við þá, hve nær sem hann vildi, og réð það því af, að dveljast um hríð á Líslandi, láta þar eptir nokkrar þúsundir manna til landvarnar, en halda síðan, þá er voraði, meginhernum móti Ágústi konungi og greiða honum makleg málagjöld fyrir svik hans og ójöfnuð allan. Ágúst hafði fengið konungdóm á Pólverjalandi, eins og fyr er sagt, og lagði alt kapp á, að ná undir sig Líslandi. Patkúll var í öllum ráðum með honum, og hafði sína erindreka um allar jarðir. Allra bragða var leitað til að hleypa Lísflendingum upp til ófriðar gegn yfirráðum Svíakonungs, og láta þá segja honum upp trygð og hollustu. Aðalsmenn voru ótryggir og tilleiðanlegir, en almúginn tregari. Ríga var helzt borg og auðigust þar í landi. Svíar höfðu ágætan höfuðsmann í Ríga, Eirík Dahlberg, sem fyr er nefndur. Nú var hann kominn yfir sjötugt, en ungur í skapi, árvakur og starfsamur eins og í fyrri daga. Hann fékk nokkurn pata af, að Ágúst og Pétur Czar mundu hafa hug á Líslandi og búa yfir svikum, og hafði því vakandi auga á öllu, því að auðvitað var, að vildu þeir ná Líslandi, þá mundi Ríga eigi verða eptir skilin.

Pólverjar vildu eigi þá þegar veita Ágústi konungi lið til þess að vinna Lísland, en eigi mæltu þeir á móti því, að hann legði landið undir sig með saxnesku liði. Konungi þótti það að vísu miður, en lét þó eigi letjast fyrir þá sök, og sendi saxneskar hersveitir austur á Kúrland, er viðbúnar skyldu vera, og í nánd við Lísland, til að ráða á það, hve nær sem færi gæfist. Meðan hann hafði þetta fyrir stafni, sendi hann menn til Svíþjóðar, og lét telja Karli tólfta trú um mesta bróðerni og óbrigðult vinfengi af sinni hendi. Sama veturinn (í desemberm. 1699) hafði Ágúst fastráðið að taka Ríga. en er þar að kom, varð hann að gefa það frá sér, því að hann varð þess þá vísari, að Eiríkur Dahlberg hafði látið víggirða borgina sem bezt. Nú hugsaði Patkúll annað ráð til þess að vinna borgina, og skyldi það gjört í febrúar-mánuði 1700. Svo stóð á, að Carlóviz, sendiboði Ágústs í Moskow hjá Péttri Czar, brá sér vestur á Saxland þenna vetur og lagði leið sína um Ríga. Hann kvaðst bráðum koma aptur, fara sama veg austur, og bæð Dahlberg leyfis að mega aka vögn-

um þeim gegnum borgina, er hann hefði meðferðis, og flytti ýmsan varning á. Þegar komið var fram í miðjan febrúar, voru ísalög mikil og allar ár hældu. Nú kom farángur sendiherrans, en eigi á vögnum, heldur á stórum sleðum; á þeim lágu vopnaðir menn eins og á komst, og breiddur hálmur yfir, og gengið svo frá öllu, að eigi sást það, er undir var á sleðunum. Lítið eitt þar á eftir komu 80 menn með vopnum, og læddust svo, að eigi sást fyr en þeir kæmu fast að borgarhliðinu; þar á eftir annar meiri herflokkur, og allra aptast fylgdi herinn allur. Á þenna hátt ætlaði Ágúst að taka borgina í eina svipan og fyrirhafnarlíuð. En það var eigi svo hægt, sem þeir hugðu, að leika á Dahlberg. Hann grunaði margt, og hafði skipað menn fyrir utan borgina, einkum fyrir vestan hana, þeim megin sem veit að Kúrlandi. Nú komu sleðarnir, miklir og margir; varðmenn höfðu hendur á þeim og fundu skjótt, að þar voru vopnaðir menn geymdir undir hálminum, tóku þá höndum og færðu Dahlberg þá. Þess urðu menn og skjótt vísari, að meira lið var í nánd. Lét Dahlberg þá liðsmenn sína vopnast og hafa alt á reiðum höndum, er Saxar kæmi. Þess var heldur eigi langt að bíða; en er Saxar sáu, að þeir Dahlberg voru við öllu búnir, treystust þeir eigi að leggja til atlögu, og sneru frá að sinni. Skömmu síðar áttu þeir fund með sér Ágúst konungur og Pétur Czar. Pétur eggjaði hann á allar lundir, að halda fram ófriðnum og vinna Lífland, en Ágúst var deigur; hét Pétur honum að styrkja hann til þess, bæði með því, að láta hann fá 20 þúsundir liðsmanna og 2 millíónir ríkisdala, því að Pétur var alt um að gjöra, að fá Karli nóg að starfa vestur í löndum Ágústs, til þess hann sjálfur gæti í friði og næði búizt um sem hann vildi þar eystra og heima hjá sér. Slíkri liðveizlu gat Ágúst eigi neitað, hafði viðbúning mikinn, og bjó lið sitt sem hann bezt kunni. En þó að þeir Ágúst og Pétur þættust miklir vinir, þá var vináttan eigi tryggari þeirra í millum en svo, að hvor um sig bauð Karli í kyrpey að sættast við hann heilum sáttum. En' við slíka menn vildi Karl ekkert eiga nema vopnaviðskipti; safnaði hann nú liði og hélt til Ríga. Sú borg er við Dúna-fljót, á nyrðri bakkanum, hér um bil 2 mílur þaðan, sem það rennur í sjóinn. Fljótið er bæði djúpt og breitt. Fyrir sunnan það hafði Ágúst konungur lið sitt, upp og niður með fljótinu, 10,000 Saxa og 19,000 Rússa.

Sjálfur gat konungur eigi fylgt liðinu, því að hann hafði þá handleggsbrotnað fyrir skemstu, en sá hét Steinau, er yfirstjórn hersins var á hendur falin. Dahlberg hafði búizt við, að Karl konungur mundi ætla sér yfir fljótið hjá Ríga, og hafði því safnað þangað öllum þeim bátum, er hann gat fengið, og látið gjöra margar nýjar ferjur. Voru sumar þeirra svo stórar, að flytja mátti á þeim fallbyssur og hesta, og á þeim ferjum framanverðum voru hlemmar stórir, er upp skyldi reisa til hlífðar móti skotum, en hleypa síðan niður, er að landi kæmi, svo hægra veltti að afferma. Snemma morguns 9. júlí (1701) var byrjað að flytja liðið suður yfir fljótið. Veður var gott og hægur vindur af norðri. Í einni svipan var fljótið þakið bátum, en á fremstu bátunum var votur hálmur og annað eldsneyti og kveikt í; lagði þá reyk mikinn suður á fljótið undan bátunum, svo að Saxar og Rússar sáu ógjörla hvað Svíar höfðust að. En er Svíar komu að syðri bakkanum, létu fjandmenn þeirra skotin skella. Hlupu Svíar á land, og tókst þar þegar hin harðasta orusta. „Nú er hingað komið, drengir mínir“ mælti Karl, er hann hljóp á land, „og lengra munum vér komast með guðs hjálpa“. Þegar í öndverðri orustu flýðu Rússar, en Saxar börðust enn nokkra stund og gjörðu harða hrið, þó kom þar, að þeir brukku fyrir og lögðu á flóttu; fengu Svíar þar ágætan sigur, feldu marga menn og tóku marga höndum, en flóttann gátu þeir eigi rekið sem þeir vildu, því að þá skorti riddaralið. Eptir þenna sigur lagði Karl undir sig alt Kúrland. Þar ræð fyrir um þessar mundir hertogi einn, og hafði landið að lēni frá Pólverjakonungi, en sjálfur barðist hertoginn móti Karli í orustunni við Dúna-fljót.

Þegar nú þess er gætt: að Karl tólfsti fór 25. júlí 1700 yfir Eyrarsund og leiddi á skömmum tíma til lykta ófriðinn við Dani; að hann fór í október-mánuði sama ár yfir Eystrasalt og vann Rússa við Narva 20. nóvember næst á eptir; og, að hann fór 9. júlí 1701 yfir Dúna og vann sigur bæði á Söxum og Rússum — þá má með sannri segja, að fá munu dæmi finnast til þess í sögunni, að nokkur hershöfðingi hafi unnið meiri afreksverk á einu ári en þessi, sem hér eru talin, eða, að nokkur sigurvegari hafi á jafnstuttum tíma fengið á sig meira frægðarorð en Karl tólfsti fékk eptir allar þessar aðfarir.

Þegar hér er komið verður breyting á sögu Karls tólfta.

Hingað til átti hann ríki sitt að verja fyrir árásum ágjarnra nágranna, og hafði sigrazt á þeim öllum með dæmasárri breysti og hamíngju. Norðurálfan hafði því nær öll fylgt tíðindum þessum með mesta athygli, undrast afreksverk Karls og glaðzt af því, að honum tókst að gjalda óvinum sínum makleg málagjöld. Hann hafði rétt bluta sinn með heiðri og sóma. Nú gat hann fengið frið, að minsta kosti við Ágúst konúng, því að hann margbeiddi Karl griða og friðar, og bauð honum beztu kosti. En Karl tólfði vildi engum friðarkostum taka. Hann þóttist eigi geta trúað Ágústi til orðs nè eiðs, og þótti hann vera óhæfur og ómaklegur þess, að bera konúngsnafn; þess vegna einsetti Karl sér, að hætta eigi ófriðnum fyr, en hann hefði algjörlega svipt Ágúst konúngdómi á Pólverjalandi. Hvernig sem bæði ráðgjafar hans og helztu hershöfðingjar, og ýmsir þjóðkonúngar réðu honum, að sættast við Ágúst og taka þeim friðarboðum, er hann bauð, þá kom það fyrir ekki; hvað sem hver sagði sat Karl við sinn keip. Þessi þverúð hans og einræði sneri smámsaman hugum manna frá honum; þeir, sem hingað til höfðu verið honum velviljaðir, urðu honum fráhverfir upp frá þessu. Á Pólverjalandi stóð að visu svo á, að margir voru þar mótstöðumenn Ágústs konúgs, en þegar Karl fór þess á leit, að Pólverjar legðust á eitt með sér og styrktu sig til þess, að reka Ágúst þar frá ríkjum, þá þótti Pólverjum sér misboðið; þeir brugðu Karli um ósáttgirni, jafnvel um hefndarhug, og sögðu, að hann, útlendur konúngur, hefði alls enga heimild til að setja konúng þeirra frá völdum; þeir kysu helzt að Svíakonúngur lėti hér við sitja, og kváðust vilja lifa í friði og vináttu við Svía. En hér var sem endrarnær eigi hugsandi til, að aptra Karli frá því, sem hann eitt sinn hafði fastráðið og vildi hafa fram. Hann kvaðst því eigi, frekara en komið var, mundu leita aðgjörða þeirra í þessu efni, en freista sjálfur með sínum mönnum, að reka Ágúst konúng þeirra úr völdum. Á öndverðu vori 1702 hélt Karl tólfði liði sínu inn á Pólverjaland og stefndi til Warschau, höfuðborgarinnar í landinu. Bæði Rehnskjóld, Magnús Stenbökk og fleiri hershöfðingjar hans réðu honum frá þeirri för, en það varð fram að fara, sem Karl vildi, hvað sem aðrir sögðu. Á leiðinni til Warschau mætti hann lítilli mótstöðu, og alls engri þá er þangað kom. Leyfðu borgarmenn Svíum inngöngu í Warschau,

og hvorugir lögðu öðrum öfugt orð, því síður annað meira. Á torgi einu þar í borginni lét konungur, jafnskjótt sem hann sjálfur kom, herinn hlýða guðspjónustugjörð, og lásu allir Svíar bænir sínar með knéfalli, eins og þeirra síður var til. Bæjar-menn undruðust þá stjórn, er konungur hafði á mönnum sínum, og þá siðprýði, er þeir sýndu hvervetna; slíku voru Pólverjar eigi vanir af sínum mönnum, og sízt þar sem Ágúst konungur átti blut að máli. Karl hafði sama siðinn hér eins og annarstaðar, að hann hafði eigi aðsetu í sjálfri höfuðborginni (Warschau), heldur í undirborginni Praga, sem er hinum megin fljótsins (Weiksel) á eystri bakkanum; einatt reið hann út um landið í kring um borgina, fámennur mjög, og fór óvarlega, eins og hann var vanur; og þó menn vörðu hann við því, og segðu honum, að þar væru hópar manna á ferðum, sem vildu ná honum, gaf hann því engan gaum og sagði: «eg kann yður þakkir fyrir, en þó eg hafi eigi nema tíu manns með mér, þá bræðist eg eigi slíka flugumenn, enda þótt þeir væru tíu tígir manna; eg held þann vörð er dugir, því að guð er með mér». Ágúst konungur var með her sinn suður í landi, bæði Saxa og Pólverja þá er honum vildi fylgja; var það allmikið lið, hér um bil 30 þúsundir manna. En þó Pólverjar létu tilleiðast að fylgja honum, gjörðu þeir það af litlum áhuga, því að þeir trúðu Ágústi eigi vel, og þóttust vita, að hann mundi ætla Karli nokkurn hluta ríkisins, en sjálfum sér nokkurn, og koma þar síðan á einveldisstjórn. Karl var liðfærri en Ágúst, en þó leggur hann nú af stað frá Warschau og er 7. dag júlímán. kominn í nánd við bæ þann, er *Klissóv* heitir. Þar var Ágúst konungur fyrir með allan sinn her, og hafði valið sér gott vígi. Pólverjar voru sér, og Saxar sér, en fallbyssuliðið að baki þeirra; fyrir framan herinn rann lækur einn, og mýri beggja megin að honum, og mjög ilt yfir að fara. Karl vildi þegar leggja til orustu, en menn hans voru langt að komnir og þreyttir, og töldu margir hið mesta óráð að berjast samdægurs. Karl var þó eigi á því, en Piper, ráðgjafi hans, sem jafnan var með honum, kvað sér þykja bezt við eiga, að berjast eigi fyr en 9. júlí, þá væri afmælisdagur orustunnar við Dúna, það væri heilladagur, og vel til fallið að vinna annan sigur þann dag. Á þetta ráð féllst konungur. Aðfaranótt hins 9. júlí (1702) tók herinn á sig náðir, en eigi

kom Karli dúr á auga þá nótt; svo var vígahugurinn mikill. Um miðjan morgun fylkti konungur liði sínu, og var sjálfur fyrir hinum hægra fylkingararmi; þar var og Rehnskjöld og fleiri af hershöfðingjum hans, þó eigi séu hér nefndir. Fyrir vinstra fylkingararminum var Friðrik hertogi af Holtsetalandi, mágur Karls, Otto Vellingk og fl. Fyrir fylkingarbrjóstinu var Magnús Stenbökk og Knútur Posse. Karl sá þegar, að ófært mundi yfir lækinn að fara á þeim stað, sem Saxar voru hinum megin, hélt því austur með honum og fram í það bil, sem autt var á milli Pólverja og Saxa; var það hið mesta snjallræði, því að á þann hátt skildi hann þá hvora frá öðrum; hann grunaði og, að Pólverjar mundu eigi standa svo fastir fyrir, og bauð því hertoganum, að veita þeim harða aðgöngu með öllu því liði, er hann var yfir skipaður. Hertoginn gjörði svo, en þegar í hinni fyrstu atlögu var hann skotinn til bana. Svíum féllst eigi hugur fyrir það, þó þeir mistu foringja sinn, og gengu djarflega fram, og svo fór, sem Karl grunaði, að Pólverjar stóðust eigi áhlaupið og lögðu á flóttu. Nú voru Saxar einir eptir á móti Svíum, og börðust vasklega, og eggjaði Ágúst konungur sína menn á marga vegu og hafði sig mjög í hættu; stóð orustan fullar fjórar stundir, og lauk svo að Saxar flýðu, en Svíar fengu sigur og herfáng mikið. Af Söxum féllu 2000 manna, en þrjú hundruð af Svíum. Í herbúðum Saxa tóku Svíar meðal annars 500 kvenna; voru flestar þeirra látnar fara sína leið, en þær sem helztar þóttu, og af æðri stigum, voru leiddar til Karls, og mælti hann við þær á þessu leið: «eg hef hér hvorki gleðileika eða hljóðfæraslátt yður til dægrastyttingar; þér verðið því að leyfa, að eg sendi yður til Krakár og fái yður áreiðanlega fylgdarmenn þángað». Og svo var gjört.

Eptir orustuna við Klissóv flýði Ágúst suður í land, en Karl hélt til Krakár. Það er stór borg og nafnkend við Weikselfljót suður undir Karpatafjöllum; þar voru víggirðingar og setulið, en hvorigt í góðu lagi. Karl konungur og Magnús Stenbökk riðu á undan liðinu með nokkra menn, og komu fyrstir að borgarhliðum; voru þar tvennar hurðir fyrir, hin ytri af trè, hin innri af járni. Stenbökk barði að dyrum og kvað, að upp skyldi ljúka, og borgin gefast á vald Svíakonungi. Honum var svarað, að lyklar fyndust eigi. Stenbökk beiddist að fá höfuðs-

mann til viðtals, og kom hann að vörmu spori. Stenbökk sagði honum, að Svíar ættu ófrið við Ágúst einan, en alls eigi við Pólverja, hér væri því engin hættu í að leyfa Svíum inngöngu í borgina. Höfuðsmaður færðist undan. Í því bar Karl þar að, og kallar hann þegar: «opnið hliðin!» Höfuðsmaður heyrði, að þetta var annars manns málrómur, vildi forvitnast um hver sá væri, og gægðist út. En í sama vetfánga ríður svipa Karls um höfuð honum. Manninum féllust hendur, en þeir konungur og Stenbökk hrundu upp hurðum og ruddust inn með sína menn. Varðmenn gáfust þegar upp, og höfuðsmaður flýði til hallarinnar, og ætlaði að verjast þaðan, en Karl elti hann og fylgdi svo fast á eftir með sína menn, að þeir urðu allir samferða inn um hallardyrnar. Borgin komst þannig orustulaust í hendur Svíakonungi. Þessi atburður varð seinast í júlímánuði 1702.

Það yrði of langt mál, að segja frá allri viðureign þeirra Karls og Ágústs á Pólverjalandi þessi árin. Karl hélt sjaldan kyrru fyrir, hvort heldur á sumrum eða vetrum, og fór fram og aptur um landið, átti margar orustur, komst í margar mannraunir, og vann jafnan sigur. Pólverjar voru, eins og þeirra var venja, sundirþykkir sín í millum, voru stundum með Karli stundum í móti honum, töluðu margt en gjörðu fátt, og gátu aldrei orðið á eitt sáttir. Árið 1704 var eftir lánga mæðu lýst yfir því, að Ágúst hefði fyrirgjört konungdómi. Margir vildu velja Karl tólfta til konungs, en hann aftók það með öllu, og gaf Pólverjum það ráð, að gjöra eigi útlendan mann að konungi. Var þá *Stanislás Leczinský* til konungs kjörinn. Hann var pólskur maður, stórættaður, og vel að sèr um marga bluti, en lítið næði hafði hann í ríkisstjórn sinni fyrir Ágúst, og hans flokki, en hélzt þó við meðan Karl var þar í landi, og var honum bæði sverð og skjöldur. Þess skal hér getið, að einhverju sinni, meðan Karl var á ferðum sínum á Pólverjalandi, féll hestur undir honum, særðist konungur á andliti, og hinn vinstri lærleggur hans gekk í sundur. Menn hans urðu daprir við, en Karl mælti: «ekki sakar, slíkt grær skjótt». Eigi vildi hann halda kyrru fyrir að heldur, þó þetta hefði að borið, en lét bera sig á börum, til þess að hann gæti fylgt hernum; áður 5 vikur voru liðnar frá beinbrotinu, lét hann setja sig á bak; viku þar á eftir gekk hann við hækju, og þrem vikum síðar reið hann.

það, sem hesturinn gat farið. Í janúar-mánuði 1706 hélt Karl með nokkrar þúsundir manna austur yfir fljót það, er Niemen heitir (en Prússar kalla það Memel nú á dögum), og að borg þeirri, er Grodnó er nefnd. Þar var þá Ágúst fyrir og Rússar með 20 þúsundir manna; bauð Karl þeim til orustu, en þeir þorðu eigi að berjast. Borgin var ramlega víggirt og frostharkan mikil; sá Karl þegar, að hann mundi eigi fá tekið borgina, og lét herinn fyrirberast þar í nágrenninu. Ágúst vissi, að Karl mundi hafa lítið lið eftir á Póllandi — enda var það svo, að þar voru eigi nema frekar 10,000 manna og Rehnskjöld yfirforingi þeirra — vildi Ágúst eyða því liði, meðan Karl væri þar eystra, og fyrir því leynist hann með sína menn burt frá Grodnó og heldur sem hvatlegast vestur á Pólland, en gjörir *Schulenburg* orð, hershöfðingja sínum, er þá var vestur á Þýzkalandi, að halda sem fljótast hann geti með það lið, er hjá honum sè, austur á Pólland, og fara í móti Rehnskjöld. En nú er að segja frá Rehnskjöld og hans mönnum. Hann fékk pata af, að Ágúst væri á leiðinni austan með 15000 manna, en Schulenberg að vestan með 20,000. Hér var Svium hinn mesti háski búinn til beggja handa; næði herinn hvorratveggja að sameinast, þá var úti um Svía. Rehnskjöld var skjótur til ráða, og hélt þegar móti Schulenburg. Þeir hittust við bæ þann, er *Fraustadt* heitir (3. febr. 1706), og fylktu hvorirtveggja liði sínu. Rehnskjöld sá skjótt, að hér var við ærinn liðsmun að eiga, og þar til kom, að Schulenburg hafði 32 fallbyssur, en Svíar alls engar. Rehnskjöld segir því mönnum sínum, hér sè alt andir því komið, að hið fyrsta áhlaup þeirra verði sem harðast. «Látum oss treysta guði, segir hann við riddara sína, og þá er eg kalla: *af baki!* hlaupið þá af hestum yðar, ráðið á fjandmenn vora og takið fallbyssur þeirra». Því næst gjörðu Svíar bæn sína og súngu, og fylkingar sigu saman. Rehnskjöld hafði auga á öllu, og í því hann sá, að menn Schulenburgs báru kyndla að fallbyssum, kallar hann hátt: «af baki drengir!» Skipti þetta engum togum; skotin riðu af, kúlnar þutu yfir höfðum þeirra, og áður en reyking lagði burt, vissu Saxar elgi fyr, en vopn Svía stóðu á þeim alla vega, og fallbyssur allar úr höndum þeim. Varð nú bardagi hinn harðasti, en svo lauk, að allur Saxaher flýði. Vann Rehnskjöld þar ágætan sigur, og fékk hið mesta frægðarorð á

sig, bæði sökum þess, að hann átti við ærinn liðsmun að etja, að hann hafði margar fallbyssur móti sér, en sjálfur engar, og, að það var Schulenburg, ágætur hershöfðingi, er hann sigraðist á.

Litlu síðar en orusta þessi varð, kom Ágúst austan og alt það lið, er honum fylgdi; en er hann frétti ófarir Schulenburgs, þorði hann eigi að leggja til orustu við Rehnskjöld, en hélt snður til Krakár, og lét þar fyrirberast að sinni.

Karl tólfsti var um þessar mundir austur í landi, eins og fyr er ritað, fór þar um ýms hærð, háði margar orustur og vann í öllum sigur. En er vora tók, hélt hann vestur á Pólverjaland. Alstaðar þar sem hann kom, lét hann landsfólkið sverja Stanislási hollustueiða, en jafnskjótt sem Karl sneri við bakinu og var kominn þaðan, brutu margir Pólverjar eiða sína, og gengu Ágústi til handa. Karl sá um síðir, að hér mundi enginn endir á verða fyr en hann ræði á Saxland, og þröngvaði Ágústi sjálfum til að afsala sér konungdóm á Póllandi og játa konungstign Stanislásar. Seiut í Ágúst-mánuði 1706 hélt Karl með 20,000 manna vestur yfir Óderfljót, og inn á Saxland og mætti hvergi mótstöðu, enda var Ágúst austur á Póllandi um þær mundir, en sem hann fréttir komu Karls til Saxlands, sendir hann menn á hans fund og beiðist friðar. Eptir nokkurt umtal komst svofeldur friður á í bæ þeim, er *Altranstadt* heitir (í sept. 1706): að Ágúst afsalaði sér konungdóm á Póllandi í hendur Stanislási, og hét því, að hugsa aldregi þar til ríkis aptur, enda þótt Stanislás dæl á undan sér. Enn fremr hét Ágúst, að segjast úr sambandi við Czarinn á Rússlandi, láta sonu Jóhans Sobieskís lausa af varðhaldi, en selja Patküll í hendur Karli, og fyrirgefa öllum þeim mönnum, er gengið hefðu úr þjónustu Ágústs til Svíakonungs, meðan ófriður stóð milli þeirra. Að öllum þessum kostum gekk Ágúst, en hafði þó eigi þrek eður djörfung til að segja Rússum frá sætt sinni við Karl tólfta, og barðist þess vegna og þó hálfnaðugt, austur á Póllandi með þeim við Svía, nokkrum vikum eptir friðargjörðina, og síðan ritaði hann Pètri Czar á þá leið, að hann hefði verið svikinn til friðar, enda sjálfur ætlað sér að véla Karl á þenna hátt, en halda, hvað sem öðru liði, öll sín orð við Czarinn, og koma næsta ár með her manns og ráða á Pólland. Það, sem hér og að fram-

an hefir verið sagt af Ágúst öðrum, er að vísu eigi mikið, en þykir þó nægja til þess að sýna, hver maður hann var. Þegar Karl spurði þessar refjar, reiddist hann sem vonlegt var, og fyrir þá skuld varð Ágúst að þola það, að Karl settist að á Saxlandi vetrarlángt með allan sinn her; lögðust þá þung útsvör á Saxa. Alþýðan bar þær álögur þó öllum vonum betur, því að hún var eigi góðu vön, og hins vegar undraðist hún Karl og alt hans háttalag, og siðprýði Svía; en aðalsmenn mögluðu undan útgjöldum, því að þeir voru þeim óvanir, báðu því Karl að hlífa sér við þeim, og kváðust hafa gjört sitt til, er þeir hefðu gjört út riddaralið til herþjónustu. Karl svaraði þeim á þessa leið: «hvar eru riddarar þessir? ef þeir hefðu gjört skyldu sína, þá væri eg eigi hingað kominn. Þegar þér eigið kost á að lifa við hirðina í glaumi og gleði, þá vantar yður eigi, þá kemur hver og einn aðalsmaður; en þegar þér eigið að verja fósturjörð yðar, þá sitað þér heima, hver sem höndum kemst undan. Þess vegna heimta eg útgjöldin fyrst og fremst af yður». Að þessu og öðru geðjaðist alþýðunni vel. Mennt streymdu að úr öllum áttum til að sjá Karl tólfta, hinn sigursæla herkonung. Mennt báru þá saman, Ágúst í öllu skartinu, settan gulli og gimsteinum og dýrindis perlum, og Karl með reiðstígvél á fótum, í skinnbuxum og bláum frakka viðhafnarlausum að öllu. Og mönnum þótti slíkur búningur sæma hinni nafnfrægu betju bið bezta. Það jók og eigi lítið á vinsældir Karls þar í landi, að hann sýndi innilega lotningu öllu, er snerti minningu Lúthers og Gústafs Adolfs, þeirra tveggja manna, er Norður-Þjóðverjar höfðu mestar mætur á. Meðan Karl dvaldist á Saxlandi, fór hann til Lützen, og skoðaði vígvöllinn nákvæmlega. Þegar hann kom þar að, er Gústaf Adolf féll, mælti hann: «eg hef leitast við að lifa sem hann; vera má, að guð veiti mér af náð sinni, að deyja eins heiðarlega eins og hann». Svo sagði Karl, að eigi tryði hann því, að Gústaf Adolf hefði fallið af völdum her-togans af Láenborg. En því höfðu ýmsir menn trúað alt til þeirra daga. Karl kom og til Vittenbergs, og lét sýna sér legstað Lúthers. Þar voru í för með konungi flestir háskólans kennendur, embættismenn margir og herforingjar. En er þeir komu að legstaðnum stóð svo á, að sá tími fór í hönd, er Svíar voru vanir að halda kvöldbænir. Konungur kraup á knén og

baðst fyrir, og slíkt hið sama gjörðu hinir allir. Var það fögur stund við legstað hins mikla manns.

Þá er Karl fór vestur yfir Oderfljót, eins og áður er sagt, lá leið hans um Slesíu. Þar bjuggu margir þeir menn, er Lúthers trú fylgdu, en keisarinn af Austurríki reð fyrir landinu og meinaði þeim að halda trú sína. Þessir menn komu til Karls og beiddu hann ásjár. Karl tók þeim vel og hét þeim liðveizlu sinni í þeim efnum, bæði sökum þess, að hann fann sér skylt, að vernda Lútherstrúarmenn, eins og fyrirrennarar hans og forfeður höfðu gjört, og líka hins vegna, að keisarinn hafði í ýmsum greinum gjört á hluta hans. Meðan hann dvaldist á Saxlandi, og eptir að friður var kominn á milli Svía og Saxa, sneri Karl sér að málum þeim, er fóru í milli hans og keisarans (Jósef 1. 1705—1711). Það, sem þeim bar í milli, voru að vísu engi stórmæli, en þó svo, að nærri lá að vandræði mundu af hljótast, því að keisarinn vildi í engu vægja fyrir Karli. En Karl var svo skapi farinn, að honum stóð á sama hver í mótl var, hvort heldur kotkarl eða keisari. Og þar kom þófi þessu, að Karl kvaðst alþúinn að ráðast inn í lönd keisarans með 40 þúsundir manna og láta vopn skipta með þeim. Þá þorði keisarinn eigi að halda málunum lengra og lét undan, en Karl hafði sitt fram í öllum greinum; þar á meðal það, að prótestantar í Slesíu fengu fult trúarfrelsi, en þar var um frekar 300 kirkjusóknir að gjöra, og sumir segja 1000. Sýna viðskipti þessi meðal annars, hvorn beyg menn hafa haft af Karli tólfta og Svíum á þeim tímum.

Nú hefir um hríð verið sagt frá viðskiptum Karls tólfta og Ágústs annars; hversu Karl elti hann land úr landi, lét sér um það eitt hugað, að svipta hann konungstign og völdum á Pólverjalandi, og fékk því loksins til leiðar komið, að Ágúst afsalaði sér þar konungdóm, en Stanislás Lezinský tók við. En meðan þau tíðindi gjörðust á Póllandi og Saxlandi, urðu þeir viðburðir með mönnum í löndum Svía austan Eystrasalts (á Líflandi, Estlandi, Ingermanlandi og Finnlandi), er í engu eru miður merki-legir. Það er viðureign Rússa og Svía þar eystra. Þá er Karl tólfti fór af Líflandi (1701) og suður á Pólland, lét hann eptir herflokka, smærri, og stærri, í skattlöndum þeim, er nú voru nefnd, til varnar móti Rússum. Eptir orustuna við Narva voru Rússar að vísu lamaðir, og meðan þeir vissu af Karli Svíakonungi í

nánd við sig, þorðu þeir sig hvergi að hræra, en eftir því sem hann fjarlægðist þá, og tíminn leið, eftir því óx þeim smámsaman djörfung og dugur. Þó hefðu þeir af sjálfadáðum engu til leiðar komið, ef þeir hefðu eigi haft yfir sér Pétur Czar, þann mann, er með óþreytandi orku og hörku knúði þá fram til stórræða og sigurs, og sem þar á ofan sýndi í öllu, að hann var hinn hygnasti maður og slægvittrasti, og beitti öllum brögðum til þess að ná því marki og miði, er hann hafði sér fyrir sjónir sett. En það var, að umskapa Rússland, hefja það upp úr þeirri niðurlægingu, sem það hafði áður í verið, og gjöra það að miklu og sterku stórveldi. Til þess þurfti hann fyrst og fremst að ná þeim löndum, er Svíar áttu fyrir austan hafið, svo að Rússar ættu þar greiðan veg til viðskipta við aðrar Norðurlálfurjóðir. Alt til þessa náðu Rússar til sjávar að eins norður við Gandvík; þar áttu þeir eina borg sem teljandi er, Arkangel; þangað var sigling af Englandi og Hollandi, en þó mörgum erfiðleikum bundin, og lítils arðs þaðan að vænta fyrir Rússa.

Þess var áður getið, að Karl tólsti hefði látið eftir í skattlöndum sínum við Eystrasalt nokkra herflokka. Það var að visu svo, en það lið var mikils til of lítið til þess að mæta árásum Péturs og öllu því ofurefli, er hann hafði á að skipa. Það er Miill efi á því, að sá liðsmunur var svo mikill, að ef Pétur hefði viljað, þá gat hann á einu eður tveim árum sigrazt á hinum fámennu herflokkum Svía á Líflandi, Est- og Ingermanlandi, og brotið þau lönd undir sig. En Czarinn var hygnari en svo, að hann gjörði það. Hann leit svo á þetta mál: taki eg lönd þessi svo að kalla í einu vetfáangi, þá þykir Karli svo mikið að gjört, að hann snýr burt af Póllandi til þess að vinna þau aftur, og þá er óvíst hvernig fara kann; vinni eg þau þar á móti smámsaman, gefur hann því minni gaum. Á hinn bóginn beitti Pétur allri sinni slægvisku til þess að fjarlægja Karl sem mest frá Rússlandi, og gjöra alt sem flóknast og langvinnast í viðureign hans og Ágústs. Hann lét Ágúst hvorki skorta menn né fé til mótspyrnu gegn Karli. Pétur þekti skaplyndi Karls, og kunni vel að færa sér í nýtt þrályndi hans og ofdirlíð. Samkvæmt þessu багаði Czarinn allri viðureign sinni við Svía. Hann sá um það, að hafa jafnan margfalt meira lið en Svíar höfðu, hvar sem fundum þeirra bar saman, fara með hægð og taka

eina og eina borg frá þeim á ári, og láta Rússa þannig venjast Svíum og vopnaviðskiptum við þá. Árið 1702 unnu Rússar sigur á Svíum í orustu við Sagniz; Svíar voru um 6 eða 8 þúsundir, en Rússar milli 50—90 þúsundir manna. Eptir þá orustu var Lífland að kalla komið alt í hendur Rússum. Þegar Karli bárust þessi tíðindi, litlu eptir bardagann við Klissóv, réðu margir honum að bregða við þegar og bjarga Líflandi, en til þess var hann ófáanlegur. Svíar á Líflandi, og annarstaðar þar norður, urðu að una því og búa við það, er þeir höfðu, og fengu aldrei styrk svo teljandi sè, hvorki frá Karli konungi þeirra, eða heiman af Svíþjóð. Alt um það vörðust þeir svo ágætlega, og gjörðu Rússum einatt svo harðkeyptan sigurinn, að mönnum getur eigi annað en komið til hugar vörn Leónídasar í Laugaskarði, eða Ólafs Tryggvasonar í Svoldarorustu. En hér sannaðist hið forn-kveðna: að engi má við margnum, og þar kom að lyktum, að Svíar þar eystra urðu alls staðar ofurliði bornir.

Þegar Pétur Czar var orðinn yfirsterkari á Líflandi, lagði hann á það alt kapp, að vinna lönd þau, er liggja að Ladóga-vatni og Neva-fljóti. Ladóga er, eins og menn vita, afarmikið stöðuvatn vestan á Rússlandi; affallið eða fljótið, sem úr Ladóga rennur vestur í Finnlandsflóa, heitir Neva; er það vatnsmikið, en eigi nema 9 mílur á lengd. Þar sem Neva rennur úr vatninu er ey ein lítil, og hét Nöteborg, meðan Svíar áttu þar yfir að ráða; áttu Svíar kastala allsterkan á eyinni, og höfðu þar jafnan lið til varnar; þó var það lið, þegar hér var komið, eigi nema 400 manna, en þótti nægja til þess, að verja inn- og útsiglingu úr Ladóga-vatni. Nokkru neðar eða vestar með Neva-fljótinu, og skamt þaðan sem það rennur í Finnlandsflóa, kemur á ein norðan af Finnlandi sem Okta heitir og rennur í Neva. Þar sem vötn þessi koma saman, höfðu Svíar sett kastala, og þar umhverfis kastalann hafði smámsaman myndast bær einn, eigi all-lítill. Þann bæ kölluðu Svíar Nýen eða Nyenskans. Af þessu er þá auðsætt, að Nöteborg og Nyenskans voru sem tveir verðir sinn við hvorn endann á Neva; en Neva sú lífæð, er verzlunin streymdi um austur á Rússland og vestur þaðan aptur sama veg til sjávar. Þessari æð vildi Pétur ná fyrir hvern mun. Um haustið 1702 settist hann með 14000 manns um Nöteborg, og sótti hana af miklum ákafa. Svíar voru þar fá-

mennir fyrir, eins og áður er sagt, en vörðust af dæmafárri breysti þángað til að eigi stóðu uppi nema nokkrir menn, þá gáfust þeir upp, en Rússar settust í kastalann. Pètri fanst mikið um að hafa náð Nöteborg, og sagði sem satt var, að þar hefði hann lykilinn að Ladoga, Neva, Finnlandsflóa og Ingermanlandi, fyrir því skyldi það ekki lengur heita Nöteborg, heldur Schlüsselburg þ. e. Lykilborg. Um veturinn eptir (í marzmánuði 1703) kom Pétur með liði miklu og settist um Nyenskans, og fór alt á sömu leið og fyr við Nöteborg, að Svíar vörðust þar meðan þess var kostur, en þeim kom engin hjálp, og Pétur vann kastalann 4. dag maímánaðar sama árið. Nú gat hann ráðið ferðum sínum upp og niður eptir Neva, og gatan greið til sjávar. Nú var að tryggja leiðina, halda því sem unnið var, og nú kom honum til hugar, að setja þar traustar varnir, koma þar upp verzlunarstað, og, ef svo vildi verkast, setjast þar sjálfur að, og gjöra þar höfuðborg í ríki sínu. Menn gáfu honum það ráð, að velja Nyen til borgarstæðis, en Pétur féllst eigi á það. Hann vildi heldur velja til þess hólma þá, er voru þar lítið eitt vestar í Nevu mynni. Þeir voru láglendir, hrísi vaxnir og mýrlendir, og að kalla óbygðir. Þetta leizt mörgum mjög erfitt og jafnvel óvinnandi, en Pétur var, þegar því var að skipta, ósveigjanlegur eins og Karl tólsti, og það varð fram að fara, sem hann vildi, hvað sem aðrir sögðu. Fjórða dag maí-mán. vann Pétur Nyenskans; 17. maí var fyrsti steinninn lagður til Pétursborgar á einum af áðursögðum hölmum; grjótið fékk hann, meðan það til entist, frá Nyenskans, og lét rífa þar alla múrveggi niður til grunna; en verkamenn tók hann úr öllum nálægum sveitum til þessa starfa, mörgum þúsundum saman, hvort sem þeim var ljúft eða leitt, sagði sjálfur fyrir verkum, og leit eptir öllu með dæmalausum dugnaði og hörku. Lítið eitt vestur af hölmum þeim, sem borgin var reist á, er ey ein, sem hét Retúsari, þángað setti Pétur 2000 manna til varnar móti Svíum, ef þeir kæmu til að banna honum húsagjörðina. Þar heitir nú Kronstadt. En Pétur þóttist eigi óhultur að heldur; þess vegna fór hann sjálfur og stikaði djúpið umhverfis eyna og fann grynningar suður af henni; þángað lét hann flytja grjót og hleypa þar niður, og gjöra þar afarsterkan kastala, með þremur fallbyssuröðum, hverri upp af annari; sá kastali heitir Kronslott,

og ver innsiglingu til Pétursborgar. Það er mælt, að 100000 manna hafi mist lífið við öll þessi miklu störf, alla þessa stórkostlegu borgargjörð Péturs Czars. Þegar hann þóttist nú hafa svo umbúizt sem hann vildi á þeim stöðvum, þá lét hann í minningu þess smíða pening; á honum var mynd sjávargoðsins (Neptúns), þar sem hann ekur vagni sínum á öldum hafsins með þríforkinn í hendi, og yfir stóðu þessi orð: *flnna eCCe trIDenteM* þ. e. Finnland, sjáðu þríforkinn¹.

Sænska stjórnin í Stokkhólmi sendi að vísu optar en einu sinni nokkur herskip austur í Finnlandsflóa til þess að eyða þessum nývirkjum Czarsins, en allar slíkar tilraunir urðu árángurslausar, því að liðsaflí sá, er Svíar sendu, reyndist jafnan of litill, og samvinna land- og sjóliðsins miklu miður en vera skyldi. Árin 1701 til 1705 unnu Rússar þannig flest þau lönd, er Svíar áttu fyrir austan haf, og komu sér þar að auki upp allmiklum herskipaflota. En menn munu spyrja: hvað olli því, að nægur liðsaflí var eigi sendur frá Svíþjóð löndum þessum til varnar móti Rússum? Þar til má svara, að til þess þurfti konungsleyfi, en hann skipaði með harðri hendi, að senda sér suður á Pólland hvern vopnfæran mann, er missast mátti að heiman; þessari skipun urðu menn að hlýða í Stokkhólmi, og höfðu því eigi meira lið aflögu, er sent yrði í austurveg. En þó allir beiddu konúng og reðu honum, að fara sjálfum með því liði, er hann hafði, og berja á Rússum, þá vildi hann það með engu móti, eins og fyr er sagt; þess vegna kom engin hjálp, og þess vegna gátu Rússar unnið þau lönd, sem þeir unnu við Finnlandsflóa, og búið þar um sig í næði.

Þegar Karl tólfsti fór suður á Pólland (1702) lét hann nokkurt lið verða eptir til landvarnar á Kúrlandi og í Ríga. Fyrir því liði var sá maður, er Stúart hét. En af því að hann hafði orðið sár, þá er Karl gjörði landgöngu á Sjálandi, og varð aldrei heill síðan, þá fékk sá maður herstjórnina í hendur, er *Levenhaupt* hét. Hann hafði á yngri árum iðkað vísindi í ýmsum háskólum bæði í Svíþjóð og á Þýzkalandi, gjörzt síðan hermaður og verið í orustum bæði á Niðurlöndum og Ungverjalandi, og jafnan reynzt vel. Jafnskjótt sem Karl konúngur var farinn suður, komu Rússar og Pólverjar þeir, er með Ágúst stóðu, og

1) Upphafsstafirnar MDCCIII sýna ártalið 1703.

gjörðu Svíum árásir, en Levenhaupt rak þá jafnan af höndum sér. Þá var það einu sinni (í marzmán. 1703), að Svíar vildu ná vígi einu, er Birze heitir, og verða fyrri til en óvinir þeirra. En er Levenhaupt kemur þangað, eru hinir komnir þar fyrir með rúmar 6 þúsundir manna. Levenhaupt hafði að eins 1300 manns, sér, að hér er við ofurefli að eiga, og heldur undan, en hinir á eptir og ná Svíum; er þá enginn annar kostur en að berjast. En svo fóru leikar með þeim, að Levenhaupt fékk sigur, en hinir flýðu og létu margt manna. Árið eptir (1704) komu Rússar og Pólverjar og voru 16000 manna. Svíar höfðu einar 6000; þó heldur Levenhaupt þegar í móti, og hittir þá við bæ þann, er *Jakobstað* heitir. Þar var í liði með Svíum pólskur höfðingi, er Sapieha hét, með sína menn. Litlu áður en orustan tókst, riðu þeir Levenhaupt og Sapieha á hól einn, og litu yfir lið fjandmanna sinna. »Þetta er mikið lið«, mælti Sapieha. »Drottins lið er þó enn meira«, svaraði Levenhaupt. »Hvað ætlið þér nú að gjöra?« segir Sapieha. »Það skal eg segja yður, þá er eg hefi fylkt liði mínu«, svaraði Levenhaupt. »Hvar skulu mínir menn standa?« mælti Sapieha. »Að baki oss Svíum«, mælti hinn. »En er orustan er úti og sigur unninn með guðs hjálp, þá skulu riddarar yðrir ríða fram og reka flóttan, til þess eru þeir vel fallnir, því að þeir eru léttari á sér en vorir riddarar«. Þessu næst fylkir Levenhaupt liðinu og lætur blása til allögu; segir mönnum, að skjóta eigi fyr en hann skipi þeim, en ganga fram og hafa byssurnar á reiðum höndum og vera viðbúnir, hve nær sem kallið komi. Nú kváðu við fallbyssurnar, og flýðu þá Pólverjar hópum saman úr liði hvorutveggja. En er Svíar sáu það, vildu margir þeirra fram hlaupa og sögðu: »leyfið oss, hershöfðingi, að hlaupa á Rússa!«. Levenhaupt svaraði: »nei, börn mín góð, eigi enn! haldið svo fram stefnunni í réttri röð. Þér skuluð fá leyfið, þegar stundin er komin!«. Í því skutu Rússar, en skotfærið var of langt, og gjörðu kúlurnar Svíum lítinn skaða. Þeir svöruðu engu og gengu þegjandi sem fyr. Þá kallar Levenhaupt. »Skjótið nú drengir! og áfram!«. Og óðar en orðin voru töluð, þaut skot fram úr hvers manns byssu. Varð reykurinn svo mikill að ekki sást. En er af létti reyknum, voru Rússar á flóttan, en vígvöllurinn þakinn mannabúkum og vopnum. Hinir pólsku riddarar í liði Levenhaupta riðu nú fram og ráku flótt-

anh og drápu margan mann. Í orustu þessari misti Levenhaupt að eins nokkra menn, en af Rússum fellu 3000 manna. Svíar fengu þar mikið herfáng, og þótti þetta hinn frægasti sigur.

Þegar Pétur Czar heyrði þessi tíðindi, varð hann ákaflega reiður, og kvaðst launa skylda Svíum. Tekur það því til bragðs, að hann sendir *Scheremetiew*, bezta hershöfðingja sinn, með 20000 manna til Kúrlands. Var sú fyrirætlan Rússa, að fara mjög dult og koma á óvart Levenhaupt; þótti þeim sem þeir mundu nú hafa ráð hans í hendi sér. En Levenhaupt komu njósni, og hafði allan þann viðbúnað, er hann kunni. Sextánda dag júlímánaðar 1705 nam hann staðar við þorp eitt, er *Gemauerthoff* heitir, og beið þar Rússa. Þá er leið fram um hádegi komu Rússar. Levenhaupt fylkti liði sínu, eggjaði menn til drengilegrar framgöngu og sagði meðal annars. »Mér er sagt, að Rússar og Tartarar séu hér komnir, 20,000 manna, að berjast við oss. Vör erum eigi nema 7000, og er hér að vísu ærinn liðsmunur. En minnizt þess hvernig fór við Narva. Gáangið djaflega fram drengir, og gleymið eigi, að þér eruð Svíar, en þeir eru Rússar!« Svíar lásu síðan þæn sína og sángu vers á eptir, sem þeirra var venja, og því næst tókst orustan. Var nú berizt lengi dags af miklum ákafa. Er svo sagt, að þá hafi Levenhaupt sýnt til fulls hver hershöfðingi hann var, enda urðu þær lyktir á, að hann vann sigur, en *Scheremetiew* varð sár og flýði undan með sína menn, en fallnar af honum áður 6000. Svíar mistu 1500 manns, en fengu þar mikið herfáng.

Nú þótti Pétur versna sagan, vildi þó eigi hætta við svo búð, og býst nú að senda 40,000 manna til Kúrlands. Leggur þerinn af stað og fer um nætur en hvílist um daga, svo að sem sízt skuli fara njósni af. En Levenhaupt grunaði hvað verða mundi og var við öllu búinn. Hann dróg því að sér allt það lið, er til varð náð, heldur til Ríga og býst þar fyrir, en borgin var ramlega víggirt, og var honum það hinn mesti styrkur. En sem Rússar koma og sjá, hversu Levenhaupt hefir um búizt, þótti þeim eigi ráð að freista atlögunnar, og sneru frá við svo búð. Það er sagt, að Pétur sæti að miðdegisverði er honum komu þessi tíðindi. Reiddist hann þá og mælti: »þetta hefir djöfullinn kent honum!« og kastaði hálfaum eptir borðunum endilöngum.

Það, sem hér að framan er sagt, sýnir, að Levenhaupt tókst að verja Kúrland og Ríga, og þær sveitir þar um kring, er hann var yfir skipaður, um fjöggra ára tíma (1702—1705), móti ofurefli liðs, svo að Rússar fengu þar eigi á unnið, og má af slíku marka, hver afbragðsmaður hann hefur verið. Er eigi ólíklegt, að öðruvísi mundi farið hafa en raun varð á, ef Karl tólsti hefði sett hann, eður hans jafningja, yfir alt það lið, er verja átti löndin meðfram Finnlandsflóa.

Á öndverðu ári 1706 hélt Karl konungur, eins og áður er sagt, austur til Groðno, og fór þá aptur og fram um Litháen (Lithaugaland). Það er suður af Kúrlandi. Urðu Rússar þá skelk- aðir og hugðu, að þeir mundu kvíðir verða milli Karls og Leven- haupts, og fyrir því héldu þeir sem hraðast austur á Rússland, til Smólensk og Kiew. En er Levenhaupt var laus orðinn við návist þeirra, ræð hann einn öllu á Kúrlandi og í þeim sveitum, er þar liggja næstar, og þó að Rússar gjörðu honum ýmsar glettíngar, bar hann sem áður jafnan herra hlut í þeim við- skiptum.

Nú er að segja frá Karli tólfta, að hann hafði lokið störf- um sínum á Saxlandi, og þóttust menn þá vita, að hann mundi halda til Rússlands og hefna alls þess yfírgánga og ójafnaðar, er Pétur Czar hafði aðhafzt í löndum Svía þar austur. Pétur vissi vel hvað Karli leið, varð mjög áhyggjufullur um sín efni, og leitaði friðar við Karl á ýmsa vegu. Það var í þeim erind- um, að einn frakkneskur sendiboði átti tal við Karl og mæltist til, að friður gæti komizt á. Karl svaraði: „Pètri er þetta eng- in alvara. Hann vill telja mönnum trú um, að það sé hann sem æskir friðar, en eg, sem æski ófriðar. Væri honum svo ant um friðinn sem hann segir, þá lèti hann af, að æsa Pólverja móti Stanislási. Enginn má því ætla, að eg hyggi á frið, fyr en eg er kominn með mína menn í nánd við Czarinn, og mér er orð- ið kunnugra en nú um alt hans athæfi“. Litlu síðar kom sá hinn sami maður aptur að máli við Karl um þetta efni. Kon- úngur mælti þá: „Það er eigi að trúa því sem Czarinn segir. Hann hefur fyrir skemstu fengið Mensikov Ingermanland að lèni og sagt, að gánga skyldi í erfðir, og bendir slíkt eigi til friðar.“ „Eg hygg þó“, segir hinn frakkneski maður, „að Czarinn vildi kaupa Ingermanland við ærnu verði“. Karl mælti: „Eg hef

aldrei ætlað mér að selja öðrum þegna mína. Og fella það tal svo niður. Ýmsir aðrir málsmetandi menn freistuðu og um þessar mundir, að telja Karl á friðinn, og þar á meðal var Píper, ráðgjafi hans, er jafnan mátti sér mikils hjá konungi, og að maklegleikum, því að Píper var stórvitur maður og honum hinn trúasti. En allar þær fortölur urðu árángurslausar. Karl sagði meðal annars: »Eg hef hugsað þetta allt, sem þér segið. En eg veit við hverja eg á. Eg æski friðar, og guð gæfi, að friður fengist og hann góður! En getið þér ábyrgzt, að fjendur vorir efni orð sín eins og eg? Czarinn hefir það til, að ganga að öllum þeim kostum, er eg set honum; en jafnskjótt sem eg er kominn heim til Svíþjóðar með mína menn, þá kveikir hann af nýju óeirðir á Póllandi, og setur Ágúst eða einhvern annan þar til ríkis. Og við Stanislás konung sagði Karl: »Eg bið yður hugsa til orða minna: þér fáið aldrei að sitja í friði á Póllandi, meðan þessi rángláti Czar er nágranni yðar, hann, sem byrjar ófrið án allra saka. Það ber því brýn nauðsyn til, að eg fari hëðan og reki einnig hann frá ríkjum. Þetta sýnir, hvernig Karl leit á málin og hvað honum bjó í skapi. Hershöfðingjar hans og þeir aðrir, sem helzt áttu hær blut að máli, þóttust sannfærðir um, að konungur mundi sem allra fyrst ætla sér austur á Rússland í móti Czarnum, en hitt vissi enginn, hverja leið hann mundi fara, eða á hvern hátt hann mundi haga austurför sinni og aðgjörðum öllum. Konungur var nú sem jafnan fámæltur, og gjörði það eigi uppskált fyrir neinum, hvað honum bjó í brjósti; en það sáu menn, að áhyggjur hafði hann miklar og venju fremur. Mönnum hans sagði þungt hugur um fyrirætlan þessa, og gjörðust margir meðal þeirra heimfúsir, og sumir fengu heimfararleyfi, þar á meðal Magnús Stenbökk, og nokkrir aðrir hershöfðingjar. Píper beiddist og að fara til Svíþjóðar, en konungur kvaðst eigi án hans mega vera, og varð hann því eptir hjá konungi.

Um haustið 1707 fór Karl af Saxlandi, eins og fyr er sagt, austur á Pólland, dvaldist þar nokkrar vikur, en hélt svo þaðan um nýársleyti 1708 austur á Litháen. Þar voru skógar miklir, vegleysur og ilt yfirferðar og veðurátt hörð; lá konungur einatt úti undir berum himni og lið hans allt; fórust þá bæði menn og hestar af kulda og illri aðbúð; en þó var það verst að lands-

menn sýndu af sér fullan fjandskap, leyndust í skógunum og skutu margan mann af Svíum til bana. Karl fór fyrst að þeim með blíðu, en er það dugði eigi, lét hann elta þá víðs vegar og skjóta sem villudýr. Nú sem Pétur fréttir til ferða Svíanna, heldur hann með 9000 manna til Grodnó, og vill verja Svíum leið austur yfir Niemen. Karl var á undan liði sínu með 800 riddara og brýzt yfir fljótið, tekur Grodnó, en Rússar flýja austur á land. Það var þó langt frá Pètri að láta hug falla, en hann fylltist heiptarhug í móti, og lét á allar landir eyðileggja Líf-, Est- og Ingerman-land; væri nokkur mótþrói sýndur, lét hann drepa landsfólkið sem fænað, eða flytja það þúsundum saman langar leiðir austur á Rússland; en Pétursborg lét hann þar á móti víggirða sem bezt, en meðfram auka hana og prýða á marga vegin. Það var eins og það legðist í Czarinn, að þar mætti hann óhultar vera fyrir Svíum, þangað mundi Karl aldrei koma.

Af því sem áður er sagt, virðist alt lúta að því, að Karl hafi einsett sér að reka Pétur Czar frá ríkjum, eins og hann hafði gjört við Ágúst annan. En til þess þurfti Karl að taka Moskva, höfuðborg ríkisins; að vinna þá borg var að koma við hjartað í Rússum. En þá var spurn, hverja leið skyldi þangað halda. Það mátti fara þrjár leiðir: um Nóvgorod, um Smólenk, og um Ukrain-sveitir, og var sú syðst. Karl hafði, þegar hér var komið, eigi af ráðið, hverja leiðina skyldi fara. En þá koma þau atvik, er leiddu hann til þess að fara syðstu leiðina, um Ukraine, og skal þess nú getið.

Sveitir þær, sem lágu suður af Litháen, niður með Dniepr-fljóti beggja megin, voru um þessar mundir nefndar *Ukraine*¹ einu nafni. Nú heitir þar Litla-Rússland. Þar voru landskostir góðir, en landið fremur illa ræktað. Íbúar voru litlir akuryrkjamennt, en lifðu af kviksjárrækt, og þó einna helst af ránum og rupli, og fyrir því voru þeir nefndir *Kósakkar*, sem þýðir: úthlaupsmenn eða ræningjar. Höfuðsmaður þeirra um þessar

1) Orðið *Ukraine* táknar land, sem liggur á landamærum; enda lá Rússland, Tyrkland og Pólland umhverfis það. Meiri hluti þess var Rússum háður, en nokkur hluti Pólverjum. Síðar komst alt *Ukraine* undir Rússa, og er nú skipt í 4 fylki: Kijev, Tschernigov, Pultava og Charkov.

mundir hét *Mazeppa*. Hann var missáttur orðinn við Pétur Czar, því að Czarinn hafði látið sér um munn fara, að hann mundi takmarka frelsi Kósakka og yfirráð Mazeppu. Gjörir því Mazeppa sér ferð á fund Karls konunga, og býður honum liðveizlu sína móti Pètri, og segir svo, að jafnskjótt sem Karl sé kominn austur yfir stórarnar Dniepr og Desna, þá skuli hann drepa alla rússneska menn í Ukraine, og koma síðan til liðs við konung með 20 eða 30 þúsundir Kósakka. Karl gaf þessu reyndar lítinn gaum, því að hann treysti eigi Kósökkum nema í meðallagi, en þó hugleiddi hann þetta mál. Um sama leyti komu og sendimenn frá Tyrklandi til Karls með þeim skilaboðum frá Soldáni, að hann bauð að senda konungi lið til styrktar, þegar er Karl væri kominn í Suður-Rússland með her sinn. Leizt konungi betur á loford og liðveizlu Soldáns en hitt, er Mazeppa hafði heitið honum. Það var þessi von um liðveizlu Tyrkja og Kósakka, sem einkum kom Karli tólfta til þess, að halda liði sínu suður á Ukraine, þrátt fyrir það þó bæði Píper og aðrir helztu menn réðu honum sterklega frá því, að sjarlægast svo mjög frá skattlöndum sínum við Eystrasalt. Eftir þetta lagði Svíaher upp og stefndi suður og austur í land. Varð þá bráðum fyrir þeim fljót það, er Berezina heitir, allmikið vatnsfall (50 faðma á breidd þar sem Svíar komu að því); það rennur suður í Dniepr og er síðan orðið mjög nafnkent af óföllum Napóleons keisara í nóvembermán. 1812. Þar höfðu nú Rússar fyrirsát og gjörðu Svíum mótstöðu, en urðu undan að hörfa, og Svíar komust yfir fljótið. En mjög gjörðist nú leiðin þeim torsótt, því að alls staðar voru smærri og stærri hópar fyrir af Rússum, er öllum vegum spiltu, brutu allar brýr, eyddu vístum, brendu bæi, svo að hvergi fanst hæli fyrir veðrum og vindi, og jafnvel sumstaðar engin björg handa hestum Svía; færu Svíar eigi fjölmennir og í fylkingum saman, þá skutust Rússar að, og gjörðu þeim meiri eður minni mannskaða. Leiðin sóttist því ákaflega seint, en Svíar létu eigi hug fallast, sigruðu allar þrautir, og höldu þannig áfram ferðinni þar til þeir komu í endalok júnímánaðar að þorpi einu, er *Holofsin* heitir.

Nú var um þessar mundir margt ískyggilegt á Rússlandi. Menn voru þar mjög óánægðir með ýmsar aðgjörðir Péturs; menn kvörtuðu undan sköttum og herkvöðum og ýmsri nýbreytni

er hann leiddi þar í lög; urðu því víða uppblaup þar í landi. En ofan á þetta bættist almennur ótti fyrir Svíum og konungi þeirra, er menn vissu, að komnir voru í landið með hefndarhug, og svo hraustir og harðfengir, að ekki hélzt við þeim. Pétur sendi því enn að nýju á fund Karls og leitaði um sættir, en það fór sem fyrri; menn gátu eigi orðið á eitt sáttir, og Karl lyktaði talsitt við sendibodann með svo feldum orðum: »berið Czarnum kveðja mína og segið honum, að eg skal semja frið við hann þá er eg kem til Moskva«. En er Pètri komu þau orð mælti hann: »Karl bróðir minn vill vera Alexander, en eg ætla mér ekki að vera Darius«.

Lítið eitt fyrir austan Berezina rennur fljót eitt er Drúsa heitir og suður í Dniepr. En í Drúsa kemur að austan á sú, er *Vabis*¹ heitir. Á vestari bakka Vabis er bær einn lítill, er *Holofsin* heitir. Þangað kom Karl 28. júní, að kvöldi dags. Þar voru Rússar fyrir með 25000 manna, og höfðingjar fyrir því liði þeir Mensikov og Scheremetiev. Þegar Karl kom, héldu þeir liðinu öllu austur yfir Vabis og bjuggust að verja Svíum yfir ána. Karl var, eins og hann var vanur, langt á undan liði sínu með fáa menn, og sá sér eigi fært að svo stöddu, að fara yfir ána og ráða á Rússa, en lítaðist þar um og setti vel á sig landslagið. Rússar voru upp og niður með ánni; en skógarnef eitt, er framgekk að ánni að austanverðu, skildi herinn í tvent, og þar að auki var mýri, bæði meðfram skógarnefinu og svo fram með ánni, mjög ill yfirferðar. Fyrir handan þá mýri stóðu Rússar og höfðu hlaðið sér skotgarða til skýlis. Yfir alt þetta, ána, mýrina og girðingarnar, áttu Svíar að sækja, og voru það eigi alllitlar torfærur. Þriðja dag júlímán. komu um síðir 4000 Svía til Holofsín. Vildu hershöfðingjar Karls að beðið væri eftir megin hernum, en Karl þóttist nú hafa nógan styrk, og sagði mönnum sínum að búast þegar við bardaga næsta dag. Um nóttina lét hann í mesta kyrpey færa fallbyssur sínar fram á árbakkann beint þar í móti, sem millibilið var hinum megin milli beggja hinna rússnesku herflokka, því að þar ætlaði hann sér yfir ána, og komast á milli þeirra, og færa sér í nyt þá yfirsjón, sem þeim Mensikov hafði á orðið, að tvískipta liðinu. Þegar í apt-

1) Nefnist og Babiek og Bibiz.

ureldíng næsta dag (4. júlí) laust á illviðri með stormi og regni, en Karl lét það eigi aptra förrinni, og fallbyssur hans kváðu þegar við; hopuðu Rússar þá á hæl, er þar stóðu fyrir, en Karl óð út í ána og menn hans þegar á eftir; áin var djúp svo að vatnið tók þeim undir hendur, hældu þeir vopnum sínum ofan vatns, eftir því sem unt var og óðu þannig yfir. Nú varð mýrin fyrir þeim. Konungur lagði einnig fyrstur út á hana, og svo hver af öðrum, sukku þeir þar djúpt í, og er þeir komust yfir þau fén og forðð, voru þeir leðja ein utan klæða, en þó var það verst, að þúðrið hafði alt vöknað, svo eigi var hugsandi til að hleypa af einu einasta skoti. Þetta grunaði konung, og kallar hann þá, og lætur berast til manna sinna: „drengir! sá er skelmir sem skýtur!“ Þessu var dyggilega fylgt. Rússar skutu þegar, en miðuðu illa og hittu fáa menn; Svíar ruddust á garðana, og létu vopnin ríða á Rússum; varð áhlaup þeirra svo hart, að hinir stóðust eigi og hopuðu fyrir; þó vörðust þeir nokkra hríð, en snerust um síðir á flóttu. Þetta var nú sá hluti Rússahers, hér um bil 12000, er neðar stóð með ánni, eða hinn vinstri fylkingararmur þeirra. Hinn hluti liðsins er ófar stóð með ánni, gat eigi komið þessum til liðs, því að mýrin, og skothríðin frá fallbyssum Svía, bannaði það. Og sem Rússar í hægri fylkingararmi sáu ófarir og flóttu hinna, þá flýðu þeir einnig, og þannig var sigurinn við Holofsín unninn. Litlu síðar kom Pétur Czar til manna sinna, og þegar hann frétti að 12000 þeirra hefðu barizt við 4000 Svía, og þó veitt nokkurt viðnám, varð hann glaður og lofaði hreysti þeirra og hugprýði; en til þess að auka þessa kosti enn meir, þá lét hann leiða fram fyrir sig alla þá, sem sár höfðu á baki og skjóta hvern sjötta mann, og þannig voru 64 af mönnum hans drepnir.

Eftir orustuna við Holofsín hafði Karl þar litla viðdvöl, en hélt þaðan austur að Dniepr-fljóti og yfir um það hjá borg þeirri, er Mobilev heitir. Dniepr er ein af stóranum á Rússlandi, því að mörg vötn og mikil renna í hana; er hún um 250 mílur á lengd og fellur suður í Svartahaf. Þegar komið var austur yfir Dniepr létu Svíar þar fyrirberast nokkrar vikur, því að konungur hafði svo ráð fyrir gjört, að Levenhaupt skyldi koma að norðan með það lið, er hann hafði, og sameinast meginhernum; sömu-leiðis hafði konungur gjört Mazeppa orð, að koma að sunnan

með Kosakka herinn. En hvorigur þeirra kom. Þá leiddist Karli biðin, og hélt af stað suður í land. Rússar forðuðust að leggja til orustu við Svía, en hins vegar voru þeir alt af á næstu grösum, og gjörðu Svíum alt það ógagn, er hugsagt gat, spiltu vegum, þar sem vegir voru, brutu brýr af vötnum, brendu þorp og bæi og jafnvel fóðngras af jörðunni, skutust að þegar þeir sáu sér fært, og áttu þá vopnaviðskipti við Svía, og mistu margir við það lífið.

En nú er að segja frá Levenhaupt. Konúngur hafði svo fyrir mælt, að hann skyldi leggja upp frá Ríga fyrstu dagana í júnímánuði, og koma til móts við sig með alt það lið, er hann hefði, og þar að auki flytja með sér alt það, er hann gæti fengið af vistum og alls konar hlutum, er herinn þyrfti með. Að draga þetta alt að sér og búa það alt til ferðar tók langan tíma, og loksins komst Levenhaupt af stað síðast í júnímánuði. Liðsmenn hans voru um 11000 manns, en farángurinn sem herinn flutti með sér, var að tiltölu miklu meiri; vagnafjöldinn skipti þúsundum. Ferðin gekk því miklu seinna en annars hefði orðið; rigningar gjörðu vegina lítt færa, og eptir því sem lengra kom suður og austur í landið, eptir því urðu Rússar fjölmennari á leið Svía, og gjörðu þeim miklar ónáðir. Þegar Levenhaupt var kominn í nánd við Dniepr, fékk hann boð frá konúngi á þá leið, að hann væri sjálfur farinn af stað þaðan, sem þeir áttu að mætast, og Levenhaupt skyldi halda austur yfir Dniepr og á eptir sér suður á Ukraine. Þetta voru þúngar fréttir; Levenhaupt sá þegar, að Rússar mundu með ofurefli liðs gjöra sér fyrirsát og fyrirmuna sér að ná konúngi, eða fá nokkurn styrk af honum. Hefði nú Levenhaupt mátt ráða, þá ætlaði hann sér að halda ofan með Dniepr að vestanverðu, því að þá var fljótið á milli hans og Rússa, og var það nokkur bót, en konúngur hafði boðið, að hann skyldi fara austur yfir fljótið og þann veg suður, og því boði varð að hlýða. Levenhaupt komst heilu og höldnu yfir fljótið, og hélt svo kænlega og rösklega áfram nokkra daga, að Rússar vissu eigi hvar hans var að leita. En þess var eigi langt að biða áður þeir höfðu sannar sögur af ferðum hans. Pétur Czar var þar sjálfur með 30000 manna, og flýtir ferðinni sem mest hann getur á eptir Svíum; var honum auðgeðt að ná þeim, þar sem þeir höfðu farángur svo mikinn meðferðis, en

Rússar lausir og léttir á sér. 26. dag septembr. náði fararbroddur Rússa þeim Levenhaupt, en hann barði þá af höndum sér, feldi af þeim 1500 manna og fór leiðar síunar. Rússum bættist nýtt lið í staðinn, og að kvöldi hins 28. september voru Svíar komnir þangað, sem Lisna heitir, og Rússar þar öllu megin utan um þá; var nú ekki undanfæri lengur. Daginn eftir, þegar er lýsti af degi, tókst orustan og stóð allan dag til kvölds; enda var þessi hin lengsta af öllum þeim mörgu orustum, sem Svíar áttu um daga Karls tólfta. Hvorirtveggja börðust af mestu hreysti, en liðsmunur var helzt til mikill. Þó ætla menn, að Levenhaupt hefði unnið sigur, ef Pétur hefði eigi sjálfur verið í orustunni og eggjað menn sína á allar lundir; en þeim stóð meiri ógn af honum en nokkrum öðrum manni. Ef það bar við um daginn meðan orustan stóð, að einhver herflokkur Rússa legði á flóttu, þá var Czarinn þar fyrir með marga menn, og lét skjóta hvern sem flýja vildi; þorðu þeir þá eigi að hyggja á flóttu. Um kvöldið þegar eigi var lengur vígljóst höfðu Svíar hvergi þokast af vígvellinum, og hvorugir höfðu unnið sigur, en Levenhaupt sá, að hann mundi eigi fá staðizt, ef hann berðist næsta dag, og einkum fyrir þá sök, að alt af bættust Rússum nýjar hersveitir og ópreyttar. Tekur hann því það ráðs, að hann heldur af stað í náttmyrkrinu, en brennir allan farángurinn, nema það sem hann nauðsynlega þurfti með til fararinnar. Margir af Svíum urðu þá eftir við farángurinn og vildu eigi fara lengra, heldur gjöra sér til góða af því, sem hver gat náð meðan kostur var á. Daginn eftir komu Rússar og hjuggu þá fléstalla niður. Annar flokkur af Svíum, hér um bil 1500 manns, viltist um nóttina frá meginher Levenhaupt, og komst eftir margar þrautir norður aptur til Ríga. En það er frá Levenhaupt að segja, að hann heldur áfram og verður þá bráðum fyrir honum fljót eitt, er Soza heitir; komst hann á einhverjum stað yfir það, og kannaði þar liðið. Taldist þá svo til, að í orustunni við Lisna hefðu fallið 1600 manna, 1800 verið handteknir, og 1500 vilzt frá liðinu; voru þá enn eftir undir merkjunum Levenhauptes her um bil sex þúsundir vígra manna. Eigi vita menn glögt, hve margt manna féll af Rússum, en svo hafa Svíar sagt, að það muni hafa fallið um 6000, eða vel það. Péttri Czar fanst svo mikið um orustuna og sigurinn við Lisna, að

hann kvað hann undirrót og aðaltíldrög til sigursins við Púltava. og svo sagði hann, að orustan við Púltava hefði verið leikur einn og barnagaman í samanburði við orustuna við Lisna. Eptir tíðindi þau, er nú voru sögð, fór Levenhaupt leiðar sinnar og náði loks að sameinast meginhernum 11. október. Tók konungur Levenhaupt að vísu allvel, en lét sér þó fátt um finast, að hann hefði hörfað undan og brent farángurinn. Nú var eigi um annað að gjöra, úr því sem komið var, en að halda lengra suður í land til móts við Mazeppu, því að hann hafði heitið konungi, að sjá honum fyrir nægum vistum, láta hann fá hinar sterkustu kastalaborgir í ríki sínu, og koma sjálfur til liðs við hann með 20—30 þúsundir manna. Í þessari von héldu Svíar suður eptir landi, jafnvel þótt mörgum hinum hygnari mönnum meðal þeirra litist eigi á blikuna, En nú kom það í ljós, eigi í einu heldur í öllu, að hamíngjan, sem áður hafði fylgt Karli tólfta nálega við hvert fótínál, var búin að snúa við honum bakinu, svo að allar vonir hans brugðust. Þegar hann kom í nánd við kastalaborgirnar, og hugðist að mæta þar vinum og bandamönnum, þá voru þar Rússar fyrir, og Svíar urðu þar frá að hverfa; þegar þangað var komið, sem ráð var fyrir gjört, að næga væru vistir handa Svíum, þá höfðu Rússar verið þar og eytt þeim öllum og brent bygdina. Mazeppa kom að vísu til Karls, en ekki með því fyrirheitna liði, heldur sem flóttamaður, því nær allslaus að kalla. Rússar höfðu komizt að allri fyrirætlun Mazeppu, og orðið skjótir til bragðs, og farið báli og brandi um þvert og endilángt Ukraine, svo að þar var lítið um björg eptir komu þeirra. Kósökkum hafði snúizt hugur, og höfðu þeir skilizt við Mazeppu og gengið flestir í lið með Rússum. Nú mátti heita fokið í flest skjól fyrir Svíum, þó létu þeir eigi hug fallast. En það var eigi þar með búið, að öll sú liðveizla var horfin, sem Svíar höfðu treyst, eða að minsta kosti konungur þeirra, þá er hann kæmi suður á Ukraine, heldur bættist þar á ofan, að veturinn 1708—1709 var einhver hinn harðasti sem nokkru sinni hefir komið yfir Norðurálfuna. Þann vetur lagði eigi einungis ísa á allt Eystrasalt landa í millum, heldur jafnvel á vötn og ár suður í löndum, t. a. m. á Portúgal og á Ítalíu; menn og skepnur frusu til dauðs víða í löndum. Það lætur að líkindum, hvernig þá hafi víðrað austur á Rússlandi, þar sem Svíar voru nú staddir. Þó

var það sök sér, ef þeir hefðu haft viðunanlegt húsaskjól, hlýjan klæðnað og nógar vistir; en á öllu þessu var hinn mesti skortur; húsin höfðu Rússar lagt í eyði; vistir og klæðnaður fórust, þegar Levenhaupt varð að brenna farángur sinn eptir bardagann við Lisna. Á öllum þeim skorti varð nú lítil eða engin bót ráðin. Svíar urðu marga nótt að vera undir berum himni; kól þá fjölda liðsmanna til stórskemda, og það er sagt, að eina nótt hafi um 4000 manna dáið af kulda. Hér við bættist og það, að Rússar voru í nágrenninu og gjörðu Svíum einatt árásir, en stundum réðu Svíar á þá; varð þá einatt allmikið mannfall. En þó Rússar féllu gætti þess eigi, því að nóg var jafnan til í skarðið, en Svíum bættist engi maður í stað hinna sem féllu. Þannig týndu liðsmenn Karls tölunni með ýmsu móti, svo að um vorið, þegar veður tók að batna, og konungur hugði til nýrra starfa, þá voru menn hans einar 20 þúsundir, og þó eigi allir vopnfærir, í stað þess, að þeir höfðu verið um eða yfir 30,000 haustið áður, þá er hann kom fyrst suður á Ukraine. Fallbyssur Svía voru eigi orðnar eptir nema 30, því að þeir höfðu eigi getað haft þær meðferðis, sem þýngstar voru, sökum vegleysu og snjóá, og víða mist þær ofan í fen og forð, og orðið að láta þær þar eptir; þúður var heldur eigi nægilegt, og því síður gott, af því það hafði margvöknað á leiðinni.

Þegar nokkuð dregur suður á Ukraine breytir Dniepr stefnunni og rennur lengi eptir það í suðaustur. Á þeirri leið kemur þverá ein að norðan, er Psiol heitir, og fellur suður í Dniepr. Nokkru austar, eður sem svarar stuttri dagleið, rennur önnur á suður í Dniepr allmikil og heitir *Vorskla*. Við hana stendur á vestari bakkanum borg sú, er *Púltava* heitir. Það var allstór borg og víggirt, og höfðu Rússar þar setulið og öruggar varnir. Frá Púltava suður að Dniepr er tæp tveggja daga leið. Borg þessi var einhver hin helzta í öllum nálægum sveitum, og henni vildi Karl konungur ná, og fyrir því heldur hann þángað og sezt um borgina. Gjörðu Svíar margar tilraunir til að taka hana, en fengu eigi að gjört. Rússar þokuðust nær og nær og voru um 80000 manna með 130 til 150 fallbyssur; var Pétur Czar sjálfur fyrir hernum og hershöfðingjar hans hinir helztu, þar á meðal Mensikov og Scheremetjev. Meðan Svíar sátu um borgina, áttu þeir ýms vopnaviðskipti við Rússa, og vildu fá þá til orustu við

sig, en Pétur vildi það eigi, því að hann vissi sem var, að alt af mundi því meir þrengja að Svíum sem þeir væru þar lengur, og því auðveldara mundi sér veita að vinna sigur á þeim. Höfðu Rússar hlaðið sterkar víggirðingar um herbúðir sínar á eystri bakka Vorsklu, og skutu þaðan á Svía, er þeir komu í skotmál. Þá var það einhverju sinni, að Karl konungur var skotinn í fótinn; var það mikið sár og ilt, svo að menn hugðu, að taka þyrfti af honum fótinn, en Karl brá sér lítið við það og var hinn kátasti; þó varð hann að halda kyrru fyrir nokkra daga, og lét þá lesa sér til dægrastyttingar ýmsar sögur, þar á meðal söguna af Hrólfi Gautrekssyni; að henni þótti honum hin bezta skemtun.

Nú voru Svíar komnir að þrotum með vistir, og eigi annað til fæðis en hrossakjöt og slæmt brauð; sólarhitinn gjörðist mikill og spilti sárum manna. Vildu þá margir, að hætt væri umsátinni og haldið á burt og norður og upp með Dniepr, og beðið þar liðsafla frá Svíþjóð eða Póllandi, en konungur setti þar þvert nei fyrir. Var þá engi annar kostur en að berjast við Rússa, þó liðsmunur væri helzt til mikill. Levenhaupt gaf það ráð, að hætt væri umsát og aðsókn að Púltava, til þess að öllu liðinu yrði varið til orustu móti Rússum, en konungur vildi eigi þekkjast ráðið, því að hann vildi hvorttveggja, bæði ná Púltava og berjast við Rússa. Urðu því hér um bil 2000 manna eptir í umsátinni hjá borginni; rúmar 2000 til varnar hjá farángri Svía, og um 1200 fyrir sunnan Púltava niður með Vorskla til þess að varna Rússum að ganga þann veg að baki Svíum; hafði því Karl eigi nema rúmar 12000 Svía á að skipa til orustunnar, og þar að auki nokkur hundruð manna, er komið höfðu til liðs við hann með Mazeppu sunnan úr landi.

Að lokinni kvöldbæn 27. dag júnímánaðar kvaddi Karl konungur alla hershöfðingja sína til fundar, og segir þeim sína fyrirætlan, að nú vill hann berjast daginn eptir. Er nú ráð fyrir gjört, hvernig atlögunni skuli til haga, og Rehnskjöld falið yfirstjórn alls á hendur, því að konungurinn var enn eigi heill orðinn af sári því, er hann hafði fengið, og gat hvorki gengið eða riðið. Dagana þar á undan höfðu Rússar farið vestur yfir Vorskla, og setzt að á völlum fyrir norðan Púltava, og hlaðið þar sterka

skotgarða fyrir framan sig; höfðu Svíar reynt að varna þeim þess, en eigi getað sökum mannfæðar.

Áður en lýsti af degi (28. júní) vopnuðust Svíar og höldu norður á völlum móti Rússum. Levenhaupt var fyrir miðjum hernum og stýrði fótgönguliðinu; Creutz hershöfðingi fyrir hinum vinstra fylkingararmi, og var þar skipað riddaraliði. Þar var Rehnskjöld og konungur og lét hann bera sig á börum meðal fylkinganna. Í hægra fylkingararmi voru og riddarar, og fyrir þeim hershöfðingi sá er Schlippenbakk hét. En fyrir framan meginherinn stóðu þeir Axel Sparre og Gustav Roos með nokkrar sveitir manna; var þeim ætlað að gjöra áhlaup á skotgarða Rússa og ná þeim. Þessu næst tókst orustan. Gjörðu þeir Sparre og Ross með sína menn hið harðasta áhlaup á skotgarðana, og fékk Sparre tekið nokkra þeirra, og féllu þeir eða flýðu, er þar stóðu fyrir. En það er að segja frá Roos, að þar sem hann sótti fram, var landslagið ógreiðara til framgöngu; gat hann því eigi komið sér svo við, sem þörf var á, eða sveitir hans orðið svo samtaka sem skyldi. Rússar stóðust áhlaup það, er hann gjörði, og varð þar hörð hríð og löng. En á meðan sóttu Svíar fram til beggja handa; varð Roos þannig viðskila við meginherinn, og einn síns liðs með sína menn. Pétur Czar fékk séð það, og sendir Mensikov þegar með 10 þúsundir manna í móti þeim Roos. Hann sá þegar hvað verða vildi, sendir til konungs og beiðist hjálpar; en sú hjálp kom eigi. Gat því Mensikov, með því ofurefli liðs, er hann hafði, umkringt Roos og felt eða handtekið flesta af hans mönnum, því að flýja vildu þeir ekki, þótt dauðinn væri vís. Að Roos og hans mönnum kom eigi sú hjálp, er hann bað um, segja menn hafi verið því að kenna, að þegar Rússar hrukku fyrir Sparre, þá hafi Píper gefið konungi það ráð, að senda þángað lið og reka flóttann af alefli; því ráði hlýddi konungur, og sendir Creutz fram með því riddaraliði er hann hafði. Creutz var ágætur fyrirliði og hinn mesti kappi, og hafði margt afreksverk unnið, þó eigi verði hér frá þeim sagt. Hann sækir fram með riddaraliðið og berst af mikilli hreysti, og er svo sagt, að hann hafði því nær keyrt Rússa út í Vorskla, en þá komu honum þau boð, að hætta við svo bú-ið og halda lítið eitt til hliðar og nema þar staðar. Þessu boði

varð Creutz að hlýða, en Rússar stöðvuðu flóttann og fylktu liðinu af nýju.

Í öðrum stað sótti Levenhaupt fram og meiri hluti fótgönguliðsins, og þó hann skorti fallbyssur og púður, fékk hann þó tekið nokkra af skotgörðum Rússa og vanst honum allvel á, enda voru Rússar farnir að sjá sitt óvænna. En í þeirri svipan kom einnig sú skipan til hans, að stöðva framsókn sinna manna, en í þess stað að halda liðinu þangað, er Creutz var kominn, og fylkja því þar að nýju móti Rússum. Þessu hlýddi Levenhaupt þegar í stað. Skipanir þær, er nú voru nefndar, komu engar frá Rehnskjöld, sem þó hafði yfirstjórn hersins á hendi þenna dag, og kunni án alls efa vel með að fara, heldur komu þær frá konungi sjálfum. Varð Rehnskjöld bæði hryggur og reiður, er hann sá hvað gjört var, og veitti konungi átölur. En hér varð eigi bót á ráðin. Hins vegar kom Rússum þetta að hinu mesta liði, því að þegar þeir sáu, að Svíar hættu aðsókn, og að sjálfum þeim gafst það ráðrúm, er þeir svo stórlega við þurftu, þá óx þeim bæði hugur og dugur. Fylktu þeir nú liðinu að nýju, og Czarinn eggjaði sína menn til drengilegrar framgöngu, því að hér var um það að tefla, hvor þeirra Karls skyldi yfirráð hafa á Norðurlöndum.

Nú varð þannig nokkurt blè á orustunni. Hvorirtveggja stóðu vígbúnir, en mjög var hér ójafnt á komið með mönnum. Fótgöngulið Svía, sem Levenhaupt stýrði, var nú eigi orðið nema fjórar þúsundir, en fótgöngulið Rússa þrjátígi og tvær þúsundir; þar að auki höfðu Rússar 100 fallbyssur, og alt var hjá þeim í góðu lagi. En Svíar voru þreyttir og margþjáðir af vökum og húngri og vosbúð; þeir höfðu engar fallbyssur, og líttnýtt púður í handbyssur sínar; þeir höfðu eigi öðrum vopnum að treysta en sverðum sínum, og voru daprir í huga. Og Levenhaupt þótti sér ógagn gjört með því, að riddaraliðinu öllu var nú fylkt að baki fótgönguliðsins, þar sem annars var vant, að skipa því til bliðar og hlífðar við fótgönguliðið.

Um morguninn, meðan orustan stóð, hafði konungur látið bera sig um fylkingar og eggjað sína menn til framgöngu. Nokkrir af mönnum þeim, er skiptust til að bera konunginn, voru nú fallnir og börurnar brotnar og bilaðar af skothríðinni. Meðan blè varð á orustunni var gjört við þær sem varð, og fótsári konungs veitt-

ar umbúðir. Því næst lét hann bera sig aptur til sinna manna, og bauð þeim veita Rússum atgöngu í annað sinn. Rehnskjóld reið um fylkingar og kom að þar er Levenhaupt stóð; höfðu fáleikar verið með þeim um hríð, en nú mælti Rehnskjóld: „lát-um okkur vera bræður og vini frá þessari stundu.“ „Svo skal og vera, mælti Levenhaupt, „en skal eg nú þegar gjöra Rússum atgöngu?“ „Já, þegar í stað“, mælti Rehnskjóld. „Fram þá í drottins nafni“, svaraði Levenhaupt. Við það reið Rehnskjóld burt, en Levenhaupt skipar mönnum sínum til áhlaups. Ruddust Svíar þá fram sem harðast, en skothríðin skall yfir þá sem kolsvart el, og alt hvarf í sortann. Var sá atgángur bæði harður og langur. Mannfallið varð ógurlegt og einkum meðal Svíanna, því að margir voru þá um einn. Karl lét bera sig þángað sem mest var mannhættan; voru þá börurnar skotnar í sundur svo konungur féll til jarðar, en menn hans björguðu honum og fengu komið honum undan; af þeim 24 mönnum, sem næst fylgdu honum, voru allir fallnir nema þrír. Levenhaupt gjörði það sem gjört varð, en gat eigi við ráðið; margar hersveitir Svía höfðu mist alla fyrirliða sína; voru sumir fallnir, en sumir handteknir. Þegar af létti nokkuð reyknum og til varð sæð, var herinn kominn í marga riðla, og þannig var enn barizt nokkra stund. En þar kom að Svíar leituðu undan; voru nú fallnar af þeim hátt á þriðju þúsund manna, en tvær þúsundir handteknar. Rehnskjóld og á annað hundrað foríngja, æðri og lægri stéttar, tóku Rússar þar höndum, en Levenhaupt náðu þeir eigi í það sinni. Hann bar þar að, er konungur var. Konungur mælti: „hvað er nú til ráða?“ „Ekki annað, mælti Levenhaupt, en halda því liði sem eptir er til herbúða vorra“. Svo var nú gjört; fylgdu Rússar að sönnu á eptir, en veittu þó ekki harða eptirför, því að bæði voru þeir þreyttir eptir orustuna, enda getur og verið, að þeir hafi óttast einhvern bakskell af Svíum. Þegar komið var til herbúðanna, og Karl gat haft tal af mönnum sínum, frétti hann fyrst, að Rehnskjóld, Piper ráðgjafi, og margir af helztu foríngjum liðsins höfðu verið handteknir af Rússum. Það þótti honum verra en þó Tyrkir hefðu tekið þá. En nú var svo komið, sem komið var, og eigi til setunnar boðið. Gaf Levenhaupt það ráð, að eyða því af farángrinum sem þýngst var í vöfum, en setja hesta alla, sem ferðafærir voru, undir liðsmenn, hafa það

með af vistum og vopnum, sem fært væri að flytja, og halda af stað. Á það vildi konungur eigi fallast, en þar kom þó, að hann sá eigi annað fært en fylgja ráðum Levenhaupts. Lögðu Svíar upp þegar um nottina, ofan með Vorskla og stefndu suður að Dniepr. Voru Svíar mjög þrekaðir eptir þenna ósigur og daprir í huga, margir mjög sárir, aðhjúkrun og aðbúnaður lítill og illur, fallbyssur því nær engar, og þúður að mestu þrotið. Þannig komst herinn suður að Dniepr 30. júní, á áliðnum degi; en menn voru litlu bættari fyrir þetta, því að fljótið er þar svo mikið — hér um bil fjórðungur viku á breidd — að eigi varð yfir það komizt nema á bátum, en til þess voru nú engin efni né áhöld. Svo er að sjá, sem Karl tólsti hafi eigi búizt við ósigri, því að hann hafði enga fyrirbyggju fyrir því haft, að ferjur eða önnur tæki væru fyrir hendi til þess að komast yfir fljótið, ef á þyrfti að halda. En Pétur Czar hafði hins vegar séð það fyrir, sem nú var fram komið, og fyrir því hafði hann, nokkrum dögum áður orustan varð, látið brenna öll þorp og öll hús upp og niður með Dniepr, til þess að Svíar gætu eigi þaðan haft við, er bjargast yrði á yfir fljótið. Hér voru Svíar þannig komnir í eins konar kvíar, þar sem sín stóráin (Vorskla og Psiol) var til hvorrar handar, en hin þriðja og lánngmesta (Dniepr) framundan þeim. Var því fyrirsjáanlegt, að þeir mundu eigi þaðan komast, heldur annaðhvort verða handteknir af Rússum, eða höggðir niður sem hráviði. Þetta sáu og þeir af Svíum, sem hyggðari voru, en konungur vildi eigi annað heyra, en að þeir gætu varizt Rússum eptir sem áður. «Þegar liðsmenn sjá mig í broddi fylkingar — sagði hann — munu þeir berjast af sömu hreysti sem áður». Menn báðu konung forða sér, hvað sem hernum liði, en hann var lengi tregur til þess. Þó lét hann um síðir til leiðast að skiljast við herinn. Gjöfðu menn sér fleka af viðum þeim, er til fengust, og þannig hélt konungur yfir Dniepr og nokkur hundruð manna með honum, enda mátti það eigi lengur dragast, því að Rússar komu þá að með miklu liði og vel búnn. Og þar eð Svíar voru svo á sig komnir, sem sagt hefir verið, sá Levenhaupt, er konungur hafði sett yfir herinn, eigi annað ráð vænna, en að gefast upp, og ganga á vald Rússum með öllu því liði, er honum fylgdi. Voru það að tölum hér um bil 12 til 14 þúsundir manna, þótt eigi væru

allir vopnfærir, og þar á meðal 900 foríngja og yfirmanna æðri og lægri stéttar. Þessi varð endirinn á herferð Karls tólfta suður á Ukraine og afleiðing orustunnar við Púltava. Allur hinn mikli, hrausti og sigursæli her mátti heita annaðhvort fallinn eða kominn í hendur Rússum, og yfirráðum Svía á Norðurlöndum lokið. Það voru því sannmæli, er Pétur Czar sagði eptir þenna mikla sigur, er hann nú hafði fengið: «nú situr Pétursborg ómakslaus upp frá þessu». Þessu næst hélt Pétur Czar austur í land og flutti með sér hertekna menn, margar þúsundir, og dreifði þeim víðs vegar um land og borgir; létust þá margir af þeim bæði af sárum og illri meðferð; margir lifðu af og staðnæmdust á Rússlandi, en nokkur hundruð manna komust heim aptur til Svíþjóðar mörgum árum seinna en hér var komið.

En það er að segja frá Karli tólfta og þeim mönnum, er honum fylgdu, að þeir héldu undan sem mest máttu suður og vestur í land, og komu að viku liðinni að fljóti því, er *Bug* heitir. Rússneskir herflokkar voru sendir á eptir þeim, og náðu Svíum við fljótið, og tóku þar margt manna, en konungur og hér um bil 500 manns gátu forðað sér og komizt yfir Bug. Sneru Rússar þar aptur, en Svíar stefndu suður á Tyrkland til borgar þeirrar, er *Bender* heitir. Hún stendur á vestari haka Dniesterfljóts, og höfðu Tyrkir þar setulið. Þá ræð fyrir Tyrklandi *Achmet* soldán hinn þriðji (1702—1730). Og sem hann fréttir, að Karl Svíakonungur er kominn, og hefir leitað þangað ásjár, lætur hann taka honum með miklum virktum, eins og jafnfrægum konungi sæmdi. Var honum boðið að setjast að í borginni, en Karl vildi eigi þekkjast það, og setti herbúðir sínar í nánd við Bender og bjóst þar um.

Nú mundi margur ætla, að Karl tólfti hefði eigi dvalið langvistum á Tyrklandi, en haldið heim aptur í ríki sitt, og það því fremur, sem þar fór margt í ólagi, og menn þráðu þar heimkomu hans eptir svo lánga burtuveru, en hins vegar ýmsir þjóðhöfðingjar, er eggjuðu hann til heimferðar, og soldán bauð honum bæði fé og menn til fylgdar; en Karl setti þar þvert nei fyrir. Hann vildi eigi heim koma fyr en hann hefði hefnt sín á Rússum, og fyrir því reyndi hann á allar lundir, að fá Tyrki til að gjöra samband við sig og segja Rússum stríð á hendur. Var soldán lengi tregur til þess, en Karl hætta eigi fyr en hann

fékk sínum vilja fram komið. Þjuggu nú hvorirtveggja lið sitt, Rússar og Tyrkir, og héldu af stað á öndverðu vori 1711. Yfirforingi Tyrkja hét *Mehemet Baltadschi*; hann var æðsti ráðgjafi soldáns (stórvezír), ítalskur að ætt og enginn garpur, en af orðum hans má ráða, að hann hafi talið sér sigurinn vísan: «eg tek sverðið í hægri hönd — sagði hann — og Svíakonung í hina vinstri, og svo skal eg með 100,000 manns ryðja honum braut hvert sem hann vill fara». Með þessu liði leggur Mehemet af stað frá Konstantínópel norður yfir Balkanfjöll. En í annan stað komu Tartarar með óflýjanda her austan frá Svartahafi til liðs við Tyrki. Pétur Czar hafði og mikið lið og heldur því til móts við þá. Jarlar Soldáns, í Moldau og Valachíi, voru ótryggir, og hétu Pètri liðveizlu þá er hann kæmi í þeirra lönd. Þess vegna hélt hann viðstöðulaust alla leið vestur yfir Pruthfljót. En er þangað var komið, þorðu jarlarnir eigi að efna orð sín við hann af ótta fyrir Tyrkjum, sem þá voru komnir í landið með óvígna her; og áður en Rússa varði, höfðu Tyrkir og Tartarar umkringt þá svo gjörsamlega, að þar var ekki undanfæri. Var nú Pétur Czar kominn með allan sinn her í engu betri kvíar við Pruth, en Levenhaupt við Dniepr tveimur árum áður. Víggróingar höfðu Rússar engar, vistir voru á þrotum, hestar hrundu niður af húngri, og liðsmenn sýktust þúsundum saman. Nú sá Pétur sitt óvænna og mælti: «mér hefir orðið alt hið sama á sem Karli bróður mínum. Eg hef hætt mér of langt inn í lönd fjandmanna minna, og hugsað of lítið um vistir handa liði mínu». Honum kom ýmist til hugar, að leynast á burt frá hernum og leita undan til Rússlands, eða freista með hinum hraustustu af riddaraliðinu, að brjótast í gegnum fylkingar Tyrkja. En hann hvarf jafnskjótt aptur frá þeirri fyrirætlan, byrgði sig inni í tjaldi sínu og leyfði engum manni til sín að koma. Þar var í liði með honum *Katrín* drottning hans¹. Hún gaf það

1) Það er sagt, að Katrín væri bóndadóttir annaðhvort frá Lithauen eða Liflandi, og gipt á unga aldri sænskum hermanni í Marienburg á Liflandi. Árið 1702 unnu Rússar Marienburg og tóku Katrínu; Menzikow leizt vel á hana og tók hana til sín. Þar sá Pétur Czar hana, og með því hún «þóknaðist hans augum», varð Menzikow að sleppa henni við Czarinn. Pétur hafði áður verið kvæntur Evdoxiu, en rekið hana frá sér og sett í klaustur. Árið 1707 kvæntist hann Katrínu. Þeirra dóttir var

ráð, að safna svo miklu sem yrði af gulli og gimsteinum, senda það vezírnum og æðstu höfðingjum Tyrkjahersins, og reyna þannig að kaupa sér frið og frelsi. Á þetta ráð féllust hershöfðingjar Czarsins, en eftir var að fá samþykki hans til þessa. Katrín tókst það á hendur, og fékk komið svo orðum sínum, að Pétur ritaði vezírnum og beiddi hann í auðmjúkum orðum, að veita sér vopnablæ um nokkrar stundir. En á meðan það stóð, lögðu Rússar fram það þeir höfðu af dýrgripum, varð það svo mikið fè, að nema mundi 200 þúsundum dúkata, og sendu síðan Tyrkjum. Vezírin var enginn vinur Karls tólfta, tók í móti fènu, og gjörði svo feldan samning við Pétur Czar: Rússar skyldu flytja her sinn burt af Póllandi, Tyrkir fá aptur Asow og löndin þar umhverfis, Kósakkar hafa fult frelsi fyrir sín lönd, rússneski herinn og Svíakonungur halda burt af Tyrklandi í friði, hver til síns heima. Karl tólfti var eigi við Tyrkjaherinn; en sem hann fréttir, að Rússar eru komnir í herkvíar við Prúth, fer hann af stað og ríður bæði nótt og dag, og kemur að Prúth litlu áður en Rússar færu þaðan. Segja sumir, að Karl biði eigi ferjunnar, en sundriði fljótið þar sem hann kom að því. Því næst hittir konungur Mehemet vezír að máli, og segir: «hér er saman komið mikið lið og frítt». Vezírin: «guð hefir veitt mér það». Konungur: «það er skaði, að því er ekki betur stýrt». Vezírin: «nú þarf eigi fremur á því að halda, ófriðnum er lokið milli ríkjanna». Konungur: «já, mér er sagt, að þú hafir samið frið, en jafnframt, að þú hafir lítið skeytt um mitt gagn, og þó hafðir bæði þú og þinn herra heitið mér því». Vezírin: «eg hef unnið svo mikið á fyrir fósturjörð mína, að eg læt mér það nægja». Konungur: «þú gæzt áunnið miklu meira, því að þú hafðir Czarinn og allan hans her í hendi þér». Vezírin: «það er gagnstætt Múhamedslögum, að synja fjandmanni griða, er hann beiðist þeirra, og ef eg hefði tekið Czarinn höndum, hver átti þá að stýra ríki hans»? Konungur: «um það þurftir þú ekki að hugsa; en hyggur þú að soldán, herra þinn, láti sér lynda þenna frið»? Vezírin: «eg ræð því, að semja frið, eins og mér bezt líkar». Konungur: «enn er tími til, að ráða bót á yfirsjón þinni og viðrætta minn hluta; láttu mig einungis ráða;

Elisabet Rússadrottning (1741—1762). Katrín var vel viti horin, og kunni allra manna bezt lag á Péttri þegar ofsinn hljóp í hann.

eg skal ábyrgjast alt við soldán, og þú skalt engan mann þurfa að ljá mér; eg veit vel, hvar eg skal finna þá menn, er mér vilja fylgja. Vezírinn: «nei, það er nú um seinan, og skal nú standa við þá gjörð, sem eg hefi gjört». Síðan skildu þeir. Sumir segja, að Karl hafi með reiðspora sínum rifð kápu vezírsins í skaut niður, reitt að honum hnefann og ætlað að berja hann o. s. frv., en engin sannindi eru fyrir því. Rússar héldu því næst af stað heim í leið, en Karl til Bender, og sá engi maður á honum eða heyrði, hvorki gleði, er hann frétti ófarir Rússa, eða ógleði, er þeir gengu honum þannig úr greipum.

Karl hélt hinu sama fram sem áður, að eggja Tyrki til ófriðar gegn Rússum. Stundum vanst honum nokkuð á, og því fékk hann komið til leiðar, að Mehemet vezír var settur frá völdum, en stundum vildi soldán eigi heyra ófrið nefndan. Og nú kom þar, að Tyrkjum leiddist þraseta Karls þar í landi. Lét soldán konung vita, að hann hefði sýnt honum alla þá gestrisni og alla þá hjálp, er skyldan byði sér — enda hafði Karl þegið af honum stórfé öll þessi ár — og nú yrði hann að fara þaðan af landi burt. En Karl sat kyr sem áður, þangað til soldán bauð mönnum sínum að reka hann burt. Karl bjóst til varnar, þótt hann hefði eigi nema nokkrum tigum manna á að skipa, og hús hans eigi ramleg. Hinn fyrsta dag febrúarmán. 1713 komu Tyrkir og Tartarar, hér um bil 8 þúsundir manna, sóttu að húsunum og gjörðu harða hrið. Konungur og menn hans vörðust af dæmafarri hreysti; gekk svo lengi dags, að Tyrkir unnu ekki á, þar til um síðir, að þeir skutu eldum á húsin. En er húsin tóku mjög að brenna, leitaði konungur og menn hans útgöngu; bar þá svo til, að reiðsporar hans kræktust saman; féll hann við og varð handtekinn, en menn hans gáfu jafnskjótt upp vörnina; tóku Tyrkir þá alla höndum. Það segja sumir, að í viðureign þessari hafi fallið 200 Tyrkir og Tartarar, en eigi nema 15 af Svíum¹. Því næst var konungur fluttur langt suður í land til borgar þeirrar, er Demotika heitir, og fengin þar höll ein til íbúðar. Það er skamt frá Adrianópel. Þar sat hann á annað ár, þar til um haustið 1714, að hann um síðir, fyrir bænastað sinna manna og fyrir þá sök, að fjárefni hans voru að þrotum komin,

1) Aðrir segja, að þar hafi fallið 31 af Svíum, en rúm 400 manna af hinum er að sóttu.

fór af Tyrklandi. Lagði hann leið sína um Úngverjaland og Þýzkaland; fór þá bæði dag og nótt, svo að fáir sem engir gátu fylgt honum, og er svo sagt, að hann væri rúman hálfan mánuð á leiðinni sunnan af Tyrklandi norður til Stralsund við Eystrasalt. Sú borg var þá enn í höndum Svía.

Nú víkur sögunni heim til Svíþjóðar. Öll þau ár, sem Karl konungur var erlendis, máttu með sanni heita reynslutími þjóðarinnar. Áður en konungur fór af landi burt, hafði hann reyndar falið ráðherrunum innanlandsstjórn ríkisins á hendur. En sú stjórn var helzt til ónóg. Þó að sumir þeirra væru vitrir menn og dugandi, máttu þeir fæstum málum til fullnaðar ráða; en í þess stað urðu þau að koma til konungs úrskurðar, hvar sem hann var staddur. En hann var, eins og kunnugt er af því sem áður er sagt, í mikilli fjarlægð, lengstum á Póllandi eða Tyrklandi. Varð því hinn mesti dráttur á öllum þjóðmálefnum Svía, til mikils skaða fyrir land og lýð; þar við bættist og, að konungur, sem var ungur er hann fór af landi burt, þekti hvergi nærri eins vel og þurfti málefni ríkisins og þarfir þjóðarinnar, og skeytti þeim miklu minna en vera skyldi, því að allur hans hugur var á hernaði, og einkum því atriði, að bægja Ágúst öðrum fyrir fult og alt frá konungdómi á Póllandi. Á hverju ári krafðist konungur bæði manna og fjár af Svíþjóð í stað þess er féll og eyddist í hinum lángvinna ófriði. Slíkar kvaðir voru þýngri en þjóðin gæti undir risið, og það því fremur, sem ýms óáran gekk yfir Svíþjóð um þessar mundir. Landið var sumstaðar orðið svo mannfátt af karlmannafólki, að eigi var öðrum á að skipa en afgangnum körlum eða ungum sveinum. Víða urðu prestar sjálfir að ganga að allri vinnu, eins og bændur, því að húskarlar þeirra voru teknir til herþjónustu. Öll atvinna, hverju nafni sem hét, leið óbætanlegt tjón, og efni landsmanna þverruðu ár frá ári. En þó bæði ráðherrar og ýmsir aðrir tjáðu konungi frá þeim vandræðum, lagði hann lítinn trúnað á það, og fór sínu fram, hvað sem hver sagði.

Nágrönnnum Svía var eigi ókunnugt um allt þetta. Ágúst annar og Friðrik fjórði vildu hefna sín á Karli tólfta, og biðu þess að færi gæfist. Pétur Czar lét eigi sitt eptir liggja að blása að þeim kolum, og jafnskjótt sem ófarir Svía við Púltava bárust til Norðurlanda, sömdu þeir Friðrik og Ágúst með sér, að hefja

ófrið af nýju gegn Svíum, þrátt fyrir friðarsamningana í Traven-dal og Altranstadt, sem fyr eru nefndir. Ágúst réð þegar á Pólland; Rússar komu þar til liðs við hann; Pólverjar sögðu skilið við Stanislás, og gengu hópum saman undir merki Ágústs; varð Stanislás að flýja landið og leita hælís hjá Svíum. Á önd-verðu ári 1710 voru allir sænskir hermenn hrokknir burt af Póllandi og komnir vestur á Pommern, og sama árið lögðu Rússar til fulls undir sig Lifland, Estland og nokkurn hluta af Finnlandi. Þannig mistu Svíar á stuttum tíma meiri hluta þeirra landa, er þeir höfðu lengi átt fyrir austan haf.

Um haustið 1709 héldu Danir liði sínu yfir á Skán og gengu á land hjá Helsíngjaborg. Yfirforingi Dana hét Reventlov. Svíar gátu eigi varið þeim landgöngu, en hér var þó manni að mæta þar sem Magnús Stenbökk var. Hann hafði, eins og áður er sagt, fengið orlof af Karli konungi að fara af Póllandi heim til Svíþjóðar, og hafði tekizt á hendur yfirstjórn á Skáni; lofuðu þar allir haus dugnað og réttvísi. Áttu Svíar þá eigi vól á hershöfðingja, er betur væri fallinn en hann til að verja landið fyrir óvina árásum; enda sýndi það sig nú, því að ekki var lið til í landinu, svo teljandi væri, er vopnum var vant, og eigi öðrum á að skipa en bændum, lítt vopnuðum og illa búnum. Þó tókst Stenbökk að safna saman 14 þúsundum manna, en svo sagði hann: «Öll þau 26 ár, sem eg hefi verið í herþjónustu, hefi eg aldrei séð jafnilla búið lið sem það, er eg nú á að stýra og verja landið með, og þó má vera, að þessir í skinnþeisunum og vaðmálstreyjunum veiti eins þúng högg og hinir í herklæðunum». Danir höfðu 17 þúsundir manna, velbúna að vopnum og klæðum, og bjuggust að taka Karlskrónu, og eyða herskipum Svía, er þar voru, en Magnús Stenbökk hagaði svo ferðum sínum, að Dönum þótti ráðlegra að hverfa aptur og halda til Helsíngjaborgar, því að þar höfðu þeir góða fótfestu og allsterkar varnir. Reventlov, yfirforingi Dana, varð um það leyti veikur, og lagði niður herstjórn, en sá maður tók aptur við, er Jörgen Ranzau hét. Hann hafði verið með Marlborough, og fengið gott orð fyrir sína framgöngu. Það var síðustu dagana í febrúarmánuði 1710, að Danir héldu til Helsíngjaborgar og settust þar að. Svíar veittu þeim eptirför og komu þangað litlu síðar. Magnús Stenbökk fylkti liði sínu, og sagði fyrir

hversu haga skyldi atlögunni; reið hann um fylkingar og eggjaði menn sína til drengilegrar framgöngu. Sæi hann þá einhvern niðurlútan og daufan í bragði, tók hann undir höku þeim, hóf upp höfuðin og sagði: *«se ond ut, min gosse, så springer dansken för dig»!* (gjörðu þig illilegan á svipinn, drengur minn, þá flýja Danir fyrir þér). Þegar Danir sáu Svía nálgast, gengu þeir út úr herbúðum sínum í móti þeim, og segja menn, að Ranzau hefði gjört hyggilegar, ef hann hefði kyr verið þar sem hann var kominn, og látið víggirðingarnar geyma sín, en hina sækja þar á. En hann var maður framgjarn og þóttist hvergi varbúinn fyrir Svíum. Nú varð þar orusta hörð, og stóð lengi dags; lauk svo með þeim, að Svíar fengu sigur, en Danir flýðu undan til Helsíngjaborgar. Það var 10. marzmán., er þeir börðust. Að nokkrum dögum liðnum, héldu Danir aptur heim til sín og höfðu látið margt manna. Magnús Stenbökk varð mjög frægur af sigri þessum, og kölluðu Svíar hann bjargvætt þjóðarinnar, og var það sannmæli. Það var líkast því þegar Karl ellefti rak Dani af höndum sér 1676, en sá var þó munurinn, að Karl hafði liðsafla betur búinn og vanari orustum en þann, er Magnús Stenbökk hafði.

Menn muna, af því sem áður er sagt, að um þessar mundir stóð annar ófriður, mikill og mannskæður, suður og vestur í löndum, þar sem Englendingar, Niðurlendingar og Austurríkismenn börðust við Frakka. Eldurinn var uppi bæði suður og norður í álfu vorri. Þýzkaland var eins og á milli tveggja elda. En sögurnar sýna, að þegar ófriður hefir verið fyrir norðan Mundiafjöll, þá hefir Þýzkaland sjaldan farið varhluta af honum. Það mátti og við því búast á hverri stundu, að ófriðurinn mundi berast þangað inn yfir landamerkin. En til þess að afstýra því, að svo yrði, lögðu Þjóðverjar á það alt kapp, að lönd þeirra mættu blutlaus vera og laus við allan ófrið. Svíar áttu þá lönd á Þýzkalandi: Pommern, Vismar og Bremen; til þeirra skyldi einnig friðurinn ná. Þeir menn, sem hér áttu mestan blut að máli með Þjóðverjum (Englendingar, Niðurlendingar og Austurríkismenn) vildu ekki, að Svíar skyldu missa sín þýzku lönd; heldur ekki, að Danir skyldu missa Slesvík og Jótland, eða Ágúst annar Saxland. Þeir vildu, að fullur friður gæti komið á norður í álfunni, og því næst vildu þeir fá liðsafla, eins og fyrr-

um, af Danmörku og Svíþjóð móti Loðvíki fjórtánda. Englendir og Hollendingar báru þessar tillögur sínar undir Dani og Rússa, og þó þeim væri það í fyrstu eigi ljúft, gengu þeir þó að þeim. Þegar til Svíanna kom, voru ráðherrarnir í óvissu, hvort óhætt mundi að fallast á tillögurnar, nema konungur væri að spurður, en hins vegar sáu þeir, að þetta var hið mesta nauðsýnjamál, og, að það var hið mesta gagn fyrir land og lýð, að geta verið ugglaus um hin þýzku fylki (Pommern, Vismar og Bremen), og snúið ódeildu afli móti Rússum eystra og Dönum heima, og það því heldur, sem Danir einmitt um það leyti (1709) gjörðu landgöngu á Skáni, eins og áður var sagt, og mörg önnur vandræði kreptu þá að Svíum. Þeir tveir af ráðherrunum sænsku, sem einna mest kvað þá að, *Fabian Wrede* og *Arvid Horn*, báðir hinir mestu merkismenn, komu því til leiðar, að ráðið varð þessu samþykkt. En sem Karl konungur þeirra fréttir þessar aðgjörðir ráðsins, þar sem hann sat suður í Bender, og hafði þá komið Tyrkjum í félag með sér móti Rússum, mislíkaði honum það stórum, og vildi ekki heyra þá griðsetningu nefnda; hann kvaðst vilja hafa lausar hendur fyrir lönd sín og liðsmenn, hvar sem væri. Hann hafði og um þær mundir lofað soldáni, að láta nokkrar þúsundir af sínum mönnum brjótast inn á Pólland, til þess að flæma Rússa þaðan. Og þegar menn vildu telja hann á, að dylja fyrirætlan sína fyrst um sinn, og ónýta ekki þá þegar aðgjörðir ráðherranna, mælti hann: «eg vil engan mann draga á talar, og eigi heldur heita því, sem eg ætla mér eigi að efna». Menn hans létu á sér skilja, að þeir, sem fyrir griðunum stóðu, mundu hafa liðsafnað norðan á Þýzkalandi og banna þar bæði honum og öðrum allar óeirðir, en Karl mælti: «ef vinir vorir vilja banna mér vopnaviðskipti við rángsnúna óvini, tel eg þá eigi framar með vinum mínum heldur með óvinum». Það er sagt, að þá er Eugen, prinzi af Savoyen, bærust þessi ummæli Karls, hafi hann sagt: *vana sine viribus ira*, (þ. e. reiðin er ónýt ef máttinn vantar). Afleiðingin af þessum gjörðum Karls var sú, að óvinir hans, Danir, Saxar og Rússar, herjuðu í Pommern (1711), og tóku Bremen (1712). Nú áttu Svíar um tvent að velja, missa lönd sín á Þýzkalandi, eða verja þau fyrir óvinum sínum. Þess vegna var Magnús Stenbökk sendur þangað suður, á áliðnu sumri 1712, með nokkrar

þúsundir manna. Danir gjörðu honum fyrirsát á hafinu, og náðu frá honum nokkrum byrðingum; var Svíum það hinn mesti skaði, því að þar mistu þeir bæði vistir og vopn. En liðinu fékk Magnús öllu á land komið, og mátti eigi seinna vera, því að komið var að því, að bandamenn (Danir, Rússar og Saxar) mundu sameina alt sitt lið, og var það margfalt meiri her, en Svíar höfðu. Magnús Stenbökk snerist fyrst móti Dönum, og varð fundur þeirra (20. des. 1712) við bæ þann í Meklenborg, er *Gadebusch* heitir. Þar fengu Svíar sigur, en Danir létu undan síga. Friðrik konungur var sjálfur í orustu þessari og gekk vel fram. Það er sagt, að Dönum hafi orðið það mest til ógagns, að Saxar voru í liði með þeim, og snerust á flóttu fyrir en aðrir og þá er sízt skyldi. En þó Magnús Stenbökk fengi sigur í orustu þessari, kom Svíum það að litlum notum; hann gat enga hjálp fengið frá Svíþjóð; bandamenn færðust nær og nær, og höfðu ógrynna liðs; hann varð því að halda undan og vestur á Holtsetaland. Á þeirri leið lögðu Svíar eld í Al-tóna, og brendu þá borg til ösku; fékk Magnús Stenbökk af hið mesta ámæli, því að borgin var varnarlaus fyrir. Eftir það höldu Svíar norður yfir Eider-fljót, og settust að í borg þeirri, er *Tönningen* heitir; hún var víggirt, og vörðust þeir þar nokkra stund. En er húngrið svarf að, varð Magnús Stenbökk að gefast upp með alla sína menn — hér um bil 11 þúsundir manna — og gánga á vald Dönum. Sat hann upp frá því í varðhaldi í Kaupmannahöfn, og dó þar 23. febr. 1717 rúmlega fimtugur að aldri. Um þessar mundir komust lönd hertogans af Holstein-Gottorp í hendur Friðriki fjórða Danakonungi, og þá kom það í ljós, að *Kristján Ágúst*, biskup af Lübeck (Lybika), forræðismaður og föðurbróðir Karls Friðriks¹ hins unga hertoga, hafði veitt Magnúsi Stenbökk og mönnum hans athvarf í Tönningen, þá er að þeim krepti, og þeir hörfuðu undan bandamanna-hernum.

Þegar Karl tólfsti kom til Stralsund, haustið 1714, eins og áður er sagt, varð hann þess vísari, að bæði Prússakonungur

1) Móðir Karls Friðriks var Hedevig Sofía, eldri systir Karls tólfta, en faðir hans var Friðrik hertogi, er féll í orustunni við Klissóv. Frá þessum Karli Friðriki, er átti Önnu dóttur Péturs Czars, eru Rússakeisarar komnir í beinan karlegg.

Friðrik Vilhjálmur 1. — er þar var kominn til ríkis (1713) eptir föður sinn *Friðrik fyrsta* —, og *Georg fyrsti*, Englands-konungur og kjörfursti af Hannóver, voru gengnir í lið með óvinum Svía. Prússakonungur hafði sezt í lönd þau, er Svíar áttu í Pommern, en Englakonungur keypt af Dönum hertogadæmin Bremen og Verden, er Danir unnu af Svíum. Þannig stóðu Rússar, Danir, Saxar, Prússar og Englendingar móti Karli einum og Svíum. Margir af hinum helztu hershöfðingjum Svía voru fallnir, en þeir þrír sem mest kvað að, sátu í varðhaldi hjá útlendum þjóðum: þeir Rehnskjöld og Levenhaupt austur á Rússlandi, en Magnús Stenbökk í Danmörku. Svíar voru að þrotum komnir bæði sökum mannfæðar og fjáreklu. Alt um það guggaði ekki hugur Karls tólfta; honum stóð á sama hvort margir eða fáir voru í móti; honum var um það eitt hugað, að berjast og vinna sigur, eða falla að öðrum kosti. En um hitt hugsaði hann alls eigi, hvort land og lýður gæti risið undir öllum þeim endalausá ófriði. Bandamenn urðu þess bráðum vísir, að Karl konungur var í Stralsund; settust þeir nú um borgina, og höfðu ógrynni liðs, og sóttu hana af miklum ákafa, en Svíar vörðust þar marga mánuði af dæmafárri hreysti. En er flest víg voru unnin og meiri hluti borgarinnar í rústum, þá hélt konungur þaðan einskipa, komst slysalaust fram hjá *Tordenskjöld*, hinum nafnfræga sjóforingja, er sat um hvert sænskt skip í Eyststrasalti, og tók land skamt frá Ýstað í Svíþjóð undir jól árið 1715; voru þá liðin 15 ár frá því, er hann fór úr landi. Nú mundu margir ætla, að Karl konungur hefði haldið til Stokkhólms, höfuðborgarinnar, kallað beztu menn þjóðarinnar til þings og ráðgast um við þá, hvað tiltækilegast væri, eptir því sem þá var komið mál-efnum Svía, og yfirráðum sjálfs hans. Men vita, af því sem þegar er sagt, að helmíngur ríkisins (þ. e. því nær öll lönd Svía fyrir austan og sunnan haf) var í hershöndum, og hinn helmíngurinn (þ. e. Svíþjóð sjálf) var margþjáður af fjárvöðum og manntjóni. En Karl tólfsti fór ekki að því; hann fór ekki til Stokkhólms, kvaddi ekki til þings, heldur lét fyrirberast í Ýstað og þar í grend, og hugsaði um það eitt, að safna fè og mönnum og fara í móti óvinum sínum sem allra fyrst. Danir voru næstir. Nú var vetur og Eyrarsund íslagt, meginher Dana suður við Stralsund og Vismar, en liðfátt heima fyrir á Sjálandi. Kon-

úngur safnaði öllu því liði, er hann gat fengið, og bjóst að fara vestur yfir sund og taka Kaupmannahöfn. En þá kom þeyr og leysti ís allan af sundinu, svo að sú ráðagjörð fórst fyrir. Karl lét eigi þar við sitja, en brauzt litlu síðar hinn sama vetur (1716), með nokkrar þúsundir manna til Norvegs og tók Kristjáníu, enda voru Norðmenn óviðbúnir. En brátt safnaðist þeim svo mikið lið, og veittu svo harða mótstöðu, að Svíar urðu að halda þaðan og suður á landamæri. Þar er bær sá, er Fredrikshald heitir, og örskamt þaðan kastali einn á háu bergi, og nefndur *Fredriksten*. Svíar tóku bæinn, en gátu þó eigi haldizt þar við nema stutta stund, því að Norðmenn eyddu honum bæði með skothríð frá kastalanum og á annan veg með eldi, er þeir lögðu í húsin. En fyrir því brendu Norðmenn bæinn, að þeir vildu eigi, að Svíar settust þar að í skjóli húsanna, og gætu svo í næði skotið á kastalann. Hér um bil 3 mílum sunnar en Fredrikshald skerst vogur einn inn í landið, er Dynekil heitir, þröngur en alldjúpur. Þar lágu byrðingar margir, er konungur hafði sent frá Gantaborg, og áttu að færa hernum vistir og ýms áhöld, en voru eigi lengra komnir norður, er Tordenskjöld kom. Nú vildi hann ná þessum skipum, en það var hin mesta hættla, því að Svíar höfðu sett virki á bæði lönd, og höfðu þar marga menn til varna, en vogurinn mjór, eins og fyr var sagt. En Tordenskjöld kunni eigi að hræðast; leggur á voginn og létir eigi fyr, en hann hefir brent sum skipin, en tekið sum, og mistu Svíar þar allan þann skipaflöta og alt sem á honum var. Eptir þann skaða varð Karl konungur að hætta umsátinni og halda suður á Svíþjóð. Það var nálægt miðju sumri 1716.

Um þessar mundir ræð sá maður mestu hjá Karli tólfta, er *Görtz* hét. Hann hafði áður verið ráðgjafi hertogans af Holstein-Gottorp, en var nú genginn í þjónustu Karls og í miklum metum hjá honum. Görtz var vel viti borinn, en mjög var hann grunaður um græzku; ekki var hann vinsæll af Svíum. Eins og vant var, hafði konungur mestan hug á hermálefnum, en hitt alt, sem innanlands stjórn snerti, átti Görtz að annast, og þar á meðal fjármálefni ríkisins. En að fá svo mikið fæ, sem þurfti til herþjónustunnar í Svíþjóð, eins og þar var þá ástatt, var enginn hægðarleikur. Þó tókst Görtz það fremur öllum vonum. En brátt sá hann, að öll þörf var á, að Svíar gerðu

þjóðir, er Svlar áttu í höggi við, sættust þeir einnig ári síðar
en Karl konungur fæll.



1870.

NÝJA SAGAN

HEFTIR

PÁL MELSTED.

GEFIN ÚT

AF

HINU ÍSLENZKA BÓKMENTAFÉLAGI.

III. HEFTI, I.

(1791—1799).

REYKJAVÍK.

Í PRENTSMÍÐJU ÍSLANDS. EINAR ÞÓRÐARSON.

1872.

Framhald annars kafla.

Yfirlit

yfir tímabilið frá dauða Loðvíks fjórtánda til stjórnarbyltingarinnar á Frakklandi (1715—1789).

Það er kunnugt, af því sem áður er sagt, að fyrstu árin fram-
an af átjándu öldinni var ófriður mikill í Norðurálfunni, bæði
suður og norður. Hið *spánenska erfðastríð* stóð suður og vestur
í löndum, milli Loðvíks fjórtánda og þeirra, er í móti honum
börðust. Það stríð endaði með friðnum í *Útrecht* 1713 og í
Rastadt 1714, litlu fyrir dauða Loðvíks fjórtánda (1715). Hið
norraena stríð, milli Karls tólfta og fjandmanna hans, gekk yfir
öll þau lönd, er liggja að Eystrasalti, og lyktaði eigi fyr, en
Karl konungur var fallinn (1718) og Svíar sömdu frið (árin 1719
—1721) við þjóðir þær, er þeir höfðu átt í höggi við. Eftir all-
an þann mikla ófriðarstorm var að mestu leyti kyrt með mönn-
um hin næstu 20 árin, eður fram að dauða Karls sjötta, Þýzka-
landskeisara (1740). Þó að einhversstaðar horfði til ófriðar,
leitust menn við að afstýra honum með sátt og samkomulagi,
eður eyða með skjótum samtökum, ef til vopna hafði komið;
einkum átti England góðan hlut að slíkum málum. En þó heita
megi, að almennur friður hældist, má samt fullyrða, að vart hafa
þjóðirnar öðru sinni verið í meiri niðurlægingu, eða fremur háð-
ar sínum yfirdrotnum en einmitt á því tímabili, er hér ræðir
um. Loðvík fjórtándi hafði viljað koma ættmönnum sínum
til ríkis á Spáni og varið til þess fæ og fjöri þegna sinna. En
þó honum tækist að koma sonarsyni sínum (Filippusi 5.) þar til
konungs tignar, brást þó hitt, er verið hafði mark og mið Loð-
víks: að sameina svo stjórnendur beggja þjóðanna, Frakka og
Spánverja, að þeir yrði fullkomnir bandamenn og fylgdist sem

einn maður að öllum allsherjarmálum. Í stað vinfengis og félagskapar óvingaðist svo mjög með þeim frændum, Filippusi Spánuar konungi og hertoganum af Orleans, bróðursyni Loðvíks fjórtánda og rikisstjóra Frakklands, að dregið hefði til fullkomins fjandskapar, ef Englendingar og fleiri þjóðir hefði eigi skorizt í leikinn og miðlað málum. Elísabet Spánardrottning vakti oftast en einu sinni ófrið á Ítalíu, til þess að synir hennar gæti komizt þar til þeirrar upphesðar, er henni þótti þeim samboðin.

Á Englandi var ný konungssætt komin til ríkis frá Hannóver; ríkið hafði aukizt við Útrechtar-friðinn, verzlunin fór sívaxandi, og Englendingar nutu þess í mörgu, að þeir voru út af fyrir sig; voru því djarsir um deildan verð, en þó einatt atkvæðamiklir í málefnum þjóðanna. Frakkland átti reyndar um sárt að binda eftir aðfarir Loðvíks fjórtánda, en rétti þó við vonum fremur og auðgaðist um daga hertogans af Orleans, því að landið er af náttúrunni auðugt, og hertoginn var að mörgu leyti vitur maður og stjórnsamur; það mátti því enn heita eitt af höfuðríkjum Norðurláfunnar. Spánverjar reyndu að ná aftur fornri frægð, en sýndu að því leyti meiri hug en dug. Austurríki reyndist nú óstyrkara en nokkru sinni áður og galt þess, að keisarinn, Karl sjötti, var dáðlitill maður, þó drambið skorti eigi. Það sem það hafði unnið í ófriðnum við Tyrki, mistist aftur, og alt eins gekk hitt úr greipum þess, er unnizt hafði á Ítalíu, Neapel og Sikiley, og þar með var yfirráðum Austurríkismanna lokið á Ítalíu og á Spáni. Hins þýzka ríkis getur að engu. Prússland tók sýnilegum framsörum. Holland hafði lifað sitt segursta, og var nú komið til sætis á hinn óæðra bekk. Slíkt hið sama mátti segja um Svíþjóð. Danir fóru hægt, en bættu þó hjá sér ymsa hluti heima fyrir. Þó sumt gengi skrykkjótt á Rússlandi, og stjórnendur sleypstust þar einatt úr völdum, börðu Rússar ómjáklega á Tyrkjum og gengu af þeim hálfdaudum, einnig komu þeir Águsti kjörfursta til konungstignar á Póllandi þrátt fyrir mótspyrnu Frakka.

Á tímabili því, er þar fylgdi næst á eftir, eður frá dauða Karls sjötta til stjórnarbyltíngarinnar á Frakklandi (1740-1789), vaknaði Norðurláfan af þeirri deysd og drúnga, sem hún hafði verið í um stundar sakir, og tók til starfa, urðu þá aflraunir miklar með mönnum og margir sögulegir viðburðir. Árin þar næst

á undan hafði enginn sá konungur setið að ríkjum, er með atkvæðamönnum mætti telja. En með þessu tímabili hefst Friðrik annar til ríkis á Prússlandi; hans mikla vitsmunir og aðfarir allar koma breytingu, meiri eður minni, á flesta stjórnendur honum samtíða. Sumir þeirra rísa í móti honum, sumir vilja líkjast honum í starfsemi og framkvæmdum. Svo var um Jósef annan í Austurríki og Katrínu aðra á Rússlandi; þau brutust í mörgu meðfram til þess að keppa við Friðrik í afreksverkum. Aðfarir þessara þriggja einvalda miðuðu til þess að efla líkamlegan og andlegan vöxt og viðgáang ríkja þeirra, er þeir réðu fyrir, en að meðölum var eigi spurt og þar af leiddi margan og mikinn ófrið, og einatt ástæðulítinn og ránglátan; en hins vegar einnig hitt, að margt lagðist niður, er áður hafði við gengizt til ills eins bæði hjá lærðum og leikum, ýmsar skaðsamlegar álögur á mönnum voru af numdar, ýmsir fjótrar leystir og mentun og mannúð tóku í mörgum greinum framförum. Margir hinna smærri þjóðhöfðingja fylgdu dæmum stórveldanna, og framfarirnar urðu fyrir þá sök því almennari með þjóðunum. Um þær mundir aftók páfinn kristmúnkafélagið (1773), og urðu múnkar þessir þá útlægir af sumum löndum. Margt kom þá í ljós, er boðaði mönnum miklar byltingar í þjóðfélaginu; en ávextir þeirra umbrota urðu fyrst sýnilegir í Vesturheimi.

Karl keisari sjötti hafði gjört samninga við aðra þjóðhöfðingja um það, að María Theresía, dóttir hans, erfði ríkisstjórnina að honum látnum, og fengið samþykki þeirra þar að lútandi. Alt um það voru þeir samningar rosnir, og hið *austurríkska erfðastríð*, er hófst litlu eftir dauða keisarans, gekk yfir lönd og lýði um 8 ára tímabil. Austurríki, er hafði í þeim ófriði að eins liðveizlu af Englandi, en marga og skæða óvini móti sér, varðist þó miklu betur, en menn höfðu búizt við, og sýndi talaverðan dugnað. Að sönnu misti Austurríki Slesíu, er Friðrik annar náði undir sig, en að öðru leyti hélt það aðallöndunum óskertum. Baiern fékk þúngar hefðir fyrir sína frammistöðu, er það vildi seilast til yfirráða í Austurríki, og Frakkland komst í þær kröggur, að þakka mátti sigursæld Mórizar af Saxlandi (Marschallen af Sachsen) að það náði svo góðum kostum í Akkenar-friðnum 1748, sem það náði.

Eftir átta friðarár hófst hlö nafnkenda og grimma *Sjö ára*

stríð (1756). Það var í þeim ófriði, að Friðrik annar varði herfang sitt (Slesíu) og ríki móti hersveitum hálftrar Norðurálfonnar. Í móti honum voru Austurríki og Frakkland, Rússland og Svíþjóð, Saxland og hið þýzka ríki; en með honum var England. Englendingar og Frakkar börðust þau árin um yfirráðin í Norður-ameríku, og þeir hlutu því einnig hér í álfu að vera hvorir í móti öðrum; þannig barst ófriðurinn um allar heims álfur, bæði á sjó og landi. Að lokum urðu Englendingar ofan á í þeim viðskiptum, og Prússar sömdu frið við mótstöðumenn sína og höldu öllu sínu. Upp frá þessu komust yfirráðin yfir Norðurálfunni, eða jafnvel yfir öllum heimsálfum, í hendur á þessum 5 stórveldum: Englandi, Austurríki, Rússlandi, Frakklandi og Prússlandi. Annara ríkja gætti annaðhvort alls eigi, eða þau voru alveg háð því stórveldi, sem þau einhverra orsaka vegna voru við bundin. Af þeim 5 stórveldum var England einkum voldugt vegna herflotans, er það hafði, nýlendnanna, sem bæði voru miklar og auðugar, og verzlunarinnar, sem var miklu meiri, en hjá nokkurri annari þjóð; enda voru Englendingar auðugastir allra manna. Austurríki átti miklar auðsuppsprettur, og tók að vísu miklum framförum um daga Maríu Theresíu, og enn meiri á ríkisárum sonar hennar, Jósefs annars, en það hamlaði stórum þjóðþrifum þess ríkis, að þar var enginn afbragðsmaður uppi, síðan Eugen prins af Savoyen leið, er vit og þrek hefði til að stýra ríkinu á réttum framfaravegi, hvort heldur í friði eða á ófriðartímum. Svo hefir Friðrik annar Prússa konungur sagt, að meðan Eugen var á upprættum fótum, væri hann í raun rétttri keisarin, þó aðrir bæri nafnið. Rússland hafði, þá er hér var komið, fengið svo mikla mentun, að bæði komst þargottskipulag á innanlands í mörgum greinum, og í annan stað færði það takmörk sín út yfir næstu þjóðir í allar áttir, og það svo freklega, að mörgum stóð stuggur af. Frakkland hafði, þegar fram í sótti, Spán sér fylgjandi, og þó því hnignaði nokkuð sökum munaðarlífs og harðstjórnar, hafði frakknesk túnga og frakkneskir siðir samt sem áður mikil áhrif á aðrar þjóðir. Prússaveldi var úngt og miklu minna að viðáttu en hin stórveldin, en fjárbagur þess var blómlegur, herinn mikill og valinn að mönnum og öllum útbúnaði, og þar var maður, sem kunni að stýra.

Hinn fyrsti vottur þess, hver háski hinum smáu ríkjunum var

búinn, og hve lítills réttindi þjóðanna voru metin, var sundur-skifting Póllands. Ískyggilegt var sundurlyndi stórbjóðanna, en því voðalegri samtök þeirra. Um þær mundir stóð ófriður með Rússum og Tyrkjum, og var þar barizt af svo mikilli grimd, að eigi var annað sýna, en að Húnar væru gengnir aftur. Hins vegar beittu stjórnendur þjóðanna hvorir aðra þeim brögðum, er mannlegt hyggjuvit gat kænlegust fundið, og blygðuðust nú síður við en áður, að fóttröða réttinn fyrir allra sjónum.

Friðurinn sem Rússar gjörðu við Tyrki (1774) jók veldi þeirra um fram það er áður hafði verið, og sýndi mönnum fram á það, hvers þaðan mátti vænta. Austurríki vildi einnig aukast að löndum, og þóttist fá gott færi til þess, þá er karleggur kjör-furstanna í Baiern var aldaða (1777); en Friðrik annar var enn uppi þó aldraður væri, og ónýtti þá fyrirætlan Austurríkis.

Í þessum viðburðum áttu Englendingar og Frakkar lítinn þátt, nema að því leyti, er til samninga kom. Frakkland gekk með þá meinsemd, að fyrirsjáanlegt var að bráðum mundi gjöra út. England hafði undir sig lagt mikið og auðugt ríki austur á Indlandi, en í Norðurameríku átti það megna styrjöld, og eitt síns liðs, fyrst og fremst við nýlendur sínar, er risið höfðu upp til að hrinda af sér ófrelsi og ánauð, þar næst við þá frændur Bourbona (s: Frakka- Spánar- og Neapels-konunga), er gjarnsamlega veittu nýlendumönnum, og loksins við Hollendinga. Á því tímabili, sem hér ræðir um, er sigur Ameríkumanna (banda-ríkjanna) 1783 hinn síðasti og fegursti aðalviðburður, og *Georg Washington* hin glæsilegasta hetja.

Spánn um daga Filippusar 5. Alberoni kardináli.

Filippus fimti, sonarson Loðvíks fjórtánda (1700—1746), erfði konungdóm á Spáni eftir Karl annan árið 1700, eins og fyr er ritað. En konungstign hans var eigi viðurkend fyr en í Út-rechtar—friðnum 1713, að ófriðnum var lokið, og má með sanní segja, að sú konungstign varð mörgum helzt til dýrkeypt, og það því fremur, sem Filippus var lítt nýtur konungur, er bæði skorti vit og vilja til að stýra ríki sínu. Árið 1714 andaðist drotning hans Gabriele af Savoyen. Meðan drotning lifði, ræð sú kona öllu við hirðina, er Úrsíni hét; en er drotning var dáið, rerí Úrsíni að því öllum árum að komast í drotningar sess, en

það vildi konungur eigi eftir henni láta, þó hún ræði flestu sem fyr. Um þær mundir var sá maður í Madrid, er *Július Alberoni* er nefndur. Hann var sendiherra hertogans í Parma við hirð Spánar konungs, Hann var ítalekur að ætt og af lágu stígu; komst snemma í klerka stétt, og til hárra metorða, því að maðurinn var vel vilið borinn og beitti öllum brögðum til þess að ná hylli höfðingjanna. Í Madrid varð hann aldavinur Úrsíni. Og þegar Filippus vildi eigi taka hana sér til drotningar, en læzt mundi kvongast annari, er betur væri við sitt hæfi, gaf Alberóni Úrsíni það ráð, að hún skyldi koma því til leiðar, að konungur kysi þá eina sér til drotningar, er væri auðsveip í lund og hógvær í hjarta, og lèti hana ráða öllu eins og áður. Hann kvaðst geta vísað á drotningarefnið; það væri *Elísabet af Farnese*, bróður-dóttir hertogans af Parma; hún væri einmitt þessum kostum búin. Þetta þótti Úrsíni óskarad, og varð það framgengt. En Elísabet var öli önnur en Alberóni hafði lýst henni; hún var ákaflega drotunnargjörð, djörf í huga og ófyrirleitin í framkvæmdum. Jafnskjótt sem hún var sezt í drotningarsætið, bauð hún að Úrsíni skyldi verða á brott úr ríkinu þegar í stað; og svo var gjört.

Filippus varð að láta aðra hafa öll ráð fyrir sér, og tók því feginn hendi, að drotning hans hefði allan veg og vanda af ríkisstjórninni; en Alberoni varð skjótt hennar æðsti ráðgjafi. Þegar það var orðið, setti hann sér það mark og mið, að hefja Spánarveldi af þeirri niðurlægingu, sem það var komið í sökum heimsku og harðstjórnar þeirra manna, er að undanfögnu höfðu þar ríkjum ráðið. Hann kipti fjárhagnum í lag og kom upp talsverðum skipaflota. En hann lét sér það eigi nægja. Hann vildi gjöra Spán voldugra en öll önnur ríki Norðurlálfunnar. Hann vakti einnatt máls á því við konunginn, að Loðvík fimtándi, Frakkakonungur, mundi eigi verða lánglífur, og þá væri Filippus rétt borinn til ríkis á Frakklandi, sem sonarson Loðvíks fjórtánda; en hvað hertogann af Orleans snerti, er um þær mundir stýrði Frakklandi, meðan Loðvík 15. var í bernsku, þá væri innan handar að svífta hann völdum. Drotning vildi um framalt, að synir hennar gætu fengið lönd til forráða; til ríkis á Spáni gátu þeir eigi komið, því að synir Filippusar konungs, af fyrra hjónabandi hans, voru þar til ríkis bornir. Fyrir því anera þau

Elisabet drottning og Alberóni huga sínum til Ítalíu. Þar voru lönd, sem í Útrechtar—friðnum höfðu gengið undan Spáni og undir Þýskalands keisara. Þar að auki stóð svo vel á, að Farnesa-ættin í Parma, og Medicea-ættin í Toskana, voru að því komnar að líða undir lok. Öllum þessum ítölsku löndum vildu þau drottning og ráðgjafi hennar ná handa þeim sonum Elísabetar. En til þess að koma öllu þessu í kring varð Alberóni að fara dult með fyrirætlun sína, leiða hugi þeirra þjóða, er hann helzt óttaðist, í aðra átt, og fá þeim annað að sýsla heima fyrir hjá sjálfum sér. Þess vegna kom hann fótum undir samtök á Englandi til þess að koma Stúarta-ættinni þar aftur til ríkis; þess vegna kveikti hann samsæri á Frakklandi gegn hertoganum af Orleans; þess vegna fékk hann Görtz, ráðgjafa Karls tólfta í lið með sér, til að sætta þá Pétur Rússakeisara og Karl konung, og fá þá í sameiningu til að koma Stúórtunum til ríkis á Englandi.

Þýskalands keisari hafði, eins og áður er sagt, í Útrechtar-friðnum fengið þau lönd mestöll, er Spánn varð þá laus að láta á Ítalíu, og Alberóni nú vildi ná aftur, þess vegna reið nú á, að ráðast á þau lönd meðan keisarinn (Karl sjötti) hafði sem mest að starfa annarsstaðar. En einmitt um það leyti átti keisarinn ófrið við Tyrki. Þeir höfðu löngum elt grátt silfur, Soldán og keisarinn. Litlu síðar en hinu spánaka erfðastríði lauk, rauf Soldán Karlowiz-friðinn¹ og tók Móreu (Peloponnesus) frá Venezíumönnum. Keisarinn var bandamaður Venezíumanna, og sendi þeim her manns til liðveizlu. Eugen af Savoyen stýrði því liði, og varð Tyrkjum sigursæll, eins og vant var. Þegar nú þannig var ástatt, og keisarinn hafði sem mest að vinna, lagði flóti mikill út frá Spáni (árið 1717), og, fyrir en nokkurn varði, voru Spánverjar búnir að vinna Sardínarey alla og meira hluta Sikileyjar. En er Karli keisara komu þau tíðindi, gjörði hann þegar frið við Tyrki í *Passarowitz* 1718. Fékk keisarinn þá Belgrad, en Venezíumann mistu Móreu, mótti því að þeir fengu nokkuð af Dalmatíu. Nú varð allt þert um ráðabugg Alberónis: Samsærið á Frakklandi gegn hertoganum af Orleans komst upp, og var þegar bælt niður; Karl tólfsti féll fyrir Friðriksteinskastala, og þá var bráðum Görtz úr sögunni. Hins vegar gjörði England, Frakkland og keisarinn samband sín í millum, og Hol-

1) Nýja sagan, II. hefti, bls. 62.

land ætlaði að vera þar með, og fyrir því var það nefnt fjórmennínga-sambandið (Kvadrupel alliance); var það til þess stofnað, að tryggja það alt sem best, er um hafði verið samið í Útrechtar-friðnum. Þegar nú þar við bættist, að Englendingar unnu sigur á flota Spánverja við Sikiley, þá varð Spánar konungur að ganga að þeim kostum, er bandamenn settu honum (1720): Alberóni var gjörður útlægur af Spáni; hertoginn af Savoyen, sem hafði leiðst í lið með Alberóni, lét Sikiley móti því að fá aftur Sardinarey, en Sikiley komst undir Austurríki; Don Karlos elzti sonur Elísabetar drottningar fékk erfðarétt til Parma og Toskana. Síðan þessi breyting komst á, hafa þeir verið nefndir Sardiníu - konungar¹, sem ráðið hafa fyrir Savoyen og Piemont.

Norðurálfan þurfti frið og næði eftir hin mörgu ófriðarár, sem á undan voru gengin um daga Loðvíks fjórtanda og af hans völdum, þó lá oft við sjálfst á tímabili því, er hér ræðir um, að friðurinn mundi raskast. Loðvík fimtándi, Frakkakonungur, hafði fastnað sér dóttur Spánar konungs; en af því að hún var barn að aldri, og þeir, sem þá höfðu mest ráð fyrir Loðvíki, vildu að hann kvongaðist sem fyrst, þá var hin spanska konungsdóttir send heim aftur til sinna áttunga, en Loðvík gekk að eiga *Maríu*, dóttur Stanisláss Leczinskýs, Pólverja konungs, er fyr hefir verið nefndur. Nú þótti Spánar konungi sér nærri höggvið, sem vonlegt var, og vantaði lítið til að ófriður risi af. Annað var það, er til mikilla vafnanga horfði. Karl keisari hinn sjötti vildi koma á fót verzlunarfélagi í borg þeirri, er Ostende heitir í Belgíu; en Belgía lá undir keisarann, síðan friðurinn gjörðist í Útrecht. Verzlunarfélag þetta átti að reyna sig við enska og hollenzka verzlunarmenn á Indlandi og í Vestindíum. Þetta hvortteggja leiddi til þess, að Norðurálfumenn gengu, að kalla mátti, í tvær sveitir: í *Wienar-sambandið*, milli Austurríkis, Spánar og Rússlands, og í *Hannóvers-sambandið*, milli Englands, Frakklands, Hollands, Svíaríkis og Danmerkur. Hér við bættist og, að keisarinn, sem engan son átti, og sá fyrir, að karlleggur Habsborgar-manna mundi bráðum undir lok líða, gjörði alt sitt ýtrasta til, að *María Theresía*, dóttir hans, erfði alt hans ríki

1) Árið 1861 lagði Sardiníu konungur niður það nafn, og nefnir sig síðan Ítalíu konung, enda er öll Ítalía gengin undir hann

Þegar hann félli frá, og samdi þar að lútandi erfða-skrá. Fyrirskipan sú, er keisarinn (Karl sjötti) þannig gjörði um ríkiserfðirnar, er síðan alment nefnd: *hin pragmatiska Sanction*. Það var einkum tveim mönnum að þakka, að friður hélzt um nokkur ár. Annar þeirra var *Fleury* kardináli, ætli ráðgjafi Frakkakonungs (1726-1743), hinn maðurinn var *Róbert Walpole*, ráðgjafaforseti á Englandi (1721-1742). Báðir þessir menn voru hinir friðsömustu, og, af því þeir réðu miklu, gátu þeir að mestu leyti afstýrt ófriðnum um sína daga. Karl keisari hætti við verzlunarfélagið, og varð það svo að engu, en bæði England og Holland, sem mest höfðu staðið í móti félaginu, samþykktust ríkiserfðir keisarans.

Hið pólska erfðastrið (1733-1735).

Ágúst annar, kjörfursti af Saxlandi og konungur á Póllandi, sem mönnum er kunnur af viðureign hans við Karl tólfta Svía konung, andaðist 1733. Þegar hann var dáinn, máttu Pólverjar eigi sjálfir ráða því, hvern þeir vildu til konungs hafa, fyrir afskiftasemi og ránglæti annara þjóða. Þeir tveir, sem umtalsmál var um að konungdóminn hlyti, voru þessir: Ágúst af Saxlandi sonur Ágústs annars, og Stanislás Leczinský, er áður hafði verið konungur á Póllandi. Allur þorri Pólverja vildi heldur hafa Stanislás yfir sér en Ágúst, því að Stanislás var gæflyndur maður, og vel að sér um marga hluti, þó hann væri enginn hreystimaður, og þar á ofan var hann pólskur að ætt og uppruna, en Ágúst var í raun og veru útlendur, og með öllu óhæfur til konungstignar sökum vitsmunaskorts og leti. Ríkisþing Pólverja kaus Stanislás til konungs, en keisarinn tók málstað Ágústs, af því að hann hafði heitið keisaranum, að samþykkjast áðurnefnda erfðaskrá hans. Slíkt hið sama gjörðu Rússar, því að þeim var mest umhugað, og að því reru þeir öllum árum, að alt gengi sem verst á Póllandi. Með Stanilási stóðu Frakkar; því að Villars marskálkur, hin aldræða hetja, og ýmsir framgjarnir menn í hirð Frakka konungs, kröfðust þess, að Stanislás, faðir drotníngarinnar, væri styrktur til ríkis, og kváðu sæmd Frakklands við liggja; þá varð Fleury að heita liðveizlu, og hafa liðsbúnað, þó honum væri það fjærri skapi. Spánn og Sardinía gengu í lið með Frökkum í því skyni að ná undan Austurríki þeim lönd-

um, er það átti á Ítalíu. Þannig hófst hið *pólska erfðastríð*, er stóð frá 1733 til 1735. Rússar voru næstir og urðu fyrst búnir og héldu liði sínu inn á Pólland. Stanislás var kominn til Warschau, höfuðborgar landsins, en varð að flýja þaðan og til Danzig. Rússar eltu hann þangað og settust um borgina. En fyrir þá sök, að Frakkar sendu þangað lítið lið, og fyrirsjáanlegt að borgin yrði tekin af Rússum, þá treystist Stanislás eigi að haldast þar við og flýði þaðan í dularklæðum, og komst nauðulega undan vestur á Prússland, en þá var honum borgið. Var því næst Ágúst kjörfursti til konúngs tekinn á Póllandi og nefndur Ágúst þriðji. Hann var einhver hinn ónýlasti konúngur, og hafði eigi hug á öðru en dýraveiðum, en lét ráðgjafa sinn, er *Brühl* hét, slúnginn mann og óhlutvandan, hafa alla ríkisstjórn á hendi. Sat konúngur lengstum í Dresden á Saxlandi, því að honum þótti betur fallið til dýraveiða þar í landi en austur á Póllandi. Hann lærði aldrei pólska tungu, kom að eins annaðhvort ár til Warschau og hafði þar litla viðdvöl; dæmefá sjáreyðsla, svall og sællífi fylgdi hirðinni land úr landi, og breiddi siðaspillínguna út á meðal almennings. Var um þær mundir — eins og því miður oftar — bæði ill stjórn og ónýt á Póllandi. Þeir sem landinu ræðu voru reyndar Rússar. En nú er að ríkjast afstíðingurinn. Þegar Frakkar gátu eigi komið sínu fram á Póllandi, og Rússar helzt til sjarlægir, sneru þeir reiði sinni á keisarann. Hann hét á Englendinga til liðveizlu, en Walpole vildi engin afskipti af hafa, og setti þar þvert nei fyrir; fekk og Hollendinga til að gjöra slíkt hið sama. Frakkar sendu Bervick marskálk með her manns austur að Rín, og vann hann á stuttum tíma öll þau hærð, er einu nafni heita Lothringen; hann tók og kastalaborg þá fyrir austan Rín, er Kehl heitir, en er hann settist um kastala þann, er Filippborg heitir, féll Bervick (1734), og þótti verið hafa dugandi hershöfðingi. Keisarinn sendi þegar herlið vestur til Rínar, og þó Eugen væri yfir það settur, þá var bæði, að hann var hrumur orðinn af elli, og hér var við ofurefli að etja, og vann hann því ekki á. Í annan stað sendu Frakkar Villars til Ítalíu með miklu liði, og kom Karl Emanuel, Sardíníu konúngur, þar til móts við hann með sínar heraveitir, og því næst fóru þeir herskildi yfir landið, og lögðu alt undir sig, sem keisarinn átti á Norður-Ítalíu, nema Mantúa. Alt hið

sama hamíngjuleysi fylgdi keisarans málefni í Neapel og á Sikiley. Spánverjar unnu bæði þau lönd undir sig, mest fyrir þá sök, að Austurríkismenn voru þar illa þokkaðir af landslýðnum; var Don Karlos (sonur Filippusar 5. á Spáni og Elísabelar) því næst þar til konungs tekinn.

Þegar keisarinn sá, að menn hans biðu allsstaðar ósigur, en Fleury hins vegar þótti fullsæð, að Frakkland mundi geta haldið Lothringen, sem það lengi hafði haft augastað á, þá fóru hvorirtveggja að tala um vopnahlæ og frið, og litlu þar á eftir var friður saminn í Wien (1735) með svofeldum skilmálum: 1. Ágúst þriðji, kjörfursti af Saxlandi, hélt konungdómi á Póllandi. 2. Don Karlos af Spáni, er orðinn var hertogi í Parma, og átti erfðarétt til Toskana, lét bæði þau lönd af hendi, en fekk í þeirra stað Neapel og Sikiley. 3. Lothringen var fengin Stanislási til forráða, en skyldi falla undir Frakkland að honum dauðum. 4. Franz Stefán, hertogi af Lothringen, skyldi erfa Toskana, þegar Medicea-ættin væri þar aldaða (og það varð 1737). 5. Hertogadæmið Parma var lagt til Austurríkis í skaðabætur fyrir Neapel og Sikiley. 6. Frakkakonungur lagði samþykki sitt á ríkiserfðaskrá keisarans. Þessa skilmála létu allir málsaðilar sér lynda, einkum keisarinn, því að hinn síðastgreindi skilmáli var í hans augum engu minna verður en lönd þau, er gengið höfðu undan honum og hinu þýzka ríki.

Ófriður sá, sem nú var getið, og friðarsamningar þeir, er honum fylgdu, var órækur vottur þess, að allur sá dugur, sem Austurríki hafði sýnt framan af öldinni, var eingöngu að þakka vitsmunum og framgöngu Eugens bæði í ríkisstjórn og herstjórn. Að herstjórninni fór stórum hnignandi, kom þó enn betur í ljós í ófriði þeim, er Austurríkismenn áttu við Tyrki. á hinum síðustu árum Karls keisara, og ráðgjafar hans leiddu hann út í. Rússar voru bandamenn keisarans í því stríði, og höfðu jafnan sigur, en Austurríkismenn biðu hvern ósigurinn á fætur öðrum, þangað til þeir rösuðu fyrir ráð fram og sömdu friðinn í Belgrad (1739). Þar misti Austurríki Belgrad, er lengi hafði verið hið öruggasta vígi og vörn ríkisins móti Tyrkjum.

Uppgáangur Prússa. Friðrik annar hefst til ríkis (1740).

Kjörfurstadæmið Brandenburg og hertogadæmið Prússland (Preussen), er því var sameinað, hafði um allmörg ár verið undir yfirráðum dugandi manna, og var nú, þegar hér var komið, orðið allmikið ríki á Norðurþýzkalandi. *Friðrik Vilhjálmur*, «kjörfurstinn mikli», er sat þar að völdum frá 1640 til 1688, hafði bæði aukið ríki sitt í vestfalska friðnum, losað við yfirráð Póllands í friðnum í Oliva (1660), og átt mikinn og góðan þátt í ófriðnum milli Niðurlendinga og Loðvíks fjórtánda, og það sem mest var vert, kómið á miklu meiri festu og einingu í löndum sínum, er eigi voru ein samgróin heild, heldur lágu að heita mátti á víð og dreif. Ýms hérud í ríki þessu, er því nær höfðu lagzt í eyði í þrjátígi ára stríðinu, voru nú gróin sára sinna og orðin aptur að blómlegum sveitum; skipgengir skurðir voru komnir víðs vegar um landið, verzlun og iðnaður í mikilli framför, og höfðu Hugennottar, er flýðu af Frakklandi, en kjörfurstinn tók fegins hendi í móti, eins og fyr er sagt¹, átt mikinn þátt í öllum þeim framförum Prússaveldis. *Friðrik* sonur *Friðriks Vilhjálms* (1688—1713) var ákaflega skraut- og metorðagjarn, og horfði eigi í kostnaðinn til slíkra hluta; hann dáðist mjög að Loðvíki fjórtánda og hirðsiðum hans og stældi eftir honum í mörgum greinum, og eigi þekti hann annað æðra hnoss en að geta náð í konungstign og borið konungs nafn. Með því að haga stjórn sinni í mörgu eftir vild hins þýzka keisara, leyfði keisarinn (Leopold 1.) að *Friðrik* mætti taka sér konungs nafn, og þá er samþykki keisarans var fengið, setti kjörfursti þessi kórónuna á höfuð sér í Königsberg (1701) og nefndi sig *Friðrik fyrsta Prússakonung*. En það var fyrst í Útrechtarfriðnum (1713), að aðrir stjórnendur samþykktu konungstign hans. Hann jók ríki sitt vestur á Þýzkalandi, er hann fékk að erfðum nokkur greifadæmi á Vestfali, og enn fremur fékk hann yfirráð í Neuschatel-fylki á Sveizalandi. Sonur hans *Friðrik Vilhjálmur* fyrsti (1713—1740) eignaðist Stettin og Vesturpommern allt að Penesfljóti, og eyjarnar Usedom og Wollin fyrir Óderfljóts mynni, er Svíar létu af hendi, en fengu í móti lausafé.

Friðrik Vilhjálmur fyrsti var mjög ólíkur bæði því, er faðir

1) Nýja sagan II. Hefði, bls. 45.

hans hafði verið, og því sem aðrir konungar voru honum samtímis. Faðir hans var hinn mesti skrautmaður og eyddi ærnu fé í veizlur og alls konar viðhöfn. Slíkt hið sama átti sér alment stað meðal konunga um þær mundir. Friðrik Vilbjálmur var fjarlægur öllum þess konar hlutum. Hann hélt sig svo spart og hirð sína, að hann mátti vel heita hinn «matarilli»; hitt kom engum til hugar að kalla hann «mildan¹», því að hann var svo harður, að flestum stóð ótti af. Hann var ákaflega geðstór, reiddist þegar í stað, ef alt var eigi eins og hann vildi, og barði þá óspart á mönnum, hver sem í hlut átti, hvort heldur skyldir eða vandalausir. Svo voru menn hræddir við hann, að þeir voru fáir, sem þorðu að mæta honum á förnum vegi, heldur flýðu til beggja handa, þegar til hans sást. Mætti hann konu á strætum úti, skipaði hann henni að fara heim og gæta barna sinna. Sæi hann prest nema staðar og horfa á hermennina, hvað þeir höfðust að, bauð hann honum að fara heim þegar í stað og hugsa heldur um bækur sínar og bænagjörðir, og barði hann um leið. Engi vísindi eða vísindamenn þrífust í ríkinu um hans daga, enda var hann sjálfur ómentaður maður. Það var einkum tvent, sem allur hans hugur hneigðist að: annað var, að safna sem mestu fé í fjárhirzlur ríkisins, og tókst honum það vel, bæði með dagnaði og sparsemi; hitt var: að koma fótum undir mikið og velbúið herlið í ríki sínu, og á þetta síðara atriði lagði hann svo mikið kapp, að furðu gegndi. Honum nægði eigi, að liðsmenn hans væri á vöxt eins og alment gjörðist með öðrum konungum, heldur hafði hann erindsreka sína um allar jarðir, og lét þá útvega sér alla þá menn, er mestir voru vexti, hvar sem til varð náð. Honum stóð á sama, hvort þeir voru austan úr Asíu, af Egyptalandi, eða af hverri þjóð í Norðurálfunni sem vera skyldi. Sumum af þess konar mönnum, og þó það væri prestar, lét hann ræna úr átthögum þeirra, og flytja til sín, sumu keypti hann dýrum dómum², sumu fékk hann að gjöf frá öðrum konungum. Þessa risavöxnu menn setti hann alla í eina fylkingu, og er sagt, að maður sá er jafnan stóð yztur í annan arm þeirrar fylkingar, og Hómann hét,

1) Sbr. Heimskringlu, Ynglingasaga kap. 52.

2) Þannig er mælt, að einhverju sinni hafi hann keypt einn af þessum risum á Írlandi fyrir því nær 11000 ríkisdala.

væri svo hár, að hann var meira en seiling Ágústs konungs hins sterka, og var hann þó ekki smámenni kallaður. Konungur lét öllum stundum æfa lið sitt við vopnaburð, enda var sagt að það tæki annara þjóða hermönnum fram í þeirri list; og það má telja víst, að konungur þessi hafi fyrstur manna kveikt þann hermanna-anda og það hermanna vald, sem síðan hefir ríkt á Prússlandi. En allmerkilegt má það virðast, að Friðrik Vilhjálmur fyrsti átti því nær aldrei ófrið við aðrar þjóðir, svo vígamannlega sem hann lét heima fyrir. Það var eins og hann tímdi eigi að sjá af liðsmönnum sínum eður senda þá frá sér, heldur hafa þá heima öllum stundum sér til augnagamans, telja þá og snúa þeim fyrir sér, eins og maurapúki yfir peninga hrúgu. Þó konungur þessi hefði lifað lengur, en hann gjörði, þá er all-ólíklegt, að hinn mikli her — um 90,000 manns —, er hann hafði safnað og æft við vopnaburð sí og æ, hefði nokkru sinni orustum vanízt, heldur heræfingum að eins. Friðrik Vilhjálmur gat að eins búið í hendur á sér meira manni, og það gjörði hann án alls efa rækilega. Hann var kvongaður og hét drotning hans Sofía, systir Georgs annars á Englandi. Þeirra sonur var *Friðrik*, er til ríkis kom á Prússlandi eftir föður sinn 1740, og var hinn *annar* með því nafni, en er oft nefndur *hinn mikli*, sökum afreksverka sína. Hann var fæddur 1712 á öndverðu ári. Honum var meðskapaður hvass skilningur og óbifanlegur vilji; en um annað andlegt atgjörvi hans, kosti og ókosti, er eigi aðvelt að segja, hvað honum var meðskapað, eða hvað kenna mátti hinu einstaka uppeldi, er honum blotnaðist á æsku-árunum. Svo harður sem Friðrik Vilhjálmur var við aðra, þá var hann þó langharðastur við konu sína og börn; og einum kom sú harka niður á Friðriki syni hans og Vilhelminu dóttur hans, er seinna giftist markgreifanum af Baireuth. Konungur var, eins og áður er sagt, ómentaður maður og var illa við allar bókmentir. Hann hataði vantrúaða, katólska menn og heimspekínga, þó hann gæti eigi gjört greinarmun á milli þeirra. Hans helzta skemtan var að reykja tóbak, drekka sænskt öl, spila Tokkodille-spil, og veiða akurhænsu. Sonur hans hafði lítinn hug bæði á hinum alvarlegu störfum og á skemtunum föður síns. En hann hafði ágætt söngeyra og lék vel á hljóðpípu. Fyrstu kennendur hans voru frakkneskir flóttamenn, og af þeim

fekk hann miklar mætur á frakkneskum bókmentum, og að vera sem oftast í frakkneskra manna hópi. Þetta mislíkaði föður hans stórum, þótti það kveifarlegt og refsaði honum fyrir, en sú refsing hafði alt önnur áhrif á soninn en til var ællast. Þegar um trúna var talað, kom Friðrik stundum með þær spurningar eða þau svör, sem virtust nokkuð frábrugðin hinni lúthersku trú. Konungi þótti það vera trúarvilla, og sér sem kristnum manni skylt að taka hart á slíku. Hann lét því taka frá syni sínum allar frakkneskar bækur, brjóta hljóðpípu, og barði hann harðlega og dróg hann á hárinu um herbergin. Stundum fékk hann eigi á öðru að nærast en vatni og braudi, og einn sinni ætlaði konungur sjálfur að hengja hann. Öll þessi dæmasáa harðneskja kom því til leiðar, að Friðrik einsetti sér að flýja til frænda sinna á Englandi. En svo tókst óheppilega til, að konungur komst að þeirri fyrirællan; lét hann þá jafn-skjótt taka son sinn og setja í varðhald. Einn af kunníngjum prinsins, sem var í vitorði með honum, var dæmdur til dauða og höggvinn, en annar gat flúið og forðað lífi sínu. Friðrik var dæmdur til dauða, og hefði eflaust mist lífið, ef keisarinn og ýmsir konungar hefðu eigi beðið honum gríða. Við það selsaðist Friðrik Vilhjálmur, en lengi mátti sonur hans sitja í fangelsi. En þó að hann væri á þann hátt sviftur frelsi, var hans kostur að því leyti betri en heima hjá föðurnum, að í fangelsinu hafði hann viðunanlegt fæði, og þar gat hann leikið á hljóðpípu sína og lesið ýmsar frakkneskar bækur, sem hann annars hefði mátt án vera.

Þegar Friðrik losnaði úr varðhaldi þessu, hafði hann því nær einn um tvítugt og var orðinn þroskaður að því skapi, og þess vegna eigi auðvelt að hafa hann undir eins hörðum aga og áður, meðan hann var í bernsku. Mótlætið hafði skerpt vilið, en gjört hjartað hart og hugann bitran. Hann hafði lært að stilla geð allt og dyljast fyrir mönnum. Þess vegna lét hann sem hann vildi nú gjöra alt að vilja föður síns, og fór þá allvel með þeim. Litlu síðar kvongaðist hann og átti Elísabetu Krístínu af Brúnsvik-Bevern; en þó að konungur eian réði því kvonfáangi, og Friðrik væri eigi um spurður, hvort honum líkaði sá ráðahagur vel eður illa, var hann konu sinni góður og virti hana mikils, en eigi hafði hann mikla ást á henni og var sjaldnast þar sem

hún var. Konungur keypti banda honum höll þá, er Rheinsberg heitir, norður undir Meklenborg; settist Friðrik þar að, og lét prýða þenna bústað sinn á allar lundir, og þangað komu kunn-ingjar hans, einkum frakkneskir vísinda menn; var þar einatt glatt á hjalla, en mestum tíma varði hann þó til bókmenta.

Um þessar mundir var frakknesk túnga og frakkneskar bók-mentir í fyrirrúmi á Þýzkalandi. Allir heldri manna synir lærðu að tala og rita frakkneska túngu, um móðurmál þeirra, þýzkuna, var lítið skeytt. Friðriki Vilhjálmi þótti nauðsynlegt að börn sín lærði frakknesku, en engin þörf á, að þau lærði þýzku. Latínu vildi konungur þessi hvorki sjá nè heyra. «Sonur» minn» sagði hann, «skal eigi læra latínu, og engum skal líðast, að nefna þann hægóma á nafn». Einu sinni kom konungur þar að, er einn af kennendum Friðriks var að yfirfara með honum gullskrá Karls keisara hins fjórða¹ á frummálinu (latínu). «Hvað ertu þarna að lesa með honum, þorparinn þinn?» sagði konungur. «Eg er að þýða gullskrána fyrir prinsinum» svaraði kennarinn. «Eg skal gullinskrá þig, fanturinn þinn!» mælti konungur, og reiddi staðinn til hóggs og ætlaði að berja manninn, en hann hopaði undan á dyr, og komst út óbarinn. Friðrik fekst ekki við latínska túngu eftir það, svo um sé getið. Hið eina túngumál, sem hann las og lærði til hlítar, var frakkneska, og á þá túngu ritaði hann allt, sem eftir hann liggur ritað, bæði í óbundinni ræðu og í ljóðmælum. Af öllum frakkneskum rithöfundum, er uppi voru í það mund, var *Voltaire* nafnkendastur, og að honum og ritum hans dáðist Friðrik meir en að öllu öðru. Bréf og gjafir gengu á milli þeirra, og seinna, þegar Friðrik var orðinn konungur, dvaldið *Voltaire* hjá honum um hríð, og var þá hafður í miklum há-vegum, þó allur sá fögnuður yrði síðan nokkuð endasleppur.

Um vorið 1740 dó Friðrik Vilhjálmur fyrsti, en Friðrik tók við ríki á Prússlandi, og hafði þá átta vetur um tvítugt. Flest-um var ókunnugt um eðlisfar hans. En hitt vissu allir, sem átt höfðu tal við hann, eða lesið það, er hann hafði ritað, að vits-munir hans voru afbragð. Margir ætluðu, að hann mundi verða sællífur, og hneigjast mjög til munaðar, af því að hann hafði um nokkur undanfarin ár verið makráður í meira lagi, haldið sig ó-spert að mat og drykk, og lagt mikla stund á bókmentir, hljóð-

1) Sjá Miðaldasögu, bls. 181.

færaslátt og samræður við menn. Suma vilti það, að hann talaði löngum um sanngirni, frið, frelsi og hve fagurt það væri, að geta glatt aðra. Og þeir, sem gjörðu sér beztar vonir um hann, töldu víst, að hann mundi verða eins og Medicearnir í Flórenz voru á sinni tíð, það mundi renna upp gylliniöld vísinda- og listamanna. Engum kom til hugar, að til ríkis var kominn harðstjóri með frábæru viti á herstjórn og ríkisstjórn, með óþreytandi starfsemi og dugnaði, en sem lítið skeytti um orð og eiða, þegar svo bar undir. Þessir kostir hans og ókostir komu þegar í ljós á hans fyrstu ríkisstjórnarárum. Hann kveikti hinn mikla ófrið, er um átta hin næstu ár gekk yfir miðbik Norðurálfunnar og enda snerti aðrar heimsálfur.

Hið austurríkiska erfðastríð (1740—1748).

Hið sama ár, sem Friðrik annar kom til ríkis á Prússlandi, en þó nokkrum mánuðum seinna, dó *Karl keisari sjötti*, hinn síðasti maður í karllegginn af hinni nafnkunnu Habsborgarætt, er að mestu leyti hafði ríkjum ráðið á Þýzkalandi hátt á fimta hundrað vetra. Eins og áður er sagt, hafði Karl keisari gjört alt sitt ítrasta til, að ríkið sundraðist eigi eftir hans dag, eins og orðið hafði blutfall hins spánska einveldis nokkru áður. Jafnvel þó Eugen hefði löngum sagt, að tvö hundruð þúsundir vopnaðra manna, og fæ að því skapi í ríkissjóðnum, væri margfalt betri trygging en óteljandi loforð allra þjóðhöfðingja í Norðurálfunni, þóttist keisarinn hafa trygt að fullu og öllu erfðarétt dóttur sinnar *Máru Theresíu*, og vel um hnútana búið, er honum hafði tekizt, að fá því nær alla stjórnendur Norðurálfunnar til að samþykkjast erfðaskrána («*pragmatische Sanktion*»). Samkvæmt þeirri erfðaskrá áttu öll erfðalönd keisarans að ganga óskift til Máru Theresíu. Hún var þá 23 ára, er faðir hennar deyði, og gift *Franz Stefáni*, stórhertoga af Lothringen, selna af Toskana. En af því að kona mátti eigi bera keisara kórónu á Þýzkalandi¹ var svo ráð fyrir gjört, að Franz maður Máru Theresíu skyldi valinn til keisara; með því móti hélzt keisaratignin í ættinni. Prússakonungur hafði meðal annara lagt samþykki sitt á erfðaskrá keisarans, og María Theresía fékk jafn-

1) Þegar María Theresía var komin til ríkis, nefndi hún sig «drottningu af Ungarn og Böhmen».

skjótt sem hún var komin til ríkis, frá ýmsum konúngum skýlausa játningu þeirra um það, að þeir ætluðu í engu að breyta út af því, er þeir áður hefði sagt og samþykkt. En frá engum bárust henni jafnfögur loforð um helta vináttu og örugga liðveizlu eins og frá Prússakonúngi; þaðan var því als annars að vænta en ófriðar. Það var einúngis kjörfurstinn af Batern *Karl Albert*, er eigi vildi samþykkjast ríkiserfðir Karls keisara. Kjörfurstinn var kominn af elztu dóttur Ferdínands keisara hins fyrsta, þóttist nær standa ríkiserfðum en María Theresía, og mótmælti því í alla staði, að hún kæmi til ríkis. En kjörfurstinn var hvergi nærri því vaxinn, að geta af sjálfs síns ramleik gjört Austurríki miklar ónáðir, og fyrir því töldu menn það víst, að þetta tilkall hans mundi eigi raska friðnum í Norðurálfunni.

Þá var það að Friðrik annar hafði hugfest, að ráðast á Austurríki og ná undir sig einum hluta þess, er heitir *Slesía*. Hann bar það fyrir sig, að Slesía hefði að fornu legið undir Brandenburg, en væri óréttilega komin undir Austurríki, og fyrir því vildi hann nú fá Slesíu aftur. Það er víst að þetta var eigi næg ástæða til að rjúfa frið og trygðir, enda hefir Friðriki sjálfum eigi þótt hún alls kostar góð og gild, því að hann segir í ritum sínum: «drotnunargirnd, eigingirni og löngun til þess að mín yrði getið að nokkru, varð ofan á, og eg reð það af að hefja ófriðinn». Fyr en Maríu Theresíu varði, var Prússa her kominn suður á Slesíu (*Slesíu-stríðið* fyrra, 1740-1742). Það var um hávetur, veður kalt og vegir illfærir. Herlið Austurríkismanna var hvorki mikið né við ófriði búið. Sá hluti þess, sem aðsetu hafði í Slesíu, gat litla vörn sýnt; lögðu því Prússar landið undir sig á svipstundu, nema nokkrar kastalaborgir, er eigi gáfust upp í það skifti.

Slesía var nú unnin, án þess að komið hefði til né einnar stórorustu; en er voraði, sendi María Theresía herlið norður þangað til þess að reka Prússa út úr landinu. Öndverðlega í Aprílmánuði (1741) varð fundur þeirra við þorp eitt í Slesíu er *Molvitz* heitir. Friðrik hafði aldrei verið í orustu fyr, er teljandi væri, enda misti hann svo gjörsamlega hug og dug, þegar orustan tók að harðna, að þar hefði hann beðið hinn mesta ósigur, ef liðsmenn hans hefði eigi verið svo hraustir og öruggir

sem þeir voru, og svo ágætur hershöfðingi til að stýra þeim, eins og *Schwerin* var. Hann hafði barizt með Karli tólfta, Eugen og Marlboroug og víðar, og allsstaðar reynzt hinn vaskasti maður. Þegar orustunni við Molvitz tók að halla á Prússa, gaf *Schwerin* konungi það ráð, að hann skyldi riða undan og forða sér, og það gjörði konungur, en *Schwerin* vann bardagann að leiks lokum. Austurríkismenn létu undan síga og mistu 8000 manna.

Þegar þessi tíðindi spurðust um Norðurálfuna, þutu ýmsir höfðingjar upp til handa og fóta. Þeir vildu eigi, að Friðrik skyldi einn saman auðgast af arfi Karls sjötta. Kjörfurstinn af Baiern greip til vopna. Frakkar veittu honum lið, því að Fleury var þá orðinn fjörgamall og skorti þrek til að halda aftur hinum yngri og framgjarnari mönnum. Ágúst þriðji af Saxlandi var búinn að gleyma því, að Karl sjötti hafði styrkt hann mest og bezt til ríkis á Póllandi; gjörði Ágúst nú kröfur til erfða í Austurríki, þar eð hann væri dótturmaður Jósefs keisara fyrsta, og gekk í lið með óvinum Maríu Theresíu. Spánar og Sardiníu konungar gjörðu slíkt hið sama í þeirri von að geta náð löndum undir sig á Ítalíu. Hins vegar voru þeir fáir, er vildu eða gátu styrkt Maríu Theresíu. Rússar voru henni reyndar vinveittir, en sá flokkur manna («Hattarnir»), er þá ræð mestu í Svíþjóð, og var Frökkum fylgjandi í flestu, kom því til leiðar, að Svíar sögðu Rússum stríð á hendur (1741), og fyrir því gátu Rússar eigi við snúizt og hjálpað Maríu Theresíu. Englendingar veittu henni þar á móti lið. Georg annar, konungur þeirra (1727-1760), átti, síðan árið 1739, ófrið við Spánverja út af verzlun þeirra í nýlendum vestur á Norðurameríku, og þar við bættist, að hann óttaðist uppgang og ofurveldi Frakklands. Valpole, er alt hafði gjört til að afstýra stríði og styrjöldum, eins og Fleury, hætti um þessar mundir öllum stjórnarstörfum, og eftir það tók England meira þátt en áður í ófriðnum á meginlandinu. Georg konungur fór sjálfur til Þýskalands og gjörðist foringi fyrir því liði, er menn nefndu «pragmatíska herinn». En hina öflugustu liðveizlu fekk María Theresía í það sinni hjá þegnum sínum á Ungverjalandi. Ungverjar voru óspakir menn á þeim tímum og lítt siðaðir, og einatt hafði slegið í hart með þeim og keisurunum, forfeðrum Maríu Theresíu, en allt um

það leitaði hún nú liðs hjá þeim í þessum vandræðum sínum. Um þessar mundir varð María Theresía lèttari og ól sveinbarn. Sá sveinn varð síðan keisari, og nefndur *Jósefannar*. Jafnskjótt sem hún var stigin af barnssæng, fór hún til Presborgar, gekk á þing, tjáði Ungverjum raunir sínar, og hét á drengskap þeirra sèr og ríkinu til varnar. Gjörðu þingmenn góðan róm að máli drotningar, og strengdu þess heit, að veita henni það lið, er þeir mætti, eða falla að öðrum kosti. Litlu síðar gekk drotning aftur á þing, og hafði þá Jósef son sinn á armi. Þá var það, að þingmenn stóðu upp og æptu allir einum rómi: vèr viljum deyja fyrir konúng vorn Maríu Theresíu!

Meðan á þessu stóð höldu Frakkar, Baiverjar og Saxar liði sínu til Austurríkis og fóru herskildi um Böhmen (1741). Karl Albert kjörfursti var til konúngs tekinn í Böhmen og lét krýna sig í Prag. Þaðan hélt hann til Frakkafurðu (Frankfurt), og þar var hann af kjörfurstunum valinn til keisara yfir Þýzka-landi og vígður undir kórónu. Hann er nefndur *Karl sjöundi* (1742—1745). Friðrik annar vann að nýju sigur (við Kötusitz) á Austurríkismönnum á öndverðu sumri 1742; þóttist hann þá hafa komið því fram, er hann vildi, en það var, að ná Slesíu undir sig, en hitt vildi hann eigi: veita Frökkum og Baiverjum til þess að vinna lönd af Maríu Theresíu. Þess vegna samdi hann nú frið við hana í *Breslá* (í júní mán. 1742), og varð drotning að láta lausa við hann mestalla Slesíu. Sardiníu konúngur gekk einnig úr sambandinu og í lið með drotningu, móti því, að hann fékk nokkurn hluta vestan af Lombardíi á Ítalíu. Nú varð drotningu hægra fyrir, er nokkrir af óvinum hennar voru gengnir úr leiknum, og gat því af alefli snúizt við hinum, sem eftir voru, Baiverjum og Frökkum. Frakkar voru reknir út úr Böhmen og liðu hið mesta manntjón (í decembr.mán. 1742). Ungverjar, Kréatar og ýmsar aðrar hálfstryltar þjóðir, óðu yfir Baiern og brutu alt undir sig, sem fyrir varð. Keisarinn (Karl 7.) varð að flýja ríki sitt. Georg annar, Englands konúngur, barðist við Frakka hjá bæ þeim, er Dettingen heitir, nyrðst í Baiern, og vann sigur (í júní.mán. 1743), en Frakkar hörfuðu undan vestur yfir Rín. Litlu síðar gengn Saxar í lið með Austurríkismönnum og Englendingum, og lýðveldi Niðurlandanna gjörði slíkt hið sama.

Nú stóðu Frakkar einir uppi af mótstöðumönnum Maríu Theresíu, og voru illa staddir, því að *Karl af Lothringen* (bróðir Franz Stefáns, er átti Maríu Theresíu) hélt miklu liði af Austurríki vestur á Elsz og bjóst að taka það land af Frökkum. Í þeim kröggum sendi Loðvík 15. Frakkakonungur Voltaire í liðsbón til Friðriks annars. Voltaire var um þær mundir nafnfrægur um alla Norðurálfuna af ritum sínum. Var hann allfús til fararinnar, því að hann vissi, að orð sín máttu sér mikils bjá Prússakonungi. En hann þekti eigi konúng nema til hálf; hann þekti hann sem vísindamann og skáld, en hér var eigi um slíkt að ræða, heldur um stjórn lýðs og landa, hernaðarmál, liðveizlu, þjóðsamnínga og þess konar. En þegar til þeirra hluta kom, þá var Friðrik annar hverjum manni tortrygnari og skarpskygnari. Konungur tók Voltaire með miklum virktum, lét hann búa í höll sinni, og matast með sér á degi hverjum. En er til erindanna kom, gat Voltaire einskis orðið vísari um það, hvað konungi bjó í brjósti. Hversu sem Voltaire leitaði á, varð hann engu nær, því að konungur færðist undan, og vildi um allt annað tala. Skáldið Voltaire vildi eigi um annað tala en þjóðmálefni og samnínga, en konungurinn, hinn mikli stjórnvitríngur, eigi um annað en skáldskap, og Voltaire fór jafnfróður heim aftur.

En þó að þessi sendiför Voltaires yrði að erindisleysu, hafði Friðrik annar engu að síður vakandi auga á öllu því, er í kringum hann gjörðist, og var í engum vafa um það er gjöra skyldi. Þegar hann sá, að Austurríkismönnum fór að ganga betur, og eigi var annað líklegra, en að María Theresía og Georg annar mundu yfirbuga Frakka, og setja þeim þá friðarkosti, er þeim sýndist, þá þóttist hann ganga að því vísu, að leitað yrði á sig, og Slesía heimtuð af sér aftur. Hann vissi, hvernig hann hafði náð Slesíu, og í garðinn búið fyrir sig við Maríu Theresíu; hann vissi, hve gramt henni var í geði við sig, og hann grunaði, að hún mundi halda gjörða samnínga viðlíka vel og hann sjálfur; enda sagði hann, að samníngar þeir, sem konungar gerðu hvorir við aðra, væri eins og víravirki, fagrir á að líta, en svo veikir, að eigi mætti við þá koma. Þess vegna bjó hann nú herinn í skyndi, og áður en nokkurn varði, var hann kominn inn í Böhmen með hundrað þúsundir manna, settist um höfuðborgina Prag og tók hana von bráðara. Þenna ófrið Prússa nefna menn

Slesíustríðið hið síðara (1744—1745). Þegar Þessi tíðindi spurðust til Víðarborgar, var Karli af Lothringen boðið, að hætta hernaði vestur í Rínarlöndum, og koma sem skjótast til varnar heima fyrir í erfðalöndum drotningar. En þó Karl væri dugandi maður og hefði mikið lið bæði af Austurríki og Saxlandi, fór hann jafnan halloka fyrir Prússakonungi; urðu þá margar orustur, en þessar mestar: við *Hohenfriedberg*, *Sorr* og *Kesseldorf* (1745) og fengu Prússar sigur í þeim öllum. Varð drotning að semja frið í *Dresden* (25 decembr. 1745), og samþykkja það, er áður hafði verið gjört í Breslá, að Friðrik héldi Slesíu fyrir fult og alt. Hið sama ár, en litlu áður, var Karl sjöundi dáiinn, og með því að sonur hans, Maximilian Jósef, afsalaði sér og sínum niðjum öllu tilkalli til keisaratignar, þá fekk hann aftur ríki það á Baiern, er faðir hans hafði haft, en til keisara var nú kosinn Franz Stefán, maður Maríu Theresíu, og nefndur *Franz fyrsti* (1745—1765). Af honum eru Austurríkis keisarar, er kenna sig við *Habsburg-Lothringen*, komnir.

Nú voru Austurríkismenn, Prússar og Baiernsmenn reyndar búnir að miðla málum með sér, og ófriðurinn þar eystra var á enda kljáður, en þó var eigi alt búið fyrir því vestur í löndum. Frakkar höfðu upphaflega gengið í lið með Baiern, og Englendingar með Austurríki. Nú þegar hér var komið, sögðu hvorir öðrum stríð á hendur Frakkar og Englendingar. Þeim lenti saman, eins og oftár, bæði á sjó og landi. Frakkar — og Spánverjar í liði með þeim — urðu undir í sjóorustum, en á landi veitti Frökkum miklu betur. Þeim vildi það til, að þeir höfðu ágætum hershöfðingja á að skipa, þar sem var *Móríz af Saxen* (almennt nefndur: *Marschallen af Saxen*), óskilgetinn sonur Ágústs annars Pólverjakonungs. Hann gekk þegar á æskuárum sínum í þjónustu Frakkakonungs og staðnæmdist síðan á Frakklandi; barðist á móti hálfbróður sínum Ágústi, þá er ófriðurinn varð um konungskosninguna í Pólen, en hið mesta frægðarorð fekk hann í hinu austurríkiska erfðastríði. Hann var það, sem tók Prag (1741) þegar kjörfurstinn af Baiern hélt inn í Böhmen, og vann þá mörg hreystiverk. Árið 1744 fekk Móríz yfirstjórn yfir Frakkaher vestur á Flandern. Þar stóðu Englendingar og Austurríkismenn móti honum, undir herstjórn hertogans af Cumberland. Sá hertogi var sonur Georgs annars. Bandamenn voru

þar liðfleiri en Móríz, en gátu þó engan bilbug unnið á honum, og árið eftir (1745) vann hann sigur á þeim í stórorustu við *Fontenoi* (vestarlega á Belgíu), og var hann þó dauðsjúkur þann dag, er þeir börðust. Eftir þenna sigur komst meiri hluti Flanderns á vald Frakka. En það var eigi þar með búið. Frakkastjórn fann um þessar mundir ágætt ráð til þess að fækka mótsstöðumönnum sínum á Niðurlöndum. En það er svo að skilja, að Frakkar styrktu *Karl Eðvarð*, sonarson Jakobs annars, til þess að komast til ríkis á Englandi, og rétta að nýju við konungdóm Stúartanna þar í landi. Karl Eðvarð fékk skip og menn, hélt til Skotlands og gekk þar á land. Urðu margir þar vel við komu hans og gengu í lið með honum, og á stuttum tíma vann hann Edinborg, og ýmsar fleiri borgir gáfust upp fyrir honum. Þar næst hélt hann liði sínu suður á England og stefndi til Lundúna. Nú sáu Englendingar eigi annað vænna, en að kalla hertogann af Cumberland heim frá Niðurlöndum til hjálpar. Hann kom þegar með miklu liði, og sem Karl Eðvarð fréttir það, heldur hann norður aftur, en hertoginn á eftir, og hittust við bæ þann, er *Culloden* heitir (í apríl 1746). Liðsmunur var helzt til mikill, og þar að auki hafði hertoginn fallbyssur og öll vopn betri en Skotaherinn. Þar fékk hertoginn sigur, en Karl flýði, og þó að 30000 pund sterling væri lögð til höfuðs honum, fengu Englendingar eigi náð honum, og loksins komst hann um veturnætur sama árið til Frakklands, eftir miklar mannbættur og brakninga. Þar hafðist hann við, þangað til friðurinn komst á, en þá varð hann að fara af landi burt og til Ítalíu og andaðist í Róm 1788. Hefir Englendingum eigi mein orðið að Stúörtum síðan.

Þegar hertoginn af Cumberland var farinn heim af Niðurlöndum til landvarnar, eins og nú var sagt, varð Móríz af Saxen enn hægra um hönd en áður; vann hann nú hverja borgina á fætur annari og tók Niðurlendinga höndum svo þúsundum skifti. Og jafnvel þó Austurríki sendi þangað Karl af Lothringen með liði miklu, eftir að friðurinn í Dresden var saminn, og enskt lið kæmi aftur til sögunnar, þegar Stúarta hretinu var af lett, þá bar Móríz samt sem áður herra blut frá borði í viðskiftum þeirra, vann mikinn sigur við *Raucoux*, skamt frá Lüttich (í Október. 1746) og hafði þá undir sig lagt því nær allan þann

hluta Niðurlanda, er Austurríkismenn áttu. Að því búna sneru Frakkar vopnum sínum móti Hollendingum, því að þeir höfðu veitt bandamönnum suður á Flandern. En er Hollendingar sáu sér hættu búna, breyttu þeir stjórn sinni. Þar hafði verið landstjóralaus síðan 1702, er Vilhjálmur þriðji dó¹. Nú lagðist lýðveldið niður, en í þess stað tóku þeir yfir sig *landstjóra* (*Generalstattholder*), Vilhjálms prins af Óranfu — hann var kominn af bróður Vilhjálms fyrsta — og er kallaður *Vilhjálmur fjórði* (1747—1751). Var svo á kveðið, að landstjóra-tignin skyldi að erfðum ganga til niðja hans, bæði í karlegg og kvennlegg. En þessi nýji landstjóri var allur annar maður en nafni hans, Vilhjálmur þriðji, hafði verið, þá er hann tók við völdum (1672) og varði ættjörð sína móti Frökkum. Nú mátti Holland þakka öðrum atvikum frið og frelsi. Bandamenn sáu sitt óvænna og beiddu Elísabetu Rússadrotningu hjálpar. Hún tók því vel og lét lið sitt búast til vesturfarar. England vildi gjarna, að friður kæmist á. Frakkland þurfti, þó vel gengi á Niðurlöndum, friðarins við sökum fjáreklunnar heima fyrir og allrar þeirrar óhamingju, sem dunið hafði yfir skipafloata þess og nýlendur. Fyrir því settust menn nú á ráðstefnu í *Aachen* (1748) og tóku að miðla málum; og að fáum dögum liðnum urðu menn sáttir og sammála um þessa friðarkosti: Prússar héldu Slesíu, og Sardinía eignaðist land alt austur að Ticino-fljóti; Don Filippo, annar sonur Elísabetar af Parma, fékk Parma og Piacenza, sem legið hafði undir Austurríki síðan 1735. En að öðru leyti hélt María Theresía öllum erfðalöndum föður síns. Frakkar létu laus þau lönd, er þeir höfðu unnið.

Sj ó á r a s t r í ð i ð (1756—1763)

Sá eini þjóðhöfðingi, sem til nokkurra muna hafði haft ávinning af hinu austurríkska erfðastríði, var Friðrik annar Prússa konungur. Hann hafði aukið ríki sitt með Slesíu, stóru og auðugu skattlandi, sem talið er 740 ferhirn. mílur á stærð, með talsvert á 4. millíón íbúa. Meðan ófriðurinn stóð, hafði hann gjört hvorttveggja, bæði að stöðva Austurríki, þegar sigursæld þess ætlaði að verða um of, og halda Frökkum aftur, þegar þeir ætluðu að verða ofan á; hann hafði komið sér svo vel við, að ríki

1) Sjá Nýju söguna, II. hefti, bls. 68.

hans mátti því nær telja með stórveldum Norðurálfunnar. Þessar aðfarir Friðriks annars og uppgangur Prússaveldis vöktu ófund og óvild annara þjóðhöfðingja gegn honum og ríki hans, þar á meðal fyrst og fremst Maríu Theresíu. Hún gat aldrei gleymt því, að hann hafði rænt Slesíu frá henni. Hún vildi leggja allt í sölurnar til að ná því aftur, sem hún þannig hafði mist; þó margar þúsundir af þegnum hennar yrðu lífið að láta, horfði hún eigi í það, gæti hún að eins náð Slesíu aftur. Þar við bættist og, að henni fanst, að skyldan byði sér að leita hefnda á Friðriki. Hann hafði hrífsað Slesíu eigi einúngis frá Austurríkis keisara, heldur einnig frá hinni katólsku kirkju. Og þó Friðrik lét katólska menn í Slesíu hafa fult jafnrétti við lúterska menn, þá þótti skriftafeðrum Maríu Theresíu slíkt ópolandi, en því, sem þeir „góðu guðsmenn“ sögðu, trúði drottningin í blindni. Hún varði því friðarárum þeim, sem nú fylgdu á eftir Aachenar friðnum, til þess, að búa sig undir nýjan ófrið, bæði með því, að bæta allt sem bezt heima fyrir í ríki sínu, og með því, að fá útlenda þjóðhöfðingja í samband við sig móti Friðriki öðrum. Fjárhag ríkisins kom hún í það horf og í svo góða reglu, að hún hafði, að fáum árum liðnum, meiri tekjur af ríki sínu, en faðir hennar, Karl sjötti, hafði nokkru sinni haft af öllum þeim löndum, er hann ræð fyrir. Keisarinn, maður hennar sem aldrei tók þátt í ríkisstjórninni, kom öllu því fê, er honum varð afgangs frá Toscana, í verzlun og á veltu í Austurríki. Hann stofnaði þar ýmsar verksmiðjur, stóð fyrir útvegum á vopnum og klæðum handa hernum. Hann seldi jafnvel Prússa konungi mæl til manneldis og hey til hestfóðurs, og á ófriðarárunum fekk drottning hans, María Theresía, oftar en í eitt skifti, talsvert fê hjá honum, er hún galt leigu af og setti veð fyrir. Keisarinn var hinn mesti kaupmaður.

Drottningin hafði á undanförunum ófriðarárum séð, að bæta þurfti marga hjá hermönnum hennar, bæði herstjórn og hernaðaráhöld. Hún setti dugandi menn til herstjórnar, en vèk hinum frá, er miður dugðu. Hún lét á hverju ári venja liðsmenn sína við heræfingar; kom sjálf þangað og hvatti þá til dugnaðar í sinni ment, losaði það, sem henni líkaði vel, og sýndi þeim allan sóma, er það áttu skilið. Með því móti tóku hermenn hennar miklum framförum í öllum greinum. Hún setti á

stofn hermanna skóla, og lét kenna þar úngum aðalsmönnum alt, sem til hermensku og herstjórnar heyrði; á þann hátt fékk hún ávalt foringja efni í stað hinna, er fötluðust eða féllu. Þannig kom María Theresía, þó hún væri kona, fótum undir meira og betra herlið, en keisararnir forfæður hennar nokkru sinni höfðu getað. Til þess að allir þættir ríkisstjórnarinnar gætu runnið að kalla saman í eina heild, gjörði hún greifa þann, er *Kauniz* hét, að ráðgjafa-forseta; varð þá meiri eining og meiri samhljóðan í stjórnarmálum, er þau komust öll í eins manns hönd og þaðan til úrslita drotningarinnar. Kauniz var mesli vitsmuna maður og átti mikinn þátt í þeim viðburðum, er síðan urðu. Hann rerir að því öllum árum, að bæði Frakkar, Rússar og fleiri þjóðir gengi í félag með Maríu Theresíu móti Prússa konungi. Að koma fótum undir slíkt félag, var enginn hægðarleikur; einkum var Frakkastjórn lengi treg til þess, því alt í frádögum Franz fyrsta og Karls fimta voru Frakkar og Austurríkismenn svarnir óvinir, og höfðu löngum elt grátt silfur, eins og kunnugt er. En Kauniz var ópreytandi. Hann leiddi Frökkum fyrir sjónir, að allur sá langvinni ófriður, sem verið hefði milli þeirra og Austurríkismanna, hefði staðið báðum þessum þjóðum fyrir þrifum, en aðrar smærri þjóðir haft allan ábata af. Svo hefði það til gengið í þrjátígi ára stríðinu; hvorigir, hvorki Frakkar né Austurríkismenn, hefðu auðgæzt á því, heldur að eins Svíar og ýmsir aðrir smáhöfðingjar; svo hefði það verið í austurríkiska erfðastríðinu, þar hefði Frakkland og Austurríki lagt í sölurnar bæði menn og fê, en til hvers? Til þess að Prússa konungur gæti eignast og haldið Slesíu. Og hverju hefði Friðrik launað Frökkum liðveizluna? Hefði hann eigi reynzt þeim bæði óheill og vanþakklátur? Stórveldin færi miklu betur að ráði sínu, ef þau í sameiningu reðu á hann, í stað þess, eins og að undanförmu, að láta hann siga þeim hvoru á annað. Austurríki ætti að ná aftur Slesíu, það væri þess aðaláform, en Frakkland ætti að eignast löndin fyrir norðan sig, norður á Flandern, og væri það hægðarleikur, því að Austurríki mundi þar fúslega slaka til við bandamann sinn. Auðgefið væri að ná Slesíu úr höndum Friðriks, þegar tvær hinar stærstu þjóðir veittust að málum. Friðrik þyrði eigi annað, en láta Slesíu lausa, er slíkir væru í móti honum, en vildi hann velja þeim mótstöðu,

blyti hann að verða undir, ef til vopna kæmi. Þessar og aðrar fortölur hafði Kauniz fyrir Frökkum, og, þó þær þættu nýstárlegar með fyrsta, festu þær þó rætur í hugum manna, og áttu meðfram þátt í því að mynda samband það, sem þá gjörðist milli Austurríkismanna og Frakka gegn Friðriki öðrum. En aðalhvötin, aðalundirrót sambandsins var þó hatrið til Friðriks annars. Hann var svo harðdrægur í viðskiftum og gjarn til fjár og landa, sem allir vissu, en það var eigi hans verstí ókostur. Hitt þoldu menn miður, hve bitur og háðskur hann var í orðum. Menn sögðu, að um alla konunga Norðurálfunnar og ráðgjafa þeirra lèti hann sjúka í kveðlingum háð og skop. Um konur var hann svo óvæginn í orðum, að engi von var til þess, að þær gætu gleymt því, eða fyrirgefið honum, og til ógæfu hans vildi svo til, að um þær mundir stýrðu konur mestöllu meginlandi Norðurálfunnar. María Theresía, svo heiðvirð kona sem hún var, komst eigi hjá þessum skopyrðum hans. Elísabet Rússadrotning var engin hreinlífskona, enda var henni vel kunnugt um, að Friðrik sagði borðgestum sínum marga óþvegna sögu af ástarbrögðum hennar. Madame Pompadour, er þá ræð mestu á Frakklandi, en var frilla Loðvíks fimtanda, varð þessa verst úti hjá Friðriki. Hún óttaðist svo skæða tungu og sendi menn á fund konungs til að blíðka hann og mýkja á allar lundir, en það kom fyrir ekki. María Theresía hafði aðra aðferð. Hún ritaði Madame Pompadour með eigin hendi mjög ástúðlegt bréf, kallaði hana frændkonu sína og annað þvílíkt. Svo var hatrið megent, að keisaradrotningin, slík kona sem hún var, gleymdi algjörlega sóma sínum og ritaði hinní verstu frillu smjaðurmæli. En þetta breif, og frillunni varð lítið fyrir, að koma Loðvíki fimtanda í samband við Austurríki.

Öllum hinum sömu brögðum beitti Kauniz og erindsrekar hans í Pétursborg, og við þær fortölur Austurríkismanna gjörðist Elísabet Rússa drotning, Péturs dóttir hins mikla, fullkominn óvinur Prússa konungs, og hét Maríu Theresíu liðveizlu sinni. Í þetta samband milli *Austurríkis*, *Frakklands* og *Rússlands* gengu þar að auki: *Saxland* og *Svíþjóð*; hið fyrra, af því að *Brühl*, ráðgjafi kjörfurstans Ágústis þriðja, var svarinn óvinur Friðriks annars; hið síðara, af því að sá flokkur manna, er þar ræð þá mestu, gjörði alt sem Frakkar vildu. Bandameinn þessir þóttust

eiga sigurinn svo vísan, að hver þeirra áskildi sér, þegar björninn væri unninn, ákveðinn hluta af ríki Prússa konungs.

En nú er að segja frá því, er Friðrik annar hafðist að þau árin, er hann sat í friði frá 1745 til 1756. Jafnskjótt sem Sle-síu-ófriðurinn var um garð genginn, tók konungur sér fyrir hendur, að endurbæta alt, sem umbóta þurfi við í ríki hans. Þó margt væri í góðu lagi þar í landi, þegar faðir hans skildi við, hafði sumt verið vanrækt, og sumt gengið miður en vera skyldi í lögum og landstjórn; á hinum fyrstu ríkisárum Friðriks, meðan hann hafði allan hug á ófriðnum, og öllu því er þar að laut, urðu ýms friðsamleg störf út undan, er breyta þurfi til hins betra. Dómsmál öll og dómendur þurftu leiðréttingar við. Lögum og rétti var komið svo, að hinn ríki átti víst að vinna mál sitt, en hinn fátæki að tapa því. Friðrik konungur rak frá embæltum alla óráðvanda dómendur og ónýta, og skipaði dómana þeim mönnum, er hver maður mátti treysta, og svo gekk hann ríkt eftir, að þriðja hvert ár lét hann rannsaka gjörðir allra yfirdómenda í ríkinu. Hann lét semja nýja löghók, er allir hans þegnar skyldi fylgja. Þótti þetta, sem það og var, hin mesta endurbót; lögin gengu nú jafnt yfir alla, og það, sem á mestu stóð, var, að sterkar gætur voru hafðar á, að lögunum væri dyggilega fylgt. Faðir hans hafði í mörgu bætt fjárbag ríkisins, en þó var í þeirri grein margt eftir ógjört. Akuryrkja, iðnaður, verksmiðjur og verzlun gat allt saman tekið miklum umbótum. Fram með Oder-fljótinu neðan frá sjó upp að Kústrin voru mýrar stórar, sem enginn hafði skift sér af. Friðrik lét grafa skurði um mýrarnar og þurka þær allar, og flytja þangað rúmar 3000 búenda; risn þar skjótt upp blómlegar ekrur og auðugar sveitir. Ullarvefnaður var nokkur í landinu, en spunamenn og vefara vantaði stórum; konungur fékk menn úr öðrum löndum, er slíkt kunnu, og lét í því skyni reisa handa þeim smábæi, hátt á þriðja hundrað að tölu, víðs vegar á landsbyggðinni, og setja 200 búendur niður í hverjum bæ. Á sama hátt bar konungur önn fyrir því, að borgirnar tækju framförum í öllum greinum. Hann lét reisa borg þá, er *Svinemünde* heitir, þar sem Oderfljót fellur til sjáfar, dýpka ósinn og gjöra þar höfn góða; við þá bærgjörð tók Stettínarborg miklum þrifum. Í hverri borg voru settar nýjar verksmiðjur; nýjar saltnámur fundu-

ar bæði vestur í Minden og víðar, og hinar gömlu hjá Halle endurbættar og auknar; verzlunarfélag var stofnað í Emden til verzlunar austur á Kína; tollgjaldið lækkað á útfluttri vöru í Stettín, Königsberg og Kolberg, og við það jókst tolltekjurnar meir en til helminga. Af öllum þessum viturlegu ráðstöfunum leiddi það, að árið 1756 voru tekjur ríkisfjárhirzlunnar orðnar 1,200,000 ríkisdöllum meiri um árið, en verið höfðu þegar Friðrik tók við, án þess hann þyrfti að auka skatta á þegnum sínum um eitt fiskvirði, og án þess að taldar sæu tekjur af Slesíu og Ostfrieslandi. Þá voru og íbúar í öllu ríkinu orðnar 5 millíónir manna. «Og með því það er vafalaust — segir Friðrik annar í ritum sínum — að fjöldi þegnanna er auðlegð ríkjanna, þá gat Prússaríki sagt (1756), að það væri helmingi voldugra, en það hafði verið á síðustu árum Friðriks Vilhjálms, föður konungsins».

Það ræður að líkindum, að Friðrik annar hafi eigi gleymt því, er miðað gat til að auka herinn og bæta alt, sem að hermálum laut í ríki hans. Hann hafði vakandi auga á, að til alls væri vandað sem bezt, liðsmenn hraustir og hugprúðir og sem bezt búnir að vopnum og klæðum; að nægtir væru af alls konar áhöldum og vistum í forðabúrum á ýmsum stöðum; varnir í borgunum treystar og styrktar, og kastalar settir þar, sem þurfa þótti. Hann valdi menn mjög til foringja, og lét hafa strángan aga á liðinu, og einatt æfa það við vopnaburð, svo að alt væri sem bezt undirbúið, hve nær sem á þyrfti að halda. Og hann sá gjörla, að þess mundi eigi langt að bíða, enda var honum vel kunnugt um hugarfar nábúa sinna. Hann hafði sína trúnaðarmenn í Víenarborg, París og Dresden, er sögðu honum greinilega alt það, er þar gjörðist, og hann gat um varðað. Hann varð þess vís, að Frakkar, Austurríkismenn, Rússar, Saxar og Svíar og meiri hluti þjóðverja, ætluðu að ráða á hann allir í senn, og skifta ríki hans milli sín þannig: að Frakkar, sem voru fjærstir, og lítil not gátu haft af landeign á Prússlandi svo langt í burtu, skyldu fá part af Niðurlöndum, svo sem í þokkabót, Austurríkismenn Slesíu, Rússar Austur-Prússland, Saxar Magdeborg, Svíar nokkuð af Pommern. Yrði þetta framgengt, mátti kalla, að úti væri um ríki Prússa konungs, og ekkert var líklegra, en að svo margir og voldugir bandamenn, er réðu yfir hundrað millíón-

um manna; mundu sigrast og það í einni svipan á litlu ríki, sem eigi taldi meira en 5 millíónir manna. Landið var þar að auki af náttúrunni mjög illa lagað til varnar móti óvina árásum, þar sem það var alt eitt flatlendi, alt á lengdina, og þó ekki samfast. Víða hafa fjöllin eða sjórinn orðið þjóðunum bezta varnarvirkið á ófriðartímum, en hér var ekki því að heilsa þar sem Prússaiðnd áttu hlut að máli. Og ofan á allt þetta bættist, að Slesía, sem var fjórði hluti ríkisins, undi því eigi sem best, að vera komin undir Prússa, og allir katólskir menn í Slesíu — og þeir voru mjög margir — voru hinir ótryggustu og líklegir til beinnar mótstöðu. Það var því fyrir manna sjónum eigi annað sýnilegt, en að þegar væri útgjört um ríki Friðriks annars.

Hann sá sjálfur glögt, hver hættu vofði yfir. En þó var hann eigi vonlaus. Hann fann varnir í sínu máli; óvinir hans voru langt hverir frá öðrum, sú fjarlægð hlaut að gjöra þeim erftt, að sameina mjög mikið lið á einum stað, og ráðast á konúnginn með ofurefli; hann gat þar á móti á skömmum tíma dregið að sér talsvert lið. Loftslag var mjög ólíkt í löndum bandamanna, og eigi ólíklegt, að sá árstími, sem var vel fallinn til herstarfa fyrir summa þeirra, væri illa fallinn til hins sama fyrir aðra. Ríki hans var laust við ýmsa af þeim ókostum og annmörkum, er finna mátti hjá bandamönnum. Herlið það, er menn höfðu á að skipa, mátti eigi eingöngu meta eftir stærð landanna eða höfðatölu þjóðanna. Konungur hafði að vísu miklu minna lið en bandamenn, — hjer um bil 100,000 móti 600,000 — en í liði hans var að kalla hver maður valinn, alt liðið var sem einn líkami, harðsnúinn og vel vígur. Bandamenn voru allir í stórskuldum; Prússar voru skuldlausir og áttu talsvert fê fyrirbyggjandi. Enginn konungur hafði grætt fê á ófriðarárunum nema Friðrik einn. En mest var þó í það varið, að hann var einn um alla stjórn í ríki sínu, en óvinir hans voru margir um völdin. Hjá öllum bandamönnum er vant að brydda á sundurlyndi, samtakaleysi, tortryggni og andvaraleysi; fyrir öllu þessu mátti ráð gjöra einnig hjá þessum bandamönnum. Friðrik var alræðismaður í ríki sínu, og þar var einungis eina vilji og ein framkvæmdin. Hugsast gat, að afbragðshershöfðingja tækist, að tesja ófriðinn fyrir bandamönnum, en að vinna eins mánaðar tíma var hinn mesti vinníngur. Tyrkir gátu breytt sig suður við Dóná,

og þá var Austurríki hætta búin. Frökkum gat snúizt hugur, svo þeir sæu, að þeir hefðu rasað fyrir ráð fram, er þeir brugðu af fornri venju og gengu í lið með Austurríki. Loksins gat dauðinn losað Prússa konúng við einn eður annan af fjandmönnum hans, er hættulegastir voru, og við það gat margt og mikið breyzt í málefnum Norðurálfunnar.

Það var enn eitt atriði, sem Friðrik misti eigi sjónar á, og gjörði fremur að glæða en veikja vonir hans. Friðurinn, sem Frakkar og Englendingar sömdu með sér 1748, var reyndar enginn friður, heldur að eins vopnahlé í Norðurálfunni, en í hinum álfunum eigi einu sinni vopnahlé. Austur á Indlandi áttust þeir ílt við Frakkar og Englendingar. Alt hið sama átti sér stað milli þeirra suður á Guíneaströnd í Afríku. En mest voru þó brögð að fjandskap þjóða þessara vestur í Norðurameríku; þar gekk eigi á öðru en sífeldri baráttu og manndrápum. Þessi víðureign þeirra í öðrum heimsálfum jók óvildina og hatrið millum þeirra hér í álfunni. Sá sem því var með öðrum hvorum, hlaut að vera hins óvinur. Hefði Friðrik mált kjósa, hefði hann vafalaust verið með Frökkum, en þeir gáfu honum eigi kost á því. Hann hlaut þess vegna að gjörast sambandsmaður Englendinga. Hann gat reyndar eigi búizt við, að þeir, sem urðu að berjast um sama leyti í áðurnefndum þremur heimsálfum, sem höfðu herskip á floti nálega um öll höf jarðarinnar, mundu geta sent herlið að nokkrum mun til Þýskalands, en Englendingar voru hin láng-auðugasta þjóð á þeim tímum, og þó auður þeirra þá væri lítil í samanburði við það, sem hann er nú, voru þeir samt svo ríkir, að þeir þurftu eigi að taka mjög nærri sér, þó þeir létu svo mikið fé af hendi rakna við Friðrik konúng, að nægði til þess að gjöra út heilan her.

Þess er áður getið, að Friðrik annar átti sér trúnaðarmenn við hirðir flestra konunga Norðurálfunnar, er létu hann vita hvað á hverjum stað gjörðist. Einn af þeim mönnum var í Dresden, aðsetursstað kjörfurstans af Saxlandi. Sá maður sendi Friðriki eftirrit af bréfum til kjörfurstans frá stjórninni í Vín og Pétursborg. Af þeim bréfum vissi Friðrik alt, hvað bandamönnum leið. Hann vissi, að þeir hvor um sig höfðu liðssafnað, og að það var áform þeirra að halda því liði sem fyrst inn í lönd hans. Austurríkismenn urðu fyrstir til og sendu her

manns norður á Böhmen sumarið 1756; þaðan og austur á Slesíu er, eins og menn vita, að eins yfir stuttan fjallveg að fara. Þegar Friðriki bárust þessi tíðindi, ritar hann Maríu Theresíu bréf og spyr hana, í hverjum erindum lið hennar hafi verið sent til Böhmen, og hvort hún ætli að halda gjörðar sættir við sig eður eigi? Kauniz ráðgjafi hennar svaraði mjög á huldu, svo að skilja mátti á marga vegu; en svo mikið varð þó af svarinu ráðið, að keisara-drotningin vildi, að til vopna kæmi, en, að konungur skyldi hafa upptökin. Þó voru allar líkur til, að árið mundi svo liða, að eigi yrði af ófriði, því að bréfin frá Dresden höfðu sagt Friðriki, að Rússar yrðu eigi búnir fyr en bið næsta ár, og þess vegna líklegast, að Austurríkismenn mundu biða þess, að hinir aðrir bandamenn yrðu að öllu viðbúnir.

Þegar hér var komið, átti Friðrik um tvent að velja: annaðhvort biða átekta þangað til óvinir hans ræði á hann, eða verða fyrri til bragðs og ráðast á þá. Honum var kunnugt, að kjörfurstinn á Saxlandi hafði eigi vígbúnar nema 18000 manna, en að missiri liðnu átti sá her að vera orðinn alt að 40000. Honum var og hitt kunnugt, að Rússar mundu eigi verða búnir fyr en á næsta vori. Ef hann nú biði eftir þeim vetrarlángt, gætu þeir hvor um sig búið liðið sem best, og haldið því inn í lönd hans. Þess vegna þótti Friðriki réttara gjört, að verða á undan þeim, þó það hæti svo, að hann hefði upptökin og ræði á þá, en þeir eigi á hann. Honum þótti það líka miklu skifta, að ófriðurinn yrði hafinn og háður, eigi í hans löndum, heldur í óvinanna löndum. Þess vegna ræð hann það af, að verða fyrri til og veita þeim aðför þegar í stað. Þannig byrjaði *sjö ára stríðið* (29. Ágúst 1756). Friðrik tvískifti liði sínu. *Schwerin* gamli, sem fyr er nefndur, hélt annari herdeildinni af Slesíu vestur á Böhmen. En hin herdeildin, 60000 manna, hélt suður á Saxland. Fyrir þeim her var konungurinn sjálfur. Hann vildi ekki eiga Saxa yfir höfði sér, þegar hann færi suður á Böhmen til móts við *Schwerin*; þess vegna fór hann til Saxlands. Þar varð engi fyrirstaða. Prússar tóku allar helztu borgir, og höldu til Dresden, höfuðborgar landsins. Þaðan var þá kjörfurstinn farinn með allan sinn her, og seztur að í fjöllum hjá *Pirna*; það er lítil bær upp með *Elfunni* (*Elben*). Drotning kjörfurstans var eftir í Dresden. Borgin gafst

þegar upp fyrir Prússum, og Friðriki var þá um ekkert eins ant elias og það, að geta náð frumritum þeim, er hann vissi að þar voru í bréfasöfnum kjörfurstans, því að þau bréf gátu sýnt og sannfært aðra um allt ráðabugg óvina hans. Drotníngu voru bréf þessi eins vel kunnug eins og Friðriki, þess vegna hafði hún safnað þeim saman, og ætlaði einmitt þá að senda þau anstur á Pólen¹, en varð of naumt fyrir. Prússneskir hermenn komu og tóku þau, hvað sem drotníngin sagði, og færðu konungi. Lét hann óðara prenta hin helztu, og má nærri geta, hver og hve misjöfn áhrif sú nýlunda hafði gjört á ýmsar þjóðir hér í álfunni. Nú sáu menn, að Friðrik hafði átt hendur sínar að verja, og að hann hafði að eins orðið fyrri til en fjandmenn hans. Þegar þetta var um garð gengið, hélt konungur suður til fjalla, þar sem Saxa her sat. Konungur sá skjótt, að hann gat þeim ekki grand gjört á þeim stað, því að náttúran hafði svo rammlega víggirt hann, að fáir menn gátu vel varizt mörgum. En svo mikið gat konungur að gjört, að hann setti þann hergarð um Saxa, að þeir gátu eigi þaðan komizt, hvernig sem þeir reyndu. Nú beið hann svo nokkra daga, en þá frétti konungur, að *Brown* hershöfðingi væri á leiðinni sunnan úr Böhmen með miklu liði þeirra Austurríkismanna, til þess að bjarga Söxum úr herkvíum Prússa. Konungur tekur það ráðs, að hann lætur nokkurn hluta liðsins verða eftir til þess að varna Söxum útgöngu, en heldur sjálfur með hinn hlutann suður á Böhmen, og hittir Brown (1. Okt.) hjá bæ þeim, er *Lowosiz* heitir; varð þar harður fundur með þeim og lyktaði svo, að Prússar fengu sigur, en Austurríkismenn hopuðu undan suður í land, þangað sem annar her var fyrir undir forustu *Dawns*, hins ágætasta hershöfðingja, og mun hans slóðar getið. En sem Saxar fréttu ófarir Browns, og sáu, að úti var að sinni um hjálp frá Austurríki og vistir voru þrotnar, gafst allur þeirra her upp fyrir Prússum, en Ágúst kjörfursti fór austur á Pólen og hætti sér eigi í hers hendur. Friðrik gaf alla hina saxnesku foringja lausa, og gjörði þeim einungis þann kost, að bera eigi oftar vopn móti Prússum, en undirmenn lét hann ganga í herþjónustu hjá sér, og reyndust þeir margir illa, eins og við mátti búast, og

1) Kjörfurstinn var einnig konungur yfir Pólen (Ágúst þriðji), en Póllendingar tóku engan þátt í þessum ófriði.

struku undan merkjum, er þeir sáu sér færi. Nú var komið fram um veturnætur. Konungur sá, að hann gat eigi frekara aðhafzt að sinni, heldur því sumu liðinu til Saxlands, og lætur þar fyrirberast um veturinn, (enda var nú Saxland alt á hans valdi), en sumt liðið hafði aðsetu í Slesía. Austurríkismenn létu þokast lengra suður á Böhmen og bjuggust þar fyrir um veturinn. Prússar höfðu að vísu allmikið að gjört á jafnstuttum tíma, þar sem einn af bandamönnum (kjörfurstinn af Saxon) var orðinn óvígur og úr sögunni, en þó var hitt meira, sem eftir var óunnið, enda bjuggust allir við stórtíðindum hið næsta ár.

Ófarir Saxa við Pirna, og óslgur Austurríkis við Lowosiz þóttu, sem vonlegt var, mikil tíðindi, og nú tóku bandamenn af alefli að búa lið sitt til nýrra stórræða og stórkostlegra hefnda. Rússar höfðu 100,000 manns undir vopnum og sendu það lið vestur á Prússland. Ýmsir smáhöfðingjar og borgir á Pýzka-landi gjörðu út 60000 manna til liðs við Maríu Theresíu, og settu prinsinn af Hildburghausen yfir. Sá her var nefndur *ríkisher*. Frakkar sendu 100,000 manns til Rínar, og fengu þar að auki Svía til að senda nokkrar þúsundir manna suður á Pommern. Af Austurríki og Ungarn var von á óflýjanda her, og máttu Prússar búast við, að úr öllum áttum streymdi óvina her að þeim milli 5—600,000 manna. Móti öllum þeim grúa gat Friðrik annar í mesta lagi sett 200,000 manna, að því liði meðtöldu, er hann fekk hjá bandamönnum sínum: Englands konungi, landgreifanum af Hessen Kassel, og hertogunum af Brúnsvík og Gotha. Þessum bandamönnum sínum ætlaði hann að taka móti Frökkum vestur í landi. Móti öllum Rússaher sendi hann hershöfðingja þann, er *Lehvald* hét, með einar 14000 manna, og móti Svíum gat hann eigi fleiri menn mist en 4000. Hann vildi sem minnst veikja aðalher sían, því að honum ætlaði konungur að beita móti Austurríkismönnum, sem voru langflestir og vobalegastir.

Um veturinn (1756—1757), meðan Friðrik var á Saxlandi, lét hann það í veðri vaka, að hann ætlaði sér einungis að verjast óvinum sínum, en hitt kæmi sér elgi til hugar, að halda suður á Böhmen og sækja þá þar heim; og til þess að styrkja menn í þeirri trú, lét hann víggirða Dresden að nokkru leyti, og

slúkt hið sama lét hann gjöra í Slesíu. En hann bjó reyndar yfir allt öðrum ráðum. Um vorið (1757). fyr en nokkurn varði, var bæði sá her, er konungur hafði á Saxlandi, og hinn, er hann hafði austur á Slesíu, kominn suður yfir fjöll og ofan á Böhmen, og alt suður að Prag. Þar var annar aðalher Austurríkismanna, og þeir Karl af Lothringen og Brown fyrirliðar. Hinn aðalherinn var ókominn, en hann var á leiðinni að sunnan, og hans var von á hverjum degi. Fyrir þeim her var Daun. Konungi þótti ekki ráð að biða þess að Daun kæmi, og fyrir því veitir hann þeim Karli og Brown aðgöngu þegar í stað, þó þeir hefðu hið bezta vígi, og þó Schwerin gamli vildi fresta atlögunni, þángað til búið væri að kanna til hlítar landslagið, þar sem orustan skyldi standa. Það var 6. dag maí (1757) er þessi orusta stóð hjá Prag. Prússar áttu mjög erfitt aðsóknar sökum landslagsins, og allra þeirra varnarvirkja og vígvæla, sem Brown hafði sett fyrir þá; enda hafði hann lært í skóla Eugens og var margþvældur hershöfðingi. Þó lauk svo þeirra viðskiftum, að Prússar fengu sigur. Flýði Karl með 40,000 manna inn í Prag, en annar hluti liðsins leitaði undan og suður þángað sem Daun var. Brown varð sár til ólífis. Svo segja sumir sagnaritendur, að orusta þessi hafi verið hin mannskæðasta hér í álfunni frá því, er Malplaquet-orustan varð (1709) og þángað til Napoleon fyrsti og Rússar börðust við Eylau (1807). Menn ágættu mjög framgöngu konungs og Ferdinands hertoga af Brúnsvík þenna dag, en þó bar Schwerin gamli af öllum. Þá er orustan stóð sem hæzt, og að því komið, að fótgöngulið Prússa mundi bila hugur og hörfa undan, greip hin gamla hetja merkið af merkismanninum, brauzt fram í móti fylkingum óvinanna og eggjaði menn sína sem mest. Fylgdu þeir þá rösklega á eftir, en Schwerin var skotin til bana. Hann var á áttæðisaldri, er hann féll. Svo hefir Friðrik sagt, að síður vildi hann missa Schwerin einn en 10,000 manna. Austurríkismenn mistu 24,000 manna í orustu þessari, en Prússar 18,000.

Friðrik hafði nú sömu aðferðina hér, eins og hann hafði haft árið fyrir. Hann lét mikið lið verða eplir og setjast um Prag, en með 30,000 manna heldur hann sjálfur suður til móts við Daun, því honum þótti alt undir því komið, að yfir lyki með þeim. Daun hafði yfir 60,000 manna, en hann var allra

manna gætnastur, og vildi því eigi leggja þá þegar til orustu við Prússa, heldur settist hann að í fellum þeim og hálsum, sem eru fyrir ofan *Kollín*. Höfðu Austurríkismenn þar svo gott vígi, að því nær þótti óvinandi. Þegar Prússar komu þangað, skipaði konungur þegar mönnum sínum til atlögu (18. júní 1757). Gjörðu þeir svo harða hrið á hinn hægri fylkingararm Dauns, að þar svignaði alt fyrir, og lítið vantaði á, að Austurríkismenn snerist á flóttu; en það varð þó eigi, því bæði var liðsmunur helzt til mikill, og þó hitt eigi síður, að út af þeirri skipan var brugðið, er konungur hafði gjört. Og hún var sú, að hinn hægri fylkingararmur Prússa skyldi halda kyrru fyrir, og hafast ekki að, fyr en konungur segði svo fyrir. En einn af foringjum Prússa, er Mannsteinn hét, ofurhugi einn, gat eigi kyrr verið, og ræð á það lið óvinanna, er þar stóð í móti. Tókst þá bardagi um allan herinn, og konungsmenn dreifðust þvert á móti fyrirætlun hans; kom þá fram liðsmunurinn og varð Prússum til allra óheilla. Biðu þeir þar hinn mesta ósigur og létu margt manna. Konungur hélt því líði, er undan komst, til Prag, en Daun veitti eigi efturför. Þó að Daun væri eflaust bæði vitur og þrautgóður hershöfðingi, þá liggur við, að segja megi um hann, og með meira sanní, hið sama sem Maharbal hershöfðingi sagði við Hannibal, eptir orustuna við Cannas: „Þú kant að vinna sigur Hannibal, en þú kant eigi að neyta sigursins¹.“ Þeir voru í mörgu ólíkir Friðrik og Daun, en það skildi á með þeim eigi hvað minnst, að þegar Friðrik vann sigur, kunni hann allra manna bezt að færa sér sigurinn í nyt, og þegar hann beið ósigur, þá varð honum alt að ráði, og þá var hann hvað viðsjálastur og voðalegastur sínum óvinum. Eptir þenna mikla ósigur við Kollín lét konungur hætta umsátrinu um Prag. Hann hafði mist fótfestu í Böhmen og fyrir því hélt hann sumu liðinu norður á Saxland, en sumu til Slésku; yfir Slésku-liðið setti hann prinzinn af Bevern og fekk honum til ráðaneytis þann mann, er Vinterfeld hét, ágætan fyrirliða og einn sinn bezta vin; en sjálfur fór Friðrik til Saxlands með meginherinn.

Hér mátti segja, „að eigi væri ein báran stök“, þar sem

1) *Livius*. 22. bók, 51. kap. „*Vincere scis Hannibal, victoria uti nescis*“.

Friðrik átti hlut að máli, því alls konar vandræði og harmar bárust honum að höndum um þessar mundir.

Þetta hið sama sumar höfðu Frakkar brotitz vestan frá Rín og af Niðurlöndum inn á Þýzkaland, lagt undir sig lönd Prússa á Vestfali og Ostfrieslandi, og haldið svo frám stefnunni til Hannóver og Hessen. *D' Etrées* hét yfirforingi þeirra. Hertogann af *Cumberland*, sem stýrði bandamanna her Friðriks þar vestra, skorti vit til að þekkjast þau ráð, er Friðrik hafði bent honum á, en barðist við Frakka hjá *Hastenbekk* (26. júlí) og beið ósigur. *D' Etrées* var kvaddur heim til Frakklands, þó hann hefði þýunnið sigurinn, en *Richelieu*, „marskálkur“, settur í hans stað. Hann fór herskildi yfir Hannóver og Hessen, og lagði þau lönd undir sig, krepti þá svo mjög að hertogannum af *Cumberland*, að hann gjörði (7. sept. mán.) svofeldan samning við Frakka í *Zeven* (Kloster-Zeven): að hið hannóverska lið skyldi halda af landi burt og norður yfir Elfunu, en hitt annað liðið heim til áttbaga sinna. Gátu nú Frakkar leikið lausumj hala og haldið í makindum austur í móti Prússum. *Richelieu* sendi allmikið lið undir yfirstjórn þess höfðingja, er *Soubise* hét. Hann var aldavinur *Madame Pompadour* og mesta hetja í hirðsölum Frakka. Herdeild sú, er *Soubise* ræð fyrir, átti að sameinast *ríkisher* þeim, sem fyr var nefndur, og prinzinn af *Hildburghausen* var yfir skipaður. Allur þessi her til samans kominn átti því næst að reka Friðrik burt af Saxlandi, og þóttust þeir *Soubise* nú hafa ráð hans í hegdi sér.

Engu minni var hættan sem vofði yfir Prússum norður og austur í landi. Rússar komu að austan með óflýjanda her undir forustu *Apraxíns* og *Fermars*, og eyddu bygðina þar sem þeir fóru yfir. Nálægt *Gross Jägerndorf* á Austur-Prússlandi ræðst *Lehwald* í móti þeim (30. ágúst 1757), en hafði ekki bolmagn móti slíku ofurefli og beið ósigur.

Svíar sátu norður á Pommern, yfir 20,000 manna, og þoknuast suður á bóginn, og gátu gjört Prússum mikið ógagn, ef þeir hefði sýnt nokkra rögg á sér. Friðrik hafði ekki lið, er hann gæti sent móti þessum fjandmönnum sínum. Af þessu, sem nú hefir verið sagt, er það ljóst, að Friðrik var umsetinn af óvina liði á allar hendur. Ofan á allt þetta bættist sá harmur, að einmitt um þessar mundir andaðist móðir hans, er hann

unni mjög, og bróðir hans *Ágúst Vilhjálmur*, er ríkið átti að erfa eftir Friðrik, og var sagður vitur maður og vinsæll.

Það þurfti mikið þrek til þess, að guggna eigi að fullu og öllu fyrir öllum þeim hættum og öllum þeim harmi, sem nú dandi yfir Friðrik; flestir töldu útséð um hann og ríki hans. Hann einn lét eigi hugfallast, og honum var ljóst, að hér var það áræðið eitt og snarræðið, sem gat bjargað. Fyrir því lætur hann nokkurn hluta liðsins verða eftir á Saxlandi til varnar móti Austurríkismönnum, en sjálfur heldur hann með rúmar 20,000 manna vestur að Saale-fljóti. Það kemur sunnan og vestan úr Fichtelfjöllum og fellur vestan í Elfunu. Þeir Soubise höfðu brotið brýr allar af ánni, en Prússar komust yfir á öðrum stað. Var þess nú skamt að biða, að fundum þeirra bæri saman. Frakkar höfðu sæt í ýmsar borgir þar fyrir vestan ána. Ein af þeim borgum heitir Gotha. Þar var Soubise sjálfur fyrir með 8000 vígra manna, er *Seydlitz*, riddaraforingi Prússa, kom þangað með 1500 manna. Soubise sat yfir borðum í höll herzogans með fyrirliðum sínum einmitt þá er Prússar komu að borginni. Varð koma þeirra með svo miklum hvatleik og hærðræði, að Frakkar stukku allir úr borginni, en Seydlitz settist með sína menn að krásum þeim, er Soubise varð svo haslarlega frá að hverfa. En það er frá Friðriki konungi að segja, að hann nemur staðar skamt frá þessum þeim, er *Rosbach* heitir, og setur þar herbúðir sínar. Þar voru Frakkar og ríkisherinn á næstu grösum. Þótti þeim konungurinn þegar genginn þeim í greipar, er hann var kominn svo liðsár í nánd við allan þann mikla her, sem þeir höfðu; báru þeir nú ráð sín saman, hvernig þeir skyldu umkröngja konung og menn hans og láta engan á burt komast. Snemma morguns 5. dag nóvember tóku þeir Soubise að hreyfa sig og þoka fylkingum á þær til teknu stöðvar. Friðrik hélt kyrru fyrir í tjöldum sínum, og lét menn sína matast, eins og ekki væri að, og hrærði sig hvergi. En er leið að miðmunda, lætur hann taka ofan tjöldin, og að vörmu spori eru allir hans menn vopnaðir og hver kominn þangað, sem honum er skipað. Því næst tekst orustan, og verða þar skjót umskifti. Eftir tæpar tvær stundir eru þjóðverjar og Frakkar flúinir víða vegar. Af Prússum féllu í orustu þessari 90 manna, en

270 urðu sárir. En hinir mistu þar um 10,000 manna, er sumir félln, en sumir teknir höndum; og urðu að athlægi.

Þegar Richelieu frétti þessar ófarir; þorði hann eigi að haldast þar við, sem hann var; og sneri sem skjólast aftur vestur á Hannóver, en konungur gat eigi neytt sigursins eins og hann vildi, því allt var í sári anstur á Slesíu. Karl af Lothringen og Daun höfðu haldið öllu liðinu þangað, meðan konungur var í vesturförinni, unnið hina sterku kastalaborg *Sveidnix* (11. nóvember) og höfuðborgina Breslá (24. nóvember), og handtekið prinzinga af Bevern, yfirforingja Prússa þar eystra, en Vinterfeld var fallinn. Það mátti heita, að Slesía væri öll á valdi Austurrikismanna. Konungur átti um tvent að velja, annaðhvort að missa Slesíu fyrir fult og alt, eða vinna hana aftur úr höndum óvina sinna, og það þegar um haustið. Fyrir því einsetti konungur sér að ráða á Austurrikismenn, jafnskjótt sem hann kæmi austur á Slesíu, þó hann ætti við ofurefli að berjast, þar sem þeir höfðu hálfu meira lið en hann. Konungur hélt nú austur á Slesíu sem hraðast, og við bæ þann, er *Leuthen* heitir, skamt frá Breslá, mætti hann þeim Karli og Daun. Áður en orustan tókst talaði Friðrik fyrir liðsforingjum sínum, en það var eigi hans vandi, og sagði meðal annars: „Eg ætla þvert á móti öllum reglum hernaðaríþróttarinnar að ráða á sjandmenn vora, þó þeir séu þrefalt liðsleiri en eg. Hér er eigi um það að ræða, hve margir þeir eru, eða hversu góð vígi þeir hafa. Allt er undir hugrekki yðar komið, og að í engu sé út af því brugðið, er eg segi fyrir. Eg hlýt að ráðast í þetta fyrirtæki, annars er alt farið. Vér hljótum að sigrast á óvinum vorum, ella liggja dauðir frammi fyrir skotgörðum þeirra. Þannig hugsa eg, þannig mun eg breyta. Látið berast um herinn, að eg krefjist hlýðni, og það skilyrðislaust, af hverjum liðsmanni, þegar þér minnist þess, að þér eruð Prússar, þá munuð þér og sýna yður verðuga þess nafns. En sé nokkur sá yðar á meðal, er eigi hafi hug til að fylgja mér, þegar um lífið er að tefla, má hann fara hæðan í friði, og þó ásmælislaust af mér. Lífið heilir og vel, herrar góðir; að litlum tíma liðnum höfum vér annaðhvort unnið sigur, eða vér sjáumst aldrei framar. Þessu næst tókst orustan og að þrem stundum liðnum hafði konungur unnið sína frægasta sigur. Hér sýndi það sig til fulls, hvílkur hershöfð-

Íngi Friðrik annar var. Og svo sagði Napóleon fyrsti: «Þessi orusta var meistaraverk. Hún ein nægir til þess, að Friðrik á með öllum rétti sæti meðal hinna mestu hershöfðingja, sem nokkru sinni hafa uppi verið». Að hálfum mánuði liðnum hafði konungur tekið og felt og tvístrað svo Austurríkismönnum, að af 90,000 manns komust einar 35,000 með illan leik vestur á Böhmen. Öll Slesía, nema Sveidniz, var nú aftur á hans valdi, nú gat hann sezt þar að í næði vetrarlángt, og nú stóð óvinum hans miklu meiri ótti af honum, en nokkru sinni áður.

Hættu þeirri, sem vofði yfir Prússlandi og Pommern, var um standarsakir aflétt, því að eftir fenginn sigurinn yfir Lehvald, sneri Apraxín heim aftur til Rússlands með annan sinn her, eftir boði Bestuchefs ráðherra Elísabetar drottningar. Hún hafði sýkt, svo menn hugðu henni eigi líft. Bestuchef hataði Pétur stórfursta, er koma átti til ríkis eftir Elísabetu, og ætlaði sér að steypa honum úr völdum, vildi því hafa Apraxín og lið hans heima við til styrktar. En á því þurfti eigi að halda; drottningu batnaði að því sinni. Eftir að Rússar voru farnir austur, sendi Friðrik konungur Lehvald móti Svíum, og hrakku þeir fyrir honum norður til Stralsund og út á Rügen.

Afreksverk Friðriks konungs og kappa hans spurðust um allar heimsálfur. Sigurinn við Rosbach og Leuthen var á hvers manns vörum, og bæði vinir og óvinir urðu að játa, að enginn hershöfðingi, er þá var uppi, kæmist til jafns við Prússakonung að herkænsku og allri ráðsnild. Það var eigi hvað sízt á Englandi, að menn dáðust að honum og frægðaryerkum hans, og þaðan fóru ýmsir úngir menn eðalbornir austur á Prússland og beiddust viðtöku í herliði Prússa, til þess að geta lært hernáðar-íþrottina hjá hinum mikla hershöfðingja. En Friðrik færðist undan því með hægð. Aginn var harður, er hann hafði á liðsmönnum sínum. Jafnvel af fyrirliðum sínum heimtaði konungur svo mikla sjálfsafneitun og sparneytni í öllum greinum, að eigi var meira krafið í nokkru múnklifi. Hverra manna, sem þessir fyrirliðar hans voru, eða hversu mikil völd sem þeir höfðu á hendi í hernum, máttu þeir, til dæmis að taka, eigi matast nema af lindiskum og með tinskeiðum, og alt var þessu líkt. Konungur þóttist vita, að hinir ungu og ríku aðalsmenn frá Englandi, munðu tala slíkum sið og slíku harðrætti illa, og af þeirra

siðum gæti kviknað óánægja og ýmsir vafningar. Hann færðist því undan, að veita hinum göfugu en vanstiltu gestum viðtöku meðal liðsmanna sinna. En England styrkti Friðrik á annan veg, er kom sér miklu betur. Hann fékk þaðan árlegan styrk, hér um bil sjö hundruð þúsund pund sterling, og fyrir það fé gat hann aukið her sinn um margar þúsundir manna. Pitt (hinn eldri), er þá ræð mestu á Englandi, kvaðst skyldu verja þýzka-land vestanvert móti Frökkum, ef Friðrik að eins vildi ljá þángað duganda hershöfðingja. Friðrik léði honum *Ferdínand* hertoga af Brúnsvík, er verið hafði með Friðriki um hríð og þótt hinn nýtasti maður. Var nú Ferdínand settur yfir Eng-landinga, Hannóversmenn, og málalið úr ýmsum stöðum á þýzka-landi. Gafst Ferdínand svo vel, að hann var talinn ganga næst Friðriki af öllum hershöfðingjum, er þá voru uppi. Ferdínand tók við þeirri herstjórn seinast í nóvember 1757, og jafnskjótt rak hann alt óvina lið úr öllum eystri hluta Hannóvers vestur yfir Aller-fljót, og skömmu eftir nýár 1758, meðan allir sátu í sínum vetrarbúðum, tók hann sig upp og rak Frakka alveg út úr Hannóver og Hessen; að fárra vikna fresti hafði hann rekið allan hinn frakkneska her vestur yfir Rín og tekið höndum 11000 manna. Clermont greifi var þá yfirforingi Frakka, höfðu menn búizt við meiru af honum en Richelieu og Soubise, en hann var enginn maður til að mæta Ferdínandi.

Um vorið eftir (1758) náðu Prússar Sveidalz úr höndum Austurrískismanna eftir lánga umsát. Nú bjuggust menn við, að Friðrik mundi ráðast á Böhmen, því að þar sat Daun með sinn liði, en konungur gjörði það þó eigi, heldur hélt hann með herinn suður á Mähren og settist um borg þá er Olmüz heitir. Það er sterklega víggirt borg, og fengu Prússar með engu móti tekið hana, einkum fyrir þá sök, að hershöfðingi sá, er *Loudon* hét, náði öllum þeim vistum og hergögnum, er konungur vænti á eftir sér norðan af Slesíu. Var það svo mikið góz, að flutt var á 3000 vögnum. Náði Loudon því öllu saman, og hann ætlaði sér þar á ofan hitt, sem meira var, að banna kon-úngi leiðina aftur norður til Slesíu, eða taka hann, ef auðið yrði. En með viturleik sínum og snarræði komst Friðrik slysalaust fram hjá óvinum sínum. Var það nú áform hans, að búast þar um fyrst um sinn og hafa gætur á Daun. En þá kom sú fregn,

að Rússar væru komnir vestur á Pommern, hefðu lagt undir sig allar sveitir þar fyrir austan (Östpreussen og Vestpreussen), og gjört þar ótal grimdarverk, hvar sem þeir kæmu. Friðrik sendi hershöfðingja þann, er *Dohna* hét, móti Rússum með 20,000 manna, en þeir höfðu ofurefli liðs, og gat hann eigi stöðvað för þeirra. Nú lætur Friðrik konungur *Keith*¹, einn af sínum besta hershöfðingjum, verða eftir til landvarnar á Slesíu, en heldur sjálfur með 14000 manns í móti Rússum. Á leiðinni hætir hann við sig liði því, er *Dohna* var fyrir. Þegar konungur sá lið þetta, sagði hann við þenna hershöfðingja: «liðsmenn yðar eru einkar vel búnir. Eg kem hér með nokkra, sem líta út ver en fjandinn sjálfur, en þeir bíta». Þó Friðrik hefði hálfa minna lið en Rússar, hikaði hann samt eigi við, að ráða á þá þegar í stað, er þeir hittast (25. ágúst); en það var hjá bæ þeim, er *Zorndorf* heitir, skamt fyrir austan Oder-fljót. Orustan tókst um dagmál og stóð allan dag til náttmála; var þar barizt af svo mikilli grimd, að hvorugir þurftu að griðum að spyrja, og því varð þar hið ógurlegasta mannsfall. Konungur vann sigur, og átti það einkum að þakka hreystilegri framgöngu Seydlizar og riddaraliðs þess, er hann ræð fyrir. Rússar þóttast eigi sigraðir til fulls, en þó treysti Fermor, yfirforingi þeirra, sér eigi að haldast þar lengur við, og lét undan síga austur á Pólland. Friðrik skorti bæði þúður og kúlur til þess, að geta unnið á þeim eins og hann vildi. Nú var konungi eigi til setunnar doðlið þar nyrðra, því að á hverri stundu mátti búast við, að hinar smáu herdeildir Prússa á Slesíu og á Saxlandi yrðu ofurefli þeirra Loudons og Dauns að bráð.

Hinrik prins, bróðir Friðriks annars, hafði verið settur til varnar á Saxlandi. Hann hafði aðaletbóvar sínar við Dresden; hann var einhver hinn ágætasti af hershöfðingjum Prússa um þær mundir. Hinrik þóttist sjá fyrir, að hann mundi eigi til lengdar geta varizt Austurríkismönnum, því að við ofur-

1) *Keith* var skozkar eðalmaður, hafði þjónað ýmsum konungum og gefizt alls staðar vel. Frá Rússlandi kom hann til Friðriks annars og reyndist honum hinn þarfasti maður. Það var *Keith*, sem sagði við Friðrik litlu fyrir orustuna við Hochkirch: «Austurríkismenn eiga skilið, að verða hengdir, ef þeir láta oss hér í náðum». «Þeir óttast meir Prússa en gálga», mælti konungur.

eðli var að elja. Hann lét því konúnginn vita, hve nauðulega hann væri staddur, og beiddist liðs. Konúngur brá þegar við og heldur Suður á leið til Saxlands. En sem Daun fréttir til ferða hans, gjörir hann konúngi fyrirsát á hæðum nokkrum, sem kendar eru við Kitliz, austan til á Saxlandi; þar hafði Daun ór-ugt vígi. Konúngur gat, ef hann hefði viljað, komizt fram hjá Daun, en bæði seinlæti Dauns og hamíngja sú, er því nær ætíð hafði fylgt konúngi, gjörði hann djarfari en skyldi, og þess vegna setti hann hertjóld sín í nánd við þorp eitt, er *Hochkirch* nefnist, og órutt frá Austurríkismönnum. Nokkrir af helztu hershöfðingjum hans, *Keith*, *Ziethen* og *Seydlitz*, sögðu sem satt var, að slíkt væri hið mesta hættuspil, þar sem vígi væri hið versta, og slúnginn foringi með ofurefli liðs órskamt á burtu. En konúngur lét sem ekki sakaði, og trúði betur njósnarmanni sínum, en sá hinn sami var enn meiri vinur Dauns, og sveik konúng í trygðum.

Á þessum stöðvum sátu hvorirtveggja þrjá daga, og hreyfðu sig eigi, en á fjórða degi ætlaði konúngur að halda þaðan á burt. Aðfaranótt þess dags (14. október) áður en ljóst var orðið, og meðan allir Prússar voru í fasta svefni, nema riddaralið *Ziethens*, ræð Daun með öllu liði sínu á konúngsmenn. Þeir vöknudu við vöndan draum og grípu til vopna, en urðu þess bráðum vísari, að Daun var búinn að ná mörgum fallbyssum þeirra, og einmitt á þeim stað, er sízt skyldi. Börðust menn þar í myrkrinu lánga stund til þess er lýsti af degi, og var það ógurlegur aðgángur. Hefðu Prússar verið höggðir þar niður í strá, ef konúngur og fyrirliðar hans hefðu eigi verið slíkir afbragðsmenn, sem þeir voru. Þegar leið fram um dagmál, lét konúngur undan stíga, og skipaði þá fyrir svo snildarlega, að Daun leizt eigi að veita þeim eftirför. Konúngur misti þar mestallan farángur sinn, og þar á meðal 100 fallbyssur, og margt manna. Þar féll *Keith*, og ýmsir aðrir nafnkendir fyrirliðar. En þrátt fyrir þetta óhapp, gátu þeir bræður, konúngur og Hinrik, sameinað lið sitt, og haft öll yðrráð á Saxlandi eins og áður. Litlu síðar fór konúngur austur á Slesíu, rak þá Austurríkismenn þaðan, er þangað voru komnir, og seztir um ýmsar borgir, og hélt síðan til Bresláar og sat þar um veturinn. Daun

hafði lítið gagn af sigrinum við Hochkirch; hélt suður á Böhmen og dvaldist þar vetrarlángt.

Frá Ferdínandi af Brúnsvík spurðust góð tíðindi. Hann hafði unnið mikinn sigur á Clermont í nánd við borgina Cresfeld. Eftir það var höfðingi sá, er *Contades* hét, settur yfir Frakka-her, og þá varð Ferdínand að fara austur yfir Rín, en, svo margir sem Frakkar voru, gátu þeir ekki illt af sér gjört fyrir austan ána, því að Ferdínand var þeim öllum drjúgari og varði landið af mikilli hreysti. Hingað til hafði Friðrik annar að vísu reynt hverflyndi hamingjunnar, og komizt í margar kröggur, en því var þó eigi saman að jafna við það, sem enn var ókomið fram, og hann átti enn eftir að reyna. Þrjú ófriðarár voru á enda. Nú byrjaði hið fjórða og óttalegasta. Fjandmenn hans lögðu alt kapp á, að gjöra lið út af nýju, meira og betur búið en áður. Elísabet Rússadrottning vildi hefna ófara þeirra, er menn hennar höfðu farið fyrir Prússum við Zorndorf, og sendi óvlgan her og nýjan hershöfðingja, Soltikov, til Prússlands. Var svo ráð fyrir gjört, að hann og Daun skyldu umkrínja Friðrik og knosa hann á milli sína. Hins vegar gjörði Friðrik hvað hann gat; hann varð að ganga hart að þegnum sínum og Saxlendíngum, og heimta þaðan bæði fólk og fé, til þess að auka og búa herinn sem bezt; því að undanfarin ár hafði hann mist margar þúsundir manna, og þau skörð þurftu aftur að fylla. Konungur hafði þannig komið fótum undir nýjan og allmikinn her, en það ræður að líkindum, að hina úngu og óreyndu menn, sem nú voru komnir í stað hinna föllnu, hafi skort hug og hreysti til jafns við þá. Um vorið 1759 fréttist koma Rússa að austan, og að London væri á leiðinni sunnan af Böhmen með 20,000 manna til að sameinast þeim. Konungur sendi fyrst Dohna, og því næst annan hershöfðingja, er *Wedel* hét, móti Rússum, en báðir þeir höfðu ósigur, og Loudon komst alla leið til Rússa. Nú sá Friðrik eigi annað ráð en fara sjálfur. Lætur hann þá Hinrik bróður sinn koma af Saxlandi til Slesíu, og setur hann þar til landgæzlu í sína stað, en sjálfur heldur hann norður og miður með Oder-fljóti, og hefir um 40000 manna, að því liði meðtöldu, er verið hafði með Dohna og Wedel, og af hafði komizt. Með þessu liði fer konungur austur yfir Oder-fljót (11. ágúst), og sér þá óvini sína þar á hæðunum milli Frankfurt og *Kunnersdorf*;

höfðu þeir búizt þar vel fyrir, og voru yfir 60,000 manna. Engu að síður tæð Friðrik þegar á þá daginn eftir (12. ágúst). Þar var erfitt til aðsóknar, ákaflega sterkar varnir í móti, og sólarhitinn megn. Prússar rannu á vígin og sóttu að af miklu kappi; mannfallið varð mikið af hvorumtveggja, en er bardaginn hafði staðið frá því einni stöndu fyrir hádegi alt til miðastans, var hinn vinstri fylkingararmur Rússa kominn á flótt, og allar fallbyssur þeirra í höndum Prússa. Konungur sendi mann til Berlínar með sigurfregn. En hér urðu snögg umskifti. Hægri fylkingararmur Rússa stóð enn fast fyrir og hörfaði hvergi, og Loudon, og alt hans lið, hafði enn engan þátt tekið í orustunni. Nokkrir af hinum helzta hershöfðingjum Friðriks, og þar á meðal Seydliz og Fink, lögðu það til, að hætta skyldi bardaganum, og láta þar staðar nema að sinni, sem komið var, því að liðsmenn væru mjög þreyttir, enda mundu Rússar halda á burt, þegar nóttin kæmi. En konungur vildi það með engu móti, hann kvaðst eigi vilja hætta við hálfunnið verk, og skipaði fyrir til nýrrar atlögu. Gjørði fótgöngulið Prússa hvert áhlaupið af öðru á fylkingar og skotgarða óvinanna, en varð í hvert skifti frá að hverfa, því að skothríðin var svo ógnarleg, er yfir það dundi. Loks lét konungur Seydliz sækja fram með öllu riddaraliðinn, en það fór á sömu leið. Seydliz varð sár og var borið burt af vígvellinum. Konungur lét þó eigi undan að heldur, og safnar öllu því liði, er hann getur til náð, og gjörir enn hærða hrið, en menn hans fengu eigi staðizt skothríð. Þá, er í móti þeim kom, og svignuðu fyrir, hafði konungur sig þá svo mjög í hættu, að tveir hestar voru skotnir undir honum. Í þeirri svipan bleypir Loudon öllu riddaraliði sínu á konungsmenn, og það reið þeim að fullu. Brast þá flóttinn, svo að konungur gat við ekkert ráðið, og flýja allir undan sem fætur toguðu. Lá þá nærri, að konungur yrði handtekinn, en einn riddaraforingi, er *Prittvis* hét, fékk bjargað honum undan. Seint um kveldið kom konungur að bóndabæ einum, en þar var eigi vistlegt fyrir, því að Kósakkar höfðu verið þar og rænt. Þar lét konungur fyrir berast um nóttina, og lá á hálmvísk einni. Þáðan ritaði hann til Berlínar þessi orð: «Látið konungsfólkið fara úr Berlín. Sendið ríkisskjólin til Potsdam. Borgin verður að gefast upp fyrir óvinum vorum». Ósigurinn, sem konungur

hafði beðið var ógnarlegur. Af öllu því liði, sem hann hafði haft þann morgun, er orustan hófst, voru nú að eins eftir hjá honum 5 þúsundir manna. Af bréfum þeim, er konungur ritaði vinum sínum um þær mundir, þykir enda mega ráða, að hann hafi á hverri stundu búizt við, að alt væri á enda fyrir sér og ríki sínu, því að hann segir fyrir um ýmislegt, er gjöra skuli, að sér látnum, og kveður til fulls og alls þessa vini sína. Það er sagt, að konungur bæri jafnan eitur á sér, meðan á ófriði þessum stóð, og hafi jafnvel látið á sér skilja, að hann mundi grípa til þess í viðlögum, «því að hann skyldi aldrei komast lifandi í hendur óvina sinna». Á því var enginn efi, að óvinum hans var nú innan handar, að gjöra skjótan endi á ófriðnum — eins og konungur hefir sjálfur sagt — ef þeir hefðu kunnað að neyta sigursins. En metnaður þeirra og sundurlyndi leyfði þeim það eigi. Þeir eyddu nokkrum dögum í þrasi og þrefi sín í millum, og nokkrir dagar, vel notaðir af Friðriki öðrum, voru meira verðir en margir mánuðir fyrir aðra menn. Daginn eftir orustuna hafði hann þegar safnað 18,000 undir merki sín, og að nokkrum dögum liðnum hafði hann 30,000 vígra manna. Fallbyssur fékk hann úr næstu kastalaborgum. Óvinirnir héldu eigi til Berlínar. Rússar höfðu öll yfirráð austur á Prússalandi, og þótti það nóg. Brandenburg vildu þeir eigi vinna handa Austurríkismönnum. Daun skoraði fast á Soltikov að halda fram ferðinni og taka Berlín. Soltikov svaraði: «Eg hef þegar unnið tvær orustur, en bið nú eftir, áður en eg hefst frekara að, að fá þá fregn frá yður, að þér hafið einnig unnið tvær orustur, því það er eigi sanngjarnt, að liðsmenn drotningar minnar standi einir saman í stórræðum». Þetta aðgjörðaleysi, og þessi ríður milli höfðingjanna, bjargaði Friðriki og hlífði Berlín um stundarsakir. Litlu síðar hélt Soltikov austur á Pólland.

Um þessar mundir hafði Hinrik konungsbróðir. haldið öllu sínu í Slesía fyrir Daun, og jafnvel krept svo að honum, að Daun varð að hörfa undan til Böhmen. Á Saxlandi gekk Prússum hins vegar miklu miður, enda höfðu þeir þar svo fátt lið, að eigi var af því heimtandi, að varizt gæti ofurefni ríkishersins og Austurríkismanna. Þeir náðu á sitt vald nokkrum helztu borgum landsins, t. a. m. Leipsig, Vittenberg og Torgá, og jafnvel höfuðborginni Dresden, sem Friðriki var mestur skaði, því að

þar átti hann sín helztu forðabúr, og þar var hann vanur að hafa sínar helztu herstöðvar þessi árin. Ofaná allt þetta bættist, að Fink hershöfðingi, sá er fyr var nefndur, varð að gefast upp við Maxen fyrir Austurríkikönnum (20. nóvember) með allt sitt lið, hér um bil 15000 manna, og litlu síðar fekk annar herflokkur Prússa sömu afdrif. En þrátt fyrir allar þessar ófarir, náði Friðrik þetta sama haust meira hluta Saxlands úr höndum óvina sinna, og sat lengi framan af vetri um Daun þar suður í fjöllum, og átti þá illa búð, en hann kvaðst hugga sig við það, að Daun ætti lítið betra. Nálægt miðjum vetri fór konungur ofan í bygð, og sat í borg þeirri, er Freiberg heitir, það eftir var vetrar (1759—1760).

Á þessu sama ári, sem nú var frá sagt, hafði Ferdínand af Brúnsvík eitt sinn beðið ósigur fyrir Frökkum við Bergen (13. apríl), en unnið það margfalt upp aptur á þeim í hinum ágæta sigri við *Minden* (1. ágúst), svo að hann hafði öll yfirráð bæði í Hannóver og á Vestfalen.

Þegar voraði (1760) bjuggu hvorirtveggja lið sitt af nýju, og eftir allan þann mótgang, er Friðriki konungi hafði mætt á undanfögnu ári, var eigi annað sýna, en að óvinir hans mundu yfirstíga hann að fullu og öllu þá þegar samsumars. Rússar og Austurríkismenn höfðu nú sameinað aftur lið sitt, og ætluðu sér að vinna Slesíu og Brandenburg. Friðrik hafði með ýmsu móti mist margar þúsundir manna; ýmsar herdeildir smærri og stærri af liði hans höfðu verið höndum teknar, og sátu í varðhaldi, víðs vegar um Austurríki, en hinir voru þó fleiri, er fallnir voru og enginn kostur að fá jafngóða menn í þeirra stað; einna tilfinnanlegastur varð sá mikli skortur, er ná var orðinn á foringjum, enda varð konungur að taka margt úngmennlið, þótt eigi hefði lært hermentina nema til hálfs, og gjöra að fyrirliðum í hernum. Engu betur var ástætt með fjárhaginn. Valdsmenn Prússa voru hættir að fá nokkrar tekjur; í mörgum borgum og bygðarlögum var jafnvel enginn valdsmaður orðinn eftir. En meðan rúgbrauð og kartöflur, blý og púður væri til í landinu, og nokkur karlmaður uppl standaði, hafði Friðrik einsett sér, að gefast eigi upp, en berjast og falla, ef annars yrði eigi kostur.

Þetta sumar var Friðrik ýmist á Saxlandi eða Slesíu, og fór þá fram og aftur um lönd sín á skemra tíma en aðrir menn, og

Það var því líkast, sem hann væri alls staðar, og þó hann væri fámennur, en óvinir hans hefðu margfalt meira lið, stóð þeim sá ótti af honum, að þeir þorðu eigi á hann að ráða. Þegar komið var fram í júlímánuð, var konungur staddur á Saxlandi; barst honum þá sú fregn, að Austurríkismenn hefðu tekið kastalaborg þá, er *Glaz* heitir, sunnan til á Slesíu. En það var konungi hinn mesti skaði, því að þá var Slesía opin og öndverð fyrir óvinum hans. «Það verður svo að vera», mælti Friðrik, er honum bárust þessi tíðindi. «En þeir skulu skila mér aftur þeirri borg, er friður kemst á. Vær verðum að halda þángað austur, svo vér missom eigi alt».

Nú var haldið af stað austur um Lausiz. Daun, sem vildi vita hvað konungi liði og ráða á hann, ef hann sæi sér fært, hélt lítið eitt á undan Prússum með allan sinn her, en sá hershöfðingi á eptir þeim, er Lascy hét. Konungur var þannig á milli tveggja óvina, þó komst hann með sína menn slysalítið austur í Slesía, og segir ekki af ferðum hans, fyr en hann kemur í nánd við bæ þann, er *Liegniz* heitir. Þar setur konungur herbúðir sínar. Daun og Loudon voru nú búnir að sameina lið sitt að nokkru leyti, skamt þar fyrir austan, og sátu þar á vegum öllum, þeim er farnir verða til Bresláar og Sveidniz. En þángað varð konungur að komast sem allra fyrst, hvað sem í vegi stæði, því að þar voru forðabúr mikil, en menn hans að þrotum komnir með vistir. Konungur hafði því nær aldrei komið í slíkar kröggur. Hann mátti búast við, að hér mundi fara fyrir sér, eins og farið hafði fyrir Fink árinu áður við Maxen. Því að auk þess sem Austurríkismenn höfðu lið hálfu meira en konungur, þá var Soltikov með 60,000 Rússa þar í nágrenninu, og gátu Prússar búið við, að hann skærist í leikinn, er miust varði, og reði á þá. Loudon var næstur Prússum af óvinum þeirra, en Daun og Lascy nokkuð lengra burt. Friðrik mundi efur nóttinni við Hochkirk. Hann vildi eigi, að eins skyldi aftur fara. Þess vegna flutti hann nú herbúðir sínar á hverri nóttu, og var á alt öðrum stað þegar morgna tók, en hann hafði yrið kvöldið áður. Þetta kom honum og að góðu haldi. Aðfaranott 15. ágúst, litlu eftir miðnætti, urðu varðmenn konungs varir við, að ófriður fór að þeim. Þar var þá Loudon kominn með alt sitt lið, og ætlaði að ráða á konung, en bjóst eigi við honum á þeim stað, sem hann nú

var. Konungsmenn hlupa þegar til vopna, og tóku svo rösklega í móti, að af London féllu 10,000 manna, en 6000 urðu handteknar. Var bardaga þessum lokið að þrem. stöndum liðnum, og fékk konungur þar fagrað sigur. Daun og Lascy voru oflángt burtu til þess að geta komið þeim London til hjálpar.

Sigurinn við Liegnitz var að vísu ágætur, en konungur sá glögt, að hans mundu lítil not verða, ef nú væri haldið kyrru fyrir. Þess vegna heldur hann þegar af stað, og gefur hvorki sér eða mönnum sínum hvíld, fyr en hann sér, að Daun geti lengur þanþað honum leið til Bresláar. En hættan var engan veginn þar með á enda. Daun hafði enn ofurefli liðs, og Rússar voru þaðan skammt í burt á eystra bakka Oder-fljóts með ófýjanda her. Friðrik vildi því koma þeim þaðan og lengra austur. En til þess fann hann það ráð: hann ritar bréf Hinriki bróður sínum, sem þá var með lið sitt á öðrum stað í Slesíu, og segir í því, að nú hafi hann unnið sigur á London, ætli sér hvernær, sem færi gefist, að veita Rússum aðgöngu og biður Hinrik koma á ákveðnum degi og stað til móts við sig, með öllu því liði er hann hafði. Konungur fær bókna einum bréfið, og biður hann haga svo ferð sinni, að Rússar taki hann, svo bréfið komist í þeirra hendur. Bóndi fer með bréfið, og gjörir sem fyrir hann var lagt. Þegar Rússar lesa bréfið, kemur felmtur á þá, og taka sig upp samdægurs og halda langt austur á sveitir. Nú varð Friðriki hægra um hönd í Slesíu eftir þessa burtför Rússa, en þó var það eftir, að koma Daun burt þaðan af landi. Beittust þeir þar brögðum nokkrar vikur, og vana hvorigur á öðrum; urðu að vísu engar stórnustur með þeim, en ýms vopna viðskifti og nokkur mannskaði af hvorumtveggja. Loksins leiddist Daun þófið, og til þess að koma konungi burt af Slesíu, fær hann Soltikoff til þess að senda 20,000 manna vestur til Berlínar, með þeim erindum að taka þá borg, en sjálfur sendir Daun þangað 18000 undir yfirstjórn Lascýs. Hælt allur þessi her viðstöðulaust þangað og tók borgina eftir litla mótstöðu, því að þar var þá lítil vörn fyrir. Þegar konungur frétti þessi tíðindi fór hann burt af Slesíu, og stefndi til Berlínar, en þá voru hinir allir á bretti þaðan, því að eigi þorðu þeir að haldast þar við, er þeir fréttu til ferða konungs; þeim stóð meiri ótti af honum en svo, að þeir vildu verða á leið hans. Konungur sá að hann

gat ekki gagn unnið sér eður ríki sínu, ef hann staðnæmðist í Brandenburg og hélt því vestur á Saxland. Þángað var þá Daun kominn og hafði búlt fyrir á hæðunum við bæ þann, er *Torgá* heitir. Þar var hið öruggasta vígi. En þó svo væri, og þó hér gæti svo farið fyrir konungi sem við *Kunnersdorf*, þá var honum samt einn kostur nauðgur, að berjast við Daun og reka hann burt af þeim stöðvum, til þess að geta sjálfur haft aðsetu á Saxlandi vetur þann er í hönd fór. Að elgi hafi verið árennilegt, að veita Daun aðgöngu, má af því ráða, að *Friðrik* kvaddi alla hershöfðingja sína til fundar við sig, og ræðst um við þá, hvort freista skyldi atlogunnar eða eigi. Þögnu himir allir nokkura hríð, en loks varð *Ziethen* fyrir svörum og mælti: «Alls má freista, en hitt er það, að sumir hlutir eru erfiðari en sumir. Konungur skifti liði sínu í tvær deildir. Setti hann *Ziethen* yfir aðra deildina, og skyldi hann með því liði gjöra bug á leið sína, og koma að baki Dauns mönnum og ráða á þá í sama mund, sem konungur gengi framan að fylkingarbrjósti þeirra með hina herdeildir og gerði þar áhlaup. Vildi konungur þannig brjótast gegnum miðjan her óvina sinna og kljúfa hann í tvent; gæti þetta tekizt, vænti hann sér sigurs. Þegar er lýsti af degi (3. nóv.), tók herinn sig upp; *Ziethen* fyrst, en konungur litlu síðar; stefndi hvor um sig þángað, sem honum var ætlað; vegurinn var langur og tersóttur, enda við ýmsa smáðokka að berjast, áður komið væri þángað, sem meginher Austurríkismanna var saman kominn. Nálægt miðjum degi heyrði konungur skothríð mikla í þá átt, er hann þóttist vita að *Ziethen* mundi vera. Hugði konungur, að *Ziethen* væri þá kominn alla leið og hefði ráðið á þá, og lætur þegar veita atgöngu. Varð þar harðari viðtaka en konungur hugði, því að *Ziethen* var enn elgi kominn; hafði hann mætt meiri mótstöðu en ráð var fyrir gjört, og seinkaði það förfinnir svo mjög, að hann gat elgi tekið þátt í aðalorustunni fyrir undir dagsetur. En alla þá stund varð konungur að berjast eingöngu með því liði, er hann hafði, og var það eigi nema hálfur herinn, því að *Ziethen* var með hina helstina. Komst konungur þarí hina mestu mannraun, en hans frábæra herstjórn og hreysti liðsmanna hans gjörði það að verkum, að Daun með öllu sínu ofurefli gat eigi yfirbugað þá. Svo hefir konungur sagt, að aldrei hafi hann fyrir hitt aðra eins skothríð eins og

Þá, er Daun gjörði í móti honum þann dag, enda hafði Daun 400 fallbyssur þar á hæðunum, og man það dæmefátt á þeim tímum. Myrkrið datt á; mannsalið var orðið ógnarlegt; hvorig-ur hafði getað á öðrum unnið. Daun þóttist hafa unnið sigur, og sendi manna með þá gleðisfrétt til Vínar. Konungur taldi víst, að hann yrði að berjast aftur að morgni, og hjó sig undir það. Nóttin var köld og dimm. Menn gjörðu elda á mörgum stöð-um, og þeir, sem skriðið gátu, settust þar að og verndu sig. Var það víða, að Prússar og Austurríkismenn sátu við sama eldinn, eins og þeir væru vinir, og sömdu með sér, að þeir skyldu gefast upp og ganga á vaki þess, er sigurinn ynni að leiks lokum. Lengi fram eftir kveldi heyrðu menn skothríð að baki Austurríkismönnum. Þar var Ziethen keminn með sína menn og barðist langt fram í myrker; fékk hann tekið hæðir þær, er hann átti að taka, og sótti svo fast fram, að þar riðluð-ust fylkingar Dauns fyrir. Daun varð sár, og lét sína menn undan síga um nóttina. En konungur vissi það eigi fyr en morguninn eftir, er Ziethen kom og sagði honum þær fréttir. Í þessari stórorustu mistu Prússar 14000 manna, en Austurríkis-menn 20,000, af föllum og handteknunum. Friðrik hafði þann hag af sigri þessum, að nú gat hann settið á Saxlandi um vet-urinn, að Daun hafði að eina yfirráð yfir Dresden og syðra hluta Saxlands, að ríkisherlun, sem áður ætlaði sér að sameinast liði Dauns, varð að hýfa undan suður og vestur á sveitir, og, að Brandenburg (og fyrst og fremst Berlín) gat fyrst um sinn verið í náðum fyrir Rússum.

Það ár (1760), sem nú var um garð gengið, hafði Friðrik leitað um sættir. En dretníngarnar, Elísabet og María Theresía, þótt-est nú engu síður en áður hafa ráð hans í hendi sér og tóku því fjarri, enda höfðu þær mikið til síns máls. Austurríkismenn höfðu náð bæði Glaz og Dresden; og fengið þannig fastan fót í Slesíu og á Saxlandi; hinir hrænstustu af liðsmönnum Friðriks voru annaðhvort fallnir, eða sátu í varðhaldi suður á Ungverja-landi; Georg annar Engla konungur var dáiinn (25. október 1760), og Butz lávarður, sem mestu ræð hjá Georgi þriðja (sonarsyni og eftirmanni Georgs annars), aftók með öllu, að veita Prússum mekkurn fjárstyrk; Friðrik gat elgi fengið skatta nema af litlum hluta ríkis síns, og helmíngar Saxlands var í óvina höndum.

Ræður því að líkindum, að það sé hætt eigi mikið verið; er fylki þessi gátu af hendi látið; eftir svo mörg ófriðarár og svo miklar hörmúningar, sem yfir þau höfðu gengið.

Nú var svo ráð fyrir gjört, að Rússar og Austurríkismenn skyldu vinna Slesíu að fallu og öllu, og halda því næst til Berlín og taka hana. *Bútturlin* og *Loudon* voru fyrir því liði, og höfðu um 180 þúsundir manna. Daun sat vestur í Dresden, og honum var ætlað; að sjá svo um, að herlið Prússa á Saxlandi hefði þar nóg að vinna; svo það gæti eigi komið þeim á Slesíu til hjálpar. Frá *Ferdinandi* hertoga gat *Friðrik* engrar liðveizla vænt, því að hann átti nú (1761) fult í fangi með Frakka, þar sem þeir sendu yfir 150 þúsundir manna í móti honum.

Konungur setti *Herik* bróður sinn til varnar á Saxlandi móti Daun, en sjálfur fór hann austur á Slesíu. Þegar hann kom þangað, höfðu þeir *Bútturlin* og *Loudon* eigi sameinað lið sitt. Rússar voru enn fyrir austan Oder, en Austurríkismenn sunnan á Slesíu. Konungur gjörði það hann gat til þess, að þeir næðu eigi að sameinast, og gekk svo lengi fram eftir sumri, en þó kom þar, að hann gat eigi varnað því; var þá alt lið þeirra til samans 130,000 manna, en konungur hafði einar 50000. Mundi slíkt ofurefli eflaust hafa unnið á konungi til fulls, ef *Loudon* hefði einn haft yfirstjórnina. En *Bútturlin* vildi engu öðru fara fram en sínum ráðum, því að hann þóttist sjá fyrir, að Austurríki mundi hafa allan hag af því, að konungi yrði algjörlega á kné komið. Rússar höfðu tekið bæði Austur- og Vestur-Prússland, og það létu þeir sér nokkurn veginn nægja. Þeim var eigi ant um, að Austurríki eignaðist Slesíu. *Bútturlin* var því að mestu leyti aðgjörðalaus; en þetta aðgjörðaleyfi hans bjargaði *Friðriki*. *Loudon* einn með Austurríkismenn — þó þeir væru yfir 70000 — þorði eigi að leggja til orustu við *Friðrik*. Þegar kom fram í septembermánuð veru vissir mjög að þrotum komnar hjá Rússum, og bá *Bútturlin* þá, að hann gat eigi haldið þar lengur við með sína menn, skildið því við *Loudon* og hélt austur yfir Oder. Þó lét hann hershöfðingja þann, er *Czernisehof* hét, verða eftir hjá *Loudon* með 20,000 manna. Þóttist *Friðrik* þá svo úr kröggum kominn, að hann bauð *Loudon* að herjast við sig, en *Loudon* vildi eigi, en í þess stað hélt hann til Sveidniz og tók þá borg með litilli fyrirhöfn (1. okt. 1761).

Það þótti Friðriki hinn mesti skaði, því að nú þótti honum út-
 séð um það, að hann ígæti nokkra sioni náð Slesíu afur ár
 höndum Austurríkismanna. Litlu síðar en hér var komið, barst
 konungi sú fregn, að Rússar og Svíar hefðu í sameiningu unnið
 borg þá í Pommern norður við Eystrasak, er Kalberg heitir.
 Var það Prússum hinn mesti skaði að missa þá borg, því að
 nú höfðu óvinir þeirra náð föstum sæti á þremur hinum helstu
 stöðum umhverfis þá. Þeir höfðu náð Dresden, og þannig
 fengið yfirráð á hálfu Saxlandi; þeir höfðu náð Sveidniz, og þar
 með fengið yfirráð yfir hálfri Slesíu; og nú höfðu þeir náð Kol-
 berg, og þá var helmingur Pommerns kominn í þeirra hendur.
 Nú var svo komið, að óvinir Friðriks gátu haft vetrarsetu bæði
 í Slesíu og á Saxlandi, en það höfðu þeir eigi getað að undan-
 förnu. Það virtist ekkert geta verið því til fyrirstöðu, að Rúss-
 ar tækju á næsta vori sjálfa Berlínaborg og legðu undir sig allt
 kjörfurstadæmið Brandenburg. Í Slesíu hafði konungur að eins
 30,000 vígra manna. Hinrik bróðir hans hafði á Saxlandi víðlíka
 mikið lið. Var Seydlitz nú gróinn sára sinna og kominn þar til
 móts við hann, og höfðu þeir bæði varizt Daun af mestu þryði,
 og hins vegar einnig rekið ríkisherion af höndum sér. Á Fer-
 dinandi af Brúnsvík höfðu Frakkar ekki getað unnið, þótt þeir
 væru liðseirir, en hvar sem þeir komu, þéttu þeir svo mikilli
 grimd og alla komar ósmá við landsfólkið, að jafnvel Rússar
 þóttu taka þeim fram að stjórnaemi og siðþryði. Það er af
 þessu, sem nú hefir verið sagt, auðséð, að því lengur sem
 ófriðurinn stóð, því meira færðist saman það svið, er Friðrik
 konungur hafði til umráða. Meiri partur ríkis hans var í óvina
 höndum, og landslýðurinn var orðinn svo margþjáður, að hann
 gat einskis ár verið. Það var eigi hægt að sjá, hvaðan kon-
 ungur gat fengið menn, hesta, vistir og í lán orðum að segja
 sér hvað það, sem hann þurfti til hersins. Ált virtist líta að
 því, að úti yrði um Friðrik og ríki hans á næsta ári.

En á Friðriki öðróm sannaðist hið forakveðna, að þegar
 neyðin er stærst, þá er hjálpin næst. Þá bar það til síðinda,
 að Elísabet drottning á Rússlandi dó (5. janúar 1761), en systur-
 sonur hennar, Pétur kom þar til afkis. Hann var, eins og áður
 er sagt, sonur Karls Friðriks af Holstein-Gottorp og Önnu dótt-

1) Sjá Nýja sögunnar II. hefti, bls. 133. og 191.

ur Péturs mikla. Hann er nefndur *Pétur þriðji*. Elísabet móðursystir hans var einhver mest á óvinur Fríðriks annars, en Pétur keisari var hans áðvinur, og dáðist manna mest að honum og hans afreksverkum. Nú var það eitt hið fyrsta verk Péturs, að hanna samdi frið við Prússakonung, og skilaði honum aftur öllu því, er Rússar höfðu náð í ófriðnum, bæði löndum og her-teknum mönnum, og þar á ofan lét hann hershöfðingja sína, Czernischef, ganga með 20,000 manna í lið með Prússum. Af þessu leiddi það og, að Svíar gjörðu litla síðar frið við Prússa. Reyndar hafði Fríðrik minna gagn, en til stóð, af þessari liðveizlu Rússakeisara, því að misseri síðar var Pétur settur frá völdum af *Katrínu*, drottningu sinni, og því næst ráðinn af dögum. Drottning (*Katrín önnur*) lét að vísu friðinn standa óraskaðan, en hún kvaddi þegar Czernischef heim og alt hans lið. Samt sem áður hafði Fríðrik þann hag af því að Rússa, þó stutt væri, að hann sigraði Daun í einni orustu og náði aftur Sveiduniz. Nú var hann laus orðna við tvo af óvinum sínum, og gat því afhízt betur enn áður við Austurríkismönnum. Daði Elísabetar, og friður Rússa og Svía við Fríðrik annan, voru Maríu Theresíu hörð tíðindi. Reynslan hafði sýnt henni, að eigi var auðvelt, að ná Slesíu úr höndum hans, og því minni líkur voru til þess nú, eftir að þessir voru gengnir úr sambandinu. Þegar María Theresía þar næst hagleiddi, að keisari, maður hennar, var hálgin að heilsu, og drottningu var mjög ant um, að Jósef sonur hennar næði keisaradign, en svo hins vegar ríkis-skuldarnar komnar fram ár öllu hófi: þá þóttist hún eigi sjá annað ráð vænna, en að leita sáttu og friðar við Prússa konung, og svo var nú gjört. Því næst áttu menn fund með sér í höll þeirri á Saxlandi, er *Hébertsburg* heitir, og þar komst friður á 15. febr. 1763 milli Prússa annars vegar og Austurríkismanna og Saxa hins vegar. Var þá alt það staðfest og við það látið sitja, sem gjört hafði verið í Bresláar- og Dresdenar friðnum (1742 og 1745). Fríðrik hélt allri Slesíu og misti ekki hið minsta af ríki sínu, og má það heita þinstakt dæmi í veraldarsögunni, að eitt lítið höngríki fékk þannig varizt, og haldið að lýktum öllu sínu fyrir svo mörgum og svo ríkum óvinum, er í móti stóðu. Þetta dæmi sýnir ljóstlega, hve miklu daglaðar og þreklyndi fær orkað, þó við ofurefli og hverfula hamngju sé að eiga. Eftir rúma sex

ára útivist hélt nú Friðrik konungur innreið sína í Berlín og Ferdínand af Brúnavík honum á aðra hönd; fegnudu borgarmenn heimkomudegi konungs sem þeir mest máttu. Meðan á ófriðnum stóð hafði Berlín oftar en einu sinni verið heimsótt af óvinaliði og orðið fyrir ráttum og óspektum. Þó hafði borg þessi að titölu komist miklu betur af en flest önnur bygðarlög og borgir í löndum Prússa konungs. Skógar voru víðast fallnir fyrir eldum og járn; ákrar voru óáanir; fénaðurinn var dáið af hungri; hérumbil 15,000 húsa, stærri og smærri, voru brunnin til ósku; landsfólkið hafði sækkað um 10 manns af hverju hundraði; sjötti hver vopnfær maður var fallinn í orustum; í sumum sveitum sást enginn karlmaður á akri eður engi um bjargræðistímann; heldur einar samán konur; í sumum þorpum og bæjum sást engin lifandi skepna; lög og yfirvöld voru allvíða eigi nefnd á nafn. Það má í þeim orðum segja um land og lýð Prússakonungs, að hverttveggja flakti sundur af sárum við endalok sjöára-stríðsins. Sú var ein bót í máli, að ríkið hafði engum skuldum safnað öll þessi ófriðar ár, og var það einstakt dæmi, því að allar aðrar þjóðir, sem nokkuð voru við ófriðinn riðnar, voru komnar í stórskuldir.

Ófriður með Frökkum og Englendíngum (1756—1763).

Um sama leyti sem sjö ára stríðið átti sér stað á Þýzka-landi, stóð ófriður milli Frakka og Englendínga einnig. Í öðrum heimsálfum, og þar börðust menn um yfirráðin í Ameríku, í Indíum og á hafinu.

Í Norðusameríku hafði fjöldi manna, bæði af Englandi og af Frakklandi, tekið sér bólfestu og sett þar nýlendur á stofn. Landnámsferðir af Englandi vestur um haf hófust með *Valter Raleigh*, á dögum Elísabetar drotningar, er hann stofnaði nýlendu þá, er síðan heitir Virginia. Á 17. öldinni, um daga Stúartanna og Cromwells, var hin mesta ófriðarótt á Englandi, og fóru þá margir ágætir menn þaðan af landi burt og vestur um haf til þess að bjarga fjört og frelsi og trú sinni. Á hinu fagra og fejóva víðlendi milli Alleghany-fjalla og Atlantshafs settust landnámsmenn þessir að; þeir voru bæði hraustir menn og starfsmenn miklir, og þó þeir ættu þar við margt misjafnt að stríða

fyrst framan af; eigi hvað sízt árástir Indíana, frumþjóðar þeirrar, er þar bjó fyrir; þá tókst þeim þrátt fyrir það; að yrkja landið, og koma þar á fót mörgum smáfylkjum með góðu skipulagi; í hverju fylki settu þeir þjóðkjörið þing, er ræð lögum og lögum, en eitt aðalþing eður aðalstjórn þar í landi var eigi til, er tengt gæti fylki þessi saman í eina ríkishéild; það eina, sem sameinadi þau, var sambandið við ættjörðu sína England. Þessi fyrsta og elstu fylki (*kin fornu fylki*) voru 13 að tölum: *New Hampshire, Massachusetts, Rhode Island* og *Connecticut* (þau voru tilsamans nefnd *Nýja England* og byggð af Púritönum), *Pennsylvania* (það var landnám Vilhjálms Penns, kveðara), *Maryland* (það námu katólskir menn), *Norður* og *Suður Carólína* og *Virginia*, og eftir friðinn í Breða (1667) bættust enn við *Nýja-Belgía* þ. e. *New York, New Jersey* og *Delaware*; seinna og á 18. öldinni bættist *Geórgía* við. Eftir siðvenju þeirra tíma var verzlun nýlendanna bundin við það land, sem þær áttu ætt sína til að rekja, og það var, þegar um þessar nýlendar er að ræða, England. En af því þær nutu frelsis, bæði hvað stjórn og trúarbrögð snerti, þá tóku þær miklum framförum í öllum greinum.

Frakkar höfðu numið *Canada*, eyjuna *Cap Breton* og *Louisiana*. *Canada* er mikið og gott land fyrir vestan og norðan Laurentsfljótið; höfðu Frakkar þaðan marga konar viðartegundir og mikla grávörur. *Cap Breton* er allstórt eyland milli Nýja Skotlands og Nýfundlands fyrir mynni Laurentsflóa; þar eru málminnámur og kolanámur miklar. *Louisiana* er mestmegnis fyrir vestan stórfloðið Mississippi, og nær neðan frá sjó norður með því og langt í land upp; þá er skamt erðið suður í bruna-belti, er þar því hiti mikill og fremur óheilnæmt, því að landið er allt að neðanverðu flatt og vottent, en breytist og batnar þegar frá sjónum dregur; þar vex baðmelli og alls konar suðran aldini. Landið dregur nafn af Loðvíki fjórtánda. Hinir frakknesku nýlendamenn í löndum þessum, bæði suður og norður, lögðu mikla stund á dýraveiðar, voru djásir lög framgjarnir, en engir aðkvæðamenn til jarðsakju eða verzlunar. Þeir voru uppeldir við frakkneska harðstjórn og trúarbragða ófrelsi; og af öllu þessu leiddi, að nýlendar Frakka í Norðrumeríku gátu aldrei verið legum þrifum eða framfötum.

Þegar Frakkar urðu að láta af hendi Nýja-Skotland (Akadia) og Nýfoundland (Terreneuve) á Útrektar-friðnum (1713), var eigi skýrt kveðið á um landamerki, af því að menn hér í álfunni voru þeim ókunnugir. Englendingar sögðu, að Nýja-Skotland væri eigi einungis sá skagi, er það nafn ber, heldur allt landið vestur og norður að Laurents-fljóti. Hins vegar vildu Frakkar eigna sér land allt upp með Missisippi og austur með Óblo-fljóti, til þess að geta tengt saman lönd þau, er þeir áttu nyrðra, við hin, er þeir láttu syðra, það er að skilja: Canada við Louisiana, eða með öðrum orðum, geta tekið höndum saman á baki Englendinga. En þar með var hinum ensku nýlendumönnum fyrir- munnað að færa byggð sína út, hvort heldur vestur eða norður, þeir voru þá allveg umsetnir af Frökkum. Sem við var að búast, ondu Englendingar þessum aðförum Frakka stórálla. Bæði þótti þeim sér með þessu vera bægt frá allri hinnar æðsömu gráðoru-verzlun norðan og vestan úr löndum, og því næst þóttust þeir eiga tilkall til landanna fyrir vestan Alleghany-fljöllin, af því þeir væru eldri landnámsmenn þar í landi en Frakkar. Svo bættist það og við, að enska stjórnin hafði gefið nýlendumönnum sínum allmikið land meðfram Ohio-fljóti í þeim sveitum, er Frakkar voru nú komnir í og farnir að ryðja sér til bústaða. Frakkar gáfu því engan gaum, er hinir sögðu, og tóku höndum hina ensku nýlendumenn, er til þeirra komu. Þetta var upphaf ófriðarins. Þegar þessi liðindi bárust stjórninni á Englandi, bauð hún nýlendumönnum, að láta hart mæta höfðu, og sendi því næst (1756) lið frá Englandi til þess að reka réttar síns gegn Frökkum. Fyrst framan af gekk hinum frakknesku nýlendumönnum í Canada betur, jafnvel þó þeir fengju litla sem enga hjálp af Frakklandi. Madame Pompadour horfði eigi í, að ansa út stórfé til þess að þóknast Maríu Thersíu, en þegar um Canada var að ræða, þótti hirtinni í Versailles (Versölum) eigi kostandi miklu fé til ísmerkanna fyrir vestan haf. Englendingar fótu allt öðruvísi að ráði sínu. Vilhjálmur Rítt hinn eldri (greifi af Chatham), einhver hinn mesti mælsku- og dagn- aðarmaður á Englandi á þeim tímum, gjörði allt sem í hans valdi stóð til þess að auka veldi Englendinga, en eyða framförum Frakka. Hann kom því til leiðar, að Englendingar sendu flota mikinn til Ameríku og 12,000 leigulíða; við þann þær bættist

allmikið lið frá nýlendumönnum, þegar þangað var komið, og nú unnu Englendingar Cap Breton og lögðu skipum sínum upp í Laurentsfjótið, svo að Frakkar komust þar eigi á land til liðs við nýlendumenn sína. Vörðust þó nýlendumenn lengi og vel, þangað til hinn enski hershöfðingi *Wolfe* vann sigur á þeim hjá *Quebec* (1 sept. 1759). Wolfe og hinn frakkneski hershöfðingi fóllu báðir í orustunni, en *Quebec* gafst upp fyrir Englendingum. Var þetta hinn mesti sigur, því að borgin stendur á nesi einu, er gengur út í Laurentsfjótið, en efri hluti borgarinnar í hömrum og þar á kastalar, svo hún er ákaflega tersótt, og má segja, að sá hafi *Canada* á sínu valdi, sem yfirtáðin hefir í *Quebec*. Enda var nú þess eigi lengi að bíða, áður Englendingar höfðu unnið alla *Canada*, og þar með var þeirri hættu lokið, er hinum ensku nýlendumönnum hafði búið verið af Frökkum. Í Vestindíum áttu Frakkar allan vesturhlutana af *Haití* og flestar hinar stærri og auðugri eyjar af *Little-Antillanum*, t. d. *Guadeloupe*, *Dominique*, *Martinique* o. s. frv. Allar þessar eyjar unnu Englendingar af Frökkum árin 1759—1762. Viðureign þeirra í Afríku fór á sömu leið; það sem Frakkar áttu þar, á *Senegal* og á *Gorée-ey*, lenti í höndum Englendinga (1758). Það sama ár vann *Clive* lávarður, einn af hinum mestu hershöfðingjum Englendinga, *Calcuttaborg* á Austur-Indlandi, og fór síðan herskildi yfir nálæg lönd og bergir, og kom þar fótum undir hið mikla og auðuga ríki, sem Englendingar hafa síðan átt þar eystra til þessa dags. Nýlendur þær, sem Frakkar áttu þar í landi, komust þá einnig í hendur Englendinga. Auk alls þessa mikla tjóns fóru þó Frakkar, ef til vill, hinar mestu ófarir fyrir Englum, í sjóörustum við Frakklands strendur og *Portúgals*, árið 1759. Voru Frakkar eptir þær orastur orðnir svo skipalausir, að þegar Englendingar tóku eyra *Belleisle* (1761) við Frakklands strendur, þá höfðu Frakkar á þá af landi, og gátu ekki aðgjört sökum skipaleysis. Áður höfðu Frakkar dugað vel í sjóörustum við Englendinga, en stjórn þeirra var um daga *Loðvíks* flutanda svo hirðlaus, að allt fór í ólagi fyrir þeim bæði á sjó og landi, eins og sjá má af því, sem hér hefir verið sagt að framan.

Nýlendur Frakka og floti þeirra voru að mestu leyti farin, þegar hertoginn af *Choiseul* varð stjórnarforseti Frakklands. Hann

var einn af þeim, sem átti Mad. Pompadour upphéð sína að þakka, starfsmaður mikill og slúnginn í mörgum greinum. Hann kom því til leiðar (1761), að þeir frændur, Bourbonar, í Versailles, Madrid, Neapel og Parma gjörðu samband sín í milli (*samningur Bourbons-ættmanna* = den bourbonske Familie-pagt) á þá leið, að einn skyldi öðrum veita í viðskiftum við aðrar þjóðir, bæði til sóknar og varnar. Hér var alls eigi spurt um þarfir eða réttiendi þegnanna, heldur einungis um ímyndaða hagemurn sjálfra þessara þjóðhöfðingja, er í það félag höfðu bundizt. Þessi félagskapur þeirra frænda var auðsjáanlega stofnaður móti Englendingum, og fyrir því vildi Pitt, jafnskjótt sem hann varð þess vísari, að samningurinn var til orðinn, að Spánverjum væri sagt stríð á hendur; hann vildi að Englendingar yrðu fyrri til bráðs, og gæfu Spánverjum eigi tóm til að búa flota sinn og landher eftir þörfum; væri þeim þá þegar gjörð aðför, mundu Englendingar fá kostnaðinn bættan, því að þá væri þeim innanhandar að ná «silfurflotanum», sem von væri á innan skamms tíma vestan frá Ameríku með égryni gulls og silfurs; vildi stjórnin eigi fylgja sínum ráðum, kvaðst Pitt ganga úr völdum — en hann var þá stjórnarforseti. Georg þriðji, sem þá var nýkominn til ríkis á Englandi (1760—1820) var enginn vinur Pitts, og aðhyttist fremur ráð Torýmanna, er friðarins æktu. Fyrir þá sök lagði Pitt niður völdin, og *Bute* lávarður gjörðist ráðgjafarforseti. Það kom alt fram sem Pitt hafði sagt. Litlu síðar, þá er Spánverjar þóttust viðbúinir, og silfurfloti þeirra var kominn heim; sögðu þeir bæði Englendingum stríð á hendur (í desember 1761) og Portúgal, sem löngum var Englendingum fylgjandi.

Þetta var hið mesta feigðarflan af Spánverjum. Floti Englendinga var á skömmum tíma kominn vestur til Cúba, og þeir seztir um Havanna, höfuðborg Spánverja í Vestindíum og aðalverzlunarstað þeirra þar vestur. Tóku Englendingar borgina og allan skipaflota Spánverja, er þar lá fyrir á höfninni. Annan flota sendu Englendingar til Filippínanna og tóku þar höfuðborgina Manilla. Á báðum þessum stöðum fengu Englendingar til samans 5 milliónir punda sterklægs að herfangi.

Í annan stað sögðu Spánverjar her manns til Portúgals, en sú fór varð þeim heldur eigi til sigurs. Englendingar sendu

Portúgalsmönnum lið, og fyrir því liði þann foringja, er Vá-
ljólmur hét og var greifi af Lippe-Bückeburg á Pýskalandi.
Hann hafði lært hernaðar-íþróttina í skóla Friðriks annars, og
gafst svo vel, að Spánverjar fengu þar enga áerkað. Áður hann
fór þaðan úr landi, kom hann góðu skipulagi á hermálefni Portú-
galsmanna, og þótti vera hinn vaskasti maður.

Allar þessar mörgu og mikla ófarir gjörðu Frakka og Spán-
verja fúsa til friðar; enda var friðurinn auðsóttur við Búte og
þann stjórnarflokk, er þá réð mestu á Englandi. Var því næst
saminn friður í París (10. febrúar 1763), milli Frakka og Spán-
verja annars vegar, og Englendinga og Portúgalsmanna hins vegar.
Það var fám dögum fyrir Hábertsborgarfriðinn, sem fyr er
nefndur. Samkvæmt þessum Parísar-friði fengu Englendingar
eyna Minorca aptur, sem Frakkar höfðu tekið, Akadíu alla, Cana-
da alla, Cap Breton og allar smáeyjar í Laurentsflóa; ýmsar
eyjar í Vestindíum og Ítók þau, er Frakkar höfðu átt, við Sene-
gal á Afríku. Af Spánverjum fengu Englendingar allan Florida-
skaga, en skiluðu aftur ýmsum löndum og borgum, er þeir
höfðu tekið. Frakkar létu Lóisiana af hendi við Spánverja í
eina konar þökkabót fyrir þegna liðveizlu.

Þennig endaði þessi mikli og grimmi ófriður, bæði sjö ára-
stríðið og nýlenduófriðurinn, er svift hafði Norðurálfuna lífi
einnar milliónar manna, og jafnvel fram yfir það, breitt eyði-
leggingu, neyð og ótaljandi þjóningar út yfir því nær alla heims-
álfuna, átti þess að mannkynið til samans tekið, eða nokkurt
einstakt ríki hefði verulegan hag af, nema England, því að verzl-
un þess og sjávarveldi hafði stórum aukizi og magnazi, og aðr-
ar þjóðir stóðu þar langt á baki Englendinga.

England og Frakkland eftir Útrektar-friðinn.

Hér að framan hefir þinna helatu styrjalda líverid getið, er
bæði þessar tvær óg aðrar Norðurálfu-þjóðir tóku þátt í á þeim
50 árum, sem taka yfir tímabilið frá hinu spánska erfðastríði og
til loka sjö ára stríðsins. Skal því hér í þessari grein að eins
fáorðlega getið þess, er innahlands gjörðist, á því hinu sama
tímabili, hjá Frökkum og Englum.

Á Englandi hafði parlamentið (þjóðþingið) máð svo al-
gjörðum yfirtöðum, þegar stjórnarbyltingin varð þar 1688—1689,

að upp frá því varð konungsvaldið. Íúls megnandi, gagnvart fulltrúum þjóðarinnar. Ráðgjafarnir höfðu ábyrgð fyrir þinginu, og gátu því að eins settið að völdum, að meiri hluti þingmanna í alþýðuhúsinu (neðristofunni) væri þeim fylgjandi. Hin enska landsstjórn var því allsendis gagnstæð einvaldsstjórn þeirri, er á meginlandi Norðurlálfunnar átti sér stað um þær mundir, og var í reyndinni hia sína frjálslynda stjórn á þeim tímum. Eugu að síður mátti þó finna galla á sumum hlutum á Englandi, því að eftir þær tilraunir, er Stúartar gjörðu (1715) til þess að brjótast þar til ríkis, var það tekið í lög, að kosningar til alþýðuhúsa-ns skyldu gilda um sjö ára bil. Á þann hátt urðu þingmenn sjálfráðari en elka mundi, og óháðari kjósendum sínum, þeir litu öðrum augum á landsins málefni en þjóðin sjálf, og það var miklu hættara við, að mútur og aðrar misjafnar hvatir, hefðu skaðleg áhrif á þá, en orðið mundi, ef kosningar hefðu verið tíðari. Það var og mikill galli á hinum ensku kosningar-lögum, að ýmsar gamlar en maonfáar borgir höfðu það réttindi frá ómunatíð, að mega kjósa mann til þingsetu, en aðrar mikku fjölmennari borgir höfðu eigi kosningarrétt, af því þær voru ýngri. Ráðgjafarnir brugðu því einalt fémútum fyrir sig jafn-vel þegar kjósa skyldi þingmenn, og það er allmerkilegt, að sá maður, sem fyrstur kom þeim ósið á, var Walpole, sem að öðru leyti var hinn þarfasti maður. Hinn nafakendasti af ráðgjöfum þeim, er komu eftir Walpole, var Pitt (hinn eldri); hann var af Whig-manna flokknun eins og Walpole. Með Georgi þriðja komu Torymenn til valda, og Bute var foringi þeirra, eins og áður er sagt. Þeir reyndu til að auka vald krúnunnar, en gátu það eigi.

Hins vegar tók esrabagur og aðlegð Englesdínge miklum frámförum, og áhrif þau, sem þeir höfðu á málefni annara Norð-urálfu þjóða, fóru vaxandi. Skuldir ríkisins oxu reyndar stór-um, bæði í hiru Austurríkiska erfðastriði og sjö ára stríðinu, en það voru innlendar skuldir; lánstraust ríkisins haggadist eigi, og þessi aðferð, að taka innlent fé á leigu, tengdi hagamuni stjórnarinnar og þegnanna fastara saman en áður. Ágætir hug- vitsmenn fundu þá ýmsa þarflega hluti, er komu fátum undir hinar ótalmörgu verkemiðjur þar í landi, t. a. m. gufuvélina, spunavélina, vefnaðarvélina og m. fl.; málmgroftur, eða mál-

námur gáfu margfalt meira að af sér en áður, eftir að menn fóru að viðhafa steinkollin til þeirrar atvinnu.

Saga *Frakka* um þessar mundir er mjög ólík sögu Eng-
lendinga. Á Frakklandi átti hin versta einvaldsstjórn sér stað,
er vanrækti skyldur sínar við land og lýð. Við bar það að sönnu,
að þar voru dugandi ráðgjafar, er nokkru ræðu, en hitt var þó
lengstum, að frillur og þeirra skjólstæðingar höfðu æðstu völdin
í höndum sér. Eftir Loðvík fjórtánda kom sonarsonar sonur
hans Loðvík fimtándi til ríkis (1715—1774). En þangað til
hann komst til lögaldurs, hafði *Filéppus hertogi af Orleans*
(bróðursonur Loðvíks 14.) ríkisstjórnina á hendi (1715—1723),
eins og áður er sagt, og stýrði Frakklandi eins og hann væri
einvaldur konungur. Móðir hertogans var *Elísabet Charlotte*
dóttir *Karls Loðvíks Falzgreifa*, sonar *Friðriks 5. kjörfursta af*
Falz og um tíma konungs í *Böhmen*¹. *Elísabet* var bæði vit-
ur kona og siðavönd, en gat þó eigi varið þenna son sinn fyrir
þeirri siðaspillingu, er þá, eins og oftast, átti sér stað við hirð-
ina í *Parísarborg*. Þegar hertoginn var sextur að völdum, fór
sú siðaspilling vaxandi, enda bætti *Dubois*, ráðgjafi hans, ekki
um í þeirri grein. Við hirðina var nú mest um það hugsað, að
komast yfir auðæfi til þess að geta eytt þeim aftur í svalli og
saurliðnaði; frá hirðinni breiddist sá ósömi út meðal höfðingi-
anna og þaðan víðs vegar út um landið. Til þess að rétta við
aftur fjárbag ríkisins, sem kómian var á fallanda fót, þá er Loð-
vík fjórtándi skildi við, lagði hertoginn lag sitt við skoðan-
mann *Jóhn Law* að nafni. Sá maður þóttist geta rétt við fjár-
baginn og stofnaði «seðlabánka» einn mikinn, og í samband
við þá stofnun var sett félag eitt, er fékk einkaleyfi til allrar
verzlunar við nýlendur *Frakka*, og eignarrétt yfir öllu hinu mikla
og frjóva landi (*Louisiana*) við *Missisippifljóts-ósa* í Norður-
Ameríku. Bráðum kom líf og fjör í verzlun og atvinnuvegi;
venir manna um fljótan og aðfenginn gróða keyrðu fram úr hófi,
blutabréf bankans hækkuðu í verði svo undrum gegndi, og menn
keptust hver við annan að láta af hendi gull og silfur fyrir seðla
bankans, en bankinn var skyldur til að leysa seðlana til sín aft-
ur móti fullu aðvirði þeirra í gulli og silfri, hvenær sem þess
var beðizt. Þegar frá leið, reyndist ábatið minni en menn

1) Nýja Sagan I. hefti, bls. 184.

höfðu gjört sér í lond, og þá var tranatið á fyrirtækjum þessum eins fljótt að fara, eins og það hafði verið að koma. Menntuðast að hákanum til þess að fá þaðan aftur fé sitt, en hákaninn gat nú eigi staðið í skilum; allt fór svo á höfuðið, og fjöldi manna misti eignir sínar. John Law varð að flýja af landi burt og dó nokkru síðar í örbirgð suður í Venedig. Filippus hertogi andaðist fertugur að aldri 1723.

Þegar Loðvík 15. var kominn til lögaldurs (1726), varð kennari hans, *Fleury* kardináli, æðsti ráðgjafi og hélt því embætti þangað til hann dó (1743) því nær nírræður. *Fleury* var hinn þarfasti maður og færði aftur margt í lag innanlands með sparssemi sinni og friðsemi. En er hans misti við, varð stjórnin á Frakklandi verri en frá verði sagt. Konungurinn hafði engan vilja eða viðleitni til alvarlegra starfa, en allur hans hugur hneigðist að svalli og saurlifnaði og það svo freklega, að vart mun í annan tíma meiri ósiðsemi hafa átt sér stað í París heldur en á því tímabili, er þar fór næst á eftir og allt til danda konungs 1774. Á þeim árum mátti eigi heita konungsstjórn, heldur frillustjórn á Frakklandi. Af þeirri óstjórn leiddi bæði það, að ríkisskuldinnar uxu fram ár hófi, en óþolandi kvaðir og álögur lagðar á bændur og borgara (aðallinn og klerkarnir voru að mestu lausir við alla skatta), og líka hitt, að Frakkar urðu undir í öllum vopnaviðskiptum við aðrar þjóðir, eins og fyr er ritað, og mistu flestar af nýlendum sínum. En hins vegar fékk ríkið nokkra viðbót á tímabili því, er hér ræðir um, þar sem *Lothringen* lagðist undir það (1766), þá er *Staniskás Lescinsky*, tengdafaðir konungans, andaðist, og í annan stað *Korsika-ey*, er Frakkar keyptu af *Genúamönnum*, og unnu hana (1769) eftir langvinna mótstöðu eyjarbúa, er með engu móti vildu ganga undir Frakka, og höfðu ágætum foringja yfir sér, er hét *Pascal Paoli*.

Konungsvaldið hafði smátt og smátt rutt sér svo til rúms, að þegar komið er fram á 18. öldina var það orðið svo mikið og magnað, að það yfirskygði öll önnur lífsöfl þjóðanna í mestum hluta Norðurlálfunnar. Aðalsmenn og klerkar höfðu að visu enn, þegar hér var komið sögunni, talsverð völd og talsverða þýðingu, en hvoristveggja urðu þó að beygja sig undir konungsvaldið, þegar það beitti sér nokkuð til muna. Báðar þessar

stóttir höfðu einn ýmsa andabágur frá sköttum og skyldum, og í því var þeirra frelsi gagnvart krónunni mestmegnis innifalið. En sá flokkur þeghanna, sem konungsvaldið lagðist þýngst á, var öll alþýða manna (bændur og borgarar). Og það var eigi þar með búið, að konungsvaldið þrengdi kostum alþýðunnar, heldur bættist þar á ofan meiri og minni yfurgangur og rángsleitni, er hún varð að sæta af hinum æðri stöttum, aðlinum og klerknum. Óvíska átti alþýðan eins illum kjörum að fagna eins og á Frakklandi. Loðvík 14. hafði orðið henni ærið nærgöngull í kröfum sínum, er að miklu leyti leiddi af hans sífelda ófriði; en menn þoldu honum það allvel framan af, því að hann var mikilmenni í aðra rönd, og hélt í ýmsum greinum mannorði þjóðarinnar vel á lofti. Framan af ríkisárum Loðvíks 15. fór allt nokkurn veginn vel; þjóðinni var vel til hans, og lét það í ljósi oftar en einu sinni. En eftir því sem á leið og menn sáu betur og betur, að hann skeytti alls eigi um skyldur sínar, en sókti sér æ dýpra og dýpra ofan í hið viðbjóðslegasta mun-aðarlíf, og var þó harðstjóri, þegar því var að skifta, þá fóru menn að finna, hvað að sér krepti, þá kom óánægjan og jafnvel hatrið, og þá fór þjóðin bæði leynt og ljóst, að æskja breytingar á kjörum sínum. Þessi óblíðu kjör hinnar frakknesku þjóðar höfðu, ef til vill, átt sér lángan aldur, ef eigi hefði annað komið til, sem flýtti viðburðum sögunnar og gaf aldarhættinum nýja stefnu, en það voru vísindameann áttjándu aldarinnar, þeirra rit og þeirra kenningar.

Framsýnir menn höfðu lengi séð og sagt fyrir, að villa og vanbrúkur einveldisins hlyti fyr eða síðar að leiða til þess, að hagar þjóðanna myndi stórum breytast. Jafnvel Loðvík 15., svo tilfinningurlaus sem hann var, sagði einhverju sinni: „Það lafir alt saman, meðan eg er uppi, en eftirmaður minn fær að reyna, hvernig hann kemst fram úr því“. Vísindamennirnir voru þá farnir að opna áagun á mönnum; nýjar hugmyndir, nýjar kenningar komu þá í ljós, gagnstæðar þeim, sem mönnum höfðu verið innrættar, og flestir höfðu sætt sig við af gömlum vaná, þó sumir fyndu á þeim einhverjar missmíðar. Hvaðan komu þessar nýju hugmyndir? Hvaðan kom þessi birta, sem nú fór að skína yfir hugi manna á Frakklandi? Hún var upphaflega komin með síðabótinni á Þýskalandi. Síðabótin velti þeim þjóðum, sem

hún náði til, andlegt frelsi. Þegar frelsið var fengið, var andinn eigi við eina fjöl feldur, hann gat farið í ótal stefnur, gjört alt að umtalsefni, því andlegt frelsi er undirstaða hins vísindalega lífs. Siðabótin barst einnig til Englands. Þarórisu síðan upp margir og margvíslegir vísindamenn. Sumir sneru sér að náttúrufræðinni, og ruddu mannkyninu nýjar brautir, eins og t. a. m. *Newton* (f. 1642, d. 1727), hinn mikli spekingur, sem fann þýngdarlögmálið; aðrir fundu þarflega hluti, er breytti atvinnu manna, eins og *James Watt* (f. 1736, d. 1819), er mest vann að fullkomnun gufuvælarinnar, eða fræddu menn um undirrót þjóðmegunarinnar, eins og *Adam Smith* (f. 1723, d. 1790), hinn skozi snillingur, er sagði og sýndi, að auður þjóðanna væri eigi undir því kominn, að eiga peninga eða dýra málma, heldur væri erfíðið, yinnan, þ. e. akuryrkja, iðnaður, verzlun hinn sanni auður, og, að frelsið væri betra og öflugra meðal til að efla þessa atvinnuvegi, heldur en einokunarréttindi veitt eftir geðþétta stjórnendanna. Þá má enn telja spekinginn *Locke* (f. 1632, d. 1704) og stjórnsfræðinginn *Bolingbroke* (f. 1672, d. 1751); hans nafnkunna rit „*Letters on the study of history*“ (bréf um iðkun sögunnar), hafði mikil áhrif á hina nafnfrægustu ensku sagnaritara á 18. öldinni, *Gibbon* (f. 1737, d. 1794), er ritaði sögu um afturför og hrun Rómaveldis, og *Hume* (f. 1711, d. 1776), er ritaði Englands sögu.

Frakkar kyntust bráðum ritgjörðum Englendinga, því að skamt er í milli landanna, og höfðu þær hin mestu áhrif á frakkneska rithöfunda. Á Frakklandi var og, eins og áður er sagt, alt komið í það óefni, að þar höfðu vísindamennirnir hin-
ar gildustu ástæður til að skerast í leikinn og láta nokkuð til sín taka. Þeir gjörðu þar að umtalsefni: harðýðgi og sið-
leysi stjórnarinnar, broka aðalsins, ofsóknir klerkanna, hnignun réttvísionnar, hörku laganna o. s. fr.; en sumir þessara manna fóru einnig miklu lengra en hófi gegndi, og rituðu gegn öllu, sem heilagt og heiðarlegt hefir verið haldið meðal kristinna manna; þeir hæddu og skopuðust að kristinni trú og dygd og öllu því, sem dýrmætast er meðal síðaðra manna; Þeir vildu kollvarpa öllu, sem átt hafði sér stað þangað til, og setja annað nýtt í staðinn. Einn hinn merkilegasti og djúpvitrasti af mönn-
um þessum var *Montesquieu* (f. 1689, d. 1755). Eftir að hann

hafði kynt sér stjórnskipun Englendinga, samdi hann eitt hið merkilegasta rit sitt, er heitir: *L'esprit des lois* (andi laganna); kemst hann þar að þeirri niðurstöðu, að *lýðveldið* (Republiken) sé hið fullkomnasta stjórnarfyrrkomulag. Þeir *Diderot* (f. 1713, d. 1784) og *Alembert* (f. 1717, d. 1783) og fleiri, sömdu eins konar almenna orðabók (*Encyclopædi*) eða ritsafn, sem hefir inni að halda ágríp af hverri vísindagrein, sem þá var kunn. Þeir menn, eða sá spekingaflokkur, sem gaf út þetta ritsafn, eru nefndir *Encyclopædistar* (þjóðfræðingar); þeir vildu gjöra alþýðunni allar vísindagreinar kunnar. Sumir af rithöfundum þessum neituðu því að guð væri til, að sálin væri ódauðleg o. s. fr. Og til þarcs um það, að þeir haði sumir eigi verið svo mjúkir í máli um það, er þeim þótti aðfönningarvert, má til gteina orð Diderots, er hann segir: „hengið hinn síðasta konung í görnum hins síðasta klerks!“. Einnna almennast og áhrifamest orðu rit þeirra *Rousseaus* (f. 1712, d. 1778) og *Voltaire* (f. 1694, d. 1778). Rousseau var aldrei settur til menta; og hann hataði alla mentun Norðurálfunnar, eins og hún var þá, og sagði, að af henni væri spröttin öll neyð og óhamingja þjóðfélagsins, og öll hin mikla niðurlægning og kúgun alþýðunnar. Hann ritadi ýmslegt og þar á meðal um uppeldi manna; og vildi breyta því öllu á annan veg; en einkum má telja sem merkilegt rit hans, er heitir *Contrat social*. Þar segir hann, að þjóðveldið eða lýðveldið, bygt á almennu frelsi og jöfnum mannréttindum, sé hið fullkomnasta og besta stjórnarform. Voltaire þykir taka fram öllum frakkneskum rithöfundum á því tímabili. Rit hans eru mörg og margbreytt, því að hann var heimspekingur, sagnaritari og skáld, og þykir ritháttur hans og orðsnild hið mesta afbrögð. Á yngri árum sínum var hann stundum í París, stundum á Englandi; síðan var hann við hirð Friðriks annars Prússakonungs, en þeir gátu elgi saman verið til lengdar; það var því líkast, sem þeir væru hirtingarvöndur hvor annars; þó ritadi hvor öðrum eftir það þeir skildu; og er þeirra viðureign allmerkileg. Hin síðustu ár æfi sinnar var Voltaire á bugarði sínum Ferney, skamt frá Genf, öllum óháður, enda var hann orðinn stórríkur maður af ritum sínum.

Rit manna þeirra, er nú voru nefndir, voru lesin af mikilli áhæð og áhoga því hær um alla Norðurálfuna. Þau áttu mik-

inn þátt í því, að útrýma hjátrú og bleypidómum, að sýna mönnum fram á, að margt var veilt og vitlitið í því, sem við hafði gengið, að vekja meðvitund manna um eðlileg réttindi þeirra, en þau miðuðu líka til hins, að niðurbryóta kristna trú og virðingu fyrir mörgum góðum og guðlegum efnum, innræta mönnum sjálfselsku og eiginirni. Ávextir hinnar nýju kenningar komu einna fyrst í ljós hjá ýmsum stjórnendum og ráðgjöfum þeirra, enda áttu margir þeirra bréfavíðskifti við hina frakknesku ríðhöfunda, eða höfðu ýms mök við þá á annan hátt. Sumir af þessum stjórnendum, er sáu hve mikils vert það var, að verða vinsæll af þegnum sínum, breyttu því ýmsu í stjórn sinni samkvæmt hinum nýju kenningum, en þeim fórst það misjafnlega úr hendi, af því þeir voru rótgrónir í einveldinu, og gjörðu margt af handahófi. Umburðarlyndi í trúarbragðafnum fór nú að verða almennara. Kristmúnkar (Jesúítar) voru reknir burt af sumum löndum, að pynda menn til sagna lagðist niður, rýmkun komst sums staðar á prentsfrelsið. En margar af þessum tilraunum til endurbóta urðu þó eigi að þeim notum, sem vænta mátti, af því þær voru teknar úr lausu lofti, en eigi settar eður sniðnar eftir þörfum daglegs lífs eins og það hafði myndast og var nú orðið á sig komið framan úr öldum.

Portúgal og Spánn.

Frá því hefir áður verið sagt¹, hvernig Portúgalsmenn komust undir Spánverja og voru þeim háðir um 60 ár (1580—1640). Á því tímabili mistu þeir flestar nýlendur, nema Brasílu í Vesturheimi og Díu, og Góa á Indlandi. Árið 1640 varð uppreisn á Portúgal, og þá hófst *Braganza*-ættin þar til ríkis, er átti kyn sitt að rekja til hinna fornu konunga af Búrgund², og urðu Spánverjar fullkomlega að viðurkenna þá konungstign árið 1668, er friðurinn var saminn í Lissabon.

Konungarnir á Portúgal, *Jóhann fjórði* (1640—1656), og synir hans *Alfons sjötti* (1656—1668) og *Pétur annar* (1668—1706), svo og *Jóhann fimti* (1706—1750) sonur Péturs, voru hver öðrum ómerkilegri. Einveldið grúfði yfir landinu eins og svartnætti; þjóðþingið (Cortes) lagðist niður; konungarnir voru

1) Nýja sagan, I. hefti bls. 54—55.

2) Miðaldasagan, bls. 196.

háðir skriftafeðrum sínum, kristmúnkunum; klerkar og aðalsmenn nutu ýmsra réttinda umfram aðra landsmenn; klerkavaldið bar þar alla hina sömu ávexti sem í öðrum löndum; vanþekking, leti og fátækt var almenn hjá þjóðinni, og allir atvinnuvegir ógreiðir og naumast teljandi. Portúgalsmenn tóku þátt í hinu spánska erfðastríði, sem bandamenn Englendinga. En af því sambandi stóð Portúgal enginn hagur. Landið var eins og skjólstæðingur Englendinga, og þessir voldugu sækonungar náðu allri Portúgals verzlun undir sig, fengu einnig mestallar vínekrur þeirra á leigu, og eyðilögðu gjörsamlega allan iðnað landsmanna, með því, að flytja þeim og fylla landið af enskum varnringi. Allur sá arður, sem Portúgalsmönnum barst frá nýlendum sínum, nam varla staðar þar í landi, en lenti hjá Englendingum.

Á dögum *Jósefs Emanúels* (1750—1777) lifnaði að nokkru leyti yfir landinu, fyrir þá sök, að hann, er sjálfur var enginn atkvæðamaður, lét *Pombal* ráðgjafa sinn (f. 1699, d. 1782) hafa alla ríkisstjórnina á hendi. Pombal var stórvirkur maður og starfsamur og lagði á það allan hug, að hefja Portúgal upp úr þeirri niðurlægingu, sem það var komið í. Hann þóttist sannfærður um, að kristmúnkar væru undirrót margs þess, er verst var þar í landi, og þess vegna gjörði hann sér alt far um að hafa þá flata. Hann komst að því, að þeir höfðu stofnað ríki eitt vestur í *Paraguay* í Suðurameríku, og á laun við stjórnina í Portúgal, og menn fengu eigi að vita, hvað þeir höfðust þar að; hann vissi og, að félag þetta stóð í nánú sambandi við nokkra tigna menn í Portúgal, er berir þóttu orðnir að samsæri gegn konungi. Þetta færði Pombal sér í nyt, og lét taka höndum alla kristmúnka, þá er í Portúgal fundust, og flytja sjóveg til Ítalíu; var það hin mesta landhreinsun (1759). Hann lét grípa marga klerka og aðalsmenn þá, er mest stóðu í móti þeim endurbótum, er hann vildi koma á fót, og setja í dýflissur; því að harður var hann í meira lagi og ráðríkur. Alla atvinnuvegi reyndi hann til að bæta, og hann kom góðri skipun á hermálefni landsins með tilstyrk greifans af Lippe, sem fyr er nefndur. Og í þám orðum að segja, kom dugur og starfsemi þessa merkilega manns fram í öllum greinum landstjórnarinnar. En jafnskjótt sem konungurinn, Jósef Emanúel var dáiinn, þá var Pombal vikið úr völdum, öllum hans endurbótum var kollvarpað, og alt sótti aftur í sama

horf, sem verið hafði í Portúgal fyrir hans daga. *María* dóttir Jósefs Emanúels, sem kom til ríkis eftir föður sinn (1777—1816), varð að lyktum geðveik, svo að *Jóhann* sonur hennar hafði ríkisstjórnina á hendi frá 1792.

Á dögum Jósefs Emanúels varð hinn mikli jarðskjálfti (1. nóv. 1755) á Portúgal, er lagði meira hluta Lissabonar í eyði og svifti lífi 30000 manna. Þá gekk Pombal svo vel fram, að undrum gegndi, bæði í því, að hjálpa þeim, er af komust og hjálpar þurftu, halda stjórn á skrílnum, er fór með ránum og stuldum, og hamlar mönnum frá því, að fara af landi burt; og var það enginn hæðarleikur, því að við margt var að stríða, og þar á meðal hjátrú lýðsins, og óstjórn þá, er þessi voðaviðburður kveikti í mönnum.

Filippus fimti Spánar konungur dó 1746, og kom þá til ríkis eftir hann sonur hans *Ferdínand sjötti* (1746—1759). Hann var eftir fyrri konu Filippusar, hafði erft þúnglyndi föður síns og varð með öllu geðveikur og gekk í klaustur. Sönglist var það eina, sem hann hafði nokkra skemtlun af, og þess vegna komst hinn ítalski söngmaður Farinelli þar til mikillar upphéðar. Þegar Ferdínand konungur dó (1759), varð hálfbróðir hans, Don Carlos, sem fyr er nefndur (sonur Elísabetar af Parma), konungur á Spáni og nefndur *Karl þriðji* (1759—1788). Hann hafði verið konungur í Neapel frá 1736, en þegar hann fluttist vestur á Spán, varð Ferdínand sonur hans, hinn fjórði með því nafni († 1815), konungur í Neapel. Meðan Karl ræð fyrir Neapel, færði hann þar ýmsa hluti í lag, samkvæmt kröfum tímanna. Alt hið sama gjörði hann, eftir að hann varð konungur á Spáni, mest og bezt fyrir tilstyrk *Aranda* ráðgjafa síns. En flestar af endurbótum þeim, sem konungur og ráðgjafinn vildu koma á fót, mættu mikilli mótspyrnu einkum hjá klerkunum, t. a. m. sú tilraun, að fá menn norðan af Þýskalandi og Sveiz til að setjast að á Sjerra Morena (svörtu fjöll) og yrkja þar landið og rækta. Margir af þessum aðkomnu mönnum fylgdu prótestanta trú, og var þeim heitið fullkomnu trúarfrelsi, og var það efnt, meðan Aranda hélt völdum; en á hinum síðustu ríkisárum Karls þriðja fengu klerkarnir meiri ráð hjá konungi en áður. Aranda varð að fara af landi burt, og þá voru þessir menn ofsóttir eins og trúvillingar. Aranda komst reyndar seinna til valda, svo að

hann varð ráðgjafaforseti, en þar kom um síðir, að hann varð að rýma fyrir *Godoy* (er síðar mun getið) og dó í Arragoníu 1799.

Karl þriðji andaðist 1788 og kom þá sonur hans, *Karl fjórði* til ríkis (1788—1808).

Þess hefir áður verið getið, að árið 1761 gjörði Frakkland, Spánn, Neapel og Parma samband sín í milli (bourbonska sambandið), af því að sama ættin ræð fyrir þeim fjórum ríkjum. Fylgdi það því, að Spánverjar urðu að taka þátt í ófriði þeim, er til lykta leiddist á Parísarfriðnum 1763; enn fremur leiddi það af konungasambandi þessu, að Kristmúnkar voru reknir burt af öllum þessum fjórum ríkjum, og að múnkafélag þetta var síðan af numið. Því þegar menn höfðu komizt að því á Frakklandi, að múnkar þessir voru flæktir við ýms miður heiðarleg verzlunarfyrirtæki, þá greip *Choiseul* ráðgjafi tækifærið til þess að fylgja dæmi Pombals, og gjörði alla kristmúnka útlæga af Frakklandi (1764). Þegar nú Spánn, Neapel og Parma gjörðu slíkt hið sama, þá neyddist *Clemens* páfi fjórtándi til þess, árið 1773, að aftaka Kristmúnkafélagið með öllu. Er það allmerkilegt, að margir af félagsbræðrum þessum fengu síðan hæli á Rússlandi og Prússlandi og settust þar að.

Rússland eftir daga Péturs mikla. Katrín önnur. Póllandi er skift.

Þess hefir áður verið getið¹, þar sem sagt var frá viðureign þeirra Karls tólfta og Péturs Czars, að síðasta árið sem Karl lifði var Görtz ráðgjafi hans því nær búinn að koma sættum á milli Rússa og Svía. En þessar tilraunir ráðgjafans féllu allar um koll og urðu að engu, þegar Karl konungur féll 1718, enda var Görtz tekinn af lífi litlu síðar. Pétur Czar hélt því ófriðnum áfram, og herjaði á Svíþjóð og lét vinna þar mörg grimdarverk, þangað til Svíar voru svo að þrotum komnir, að þeir urðu að ganga að öllum þeim kostum, sem Pétur Czar setti þeim, og sömdu þeir þá frið í *Nýstað* (1721). Fengu Rússar þá Ingermanland, Esthland, Lifland, og Viborg á Finnlandi, og hafa haldið því síðan. Nú var ófriðnum lokið, Svíþjóð orðin stórlega undir, en Rússland orðið eitt af stórveldum Norður-

1) Nýja sagan, II. hefti, bls. 194.

álfunnar. Pétur lagði niður Czars-títúlinn og lét gefa sér keis-
arunafn, og hafsa eftirkomendur hans jafnan verið nefndir því
nafni síðan. Á ófriðarárunum var Pétur búinn að koma sér
upp miklum og velæfðum landher og álitlegum herskipaflota.
Enginn gat orðið foringi í liði hans, hvorki á sjó nè landi, nema
hann hefði byrjað fyrst á því, sem lægst var. Enginn gat orðið
hershöfðingi, nema hann hefði byrjað á því, að vera valdalaus
liðsmaður í hernum. Enginn gat orðið «admirall», nema hann
hefði fyrst verið háseti og stigið svo upp koll af kolli. Það stóð
á sama, hvort aðalamaður átti í hlut, eða aðrir ótignir menn,
Pétur hafði sjálfur byrjað neðst og þokast svo smátt og smátt
upp til hinna æztu hervalda. Hann hagaði fyrirkomulagi á öll-
um greinum stjórnarinnar eftir frakkneskri fyrirmynd; hann
bældi undir sig bæði aðalinn og klerkastéttina — alt varð að
lúta keisarannum einum. Kirkjustjórninni breytti hann á þann
hátt, að í stað «patriarkans», sem áður hafði yfirstjórn allra
kirkjulegra mála í landinu, kvaddi keisarinn nokkra biskupa í
nefnd, sem nefndist *hin helga synodus* og stýra átti öllum þess
konar málefnum undir yfirráðum keisarans, og hefir svo verið
síðan. Aðaltrúin á Rússlandi er hin grísk-katóléka, og keisar-
inn yfirbiskup, að sínu leyti eins og páfinn hefir verið yfirbiskup
hinna *rómverok*-katólésku þjóða. Allá atvinnuvegi leitaðist keis-
arinn við að bæta; hann lét gjöra hafnar við sjóinn, þar sem
því varð við komið, grafa skurði um landið til vöruflutninga, og
hefir þeim síðan verið haldið áfram, svo að nú má fara vatns-
veg um Rússland úr Eyrstrasalti suður í Svartahaf og Kaspíska
haf og norður í Hvíta haf. Ýmsum vísindastofnunum var kom-
ið á fót, einkum til þess, að klerkar gætu lært, en allt um það
breiddust vísindi og mentir mjög svo lítið út meðal alþýðu á
Rússlandi, fyrir þá sök að honni var haldið í þungri ánauð af
hinum heldri og ríkari mönnum. Við hirðina vildi Pétur keis-
ari láta fylgja frakkneskum siðum, og gekk það þó allmisjafn-
lega, einkum vegna þess, að hann var sjálfur hinn mesti drykk-
jumaður, og illur við ölið, og var þá alt annað en kurteis og
siðprúður. Það var fátt hjá þjóðinni, sem breytingar Péturs
keisara náðu eigi til, og þessar breytingar gjörði hann með lit-
illi vægð, og hvort mönnum líkaði betur eða ver; annað var
það, að hann hafði marga útlenda menn um sig og flest út-

lent í miklum metum. Af þessu hvorutveggja leiddi, að margir hneigðust að Alexíusi syni keisarans, en urðn Pètri fráhverfir; enda hafði Alexíus gefið mönnum í skyn, að hann mundi kollvarpa því flestu, er faðir hans hafði gjört, þá er hann kæmi til ríkis. Þetta frétti keisarinn, og féll honum það stórfilla sem nærri má geta. Hvernig sem hann talaði um fyrir syni sínum, og reyndi til að laða hann að sér, skipaðist hinn úngi maður ekki við það og fór sínu fram, og þar kom, að Pétur lét setja hann í varðhald; því næst var hann dæmdur til dauða, og dó litlu síðar í dýflissunni; segja sumir, að Pétur lèti taka hann af lífi. Pétur kvað síðan á, að keisarinn skyldi jafnan ráða því, hver eftirmaður hans yrði. Árið 1725 dó Pétur keisari (hinn 1. eða hinn mikli) og hafði engan kosið til ríkisstjórnar eftir sinn dag. Mensikov, sem áður er nefndur, ræð því, að Katrín drottning fekk ríkisstjórnina í hendur, og er hún nefnd *Katrín fyrsta* (1725—1727), en sjálfur ræð Mensikov reyndar öllu. Eftir fyrirmælum Katrínar drottningar kom *Pétur annar* til ríkis eftir hennar dag (1727—1730). Hann var sonur Alexíusar þess, er í fangelsinu dó, Péturssonar hins fyrsta, og að eins 13 veltra gamall, er hann fekk keisaranafnið. Það var áform Mensikova, að gifta hinum unga keisara dóttur sína, og stýra svo ríkinu í nafni tengdasonar síns. En sá ráðahagur fórst fyrir, því að Mensikov var sviftur völdum og rekinn í útlegð austur á Síbería af manni þeim, er Ivan Dolgorúki hét. Ivan var af gamalli og nafnkendri höfðingjaætt þar í landi, og komst nú, þegar Mensikov var úr sögunni, til hinna ætta valda. Keisarinn ætlaði að eiga Katrínu systur Ivans Dolgorúkis, en af því gat eigi heldur orðið, því að einmitt þann dag, er brúðkaupið skyldi standa, dó keisarinn úr bólusótt (1730). Var þá *Anna Ivanovna* bróðurdóttir Péturs mikla, kjörin til ríkisstjórnar, en varð að ganga að þeim kostum (skuldbindingarskrá), er ríkisráðið setti henni, fyrir þá sök, að hún stóð fjær ríkiserfðum, en Katrín systir hennar, sem var eldri, og þær frændkonur hennar, Anna og Elísabet dætur Péturs mikla¹. Ríkisráðið hafði ætlað sér, þá er það kaus Önnu, að stýra ríkinu, þó hún bæri drottningarnafnið, en Rússar gátu eigi felt sig við annað en einveldisstjórn, og fyrir því veitti Önnu drottningu hægt, að ónýta þá skuldbindingarskrá,

1) Sjá ættartöluna í II. hefti bls. 133.

er hún hafði skrifað undir, og að ná einveldinu algjörlega sér í hendur; varð þá Ivan Dolgorúki, og ættingjar hans margir, að fara í útlegð, og nokkru síðar var hann tekinn af lífi. Anna drotning gaf sig lítið við ríkisstjórn, en *Bíron* ráðgjafi hennar stýrði ríkinu eins og hann væri einvaldur, og var hinn grimmaasti maður. Þegar Anna drotning hafði styrkt Ágúst þriðja til ríkis á Póllandi (friður í Vínarborg 1735), kom hún því til leiðar, að Ágúst veitti Bíron hertogatign yfir Kúrlandi, og þó Kúrland hét í orði kveðnu lèn undir Pólverjakonung, varð það öllu fremur upp frá þeim tíma (1737) rússneskt skattland. Auk Bírons hafði Anna drotning í þjónustu sinni tvo menn þýzka, er mikinn þátt áttu í framsörum Rússlands á þeim tímum. Annar þeirra hét *Ostermann*, en hinn *Münnich*. Ostermann var prestsson frá Vestfalen, iðkaði bókmentir á æskuárum í Jena á Saxlandi, en varð þar mannsbani og flýði til Hollands. Þaðan fór hann til Rússlands og gekk í þjónustu hjá Pètri mikla, og komst þar til hárra valda sökum vitsmuna og dagnaðar. Á dögum Önnu drotningar varð hann kanselleri, þótti stjórnvitur maður, og ræð þá miklu. En er Elísabet drotning kom til ríkis, var Ostermann sviftur völdum og dæmdur til dauða, fekk þó að halda lífi, en fluttur var hann til Síberíu og þar dó hann 1747. Münnich var ættaður frá Oldenborg, var með Eugen í erfða stríðinu spánka og lærði þá hernaðarfróttina; eftir það fór hann til Rússlands, nokkrum árum áður en Pétur mikli dó, og staðnæmdist þar síðan. Anna drotning setti hann yfir öll hermálefni ríkisins, og stýrði hann þeim vel og viturlega, hafði sjálfur yfirstjórn Rússahers (árin 1736—1739), meðan ófriðurinn stóð milli Rússa og Tyrkja, og varð frægur af þeirri herstjórn. En svo stóð á þeim ófriði, að Rússar mintust þess jafnan, að Tyrkir höfðu borið herra blut í viðskiftum þeirra (1711), þá er Pétur mikli komst í mestar kröggur við Prút-fljótið¹. Þessa vildu Rússar hefna, hvenær sem færi byðist. Árið 1735 áttu Tyrkir ófrið við Persa, og því tækifæri sættu nú Rússar til þess að geta náð undir sig löndum suður við Svarta hafð. Það var gefið til sakar, að Tatarar suður á Krím gjörðu Kósökkum, þegnum Rússakeisara, ýmsan óskunda. *Mahmúd fyrsti*, Tyrkjasoldán (1730—1754), bauðst til að greiða Rússum skaðabætur, en

1) Nýja sagan, II. hefti, bls. 184.

þeim boðum var hafnað, því að Rússar vildu eigi friðinn. Var þá Münnich sendur með her manns móti Tyrkjum, og sýndi hann þá, hve mikla yfirburði Rússar höfðu yfir Tyrki í vopnaviðskiftum. En af því að Austurríkismönnum, er voru bandamenn Rússa, varð lítið ágengt, og gjörðu frið við Tyrki í Belgrad (1739), þá urðu Rússar að slaka til í kröfum sínum og láta sér lynda að fá Asow. Anna drottning dó barnlaus 1740, en hafði áður gjört þá fyrirskipan, að systurdóttursonur sinn *Ivan*, eigi misserisgamall, skyldi erfa ríki eftir sinn dag, en Bíron hertogi hafa forsjá með honum og ríkinu. En að nokkrum dögum liðnum, var Bíron rekinn frá völdum og sendur til Síberíu af Önnu móður hins unga keisara. Varð Münnich þá ætzi ráðgjafi. Eigi fullu ári þar á eftir varð aftur stjórnarbylting. Maður sá er *Lestocz* hét, og var læknir. *Elisabetar* dóttur Péturs mikla, fékk svo talað um fyrir henni, að hún lét nokkur hundruð hermanna umkringja keisaraböllina og taka þá alla höndum, er að völdum sátu. Hinn ungi keisari Ivan (fjórði), þá á öðru ári, var settur í dýflissu á Schlüsselborg, og þar sat hann alla ævi, þangað til hann var ráðinn af dögum 24 árum síðar. Foreldrar hans, *Anton Úlrik* hertogi og *Anna Karlóvna*, voru sendir til Síberíu, og dóu bæði í útlegð. Ostermann og Münnich voru einnig teknir og sendir sömu leið; dó Ostermann þar eystra, eins og fyr er sagt, en Münnich var þar, meðan *Elisabet* drottning lifði, og þangað til Pétur þriðji leysti hann úr útlegð 1762 og leyfði honum heimkomu; komst hann þá aftur til nokkurra valda og dó í Pétursborg 1767. *Elisabet* leyfði Bíron hertoga að koma aftur frá Síberíu og setjast að í Jaroslav við Volga-fljót. En á dögum *Katrínar* drottningar fékk hann Kurland aftur til forráða (1763) og stýrði því síðan til dauðadags (1772), og þótti vel stýra. *Elisabet* drottning ræð ríkjum frá 1741—1762, og hafði jafnan ilt orð á sér fyrir sællífi og saurlífnað. Hún gaf sig lítið við stjórnarstörfum, en *Bestushev*, kanselleri hennar, hafði allan veg og vanda af þeim hlutum.

Áður en *Elisabet* kom til ríkis, var ófriður byrjaður milli Svía og Rússa, og var það af völdum Frakka, að Svíar höfðu vakið ófriðinn. Svíam gekk þá svo illa, að Rússar lögðu allt Finnland undir sig, en á friðnum í Åbo (1743) sluppu Svíar þó svo vel, að þeir létu að eins laust af Finnlandi landið fyrir aust-

an Kymeneðjótíð, en kjósa varð ríkisdagur þeirra *Adolf Friðrik* af Holstein-Gottorp til konúnga í Svíþjóð eftir Friðrik fyrsta, því að þau Friðrik og Ulrika Eleonóra drottning hans (systir Karls 12.) voru barnlaus, en Rússar voru hræddir um, að Dana konungur, eða sonur hans, mundi verða kosinn til konúnga yfir Svíum og þau þrjú norðurríkin (Svíþjóð, Norvegur og Danmörk) sameinast. Á síðustu árum sínum tók Elísabet þátt í sjö ára stríðinu móti Friðriki öðrum, eins og fyr er ritað, og var einhver hans verstí fjandmaður. Dauði hennar varð honum til lífs, eins og kunnugt er.

Elísabet kaus til ríkis eftir sinn dag, Pétur systurson sinn hertoga af Holstein-Gottorp. Hann er nefndur *Pétur þriðji*. Foreldrar hans voru Karl Friðrik af Holstein-Gottorp og Anna dóttir Péturs mikla; móðir Karls Friðriks var Hedevig Sofía, systir Karls tólfta Svíakonúnga. Pétur þriðji hafði átt kost á að verða konungur í Svíþjóð, en honum þótti meiri fremd í að verða keisari á Rússlandi, þegar þar að kæmi, og þess vegna komst frændi hans *Adolf Friðrik* að (1743) og varð síðan konungur í Svíþjóð. Drottning Péturs þriðja hét Katrín, prinsessa af Anhalt Zerbst, og urðu samfarir þeirra eigi góðar. Pétur var eigi vaxinn því að stjórna Rússlandi; hann var grunnhygginn og fljót-sær, og vildi bylta öllu og breyta í ríki sínu, og herma, í flestu því er þó var minnst í varið, eftir Friðriki öðrum Prússa konungi. Varð keisarinn af þessu mjög óvinsæll, og þegar hann hafði ráðið ríkjum nokkra mánuði, lét drottning hans taka hann höndum og setja í varðhald, og þar var hann af lífi tekinn nokkrum dögum síðar (17. júlí 1762).

Þannig komst ríkisstjórnin í hendur drottningar, er hún síðan nefnd *Katrín önnur* og stýrði Rússlandi 34 ár (1762—1796).

Katrín drottning hélt ríkisstjórninni í þeirri stefnu, sem Pétur mikli hafði á undan farið, og bent sínum eftirkomendum á, að halda skyldi. Og má það með sannri segja, að fáir af stjórnendum Rússlands, og ef til vill enginn nema Pétur einn, hafa meira að gjört en Katrín til þess að efla framfarir þess, svo var hún stórvirk og starfsöm, meðan hún sat að völdum. Að því leyti á hún gott orð skilið af sögunni. En að öðru leyti er hún eigi lofsverð, bæði vegna þess, að siðferði hennar var mjög

vítavert, og vegna þess, að hún beitti rángindum og það freklega við nágranna þjóðir sínar, einkum hinar óstyrkari, eins og t.a.m. Pólvörja. Rússland var á þeim tímum mjög strjálbyggt, en víðlendið afarmikið. Til þess að auka bygðina, bauð drotning þáangað fjölda manna af öðrum löndum, og styrkti þá á allar lundir, til þess að ná þar bólfestu. Hún lét reisa af nýju marga bæi stærri og smærri, víðs vegar um ríkið, þar sem bezt þótti í sveit komið. Segja menn, að bæir þeir séu yfir 200 að tölu, og margir þeirra nú orðnir stórar og mannmargar borgir. Hún kom fótum undir ýmsar stofnanir t. a. m. sjúkrahús, fátækrahús, munaðarleysingjahús, og á læknaskipunina kom hún góðu lagi; atvinnuvegi efldi hún á allar lundir; verzlun og siglúngum greiddi hún veg bæði með samningum við aðrar þjóðir, og með því að bæta þjóðvegi og grafa skurði um landið. Vísindi og íþróttir studdi hún af mikilli rausn og gðfuglyndi, en vitaskuld er það, að alþýða manna á Rússlandi hafði lítið gagn af þeim hlutum. Ánað sú, sem bændalýðurinn lifði við, var útbreiðslu mentunarinnar til fyrirstöðu. Drotning skifti ríki sínu í fóst og skipuleg umdæmi stærri og smærri, og skipaði þar valdsmenn og dómendur yfir. Það var áform hennar að setja ein lög um allt ríkið, en þó að því verki væri starfað um bríð varð það eigi framgengt.

Þegar Jóhann Sobiesky var dæinn (1696), fór *Póllandi* að hnigna. Þá komu kjörfuretarnir af Saxlandi þar til ríkis, Ágúst annar (1697—1733), og Ágúst þriðji (1735—1763), eins og fyr er sagt. Hið pólska ríki var að vísu allstórt, því að það náði norðan frá Estrasalti suður til Karpathafjalla, og vestan frá Brandenburg austur að Dnieprfljóti, en þar mátti öllu heldur heita höfðingjastjórn í landi en konungsstjórn. Þeir hinir saxnesku konungar, er nú voru nefndir, voru einhver hin versta sending, er til Póllands gat komið. Frá þeim og þeirra hirð breiddist hin mesta siðaspilling út um landið, og þá fyrst og fremst til aðalsins, en aðalsmenn réðu mestu á þjóðþinginu (ríkisdeginum); hefir því lengi verið við brugðið, hve róstusamt var á þingum Pólverja. Þar gat eitt einasta atkvæði (*liberum veto*), ef því var beitt, ónýtt hvert mál-efni, hversu mikið nauðsynjamál sem það var. Landsmönnum var þar að auki heimilt að vopnast og ganga þannig í félög (slíkan félagskap nefndu menn *Confederation*), og olli slíkt einatt miklum óspektum í landinu. Alt þetta sundurlyndi, allir

Þessir flokkadrættir ollu því, að ekki kvað að Póllendingum, hvorki í hinum mikla Norðurlanda ófriði, né í sjö ára stríðinu. Það sem mest og best hafði styrkt Pólland, var ófriður sá, er einatt átti sér stað milli nágranna-þjóðanna; en er Húbertsburg-arfriðurinn var saminn (1763), þá var úti um þann styrk. Enda gjörðu þau þá (1764) samning sín í millum, Friðrik annar Prússa-konungur og Katrín Rússadrottning, og hétu hvort öðru, „að vernda frelsi Póllands“, það er að skilja, að þar skyldi kjörríki haldast, eins og verið hefði, og einn þingmaður með neikvæði sínu (*liberum veto*) geta ónýtt það, er allur þingheimur galt jákvæði við. Tilgáangur þeirra konungs og drottningar var beinlínis sá, að ala sundurlyði og samtakaleysi Pólverja, þangað til tími væri til kominn, að ráða á þá og ná undir sig af Póllandi því, sem náð yrði. Um þessar mundir áttu Pólverjar að kjósa sér konung. Katrín drottning vildi, að sá maður yrði kosinn, er *Stanislás Poniatóvski* hét; hann var friður maður sínum, skraut-menni mikið, og aldavinur Katrínar, en með engu móti vaxinn þeim vanda, að stýra Pólverjum svo að í lagi færi. Lendir menn (aðallinn) á Póllandi voru því mótfallnir, að Stanislás yrði þar konungur, en Katrínu var alvara og sendi 10,000 Rússa vestur til Varskáar (Warschau), og í annan stað sendi Friðrik konungur jafnmargt lið austur þangað, og þannig voru Pólverjar neyddir til að kjósa Stanislás (í sept. 1764). Má svo að orði kveða, að frá þeim tíma byrji raunasaga Pólverja. Þegar Stanislás var þannig orðinn konungur, varð að sönnu stundarfriður, en það kom bráðum í ljós, að konungur ræð litlu, en Katrín miklu, eða jafnvel öllu á Póllandi, og hafði hún þar sendiherra sinn, er Repnin hét, ráðrikan mann og harðan, til að framkvæma það, er hún vildi vera láta. Það sást best, hve mikið Rússar létu til sín taka á Póllandi, þegar trúarbragðadeilurnar hófust þar, litlu síðar en hér var komið. Svo stóð á, að framan úr öldum fylgdu Pólverjar almennt rómversk-katólskum sið. En þar var flokkur manna í landinu, er aðra trú hafði, bæði prótestantar og grísk-katólskir menn, og voru þeir kallaðir *Dissidentar*. Þessir urðu fyrir ójöfnuði af hinum, er páfatrúnni fylgdu, og þess vegna snoru þeir sér til Katrínar Rússadrottningar, og beiddu hana styrkja sig til jafnréttis við páfatrúarmenn. Drottning tók þeim tilmælum feginsamliga, því að nú bauðst henni gott og nýtt færi til

að skerast í mállefni Pólverja. Krafðist hún þess þegar af hinri pólsku stjórn, að „Dissidentum“ yrði veitt allt það, er þeir um beiddu. Ríkisdagur Pólverja færðist undan, og Soltyk biskup í Kraká kom því til leiðar, bæði sökum páfalegs trúarofsa og sökum haturs við Rússa, að kröfum drotningar var í flestum greinum teitað. En niðurstaðan á þessu varð sú, að Repnin lét taka Soltyk biskup höndum, og nokkra aðra lígna menn, og flytja þá anstur á Síberíu, en fíkisdeginum í Varská var þröngvað til að leyfa Dissidentum fult trúarfrelsi og jafnrétti við aðra landsmenn á Póllandi. Nú undu margir af Pólverjum illa þessum málalokum: og sveið það sárt, að vera nauðungarmenn Rússa, gjörðu því félag með sér (*Confederation*), þar sem heitir í *Bar* (í Póðolíu), bæði til þess að losast undan yfirráðum Rússa, og til þess, að swifta Dissidenta þeim réttindum, er þeir höfðu fengið. Nú laust upp ófriðnum. Rússar og Stanislás konungur höfðu lið miklu meira; urðu bandamenn uodir í þeim viðskiftum, og brukku nokkrar hersveitir þeirra suður á Tyrkland. Rússar eltu þá þangað, og gjörðu þar ýms grimdarverk. Reiddist þá Soldán (Mústapha 3. 1757—1774), sem vonlegt var, og sagði Rússum stríð á hendur (1768) meðfram eftir áeggjan Frakka. Stóð sá ófriður á sjötta ár (1768—1774) og var hinn grimmasti. Rússar fóru herskildi yfir landið alt suður að Dóná, og um sama leyti lagði rússneskur herskipafloki út frá Krónstadt, og hélt alla leið vestur fyrir Norðurálfa, inn í Miðjarðarhaf, og austur til Grikklands. Alexius Orlov, einn af gæðingum Katrínar, var yfirforingi flotans. Rússneskum hermönnum var hleypt á land á Grikklandi; gjörðu Grikkir, í von um liðveizlu Rússa, þegar uppreisn móti Tyrkjum, en höfðu hið mesta ógagn af, því að styrkar sá, er Orlov veitti þeim, var langt um of lítill, og er minnst varði, flutti Orlov lið það, er hann hafði sett á land, aftur út á skipin, og hélt austur á eyjar. Þar urðu herskip Tyrkja fyrir þeim við ey þá, er Scio (fyrrum Chios) heitir, og tókst þegar orusta; fengu Rússar þar sigur, og máttu þakka hann enskum foringjum, er voru á skipum þeirra. Litla stöðar brendu þeir öll þau skip fyrir Tyrkjum, er flúið höfðu frá Scio inn á vík eina vestan á Litlu-Asíu, fram undan bæ þeim, er Techesme hét (1770). Ári stöðar annu Rússar aflu Krim-skaga; þar bjuggu Tatarar, eða Tartarar, en höfðingi þeirra nefndur

Chau, og var hann skaftskyldur undir Soldán í Miklagarði. Rússar ráku Chaninn úr völdum, og settu annan í stað hans, er játaðist undir yfirráð Rússa, en sagði skilið við Soldán.

Nú fór mönnum að þykja nógi um aðfarir Rússa. María Theresía hélt, að þeir mundu ætla að setjast að fyrir fult og alt í Dónárlöndunum (Moldau og Wallachii), sem þeir höfðu unnið, og stóð henni stuggur af því nágrenni. Fyrir því gjörði hún löynilega samninga við Soldán gegn Rússum, og nú var eigi annað fyrir að sjá, en að almennur ófriður kviknaði um alla Norðurálfu. Til þess að sporna við slíkum vandræðum, kom Friðrik annar fram með þá tillögu, að Katrín Rússadrottning skyldi semja frið við Tyrkjasoldán og gjöra honum góða kosti, en ef hún þættist hafa skaða af þeirri friðargjörð, þá gæti hún unnið hann upp aftur á Póllandi; og til þess að jafnvægi ríkjanna haggast eigi við það, að Katrín fengi nokkuð af Póllandi, þá skyldi bæði Austurríki og Prússaríki fá sinn hlut af bráðinni. Á þessa tillögu féllust þær Katrín ónætur og María Theresía, og meðan verið var að semja um sundurskifting Póllands, sendi bæði Friðrik og María Theresía lið þangað austur, og létu það setjast að í þeim sveitum, sem þeim lék helst hugur á að eignast. Kvaðst María Theresía hafa sent sína menn til þess að vernda, gegn yfirvofandi hættu þeirra tíma, íbúana í nokkrum héraðum á Póllandi, er væru gamlir skiftavinir Ungverja; en Friðrik kvaðst þurfa að setja vörð þar eystra, til þess að verja lönd sín fyrir drepsótt þeirri, er þá gekk á Póllandi. Rússar höfðu einnig lið þar í landi, og allur þessi útlendi hermannasægur hafðist þá sve marget og mikið ilt að meðal Pólverja, að sumir sagnaritendur segja, að því mundi naumast trúast, ef nákvæmlega væri frá skýrt. Það er vitaskuld, að Pólverjar höfðu illa í garðinn búið fyrir sig, þar sem þeir gátu sjaldan orðið á eitt báttir í þeim aðalmálum, sem eru skilyrði fyrir viðreisni og lífi þjóðanna. Hin pólska þjóð hafði mikla ókosti, það verður eigi varið, en hún var hins vegar þeim kostum búin, að hún gat rétt sig við, ef hún hefði fengið næði til þess, fengið sjálf að jafna sín mál. En að því leyti var hún ver farin en margar aðrar þjóðir, að hún fékk eigi tíma eður næði til þess fyrir ágirnd og ilsku sinna nágranna. Engir vildu hjálpa, eða þorðu að hjálpa, Pólverjum; þeir stóðu einir uppi móti þremur stórvörgum. Stanislás konungur og rík-

isdagur Pólverja mæltu fastlega móti því, að ríkið yrði limað sundur, eins og hinir fóru fram á. En þeim mótmælum var svarað á þá leið, að ef Pólverjar létu eigi góðviljuglega af hendi þá landsbluta, sem um væri að ræða, þá yrði alt Pólland af þeim tekið og skift upp milli Rússa, Austurríkismanna og Prússa. Hér var því ekki undanfæri. Pólverjar urðu að ganga að þeim kostum, sem þeim voru settir, og láta þriðjung af ríkinu. Þessi fyrsta sundurskifting Póllands gjörðist á áliðnu sumri árið 1772.

Prússakonungur fékk í sinn bluta Vestur-Prússland, eða, sem það hét öðru nafni, Pólska-Prússland. Á þann hátt sameinaðist Austur-Prússland við Brandenborgar-löndin, og konungur fékk öll yfirráð yfir Weichsel-fljótinu, sem var svo mikils vert, því að Póllands verzlun streymdi út og inn um fljótið; þó fékk konungur eigi borgirnar Danzig og Thorn, en allmiklar lendar eignaðist hann meðfram Neze-fljóti. Það voru samtals 600 ferh. mílur lands, og um 600,000 manna, sem gengu undan Pólverjum undir Prússa í þetta sinn.

Rússadrotning fékk mikinn part af Lithauen (Lithaugalandi), og þar að auki Minsk-, Vitepsk- og Miscislav-sveitir, með öðrum orðum: landið milli stóránna Dúna, Dniepr og Drutsch. Alt til samans 2,000 ferh. mílur með 1,800,000 manna.

Austurríki eignaðist þó frjóvasta og fjölbygðasta partinn: konungsríkin Lodomeríu og Gallizíu og mörg önnur smærri hær-öð, þar á meðal hinar hafnkendu saltnámur í Bochnia og Wieliczka, samtals 1400 ferhyrndar mílur, með því nær 3 millíónum manna.

Að þessu búnu hétu öll þessi þrjú stórveldi Pólverjum því, að þau skyldu ábyrgjast þeim þau lönd, er þá voru eptir ótekin frá þeim, og kváðust alls engar kröfur hafa til þeirra upp frá því. Sagan sýnir hve vel þau heit voru síðan efnd.

Um þessar mundir varð upphlaup mikið austur á Rússlandi. Maður hét *Púgatschew*, ættaður austan frá Don-fljóti og einn af Kósökkum þeim, er þar eiga heima. Hann hafði verið í liði Rússa, bæði vestur á Prússlandi í sjö ára stríðinu, og suður á Tyrklandi, en síðan komst hann til Póllands, og var þar í klaustri. Einhverju sinni hittir hann þar herforingja einn að máli, og segir foringinn, að Púgatschew sé mjög líkur í sjón að sjá Péttri keisara hinum þriðja.

Púgatschew kom nú til hugar, að telja löndum sínum trú um, að hann væri Pétur keisari, og þóttist sannfærður um, að sér yrði þá tekið segins hendi, því að Kósökkum var vel til Péturs keisara. Fór Pugatschew því næst austur til Kósakka þeirra, er bjuggu við Jaik-fljót. Það er austur undir Úralfjöllum. Segir hann þeim, að hann sé Pétur keisari, og hafi komið úr höndum óvina sinna, en að annar maður hafi verið drepinn, sem þeir hafi ætlað mundi vera keisarinn. Þessu trúðu menn, og af því að stjórn Katrínar var illa þokkuð þar eystra, þá flyktist þegar mágur manns saman (1773), og ætluðu að reka Katrínu úr völdum, en koma Pétri aftur til ríkis. Þegar Katrín fréttir óspektir þessar, gjörir hún menn út í móti þeim, en drotningarmenn urðu ofurliði bornir, og gekk svo um hrið, að uppreistar menn fjölguðu, en drotningarmenn fækkuðu þar eystra, þangað til dugandi hershöfðingjar komu til sögunnar, og fór þá svo, að Púgatschew varð höndum tekinn og höggvinn í Moskva í jan.-mán. 1775. Hafði flokkur hans gjört hinn mesta skaða, og mælt er, að um 100,000 manna hafi fallið í þeim óspektum. Eigi lagði Katrín drotning þungar refsingar á þá, sem verið höfðu í flokki uppreistarmanna, en hitt bauð hún, að engi maður skyldi nefna Jaik framar, heldur skyldi fljótið heita Úral, og bærinn, sem upphlaupið hófst fyrst í og Jazkoi hét, skyldi heita Úralak, og svo er það hvorttveggja nefnt síðan.

Þessar óeirðir Púgatschewa töfðu fyrir friðarsamningum milli Rússa og Tyrkja; því að Tyrkir hugðust mundi hafa gagn af upphlaupi Kósakka, og vildu svo eigi taka þeim friðarkostum, er Rússar þá buðu, en síðan þrengdu Rússar svo að Tyrkjum, að þeir sáu sér eigi annað fært, en sættast. Þannig komst friður á með þeim í *Kútschuk-Kainardachi* (í júlímán. 1774), mistu Tyrkir þá allt, er þeir áttu í löndum með Svartahafinu fyrir austan Dniepr; Rússar fengu ýms. ítök í löndum Tatarar, og það, sem mestu skifti, fult frelsi til sjóferða allra um Svartahafið og um Dardanellasund; svo skyldu og Tatarar vera með öllu lausir undan yfirráðum Tyrkja.

Nú var svo komið, að Rússar höfðu náð fólfestu við Svartahafið, og skip þeirra gengu nú fyrirstöðulaust, bæði þar um hafið og um sund þau, er þaðan liggja suður í Grikklandshaf og Miðjarðarhaf, og fluttu varning til borganna vestan á Litluasíu, á

Grikklandi og á Ítalíu, og þaðan aftur heim til Rússlands. En Rússar létu elgi þar við sitja. Þeir vildu eignast öll lönd norðan að Svartahafinu, og jafnvel ná undir sig öllum Tyrkjalöndum í Europa. Kom sá vilji þeirra einkum í ljós, eftir að sá maður komst til valda á Rússlandi, er *Potemkin* hét. Að hans ráði var það, að Tatara-Chaninn á Krím var gjafur til þess, bæði með refjum og fémútum, að afsala sér og stauma öll yfirráð yfir Krím í hendur Rússum (1783). Þá af Tatörum, sem móti málta, lét *Potemkin* taka af lífi, að sögn um 30,000 manna. Litla síðar fékk *Heraklius*, jarl Tyrkjasoldáns í Georgíu, Rússum það land allt í hendur. Það eru miklar og góðar sveitir fyrir sennan Kákasusfjöll og austan Svartahafið. *Potemkin* var landstjóri Katrínar drottningar á Krím og hinum öðrum fylkjum suður við Svartahafið, og ræð mestu á Rússlandi árið 1776 til 1791. Á því tímabili var það, að drottning fór þangað suður (1787) til þess að sjá hin nýja fylki, er undir hana höfðu gengið. Þegar *Potemkin* vissi að hennar var von, lét hann smala saman mönnum og fænaði úr ýmsum áttum, húsa bæi, ryðja akra, og gjöra ýms mannvirki alls staðar þar, sem leið drottningar lá um, svo að þegar hún kom og sá þetta, undraðist hún hve allt var þar blómlegt, og hvílíkan afbragðs dagnað *Potemkin* hefði sýnt í því, að koma öllu því til leiðar á svo fáum árum, enda sparaði hann eigi að telja henni trú um, að allar þær miklu framfarir væru sér að þakka. En hið sanna var þó hitt, að mest af þessu voru eins konar sjónhverfingar og þrettir elair, því að sólkið og fæð, sem drottningin sá við veginn ekkun daginn, var flutt um nætur á þá staði, sem leið hennar lá um daginn eftir; og margt af því líði er sagt að dáið hafi jafnóðum af eultu og seyr. En það vissi drottningin eigi. *Potemkin* hafði látið gjöra borg eins þar sem Dniepr fellur suður í Svartahafið. Sú borg heitir *Cherson*, þar átti að vera herskipastöð Rússa við Svartahaf. Yfir borgarhlíðum stóða með stóra letri þessi orð: „*hðan er leiðin til Byzanz*“ (þ. e. Konstantínópel). Þýðing þeirra orða er auðskilin. Í *Cherson* kom Jósef annar Þýzkalandskelsari til fundar við Katrínu drottningu, og var það ætlun manna, að þau hefðu þá ráðgjört að reka Tyrki á brant úr Norðurálfu. En er Soldání komu þau tilbúið, að þau hafi átt fund með sér Katrín drottning og kelsarinn, og að þau hafi þar að auki liðsafað mikinn,

þá vill hann eigi bíða boðanna, en hatar taka Búlgakow, hinn túsneska sendiherra í Konstantínópel, höndumt og setja í dýflissu, og segir Rússum stríð á hendur (1787). *Pótemkin* og *Sévaróv* voru höfðingjar yfir líði Rússa, en Jósef keisari hafði sjálfur yfirforusta Austurríkismanna. Rússum varð vel framgengt, og unnu ýmsar af kastalaborgum Tyrkja t. a. m. *Otajakov*, *Bender* og *Ismail*, eftir drengilega vörn og mikið mannsfall; fóru Rússar alls staðar fram með hinni mestu grið og drápu jafnt vopnlausar menn sem vopnaðar. Meðan keisarinn hafði sjálfur herstjórn, vanst Austurríkismönnum lítið á, en hann sýktist bráðum, fór heim til Vínar (Wien) og andaðist þar (1790). Tók þá *Loudon*, sem kunnar er frá sjö ára stríðinu, við sætu hervöldum, og skifti þá svo um, að Austurríkismenn unnu Belgrad, hina nafnakendu og sterku kastalaborg, og mundu bandamenn eflaust hafa unnið á Tyrkjum til fulls og alls, ef annað hefði þá eigi í milli komið. En það var bæði það, að Gústaf þriðji Svíakongur hóf ófrið gegn Rússum (1788), og urðu þeir að smást við honum, og svo hitt, að Englendings og Prússum þótti aðg om aðfarir bandamanna, og gjörðu sig líklega til að veita Tyrkjum; þá var og stjórnarbyltingin á Frakklandi byrjuð, er sneri hugum allra þjóðhöfðingja Norðurláfunnar í þá átt. Þetta allt tilsamans knúði Leópold Þýskalandskeisara annan, er kominn var til ríkis eftir Jósef bróður sinn, til þess að semja frið við Tyrki í *Szistova* (1791), og láta aftur Belgrad af hendi við þá. Katrín Rússa drottningu þótti nú uggvænt um, að hún mundi fá yfirbugað Tyrki, er bandamenn hennar voru geognir úr leiknum, þar að auki voru óeirðir kviknaðar í Póllandi, og allar líkur til, að þar væri arðsvon meiri, þess vegna gjörði hún frið við Tyrki í *Jassy* (1792), og lét sér nægja að Dniester yrði merki — á milli Rússlands og Tyrklands.

Meðan Rússar áttu í hæggi við Tyrki og höfðu ærið að vinna, hugðu Pólverjar, að sér mundi gefast færi á að losast undan yfirráðum og ánaud Rússa, og það því fremur sem Prússastjórn, er í það mund var lítil vinur Rússa, eggjaði Pólverja til nokkurra framkvæmda í þá átt, og gjörði sig líklega til aðstoðar við þá. Og kom það svo langt, að árið 1790 gjörðu Prússar og Pólverjar þann samning milli sín, að hvorir skyldu öðrum lið veita, ef til vandræða kæmi. Ári síðar (1791), eftir

miklar og harðar umræður, leiddu Pólverjar í lög hjá sér nýja stjórnarbót, er í ýmsum greinum bætti út þeim brestum, er verið höfðu á stjórnarskipun ríkisins. Í hinni nýju stjórnarskrá var meðal annars kveðið svo á, að Pólland skyldi upp frá því vera erfðaríki, í stað kjörríkis, og konungstignin ganga í ætt kjörfurstans af Saxlandi, að Stanislási konungi Poniatovsky dauðum. Svo virtist sem hin nýja stjórnarskipun mundi geta borið góða ávexti fyrir land og lýð, ef hún næði að festa rætur; en þess var eigi kostur. Ýmsir tendir menn (aðalsmenn) á Póllandi þóttust missa helzt til mikið af einkaréttindum sínum við þessa nýja stjórnarbót, áttu því fund með sér í *Targóviz* (1792), og sórust í félag, og leitaðu liðs hjá Katrínu Rússa drottningu. Drottning tók því gjarnsamlega, og sendi þegar óvígna her til Póllands, «til þess að vernda fornt frelsi hinna pólsku þjóðar», eins og látið var í veðri vaka. Pólverjar treystu því, að Prússar mundu, eftir gjörðum samningi, koma til liðs við sig, en sú liðveisla kom aldrei, því að Friðrik Vilhjálmur annar Prússakonungur, eftirmaður Friðriks mikla, sá sér meira hag í því, að ræna Pólverja löndum, en rétta þeim hjálparhönd. Pólverjar stóðu því einir uppi móti ofurefli Rússa, og höfðu lítið lið og lítt vopnað, en hreysti og hugprýði skorti eigi. Helztu herforingjar Pólverja voru þeir *Jósef Poniatovský*, — bróðursonnr Stanislás konungs, hinn mesti kappi, og var seinna með Napóleoni kelsara og fékk gott orð — og *Thaddeus Kosciuszkó*, einn af hinum ágætasta mönnum, fyrir allra hluta sakir, er nokkru sinni hefir verið með Pólverjum. Kosciuszkó hafði gengið undir merki Washingtons, og barizt fyrir frelsi bandaríkjanna í Vesturheimi og fengið þar mikinn orðstír. En þó að herforingjar Pólverja væru afbragðsmenn og liðið sýndi ágæta hreysti, urðu þeir alls staðar ofurlíði bornir af Rússum sökum mannsæðar. Stanislás konungur lét og Rússadrottningu hræða sig til að samþykkjast gjörðina í *Targóviz*, og bauð því sínum mönnum að leggja vopnin niður; og var þá vörninni lokið. Kosciuszkó og margir ágætir menn fóru þá af landi burt, og vildu eigi vera við staddir niðurlægingu ættjarðar sinnar. En Rússar og Prússar skiftu Póllandi með sér í annað sinn; tóku hinir fyrnefndu mikinn hluta af Lithauen, en hinir síðarnefndu nokkuð af «Storpolen», og borgirnar Danzig og Thorn (1793).

Shkum rángipdum gátu Pólverjar eigi unað; og gjörðu því samtök með sér í kyrpey til þess að brjótað undan oki hinna útlendu ránsmanna. Hóf sá maður, er Madalínský hét, uppreistina (24. marz 1794). En er Rússar og Prússar urðu þess vísari, höðu þeir honum þegar í stað, að hafast ekki að, og senda það lið frá sér, er til hans hafði safnast. Hann neitaði að hlýðnast þeirri skipun og hélt liði sínu til *Krakáa*. Það var önnur hin helzta borg á Póllandi, og er langt suður í landi við Weikselfjót, en Varská höfuðborgin er miklu norðar og neðar með fjótinu. Nú kemur Kosciuszko til móts við Madalínský, og eftir að hann hafði unnið sigur á einum herflokki Rússa, var hann gjörður að *alræðsmanni* (*Dictator*) Pólverja, en Stanisłasi konungi vildu þeir fyrir engum völdum trúa; því að menn báru ekki traust til hans. Setulið það, er Rússar höfðu í Varská, var höggvið niður; en þó Kosciuszko gerði allt sem gjört varð, og við mátti búast af slíkum hershöfðingja, og þó liðsmenn fylgdi honum vel og drengilega, máttu þeir eigi við margnum, þar sem hæði voru Rússar og Prússar í móti með ofurefli liðs. Eftir ýms vopnaviðskifti varð aðalfundur Rússa og Pólverja (10. okt. 1794) þar sem heitir *Maciejovice*. Höfðingi Rússaliðs hét *Fersen*, en Kosciuszko hafði sjálfur yfirstjórn Pólverja. Þar varð orusta löng og hörð, en svo fór að Rússar unnu sigur. Kosciuszko hnég til jarðar yfirkominn af sárnum og mæði, og mælti þetta við er hann féll: *Finis Poloniae*! Var hann því næst fluttur til Pétursborgar og settur í varðhald, og þar sat hann til þess er Katrín drottning andaðist (1796), en Páll keisari, sonur hennar, kom til ríkis. Hann gaf Kosciuszko lausn og vildi gjöra hann að hershöfðingja sínum, en það þektist Kosciuszko eigi, og fór af landi burt og dó í Sveiz (Svisslandi) 1817.

Um þar mundir er Maciejovice-orustan varð, kom Súvaróf með miklu liði sunnan frá Svartahafi, og settist um Varská, og tók hana eftir mikið mannfali og mörg grimdarverk (í öndverðum nóvembermán. 1794). Var landið þá allt í fjandmannahöndum, og skiftu þeir því næst Póllandi með sér hið þriðja sinn (24. októbermán. 1795). Rússar tóku það, sem eftir var, af Litauen, Volhyniu og Pódogiu; Prússar fengu Varská og Ný-Aust-prússland. Austurríkismenn, er eigi þóttust mega sitja hjá að-

þ. e. «Endalok Póllands!»

gjörðalausir, hrifsbörn undir sig Vesturgalizin. Þannig hvarf Pólland úr ríkjatölu Norðurlálfunnar, og hefur aldrei síðan verið sjálfsær ráðanda. Vetri síðar lagði Stanislas niður konungdóminn, eftir boði Katrínar drottningar, og andaðist austur á Rússlandi (1798). Kúrland komst einnig á þeim missærum undir algjörð yfirráð Rússlands.

Katrín önnur dó undir árslokin 1796, og kom þá Páll keisari sonur hennar til ríkis, eins og áður var sagt.

Austurríki og Prússland frá 1763—1792.

Franz Stefán af Lothringen (Toskana), er verið hafði Þýskalands keisari síðan 1745 (Franz I.) dó 1765. Hann hafði í rænu og verið eins borið keisaranafni, en lítil sem engin völd haft, og tekjur keisarans voru í það mund órðnar mjög litlar. Í erfðalöndum þeirra Habsborgarmanna ræð hann því nær engu, því að drottning hans, María Theresa, leyfði honum það eigi. En þar var hún ein til ríkis borin, eins og áður er sagt. Þá er Franz fyrsti dó, varð eldri sonur hans, Jósef annar, Þýskalands keisari, en hinn yngri, Leopold, fékk Toskana til forráða.

Árið 1780 dó María Theresa, en Jósef keisari sonur hennar erfði þá yfirráðin yfir hinu austurríkiska einveldi (1780—1790). Hann var handgenginn ritum hiana frakkneska þjóðfræðinga, og samkvæmt kenningum þeirra einsetti hann sér, að bæta kjör þegna sinna í öllum greinum. Það er með sannri sagt um Jósef annan, að hann hafði haft einlægna vilja til þess að koma sem mestu góðu til leiðar í ríki sínu og verið einhver hinn starfsamasti þjóðhöfðingi, en það sem honum þótti vera rétti og þarft fyrir land og lýð, það vildi hann láta framgengt verða, hvernig sem á stóð og hver sem í hlut átti, og brauzt í því með meiri ákafa en byggingum. Hann var frjálslýndur í orðum og anda, en harðstjóri, þegar til framkvæmdanna kom, og þess vegna mætti svo margt af hans góðu áformum og fyrirtækjum mikilli mótstöðu, olli honum sjálfum skapraun, og varð um stundarsakir að litlum eða engum notum.

Klerkastéttin í Austurríki var stórauðug og hafði völd að því skapi. Jósef keisari vildi takmarka hvorttveggja, og þess vegna lét hann leggja niður mörg klaustur (hér um bil 700), og verja auðæfum þeirra til alþýðuskóla og annara stofnana í alþjóðleg-

er þarfir; þessa vegna leiddi hann í lög alment trúarfrelsi; bændur leynt hann undan þeirri ánað, er stórmenni og höfðingjar — einkum á Ungverjalandi — höldu þeim í; hann endurbætti skattalögin og skipaði svo fyrir, að ein lög skyldu ganga jafnt yfir alla, hvernar stéttar sem væri. Við þetta urðu þeir óðir og uppvegir, sem áður höfðu átt undanþágum og einkaréttindum að fagna, og klerkarir þessa mest. Páfanum, *Píusi sjöttu*, fannst svo mikið um allar þessar breytingar og öll þessi nýmæli keisarans, að hann tókst sjálfur ferð á hendur til Vínarborgar (1782) og sótti keisarann heim, til þess að telja honum hughvarf, og fá hann til að taka aftur nýmæli þau, er páfa þóttu sér og sínu ríki til ógagns þrifa. Keisarinn tók svo gófugum og sjaldsænum gesti með miklum virktum, en páfinn fór svo heim aftur, að hann fékk eigi fram komið sínu erindi.

Um þjóðerni mána og gömul réttindi skeyttu konungar og stjórnfræðingar einnelti lítið á þeim tímum, og Jósef annar tók eigi óðrinn fram í þeirri grein. Hið austurríksa einveldi var og er, eins og menn vita, samsett af mörgum þjóðlöndum. Þar bjuggu ýmsar þjóðir, ólíkar að uppruna, tungumáli, trúarbrögðum og siðum. Það þurfti því styrka og gætna hönd til að stýra þeim öllum svo vel færi, einkum ef raska skyldi gömlum réttindum eða gamalli venju. Keisarinn vildi sameina alla þá ólíku parta í eina heild, gjöra þá alla að einu *þýsku alríki*. Þannig bauð hann, að rita skyldi öll embættisbréf á þýska tungu, og setti í því skyni embættismönnum þriggja ára frest til þess að læra hana til fullnustu; kynnu þeir eigi. Þýskuna að þeim tíma liðnum, skyldu þeir missa embættið. Það var gömul venja, að krýna Ungverjakonunga þar í landi; það vildi keisarinn eigi, heldur lét hann flytja kórónuna þaðan (frá Presburg) og til Vínarborgar og krýna sig þar. Varð af þessu hvorutveggja, bæði því, að viðhafsa skyldi þýska tungu, og hinu, að kórónan var tekin, svo flur kur meðal Ungverja, er þóttu landsréttindi sín troðin undir fótum, að við upphlaupi var búið; sendi keisarinn þá kórónuna aftur, og við það selsuðust landsmenn. Á Belgíu, sem þá lá undir Austurríki, varð uppreisn, af því að keisarinn bykti þar mörgu um og breytti. Niðarstaða þeirra óeirða varð sú, að öll fylkin þar í landi gengu í samband sín í milli og sögðu keisarann um upp blyðni og hollustu (1790). Jósef keisari andaðist þá litlu

síðar; gat eftirmaður hans að sönnu selsð óróann og sameinað Belgíu aftur Austurríki, en það var elgi nema stundarfriður, því að þá kom stjórnaðarbykingin á Frakklandi, er losaði Belgíu til fulls og alls undan Austurríki.

Þannig mætti Jósef keisari mótspyrnu því nær í öllu, sem hann vildi breyta innanlands, og þó það væri til hins betra; klerkarnir voru hans verstu mótstöðumenn; og þeirra orð og dæmi höfðu, eins og löngum hefir við gengist; mikil áhrif á alþýðu manna, og ætlu hann til mótstöðu. Engn betur varð keisaranum ágengt í viðskiftum sínum við erlendar þjóðir. Þegar algjörður friður komst á milli Spánar og Niðurlanda (1648), fengu Niðurlandamenn (Hollandingar) komið því til leiðar, að Belgír (fóðar hinna spánsku Niðurlanda) máttu enga síghögu hafa á Schelde-fljótinu, og var það verzlun þeirra til hins mesta hækkis. Í Utrektar-friðnum (1713) fengu Hollandingar rétt til að hafa setulið í ýmsum köstulum í hinum spánsku Niðurlöndum. Þessi spánsku Niðurlönd (Belgia) höfðu nú um 70 ára tímabil legið undir Austurríki, og Jósef keisari undi því illa, að þegnar, hans erðu að sæta þessum ókjörum af hendi Hollandinga, bæði siglfogabanninu á Schelde og setuhöðinu í köstulunum. Á þessu vildi hann fá breytingu, en er Hollandingar neituðu því, freistaði keisarinn að hafa sitt fram með ofríki, en þá skárust Frakkar í leikinn og miðluðu svo málum, að Hollandingar réðu skipagöngu um fljótið, eins og áður, en setulið sitt færðu þeir burt úr kastalaborgum Belgja. Eins var það, er keisarinn vildi ná undir sig nokkru af Balerna (1777), þá er hinn eldri ættleggur Wittelsbakemanna var undir lok liðinn. Þóttist keisarinn þar hafa fyrir sig að bera gömul skjöl og skíríki frá dögun Sig-múndar keisara. Karl Theódór af Fala, sem þar stóð næstur til erfða, lét sér það að vísu lynda, sem keisarinn sagði, en þá reis upp Friðrik annar Prússakonungur, og gekk svo karlmannlega í málið, að keisarinn varð að láta undan, og í friðarsamningi þeim, sem þá var gjörður í *Teschen* (1779), fékk Austurríki að eins litla sneið af Baiern. En keisarinn lét elgi þar við sitja, og fékk nokkru síðar Karl Theódór til að samþykkja landaskifti við sig þannig: að Austurríki skyldi eignast Baiern, en Karl Theódór fá í þess stað Belgíu, sem svo skyldi verða nefnt konungsríkið Búrgúnd. Keisaranum þótti, sem og var, Belgia vera

ólángt, burtu og afskekt, og að mörgu leyti ólík Austurríki, þar á móti var Bæirn áföst við Austurríki og lík því í mörgu; þess vegna sóttist keisarinn svo mjög eftir þeim landaskiftum. En hér fór sem fyr, að Friðrik annar reis aftur upp og mælti fast á móti þeim fyrirhuguðu landaskiftum, er haggja mundu jafnvægi Þýskalands. Stofnaði Prússakonungur þá *hið þýska þjóðhöfðingjafélag*, sem svo er nefnt (1785), og urðu þeir allmargir, er í það félag gengu. Keisarinn sá sér eigi fært, að brjótaст í móti svo mörgum og ríkum höfðingjum, og þannig fórust landaskiftin fyrir. Þess er áður getið, að þau Katrín ónnur og Jósef keisari áttuðu sér að reka Tyrki burt úr Norðar-áttunni. Í stríði því, sem þá hófst, sýttist keisarinn, bæði af áhyggju af því, hve alt varð honum erfiðt og mótdrægt, og af áreynsku þeirri, er hann varð á sig að leggja, og dó í febrúar-mánaði 1790 á fortúgasta og niunda áldursári.

Jósef keisari hafði verið tvíkvæntur, en mist báðar konur sínar, og dó barnlaus. Tók þá ríki eftir hann, og keisaradóm á Þýskalandi, Leópolð bróðir hans, stórhertogi af Toscana, og er nefndur *Leópolð annar* (1790—1792). Hann var vitur maður og gætinn, enda þurfti þess við, því að alls staðar í ríkinu var hion versti kur. Leópolð samdi frið við Tyrki í Sistova (1791), og innanlands friðaði hann skatlönd sín, sumpart með hörku og hermannavaldi, sumpart með því, að taka ástar ýmsa lög og tilskipanir, er Jósef bróðir hans hafði sett, og láta þegunna halda fornum réttindum sínum. Þegar hér var komið, var alt orðið í uppnámi á Frakklandi, og þau tóndi, er þar gjörðust, bentu þjóðhöfðingjum á að fara varlega. Þegar Leópolð dó (1792), og *Franz annar*, sonur hans, kom til ríkis, var sigl annað fyrir að sjá, en að ófriðast mundi með Austurríkismönnum og Frökkum, enda kom það fram litlu síðar.

Á Prússlandi var margt á annan vög en í Austurríki. Það, sem í Austurríki gjörði stjórnina enfiðasta, voru hin mörgu og margbreyttu þjóðerni, er því veldi lutu. Slíkt átti sér eigi stað á Prússlandi. Þar var að mestu leyti einungis um eitt þjóðerni að gjöra; ríkið mátti nálega heita ein samgróin heild, og það var því í raun réttari vandaminna að stýra Prússlandi en Austurríki. Alla þá stund, sem Friðrik annar sat að ríkjum, eftir lok sjö ára stríðsins, frá 1763 til dauðadags 1786, átti hann friði

að fagna, og þeim tíma varði hann kappsamlega til þess að eða framfarir mikilsins í öllum gránum. Sö það nú svo, sem sagt hefur verið, að einn eða tveir dagar notaðir af Friðriki hafi verið meira verðir en allt árið eina og aðrir menn notuðu það, þá má nærri geta, hverju hann hafði til leiðar komið öll þau 23 friðar ár.

Þess er áður að nokkuð getið, hvíliur hershöfðingi Friðrik annar var; nú skal þess minzt í fáum orðum, hvernig hann var, sem stjórnmari lands og lýða á friðartínum. Hann hafði þá lengstam aðsetið í borg þeirri, er *Potsdam* heitir, hér um bil 4 mílur vegar frá höfuðborginni Berlin. Það var venja hans á sumrum, að rísa úr rekkju um þriðja stund nætur, en á vetrum stundu seinni. Þá lét hann fara sér öll þau bréf, sem komið höfðu með síðasta pósti, er jafnan voru mörg og margs efnis. Konungur las þau og ritaði svar sitt á þau flétt, að eins eitt hvert merki, eða eitt og tvö orð; eða jafnvel eitthvert sköpyrði. Að þessu starfi var hann fram undir dagmál; þá tóku skrifarar hans við, og svöráðn bréfunum samkvæmt þeim bendiðum, er konungur hafði á þau titað, en sjálfur fór hann að gegna málefnum hermannanna sína um allt ríkið, er tók hann löngan tíma; þar næst sneri hann sér að ýmsum öðrum málefnum, og ritaði undir flest bréf samdægurs, er síðan voru send burt að kveldi. Konungur lagði á sig margfalt meira starf en hann þurfti, en það kom af því, að hann trúði reyndar engum nema sjálfum sér; hann vildi sjá allt með sjálfs síns augum, og skipa sjálfur fyrir um allt, bæði stórt og smátt. Þess munu vart dæmi finnst, að nokkur konungur hafi verið eins ráðríkur og afskiftasamur um allt það, er framför í ríki hans, eins og Friðrik annar. Enginn af þegnum hans mátti fara af landi burt nema með hans leyfi, og féngist leyfið, þá kvað konungur á, hve mikið fé hver og einn mætti hafa með sér. Kaupmaðurinn mátti hafa 250 dali í gulli, og ekki meira, aðalsmaðurinn 400 dali. Konungur gjörði mikinn mun á því, hverrar stéttar sá var, er hlut átti að máli. Færi nokkur leyfislaust til erlendra háskóla, til náms, þó eigi væri nema um stundar sakir, varðaði slíkt þungri fjársekt, eða algjörðum eignatmissi. Þannig hélt konungur hermannshendi yfir öllum sínum þegnum, hánum og lágun. En um hitt fekkat hann alls eigi, þó menn hans ségðu eða rituðu eitthvað djarft um

hann. „Það er samkomulag:— sagði Friðrik — milli mín og þegna minna, sem báðum líkar vel, að þeir mega tala það sem þeir vilja, og eg mæ gjöra það sem ég vil.“ En þó hann væri þannig alt í öllu, þá lét hann sig langmestu varða um þetta trent: herian og fjárhag ríkisins. Hann vildi hafa bæði mikið líð, og vel að ölla hlúð. Þó ríki hans væri miklu minna en Austurríki, Frakklandi eða Englandi, vildi hann gefa jafnan við þá, ef þeim stýrðu. Þegar komið var fram um 1770 hafði hann, hvenær sem til þurfti að taka, vígbúnað 160,000 manna, og það var bæði sögn og sannind, að það líð var svo vel hlúð og vígkænt, að langt þótti bera af hermönnum annara þjóða á þeim tímum. Til svo mikils herliðs þurfti mikið fé, og þess vegna lét konungur sér mjög ant um, að safna í ríkissjóðinn, svo að jafnan væri nóg fyrir hendi, hvenær sem til þurfti að taka. Hann lét því við hafa hins mesta sparnað í hverri grein, og hafa alla reiknings ríkisins í góðri reglu. Flestir aðrir konungar eyddu stórfé (og jafnvel af ríkissjóðnum) handa frillum sínum og vildarmönnum; slíkt átti sér engan stað hjá Friðriki öðrum. Hann gjörði glöggan mun á því, sem ríkið átti og því, sem hann sjálfur átti. Tekjur þær, er konungur ætlaði sér árlega, voru 1,200,000 ríkisdala, en af þeim eyddi hann aldrei meiru á ári, en 222,000 dala handa sjálfum sér; afganginn lagði hann í sjóð, og af þeim sjóði gaf hann (frá árinu 1763 til 1786) ýmsum heruðum, bergum eða einstöku mönnum yfis vegar um ríkið 24,000,000 ríkisdala, þegar þess þurfti við, til að bæta hag þeirra eftir óáran, eldsvöða og þesskonar, eða til að koma fótum undir einhver nytsem fyrirteki og þarflegar stofnanir. Sýnir þetta bæði sparsemi hans við sjálfan sig og órlæti við aðra. Þegar um tekjur ríkisins var að ræða sagði hann: „ríkið er auðugt, en eg er fátækur“, og í arfleðsluskrá sinni kveður hann svo að orði: „Það, sem eg hef undir höndum, er elgi mitt, heldur ríkisins“.

Það var venja Friðriks, að fara á hverju ári um eitt eður annað fylki í ríki sínu, eigi til þess, að þiggja veizlur og skemtanir af þjóðinni, eins og konungar eindtt hafa gjört, heldur til hins, að líta eftir hvernig þar fór fram, og kynna sér alt háttalag manna og störf í bergum og bæjum, áminna, ráðleggja og oppörfa menn til einna eður annara framkvæmda, eftir því sem

honum þótti við þurfa. Honum var svo kunnugt um hvað eina í ríki sínu, að enginn konungur hefir nokkra síni lengra komið í þeirri grein. «Ef yður langar til að vita, hve mörg hús hafa lagat í eyði», — ritar hann Voltaire einhverju sinni — «þá get eg sagt yður, að eg hefi látið reisa 8,000 hús í Slesíu, og 6,500 í Pommern og Neumark; það verða, eftir tókum þeirra Newtons og Alemberts, samtala 14,500. Flest af þeim húsum höfðu Rússar brent. Í öðru bréfi til Voltaire (1777) kemur konungurinn svo að orði: «Eg er nýkominn heim þunnan úr Slesíu og líkæði þat vel. Akuryrkjunni miðar þar vel áfram og iðnaðar fer vaxandi. Vær höfum selt þaðan til útlanda lèrest fyrir 3,000,000 ríksdala, og klæði fyrir 1,200,000 rd. Menn hafa fundið «kobolt» í fjöllum meira en nóg handa Slesíu; vár búum til «vitrið» engu takara en í öðrum löndum, og «indigó» selt eins gott og það, sem kemur frá Indlandi; járn gjörum vár að stáli, og með langtum andvældari aðferð en þeirri, sem Reaumur kennir. Síðan 1756 þegar stríðið hófst, hefir fólkatalan aukist um 180,000 manna. Landið er því nær búið að ná sér aftur, eftir allar þær hörmúngar, sem yfir það höfðu gengið, og — yður í einlægni að segja — það gleður mig innilega, að hafa rétt við aftur þetta margþjálfa skattland».

Á síðustu árum Friðriks kundi hann fótaveiki í meira lagi, og sögðu þá læknar í Vínarborg, að kvilli sá mundi þráðum snúast í vatnasýki, og þá væri dauðinn vísa. Þessu trúði marger, og það er sagt, að Jósef keisari hafi haft vígbúið lið í Böhmen, til þess að ná aftur Slesíu jafnskjótt sem konungaskiflin yrðu á Prússlandi. Þetta vissi Friðrik, og um þær mundir ritar hann Voltaire, meðal annars, á þessa leið: «Vera má að sumum þyki eg lifa helst of lengi, og segi heilsólar mitt lekara en það er, af því þeir hugsa, að sé mikið orð af því gjört, þá muni eg, ef til vill, hrökkva upp af eins fljótt eins og þeir vilja. Loðvík fjórtándi og Loðvík fimtándi reyndu þolriðin í Frökkum með langri ríkisstjórn. Eg hefi nú sætið við stýri um 36 ár; vera má að eg, eins og þeir, vanbrúki réttun til að lifa, og kunni mig eigi svo vel, að fara háðan, þegar menn eru orðnir leiðir á mér. Eg held enn sem áður fast við þá venju, að hlífa mér eigi. Því betur sem menn fara með sig, því viðkvæmari og veikari verður líkaminn. Staðs mín heimilar starfsemi og vinnu; líkami minn

og sál beygir sig undir skylduna. Það er eigi nauðsynlegt, að eg lifi, heldur hitt, að eg starfi; mér hefir ætíð falið það vel. Þó kemur mér elgi til hugar, að gjöra öðrum það að skyldu, að fylgja þessari reglu, mér nægir að fylgja henni sjálfur.

Friðrik annar bar eftaust langt af öðrum konungum; er honum voru samtíða, bæði að vitmunum og dögnaði; þó gat hann í sumum greinum eigi slitið sig lausan frá venjunni. Þannig fylgdi hann þeim sið, sem kominn var af Frakklandi, að einoka verzlunina með ýmsu móti, og leggja skatta á helztu nauðsynjar manna, til þess, að ná sem mestum tekjum handa ríkissjóðnum. Að ríkið hefði bagnað og ábata, það var honum fyrir öllu, en hitt lét hann sig engu skifta, hvort þegnum hans líkaði betur eða ver. Hann þekti hvorki né þoldi annan vilja í ríki sínu en þann, er hann sjálfur hafði. Þess hefir fyr verið getið, að hann þekti lítið og virti lítils þýzka tungu og þýzkar bókmentir, en hafði tungu og bókmentir Frakka í miklum hávegum, fylgdi jafnvel í sumum greinum kenningum hinna frakknesku rithöfunda; t. a. m. hvað trúarbrögðin snerti, og þess vegna leyfði hann kristmönkum landvist í ríki sínu, þó að þeir væru reknir burt, jafnvel af katólskum löndum.

Það er eðlilegt, að Friðrik yrði einn atkvæðamikiill í viðskiftum sínum við önnur ríki og aðra þjóðhöfðingja. Hann var, eins og áður er sagt, hvatamaður þess, að Póllandi var skift (1772). Nokkrum árum síðar fékk hann ónýtt þá fyrirætlun Jósefs keisara annars, að auka veldi sitt á Þýzkalandi. Friðrik annar dó 17. ágúst 1786.

Þá kom til ríkis á Prússlandi *Friðrik Vilhjálmur annar* (1786—1797)¹. Hann var bróðursönur Friðriks mikla, og þótti ónýtur konungur. Hann beitti hörku við menn í trúarbragðafinum, og bældi alt andlegt frælsi niður, eftir því sem honum var unt. Í viðskiftum sínum við Pólland, hélt hann þeirri stefnu fram, er Friðrik annar hafði byrjað, og rænti þar löndum og lýðum, eins og fyr er ritað. Systir þessa Friðriks Vilhjálms Prússakonungs var gift Vilhjálmi fimta, landstjóra á Niðurlöndum (1751—1795), syni Vilhjálms fjórða. Landstjórinn var duglaus maður, og aðrir urðu lengstunni að háfa vit fyrir honum. Á

1) Faðir hans hét Ágúst Vilhjálmur, bróðir Friðriks annars, dáið 1758.

Niðurlöndum höfðu hugit manna einuð verið tvískiftir, þar sem einn flokkur manna vildi hafa landstjóra yfir sér, en annar vildi hafa lýðveldi (Republik). England hafði drjúgum stutt að því (1747), að landstjóratignin gengi í erfðir, og magnaðist sem mest; England hafði spilt sjóverzlun Niðurlendinga, og þess vegna var lýðveldismannaflokknum græmt í geði við England — en í þeim flokki voru kaupmenn allir í Amsterdam og hinum helstu borgum Niðurlandanna. Landstjórinn og hans flokkur voru vinir Englendinga, en lýðveldisflokkurinn var Frökkum fylgjandi. Niðurlendingar veittust að með Frökkum til að hjálpa handafylkjum Norðurameríku þá er þau brættust undan yfirráðum Englands. Í þeim ófriði hiðu Niðurlendingar mikinn skaða, og kundu landstjóranum um; hann hafði sögðu menn, einungis hugsað um landherinn, en engin afskipti haft af flotanum og sjóliðinu, og gjórt það eingöngu til þess, að þóknað Englendingum, vinum sínum og verndarmönnum. Óvildin til landstjórans fór dagvaxandi; borgalýðurinn greip til vopna, þar urðu mannavíg og baráttur, liðamenn landstjórans urðu undir, og sjálfur hann brókk úr landi, eftir að þjóðþingið hafði sagt honum upp hlýðni og hollustu (1786). Hér við bættist og, að kona landstjórans varð fyrir óskunda af lýðnum á förnun vegi milli Nimvegen og Haag þar í landi. Þetta var allt meira en að Prússakonungur gæti lengur hjá setið afskiptalapa. Þess vegna sendi hann 24000 manna til Niðurlanda, og fyrir því liði Karl hertoga Ferdínand af Bráunsvík, bróðurson Ferdínanda þess, er var með Friðriki öðrum í sjö ára stríðinu. Prússum var lítill mólstaða veitt, og reyndust nú Niðurlendingar allir aðrir menn, en á dögum Filippusar annars og Loðvíks fjórtanda. Á tæpum mánaðartíma var landið allt í höndum Prússa. Vilhjálmur landstjóri komst aftur til valda, en Niðurlendingar undu því illa, og dró það til þess, að Frökkum varð hægra fyrir, þá er þeir ságu Niðurlöndin litlu séðar en hér var komið.

Síðakót Lúthers hafði að vísan lesað um andlegt frelsi manna á Þýztaalandi, eins og annars staðar, þar sem hún náði að festa rætur, en sást sem áður var þess lengi að bíða, að vísindi yrðu almenn og þjóðleg þar í landi. Þau hundrað árin, sem fylgja næst á eftir Lúther, og heita má síðabótaröldin, snúast hægir

mannna, bæði æðri stéttar og lægri, með ákafa, og því nær eingöngu, að trúarbrögðunum, um annað er lítið ritað. eður rætt. Þrjátígi ára stríðið truflar allt og tesur allar andlegar framsfarir. Þegar því er lokið og Vestfaliski friðurinn fenginn, verður breyting á. Hioir lúthersku guðfræðingar verða fastir í orðum og bókstöfum, andinn dofna, og trúin kólnar. Við endalok 17. aldar, en einnig á öndverðri 18. öld, risu upp menn, er settu sér fyrir mark og mið, að losa guðfræðina og hið kirkjulega líf úr fjötrem hins dauða bókstafa. Af þeim mönnum er *Jakob Spenner* nafnkendastur (fæddur 1635, d. 1705 í Berlin). Hann kandi mönnum bæði í ræðu og ritum og eftirdæmi, að trúin ætti að sýna sig ávaxtarsama í verkunum, í daglegri hegðun og breytum. Einn af hans merkileguustu lærisveinum var *Hermann Franke* († 1727 í Halle). Nokkrir af lærisveinum þeirra Spenners og Frankes fóru í þá stefnu lengra en hófi gegnið; þeir neitðu sér um saklausu gleði og skemtunir, gjörðust alvörugefnir, vandlætlingasamir, og í mörgu frásneiddir öðrum mönnum. Þeir voru nefndir „*pietistar*“ (oftrúarmenn). Þessi andlega stefna manna var reyndar upphaflega góð og gagnleg, en þegar hún komst á afveg, leiddi hún beinlínis til *vantrúarinnar* í lúthersku kirkjunni.

Liðs og áður er bent til, áttu vísindin erfitt uppdráttar á Þýzkalandi. Hin þýzka þjóð var sundursklíft meðal margra höfðingja, smærri og stærri. Frakkar söngu mikið áhrif á Þýzkaland eftir Vestfalaska-friðinn. Frakknesk túnga var þar í fyrirúmi hjá öllum þjóðhöfðingjum og heldri mönnum, en þýzkunni, móðurmáli landsfólksins, var lítill sómi sýndur. Menn muna, hvernig því var háttað á Prússlandi (Friðrik annar), og eigi var betur ástatt annars staðar á Þýzkalandi í þeim efnum. *Leibniz*, einhver hinn mesti spekingur að vili, sem nokkru sinni hefir uppi verið (fæddur í Leipzig 1646, d. 1716), ritaði margt og mikið, eigi á móðurmáli sínu þýzkunni, heldur á latínu eða frakknesku. Samtíða Leibniz, en þó yngri, voru þeir *Tomasius* (f. í Leipzig 1655, d. 1728) og *Wolf* (f. í Breslau 1679, d. í Berlin 1754), báðir nafnkendir heimspekingar. Tomasius byrjaði fyrstur manna á því, að halda fyrirlestra á þýzka túngu; áður hafði eigi annað heyrzt í háskólum Þýzkalands en latínsk túnga. Honum er og að þakka, að það lagðist niður, að ofsækja menn og brenna fyrir

galdra: Wölf. byggði kenníngur sína á undirstöðum Leibnizar, og var sá fyrsti á síðari öldum, sem reyndi að skípa hinum heimspökilegu setningum niður í samanhángandi lærdómskerfi (Systematisk Lærebygning). Var hans kenníngum víða fylgt fram að síðastu aldamótum, þá er *Immanuel Kant* (f. í Königsberg 1724, d. 1804), gjörði þar á breytingu. *Vilhjálmur Herschel* (f. í Hannóver 1738, d. 1822 á Englandi) var einhver sá mesti og starfsamaasti stjörnufræðingur, sem uppi hefir verið. Hann gjörði sjónpípur stærri og betri, en menn áður höfðu, og fann Úranus 1781, miklu lengra út í bláningeiminum, en nokkurt mannlægt auga hafði áður til náð. Afreksverk Herschels í stjörnufræðinni eru svo mikil og mörg, að undrum gegnir. *Friðrik Ágúst Wolf* í Halle (f. 1759, d. 1824), og *Heyne* í Göttingen (f. 1729, d. 1812) voru nafnkendir fornfræðingar, og fræddu menn, betur en áður hafði verið gjört, um fornöld Grikkja og Rómverja. *Jóhannes Müller* sveizneskur að sett og uppruna (f. 1752, d. 1809), er nafnkendastur meðal þjóðverskra sagðaritarar á þessu tímabili; hann hefir meðal annars ritað sögu Sveizlendínga og þykir hún afbrigð.

En eigi fer þjóðverskri mentun að fara fram til muna, eða að verða innlend og þjóðleg á Þýzkalandi fyr en á síðari hluta 18. aldar, að skáldin rísa þar upp, hver snillingurinn öðrum meiri: *Klopstock* (f. í Kvedlinborg á Saxlandi 1724, d. í Hamborg 1803), *Lessing* (f. 1729, d. 1781), *Wieland* (f. 1733, d. 1813), *Herder* (f. 1744, d. 1803), *Jóhann Wolfgang Goethe* (f. í Frankfurt am Main 1749, d. í Weimar 1832), *Friðrik Schiller* (f. í Marbach í Württemberg 1759, d. í Weimar 1805).

1872.

*Svo er ráð fyrir gjört, að síðari partur þessa
heftis komi út að vori komanda.*

John M. ...

NÝJA SAGAN

EFTIR

PÁL MELSTED.

GEFIN ÚT

AF

HINU ÍSLENZKA BÓKMENTAFÉLAGI.

II. Bindis I. Hefi.

REYKJAVÍK.

Í PRENTSMÍÐJU ÍSLANDS. EINAR ÞÓRÐARSON.

1876.

Þriðji kafli.

Frá því er stjórnarbyltíngin hófst á Frakklandi 1789, til þess er ríki Napóleons fyrsta leið undir lok 1815.

Inngangur.

Þegar vèr tókum oss fyrir hendur að rita sögu hinna helztu viðburða, er gjörðust á tímabili því, er hér ræðir um, þá er það mjög eðlilegt, að Frakkland og hin frakkneska þjóð verði aðal-umtalsefnið, fyrir því, að þá urðu þar í landi þau tíðindi, að ekki hafa önnur meiri orðið með þjóðunum á hinum síðari öldum. Allur þorri manna á Frakklandi hafði um lángan aldur lifað undir harðstjórn konunga sinna og höfðingja, og það svo freklega, að eigi var lengur við vært. Nú þegar hér var komið, reis þjóðin á fætur og vildi hrinda þessu ánauðaroki af sér. Henni kom ekki til hugar að áreita aðrar þjóðir; hún vildi að eins breyta öllu og bæta allt heima fyrir hjá sjálfri sér. Það sem Frakkar höfðust að fyrst framan af stjórnarbyltíngarárunum, að því verður ekki með réttu fundið. Það sem þeir þá unnu, það unnu þeir í þarfir alls mannkyns. En eftir því sem fram í sótti, eftir því versnar sagan. Hinir betri menn og vitrari verða ofurliði bornir af hinum verri og vitminni. Útlendir þjóðhöfðingjar skerast í leikinn, því að þeir eru hræddir um, að alþýða muni gjöra slíkt hið sama í þeirra löndum, sem hún hafði gjört á Frakklandi, og alt muni komast í ljósan loga. Þeir vilja kæfa bálið á Frakklandi meðan tími er til, og vaða inn þángað með óvígán her. Frakkar verða vel við og reka útlendingana af höndum sér. En ófriðurinn er ekki úti með því. Hann er að eins byrjaður en ekki búinn. Því nær allar Norðurálfþjóðir ganga í samband móti Frökkum. Menn sjá þar

jafnvel bæði Páfann og Tyrkjann róa báða á sama borðið. Öll saga Norðurálfunnar er komin í eina bendu utan um Frakka. Það sem þá gjörist sögulegast hjá hverri þjóð, það stendur á einn eður annan hátt, fjær eða nær, í einhverju sambandi við Frakka sögu. Allt snýst um hana eins og einn möndul eða miðpúkt. Ekki á þetta sèr síður stað, þegar komið er fram um aldamót (1800), og Napóleon fyrsti er tekinn til starfa. Hann er það mikilmenni, að hann þaggar niður allan innanlands flokkadrátt og óeirðir á Frakklandi, snýzt síðan við öðrum þjóðum, og það svo rækilega, að á meginlandi Norðurálfunnar verða þær allar að lúta hans boði og banni. En yfirráð hans standa að eins um stundarsakir. Þegar hann kann sèr ekki lengur hóf, og þykir sèr ekkert ofvaxið, þá tekur forsjónin í taumana; þá er hinum mikla Napóleoni hrundið af veldisstóli, og hann endar æfi sína á lítilli eyju, í úthafi heimsins, langt frá öllu meginlandi. Á Frökkum byrjar tímabilið og með frakkneskum manni endar það. En menjar hinnar frakknesku stjórnaþýltíngar og menjar Napóleons fyrsta eru ekki þar með á enda; þær eru þess eðlis, að þær eiga sèr lángan aldur í sögunni, eins og hver önnur stórvirki mannanna.

Áður en vèr snúum oss að sjálfri stjórnaþýltíngunni, þykir hlýða, að skýra stuttlega frá því, hvernig ástatt var á Frakklandi um þær mundir, er Loðvík 16. sonarsonur Loðvíks 15., kom þar til ríkis árið 1774; það er nú, þá þetta er ritað, fyrir rúmlega hundrað árum.

Það hið fagra og frjóva land var þá viðlíka stórt eins og það er nú á dögum; þó lá hvorki Savoyja eða Nizza undir það, en hins vegar fylgdi því bæði Elsass og hinn þýzki hluti af Lothringen, sem Frakkar urðu að láta laust við Þjóðverja eftir hinn síðasta ófrið 1870—71. Fólksfjöldinn, sem nú mun vera á Frakklandi um 36 millíónir, náði þá ekki 24 millíónum manna. Fyrrum höfðu konungar Frakka verið takmarkaðir af *ríkisstættunum*, er svo voru nefndar, eður fulltrúum klerka, aðalsmanna og borgara; en þessir fulltrúar höfðu um hin síðustu 160 ár eigi verið kvaddir á þing. Loðvíki konungi 14. og eftirmönnum hans þótti þess eigi við þurfa, en kusu hitt heldur, að leggja skatta á þjóðina og setja henni lög, eins og sjálfra þeirra geðþótti bauð. Konungur hafði sitt ráðaneyti, og æztur í því var

ráðgjafi sá, er nefndist „*General Kontrolör*“, og hafði hann hér um bil sama embætti á hendi eins og nú hafa fjárhags- og inn-
anríkisráðherrar til samans. Undir þessum ætta ráðgjafa stóðu
umboðsmenn konungs eða krúnunnar („*Intendanter*“), hver í
sínu fylki, og svo aðrir undir þeim. Þó ber þess að gæta, að
hið frakkneska ríki var eigi á þeim tímum ein samgróin ríkis-
heild eins og það er nú. Það voru þá enn til margar leifar
þess, er átt hafði sér stað á fyrri öldum, á dögum lènsdrott-
anna, þá er kalla mátti að Frakkland væri alt í molum, sund-
urskift í mörg hertoga- og greifadæmi, er hvert fyrir sig ræð
sjálft sinum lögum og lofum¹. Mætti því konungur og stjórn
hans einatt mótspyrnu af sérstökum réttindum; venjum og und-
anþágum hinna ýmsu fylkna, er hann valdi beita einveldi sínu
og láta eitt og hið sama boð eður hann ganga jafnt yfir allt
ríkið. Þannig átti bæði Bretagne og Languedoc hvort um sig
sitt *fullrúa-* eða *stættþing*, er hafði skattálögurætt og sjálfráða
stjórn ýmsra málefna, þar sem umboðsmenn krúnunnar höfðu
þvílík völd í öðrum fylkjum. Hin *katalóska klerkastætt* var ákaf-
lega völdug og stýrði kyrkju- og kenslumáttum öllum því nær
alveg óháð verulegu valdi. Hún hafði ákaflega miklar tekjur af
tíundum og jarðeignum, og galt eigi annað eða meira til ríkis-
ins þarfa, en það sem henni sjálfri sýndist. En samt sem áður
mætti þó einvaldstjórn konungsins á dögum Loðvíks fimtánda
mestri mótspyrnu af hinum æstu dómum (*Parlamentumum*).
Þessi parlament voru venjulega eitt í hverju fylki, en hið helsta
þeirra í París. Aðalætlanarverk þeirra voru reyndar dómara-
störfin, en parlamentin höfðu þar að auki ýms önnur störf á
hendi, og gjörðum þeirra voru eigi sett neín glögg takmörk.
Það bar einatt við, að stjórnin greip fram fyrir hendur þeirra
og beitti við þau miklu gjöræði, en hins vegar beittu þau oft
valdi sínu á móti, þegar um löggjöf eða ýmsar ráðstafanir stjórn-
arinnar var að ræða. Til þess að lög og skattakvaðir gætu öðl-
ast gildi, varð að rita þau í bækur parlamentanna; en þau neit-
uðu því standum, og leyfðu eigi að lögin væru rituð í þær;
kom þá til þverúðar með þeim og stjórninni. Konungur beitti
ofríki, lét taka parlaments-dómendur höndum, og setja í dýfl-
issur eða reka í útlegð; parlamentin lýstu yfir mótmælum sín-

1) Sbr. Miðaldasöguna bls. 30 og víðar.

um, bönnuðu embættismönnum, er undir þeim stóðu, að hlýðnast þeim lögum konungsins, er um var að ræða, og öll dóm-mál varð að stöðva. Á síðustu árum Loðvíks fimtánda lagðist parlamentið í París niður eftir boði stjórnarinnar, og aðrir dóm-ar voru settir í þess stað, stjórninni alveg háðir. Loðvík sex-tándi kom parlamentinu aftur á fót, jafnskjótt sem hann var kominn til ríkis.

En hvað olli því, að parlamentin voru svo óháð stjórninni og gátu sýnt henni svo mikla mótspyrnu? Því var svo varið, að parlamentsdómendur höfðu keypt embætti sín, eins og þá var almennt siður á Frakklandi, að flest embætti gengu þar kaup-um og solum. Þar hafði myndast eins konar *embættis-aðall*, og af því að hann var undanþeginn öllum hinum þýngstu skyldu-kvðum, leituðust efnaðir borgamenn og bændur við, að koma sonum sínum í þann veg. Stjórnin seldi öll embætti, og kom á ýmsum nýjum, til þess að hafa af stundarábata. Þeir, sem sátu í hinum æztu embættum, seldu þau embætti er undir þá lutu, og hinir sem keyptu unnu aftur það, sem þeir höfðu orðið úti að láta, upp á öðrum. Gjöræði embættismanna keyrði úr öllu hófi, og enginn var óhultur um sig, eða eigur sínar; menn voru sviftir frelsi og settir í höft án dóms og laga. Svo er sagt, að um daga Loðvíks fimtánda, hafi þannig verið teknar 150,000 manna og varpað í dýflissur; sátu margir þar svo árum skifti og sumir alla æfi, án þess að vita hvað þeir höfðu til sakar unnið.

Hinn *gamli aðall* hafði mist mikið af þeim völdum, er hann hafði haft á lènsdrottna-öldinni, en þó hélt hann enn eftir mörgum einkaréttindum. Aðalsmenn voru undanþegnir öllum hinum þýngstu skyldusköttum; þeir einir gátu orðið yfirmenn í herliðinu, þeir höfðu ótakmarkaðan veiðirétt og ýms önnur rétt-indi, til ómetanlegs skaða fyrir alþýðu manna á landsbygðinni; þeir sýndu embættismönnum, borgurum og bændum fyrirlitningu, en auðmýktu sig á allar lundir fyrir konungi og konungsmönnum, sátu í París öllum stundum eða í *Versailles*, er á þeim tím-um var aðsetursstaður konungsins. Hugur þeirra var allur í höfuðborgunum, þar sem glaumur og gleði og alls konar mun-aður átti heima, en á búgörðum sínum á landsbygðinni höfðu þeir sem sjaldnast lánga viðdvöl, og þeim stundum, er þeir sátu

þar, var mestmegnis til þess varið, að kúga fê af landsetum sínum til þess að geta sóað því út aftur í borgunum eða við hirðina. Vitaskuld er það, að sumir aðalsmenn voru öðruvísi lyndir, einkum í vestari hluta Frakklands; þar sátu þeir á búngörðum sínum, lögðu stund á akuryrkju og reyndust landsetum sínum sem góðir feður. En, slíkir menn voru undantekning frá aðalreglunni.

Í flestum sveitum landsins átti *bændulýðurinn* við verstu kjör að búa. Að vísu voru bændur að nokkru leyti betur farnir en á fyrri tímum, og margir þeirra voru jarðeigandi; en sá þriðjungur af öllum jarðeignum á Frakklandi, er var bændaeign, var sundurskiftur í svo smáa jarðarskika, að á þeim varð ekki búið til nokkurra muna. Það mátti varla heita bændabú, heldur að eins húsmenska. *Tveir þriðjungar jarðagóðsins voru eign klerka, aðalsmanna og ríkra borgara.* Helmíngurinn af því jarðagóði er nú kominn í eigu ótal margra smærri jarðeigenda, er mynda eins konar meðalstétt; en á undan stjórnarbyltingunni var sú meðalstétt á landsbygðinni ekki til. Auðmennirnir (klerkar, aðalsmenn og ríkir borgarar), sem áttu stórar lëndur, skiftu þeim sundur og bygðu þær ótalmörgum smábændum, með svo dýrum leigumála, að varla varð undir risið; venjulega gekk helmíngur alls þess, sem ábylíð gaf af sér, í hendur landsdrottans. Býlin komust þess vegna í vanhirðingu og órækt, því að bændur urðu að leita sér viðurværis og atvinnu á einhvern annan hátt en að yrkja ábúðarjörð sína. Akuryrkjan í landinu var fyrir þá sök í svo miklu ólagi, að menn segja, að ágóði hennar hafi þá ekki verið nema þriðjungur til móts við það, sem hann er nú á dögum. Bændur máttu ekki mala korn sitt, nema í mylnum höfðingjanna, ekki eyða illgresi á ökrum sínum, er dýr og fuglar hændust að, til þess að stygð kæmi eigi að þeim, og höfðingjar ættu því hægra með að veiða þau, en þeir einir máttu veiða. Þótt úlfar yrðu svo nærgöngulir, að þeir dræpu börn fyrir bændum, máttu bændur ekki veiða þá og fengu enga bót skaða síns eður harma. Húsakynni bændu voru lítill og ljót og aðbúnaður allur að því skapi, menntun því nær engin; það var sjaldgæft að finna þann bónda, er kynni að lesa og skrifa.

Verzlun og iðnaður var í sömu niðurlægingu sem akuryrkja,

og ýmsum böndum og álögum háð; sultur og seyra gat átt sér stað í einum hluta ríkisins, þótt alls nægtir væru í öðrum. Skattar lágu einkum á hinum fátæka, og voru vægðarlaust af þeim krafðir. Tollarnir voru afar háir og spíltu öllum verzlunar viðskiftum manna, og þar af leiddi, að menn leyndu vöruflutningum sínum fram og aftur og verzlðu í laumi. Menn voru settir til, svo þúsundum skifti, að hafa gát á slíkri launverzlun, ótal margir teknir fastir og settir í fangelsi. En þegar nú þannig var ástætt nálega í öllum greinum, þá ræður að líkindum, að tekjur ríkisins hafi skort mikið á til þess að geta jafnast við útgjöldin; einkum þegar ógrynni fjár gekk til hirðarinnar, og fjárhag ríkisins var stýrt af lítilli fyrirbyggju. Ríkisskuldirnar jukust því stórum ár eftir ár.

Af því, sem hér hefir verið sagt, má ráða, að ekki hafi hagar manna á Frakklandi verið glæsilegar um þær mundir. Menn voru líka almennt farnir að sjá, að svo var, enda höfðu ýmsir *rithöfundar* gjört sitt til, að opna augun á almenningi, og sýna fram á, að svo búið mætti eigi lengur standa. Fæstir af rithöfundum þessum voru miklir stjórnavitringar, og þeim kom eigi til hugar að ráða bót á vandræðum þjóðarinnar með hægum og lagfærandi endurbótum, en þeir vildu, hver á sinn hátt, kollvarpa öllu því sem þá var og *mynda nýtt þjóðfélag, er væri byggt á jafnrétti og lögmæt skynseminnar*. Einkum réðu þeir í ritum sínum á klerkastettina og höfðu þar í fylgi með sér flest stórmenni hinnar verzlegu stéttar. En árásir þeirra gegn kátolsku kirkjunni og klerkum hennar sneru sér tíðum móti sjálfri hinni kristnu trú, og leiddu menn beinlínis til sjálfbýrgingskapar í trúarefnum og til guðleysis, og það var villan verri. Hins vegar kom fæstum af rithöfundum þessum til hugar að takmarka og því síður kollvarpa konungdómnum; það var einmitt öflugt og vel mentað konungsvald, sem átti að koma hinu nýja sköpunalagi, hinni nýju endurbót, á allt þjóðfélagið. Það er og sannast að segja, að þær litlu endurbætur, er gjörðar höfðu verið, þær hafði stjórnið gjört, en hvorki þíngin eða parlamentin; þau vildu helst halda öllu í gamla horfinu. Nafnkendastur af þeim rithöfundum, er hófu kenningar sínar móti aldarhættinum og einkum móti kirkjunni en eigi konungsvaldinu, var *Voltaire*¹.

1) Sbr. Nýju sögunnar III. hefti, bls. 65—67.

Hann og þeir, er fetuðu í hans fótspor, gjørðu gys að öllu því, er heilagt hafði verið haldið til þeirra tíma, og fyrir þá sök, að rit þeirra voru að öðru leyti samín af mikilli snild, þá fengu þau hin mestu áhrif á hugarfar hinna mentuðu manna. Sumir af rithöfundum þessum tóku aðra stefnu, og sneru sér fremur að landsstjórn og skipulagi borgaralegs félags, og það voru þeirra kenningar, sem einkum komu fram í stjórnarbyltíngunni, og menn vildu þá sýna í verkunum. Til þeirra rithöfunda má telja *Montesquieu*, er mælti fram með takmarkaðri konungsstjórn, eins og átti sér stað á Englandi. Kenníngum hans fylgdu hinir helztu og mentuðustu menn á fyrstu árum stjórnarbyltíngarinnar. En *Rousseau* var þó sá maður, er fremur öllum öðrum skapaði hinn nýja aldarhátt og kveikti hjá mönnum allar þær sterku frelsis- og jafnréttis hugmyndir, er brutust fram með svo mikilli ákefð í stjórnarbyltíngunni. *Rousseau* kendi meðal annars, að frá náttúrunnar hendi, frá öndverðu, hefðu allir menn verið jafnir, og enginn mannamunur átt sér stað, enda hefði þá hagar þeirra verið beztur; það væri upphaf niðurlægíngar og spillíngar mannkynsins, er það hefði gengið í þjóðfélag, og ríki hefðu myndast, þess vegna ættu menn, að svo miklu leyti unt væri, að komast aftur í hið upphaflega sakleysis og sælu ástand; hjá þjóðinni allri í heild sinni, en ekki hjá ríkisstjórninni, væri einveldið, og hin einvalda þjóð ætti eigi að trúa kosnum mönnum fyrir lög-gjafarvaldinu, heldur ætti hún sjálf að framkvæma það beinlínis; hafi þjóðin fengið einhverjum einstökum valdið í hendur, geti hún tekið það aftur, hvenær sem henni sýndist; það sem hinir kosnu menn hafi samþykkt, það sé ekki lög fyr en öll þjóðin hafi staðfest það. Frelsið geti því í raun og veru einángis átt heima hjá smáum þjóðfélögum, þar sem öll þjóðin geti oft átt fundi með sér; þetta hafi að miklu leyti átt sér stað hjá hinum smáu lýðveldum í fornöld. *Rousseau* þótti viltar þjóðir, t. a. m. Indí-anar og fl., lifa sælla lífi, því að stjórn og mentun hefði enn eigi leitt þær á afvegú, og bannað þeim að lifa samkvæmt eðli þeirra og upphaflegum fýsnum.

Lýðurinn, sem mist hafði sjónar á sannri trú og siðalærdómi, tók þessum og þvílíkum kenningum með tveim höndum. Þær voru honum nýr gleðiboðskapur, þaðan væntu menn frelsisins. Aldarhátturinn var orðinn truflaður og tryltur; hver

höndin var upp á móti annari. Hirðin, aðallinn, parlamentin og klerkarnir báru sakir hverir á aðra, kendu hverir öðrum um alt ilt og spiltu það þeir kunnu hverir fyrir öðrum. Alls staðar heyrðist talað um bágindi alþýðunnar og um það, hver ráð væru til þess að bæta hag hennar. Þetta heyrði þjóðin og sá. Það vakti vonir hennar, er ýmsir af æðri stétta mönnum tóku málstað hennar, en að því skapi sem vonir manna vöknudú, kviknaði einnig hatrið. Þannig var ástatt á Frakklandi þá er *Loðvík sextándi* kom þar til ríkis (1774).

Ríkisstjórn Loðvíks 16. á undan stjórnararbyltíngunni (1774—1789).

Frakkar voru fyrir löngu orðnir leiðir á Loðvíki fimtánda, og þegar hinn gamli og dáðlaus konungur leið undir lok, fögnuðu menn sonarsyni hans, hinum unga konungi, eins og allar nauðir væru á enda og ný gullöld væri upp runnin. Og sá fögnður var eigi ástæðulaus, því að hér var allmikill munur á mönnum. Loðvík fimtándi hugsaði eigi um annað en að seðja girndir sínar, Loðvík sextándi hafði allan vilja og viðleitni á, að gegna skyldum sínum; hann vildi þegnum sínum alt hið bezta, en hann vantaði því miður marga þá kosti, er konungar mega sízt án vera. Hann var óhöfðinglegur ásýndum og í allri framgöngu, og hafði ekki lag á því, að vekja hjá mönnum lotaingu fyrir sèr, eða gjöra þá sèr að vinum. Numið hafði hann ýmislegt, en sízt það, er helzt gat komið honum að haldi sem þjóðhöfðingja, eða gjört hann hæfan til ríkisstjórnar. Hann hafði mesta vantraust á sjálfum sèr, og þótt hann sæi álengdar hið sanna og rétta, og vildi feginn ná því, þá gat hann það eigi sökum kjarkleysis, ef þeir, sem í móti stóðu, höfðu nokkur hyggindi og nokkurn dug til að bera; þess vegna varð alt hans ráð á reiki. Þó honum tækist stundum að fá góða og dugandi ráðgjafa, gat honum eigi orðið haldsammt á þeim, því að, ef þeir vildu koma einhverju góðu til leiðar, sem hirðinni og höfðingjunum var í móti skapi, þá stóðu ráðgjafarnir einir uppi, og áttu ekki liðs að vænta hjá konungi. Drotníng Loðvíks sextánda hét *María Antonetta*, dóttir Maríu Teresíu, hinnar nafnkendu keisaradrotníngar, er deildi við Friðrik annan um Slesíu, og systir þeirra bræðra, Jósefs annars og Leópolds annars, Austurríkiskeisara.

Hún var í sumum greinum eigi ólík móður sinni, og hafði án efa ýmsa góða kvennkosti til að bera, en af því að hún vildi hafa alt sem rausnarlegast og skrautlegast, hvað sem fjárhagnum leið, og fylgdi fremur tilfinningum sínum en hygginna manna ráðum, en konungur mátti ekki gjöra neitt á móti vilja hennar, þá hafði hún fremur ill en góð áhrif á hann og hans ríkisstjórn. Það bætti heldur ekki um, að Frakkar trúðu henni illa, af því að hún var komin frá Austurríki og þeirri þjóð, er um langan aldur hafði deilt illdeildum við Frakka.

Á öndverðum ríkisárum Loðvíks sextánda, var sá maður æzti ráðgjafi hans (General-Kontrolör), er *Turgot* hét, afbragðsmaður bæði að vitsmunum, góðgirni og framkvæmdum, og ef nokkur hefði verið fær um, að laga það friðsamlega sem laga þurfti, og afstýra stjórnarbyltíngunni, þá var Turgot það. En jafnskjótt sem hirðinni, aðlinum, parlamentunum og ýmsum öðrum, þótti hann hreyfa við sèrstökum hagsmunum þeirra og einkaréttindum, risu þeir allir upp og gjörðu hinn mesta storm í móti honum. Konungur stóð með ráðgjafanum fyrst framan af, dáðist að framkvæmdum hans og lét sèr oft þau orð um munn fara: „eg og Turgot erum hinir einustu vinir þjóðarinnar“. En er frá leið, gjörði konungur það að vilja þeirra, að hann vèk Turgot frá völdum, og með honum féllu þá um koll flestar þær endurbætur, er hann hafði til leiðar komið, og alt komst aftur í hið gamla horf.

Nú gekk svo um hríð; fjárhagur ríkisins fór versnandi dag frá degi, og um síðir varð eigi hjá því komizt, að fá einhvern þann mann, er afstýrt gæti hinum bráðustu vandræðum. Maður hét *Necker*, þjóðverskur að ætt, en borinn og barnfæddur í Genf. Hann var auðmaður mikill, manna kænastur við alla fjárstjórn og hafði mikið orð á sèr; Colbert, hinn nafnkendi ráðgjafi Loðvíks 14., var hans fyrirmynd, eins og Turgot hafði tekið sèr Sully¹ til eftirdæmis. Nú var Necker fenginn (1777) til að taka að sèr stjórn fjármálanna, en að svo stöddu fékk hann þó eigi setu í ráðinu eða ráðgjafa tign, fyrir þá sök, að hann fylgdi prótestanta trú, heldur varð hann að eins umsjónarmaður ríkisfjárins. En þó svo væri, báru menn svo mikið traust til hans, að honum varð alls staðar gott til fjár þar sem

1) Sjá Nýju sögunnar I. hefti, bls. 124.

hann leitaði þess, því að allir vildu honum lána; streymdi nú drjúgum fê í ríkissjóðinn, enda þurfti mikils við, því um þær mundir (1778) skárust Frakkar í lið með Norðurameríkumönnum móti Englendingum, og kostuðu til þeirrar útgjörðar ærnu fê. Vær höfum áður minzt á frelsisstríð Norðurameríkumanna, og skulum því eigi orðlengja um það hér, en að eins geta þess, að sá ófriður átti eigi lítinn þátt í því, að breiða út frjálslegar og þjóðstjórnlegar hugmyndir á Frakklandi og innræta mönnum óbeitt á konúngsvaldinu. Það var því bæði hnittilega að orði kveðið og ekki fjarri sanni, er kona ein sagði við Vergennes greifa, einn af ráðgjöfum Loðvíks 16. Það gekk um þær mundir ákóf kvefsótt (*Influenza*) á Frakklandi, og varð greifanum það að orði, að sóttin (*Influenza*) mundi vera komin frá Rússlandi. Þá mælti konan: „áður en langt liður, munum vér fá frá Norður-Ameríku aðra sótt og hana nýja, er heitir „*Independenza* (þ. e. sjálfræði)“. Menn fengu nú að sjá og heyra, að það var framkvæmt í verkinu vestur á Ameríku, er rithöfundarnir á Frakklandi höfðu kent í bókum sínum, og úngir menn og eðli bornir, er farið höfðu vestur um haf af Frakklandi til þess að berjast fyrir frelsi Ameríkumanna, og fengið þar gott orð, vildu ekki vera atkvæðalausir í alþjóðlegum málefnum, er þeir voru komnir heim aftur, og helztur og fremstur á meðal þeirra var hinn ríki og göfugi hershöfðingi *Lafayette*, er bæði var frægur orðinn af framgöngu sinni og allra manna vinsælastur. Lýðveldismaðurinn Benjamín Franklín, er hafði aðsetu á Frakklandi svo árum skifti, var í mestu metum hjá öllum höfðingjum í Paris, og hafði mikil áhrif á alla er við hann kyntust. Margt hjálpaðist þannig að, til að snúa hugum manna að lýðveldisstjórn en gjöra þá konúngsvaldinu fráhverfa.

Því meira fê sem eyddist til ameríkanska stríðsins, því meiri þörf var á að spara sem mest önnur útgjöld ríkissjóðsins á Frakklandi. Necker vissi það manna bezt, og hagaði störfum sínum samkvæmt því. En er hann vildi, að meiri sparnaður væri við hafður, þá vakti það megna óánægju meðal hirðmanna, og er hann vildi auka tekjur ríkisins með ýmsum tilbreytingum eða nýjum álögum á hinar æðri stéttir, þá mætti hann frá þeim öllum hinum sama mótblástri, sem Turgot hafði mætt. Það fór því á sömu leið sem fyr, Necker varð eigi við vært og varð

að víkja úr völdum (1781). Aðrir komu í hans stað, en ekki batnaði fjárhagurinn fyrir það. Sama árið sem friðurinn komst á milli Englendinga og Frakka (1783), varð sá maður fjárhagsstjóri Loðvíks konungs, er *Calonne* hét, allvitur maður og úrræðagóður, en eigi svo vandur að meðölum sem skyldi. Hann hét konungi og hirðinni öllu fögru, og taldi mönnum trú um, að hér væri engin hætt á ferðum, menn skyldu engu kvíða og ekki horfa í skildinginn, því að einka ráðið, til þess að fá á sig ríkismanns orð og geta haldið lánstrausti, væri, að hegða sér í öllu eins og nóg væri fê fyrir hendi. Þessu ráði var fylgt, allt var haft í sukki, og svo liðu 3 árin. En þá var og lánstraustið á enda, hvergi fekst fê til leigu, en allar fjárhirzlar tómar. Nú var úr vöndu að ráða. Eigi dugði að auka skatta á alþýðunni. Eina ráðið var að minka útgjöldin, og, dygði það eigi, þá að leggja skatta á aðalsmenn og klerka. En þá rak aftur að því, er þeir Turgot og Necker höfðu áður reynt, en báðum orðið hált á. Fyrir því kom *Calonne* til hugar, að leita samþykkis hvorratveggja, bæði aðalsmanna og klerka, og til þess að þetta gæti orðið framgengt, fékk hann konung til að ákveða höfðingjafund (*Notabler*). Fundarmenn þessir komu saman í Versailles 1787, á öndverðu ári, og voru alls 148 manns, að eins 8 af borgarastétt, en hinir 140 aðalsmenn og klerkar. Sýnir það ljóslega, hvernig stjórnendur og stórhöfðingjar á þeim tímum virtu lítils hinar lægri stéttir, og þó mátti ganga að því vísu, að einmitt þær mundu styrkja stjórnina til þess, að af nema ýms órættindi og koma á meiri jöfnuði milli manna, eins og stjórnin hafði þá hugfest. Þegar nú fundarmenn tóku til starfa, kom það fram sem áður, að höfðingjar vildu eigi láta hreyfa við einkaréttindum sínum, og ekki leggja neitt í sólurnar til almenningsheilla, þó sögðu þeir það ekki með berum orðum, heldur brugðu hinu við, að þeir bæru ekki traust til *Calonne*, og vildu ekki til slaka, meðan hann sæti að völdum; varð hann því að leggja þau niður það hið sama ár.

Erkebyskup Brienne af Toulouse hafði lengi viljað komast í ráðgjafasess, og komst það nú; en þó hann hefði verið hinn helzti af mótstöðumönnum *Calonne*, sá hann eigi annað ráð vænna, en bera fram allar hinar sömu tillögur, sem formaður hans í embættinu hafði gjört. Parlamentið samþykkti og sumar

af þeim, en undan hinu skoraðist það, að skrásetja í bókum sínum hin nýju lagafrumvörp um almenna skatta. Þó var nú svo komið, að parlamentið sá sér eigi lengur fært, að halda í hin fornu einkaréttindi, og lét því í veðri vaka, að *ríkisstettirnar* einar (þ. e. umboðsmenn allra stétta á einu allsherjarpíngi) hefðu vald til að samþykkja nýja skatta. Þetta þótti stjórninni ógnarlegt bragð, og lenti nú í hörðum deilum við parlamentið, eins og oft hafði áður átt sér stað. Urðu nú viðsjár miklar með mönnum, og mátti kalla að færu dagvaxandi, svo að Brienne þorði eigi annað en slaka til — því að ráðgjafatigninni vildi hann halda til lengstra laga — og gefa alþýðunni vonir um, að stefnt mundi verða til allsherjarpíngs. Þó vildi hann eigi kveða skýrt á um það, hvenær eða hversu því máli skyldi til haga; en í þess stað skoraði hann á alla hina vitrustu menn þjóðarinnar, að þeir kæmi fram með tillögur sínar þar að lútandi. Þetta var því líkast, sem eldi væri hleypt í tundur, og, að því er Brienne sjálfan snerti, hafði hann engan hag af því; hann varð eigi fastari í sessi fyrir það, og varð að segja af sér embættinu lítlum síðar (1788), er hann gat eigi safnað svo miklu fê saman, sem við þurfti.

Nú var Neckers leitað í annað sinn, og nú varð hann ráðgjafi konúngs. Var honum tekið með miklum fögnuði, því að allir báru hið bezta traust til hans. Brienne hélt við ofsóknum, og í París urðu óspektir því nær á hverju kveldi, án þess að valdstjórnin hefði dug í sér til að bæla þær niður. Skrifllinn fjölgaði þar óðum, því að margir óreiðumenn streymdu þangað utan af landi, er engu höfðu fyrir að fara, en gjörðu sér von um höpp og herfáng í borginni. Þannig bættist þessi nýi ófögnuður ofan á öll önnur vandræði stjórnarinnar. Necker fékk konung til að ákveða, að innan skamms tíma skyldi hið áðurnefnda *allsherjarpíng* verða sett, en nú greindi menn á um það, hvort því skyldi til haga eftir fyrri daga venju, eða eftir seinni tíma þörfum. Árið 1614, þá er hið síðasta alsherjarpíng var haldið, hafði hver af þeim þrem stöttum setið sér á ráðstefnum, en þó borgarastettin hefði verið þar fjölmennust, hafði hún samt sem áður ekki haft nema eitt atkvæði móti tveim atkvæðum hinna stöttanna (klerka og aðalsmanna).

Um þessar mundir komu út á prenti ótalmargir smáritling-

ar og var í flestum þeirra krafist, að borgarastéttin sendi eins marga menn á þingið, eins og báðar hinar tvær til samans, og allar þrjár skyldu sitja í einni málstofu, en ekki sín í hverri eins og að fornu hefði verið. Stjórnin fêlst reyndar á hið fyrra atriðið, en að hinu síðara vildi hún eigi gánga að svo stöddu, og var þó mest undir því komið að þetta fengist, því að ekki dugði höfðatalan án þess, þegar til atkvæðanna kom. Við þetta harðnaði deilan, ritlíngarnir, sem drifu að úr öllum áttum, skiftu þúsundum; einn þeirra var saminn af ábóta einum, er *Sieyès* hét, djúpvitrum manni. Hann setti þar fram þær spurningar: «hvað er hin þriðja stéttin?» og hann svaraði: «ekkert». «Hvað á hún að vera?» «alt». Ritlíngur þessi hafði meiri áhrif á alþýðu manna, en orðum verði að komið. Það var eins og hún vaknaði af svefni; enda var þess skamt að bíða, áður upphlaup yrði og barátta með mönnum einkum vestur á Bretagne. Þar á ofan bættist allmikið harðæri, því að uppskera varð lítil í landinu sumarið 1788, og vetur hinn næsti þar á eftir 1788—1789 var svo harður, að enginn hafði slíkur komið á Frakklandi síðan 1709¹. Það var því ekki eitt, heldur alt, er veittist að til þess að óspekja menn og æsa og flýta fyrir stjórnarbyltíngunni. Konúngur gjörði í þetta sinn að vilja þjóðarinnar, og kvað svo á, að tala þingmanna skyldi vera 1200, skyldi þriðja stéttin (þ. e. aðrir en aðalsmenn og klerkar) kjósa helmíng (600), en af hinum helmíngnum skyldu aðalsmenn kjósa 300 og klerkar 300. Hins vegar hugði konúngur, að hafa gagn af þriðju stéttinni, svo mannmargri sem hún var, til þess að lægja drambið í aðalsmönnum og klerkum þá er til þings kæmi, og þrýsta þeim þannig til að láta nokkurt fê af hendi rakna til ríkisins þarfa. Kosningar þingmanna urðu sums staðar ærið róstu-samar en alls staðar voru þær fjörugar og með miklum áhuga sóttar af kjósendum. Ýmsir af þingmönnum hinnar þriðju stéttar voru mestu afbragðsmenn þjóðarinnar að vitsmunum og dugnaði; mátti einkum telja þá *Sieyès* ábóta — er fyr var nefndur — og *Mirabeau* greifa sem framúrskarandi þingmenn. *Mirabeau* var af ítölskum ættum og fæddur suður í Provence. Hann var geðríkur, tápmikill og ódæll, og gæddur frábærum námsgáfum. Faðir hans beitti við hann óeðlilegri hörku á upp-

1) Nýja sagan, II. hefti, bls. 75.

vaxtarárum hans, og þess vegna hataði hinn úngi maður alla kúgun og varð svarinn óvinur allrar harðstjórnar, hver sem í hlut átti, hvort heldur stjórnin, aðallinn eða aðrir menn. Hann hafði oft átt hörðu að mæta, setið í dýflissum, verið dæmdur til dauða og lifað í útleög. Þótt hann væri aðalsmaður vildu aðalsmenn eigi kjósa hann, — heldur en klerkarnir Sieyès — því að bæði þótti þeim hann gjöra stætt sinni mínkun og þar á ofan vera helzt til frjálslyndur; þess vegna varð hann þingmaður borgarastéttarinnar suður í Provence. Mirabeau var hinn stjórnvitrasti maður og allra manna málsnjallastur, og svo er sagt, að hefði nokkrum manni, er þá var uppi á Frakklandi, verið fært að laga það sem laga þurfti og koma stjórnarbotinni í viðunanlegt horf, þá hafi hann verið það; en hér var bæði, að hann lifði svo skamma stund, og svo hitt, að konunginn skorti bæði hyggindi og þrek til að þekkja ráð hans og fylgja þeim, meðan þeirra naut við. Hinar æðri stættir (aðalsmenn og klerkar) kusu ýmsa menn á þing, er gengu í lið með alþýðunni, eins og t. a. m. *Lafayette* hershöfðingja, *Talleyrand* byskup, hinn nafnkunna stjórnfræðing, og *Filippus* hertoga af Orleans — föður Loðvíks Filippusar Frakkakonungs frá 1830—1848. Hertoginn var stóranægur maður, en að öðru leyti þótti hann ærið óhlutvandur og til alls búinn. Hann gekk í lið með alþýðunni til þess að hefna sín á drotningu og hirðinni, er hann þóttist eiga fyrir grátt að gjalda.

Stjórnarbyllingin.

I. F r u m l a g a þ í n g i ð. (*Den grundlovgivende Forsamling*).
(frá 5. maí 1789 til 30. sept. 1791).

Hið fjölmenna þing var sett í Versailles, aðsetursstað konungs, 5. dag maímán. 1789. Þangað hafði streymt mágur og margmenn til þess að sjá alla þá dýrð, er þeir 1200 þingmenn gengi til kirkju og hlýddu helgum tíðum áður tekið væri til starfa. Fyrst komu 600 manna, svartklæddir, það var borgarastéttin; þá 300 aðalsmanna í flögelskápum settum gulli og kniplingum með fjaðrahatta á höfðum; og síðast 300 klerka, sumir í glæsilegum byskupskrúða, en allfestir í svörtum prestshempum. Mátti af því sjá, að hinir fyrri voru af aðalsmanna eða

stórhöfðingja flokki, en hinir síðari af alþýðuflokknum. Konungur setti þingið með ræðu, en Necker skýrði frá fjárhag ríkisins og sagði hann betri en hann reyndar var, og kvaðst hann treysta því, að aðalsmenn og klerkar mundu vilja láta laus ýms af einkaréttindum sínum, til þess að bæta efnahag þjóðarinnar, en ekki bar hann upp beinar tillögur í þá átt, heldur lét það vera undir þinginu komið.

Nú tóku þingmenn til starfa, þó ekki allir á einum stað, heldur hver stétt út af fyrir sig. Þingmenn alþýðuflokksins (þriðju stéttar menn) vildu, að þingmenn ynnu allir í sameiningu, í einni málstofu, en hinar stéttirnar (aðall og klerkar) vildu það með engu móti, heldur hitt, að þingið væri þrískift, því að á þann hátt gátu atkvæði þeirra tveggja mátt sèr meira en atkvæði hins eina alþýðuflokks, þó hann væri mannfleiri. Um þetta voru menn að þrefa þángað til 17. dag júnímánaðar, að Sieyès lagði það til, að þriðja stéttin skyldi lýsa yfir því, að hún væri *þ j ó ð þ í n g* (*Nationalversammlung*), eða með öðrum orðum: *fulltrúar hinnar frakknesku þjóðar*, og var sú tillaga samþykkt. Jafnframt þessu var nú einnig af ráðið, að þingið byrjaði þá þegar á ætlunarverki sínu, sem var í því innifalið, að ráða bót á vandkvæðum hinnar frakknesku þjóðar með nauðsynlegum lagabreytingum. Samþykkti nú þessi þingdeild ýms lagabæð, er sýndu að henni var full alvara, en lét þess þó getið, að bæði aðalsmenn og klerkar væru velkomnir, hve nær sem þeir vildu koma og ganga í lið með sèr.

Nú fór stjórninni og stórhöfðingjum ekki að lítast á blíkuna. Stjórnin sá nú um seinan, að hún hafði ekki látið til sín taka sem þurfti; hún sá, að þjóðin hafði nú beinlínis tekið fram fyrir hendur á konungi og sett sitt einveldi í staðinn fyrir hans. Necker vildi miðla málum, og koma á tvískiftu þingi, og haga flestu líkt því sem var á Englandi; en fékk því eigi fram komið fyrir konungsmönnum, er á allar lundir vildu brjóta á bak aftur og bæla undir sig alþýðuviljann, enda ræðu þeir konungi, að hann skyldi kalla allar þingdeildir á einn aðalfund, og kunngjöra þeim þar það, er hann vildi vera láta. Hinn 20. dag júnímánaðar ætluðu þjóðdeildarmenn (eða þriðju stéttar menn) að halda fund þar sem þeir voru vanir, en er þeir komu þángað, voru þar vopnaðir menn fyrir, er ráku þá burt þaðan og

sögðu, að enginn fengi þar inn að ganga fyrir þá sök, að verið væri að undirbúa aðalfund þann, er konungur hefði boðað. *Bailly*, forseti deildarinnar, varð fyrir svörum, og kvað þíngmenn þá mundu halda fund sinn á öðrum stað. Sneru þeir þá þaðan og settust á ráðstefnu í öðru húsi, er nefnt var *knattleikahús* (*Boldhus*), og var ákaflega stórt. Þar urðu þíngmenn ásáttir um, að skiljast eigi fyrir hverir við aðra, en þeir hefðu komið stjórnarskipun ríkisins á fastan fót, og unnu eigna að því.

Meðan þetta gjörðist, hafði meiri hluti klerkadeildarinnar af ráðið, að ganga í lið og á þíng með þjóðdeildarmönnum. En greifinn af *Artois*,¹ yngri bróðir Loðvíks sextánda, fyrirbauð þíngmönnum að halda fundi í knattleikahúsinu, því að hann kvaðst sjálfur þurfa á því að halda, til sinna skemtana. Hældu þá þíngmenn, bæði alþýðudeildin, þeir af klerkum, er gengið höfðu í lið með henni, og nokkrir af aðalsmönnum, er við höfðu bæzt, fundi sína í kirkju einni þar í borginni (*Versailles*). Hinn 23. dag júnímán. hélt konungur hinn ákveðna aðalfund með þíngmönnum. Flutti konungur ræðu og fór þúngum orðum um þjóðdeildarmenn og aðgjörðir þeirra, og kvað það alt ógilt og marklaust, er þeir hefðu aðhafzt á fundum sínum, og að lyktum skipaði hann svo fyrir, að þíngið skyldi vera þrískift, hver deild á sínum stað. Að svo mæltu gekk konungur af þíngi og aðalsmannadeildin og margir af klerkadeildinni, en hinir allir sátu eftir með þúngu skapi. En er hirðstjóri konungs sá, að þeir sátu kyrrir, sneri hann sér að forseta og mælti: «hafið þér eigi heyrt, hvað konungur bauð?» *Bailly* svaraði, að hann yrði fyrst að spyrja þíngmenn og vita, hverju þeir vildu svara. *Mirabeau* var þá sem oftast skjótur til svars, og mælti: «Hver leyfir yður að tala hér? segið þeim, er yður hefir sent, að vèr sè-um hér samkvæmt vilja þjóðarinnar, og látum eigi reka oss út hëðan fyrir en vopnin standa á oss». Hirðstjóranum leizt eigi að bíða og hrökk út úr salnum. *Sieyès* mælti þetta fyrir manni sér: «vèr erum í dag það sem vèr vorum í gær; látum oss

1) Eldri bróðir Loðvíks sextánda hét *Loðvík* (18), og var nefndur *greifi af Provence*, varð konungur eftir *Napóleon I.* og dó 1824. Yngri bróðir Loðvíks 16. var *greifinn af Artois, Karl* (10.), er ríkti á Frakklandi frá 1824 til 1830, en var þá rekinn frá ríki og dó 1836.

halda áfram störfum vorum», — og svo var gjört. Tóku þíngmenn þá að ræða um framkvæmd ályktana þeirra, er þeir höfðu gjört undanfarna daga. «Hin fyrsta af ályktunum þessum, mælti *Barnave*,¹ hefir lýst yfir því hvað þér eruð; hin önnur tilgreinir þá skatta, sem þér einir hafið vald til að leggja á þjóðina; og hin þriðja er eiður sá, er býður yður að gegna rækilega skyldum yðar. Ekkert af þessu þarf konungur að staðfesta, og það sem eigi þarf hans samþykkis við, það getur hann eigi bannað». Í þessu gengu vopnaðir menn í þingsalinn og smiðir komu til þess að taka burt bekki þíngmanna, en þeir létu sem þeir sæu það eigi og voru við sín störf; var þá tekið í lög, og lýst yfir — eftir tillögum Mirabeaus — að þíngmenn væru friðhelgir, en sá væri sekur um landráð, er bryti frið á þeim. Þegar konungur var kominn til hallar sinnar, spurðu menn hann, hvað nú skyldi til ráðs taka. Hann mælti: «látum þá sitja kyrra í salnum úr því þeir vilja eigi fara þaðan». Sýnir þetta eitt með öðru, að konungur var alt annað en fastur fyrir, ef honum var mótstaða veitt, svo harður og einbeittur sem hann hafði verið litlu áður, þá er hann talaði á þíngi; enda höfðu aðrir lagt honum þau orð í munn.

Þannig var nú hið fyrsta stig stjórnarbyltíngarinnar stigið. Þjóðdeildarmenn höfðu náð undir sig löggjafarvaldinu, en mótstöðumenn þeirra mist það, af því að þeir höfðu viljað halda því öllu og óskiftu. Að fáum dögum liðnum voru aðalsmenn þeir og klerkar, er lengst höfðu tregðazt við að eiga samsæti með þjóðdeildarmönnum, eftir áskorun stjórnarinnar gengnir í lið með þeim, og 27. dag júní-mánaðar var þingið alskipað öllum stöttum. En þetta er eigi þann veg að skilja, að stjórninni gengi gott til, heldur hafði hún eggjað aðalsmenn og klerka til þess, af því hún bjóst við, að þegar allar stöttir væru saman komnar á einu þíngi, þá mundi samlyndið versna, alt lenda í vafningum, en ekkert verða framgengt af því sem framkvæma þyrfti, og þá ætlaði hún sér að taka til sinna ráða og slíta þínginu með hermanna valdi. Hún hafði því ýms brögð í tafla, og sum, er konungi voru alveg ókunn.

Stjórnin, eða þó öllu heldur ýmsir stórhöfðingjar við hirð-

1) Ungur málafærslumaður frá Grenoble, mælskur vel og beztí drengur, tekinn af lífi 1793.

ina fengu því næst konung til að safna liði og hafa það vígbúið í nánd við París og Versailles, og þegar það var fengið gjörðust hirðmenn djarfmæltari; þóttust menn þá vita, að til nokkurra stórræða mundi stofnað. Necker var um það leyti vikið úr völdum og nokkrum öðrum ráðgjöfum, er þóttu helzt til þjóðholhir, en aðrir teknir í þeirra stað, sem hirðinni geðjaðist betur að. En er þessi tíðindi bárust til Parísar varð þar alt í uppnámi, því að Necker var þá enn átrúnaðargoð þjóðarinnar, og þegar hann var burtu, bjuggust menn við hallæri, borgarastriði og öllu illu. Urðu þá til ýmsir framgjarnir menn og ákafir, að æsa lýðinn í borginni, og telja honum trú um, að hirðin sæti á svikráðum við hann, og einu úrræðin væru að grípa til vopna og verja líf sitt og eignir. Við slíkar fortölur gjörði borgarlýðurinn uppreisn. Manngrúinn flyktist saman á strætum og krafðist vopna, og, fengjust þau eigi með góðu, voru vopnabúr brotin og alt það hrifsað, er að vopni gat orðið; urðu nú óspektir, meiðingar og manndráp. Meðan þessu fór fram, áttu kjósendur í borginni fund með sér og skipuðu nefnd manna (*borgarráð*) til þess að hafa yfirstjórn borgarinnar á hendi, og þar að auki settu þeir *varðlið* eða *þjóðvörð* (*Nationalgarde*), bæði til þess að halda friði á og reglu í borginni, og svo til þess, að verjast árásum hirðarinnar. En þó þetta væri í sjálfa sér vel og viturlega ráðið, var allur þorri manna orðinn svo óður og uppvægur, að honum varð eigi haldið í skefjum. *Hinn 14. dag júlímánaðar* (1789) streymdi mannfjöldinn til kastala þess, þar í borginni, er *Bastille* nefndist. Var hann ákaflega sterkur og illa ræmdur, því að þangað höfðu löngum verið settir menn fyrir litlar eða engar sakir, og harðlega haldnir þar í dýflissum. Varð þar nú lítil vörn fyrir af hendi kastalaforingjans; tóku menn kastalann eftir stutta hríð, drápu foringjann og liðsmenn hans flesta, og báru höfuðin á spjótsoddum sigri hrósandi um stræti borgarinnar. Eftir þessi hryðjuverk sfaðist borgarlýðurinn um stundarsakir; það var sem hann yrði máttminni er af honum gekk berserksgangurinn.

Nú víkur sögunni aftur til Versailles. Þingmenn sátu á ráðstefnu og höfðu jafnóðum fregnir af því er fram fór í París, því að skamt er í málli. Tóku þingmenn það ráðs, að senda menn á konungs fund og beiðast þess, að hann læti herlið það,

er fyr var sagt að saman hefði verið dregið, fara í burt og í fjarlægð við borgina, til þess að eyða öllum grun og ótta borgarmanna. Konungur færðist í fyrstu undan því, en eftir því sem tíðindin hörðnuðu frá höfuðborginni (*Paris*) og þingið skorði oftár á konúng, þá fór hann að mýkjast og hét að verða við beiðni manna. Þegar þingið sendi í síðasta sinn til konúngs, og mennirnir ætluðu að ganga úr þingsalnum stóð Mirabeau upp og mælti til þeirra: «Segið konúngi, að í gær hafi prinsar og prinsessur, vinir þeirra og vinkonur gengið til fundar við þenna útlenda þorparalýð, sem látinn er umkríngja oss, sýnt honum alls konar ástaratlot, eggjað hann til framgöngu og gefið honum gjafir. Segið honum, að liðlanga nóttina hafi þessir útlendu leigubjórnar, gulli troðnir og víni fyltir, sýngið ósvífin kvæði um undirokun Frakklands í þrældóm, og flutt þrumandi ræður um eyðileggingu þjóðþingsins. Segið konúngi, að í sjálfs hans höll hafi hirðsnákarnir snúizt í ótal hlykki eftir þessum ófagra glaumi, og að einmitt svona hafi dansleikurinn verið stiginn á undan Bartholomeusnóttinni. Segið honum, að Hinrik fjórði, sá konungur er allar þjóðir minnst til góðs, og sá af forfeðrum konúngsins er óskandi væri að hann tæki sér til fyrirmyndar, að hann hafi látið flytja matvæli inn í París, þótt hún hefði snúizt til uppreisnar í gegn honum, og þótt hann sjálfur haldi henni þá í umsátri; en að nú leggi hinir miskunnarlausu ráðgjafar konúngs hald á mjöl það, er kaupmenn vilja hjálpa hinni hlýðnu og húngruðu París um».

En í því er sendimennirnir ætluðu að fara, var sagt, að konungur kæmi og fáiir menn með honum. «Bíðið þá við,» mælti Mirabeau, «þángað til konungur hefir kunngjört oss það, er honum býr í brjósti. Hið fyrsta sem hér á að mæta konúngi í þessu áhyggjunnar augnabliki, skal vera þögn og stillileg lotning: þögn þjóðanna er konúngunum kenníng».

Nú kom konungur á þíng og bræður hans báðir með honum. Var hann hinn blíðasti í máli, kvaðst treysta þínginu hið bezta, og bað þá styrkja sig til allra góðra framkvæmda; herlið það, er menn hefðu mest óttazt, kvaðst hann hafa sent burtu. Var nú eigi annað að sjá og heyra, en að gott samkomulag væri milli hans og þíngsins. Sendi þingið þegar sveit manna til Parísar, til þess að skýra þar frá málalýktum milli konúngs

og þíngmanna. Öðdvitar sendimanna voru þeir Bailly og Lafayette. Var þeim vel fagnað í höfuðborginni, sem nærri má geta, því að tíðindin þóttu góð, er þeir færðu. Var Bailly gjörður að *borgarstjóra* í París, en Lafayette að *yfirmanni varðlíðsins* er nú var nefnt *þjóðvörður*. Eins og nafnið bendir til, var það ætlunarverk þjóðvarðarins að vernda þjóðfrelsið. Liðsmenn þessir tóku fyrstir upp hið þrílita hermerki, er Frakkar hafa síðan borið: *blátt, rautt og hvítt*. Hafði París áður haft bláa og rauða litinn í merki sínu, en ríkið hinn hvíta. Annars staðar í ríkinu var sami siður tekinn upp, og sett þjóðvarðarlið í hverri borg.

Eins og áður er bent til, hafði hirðin verið mjög hrokafull, og hugsað, að sèr væru allir vegir færir, nú var hún orðin svo hrædd og huglaus, að hún bjóst við að á hverri stundu mundi koma her manns frá París og veita sèr aðgöngu. Greifinn af Artois, og nokkrir stórhöfðingjar ásamt honum fóru nú af landi burt, og urðu þannig fyrstir í tölu hinna mörgu, er síðan gjörðu vont verra með því að flýja ættjörð sína og óðl á ófriðarárum þeim, er hær fóru á eftir. Bailly gjörði sèr ferð til Versailles til þess að hughreysta konúng, og gaf honum það ráð, að koma sjálfur til Parísar, og það þektist konúngur, þó drotníng hans og hirðin teldi hann af því á allar lundir. Litlu síðar fór konúngur til Parísar og 200 þíngmanna með honum. Var honum þar vel fagnað, enda var honum lættara í skapi þá er hann sneri heim aftur til Versailles; en drotníng þóttist hafa heimt hann úr helju. Til þess að gjöra þjóðinni sem flest til geðs, var Necker kvaddur af nýju í ráðaneytið, en þeim ráðgjöfum vikið á burt, er hún bar ekki traust til. *Liancourt*, vinur konúngs og góðgjarn maður, varð forseti þjóðþíngsins í staðinn fyrir Bailly. Þannig mátti nú segja, að stjórnarbreytingin væri til lykta leidd; löggjafarvaldið var komið í hendur þjóðarinnar, þar sem þíngið var, og framkvæmdarvaldið var undir sjálfri henni komið, eins og nú hafði fyllilega komið í ljós, en konúngsvaldið var á fallanda fæti.

Tíðindi þau, er orðið höfðu í París 14. dag júlímánaðar, bárust á örstuttum tíma um allt Frakkland og höfðu mikil áhrif á hugi manna. Þótti flestum, sem nú væri lokið hinni grimmu harðstjórnaröld, er svo lengi hafði ríkt yfir þjóðunum, og að í

hennar stað væri runninn upp nýr frelsisdagur. En mörgum hinna hyggjari manna stóð mesti ótti af aðförum skrilsins í höfuðborginni, er berlega sýndu, að hann skeytti alls eigi um lög og landstjórn þegar svo bar undir. Þess var heldur eigi langt að bíða áður óeirðir kviknuðu víðs vegar um landið. Bændalýðurinn reis upp í móti landsdrotnum sínum, neitaði öllum skyldum og sköttum, brendi til kaldra kola hallir þeirra og búgarða og fóru jafnvel hópum saman um ýmsar byggðir með manndrápum; var eigi annað sýnna, en að stjórnleysi eitt mundi ná yfirráðum á Frakklandi. Þjóðþingið í Versailles var það eina, er við nokkuð gat ráðið, og nú var það ætlunarverk þess fyrst og fremst að friða landslýðinn og koma á fót nýrri stjórnskipun. Þíngmenn sáu skjótt, að engin bót varð hér á ráðin, nema því að eins, að það væri allt í burtu numið, er óánægjunni olli. Afleiðingar þess, sem verið hafði, voru nú komnar í ljós. Vildu menn sporna við þeim eftirleiðis, var nauðsynlegt að uppræta orsakir þeirra. Þjóðlyndir aðalsmenn sáu, að það voru einkaréttindi stöttarbræðra þeirra, sem steyppt höfðu alþýðunni í eynd og volæði og knúð hana til að brjóta af sér alla fjötra; að öll sú óhamíngja, er nú dundi yfir þjóðina, hafði sín upp-tök þaðan, og að einu úrræðin voru, að segja að fullu og öllu skilið við forna landsvenju og fornt háttalag. Á fundi þeim, er þjóðþingið átti 4. dag ágústmánaðar, er um það var rætt, að skora á landslýðinn að hlýðnast lögunum þángað til þau yrðu numin úr gildi, lýstu tveir aðalsmenn, greifinn af *Noailles* og hertoginn af *Aiguillon* yfir því, að eina ráðið til þess að friða þjóðina væri, að öll einkaréttindi aðalsins væri þegar í stað af tekin. Þíngmenn gjörðu góðan róm að tillögum þessara ágætu manna, og á þeim sama fundi var það leitt í lög, að öll einkaréttindi aðalsmanna og klerka skyldu af numin, t. a. m. undanþága frá skattgjaldi, veiðiréttur, dómsvald landsdrotna, tíandarfrelsi o. fl.; borgir og hærud sleptu einnig sínum sérstöku réttindum; bændur voru leystir af ýmsum kvöðum, er á þeim lágu; landsmenn allir fengu jafnan rétt til embætta, hvort heldur til borgaralegra valda eða hervalda. Öll þessi nýmæli og allar afleiðingar þeirra voru hinir beztu og varanlegustu ávextir hinnar frakknesku stjórnarbyltíngar; allur hinn mikli og óréttláti mismunur, sem átt hafði sér stað meðal þegnanna á Frakk-

landi, var nú fallinn um koll. En nú var eftir að setja annað nýtt í þess stað, og á meðan það vantaði var verið að eins hálfunnið. Menn höfðu orðið vel ásáttir og samtaka, meðan verið var að rífa niður hið gamla; en þegar byggja skyldi upp aftur hið nýja, þá skiftust hugir manna, þá hófust flokkadrættirnir. Á þínginu greindust menn í þrjá flokka, og voru nefndir eftir sætum þeirra í þingsalnum; *Hægrimenn*, *Miðmenn* og *Vinstri-menn*. Í fyrsta flokknum voru allflestir aðalsmenn og æðstu klerkar, er fæstu vildu breyta frá því sem verið hafði, en tala þeirra manna fór minkandi dag frá degi, því að margir þeirra gengu af þíngi og fóru af landi burt. Í miðflokknum voru þeir, sem vildu hafa takmarkað konungsveldi, byggt á nýjum og sterkum grundvelli. Í hinum þriðja flokki voru allir svarnir óvinir aðalsmanna og klerka, er hafa vildu fullkomið lýðveldi. Sumir af hinum áköfustu úr þessum vinstri manna flokki áttu stöðuga fundi með sèr utanþíngs; var samkomustaður þeirra kendur við Bretagne (*den bretagnske Klub*), en seinna *Jakobinernes Klub*. Meðal þeirra manna var hinn úngi málaflutningsmaður *Barnave*. Þá voru enn nokkrir þessa frekastir í broddi vinstri manna (*Yderste Venstre*), þeir voru, enn sem komið var, fáir að tölu, og helztir meðal þeirra málaflutningsmennirnir *Pétion* og *Robespierre*. Þeir vildu sníða alt eptir kenningu Rousseaus. Mirabeau var einn síns liðs, en þessi Herkúles stjórnarbyltíngarinnar, sem hann hefir verið nefndur, var sem heill flokkur manna. Hann vildi hafa takmarkaða einveldisstjórn, en sjálfur vera í stjórninni, því að hann fann styrk hjá sèr til þess að geta stýrt fósturjörðu sinni, en sveið það sárt, hve lítinn kjark bæði Necker og hinir aðrir ráðgjafar konungsins höfðu til þess.

Það, sem menn fyrst urðu ásáttir um á þíngina, var, að þíngið skyldi standa í sífelli, en til þess að ýngja það upp, skyldi kjósa nýja menn til þess annaðhvort ár. Því að þíngið táknaði einveldi þjóðarinnar, en konungur var (sögðu menn) eigi annað en æzti embættismaður ríkisins, er enga heimild hefði til að kveðja til löggjafarþíngs eða segja því slitið. Þar næst var um það að ræða, hvort þíngið skyldi tvískíft vera eða ekki. Miðflokkurinn vildi hafa það tvískíft, en vinstrimenn voru því mótfallnir. Sieyes var einn í þeirra tölu, og sagði svo: «einn guð, ein þjóð, einn konungur, eitt þíng!» og niðurstaðan varð sú, að

vera skyldi ein málstofa (eða óskift þing). Það sem olli einna mestum ágreiníngi, var um *neitunarvald* konungs (*veto*), þ. e. hvert vald konungur hefði til að neita að samþykkja það, er þingið hefði fallist á. Bæði hægrimenn, miðflokkurinn og Mirabeau vildu, að konungur hefði það vald, en vinstrimenn kváðu það með öllu ófært, enda væri slíkt beinlínis til að ónýta allt einveldi þjóðarinnar. Loks báru menn þetta undir Lafayette, og gaf hann það ráð, að menn skyldu fara meðalveg, og láta konung hafa *frestandi neitunarvald*, þ. e. vald til að neita sínu samþykki til þess, er þingið hefði tvívegis fallist á, en ef þrjú þing, hvert eftir annað, hefðu samþykkt eitt og hið sama laga-boð, skyldi konungur eigi geta ónýtt það. Á þetta féllst konungur og ráðgjafar hans, og var svo þeim ágreiníngi lokið. Lengi færðist konungur undan því, að staðfesta þau nýmæli, er þingið hafði gjört 4. dag ágústmánaðar, og fyr eru nefnd. Hann var í sffeldri óvissu, hverjum flokknum hann skyldi fylgja, og fyrir því óttuðust margir, að hann mundi flytja byggð sína, og setjast að í einhverri víggirtri borg út á landamærum, hafa þar her manns sér til varnar, og í skjóli hans taka það allt aftur, er hann hafði heitið þjóðinni. Um þessar mundir var vista-skortur mikill í París meðal alþýðunnar, og færðu ýmsir óhlutvandar blaðamenn sér þetta hvorttveggja í nyt, og töldu mönnum trú um, að hirðin og höfðingjarnir ætluðu sér að leiða hallæri yfir landið; það væri því öll þörf á að grípa til vopna og verjast slíku vèlræði. Sá hét *Marat*, er bent gekk fram í því að sasa lýðinn í blaði, er hann gaf út og nefndi „*þjóðvininn*“. Hann hafði verið læknir, en nú var hann hættur þeim störfum og orðinn ritstjóri; hann var lítill maður vexti, ófríður sýnum og illgjarn.

Hinn 5. dag októbermánaðar snemma morguns flyktist skrállinn saman á strætum í París, og heimtaði brauð með frekju, brauzt inn í ráðstofuna, og náði þaðan vopnum. Þá gaf maður nokkur það ráð, að halda skyldi til Versailles, og var svo gjört. Urðu þeir saman margar þúsundir manna, bæði konur og karlar, er þangað höldu. Í annan stað áttu þeir fund með sér borgarstjórnir og Lafayette, og urðu á það sáttir, að hann skyldi halda með höfðingjum sínum á eftir mannsöfnuði þessum til Versailles, og skora á konung að flytja sig þaðan til Parísar; á

þann hátt væri tvent unnið, bæði það, að höfðingjar gætu síður haft áhrif á konúnginn, og svo hitt, að þá væri nokkuð gjört til skaps alþýðunnar.

Nú kom allur þessi manngrúi til Versailles; ruddust sumir inn í þingsalinn, en sumir gengu fyrir konúng, og beiddu hann um brauð með góðu verði. Konúngur hèt þeim öllu góðu; lét þá múgurinn sefast, og var alt kyrt um nóttina, enda hafði Lafayette gætur á öllu í borginni. En er lýsti af degi morguninn eftir (6. október), hófust óspektir af nýju. Fjöldi mikill af hinum verstu óaldarseggjum brauzt inn í konúngshöllina, og drap nokkra af varðmönnum, áður en Lafayette kom til og fékk sefað upphlaupið. Lýðurinn fyrir utan höllina hrópaði í sífellu, að konúngur skyldi til Parísar, og var það nú af ráðið. Áð kveldi hins sama dags var konúngur og hirð hans kominn til Parísar, og settist hann þar að í *Tuileri-höllinni*. Fáum dögum síðar fluttist þingið einnig til Parísar; varð nú all-tómlegt eftir í Versölum. En við þenna atburð sögðu margir meðal þingmanna að fullu og öllu skilið við þingið, og fóru annaðhvort heim til sín, eða af landi burt, því að reynslan hafði nú sýnt, að skrillinn beitti ofríki við konúng og truflaði þingstörfin, og allar líkur til, að enn meiri brögð myndu að því verða, þá er alt væri saman komið í París. Hins vegar skal þess getið, að eins og nú var komið, var konúngi og þingi engin hættu búin; Lafayette og hinir betri menn í París reðu nú öllu, en hitt var óseð, hversu lengi þeir gætu við ráðið.

Þegar hér var komið og þingmenn tóku til starfa í París, þá var það eitt hið fyrsta, sem Mirabeau lét sér annt um, að gjöra stjórnina sterka og þjóðlega, því að hann sá gjörla, að það var eina skilyrðið fyrir því, að konúngdómur gæti átt sér stað á Frakklandi og land og lýður tekið nokkrum verulegum framförum. Hann bar því fram ýmsar tillögur, er hnigu í þá átt. Það sem fyrst þurfti að gjöra var að tryggja stjórnina og þingið fyrir ofsa og ofríki skrilsins, og þar næst að útvega stjórninni fê til umráða. Talleyrand byskup, sá sem fyr er nefndur, hafði þegar meðan þingið sat í Versailles lagt það til, að tekið væri hið geysimikla kirknagóz til þess að rétta við fjárhag ríkisins. Mirabeau féllst á þá tillögu, og var það að lögum gjört, að alt kirknagóz skyldi fengið þjóðinni í hendur móti því, að

hún annaðist alla guðspjónustu, laun allra klerka og kennimanna og sæi snauðum mönnum fyrir uppeldi. Þá vildi Mirabeau og, að ráðgjafarnir fengi atkvæðisrètt á þingi; hann bjóst sjálfur við að verða ráðgjafi, og þá þótti honum það miklu skifta, að geta talað á þingi, þegar hann vildi. En þingmönnum stóð ótti af hans miklu málsnild og hugðu, að yrði hann ráðgjafi og ætti setu á þingi, þá mundi hann einn öllu ráða bæði í stjórninni og á þinginu; enda var meiri hluta þingmanna það þá ríkast í skapi, að láta stjórnina vera sem óstyrkasta, til þess að þeir sjálfir gætu ráðið sem mestu. Þeir ræru að því öllum árum, að stjórnin hefði engin áhrif á löggjöfina, heldur yrði einúngis verkfæri í þingsins hendi. Þingmenn höfðu það fram, að tillaga Mirabeaus var feld, og í annan stað var svo kveðið á, að engan af þingmönnum mætti taka í ráðaneyti konungs. Konungur samþykkti alt sem þingið hafði fallizt á. Má af þessu sjá, að öll yfirráð voru, eins og nú var komið, í höndum þingsins, en meiri hluti þess var, eins og bráðum kom í ljós, háður mjög margbreyttum og misjöfnum áhrifum ýmsra manna út í frá, fjær og nær þinginu. Eigi þarf það að efa, að margir af ágætustu mönnum Frakka sátu á þingi, og margt og mikið gagn vann það Frakklandi, þar sem þjóðin sameinaðist í eina heild miklu fremur en átt hafði sér stað að undanfögnu, betra skipulag varð á lögum og réttarfari, almennt trúarfrelsi var veitt, og lög og skattar og skyldur látnar ná jafnt til allra frakkneskra manna, en samt sem áður hafði meiri hluti þingmanna það einatt fram, og fékk það gjört að lögum, af reynsluleysi og einberum ákafa, er ver gegndi, og varð landinu til hins mesta ógagns.

Hin forna fylkjaskipun á Frakklandi og allur sá mikli mismunur, er því hafði verið samfara, var nú af numinn. En í þess stað var Frakklandi nú skift í 83 samkynja *umdæmi* (*Departement*), er síðan hefir haldizt. Var þá, er þessi nýju skifti komust á, einkum farið eftir eðlilegum takmörkum umdæmanna, og gefin nöfn eftir fljótum, ám eða fjöllum og fleiru þess konar. Yfirvöldin í þessum umdæmum, og hinum smærri sveitum, er þau greindust í, kusu borgarar og bændur með tvöföldum eða einföldum kosningum, eftir því sem lög mæltu fyrir. Stjórnin hafði lítið vald yfir öllum þeim mörgu embættismönnum, og lítil áhrif á eða afskifti af því, hvernig þessi stærri og smærri um-

dæmi og sveitafélög stýrðu málefnum sínum. Menn hafa því sagt, og með nokkrum sannni, að Frakkland hafi þá verið sundurskift í 44,000 smáríki (sveitir, eða sveitafélög á Frakklandi, náðu hér um bil þeirri tölu). En hitt var lakara, að smámsaman náðu ráðríkir og eigingjarnir flokksforingjar þar mestum yfirráðum, en hinir gæflyndari menn drógu sig í hlè.

Hinni fornu dómaskipun og rættarfari var breytt. Parlamentin og ýmsir eldri dómar lögðust niður, og í þeirra stað komu þjóðkjörnir dómendur, en þó skyldu þeir vera lögfróðir menn; en í óbótamálum voru settir kviðdómar og dómendur kjörnir til þeirra af alþýðu manna. Var það að vísu talsverð breyting til hins betra, en þó verður því eigi neitað, að alþýðan hafði meiri áhrif en vera skyldi á þessa hina nýju dómendur, einkum fyrir þá sök, að prentfrelsið mátti heita ótakmarkað, og félög þau (*Jakobínar*), sem þá voru í miklum uppgangi, náðu mjög miklum yfirráðum, og fyrir vilja þeirra beygðu dómendur sig meir en góðu hófi gegndi. Hið katólska klerkavalð, eins og það hafði lengi við gengizt á Frakklandi, gat heldur eigi lengur staðizt og hlaut að breytast í nýja stefnu, enda var nú svo gjört. Yfir hvert umdæmi (*Departement*) var settur einn byskup, og einn prestur í hverjum söfnuði, er þjóðin kaus, og fengu laun sín af ríkissjóði. Klanstur voru lögð niður og mörg klerka embætti; allar kirkjujarðir urðu *þjóðjarðir*, er selja skyldi smámsaman; á sama hátt voru jarðir krúnunnar gjörðar að þjóðjörðum, en fóst laun (*Civil-Liste*) ákveðin handa konungi og hirðinni¹. Þeir sem nú keyptu þessar þjóðjarðir gjörðust allir vinveittir stjórnarbyltíngunni og studdu hana og allar hinar nýju breytingar; enda komu þau jarðakaup fótum undir *nýja meðalstætt* í landinu, er varð hin sterkasta vörn gegn því, að allt kæm-ist aftur í hið gamla horf. En hitt er vitaskuld, að mikill þorri alþýðu undi illa hinum nýju breytingum, og þótti ilt að hverfa svo skyndilega undan valdi páfans og klerkanna, og verða háður veraldlegum yfirboðurum, og snerist því í móti stjórnarbyltíngunni. Öll hin sömu áhrif hafði það á flesta aðalsmenn, er aðalstign og nafnbætur voru af numin sumarið 1790.

Frá því árið áður (1789) hafði víska bryti á óeirðum á Frakklandi, og urðu þær enn almennari, þegar hér var komið.

1) Hér um bil 30 milljónir fránka ár hvert.

Þá var það, að nokkrir góðgjarnir menn tóku sig til og mynduðu mörg og smá félög, til þess að afstýra vandræðum og borgarastríði. Því næst urðu menn ásáttir um, að stofna til aðalfundar eða hátíðahalds í París, til þess að efla með sér sátt og samlyndi. Skyldi sú hátíð standa 14. dag júlímán. 1790, því að þann dag árið áður hafði Bastillen verið brotin og lögð í eyði. Kom þar saman mógur manns af öllum stöttum. Þar kom konungur og drottning hans, og hét hann að halda hina nýju stjórnarskrá og vann eiða að, þótt hún væri þá enn eigi albúin frá þinginu. Þótti nú mörgum, sem hér mundi friður einn og fögnuður á eptir fara. En þetta reyndist alt á annan veg.

Um þessar mundir gekk sá orðrómur á Frakklandi, að aðalsmenn þeir og annað stórmenni, er þaðan hafði stokkið til útlanda, og svo aðrir þeirra líkar, er heima sátu eftir, hefðu á þjónum ýmsar ráðagerðir og jafnvel samsæri gegn þjóðfrelsi Frakka. Orðrómur þessi var án efa á nokkrum rökum byggður, en illgjarnir blaðamenn notuðu hann til þess, að æsa alþýðuna sem mest. Marat — sem fyr var nefndur — krafði þess, að konungur og drottning, ráðgjafarnir, Lafayette og ýmsir aðrir menn væru höndum teknir; «það væri úti um þjóðfrelsið» sagði hann, «nema því að eins, að 5—600 höfuð væru látin fjúka af bolnum». Borgarskríllinn kvað þetta hið mesta þjóðráð; en hann mátti sín lítið enn sem komið var. Þar á móti magnaðist nú óðum félag það (vinstri manna), er vör áður höfum minzt á, og kent var við Bretagne meðan þingið sat í Versailles, en nú var nefnt *Jakobína-félagið*, af því að samkomustaður þess var í gömlu Jakobsklaustri í París. Félagsmenn þessir höldu fundi sína á kveldin, til þess að alþýðumenn gætu verið þar viðstaddir, að afloknu dagsverki. Þar gjörðu menn að umtalsefni helztu þingmál, þar komu óspart fram kærur gegn konungi, ráðgjöfum hans, og þeim af þingmönnum (hægri mönnum), er annari stefnu fylgdu; þar gjörðu menn sér alt far um, að telja alþýðunni trú um, að allir aðrir sætu á svikráðum við hana, bæði konungur, hirð hans og ráðgjafar og útlendir þjóðhöfðingjar. Alþýðan trúði slíkum fortölum og fylltist tortryggni, en leitaði sér halds og trausts hjá þeim, sem sínum verndarmönnum, er þannig hefðu opnað augu hennar, og sýnt, hvaðan

hættunnar væri von. Út um alt land mynduðust smærri fêlög, er stóðu í sambandi við aðalfêlagið í París, og gengu í það margar þúsundir manna af ýmsum stöttum, þar á meðal fjöldi hermanna og þjóðvarðarmanna. Var þetta eins konar samsæri, eða að minsta kosti samtök, móti landsstjórninni. Verst var þó það, að fêlög þessi spiltu öllum aga meðal herliðsins, svo að yfirmenn gátu varla við ráðið; enda gjörði liðið á sumum stöðum uppreisn, og urðu mikil brögð að því austur á Lothringen, en þar var dugandi hershöfðingi, er *Bouille* hét, og fêkk hann bælt upppotið niður. Það var á áliðnu sumri 1790. Þjóðþingið og Lafayette þökkðu hershöfðingjanum dugnað þann og stjórnsemi, er hann hefði sýnt, en í annan stað þyrptist lýðurinn hópum saman og hét að sýna ráðgjöfunum í tvo heima fyrir það, að þeir hefðu veitt hershöfðingjanum slíkt vald til þess, að bæla niður leyfilegar frelsishreyfingar sinna liðsmanna. Þá var það, að Necker fór alfarið burt af Frakklandi. En Jakobínar létu sér það eigi nægja, og sendu menn á þing með þær kröfur, að öllum ráðgjöfunum væri vikið frá völdum. Sá hét *Danton*, er hafði orð fyrir sendimönnum. Hann hafði verið málaflutningsmaður áður en stjórnarbyltíngin hófst, og þótti þá ekki að honum kveða. En með frelsisdegi þjóðarinnar vaknaði Danton, og gjörðist skjótt hinn ótrauðasti og aðkvæðamesti forvígismaður alþýðunnar. Hann var mikill maður vexti og trölleslegur, og að því skapi var hans andlega atgjörfi. Ekkert var smátt en alt stórgert og jafnvel hrikalegt hjá þessum manni, vitið, mælskan, röddin; þess vegna hreif hann alþýðuna með sér meir en aðrir menn. Þegar svo bar undir, hamaðist hann, og var þá til alls búinn, enda var geðið og hugurinn þá óbilandi. Þó var hann ekki grimmur í skapi, hataði engan og ófundaði engan, eins og sumir aðrir af samtímismönnum hans. Með köflum var hann hvílrækinn og lifði þá við hóglífi og aðgjörðaleysi. Hann var eins konar berserkur sinnar tíðar; hið sama meðal alþýðumanna, sem Mirabeau meðal höfðingja og þingmanna.

Þegar ráðgjafarnir sáu, að þingið setti eigi þvert nei fyrir kröfur alþýðunnar, viku þeir flestir úr völdum, og aðrir komu í staðinn, er lítið kvað að. Konungur var sem oftast, að hann vissi eigi hvað til bragðs skyldi taka. Hann hafði reyndar um

Þessar mundir leitað ráða til Mirabeaus, en gat þó eigi fengið af sér að fylgja nema sumu af því, er hann ræð honum. Einkum var það klerka- og kirkjumálefnið, sem þeim bar mest á milli. Konungur var svo mikill vinur klerkanna, að hann gat eigi vitað, að þeirra kjörum og kosti væri í nokkru breytt eða þröngvað frá því sem verið hafði. Þíngið hafði, eins og fyr er sagt, gjört nýtt skipulag á málefnum kirkjunnar, en klerkarnir streittust í móti það þeir kunnu. Til þess að gjöra enda á þeirri mótspyrnu, kvað þíngið svo á (í nóvembermán. 1790), að hver sá klerkur, er halda vildi embætti sínu, skyldi sverja landstjórninni hollustueið. Konungur var lengi tregur til að staðfesta þessa þingsályktun, þó gjörði hann það um síðir. En páf-inn bannaði þar á móti klerkunum að sverja, enda fór svo, að tæplega einn þriðjungur þeirra vann eiðinn. Voru þá settir aðrir og nýir klerkar í hinna stað, er eigi höfðu viljað eiðinn vinna, og margir þeirra lítt nýtir. Varð af öllu þessu hið mesta sundurlyndi; sums staðar ráku menn burt hina gömlu presta, og sums staðar vildu söfnuðirnir hafa þá og enga aðra.

Það sem hér gjörði alla ógæfuna var kjarkleysi og hviklyndi konungs. Hann ritaði nafn sitt undir og staðfesti þau lög, sem hann fyrirleit eða jafnvel hataði. Hann gjörði einn daginn það, sem þíngið vildi, og hinn það, sem drotning hans og hirðin ræð honum. Það dugði ekki, þó Mirabeau beitti öllu sínu viti og öllum sínum dugnaði til þess, að ráða konungi heilræði og halda honum á réttum vegi. Mirabeau vildi, að konungur skyldi færa sér í nyt allt það gott sem þíngið hafði afrekað, og á þann hátt styrkja konungsvaldið, því að Mirabeau vildi ekki hafa lýðveldi, heldur konungsstjórn, en halda henni innan skynsamlegra takmarka. En allar tilraunir Mirabeaus í þá átt komu að litlu haldi. Hvað slíkum afbragðsmanni, sem Mirabeau var, hefði kunnað að takast, ef hans hefði lengur notið við, er ekki hægt að segja. En víst er um það, að hann hélt öllum þíngstörfum og flestum þjóðmálefnum Frakka í horfinu, þann tíma er hann sat á þíngi. En þegar hér var komið, lagðist hann veikur og dó eftir stutta legu 2. dag aprílmánaðar 1791.

Þegar er Mirabeau var dáinn, jukust flokkadrættir og vandræði í Parísarborg, og ýmsir af foringjum vinstri manna, eins

og t. a. m. Barnave, þóttust nú sjá, að þeir hefðu farið lengra en góðu hófi gegndi; vildu því feta í fótspor Mirabeaus — þó áður hefðu þeir einatt verið hans mótstöðumenn — og freista að bjarga því, sem eftir var af konúngavaldinu. En konúngurinn hafði það eitt hugfast, að losast sem fyrst úr þeirri ánauð, er hann þóttist haldinn í, og flýja til einnar eður annarar víggirtrar borgar á landamærunum, safna þar liði og vinna svo aftur þau völd, er hann hafði mist. Bouille, hershöfðingi sá, er fyr var nefndur, hafði um hríð verið í þessari ráðagjörð með konúngi. En um þessar mundir hafði Bouille herstjórn austan og norðan til á Frakklandi. Var það nú í ráði, að konúngur leyndist á burt úr París og leitaði þangað austur; skyldi Bouille koma þar til móts við hann, og sjá honum borgið austur á landamæri. Drotníngin hafði fengið það loforð hjá Leópold keisara bróður sínum, að austurríkskt lið skyldi vera við búið og styrkja konúng til að koma fram sinni fyrirætlan.

Aðfaranótt hins 21. júní 1791, leyndist konúngur með drotníngu sinni og börnum burt úr París og komst til borgar þeirrar austur í landi, er Varennes heitir, en þar þektu menn hann og heftu för hans. Jafnskjótt sem Lafayette og þíngmenn urðu þess vísari, að konúngur var farinn burt, var afraðið að veita honum eftirlör og flytja hann aftur til Parísar, því að mönnum var fullljóst, að næði hann að koma fram áformi sínu, þá var eigi annað fyrir hendi en borgarastríð. Svo fór, að Bouille varð of seinn til liðs við konúnginn. Var hann nú fluttur aftur til Parísar, en Bouille flýði af landi burt og dó nokkrum vetrum síðar á Englandi.

Þessi flóttatilraun konúgs varð honum til hinnar mestu óhamíngju, því að nú mistu menn það lítið, er eftir var, af virðingu fyrir honum og trúðu hvorki orðum hans eða gjörðum. Hann hafði sjálfur sagt, og það skömmu áður en hann flýði, að sèr geðjaðist hið bezta að hinni nýju stjórnarskrá; en þegar hann flýði, hafði hann skilið eftir ritað skjal, og stóð þar á, að hann gæti með engu móti sætt sig við stjórnarskrána, hann hefði verið neyddur til að staðfesta hana, og nú tæki hann aftur þá staðfestingu. Margur var því sá, er nú sneri huga sínum algjört frá honum, og æskti þess helzt af öllu, að menn fengi lýðveldi í stað konúngdóms. Meiri hluti þíngmanna bar

þó kvíðboga fyrir því, að ef konungdómurinn væri með öllu aftekinn, þá mundi skrállinn verða óviðráðanlegur, og þess vegna höldu þeir fast við hina nýju stjórnarskrá. En þingið svifti konung um stundarsakir framkvæmdarvaldinu; sjálfan hann vildu þeir hvorki draga fyrir lög og dóm, nè heldur reka frá völdum, en ýms félög og dagblöð kröfðu þess af miklum ákafa, enda lét Robespierre það löngum kveða við í Jakobína-félaginu, að allur þorri þingmanna væru beinir mótstöðumenn stjórnarbyltíngarinnar. «Vér viljum engan konung hafa», var viðkvæði flokka þeirra, er fylgdu þeim Robespierre (*Jakobínar*) og Danton (*Cordeliers*¹), en Marat krafði nú sem fyr, að bæði konungur og allir þeir, er hann nefndi «svikara», væru teknir af lífi án dóms og laga. Þegar þetta gat ekki orðið framgengt, urðu óspektir nokkrar í París, en Lafayette þaggaði þær jafnskjótt niður.

Meðalhófsmenn á þinginu voru ekki ánægðir með sumar greinir í stjórnarskrá þeirri, er þá var í smíðum, og vildu breyta þeim, áður hún yrði fullgjör, en þeir fengu því þó eigi fram komið, því að vinstri menn óttuðust, að þeir mundu þá missa hylli alþýðunnar, og hægri menn vildu engu breyta og í engu bæta stjórnarskrána, til þess hún eyðilegði sjálfa sig sem fyrst. Þannig var stjórnarskráin sögð albuin, og lögð fyrir konung til staðfestingar. Gjörði hann það viðstöðulaust og vann eið að henni 13. dag septembermánaðar.

Robespierre hafði borið þá tillögu upp á þinginu, að engan af þingmönnum mætti aftur kjósa til hins komanda þings. Hann óttaðist, að margir þeirra mundu aftur verða kosnir, og þá mundu þeir ráða mestu hjá hinum nýju og óvönu þingmönnum; en kæmust þeir eigi að, þá bjóst hann við, að hann og hans fylgismenn mundu geta mestu ráðið. Flokkur hans var þá orðinn bæði mikill og harðsnúinn. Sumir litu svo á tillögu þessa, sem væri hún vottur sérlegrar ósérplægni, og féllust því á hana; og hægri menn, sem ekki bjuggust við endurkosningu, gengu í

1) *Cordeliers* nefnast Franciscus-múnkar á Frakklandi, af bandi því (*corde*), er þeir hafa bundið um sig. Félag það, eða flokkur sá, sem hér er um að ræða, og Danton að nokkru leyti stýrði, hélt fundi sína í gömlu Fransiscus-múnka klaustri, og þaðan er nafnið dregið.

flokk með þeim, af því þeim var stórilla við hina nýju stjórnarskrá og vildu alt til vinna að steypa henni. Tillagan var því samþykkt af meiri hluta þíngmanna. Um sömu mundir var það ákveðið, að Lafayette legði völdin niður, því að þessir skamm-sýnu óróamenn óttuðust þjóðvörðinn, og kváðu það óráð, að einn maður stýrði jafnmiklu liði og hefði svo mikil völd á hendi. Var þá þjóðverðinum skift í 6 flokka og settur einn foringi yfir hvern. Þannig lauk *frumlagapíngið* störfum sínum 30. dag septembermánaðar 1791, og hafði setið á ráðstefnu því nær hálft þriðja ár.

II. Löggjafarþíngið. (*Den lovgivende Forsamling*). (Frá 1. okt. 1791 til 20. sept. 1792).

Daginn eftir að frumlagapínginu var slitið, tók *löggjafarþíngið* til starfa og á sama stað sem hið fyrra (1. okt. 1791). Jakobínar höfðu haft allar klær úti, og áttu mikinn þátt í því, hverjir kosnir voru til þessa þíngs, af því að mótstöðumenn þeirra voru aðgjörðalitlir um kosningartímann. Þó voru þíngmenn mjög margbreyttir bæði að skapsmunum og vitsmunum og í skoðun sinni á alþjóðlegum málefnum. Á meðal þíngmanna voru 300 málaflutningsmenn, 70 klerkar, sem svarið höfðu stjórnarskránni eiða, en því nær enginn af hinum ríku jarðeigendum. Meiri hluti þíngmanna voru úngir að aldri, og stigu nú feti framár í kröfum sínum, en allur fjöldi manna á hinu fyrra þíngi. Nú leit enginn á þíngi við því, er *hægri menn* frumlagapíngsins höfðu fylgt fram. Þeir, sem nú máttu heita *hægri menn* á löggjafarþínginu, fylgdu hér um bil því sama fram, sem *vinstri menn* á hinu fyrra þíngi, og þeir sem nú voru *vinstri menn* voru líkastir þeim, er áður voru *långfrekastir* (*Yderste Venstre*) meðal frumþíngismanna. Þessir *vinstri menn* höfðu Jakobínaflokkinn við að styðjast. Hinir (*hægri menn*) þar á móti nálguðust þá utanþíngsmenn, er gæflyndari voru, og létu sér margt vel líka í stjórnarskránni og vildu hafa konungsstjórn. Meðal *vinstri manna*, var flokkur sá, er nefndi sig *Girondina*, fyrir því, að hinir helztu menn í honum voru frá Gironde, — að öðru leyti voru flokksmenn þessir víðs vegar að úr Frakklandi — Höfðingi Girondina hét *Brissot*, rithöfundur þeirra *Condorcet*, en sá hét *Vergniaud*, er jafnan hafði orð fyrir þeim, og var

allra manna best máli farinn á löggjafarþinginu. Flokksmenn þessir vildu hafa *lýðveldi*, og máttu sér mikið á þinginu sökum vitsmuna sinna og málsnildar, en utanþings og þegar til framkvæmdanna kom, reyndust þeir miklu miður. Þegar fram í sótti og konungsvaldinu var kollvarpað, skiftust Girondinar þannig, að nokkrir þeirra, sem voru miklu ákafastir, skildust við hina, mynduðu flokk út af fyrir sig og nefndu sig *fjallið*, af því að þeir sátu skör hærra í þingsalnum og á baki hinna, er neðar sátu.

Félög þau (*Klubberne*), er fyr hafa verið nefnd, mögnuðust stórum um þessar mundir, og þar sem þau áður, meðan frumlagarþingið átti sér stað, að eins kveiktu óróa með mönnum, gjörðust þau nú, er löggjafarþingið var tekið til starfa, svo umfangsmikil, að þau vildu ein öllu ráða. Til þeirra streymdi múgur og margmenni, því að minstur hluti framgjarnra manna náði þingsetu, en allir, sem vildu, áttu kost á að ganga í félög-in og taka þátt í störfum þeirra. Jakobína-félagið var þeirra elzt, og hafði, þegar hér var komið, náð mikilli þýðingu og fengið mikil áhrif á þjóðina. Í París var varla nokkurt hús svo stórt, að það gæti tekið alla félagsmenn, er þar áttu heima, og tilheyrendur þeirra, en út um landið voru stærri og smærri deildir félagsins því nær í hverri borg. Robespierre, sem áður er nefndur, var höfðingi þessa félags og ræð þar flestu sem gjörðist, eigi fyrir þá sök, að hann væri afbragðsmaður að vitsmunum eða málsnild, heldur hins vegna, að hann hafði fengið það orð á sig hjá fylgismönnum sínum, að hann væri manna ósérplægnastur, og fólksvalaus ástvinur fósturjarðarinnar. Hann las rit Rousseaus öllum stundum, og setti sér fyrir mark og mið að framkvæma kenningar hans í verki, og koma á fastan fót lýðveldi eins og Rousseau hafði viljað skapa það. Robespierre var ekki hugprúður maður, og hafði sig aldrei frammi, er hætta var á ferðum, en hann var þrályndur og fastur við sína fyrirætlan, hann var tortryggur og ófundsjúkur og hataði alla afbragðsmenn, er hann hugði að kasta mundu skugga á sig og rýrð. Þess vegna var honum gramt í geði við Girondina og einkum við Brissot, því að hann þóttist sjá, að hann mundi keppa við sig um völdin.

Bailly, er vèr áður höfum nefnt, hafði um undanfarin 3 ár

verið borgarstjóri (*Maire*) í París, og gegnt því vandasama embætti með mikilli árvekni og mannúð, og dyggilega stutt Lafayette í því, að halda þar mönnum og málefnum innan rættra takmarka, og mátti það heita þrekvirki. Nú var Bailly eigi lengur við vært, og varð að fara frá völdum um sama leyti sem Lafayette vinur hans. En er kjósa skyldi nýjan borgarstjóra, gengu menn í tvær sveitir; vildu sumir kjósa Lafayette, en aðrir vildu kjósa *Petion*. Enginn var betur þeim vanda vaxinn en Lafayette, en alt um það varð Petion þó hlutskarpari í kjörinu (í nóvember 1791), og átti það helzt að þakka fylgi hirðarinnar, eða þó einkum drotníngarinnar. Hún kunni ekki að meta þá miklu mannkosti, sem Lafayette hafði til að bera; hún hataði hann einúngis fyrir þá sök, að hann unni skynsamlegu frelsi og vildi hafa takmarkaða konúngsstjórn, en í augum drotníngar mátti aðalsmaður eigi vera að slíku fundinn — og Lafayette var aðalsmaður. Petion var einbeittur lýðveldismaður, og hafði verið ásamt með Robespierre foríngi þeirra manna, sem ákafastir voru á frumlagapínginu; þetta mátti hirðinni og drotníngu reyndar vera kunnugt, en þau voru svo blind, að þau sáu það eigi, og hugðu að ráða mætti öllu við Petion, af því að hann var hversdagslega hægur og fásíftinn. Það er sannast að segja, að hirðin vissi ekki hvað til síns friðar heyrði, og þannig hafnaði hún einmitt þeim manni, er færastur var og fúsastur til að styðja konúnginn samkvæmt stjórnaðskránni, en kaus þann til valda, er líklegastur var til liðs við alla óvini konúngdómsins.

Þegar er löggjafarþíngið var tekið til starfa, sneri það athygli sínu að hinum óeíðfestu prestum og að útflutníngsmönnum (*Emigranter*). Frumlagapíngið hafði veitt prestum þessum nokkur optirlaun; en nú fréttist það úr öllum áttum, að þeir æstu lýðinn móti öllum hinum nýju breytingum, og þá setti þíngið þau lög, að hver sá prestur, sem ekki hefði svarið eiðinn (að hlýðnast stjórnaðskránni) að viku liðinni, skyldi svíftur eftirlaunum; þeir, sem þá eigi vildu eiðinn vinna, skyldu engin prestsverk mega gjöra, og vera taldir meðal grunsamra manna; yrði af nokkrar óspektir, skyldi klerkarnir annaðhvort gjörðir útlagir eða settir í varðhald. Útflutníngsmennirnir höfðu sezt að í Rínarfylkjunum þjóðversku, og aðalaðsetur þeirra var í Koblenz, er þá lá undir kjörfurstann af Trier. Menn undu því illa,

að frakkneskir menn sætu flokkum saman skamt fyrir utan landamæri fósturjarðar sinnar í hefndarhug til hennar. Urðu um það mál langar og harðar umræður, er svo lyktuðu, að þessir frakknesku menn við landamærin skyldu grunaðir um samsæri gegn fósturjörðu þeirra, og sekir vera um landráð, ef þeir sneru eigi heim aftur til Frakklands fyrir árslok, enda skyldu þá allar eigur þeirra upptækar.

Konungur vildi hvorig af lögum þessum samþykkja, en hins vegar skoraði hann á bræður sína, er báðir voru farnir úr landi, að þeir skyldu koma heim aftur og forðast allan samblástur móti ættjörðu þeirra. En þeir gáfu því engan gaum, nè heldur aðalsmenn þeir, er flokk þeirra fyltu, og, það sem lakara var, allur þorri manna í París grunaði konúnginn um, að hugur hefði eigi fylgt máli, er hann sendi bræðrum sínum þessa áskorun. Æsingamenn sögðu á félagsfundum og rituðu í blöðunum, að konungur stæði í leynilegu sambandi við útlenda þjóðhöfðingja, og báru ýmsar sakir á hann og hirðmenn hans, þar á meðal það, að hirðin ætlaði sér að svelta í hel borgarlýðinn í París. En ótti fyrir húngursneyð var óbrigðult meðal til þess að æsa lýðinn, enda urðu óspektir í París um þær mundir. Þá tóku þeir, sem ákafastir voru og verst létu, að breyta búningi sínum, bera rauðar húfur og gánga í lángbuxum, en lögðu niður stuttbuxur eða knébuxur, er menn alment höfðu áður haft. Voru þeir því nefndir *Sansculots*.¹

Nú varð það þessu næst aðalatriðið, hvað til ráða skyldi taka gagnvart öðrum þjóðum. Mönnum var kunnugt, að útflutningsmenn gjörðu það þeir kunnu til þess að æsa þær móti Frökkum, og menn vissu, að þær voru til alls búnar. Jafnvel þó hugir manna á löggjafarþinginu væru í mörgu tvískiftir, voru þó þingmenn allir á einu máli um það, að helztu úrræðin væru, að snúast við útlendingum, enda mundi ófriður við þá bezt af öllu eyða innlendum ófriði. Fyrir því skoraði þingið á konúng, að láta nokkuð til sín taka, og tala máli Frakklands skorinort við aðra þjóðhöfðingja. Konungur varð vel við og ritaði hinum þjóðversku höfðingjum í Rínarfylkjunum á þá leið, að hann

1) *Sansculottar* hafa oft verið nefndir „buxnaleysingjar“, en það er eigi rétt, orðið táknar einungis þá, sem eru án stuttbuxna, ekki gánga í stuttbuxum.

segði þeim stríð á hendur, ef þeir létu útflutningsmenn eigi hætta öllum liðsafnaði áður mánuður væri liðinn. Jafnframt þessu sendi Frakkastjórn allmikið lið til landamæra og var Lafayette settur yfir eina af þeim herdeildum. Kjölfurstinn af Trier varð hræddur, er honum komu þessi tíðindi, og fyrirbaud þegar í stað allan liðsafnað í sínu ríki; en um sömu mundir kom bréf frá keisaranum, og í því rituð áminningarorð til Frakka og þeim var ráðið til, að varast Jakobínaflokkinn. Hugðu menn alment, að bréf þetta mundi til orðið af völdum einhvers við hirð Löövíks sextánda, og þess vegna varð það honum til ógagns en hinum til gagns, er grunaðir voru um hollustu.

Vinstri menn fengu þannig algjörð yfirráð, en konungur slakaði til og gjörði þeim það til geðs, að veita nokkrum af ráðgjöfum sínum, er eigi þóttu allsendis þjóðhollir, lausn frá embætti, og kaus aftur aðra í þeirra stað og, að ráði Brissots, af Girondinaflokknum (í marzmánuði 1792). Helztir af þeim nýju ráðgjöfum voru þeir *Dumouriez* hershöfðingi og *Roland*, er varð ráðgjafi innanríkismála. *Dumouriez* var vitur maður, djarfur og virðingagjarn, en nokkuð laus í ráði. Honum tókst um stundarsakir að synda svo milli skers og báru, að bæði konungur og þíngmenn hugðu hann vera vin sinn fullkominn. *Roland* var mesti dugnaðarmaður og vel virður af öllum hinum betri mönnum.

Um þessar mundir dó Leópolð keisari annar (1. dag marzmánaðar 1792), en til ríkis kom *Franz annar*, úngur og óreyndur og gjarnari til ófriðar en fyrirrennari hans hafði verið. Það leið heldur eigi á löngu, áður keisarinn fengi Friðrik Vilhjálm 2., Prússakonung, í lið með sér, og því næst krafði hann af Frökkum, að þeir settu alt í sama horf heima hjá sér, sem verið hafði árið 1789, áður byltingin hófst. Þetta var meira en Frakkar gætu þolað, og fyrir því þóttust þeir til neyddir, að grípa til vopna og verja sæmd sína og hendur. Ráðgjafarnir réðu konungi, að segja keisara stríð á hendur, og það gjörði hann 20. dag aprílmánaðar 1792, en sagt er, að hann hafi tár-felt, er hann ritaði nafn sitt undir þá herboðan. Þannig hófst hinn mikli ófriður, er um mörg ár gekk yfir alla Norðurálfuna.

Frakkar voru lítt búnir undir ófriðinn. Flestallir af hershöfðingjum þeirra og liðsmannaforingjum voru aðalsmenn, og

meiri hluti þeirra stokkinn af landi burt, en hinir, sem eftir voru, höfðu lítið traust á sèr af liðsmönnum og öllum þorra manna í París; það var jafnvel ætlun margra, að þeir sæti á svikráðum við þjóðina. Hin fornu spánsku Niðurlönd (*Belgia*) voru háð Austurríkiskeisara síðan 1714, og undu illa sínum hag, eins og kunnugt er af því, sem áður er sagt. Hugðu því Frakkar, að Belgía mundi auðunnin, ef þeir sendi lið þángað, og var nú svo gjört. En þá tókst svo illa til, að jafnskjótt sem hinar fyrstu hersveitir þeirra voru komnar yfir landamærin og sáu herlið keisarans koma í móti sèr, gaus sá kvittur upp meðal hinna frakknesku liðsmanna, að hær væru svik í tafla, og að foringjar þeirra ætluðu að koma þeim öllum á vald Austurríkismanna. Ekki varð við ráðið. Frakkar lögðu á flóttu og drápu jafnvel nokkra af foringjum sínum. Þessi atburður varð síðustu dagana í aprílmánuði 1792.

Þegar tíðindi þessi spurðust til Parísar, höfðu þau þar hin verstu áhrif á hugi manna; flokkarnir báru sakir hverir á aðra, og margir höfðu fyrir satt, að hirðin og konungur væri í leynilegum samtökum við fíandmenn fósturjarðarinnar. Þess vegna vildu menn eigi að konungur hefði lengur um sig varðlið það, er hann hafði samkvæmt stjórnarskránni, með því að það voru einir saman aðalsmenn og konungsvinir. Var því af ráðið, að leysa það lið undan þeirri þjónustu. Konungur samþyktist það, og var þá öll hans vernd og vörn undir þjóðverðinum komin. En sumum þótti það eigi nægja, því að þeir vissu, að konungur átti sèr marga vini meðal þjóðvarðarmanna, og fyrir því bar hermálaráðgjafinn *Servan* (einn af Girondinaflokknum) það lagafrumvarp upp á þingi, að kveðja skyldi alt að 20,000 manna úr öllu landinu til Parísar; skyldi það lið hafa þar aðsetu og verja þingið og borgina. Meiri hluti þingmanna voru Girondínar, var málið því auðsótt og þingið fêlst á frumvarpið, en konungur neitaði sínu samþykki. Urðu þá ráðgjafaskipti. *Servan* og Róland og þeir, sem þeim fylgdu, gengu úr völdum og litlu síðar Dumouriez. Hann fór norður í land og tók þar við herstjórn.

Mótstöðumenn konungdómsins mögnuðust dag frá degi, þótt þeir væri allólikir sín í millum. Girondínar voru of vel mentaðir menn, og þóttust of góðir til þess, að þeir vildu sjálfir taka

þátt í upphlaupi og hryðjuverkum skrílsins; slíkt þótti þeim vera eins konar neyðarúrræði, er til yrði að grípa að eins til þess, að koma því fram, er gott var og gagnlegt í þeirra augum. Robespierre var of gætinn og kaldlyndur til þess, að honum væri lagið að gjörast beinlínis upphlaupsmaður. En það var Danton og hans menn (*Cordelia-félagið*), sem reistu flokka og komu fótum undir uppreisnir. Þegar skríllinn hljóp upp til handa og fóta og hamaðist um strætin, þá var Danton dillað, en Robespierre dró sig í hlè. Maður hét *Santerre*; hann var ölgerðarmaður og foringi fyrir einni deild þjóðvarðarins í París, óspektarmaður mikill. Hann og ýmsir aðrir æstu lýðinn nú sem oftast, og var af ráðið, að 20. dag júnímánaðar skyldi múgur manns vopnast, ganga síðan fylktu liði á þing og fyrir konúng, og skýra þeim frá því, er þjóðin vildi vera láta. En er menn fengu pata af fyrirætlan þessari, skoruðn þeir á Petíon borgarstjóra, að hafa viðbúnað, svo að eigi yrði af óspektum; en hann hafðist ekki að, því að hann var vinur Girondína, og lét sér eigi miður líka, þótt þingið og konúngur hefðu hitann í haldiinu. Að Petíon hafi verið vel kunnugt um ráðagerð þessa, og eigi verið henni mótfallinn, þykir auðráðið af orðum hans, þá er einhverjir létu sér um munn fara, að við öllu mætti búast. «Hvað hræðizt þér?» — mælti Petíon — «þjóðverðinum mun eigi boðið að skjóta á oss, og Petíon sjálfur verður eflaust við staddur».

Á ákveðnum degi (20. júní) flyktust margar þúsundir vopnaðra manna að þingsalnum, og meiri hluti þjóðvarðarins hafði slegizt í för með þeim. Beiddust fyrirliðar inngöngu í salinn, og að þeim yrði leyft að bera fram bænarskrá þá, er þeir hefðu meðferðis. Á því varð nokkur dráttur; ruddust þeir þá inn í salinn. Þingmenn allir (e. 750 manns) stóðu upp í móti þeim, og forseti setti hattinn á höfuð sér. Þóttust þá hinir skilja, hvað valda mundi, og hörfuðu til dyra. Létu þingmenn sér það líka, og kváðust leyfa þeim inngöngu og málfrið. Bænarskrá sú, er hér ræðir um, lýsir því, hvernig þær alment voru lagðar hjá Frökkum á þeim tímum, því að þær voru hver annari líkar; þar segir meðal annars svo: «þjóðin er við búin; hún bíður einungis eftir yður; hún er undir það búin að beita stórkostlegum meðölum til þess að annari greininni í yfirlýsingu mann-

rèttindanna verði fullnægt, eða með öðrum orðum: *mótsstöðu gegn kúgun*. Óskandi væri, að hinir fáu menn yðar á meðal, er líta annan veg á málin en bæði þér og vèr, vildu eigi lengur svívirða frelsisins land, en snáfa sem fyrst hëðan á burt til Coblenz. Grafizt eftir undirrót alls hins illa, er yfir oss vofir; ef hún hefir upptök sín frá þeim, er framkvæmdarvaldið hafa á hendi, skulum vèr brjóta þá á bak aftur». Í svari sínu sagði forseti beiðendum, að þingið mundi láta sér ant um að gegna skyldu sinni, en vænti þess hins vegar af þeim, að þeir sýndu lögunum hlýðni. Því næst leyfði hann þeim að ganga gegnum salinn. Það var undarleg og þó mikilfengleg sjón, að sjá allan þann manngría — að minsta kosti 30000 — karla og konur, gamla menn og únga, suma í herklæðum og vel vopnaða, suma í alls konar flíkum með barefli og broddstengur, ganga gegnum salinn, sumir sýngu og stigu dans, en þó gjörðu þeir þar engar óspektir. Því næst dreif alt þetta lið til konungshallarinnar (*Tuilori-höllin*) og ruddist þar inn; varð þar alls staðar húsfyllir, jafavel í því herbergi, er konungur var sjálfur í. Konungur gekk í móti þeim og var hinn öruggasti, en hirðmenn hans óttuðust, að hann yrði troðinn undir í mannþrönginni, og settu undir hann bekki úti í gluggaskoti, og þar stóð konungur tvær stundir, og átti tal við gestina. Var þar klišur mikill og kallan og mátti einatt heyra þessi orð endurtekin: «ekkert neitunarvald! enga klerka! enga höfðingja! varnarlið við París!» Maður einn krafði, að þetta yrði þá þegar gjört að lögum. «Hér er hvorki staður nè stund til þess», mælti konungur, «eg skal gjöra alt það, er stjórnarskráin býður». Þetta létu menn sér lynda: «Lifi þjóðin!» æpti múgurinn. «Já!» svaraði Loðvík sextándi, «lifi þjóðin! eg er hennar beztí vinur». «Lát oss þá sjá það!» sagði einhver í hópnum, og rætti konungi rauða húfu á spjóti. Konungur tók í móti og setti húfunu á höfuð sér, því að annað var eigi ráðlegt á slíkum mannfundi. Meðan á þessu stóð komu nokkrir þingmenn í höllina, og þar á meðal Vergniaud, töluðu til mannfjöldans og vildu fá hann til að fara þaðan, en því var engi gaumur gefinn. Seint og síðar meir kom Petion, og þóttist eigi fyr en í þeirri svipan hafa fengið vitneskju um þenna atburð. Petion fékk með mjúkum orðum allan þenna mannsöfnuð til að ganga burt úr höll-

inni að því sinni. En nú hafði borgarskrifllinn fundið greiða götu til þingsins og konungshallarinnar, og Girondínar, er að því höfðu stutt, fengu litlu síðar sjálfir á því að kenna.

Tíðindi þau, sem gjörzt höfðu í París 20. júní, spurðust um allar sveitir og mæltust illa fyrir. Lafayette fanst svo mikið um aðfarir Parísarmanna, að hann brá þegar við, þar sem hann var staddur norður á landamærum, og fór sjálfur til Parísar. Hann skoraði á þingið að það lèti höfða sakir gegn frumkvöðlum óspekta þeirra, er orðið höfðu í höfuðborginni (20. júní), og að flokkur Jakobína, er hrifsað hefði undir sig öll yfirráðin, yrði gjöreyyddur. Forseti kvað þingið mundu fylgja stjórnarskránni af fremsta megni samkvæmt eiðum þeim, er það hefði unnið, og hét góðu um að áskorun hershöfðingjans skyldi nákvæmlega verða prófuð. Eftir það gekk Lafayette fyrir konung og bauð honum liðveizlu sína. Konungur tók honum fállega, og drotning vildi heldur eiga alt á hættu, en að þiggja lið af Lafayette. Hún vissi, að hann unni stjórnarskránni af hug og hjarta; en drotning hataði stjórnarskrána og vildi kollvarpa henni, og helzt með tilstyrk Prússa og Austurríkismanna. Það var því eflaust drotningu mest um að kenna, að ráð Lafayettes voru ekki þegin og liðveizlu hans hafnað. Þjóðvörðurinn, er áður hafði fylgt Lafayette og það dyggilega, var nú orðinn annars hugar, og endalyktin varð sú, að hershöfðinginn sá, að hann gat engu til leiðar komið í París, og hélt því þaðan sem fyrst norður til liðsmanna sinna. Meðan hann dvaldist í París voru Jakobínar, og allir þeir, er steypa vildu konungsvaldinu, hræddir og hlupu í felur, en jafnskjótt sem hann var þaðan á burt, komu þeir aftur í ljós og tóku til sinnar iðju. Það ræður að líkindum, hvernig þeim mönnum hafi verið í geði til Lafayette.

Um þessar mundir þokaðist herlið Prússa og Austurríkismanna að landamærum Frakka. Það var bæði mikið lið og harðsnúið — yfir 80 þúsundir manna — og yfirforingi þess, *Karl Ferdinand Brúnsvíkur hertogi*¹, reyndur að dugnaði. Þóttust Þjóðverjar eiga sigurinn vísan og það því fremur, sem Frakkar voru lítt við búnir slíkri heimsókn. Menn vissu í París, að her bandamanna var á leiðinni, og drotningu var vel kunnugt

1) Nýju sögunnar 3. hefti, bls. 94.

um flestar ráðgjörðir þeirra, enda taldi hún daga og stundir þángað til sá dagur rynni upp, er þeir kæmi til Parísar. Þíngið skoraði á stjórnina, að höfuðborginni yrði sæð fyrir nægum vörnum. Lagði konungur það þá til, að safna skyldi liði um alt ríkið og skyldi því skipað á fastar stöðvar í nánd við Soissonsborg. Það er í norðaustur frá París, miðs vegar milli hennar og landamæra. Þíngið gjörði þann viðauka við tillögu konungs, að lið það, er stefndi til Soissons, skyldi leggja leið sína um París, og á það félst konungur. Nú var komið fram í júlímánuð; flokkar manna komu úr ýmsum áttum, og einkum sunnan úr landi, til Parísar, er deildir Jakobínafélagsins sendu þángað; höfðu mjög valizt til ferðarinnar alls konar óróaseggir og vígamenn. Félagsbræður þeirra í París tóku þeim tveim höndum og höfðu þá í hávegum, því að þeir sáu skjótt, að af slíkum mönnum máttu þeir vænta sér öruggrar fylgdar, þá er til stórræða nokkurra kæmi. En nú var svo komið, að við öllu mátti búast; úlfúðin og hatrið með flokkunum í höfuðborginni fór vaxandi dag frá degi. Menntu fundi með sér jafnt nætur sem daga, svo var ákafinn mikill. Þá fundi sóttu einkum þeir sem illgjarnastir voru og óspakastir, en hinir gæflyndari menn drógu sig í hlè, sumir af ótta, sumir af gremju, sumir af því, að þeir hvorki vildu nè gátu vanrækt atvinnu sína. Þegar nú eitthvað var af ráðið á mannfundum þessum, var það jafnan borið fram á löggjafarþínginu, og flest af því samþykkt, því að varla mátti heita, að þíngið hefði lengur frjálsar hendur. Flokkar æsingamanna voru orðnir svo stórum magnaðir. En hvað var þessum ákafa- og æsingamönnum ríkast í skapi? Þeir vildu fyrst og fremst kollvarpa konungdóminum, því næst eyða öllum sínum mótstöðumönnum innanlands, og að því búnu halda til landamæranna og reka af höndum sér útlenda óvini. Robespierre og hans fylgismenn létu það jafnan í veðri vaka, að hinir innlendu fjandmenn væru miklu skæðari en hinir útlendu.

Ofan á allt það, sem á gekk í París, bættist það nú þessu næst, að þángað barst skjál eitt, samið að sögn af frakkneskum útflutningsmönnum og dagsett í Coblenz 25. dag júlímánaðar 1792, en undirskrifað af hertoganum af Brúnsvík. Í skjali þessu lýsti hertoginn meðal annars yfir því, að hann væri eigi sendur til þess að leggja undir sig bygðir og borgir á Frakklandi, held-

ur til hins, að eyða óstjórn þeirri, er nú ætti sér stað þar í landi, og koma þar aftur á fastan fót konungsvaldi, eins og verið hefði að undanfögnu. Ef Frakkar veittu nokkra mótstöðu, yrði farið með þá sem upphlaupsmenn, en þing og þjóðvörður og yfirvöld í París skyldi ábyrgjast, að konungi væri engin hættu búin. En færi svo, að hann eða ættmenn hans yrði fyrir nokkrum óskunda, skyldu þeir, sem sekir fyndust í þeim glæp, sæta hinn grimmustu hegningu, en Parísarborg rifin til grunna, svo að eigi stæði þar steinn yfir steini.

Slíkur boðskapur sem þessi var einungis til þess, að gjöra vont verra og skaða þann, er hann skyldi gagna. Því að nú þóttust menn sannfærðir um, að konungur og hirð hans væri í samráðum og vitorði með hinum útlendu óvinum. Konungur leitaði reyndar við, að breinsa sig fyrir þinginu af allri hlutdeild í þessari yfirlýsingu hertogans, en því var ekki lengur trúð, sem konungur sagði. Menntu hétu hverjir öðrum að grípa til vopna, og verjast árásum útlendinganna, og í annan stað þótti nauðsyn til bera, að reka konung frá völdum, enda var ákveðið að gjöra honum aðför nóttina milli hins 9. og 10. ágústmánaðar. Jakobínar höfðu sett nefnd manna til þess að standa fyrir aðförinni. Petion borgarstjóri vissi fyrirætlan manna, en af því að hann var þeim að mestu leyti samþykkur, gjörði hann ekkert til að afstýra henni. *Danton, Camille Desmoulins* og *Santenne* gjörðust helztu forgöngumenn uppreistarinnar, en Robespierre og Marat komu hvergi nærri. Aðfaranótt hins 10. ágústmánaðar kváðu klukkur við um alla Parísarborg. Höldu þá uppreistarmenn flokkum saman til konungshallarinnar og ruddust þar inn. Konungur flýði og drotning hans og börn og leitaðu ásjar þingmanna, en varðmenn í höllinni, er nokkra vörn sýndu, voru allir drepnir; voru flestir þeirra Svisslendingar og sagðir vaskir menn, en hér voru þeir helzt til fálíðsátt móti slíku ofurefli, er að sótti. Meðan þetta gjörðist í höllinni, sem nú var sagt, höfðu aðrir af upphlaupsmönnum rekið embættismenn borgarinnar úr völdum, og sett aðra af sínum flokki í þeirra stað. Og þegar nú sigurinn var unninn og konungshöllin í þeirra valdi, hélt manngrúinn og þessir nýju valdsmenn (*bæjarráðið*) til þinghússins og kröfðu þess, að konungur væri þegar í stað svíftur völdum, en þjóðinni fengin öll yfirráð í hendur. Þing-

mennt sáu, að þeir gátu eigi lengur við ráðið, straumur byltíngarinnar var vaxinn þeim yfir höfuð, og kváðu þeir svo á: að konungsvaldið væri af numið um stundarsakir, en kveðja skyldi menn að nýju til *þjóðarþings*, er gjöra ætti út um stjórnarskipun Frakklands. Meðan þetta fór fram, sat konungur í litlu herbergi áföstu við þingsalinn, og drotning hans og börn, og þó þeim væri óhætt á lífi og limum, áttu þau þar samt illa búð og máttu heyra þar mörg skapraunarorð. Ráðgjafarnir voru settir í varðhald, en aðrir menn skipaðir í þeirra stað; var Danton einn af þeim, og gjörðist hann nú dómsmálastjóri ríkisins. Sauterre var skipaður foringi fyrir öllu þjóðvarðarliðinu. Bæjarráðið í París hafði þar alla hina æztu stjórn, og í því sátu þeir Marat og Robespierre. Má af þessu sjá, að Jakobínar réðu nú einir öllu í borginni, en þingið var aflvana og varð að samþykkja allt, sem hinir vildu vera láta. Þessu næst voru sendir menn víðs vegar út um landið, til þess að skýra þjóðinni frá því, er gjörzt hefði í París og snúa öllum til hlýðni og hollustu við hina nýju stjórnendur. Landslýðurinn var orðinn fráhverfur hinni fyrri stjórn, þótti vel sem var, að hún var undir lók liðin, og gjörði sér von um, að breytt mundi til batnaðar við umskifti þau, er nú voru orðin. Þess vegna sætti allur þorri manna sig við þau; alls staðar hjuggust menn til varnar móti útlendingunum, og ættjarðarástin eyddi um stundarsakir sundurlyndi og flokkadráttum í landinu.

Lafayette einn vildi fyrir engan mun þola yfirráð Jakobínaflokksins, Hann var með hersveitum sínum norður við Sedan skamt frá landamærum, er honum bárust tíðindin frá París. Hann vildi, eins og kunnugt er, hafa takmarkaða konungsstjórn, og halda fast við þá stjórnarskrá, sem samþykkt hafði verið árið áður (1791), og hann hafði svarið að halda. Byltíngu þá, sem orðið hafði 10. ágúst, kvað hann með öllu ólögmæta, og engum skylt að hlýðnast þeirri stjórn, sem þá hefði brotist til valda með lögleysu einni og ofríki. Þess vegna lét hann taka þá erindreka hinnar nýju stjórnar, er til hans voru sendir, og setja í varðhald, en foringja þá og liðsmenn, er undir hann voru gefnir, lét hann endurnýja þá eiða, er þeir höfðu áður unnið stjórnarskránni. Dumouriez var fyrir hersveit einni þar nyrðra og undir yfirstjórn Lafayettes. Honum var hvorki ant um kon-

únginn eða stjórnarskrána; hann þóttist sjá að þau voru á förum, en hitt mundi ráðlegra, að styggja sem minst hina nýju stjórnendur; þess vegna vildi Dumouriez ekki vinna eiðinn eða hans flokkur. Eins og nú var komið málum, var Lafayette í miklum vanda staddur: annars vegar útlendir fjandmenn með ofurefli liðs við landamærin, en hins vegar innlendir ofríkismenn, komnir til æztu valda, er nú höfðu af ráðið að taka af honum herstjórn og draga hann fyrir lög og dóm. Hann vildi eigi byrja borgarastrið, enda óvíst hvort liðið vildi fylgja honum. Hann sá, að hann gat ekki lengur unnið fósturjörðu sinni það gagn er hann vildi, Hann tók það ráðs, að hann skipaði fyrir hvað gjöra skyldi, ef óvinaherinn gjörði atlögu, og hélt síðan felaus að mestu og við fáa menn út yfir landamærin til Belgíu, og þaðan ætlaði hann til Englands. En er hann var skamt eitt kominn, urðu fyrir honum austurríkskir varðmenn, er tóku hann og förunauta hans höndum, hvað sem hann sagði. Eftir það sat hann á ýmsum stöðum í varðhaldi Prússa hálfri þriðja ár, þángað til friður var gjörður milli þeirra og Frakka (1795), þá seldu Prússar hann Austurríkismönnum í hendur, og þar sat hann í dýflissu og var þá einatt harðlega haldinn til 1797, þá var Napóleon kominn til sögunnar og hafði barið á þeim og heimtað, að þeir létu Lafayette lausan; þorðu þeir þá eigi annað en gjöra sem Napóleon vildi.

Þegar Lafayette var flúinn af landi burt, mætti stjórnarbyltíngin því nær engri mótstöðu. Dumouriez hafði sagt og sýnt í verki, að hann viðurkendi hina nýju stjórn, enda fékk hún honum þegar í hendur yfirstjórn alls þess liðs, er Lafayette hafði stýrt. Sum staðar neituðu reyndar herforingjar yfirráðum stjórnarinnar, en þeim var óðara vikið frá völdum. Þannig gat stjórnin treyst herliðinu og að því leyti þóttist hún óhult. En jafnvel þó Jakobínaflokkurinn hefði fengið sitt fram, og væri orðinn yfirsterkari síðan 10. ágúst, voru þó hinir margir, er þá höfðu orðið að lúta og þóttust eiga um sárt að binda. Allir þeir menn — og til þeirra töldust þeir, er haldið höfðu fram konúngsvaldinu, höfðingjar, óeiðsvarnir klerkar, ýmsir ríkir menn o. s. frv., — allir þeir voru næsta tortryggilegir í augum Jakobína, af þeim þóttust þeir eiga ófriðinn vísan, hvenær sem þeir sæi sér fært, og þess vegna væri nauðsynlegt að uppræta

þá með öllu, eins og ráða má af orðum Dantons. Hann sagði einhverju sinni: „Það dugar ekki að gjöra sèr rángar hugmyndir um stöðu þá, er vèr komumst í 10. ágúst. Sá dagur skifti oss í tvær sveitir, lýðveldismenn og konungsmenn, hinir fyrri eru fáir, hinir síðari því fleiri. Meðan þetta stendur, göngum vèr lýðveldismenn millum tveggja elda, óvinanna að utan, konungsmanna að innan. Þessir konúngssinnar hafa sína yfirstjórn í París, þó í leyndi sè, er stendur í sambandi og viðskiftum við hersveitir Prússa. Að segja yður hvar þeir eiga fundi sína, eða hverjir þeir eru, geta ráðgjafarnir með engu móti. En til þess, að trufla slíka menn, og banna þeim öll viðskifti við útlendingana, sem oss eru svo skaðvænleg, þá verðum vèr að skjóta þessum konungsmönnum skelk í bríngu. Eg tek það upp aftur: vèr verðum að skjóta þeim skelk í bríngu“. Sumum er þetta heyrðu, var það þá, ef til vill, eigi fullljóst, er Danton bjó helzt í huga, en Marat og hans fylgismenn skildu það eins og þeim var næst skapi. Skríllinn, hinn órsnaði skríll, hafði unnið sigur á auðmönnum og vildi nú neyta sigursins. „Einúngis sá, sem ekkert á, er ráðvandur, vitur og fær um að stjórna öðrum“, sagði Robespierre. Marat talaði eigi um annað en að hefna sín á auðmönnum, er svo lengi hefðu sogið merg þjóðarinnar, og kvað réttast að drepa þá alla án dóms og laga. Þessu næst hófust nú rannsóknir og ofsóknir bæði í París og annars staðar gegn öllum þeim, er grunaðir voru um hollustu. Menn voru teknir þúsundum saman af öllum stöttum og á öllum aldri og settir í dýflissur; dómendur máttu engan dóm dæma öðruvísi en ofríkismennirnir vildu; allt prentfrelsi var undirokað; sèrhvert blað, er lagði konúngdóminum eitthvert líknaryrði, var gjört upp-tækt, og Marat ruplaði og rænti prentsmiðjur þeirra. Aldrei hafði ofríki og harðstjórn, meðan einveldið stóð, komizt jafnlángt sem nú, og þó báru þessir menn „frelsi“ og „jafnrètti“ og „einveldi þjóðarinnar“ öllum stundum á vörum sèr; en í þeirra augum var „þjóðin“ að eins nokkrar þúsundir upphlaupsmanna, er kollvarpað höfðu lögum og landestjórn.

Löggjafarþíngið hafði ætlazt svo til, að konúngur og skulda-lið hans fengi höll eina sæmilega til íbúðar, en bæjarráðið heimt-aði með hörðu, að hann yrði settur í varðhald, þar sem hægt væri að hafa gætur á honum. Þíngið varð að láta undan, og

herinn í nánd við borgina *St. Menchould*, en einn af hans helztu herforingjum, *Kellermann*, tók sér stöðvar með sínar sveitir á hæðum þeim, er kendar eru við *Valmy*-þorp. Þángað komu Prússar 20. dag septembermánaðar (1792), og réðu þegar á Frakka. *Kellermann* tók vasklega í móti, en *Dumouriez* sendi honum lið til hjálpar eftir því sem við þurfti. Undir kvöld lyktaði orustan og létu Prússar þá undan síga. Þetta var orustan við *Valmy*, og hafði hún þau áhrif á Frakka, að þeim óx hugur og traust á sjálfum sér, en Prússar og margar þjóðir með þeim komust nú að raun um, að hinir frakknesku útflutningsmenn (*Emigranter*) höfðu eigi haft satt að mæla, er þeir létu sér um munn fara, að Frakkar hefðu eigi undir vopnum aðra menn en „skraddara og skósmiði“. Eftir þessa orustu varð fát til tíðinda með Prússum og Frökkum. Hvorirtveggja sátu um hríð þar sem komnir voru og hvorugir réðu á aðra. Dagar styttust, veður fór versnandi, sótt kom upp í liði Prússa og loks sá hertoginn eigi annað ráð vænna en að halda burt af Frakklandi. Menn höfðu gjört sér miklar vonir um framgöngu og afreksverk Prússa og talið það víst, að þeir mundu kúga óstjórn alla á Frakklandi, og kippa þar aftur konúngsvaldinu í liðinn. En reyndin varð hér öll önnur. Prússar hörfuðu undan illa til reika, mistu mikið fê og létu margt manna, og höfðu af hina mestu skapraun, en Frakkar þóttu meiri menn eftir en áður. Nú áttu Frakkar um sama leyti ófriði að gegna annars staðar. Austurríkismenn héldu liði sínu frá Belgíu inn á Frakkland og settust um *Lille*. Það er mikil borg og ramlega víggirt norður við landamæri vestarlega. Sóttu þeir borgina af mikilli ákefð, en urðu frá að hverfa við svo búíð. Hinn frakkneski hershöfðingi *Custine* fór herskildi yfir ýms hêrð þjóðverskra höfðingja fram með Rínfljóti. Hann tók *Mainz*, hina sterku kastalaborg því nær orustulaust, og lét eigi þar við lenda, heldur fór hann austur yfir Rín og náði *Frankfurt* við *Main*, ekki fyrir þá sök, að sú borg væri óvinveitt Frökkum, heldur hins vegna, að hún var vellauðug og þar var gott til fêfanga.. Frakkar gátu þó eigi haldizt við fyrir austan ána, og urðu að láta sér nægja þær sveitir, er þeir lögðu undir sig fyrir vestan hana. Þetta hið sama haust unnu þeir einnig *Savoyen* og *Nizza* frá Sardiníu konúngi. *Dumouriez* var heldur eigi aðgjörðalaus um þessar

mundir. Litlu síðar en viðskiftum hans var lokið við Prússa, hélt hann norður á Belgíu með rúmar 40 þúsundir manna. Þar voru Austurríkismenn fyrir — þeir höfðu yfirráð yfir landinu — og höfðu búið fyrir hjá þorpi einu, er *Jemmappes* heitir. Þar ræð Dumouriez á þá (6. nóv. 1792), þótt eigi væri árennilegt. Þar varð orusta hörð og löng, áður Austurríkismenn létu undan síga, en Frakkar unnu sigur. Þar var einn úngur maður í liði Frakka, sonur hertogans af Orleans (*Égalité*), er gekk svo vel fram, að sigurinn var honum að miklu leyti að þakka. Sá úngi maður varð löngu síðar konungur Frakka (frá 1830 til 1848) og er nefndur Lodvík Filippus. Eftir þenna sigur vann Dumouriez alla Belgíu. Ófriðurinn 1792 byrjaði á því, að Prússar brutust inn á Frakkland, en endaði þannig, að Frakkar ráku þá af höndum sér, og lögðu undir sig Savoyen, Nizza, Belgíu og meiri hluta þjóðverskra landa fyrir vestan Rín. Það sem að nokkru leyti gjörði Frökkum sigurinn auðveldari var, að allar þær þjóðir, sem þeir þá unnu, lifðu við harðstjórn og ófrelsi. Frakkar létu alls staðar það boð út ganga, að þeir væri komnir til þess, að leysa menn undan þeirri harðstjórn og veita þeim frelsi og alla góða hluti með því, enda breyttu Frakkar þá þegar hjá þeim lögum þeirra og landstjórn og skipuðu öllu fyrir á sama hátt, sem þá var orðið hjá sjálfum þeim heima á Frakklandi. Upp frá þessu tók hin frakkneska stjórnarbyltíng að hafa mikil áhrif á aðrar þjóðir og þeirra málefni.

III. Þjóðþingið (*National-Conventet*).

(frá 21. sept. 1792 til 28. oktobr. 1795).

Þjóðþingið var sett 21. september 1792. Tala þingmanna var nálægt 750, eins og verið hafði á löggjafarþinginu. *Petion* var kjörinn forseti því nær í einu hljóði. Nú var svo komið, að þeir, sem halda vildu í takmarkað konungsveldi, og verið nefnadir «vinstri menn» á frumlagarþinginu, en «hægri menn» á löggjafarþinginu, þeir voru nú horfnir. Nú voru *Girondínar* orðnir «hægri menn» þjóðþingsins, þar sem þeir höfðu verið «vinstri menn» löggjafarþingsins. Þeir höfðu verið í Jakobínafélaginu og fylgt því fram, að konungsvaldið yrði af numið. En eftir upphlupið, sem varð 10. ágúst, og eftir manndrápin miklu í september mánuði, fór Girondínum ekki að lítast á

blikuna, og þótti ofsi og grimd skrifsmis keyra langt úr hófi. Girondínar vildu láta hér staðar nema, og koma á fót lýðveldi (*Republik*) byggðu á lögbundna frelsi og réttlæti. Margir af þeirra flokki voru vel máli farnir og beittu mælskunni óspart gegn mótstöðumönnum sínum á þínginu, og báru þar einatt hærra hlut frá borði, en þó þeir fengi sigur í þingsalnum, kunnu þeir ekki með sigurinn að fara; þá vantaði fyrirliða og fast skipulag sín á millum; þá er til framkvæmda skyldi koma. Þess vegna gátu þeir ekki yfirbugað mótstöðumenn sína, heldur einungis egnit þá og æst til haturs og hefnda. Var Girondínunum af þessu öllu því meiri hætta búin, sem þeir áttu þeim mönnum að mæta, er eigi létu sér neitt fyrir brjósti brenna og svífðust einskis illa, er því var að skifta. Utan þings stóðu ráðgjafarnir með Girondínunum, enda var Danton genginn úr ráðgjafasessi, eftir að hann var kjörinn til þjóðþingis.

„Vinstri menn“ á þjóðþínginu (eða „*fjallid*“ sem þeir alment eru nefndir) voru vart 50 að tólu, eins og Girondínar, fyrst þegar þingið var sett, en þeirra flokkur var fastur fyrir, allir sem einn maður, harðnúnir og þrautseigir. Þeir vildu með engu móti láta lenda við það sem komið var; þeir vildu halda stjórnarbyltíngunni áframt, og það vægðarlaust, brjóta það alt niður og breyta því öllu, sem verið hafði á undan, og þeir voru einráðnir í því, að láta engar mótspyrnar aftra sér, heldur yfirstíga þær allar, og ná undir sig og sína fylgismenn öllum yfirráðum utan þings og innan. Með þessum „vinstri manna“ flokki stóð bæjarráðið í París, félögin, sem fyr eru nefnd, og allur borgarskriflinn. Jakóbínafélagið magnaðist dag frá degi; á fundum félagsins voru ráðin lögð til alls þess, er jafnóðum var framkvæmt í verki, eða, að minsta kosti reynt til að framkvæma; frá félagi þessu rann öll sú illa alda, er þau árin gekk yfir land og lýð. Smámsaman gengu Girondínar úr félaginu, eða voru gjörðir rækir þaðan, en í þeirra stað gengu aðrir þíngmenn í félagið og fylltu þann flokk. Brissot var hinn fyrsti, er rekinn var úr félaginu, enda var hann hataður af Robespierre, en mikils metinn af öllum Girondínunum. Meiri hluti þíngmanna fylgdi hvorki Girondína- eða „*fjall*“-flokknum, en fóru sér, og voru nefndir „*sléttan*“ eða „*mýrin*“. Samir þeirra voru kjarklausir menn, er vantaði þor og þrek til að kveða það upp, er

þeim bjó í brjósti, vildu helst «að sín væri hvergi við getið», en gættu þó hins, að ganga jafnan í þann flokkinn, sem yfirsterkari varð; sumir vildu horigum fylgja, en fóru eftir sinni sannfæringu og mislíkaði margt í fari beggja flokkanna, bæði «vinstrí manna» og «hægri». Fyrst framan af þingtímanum hneigðist allur þorri þessara manna þó öllu fremur að Girondínunum, en að hinum, og ef Girondínar og ráðgjafarnir með þeim hefði þá sýnt meiri rögg af sér, telja menn miklar líkur til þess, að þeir hefði náð yfirráðum í sínar hendur, en Jakobínar orðið undir, og allt komið í annað horf. Jakobínar voru þá jafnvel allameikar um sig; hvorki þeir né bæjarráðið vildu hafa ábyrgð af september-vígumunum, og Danton sjálfur vildi koma á sátt og samlyndi. Hann var á sama máli sem Girondínar um það, að öllum innanlands ofsóknum og manndrápum ætti að linna meðal Frakka, en í þess stað ætti þeir að snúast við útlendingum, og berjast við þá af alefli. Danton kaus heldur að eiga félagskap við Vergniaud og hans líka, en við Marat og aðrar eins ófreskjur. En Girondínar vildu hafa sem minnst saman við Danton að selda —, þeim stóðu september-vígin fyrir hugskots-sjónum. En þar mistu þeir góðan höfðsmann, sem Danton var.

Þegar á fyrsta fundi þingsins var það tekið í lög, að konungdómur skyldi numinn úr gildi á Frakklandi, og næsti dagur þar á eftir, eður 22. september, varð þannig *fyrsti dagur í fyrsta dri lýðveldisins*. Þenna dag var einnig leidd í lög sú tillaga Dantons, að kjósa skyldi um allt ríkið nýja valdameðmenn og nýja dómendur í stað hinna, er þá höfðu þau embætti á hendi, og að ekki þyrfti lengur lögfróða menn til þess að gegna dómaraættum. Einn af þingmönnum, er *Billaud Varenne* hét, bar jafnvel þá tillögu fram, að aftaka skyldi alla dóma; það var sami maðurinn, sem fyrstur kom upp með það, að breyta tímatalinu.

Litlu eftir þetta skýrði Roland, innanríkisráðgjafinn, þinginu frá því, hvernig hagur landsins og höfuðborgarinnar stæði. Lýsingin var allt annað en glæsileg. Hann fór þingum orðum um alla þá óstjórn, sem ætti sér stað í París, og gengi þaðan út um landið; hann bentu á orsakirnar til þeirrar óstjórnar og jafnframt á hitt, hver ráð myndu líklegust til bóta. Ýmsir meðal þingmanua tóku í sama strenginn, og sögðu svo meðal ann-

ars: „Það er í París, að allur þessi ófagnaður hefir sín upptök, og þaðan dreifist hann út um landið. Á húsveggjum höfuðborgarinnar má víða sjá og lesa skjöl, er eggja menn á að myrða, brenna og ræna, þar eru og þeir menn til greindir — og þeirra tala fer dagvaxandi — er fyrir slíkri heimsókn eiga að verða. Það er ekki stjórnleysið eitt, er þessu veldur, það eru nýir harðstjórar, er nú vilja brjótast til valda á meðal vor, sem varla megum lausir heita undan harðstjórninni. Hvernig getur Frakkland gjört sér von um stjórnarbót, meðan þingið, er á að semja og samþykkja hana, hefir morðvopnin yfir höfði sér? Sæmd stjórnarbyltíngarinnar krefur þess, að slíkar aðfarir verði stöðvaðar, og að gjörður sé greinarmunur á karlmensku þeirri, er kúgaði harðstjórnina 10. ágúst, og þeirri grimd, er annan og 3. september hlýddi í blindni harðstjórnarvaldi því, er í myrkrunum læðist“. Samkvæmt þessu gáfu Girondínar það ráð, að sett væri nefnd til þess að semja lög gegn þeim mönnum, er æstu til manndrápa og rána, og að þeirri nefnd yrði einnig falið á hendur að leggja ráðin á til þess, að þingið hefði nægilegt lið (þinglið) fyrir hendi, hve nær sem til þyrfti að taka. Þingið fêlst á þessar tillögur, en út af þeim spunnust miklar deilur milli þingflokka. Menn brugðu Robespierre um, að hann væri sá, er sækti eftir einveldinu, en gátu þó eigi fært sönnur á sitt mál, og gáfu honum einúngis tækifæri til að halda lofræðu yfir sjálfum sér og héra sakir á mótstöðumenn sína, þar á meðal þá, að þeir (Girondínar) vildu sundra Frakklandi, og koma þar á fylkjastjórn, eða bandafylkjum, eins og í Norður-ameríku. Á þessu þingþrefi stóð lengi, nauðsynjamálum, sem alla þjóðina varðaði um, var vísað til nefnda (t. d. um stjórnarskrána, hermálefni, fjárhaginn, o. fl.). Tillaga Girondína um þingliðið mætti svo mikilli mótspyrnu í París, að hún varð að engu. Bæjarráðið í París var, eins og menn muna, ólöglega til orðið, og var illa þokkað af flestum, þess vegna skipaði þingið, að nú skyldi að nýju kjósa menn í bæjarrád, og svo var loksins gjört, en það varð til lítilla bóta, og fór á sömu leið sem fyr, að margir af Jakobínaflokki náðu þar aftur sæti, þar á meðal *Hébert*, nafnkendur stórglæpamaður.

Um þessar mundir varð sú breyting meðal ráðgjafanna, að hermálastjórinn Servan gekk úr völdum, en í hans stað kom sá

maður, er *l'ache* hét. Óðara en hann var seztur að völdum, gjörðist hann mesti vinur Jakobínaflokksins, og hafði það mikil og ill áhrif á herinn og alla hermálastjórn. Margir misjafnir menn komust til upphéðar og valda, og því fè, sem hermálaráðgjafinn hafði yfir að ráða, var miklu fremur varið í þarfir Parísarskrílsins en til nauðsynlegra útgjalda herliðsins. Þegar liðsmenn skorti það, er hafa þurfti, var sagt, að þeir gætu tekið það í þeim löndum, er þeir hefði leyst undan harðstjórnarvaldi, og að því rak oft og einatt; en slíkt var beinlínis til þess að brjóta niður allan hermánnaaga.

Meðan þessu fór fram, er nú hefir verið sagt, sat konungur og fólk hans í varðhaldi. Bæjarráðið setti menn til að geyma þeirra, og valdi jafnan til þess þá eina, er skorti mannúð og mentun, og eftir því fór þá öll viðgjörð við þessa fanga; en þeir báru harm sinn í hljóði, vorðu tímanum vel og styttu sér þannig stundir. Nefnd sú, er falið var á hendur að rannsaka bréfasöfn konungs, skýrði svo frá, að konungur hefði gengið í samband og samsæri með útlendingum móti Frakklandi, og fyrir því væri hann ekki lengur friðhelgur. Komu því næst til umræðu þessar spurningar: Getur Loðvík 16. orðið dæmdur? og hverjir dómendur eiga að dæma hann? Hinir gæflyndari menn meðal þíngmanna sögðu, að nóg væri að gjört, og konungur hefði fengið sín gjöld, er hann hefði verið sviftur völdum, og þess vegna gæti ekki orðið umtalsmál að dæma hann; annað mál væri það, að hafa hann í varðhaldi þangað til friður kæmist á, og reka hann þá af landi burt. Hinn 10. ágúst — sögðu þeir — var útgjört um Loðvík sextánda; hinn 10. ágúst hætti hann að vera konungur; hinn 10. ágúst var hann ákærður, dæmdur og settur frá völdum, og þannig er öllum viðskiftum lokið milli hans og þjóðarinnar. Þetta vildu ákafamennirnir með engu móti láta sér nægja, þeir vildu taka konung af lífi þá þegar, og það án dóms og laga. Eitt úngmennir þar á þíngi, *Saint Just* að nafni, ofstopamaður mikill og orðhvatur, sagði meðal annars: «þér sveitizt yfir því, að grafast eftir *règlum*, er þér getið fylgt, þá er dæma skal konúnginn. Þér streitizt við að gjöra hann að borgara, og hefja hann til þeirrar tignar, til þess að geta brugðið fyrir yður *lögum* og beitt þeim gegn honum. Eg fyrir mitt leyti segi þvert á móti, að konungur sé

alls eigi borgari, heldur fjandmaður vor, og sem fjandmann eigum vèr að dæma hann . . . Jafnvel það «að stjórna», er í sjálfu sér hegningarverð tilraun, það er ofríki, sem engi bót verður mælt, þær þjóðir sem láta slíkt við gangast, eru hegningarverðar; menn geta eigi stjórnað án þess að gjöra sig seka í glæp . . . Menn eru hér að tala um reglur og réttarfar, en slíkt er hræsni einber og fagurgali. Hve nær sem það hefir átt sér stað, að þjóðir hafi hefnt sín á konúngum, þá var það ekki réttarfarsreglur og málafaras, sem réttlætti aðgjörðir þeirra, heldur sá réttur, er þær höfðu til þess að beita valdi á móti valdi. Þeir tímar munu koma, að það mun þykja furðu gegna, að menn skuli eigi vera komnir eins langt á 18. öldinni, eins og þeir voru á dögum Cæsars. Þá reðu menn harðstjóranum bana í öldungaráðinu, og beittu eigi öðrum réttarfarsreglum en 23 sárum, og eigi öðrum lögum en frelsi Rómaborgar. En á vorum dögum eru menn með mestu virktum og viðhöfn að höfða sök á hendur þeim manni, sem verið hefir morðingi þjóðarinnar, og er staðinn að verkinu». Í sömu stefnu töluðu ýmsir fleiri af fylgismönnum Robespierre. En hins vegar lögðu aðrir þingmenn það til, að höfðuð væri sök á hendur konúngi, og síðan skyldi þingið dæma mál hans. Um þetta leyti fundu menn í löyni-hirzlu einni í konúngshöllinni ýms skjöl, er þóttu sanna sakir þær, er menn báru á konúng; enda sýndu þau, að hann hafði staðið í bréfaviðskiftum við ýmsa menn, bæði þá er af landi flúðu, og þá, er á þingi sátu, þar á meðal við Mirabeau. Urðu Jakobínar þá svo reiðir, að þeir vildu þegar í stað flytja líkkistu Mirabeaus burtu úr Pantheon¹, og brjóta marmaramynd hans; þó férst það fyrir í það sinni.

Þá var það eitt, er olli mönnum mikilli áhyggju, og varð að miklu ágreiningsefni meðal þingmanna. Það bárust frétnir úr ýmsum hærðum landsins, að víða væri skortur á matvælu, og það svo mjög, að til næstu vaandræða hefði. Það var reyndar ekki kornskortur það ár (1792); að vísu hafði veðráttan verið stíð og mannafla vantað til kornyrkjunnar, en aðalorsökin var

1) Kirkju hinnar heilögu Genovevu í París var á dögum frumlagapingsins breytt, og kveðið svo á, að þar skyldu vera legstaðir helztu afdragðsmanna þjóðarinnar, þá var og nafni kirkjunnar breytt og nefnd Pantheon.

þó sú, að eigendur þorðu eigi að senda korn sitt til markaða sökum stigamanna á þjóðvegum, og misþyrminga þegar á markaðinn var komið; kusu menn svo heldur, að sitja inni með óselda vöru en eiga lítt á hættu. Nú vildu þeir, sem verst létu af Jakobínaflokknum, láta kúga korneigendur til þess að senda kornið til markaða, og selja það fyrir ákveðið verð; kornpúkar þessir væru — sögðu þeir — förnir harðstjórar. Í nýrri mynd, og öll þörf á að taka sem fyrst af þeim ráðin. En meiri hluti þíngmanna hélt því fast fram, að eignarrétturinn ætti að vera friðhelgur, og verzlunin frjáls manna í málum, en það væri lögleysa sú, sem viðgengist í landinn, er væri aðalorsökin til neyðar þeirrar og umkvörtunar, er nú ætti sér stað. Robespierre greip tækifærið til þess að gefa konungi sök á þessu sem öðru, er ábótavant þótti. „Drepið harðstjóran!“ mælti hann, „og verð fáum aptur frið og spekt.“ Þessi orð þóttu dýrmæt, og voru endurtekin um alla borgina; samir kröfðu þess, að konungur og dróttning hans yrðu tekið af lífi, aðrir, að hann yrði dæmdur þegar í stað. Girndánum þótti mikið vandast málið; þeim reis hugur við að eiga þátt í slíkum stórræðum, og vildu bjarga lífi konungs, en hins vegar var auðvitað, að þeim sjálfum var háski búinn, ef þeir yrðu grunaðir um vináttu við konung. Þess vegna reyndu þeir til að draga mál þetta sem lengst, og eftir tillögu Petions var með miklum atkvæðafjölda af ráðið, að höfða mál móti Lódvíki sextánda, og, að þingið skyldi dæma hann.

Nesnd manna, er til þess var kjörin, settá saman á eitt skjal öll þau afbrót, er konungur hefði átt að drýgja gegn þjóðinni. Þar var honum meðal annars kent um mannfall það, er varð 10. ágúst; en einhver hin helzta og þýngsta sakargift var þó samband það talið, er hann hefði verið í við útlenda þjóðhöfðingja. Ákveðið var, að konungur skyldi mæta á þjóðþingi 11. desember til þess að standa fyrir máli sínu. Þegar sá dagur kom, var konungur fæddur á þíng, en strætán, þar sem leið hans lá um alskipuð hermannaafyrkingum. Ákæran var lesin í heyranda hljóði frá upphafi til enda, og eftir því sem hverri grein var lokið, spurði forseti: „hverju svarið þér til þessa?“. Konungur svaraði vel og stíllilega, neitaði mörgu, gaf ráðgjöfum sínum sök á sumu, og bar jafnan fyrir sig stjórnarskrána,

er hann kvaðst aldrei hafa brotið á móti. Að lyktum beiddist hann þess, að hann mætti kjósa mann sér til aðstoðar í málsvörninni. Því næst var konungur fluttur aftur í fángelsið, en eigi var honum leyft að sjá konu sína eða börn meðan á máli hans stóð. Harðar deilur urðu um það á þingi, hvort leyfa skyldi konungi frekari málsvörn en komið var. Jakobínar settu þar þvert nei fyrir, en hinir urðu yfirsterkari, er leyfa vildu. Konungi var sagt það. Hann kaus þann mann, er *Tronchet* hét, nafnfrægan lögfræðing. Um sama leyti kom bréf til forseta þingsins frá sjötugum manni, er *Malsherbès* hét. Hann hafði verið samverkamaður Turgots og vinur hans, og hafði á sér almenningsorð sakir vitsmuna sinna og mannkosta, í bréfinu sagði svo: „Eg hef tvisvar verið kvaddur til ráðaneytis af þeim manni, er eitt sinn var húsbóndi minn og færri fengu að þjóna en vildu. Eg finn mér skylt að veita honum þá sömu þjónustu nú, þótt flestum þyki hún hættuleg“. Boð hans var þegið; en úngum manni og málsnjöllum, *Desèze* að nafni, var falið á hendur að orðfæra vörnina og bera hana fram á þinginu. Konungur mætti aftur á þingi 26. dag desembermánaðar, og *Desèze* flutti þá varnarræðu sína fyrir hann af hinni mesta smild. Hann sagði meðal annars, að *annaðhvort* yrði að dæma Loðvík sem konung samkvæmt stjórnarskránni frá 1791, en eftir henni gæti hann ekki sætt annari hegningu en þeirri, að vera settur frá völdum. Vildu menn eigi fallast á þetta, gæti menn eins vel sagt, að stjórnarskráin frá 1791 væri hin versta gildra, gjörð til þess að veiða Loðvík sextánda í henni, af því að menn hefði gefið honum loforð, en hugsað með sjálfum sér að halda það eigi; eða það yrði að dæma hann sem hvern annan ákærðan borgara, og þá ætti hann að njóta allra hinna sömu réttinda, sem hver maður ætti fulla heimtíng á að lögum, t. a. m. að þeir, sem ákærðu, væri aðrir en þeir sem dæmdu, o. fl. Og *Desèze* hafði þá einurð að segja: „eg leita hér alls staðar að dómendum, en finn eina saman sakar-ábera.“ Í niðurlagi ræðunnar fer hann nokkrum orðum um mannkosti Loðvíks sextánda, og það er hann hafi gjört fyrir þjóð sína, og lyktar þannig: „Hann lagði meira í sölurnar en þjóðin æskti, og engu að síður er það þó í nafni hinnar sömu þjóðar, að menn í dag krefja . . . Borgarar! eg fæ mig ekki til að nefna það, er

menn krefja . . . eg lýk máli mínu með veraldarsöguna frammi fyrir mér: gætið þess vel, að það er *hún*, sem dæma mun dóm yðvarn, og að *hennar* dómur stendur óhaggaður um aldur og æfi!.

Það hafði verið kyrd og þögn meðan konungur og svaramenn hans voru á þingi, en jafnskjótt sem þeir voru farnir, hófst aftur hið mesta háreysti og orðakast milli flokkanna. Vinstri menn kröfðu dóms þegar í stað, en þingmaður sá, er *Lanjuinais* hét frá Bretagne, mælti harðlega í móti, og kvað það lögleysu eina og þinginu til hinnar mestu vanvirðu að ætla sér að dæma Loðvík sextánda, það væri hið sama sem að sigurvegararnir dæmdu hinn sigraða. Girondínar höfðu til þessa lítið gefið sig fram, nú létu þeir til sín heyra, og báru upp þá tillögu, að leggja skyldi dóm þingmanna undir samþykki allrar þjóðarinnar. Þeir treystu því, að þjóðin mundi á mannfundum víðs vegar um landið rísa í gegn Jakobínum, og að sér mundi verða svo vel til liðs, að þeir gætu yfirstigið skríslveldið í París. Robespierre og hans flokkur þóttust sjá, hvað undir mundi búa tillögu hinna, og kvað leikinn vera til þess gjörðan, að Girondínar gæti skotið máli sínu undan þjóðarviljanum, er auglýstur væri 10. ágúst, undir atkvæði allra fjandmanna jafnréttisins; þessir myndu síðan gjöra samtök móti fátækri og ráðvandri alþýðu, þar af myndi kvikna borgarastríð, og konungsvaldið að líkindum komast aftur á fót. «Dygdin er», sagði Robespierre, «jafnan í minni hluta hér á jörðu, og það er rangt að ætlast til þess, að hún skuli gefa sig undir yfrráð lastanna». Þessu bragði var Robespierre vanur að beita; hann lét það jafnan í veðri vaka, að hann væri talsmaður dygðarinnar, hana væri einungis að finna hjá hinni fátæku alþýðu, þeir sem eigi vildu sér fylgja, eða sinn flokk fylla, þeir sæti á sífeldum svikráðum við alþýðuna, þeir vildi kveikja innanlands-ófrið til þess að geta sjálfir haft gagn af og brotízt þannig til valda; það riði því mest af öllu á því, að ryðja þeim öllum úr vegi. Slíkar fortölurlétu vel í eyrum hins fáfróða og fjölmanna Parísar-skríls og hinna mörðu drotnunargjörnu og óhlutvöndu manna, er þar voru saman komnir. Liðsafi var þannig nægur og jafnan við höndina; að meðölum til að koma sínu fram, var ekki spurt. Þess vegna gat Jakobínaflokkurinn komið svo miklu og illu til leiðar.

Þegar Robespierre hafði lokið tali sínu, tók Vergniaud til máls og talaði þá svo, að allir undruðust málsnild hans. Hann sýndi þingmönnum fram á það, er af lífláti konungs mundi leiða: það mundi kveikja almennan ófrið milli þjóðanna, og alls konar eynd og hörmúngar dynja yfir Frakkland og leggja það í eyði, og þegar um slíkt stórræði væri að gjöra sem þetta konungsmál, þá væri ekki annað ráð, en að skjóta því til atkvæða altrar þjóðarinnar. Ræða Vergniauds hafði að vísu mikil áhrif á allan þingheim, og jafnvel Robespierre var sem agndofa eftir, en þeir urðu þó að lyktum fleiri, sem eigi létu sannfærast. Um síðir, þegar komið var fram yfir nýár (1793), komst þingið að þeirri niðurstöðu, að greiða skyldi atkvæði um þessar þrjár spurningar:

1. Hefir Loðvík Capet¹ gjört sig sekan um samsæri gegn frelsi þjóðarinnar, og um hegningarverða tilraun til að raska almennum friði þjóðfélagsins?
2. Skal dómurinn, hver sem hann verður, borinn undir þjóðina til staðfestingar?
3. Til hvernar hegningar skal hann dæmdur?

Þingmenn voru alls 749. Af þeim voru 28 sjúkir, eða í erindagjörðum þingsins út um land, 87 kváðust eigi hafa heimild til að dæma Loðvík, en 683 guldu fullt jákvæði við hinn fyrsta spurningu. Annari spurningunni svöruðu þrír fimtu hlutir viðstaddra þingmanna með nei. Þannig var tillaga Girondína fallin. Margir af «sléttumanna» flokki greiddu atkvæði móti Girondínum, eigi af því, að þeir vildu konunginn feigan, heldur af hinu, að þeir óttuðust þjóðina, ef hún fengi málið í sínar hendur. Sextánda janúar (1793) átti að gjöra út um þriðju spurninguna. Ária morguns þann dag flyktist bæjarskriflinn þúsundum saman að öllum dyrum þinghallarinnar, og tók með fagnaðarópi og fagurgala móti þeim þingmönnum, sem honum líkaði við, en með hótunaryrðum móti hinum, sem vægð vildu sýna konungi: «annaðhvort hans höfuð, eða þátt!» æpti skriflinn til þessara manna. Atkvæðagreiðslan byrjaði ekki fyr en um kvöldið, og stóð alla nóttina og fram á kvöld daginn eftir (17. jan.). Tilheyrendur voru svo margir í þingsalnum, sem komist

1) Þingið var hætt að nefna konung sem að undanfögnu, Loðvík sextánda, það þótti ekki lengur sama, en hins vegar muna menn, að Hugo Capet var forfaðir Loðvíks 16.

gátu, og létu allófriðlega, svo að margir af þíngmönnum voru jafnvel eigi óhræddir um líf sitt, og bjuggust við öllu illu, ef konungur yrði dæmdur sýkn saka. Af Girondína- og «slèttumanna» flokknunum greiddu 321 þíngmenn atkvæði með ýmsari hegningu, t. d. fangelsi, þar til friður kæmist á, og síðan útleigð. Að kveldi hins 17. janúarmán. lýsti forseti yfir því: *að þingið hefði með atkvæðafjölda (361 af 721) dæmt Loðvík Capet til dauða.*

Malesherbes færði konungi þessi tíðindi. Hann varð vel við og mælti: «eg kvíði ekki dauða mínum; eg treysti miskunnsemi drottins». Loðvík sextándi kunni eigi að stjórna þjóð sinni eins og við þurfti og vera átti, enda var það eigi auðgjört eins og þá hagaði öllu til hjá Frökkum, en hann kunni að bera mót-kætið, þegar það lagðist á; hann var góður maður og unni þjóð sinni af heilum hug, og kvaddi hana á höggpallinum með þessum orðum: «Eg fyrirgef þeim mönnum, er verið hafa frumkvöðlar að dauða mínum, og bið guð þess, að blóð mitt komi eigi yfir Frakkland». Meira heyrðist eigi, því að bumbulátturinn og óhljóðin tóku yfir. Það var afhallandi dagmálum 21. janúar 1793.

Líflát Loðváks konungs þótti mikil tíðindi og ill. Alþýða manna á Frakklandi varð óttaslegin, og útlendum þjóðum þótti verk þetta svo illt, að þeir urðu Frökkum með öllu fráhverfir. Það kom nú fram, sem ýmsir framsýnir menn meðal Frakka höfðu sagt, að nú fýnst hófst ófriðurinn að fullu og öllu, og að nú var eigi lengur hægt aftur að snúa. Frakkar höfðu með þessu illræði slitið af sér öll bönd, höggvið sig sjálfa úr tengslum bæði við aðrar þjóðir og við fortíð sjálfra sinna. Nú var ekki annað fyrir hendi, en að berjast við aðrar þjóðir, og annaðhvort yfirstiga þær, eða verða undir í þeim viðskiftum; um þetta voru því nær allir Frakkar samdóma, enda varð nú ófriðurinn og fjárhagur ríkisins aðalamtalæfnið bæði utanþings og innan. Flokkarnir stóðu nú, eins og áður, andvígir hvorir á móti öðrum, að eins með þeirri breytingu, að Jakobínar voru nú, síðan konungur var af lífi tekinn, vandrættir en áður um, að stjórnarbyltíngin mundi ekki verða stöðvuð eða bæld niður, heldur mundi hún ryðja sér til rúms, rótfestast hjá þjóðinni og bera ávöxtu. Hins vegar urðu Girondínar vondaufir um sigur, og þóttast í atvæði þeim, sem varð 21. janúar, sjá upphaf nýrra

og ofboðslegri hryðjuverka en þeirra, er unnin höfðu verið að undanfögnu. Sú breyting varð á um þessar mundir, að tveir af ráðgjöfunum lögðu völdin niður. Annar þeirra var Roland, hinn mesti dugnaðarmaður en hataður af Jakobínaflokknum, hinn var hermálastjórinn Pache, er miklu illu hafði til vegar komið, bæði sökum ódugnaðar og með fylgi sínu við Jakobína. Hinn nýi hermálastjóri, *Beurnoille*, þótti miklu nýtari maður en formaður hans hafði verið, en hann átti úr vöndu að ráða, þar sem alt var í mestu óreglu, er hann tók við, og ófriðurinn færðist út, og varð miklu umfangsmeiri en áður. Til þessa höfðu Frakkar átt ófrið einungis við Piemont, Prússa og Austurríkismenn, en nú bættust fleiri við. Englendingar undu því illa, að Frakkar lögðu Belgíu undir sig, og í annan stað brugðust Hollendingar reiðir við, þegar Frakkar létu af siglingabanni því, er lengi hafði legið á Schelde-fljóti, Hollendingum einum til hagsmuna. Landstjóri Hollendinga (Vilhjálmur 5.) var Englendingum háður, og gjörði flest að þeirra vilja — þótt lýðveldismannaflokkurinn á Hollandi stæði í móti. Frökkum var kunnur fjandskapur Englakonúngs og Landstjórans, urðu fyrri til bragðs og sögðu hvorumtveggja stríð á hendur (1. febr.). Litlu síðar hófst ófriður milli Frakka og Spánverja. Konungurinn á Spáni var einn af Bourbona-ættinni, og lét Englendinga spana sig til ófriðar. Enn fremur risu þýzku ríkin upp móti Frökkum, því að Custine hafði að fyrra bragði brotitzt inn í lönd þeirra, eins og áður er ritað; loksins má telja flestöll smáríkin á Ítalíu í óvinatölu Frakka. Það má því svo að orði kveða, að allar þjóðir Norðurálfunnar væri gengnar í samband móti Frökkum. Rússar gáfu sig reyndar lítið fram að þessu sinni, því að Katrín önnur, drottning þeirra, var þá sem óðast að brjóta undir sig Pólverja og skifta ríki þeirra. Með hvorigum voru Danir, Svíar, Svisslendíngar og Tyrkir. Sá maður, er fótum kom undir þetta stórkostlega samband, var *Vilhjálmur Pitt* (hinn yngri), stjórnarforsetinn enski, stórvitur maður eins og faðir hans og svarinn óvinur Frakka. Hann kom því til leiðar, að Englendingar styrktu meginlandspjóðirnar með ærnu fê, til þess þær gætu gjört út her á hendur Frökkum. Pitt vann hér tvennt í einu: hann friðaði alt stórmenni á Englandi, er hataði aðfarir Frakka, með því að gjörast forgöngumaður sambandsins gegn þeim, og í ann-

an stað jók hann svo veldi og yfirráð Englendinga á hafinu, að þeir urðu þar einvaldar.

Nú voru Frakkar að vísu lítt við búnir slíku ofurefli, er í móti þeim stóð, en hugur þeirra og dugur óx með hættunni. Þingið lét auka herinn og bæta á allar lundir. Lið það, sem Dumouriez hafði yfir að ráða, var fátt að tölu og illa búið. Hann hafði þenna sama vetur brotitzt inn á Holland, því að Frakkar vildu fyrir hvern mun ná undir sig jafnauðigu landi. En sem Dumouriez var farinn burt af Belgíu, komu Austurríkismenn þangað með miklu liði og settust þar að; varð Dumouriez þá aftur að halda til Belgíu, en átti þar illu einu að mæta. Frakkneskir sendimenn frá París höfðu komið þar, og þó Belgía hēti vinaland, höfðu þeir rænt þar bæði kirkjur og klaustur, og flutt ógrynni gulls og silfurs til Parísar. Þessir óhlutvöndu menn spiltu þannig vinsældum Frakka á Belgíu, en greiddu götu Austurríkismanna. Dumouriez gjörði það, er í hans valdi stóð, til að ráða bót á þessu, og upp frá því var það hans mark og mið, að ganga í berhogg við ofríkismannaflokkinn í París. Hins vegar voru þessir flokksmenn heldur eigi aðgjörðalausir; þeir fengu því til vegar komið, að nýr skattur var lagður á alla efna-
menn, og að nýr dómur (*stjórnþýltíngardómur*) var settur til þess að vaka yfir öllum grunsömum mönnum og dæma þá; líkt því sem átt hafði sèr stað sumarið áður, þá er septembervígin urðu. Þá var og ákveðið, að senda skyldi 82 menn af þjóðþínginu, tvo og tvo saman, út um alt land, til þess að flýta fyrir liðssafnan, handsama þá menn, sem þeir kölluðu grunaða, og, í fáum orðum að segja, skipa þar fyrir um alt eins og stjórnendur Jakobína í París vildu vera láta. Það mátti segja, að Frakkland væri ofurselt harðstjórn þessara ófyrirleitnu erindreka.

Um þetta leyti hófust óeirðir á vestanverðu Frakklandi, og urðu bæði harðar og langar. Hafa menn kent þær við fylki það, er Vendée heitir, og nefnt *Vendé-ófriðinn*. Þar er landi svo hátt að vestur frá, að með sjó fram er láglent og mýrlent og alt sundurgrafið með skurðum, en þá er frá sjónum dregur, taka við skógi vaxnir hálsar og hæðir með skörðum og geilum, og alt er görðum sett og girðingum til þess að friða ekrur og engjar; þar er gott til varnar en ilt til aðsóknar. Þar lifði alt í bróðerni, bændur, klerkar og höfðingjar; þar var allur annar

sveitarsíður en austur á Frakklandi. Þegar nú stjórnarbyltíngin kom í þessi kyrlátu og tilbreytingarlausu hygðarlög, með öllu sínu harki og öllum sínum nýbreytingum, þá var sem menn hrykkju upp af værum blundi. Þegar prestarnir, er eigi höfðu viljað eiðinn vinna, voru sviftir embættum, þegar allir yngri menn voru teknir frá heimilum sínum og reknir í herþjónustu, þá risu bændur upp (10. marz 1793) í sveitum þessum, beggja megin við Loire-fljótið, og drápu valdsmenn þá hina nýju, er Jakobína-stjórnin í París hafði sent þangað. Þannig byrjaði þessi skæði ófriður. Fyrst framan af voru það bændur einir sem börðust og í smáhópum, en er frá leið, gengu höfðingjar í lið með þeim og gjörðust foringjar þeirra. Voru sumir af þeim vopnum vanir og kappar miklir.

Jafnframt því, sem þjóðþinginu í París bárust fregnir af uppreistinni vestur á Vendée, komu önnur tífundi og eigi betri norðan af Þýskalandi og Belgíu. Prússar höfðu rekið Custine og lið hans vestur yfir Rín og sezt um Mainz, en Frakkar voru þar illa staddir. Frá Dumouriez kom bréf til þingsforsetans, og voru þar ritaðar ófagrar sögur um aðfarir hinna frakknesku erindreka á Belgíu, og þángum orðum farið um alla þá óhæfu, er við gengist í París og breiddist þaðan út í allar áttir. Þeir, sem þá réðu mestu í París, vissu að Dumouriez var vinsall meðal líðsmanna sinna og þorðu eigi að ganga í berhögg við hann þá þegar, létu því eigi uppskátt það, er í bréfinu stóð, en tóku það ráðs, að senda Danton til Belgíu með þeim erindum, að fí Dumouriez til að taka það aftur, er hann hafði ritað. En þótt hann hefði einmitt þá daga (18. marz 1793) bærzt við Austurríkismenn hjá Neerwinden og beðið ósigur, var hann samt ófí-anlegur til að afturkalla nokkuð af því, er hann hafði sagt og ritað. Hann var þvert á móti staðráðinn í, að kollvarpa yfirráðum Jakobínaflokksins. En með ráði varð að fara, þar sem hann hafði nýbeðið ósigur og stóð því var að vígi en síður. Dumouriez tók því það til bragða, að hann sagði einum af hershöfðingjum Austurríkismanna, er *Mack* hét, frá fyrirætlan sinni, og samdist svo með þeim, að Dumouriez hét að láta Belgíu lausa við Austurríkismenn, en sjálfur ætlaði hann að halda liði sínu til Parísar, hleypa þinginu upp, gjöra son Loðvfks sextánda að konúngi, og, bjarga drotníngunni úr varðhaldi; á meðan skyldi

vopnahlè standa og Austurríkismenn veita Dumouriez lið ef á þyrfti að halda. Jafnskjótt sem þetta fréttist til Parísar, sendi þingið erindreka sína og þar á meðal hermálastjóran Beurnonville norður til Dumouriez og bauð honum að koma og gjöra grein fyrir gjörðum sínum. Því neitaði hann harðlega og þá er þeir lýstu yfir því, að hann væri settur frá völdum, lét hann grípa þá alla og senda Austurríkismönnum, og þar voru þeir settir í varðhald¹. En af þeirri fyrirætlan Dumouriez, að halda til Parísar og steypa Jakobínunum úr völdum, varð ekkert, því að liðsmenn hans vildu eigi fylgja honum. Sá hann þá eigi annað ráð vænna en að flýja af landi burt eins og Lafayette hafði áður gjört. En það skildi með þeim, að Lafayette sneri aftur til Frakklands og hélt virðingu sinni til dauðadags, en Dumouriez átti aldrei afturkvæmt og andaðist í elli á Englandi 1823.

Atferli Dumouriez hafði mikil áhrif á Frakkland, að vísu urðu þau minni en við mátti búast, að því leyti er snerti vopnaviðskifti Frakka og Austurríkismanna þar nyrðra, því að prinziinn af Coburg, yfirforingi Austurríkismanna, lét vopnahlèð standa um nokkra daga, og gjörði Frökkum engar ónáðir, en á meðan bjuggust þeir um sem best varð og fengu þann yfirforingja í stað Dumouriez, er *Dampierre* hét. En að því leyti er snerti, þingið í París og þingflokkana og aðgjörðir þeirra, voru áhrifin mikil og ill. Það hafði oft verið yfir því kvartað, að framkvæmdarvaldið væri helzt of létið. Nú er hér var komið og landi og lýð var hætta búin af útlendum og innlendum vandræðum, kom þetta málefni af nýju til umræðu, og nú kvað þingið svo á (6. apríl) að skipa skyldi *nú manna stjórnarnefnd*, er hafa skyldi hið sæta vald á hendi. Nefnd þessi var kölluð *velferðarnefnd* (*Comité du salut public*), og kosnir menn í hana til eins mánaðar í einu. Allar þær fyrirskipanir, sem út gengu frá nefnd þessari, áttu ráðgjafarnir tafarlaust að láta framkvæma; allir umboðsmenn, er sendir voru út um landið til herliðsins, og allir hershöfðingjar, urðu að hlýða boði og banni nefndarinnar. Hún hafði mikið fê til umráða, og þegar nú aðrir eins dugnaðar og ákafamenn eins og Danton og nokkru seinna Robespierre

1) Nokkru síðar létu Frakkar dóttur Loðvíks sextánda lausa við Austurríkismenn, og þá fengu þeir Beurnonville lausn og heimfararleyfi.

og Saint-Just komust í nefndina, þá má nærri geta, að hún hafi gjörzt ærið umsvifamikil og keppt að því marki og miði, að ná fullu einveldi yfir Frakklandi. Enginn maður af Girondínaflokki var kosinn í nefnd þessa.

Þegar er menn voru búnir að jafna sig eftir hin fyrstu ó-tíðindi, er bárust til Parísar bæði frá Vendée og frá Dumouriez, höfðuðu deilur meðal þingflokka. Robespierre og kompan-ar hans báru ýmsar sakir á Girondína, og ein var sú, að þeir hefðu verið í vitorði með Dumouriez. Krafði Robespierre þess, að allir þeir, er verið hefðu í slíku vitorði, og enn fremur að allir Orleans-ættmenn yrðu dregnir fyrir lög og dóm, og end-aði ræðu sína þannig: «en það er þingmennina Vergniaud, Guadet, Gensonné o. fl. snertir, þá væri það ósvinna af mér, að bera sakir á slíka sæmdarmenn, og jafnframt því, er eg kann-ast við, hve litlu eg fæ orkað þar sem þeir eru annars vegar, vil eg fela þetta atriði speki og forsjá þingmanna». Girondínar — og þá Vergniaud öðrum fremur — gáfu mótsöðumönnum sínum aftur góð svör og gild, brugðu þeim um september-vigin og um það, að þeir vildu beita harðstjórn og ofríki við þingið, og hefðu Parísar-skrilinn sem verkfæri til þess og annars, er þeir vildu framkvæma. Þegar þeir Robespierre sáu, að þeir myndu engan veg komast með orðum einum, gripu þeir til hins sem þeir áður höfðu gjört, að beita ofríki. Nú voru því — síðustu daga maí-mánaðar 1793 — ýmsir menn, er Jakobínar höfðu helzt augastað á, teknir höndum og settir í varðhald, bumbur voru barðar, turnklukkum hríngt, liðsmönnum skipað á ýmsa staði, skrílnum fengin barefli í hendur, og alt var á tjá og tandri um Parísar-borg. Annan dag júní-mánaðar komu sendisveinar bæjarráðsins á þing og báru vopn undir klæðum, og kröfðu þess, að 30 þingmanna væru þegar teknir fastir, en forseti svar-aði, að fyrst yrði að prófa sök þeirra, áður það væri gjört. Við það fóru sendimenn á burt, en hersveitirnar þokuðust nær þing-höllinni og skipuðust sem þykkvast fyrir allar dyr. Nokkrir meðal þingmanna leituðu útgöngu, en þess var enginn kostur, alls staðar voru fyrir vopnaðir menn. Þá gaf einhver það ráð, að þingmenn skyldu allir ganga af þingi og leita verndar hjá þjóðverðinum. (Nationalgarden). En fyrir því hafði verið séð, að það lið væri eigi hendi næst, ef þingið leitaði þaðan trausts og

halds, þess vegna brást þíngmönnum sú hjálp. Gekk nú forseti af þíngi og flestallir þíngmenn fylgdu honum; en sem þeir komu út fyrir höllina, stóð manngnúinn þar fyrir með vopnum. Forseti bauð að þeir gæfi þíngmönnum rúm, en höfðinginn fyrir liðinu, *Henriot* að nafni, hinn mesti ribbaldi, kvaðst engum manni leyfa útgöngu, og í annan stað lét hann skjóta þínghöllina niður í rústir, ef menn þeir væru eigi fram seldir, er þjóðin krefði. Þíngmönnum var því einn kostur nauðugur að snúa aftur til þingsalsins og láta þar fyrir berast. Eftir nokkrar umræður varð niðurstaðan sú, að hinir ákærðu þíngmenn voru afhentir lögreglumönnum, fluttir hver til síns heimilis í borginni og hafðir þar í varðhaldi. Þannig var aðgjörðum Girondína á þínginu lokið. Flestir þeirra höfðu á *löggsjafarþínginu* með málsnild sinni og ákafa veitt straumi stjórnarbyltíngarinnar lengra áfram en góðu hófi gegndi. En er þeir sáu hinar hryggilegu afleiðingar starfa sinna, þá skelfdust þeir, og gjörðu á *þjóðþínginu* það þeir kunnu til þess að sporna við frekari vandræðum, en gátu þá eigi lengur við ráðið. Stjórnarbyltíngin óx þeim yfir höfuð; þeir voru grunaðir af mótstöðumönnum sínum um, að þeir stæðu í sambandi við útlenda og innlenda óvini, er bæla vildu stjórnarbyltínguna niður, og eyða öllum hennar góðu ávöxtum. Til óleyfilegra meðala vildu Girondínar ekki grípa, en hinir svífðust einskis. Þess vegna urðu Girondínar undir í þeirra viðskiftum.

Nú var svo komið, að Jakobínaflokkurinn átti sigri að hrósa, enda heimtuðu þeir, sem frekastir voru og verst létu, að valdsins væri neytt sem framat væri unt, en foringjarnir sem hygnari voru, vildu fara hægt og gætilega, því að þeim var kunnugt, að víða um landið bryddi á talsverðri óánægju og mótspyrnu, og það varðaði miklu, að borgarastéttin í höfuðstaðnum, er mislíkaði svo margt af því sem gjört hafði verið, yrði eigi stygð svo að hún neyddist til að grípa til vopna. Í Marseille höfðu menn rekið erindreka þjóðþingsins burt úr borginni, og bannað Jakobínum þar alla mannfundi. Í Toulon voru menn eigi tryggir. Í Lyon höfðu orðið óspektir, því að skríllinn vildi ræna hina betri menn elgum sínum; en skríllinn varð undir. Í Bordeaux, höfuðborg Girondafylkis, risu menn upp til þess að verja þíngmenn sína, og á Norðmandíi stóð fjöldi manna í móti

Jakobínunum, og höfðu einnig aðsetu í borg þeirri, er Caen heitir. Þangað norður höfðu og fmsir af Girondínunum leitað, en sumir þeirra, eins og t. a. m. Vespignand, vildu ekki flyja úr varðhaldi, heldur sitja kyrrir þar sem komið var, og bóða dómsins. Aftur höfðu nokkrir komið á burtu t. a. m. Brissot, Petion, Barbaroux og Lanjuinais. Brissot og Barbaroux varð báðum náð og báðir teknir af lífi, Petion var eltur sveit úr sveit þangað til um síðir að hann sá sér ekki undanfæri, og ræð sér sjálfur bana; Lanjuinais náðist aldrei, komst seinna til vegs og valda, og lifði fram á daga Karls títunda.

Þjóðþingið hafði komið saman í þeim tilgangi, að semja nýja stjórnarskrá, því að hin frá 1791 átti ekki lengur við, úr því konungsvaldið var af tekið. En meðan Girondínar voru á uppréttum fótum, og máttu sín mikils á þingi, vildu Jakobínar með engu móti, að stjórnarskrá yrði samín og samþykkt. Nú þar á móti, þegar þeir voru orðnir einráðir, þótti Robespierre tími vera kominn til þeirra starfa, og sá lét hann það í veðri vaka, að það væri Girondínunum einum að kenna, að svo lengi hefði dregið að semja stjórnarskrána. Elma af þingmönnum, er *Hérault Séchelles* hét, var því kjörinn til þess að semja frumvarp til þessara grundvallarlaga, er byggt skyldi á fullkomnu jafnrétti og aðstu yfirláðum lýðsins. En undir niðri var það áform Robespierre, að stjórnarskráin yrði einungis til málamyndar, og til þess að alþýðu manna væri gjört nokkuð til skapa, því alþýðan bjóst allt af við, að þegar stjórnarskrá væri fengin, þá mundi henni fylgja friður og fullsæla. «Eg skal reyna til», sagði Hérault, «að ganga svo frá þessari stjórnarskrá, að engum lifandi manni komi til hugar að fylgja henni». Að fáum dögum liðnum var skráin fullgjör og samþykkt á þingi, en reyndar komst þessi stjórnarskrá (sem kend er við árið 1793) aldrei lengra en á pappírinn. Það var eitt í henni, að framsæmdarvaldið skyldi vera í höndum 24 manna, og helmingur þeirra víkja úr völdum á ári hverju. Lögum þessum fegnust þeir hvað mest, sem minnst höfðu vit á að meta þau. Þannig flyktust bæði konur og karlar á þing, og færðu þingmönnum þakir sínar fyrir þessa aðdánlegu löggjöf; stundum hljómaði þingsalurinn af lofsöngum, stundum voru sæti þingmanna blómum stráð, ungbörn færðu

forseta blómkerfi, og konur réttu honum rauðar húfur í þakk-lætis- og virðingarskini.

En meðan allur þessi fögnuður í París stóð sem hæst, gaus sá kvittur upp, að Marat, „þjóðvinurinn“ hefði verið myrtur (13. júlí). Morðinginn var úng stúlka frá Caen, *Charlotte Corday* að nafni. Hún var gagnatekin af harni og gremja yfir öllum þeim hörmúgum, sem fósturjörð hennar varð að líða, og hún kendi þar að mestu leyti hinum blóðþyrsta „þjóðvini“. Hún einsetti sér að ráða hann af dögum, og vinna þjóð sinni gagn á þann hátt. Hún daldi alla þess, er henni bjó í brjósti, fór til Parísar, náði fundi Marats, og kvaðst verða að segja honum merkileg tíðindi frá Caen. Marat spurði hana að nöfnum þeirra þingmanna, er þángað höfðu flúið. Hún skýrir honum frá því, en hann ritar nöfnin á blað, og segir um leið: „það er vel, þeir skulu allir innan skamms upp á höggpallina!“. „Á höggpallinn“, mælti hún, grípur hníf úr barmi sér, og leggur til Marats; kom lagið í brjostið, og var það hans bani. Charlotte reyndi eigi að forða sér; var hún fátum dögum þar á eftir dæmd til dauða og höggvin síðan. Hún gekk móti dauða sínum með mikilli hugprýði og stillingu, enda var hún sannfærð um, að hún hefði unnið þjóð sinni þarft verk. Og þó var það reyndar eigi svo, því að þeir Robespierre þóttust nú sjá, að sér mundi ætlað alt hið sama, og fyrir því einsettu þeir sér, að verða fyrri til taks, sjá sjálfum sér borgið, og eyða sem fyrst öllum sínum mótstöðumönnum; en eigi létu þeir annað uppskált, en að þeir vildu hefna Marats, og áttu því mjög hægt með að æsa alþýðuna og skrflinn, sem trúði á Marat, eins og hann væri dýrðingur þjóðarinnar.

Velferðarnefnd sú, er fyr var getið, — í henni voru þeir Danton og Barrère, helztu mennirnir — hafði, það sem af var, miðlað málum, og sýnt bæði vit og stillingu í stjórni sinni. Hún hafði meðal annars eigi hikað við, að setja aðalsmenn yfir herinn, ef þeir þóttu á annað borð nýttir feringjar, eins og t. a. m. Custine. En flestir þeirra höfðu lært í „gamla skólanum“, og vildu hafa strángan aga á liðsmönnum sínum. Slíkt þótti Robespierre óþolandi harðstjórn, og átaldi það harðlega í Jakobínafélaginu, enda varð það nú viðkvæðið á fundum þeirra, að allir aðalsmenn skyldu gjörðir rækir úr hernum. Hébert ritaði í

blaði sínu, að liðsmönnum væri eigi skylt að hlýðnast slíkum foringjum, en sjálfur hermálastjórinn *Bouchotte* lét útbýta blaði Héberts í öllum herbúðum. Það má því nærri geta, hvernig gengið hafi herþjónusta og hernaðarstörf Frakka um þessar mundir. Vælförðarnefndin sá, að svo búið mátti eigi lengur standa, og sumir af nefndarmönnum vildu jafnvel losast úr henni. Danton gekk úr nefndinni og fleiri með honum, en í þeirra stað komu vinir Robespierre, og var St. Just einn af þeim. Það var 10. dag júlímánaðar. Robespierre varð litla síðar nefndarmaður, þá er honum þótti tími til þess kominn. Upp frá þessu harðnaði öll stjórn nefndarinnar. Nú var eigi framar spurt um líf eður eignir manna eður réttindi. Þeir sem nú réðu öllu, hugsuðu eigi um annað, en halda viðstöðulaust áfram sinn blóðferil, hrinda því öllu úr vegi, er fyrir varð, og brjóta undir sín yfirráð land og lýð. Til þessa höfðu Parísardrottnarnir hlífzt við að ganga í berhogg við Lyon og hinar aðrar stórborgir, er nefndar voru. Nú var lýst yfir því, að yfirvöldin í Lyon væru ófriðhelg og skorað á bændur í nærsveitum þar syðra, að taka þá borg, en eigum borgarmanna skyldi skift að verðlaunum milli borgarskrálsins og þeirra manna, er fengi tekið hana. Borgarmenn í Lyon gripu til vopna, drápu *Chalier*, einn af erindrekum þjóðþíngsins og einhvern hinn versta mann, og vörðust djarflega liði því, er að sótti.

Ófriðurinn vestur í landi (*Vendée*) magnaðist dag frá degi, og var margt er að því studdi; landslagið var, eins og fyr er sagt, gott til varnar en illt til aðsóknar, íbúar voru þar veiðimenn miklir og skotmenn hinir beztu, samgöngur voru greiðar um hafið og fengu þeir bæði vopn og vistir frá Englandi, fyrirliðar þeirra voru margir hverir hinir mestu fullhugar. Hins vegar áttu hershöfðingjar þeir, er sendir höfðu verið til þess að bæla uppreistina niður, mjög svo erfitt uppdráttar. Þeir voru með fyrsta höfáir, fengu reyndar nokkurn liðsafla frá París, en það lið gjörði fremur að spilla en að bæta. Það var óvant allri herþjónustu, þoldi enga stjórn og engan aga, og flýði þá er fram skyldi ganga. Þegar því eitthvað gekk miður en skyldi, var hershöfðingjunum einum gefin sök á því og þeir reknir frá völdum, en aðrir ónýtari látnir koma í þeirra stað. Því að þeir einir voru sjálfsagðir að komast til valda, sem kostuðu kapps

um að þóknast Robespierre og vinum hans; um þekkingu og mannkosti var eigi spurt á þeim tímum. Þannig varð *Rosignol* yfirforingi vestur á Vendée. Hann var úrsmiður í París, kunni ekki til herþjónustu og því síður til herstjórnar, en hafði gengið vel fram þegar septembervíginn voru unninn, og fleiri mætti nefna honum líka, er þá komust til upphéðar. Svo gekk það þar vestur og svo gekk það nyrðra, þar sem við Prússa og Austurríkismenn var að etja. Prússar náðu loksins Mainz (25. júlí 1793), eftir lánga og fræga vörn, og Austurríkismenn náðu ýmsum kastalaborgum.

Þannig var Frakkland umsetið af útlendum óvinaher að norðan og austan, en borgarastríð þjáði það sunnan og vestan. Neyð var mikil í landinu. Bændur vildu eigi flytja korn til kaupstaða, af því þeim var bannað að selja það nema fyrir ákveðið verð, og boðið að taka í móti seðla eina, sem lækkað höfðu í verði og voru orðnir því nær gagnslausir. Það var því harðrætti og húngur manna á milli í kaupstöðum og í þeim sveitum, er kornyrkja átti sér eigi stað. Allar nauðsynjavörur hækkuðu í verði að því skapi sem peningar lækkuðu. Sama daginn, sem Robespierre gekk í velferðarnefndina (27. júlí) var það tekið í lög, að hver sá, sem ætti nokkurn forða af matvællum og annari nauðsynjavöru fremur en sjálfur þurfti, skyldi gjöra yfirvaldinu grein fyrir því, en yfirvaldið setja fast söluverð á vöruna. Sá sem bryti móti þessu boðorði skyldi dauðasækur. Þeir, sem nokkuð höfðu handá í milli, áttu því á hættu að vera dregnir fyrir lög og dóm, hvenær sem einhver vildi verða til að kæra.

Þegar Robespierre gekk í velferðarnefndina 27. júlí 1793, var stjórn Frakklands nokkuð á reiki. Þjóðþingið hafði reyndar lokið störfum sínum, þá er hin nýja stjórnaðarskrá var samþykkt, og velferðarnefndin sát eigi nema einn mánuð að völdum. En þingið vildi ógjarna leggja völdin niður og sjá á bak þeim vegi og þeirri virðingu, er þingmennskan hafði í för með sér, og velferðarnefndin reyndi að koma sér á fastan fót. Að hve miklu leyti þetta gæti tekizt var eigi undir þjóðarviljanum komið, því að þjóðin var undirokuð um land allt, nema á Vendée og í einstökum borgum. Jakobínafélögin og nefndir þær, sem settar höfðu verið um allar sveitir (*stjórnbýllingarnefndir*), höfðu alt

vald í sínum höndum; en nú var spurningin sú, hvort þessir forvígismenn lögleysunnar vildu til lengdar hlýða yfirboðurum sínum. Allir vildu stjórna, enginn hlýða, og þeir menn, sem nú fengu æstu yfirráð á Frakklandi um eins árs tíma, komust brátt að þeirri raun, að sumir aðrir af Jakobínaflokknum vildu með engu móti vera undir þá gefnir. Kinkum var það *Hébert* og hans fylgismenn (*Hébertsmennar*), eins og *Chaumette*, er miklu ræð í bæjarstjórninni, og *Vincent*, ónnur hönd hermálastjórana *Beuchotte*, er þóttust eins vel kjörnir til yfirráða eins og *Robespierre*. Á það, sem nú fór í hönd, eða tímabilid frá 27. júlí 1793 til 27. júlí 1794 (*ógnardárid*, „*Ræðstígsperioda*“) lianir hverki grimmustu harðstjórn yfir þjóðinni, né sífeldum deilum og ofsóknum milli höfðingjanna.

Nú leið ekki á löngu áður ýms lög og fyrirskipanir bártust frá þinginu, er ljóslega sýndu það, er velferðarnefndinni bjó í brjósti — því að þingið gjörði það eitá er nefndin vildi —; *María Antonetta* skyldi flutt í annað og lakara fangelsi og mæta fyrir stjórnbyktíngardómi; legstaðir konúnganna í *Saint-Denis* skyldu lagðir í eyði; allir útlendir menn, af óvinarþjóðum Frakka er bólfestu höfðu tekið í Frakklandi eftir 14. júlí 1789, skyldu teknir fastir og settir í varðhald. Var þetta síðasta boðerð einkum gefið móti Englendingum, því að mönnum var kunnugt, að Englar höfðu sína erindreka um allt Frakkland, og komu þar ýmsu illu af stað. Ensku stjórninni var kent um, að hún lèti út bjta falspeningum á Frakklandi, ræna bæði frakknesk skip og annara þjóða, er þangað vildu flytja vörufarna. Þingið lét út gánga kæruskjal yfir ensku stjórninni, og sendi það öllum mentuðum þjóðum og lýsti yfir því, að *Vilbjáknur Pitt* væri óvinnur alla mannkyns.

Þegar komið var fram í miðjan ágústmánnáð (1793), gekk sá meður í velferðarnefndina, er *Carnot*¹ hét, og varð hann Frökkum einhver hina þarfasti maður, því að hann kem með vitmunum sínum og dagnaði góðri skipan á öll hermálefni Frakka, og frá þeim tíma hófst sigursæld þeirra yfir öðrum þjóðum. Þá

1) *Carnot*, fæddur 1753, staðfastur lýðveldismaður og manna ósérplægnastur. Árið 1804 hafði hann einn af þingmönnum hug og hremskilni til að mæla gegn því, að *Napóleon* yrði keisari. *Carnot* dó í útleigi 1823.

var það meðal annars leitt í lög, að allir ókvæntir menn, 18 til 25 ára gamlir, væru skyldir að ganga í herþjónustu. Seinna var því við bætt, að hver maður frakkneskur og vopnfær, væri skyldur að berjast fyrir fósturjörð sína, þangað til hinn útlendi her væri rekinn út yfir landamærin. Með þessu móti safnaðist Frökkum skjótt lið, og Carnot sá um, að eigi skorti vopn eða annað, er herinn þurfti á að halda.

Einn af yfirhöfðingjum liðsins, Custine, hafði farið halloka fyrir þjóðverjum norður í Rínarlöndum eins og áður er sagt, og ekki komið hersveit þeirri til liðs, er upp varð að gefast í Mainz. Hann var því að boði stjórnarinnar tekinn höndum, dæmdur og höggvinn seinustu dagana í ágústmánuði. Afdrif hans áttu að vera öllum öðrum hershöfðingjum til viðvörunar, og sýna þeim, að líf þeirra væri í veði, ef þeir fylgdu eigi skilyrðislaust skipunum stjórnendanna í París.

Um það leyti kom sú fregn sunnan úr landi, að Toulon hefði gengið á vald Englendingum, og þótti það verri atburður en allt annað, er lýðveldinu hafði mætt til þessa. Helztu borgir á sunnanverðu Frakklandi við Miðjarðarhafið eru Marseille og Toulon, hver annari meiri og auðugri. Marseille var fræg af verzhun sinni framan úr öldum, en Toulon hafði það sér til ágætis, að þar hafði herskipaflotí Frakka á Miðjarðarhafi aðsetu, og hún var ramlaga víggirt. Íbúar í borgum þessum undu illa ofríki Jakobína, og í Toulon voru fleiri konungsvínir en lýðveldismenn. Englendingar lágu þar mörgum skipum fyrir landi og sátu um Frakka ef á sjóinn færi, en hitt kom þeim eigi til hugar að ráða á Toulon og taka hana með vopnum; hún var traustari en svo. En nú kom þar, að Marseille gafst upp fyrir stjórnarhernum og fékk þunga hegningu. Þá sáu Toulonamenn sitt óvænna og tóku það ráðs, að leita liðs hjá Englendingum og gefa þeim borgina á vald, þó þannig, að það væri í nafni Loðvíks 17^a. Settust Englendingar nú í borgina og tóku öll

1) Svo nefndu útlendingar og konungsvínir son Loðvíks sextánda. Hann var fæddur 1785, sat í fángelsi frá því foreldrar hans voru teknir og til þess hann dó 1795 lítið kominn á ellefta ár. Margt unnu Frakkar illt og óguðlegt á þeim árum, en meðferð þeirra á sveini þessum er þó eitt hið versta og viðbjóðslegasta, er eftir þá liggur.

borgarvirki og öll herskip Frakka þar á höfninni, yfir 50 línu-skip og freigátur, í sínar vörzlur. Hinir skæðustu óvinir Frakka höfðu þannig náð fótfestu þar, er sízt skyldi, og þar, er þeir gátu orðið lýðveldinu hættulegastir. En því meiri sem hættan varð, því meiri varð hugur og dugur, harka og hamfarir lýðveldisstjórnanna. Það hafði nokkru áður verið lögboðið, að hver maður sem efni hefði, væri skyldur til að lána stjórninni fé, miðað að tiltölu rætti við efni manna og tekjur — þeir sem t. a. m. höfðu 50,000 «fránka» í tekjur, voru eftir því skyldir að lána stjórninni 20,000 fránka, en halda sjálfir að eins 30,000 eftir o. s. frv. — En alt til þessa höfðu menn hlífzt við að heimta fé þetta saman, en nú var það gjört, og það vægðarlaust. Nú voru og settir fjórir stjórnbyltíngardómar (áður var hann einn), því að nóg var til handa þeim að starfa. Það var um sama leyti, að sendimenn frá bæjarstjórninni í París komu á þjóðþingið með umkvörtun yfir þeim, er eigi vildu selja kornföng sín. Chauvette hafði orð fyrir sendimönnum þessum og sagði meðal annars svo: «Nú dugar engin hlífð við þá svikahrappa! vér krefjum þess, að her manns (stjórnbyltíngarher) verði þegar látinn fara um land alt, með dómendur og Guillotínsvèlar¹ í för með sér, til þess að jafna á þessum kornpúkum». Herlið þetta átti að taka korn og önnur matvæli úr forðabúrum manna og setja þá í bönd og fjötra, er sýndu nokkurn mótþróa. Þá komu og sendisveinar Jakobínafélagsins á þing og kröfðu þess, að allir aðalsmenn væru höndlaðir, en Girondínar teknir af lífi, og luku svo sínu máli: «Látið vèlina ganga hvíldarlaust, meðan nokkur svikari er á lífi! setjið skelfing og dauða á dagskrána!»

Þingið lagði samþykki sitt á alt, er um var beðið, og þegar í stað var herliði komið á fót, til þess að framkvæma í París það, er í þessu efni var fyrir skipað. Nú gengu tveir nýir menn í velferðarnefndina, *Billaud-Varennès* og *Collot d'Herbois*, hver öðrum grimmari, og eftir það urðu allar aðgjörðir hennar ofsalegri en áður. Nefndin hafði ógrynna fjár til umráða (1 millíón «livres» um mánuðinn, en hver «livre» jafngildi hér um bil 1

1) Guillotin hét kœknir einn 'frakkneskur og átti setu á frumlagapínginu. Hann fann fyrstur vèl þessa, er höfð var til þess að hálshöggva menn á stjórnbyltíngarárunum, og síðan er við hann kend.

fránka eða 70 aurum), og þegar nú þar við bættist alt það, sem herlið það rænti, er fyr var getið, þá hafði nefndin mikið fê afgánga handa sèr og vinum sínum, og því auðveldari urðu heani yfirráðin í höfuðstaðnum. Nefndin hafði hina verstu óaldarseggi í sinni þjónustu og kostaði ærnu fê til þeirra, og lét þá sækja alla mannfundi, hins vegar voru mótstöðumenn nefndarinnar settir hópum saman í fangelsi. Einkum fjölgaði tala þeirra sem höndlaðir voru eftir að þingið 17. dag septembermán. hafði sett þau lög, að allir grunaðir menn skyldu teknir og settir í dýflissur þangað til friður kæmist á. En grunaðir voru: allir þeir, er með orðum eða gjörðum höfðu sýnt, að þeir væru vinir kóngdómsins en óvinir frelsisins; allir embættismenn, er þingið eða umboðsmenn þess höfðu vikið frá völdum; allir aðalsmenn, konur þeirra og börn, nema þeir hefðu sýnt, að þeir væru einlægir fylgismenn stjórnbyltlingarinnar; allir sem flúið höfðu af landi burt (útflutningsmenn), en hlíft hafði verið til þessa, af því að þeir höfðu snúið aftur heim til Frakklands á lögskipuðum tíma; allir, sem eigi gátu fengið áreiðanlegt vottorð valdstjórnarinnar um, að þeir væru sannir ættjarðar vinir. En umboðsmenn stjórnarinnar á hverjum stað skyldu staðfesta slík vottorð, og fram. fylgja þessum lögum, hver í sínu umdæmi. Lögum þessum var svo rækilega fylgt, að skömmu eftir að þau komu út var tala þeirra, sem sátu í fangelsum, einúngis í París, orðin um 3,000 manna, í stað fárra hundraða að undanfögnu.

Giröndínar höfðu verið teknir fastir 2. dag júnímánaðar, og sátu í varðhaldi síðan. Nú var komið fram á haust og ekkert hafði verið við þá fengizt allan þann tíma. Þetta þótti ýmsum af Jakobínaflokki óþarfa dráttur, enda var nú í öndverðum októbermánuði tekið til óspiltra málanna. Voru nú sakir höfðaðar gegn fjórum tögum þingmanna, bæði þeim er teknir voru 2. júní, og öðrum, þar á meðal Filippusi hertoga af Orleans. Umtalsmál var og, að dregnir yrðu fyrir dóm þeir 73 þingmenn, er mælt höfðu móti ofríki því, sem beitt hafði verið við þingmenn 2. dag júnímánaðar, og hér að framan er getið, en Robespierre ræð því, að það var þó eigi gjört, því að hann þóttist sjá, að svo gæti farið, að hann þyrfti liðs þeirra við gegn þeim, sem voru allra ákafastir. Fundir þingmanna voru um

þessar mundir eigi fjölsóttir; sumir voru farnir burt af þingi fyrir fult og alt, sumir voru í erindagjörðum þingsins út um landið, og sumir sátu í fóstum nefndum og sömdu frumvörp til ýmsra laga. Eitt af þeim lagastörfum var um tímatalið, þar sem umsteypa skyldi öllu hinu forna og setja annað nýtt í staðinn, koma á fót öðru og nýju þjóðfélagi, þótti eigi við eiga, að haldið væri hinum forna tímareikningi. Það hafði þegar verið byrjað nýtt tímatal frá 22. degi septembermánaðar 1792, og vildi þá svo til, að stofnunardag lýðveldisins bar upp á haustjafndægur. Hið annað ár lýðveldisins hófst þannig 22. dag septembermánaðar 1793. Árinu var skift í 12 mánuði, hverjum mánuði í 3 tigi (*décade*), hverjum tig í 10 daga. Deginum var skift í 10 stundir og hverri stund í 10 smærri parts o. s. frv. Tíundi dagur í hverjum tig var helgur og settur í stað sunnudaga; þannig urðu hvíldardagar einum færri í mánuði en áður. Nöfn mánaðanna voru mynduð eftir eðlisfari náttúrunnar á ýmsum árstíðum. Þannig hétu

Haustmánuðir:	Vendémiaire	(vínyrkjumán., 22. sept. til 21. okt.),
	Brumaire	(þokumánuður, 22. okt. — 20. nóv.),
	Frimaire	(hrímmánuður, 21. nóv. — 20. des.);
Vetrarmánuðir:	Nivôse	(snjómanuður, 21. des. — 19. jan.),
	Pluviôse	(regnmánuður, 20. jan. — 18. febr.),
	Ventôse	(vindmánuður, 19. febr. — 20. marz);
Vormánuðir:	Germinal	(frjóangamán., 21. marz — 19. apr.),
	Floréal	(blómmánuð., 20. apr. — 19. maí),
	Prairial	(engmánuður, 20. maí — 18. júní);
Sumarmánuðir:	Messidor	(uppskerumán., 19. júní — 18. júlí),
	Permidor	(hitamánuður, 19. júlí — 17. ág.),
	Fructidor	(aldinmánuður, 18. ág. — 16. sept.).

Þeir 5 dagar (17. — 21. sept.), er afgánga urðu, voru nefndir hlaupárs dagar, og öðru nafni Sansculott-dagar, og skyldu helgaðir vera hugviti, vinnu, dygð, verðlaunum og hyggju manna. Hinn síðasta dag af þessum 5 mátti hver maður tala eður rita það að ósekju, sem honum bjó í brjósti, um hvern þann mann, er opinber störf hafði á hendi. Hlaupársdagurinn fjórða hvert ár skyldi vera þjóðhátíð í minningu stjórnaðbyltíngarinnar og frelsisins.

Þegar komið var fram í miðjan október (1793), tók stjórn-

byltingardómurinn algjörlega til starfa. María Antonetta, er nú var eigi lengur nefnd drottning, heldur „ekkja Capets“, og hafði setið á annað ár í fangelsi, var nú látin koma fram fyrir þenna harðstjóra-dóm. Stjórnin (þ. e. velferðarnefndin), hafði sett þann til sakarábera við dóminn, er Fouquier Tinville hét, og sparaði hann eigi að tína alt til, er orðið gat henni til áfellis, en þó að gögn og vitni brýsti til að sanna þær sakargiftir, og aðrar enn þýngri, er Hébert bar á drottningu, var hún samt sem áður dæmd til dauða. 16. dag októbermánaðar var hún flutt á kerra með bakbundnar hendur til aftökustaðarins. Gællotinsvælin gjörði þar skjótan enda á kvölum hennar, en Jakobínar klöppuðu lof í lófa. Viku síðar voru Girondínar þeir, er í varðhaldi sátu, leiddir fyrir dóm — nokkrir þeirra, er flúið höfðu en náðst aftur, voru drepnir án dóms og laga — þeim var gefið að sök, að þeir hefðu gjört samsæri gegn einíngu lýðveldisins, og frelsi hinnar frakknesku þjóðar. Og af því menn óttuðust vitsmuni þeirra og málsnild, fékk Robespierre þingið til þess að gjöra þá fyrirskipun, að sökin skyldi til lykta leidd að þrem dögum liðnum. 30. dag októbermán. var kveðinn upp dauðadómur yfir 20 Girondínum, og degi síðar voru þeir höggnir; voru þeir Brissot og Verghiaud þar á meðal, og allir voru þeir afbragðsmenn að viti og mannkostum, og flestir úngir að aldri. Einn af þeim, Lasource að nafni, mælti, er hann heyrði dauðadóm sinn: „eg dey þann dag, er þjóðin missir vitið, en þér deyð þann dag, er hún fær það aftur“. Lítlu síðar var hertoginn af Orleans tekinn af lífi, og þótti það lítill skaði, en því meira fanst öllum góðum mönnum um, þá er hinn lærði öldungur Bailly, vinur Lafayettes og einhver hinn mesti ágætismaður með Frökkum, var lífiátinn. Um þær mundir var og Barnave höggvinn og margir aðrir beztu menn þjóðarinnar. Roland hafði flúið, en kona hans orðið eftir í París. Hún var eitthvert hið mesta kvennal á þeim tímum. Þegar Roland frétti að hún hefði verið hálshöggvin, vildi hann ekki lifa, og ræð sèr sjálfum bana.

Margir menn voru af lífi teknir í París, en þó miklu fleiri að tiltölu í öðrum borgum og bæjum á Frakklandi. Vær höfum áður getið þess, að Marseille hafði gefið upp fyrir herliði stjórnarinnar og fengið þunga höfnd fyrir mótstöðu sína. Hið sama átti sèr stað í Bordeaux, nema að því leyti, sem Tallien,

eian af umboðsmönnum þjóðþingsins, beitti þar enn meiri grimd. Hann lét setja Guillotins-vél fyrir utan glugga á húsi sínu, og höggva menn þar sér til augna gamans, til þess er kona ein þar í borginni fékk mykt skap hans, og mínkuðu þar manndrápin upp frá því. Lyon, hin mikla og auðuga borg, varðist stjórnarhernum lengi og vel, en varð um síðir að gefast upp og sæta ógnarlegri hegningu. Erindrekar þingsins, er þángað voru sendir, voru þeir Couthon, Collot d'Herbois og Fouché¹⁾, hver öðrum grimmari. Velferðarnefndin í París sendi þessum umboðsmönnum sínum í Lyon, og öðrum valdsmönnum í því bygðarlagi, opið bréf, og segir þar svo: «alt er leyfilegt þeim, er vinna verk stjórnbyltingarinnar. Lýðveldið leyfir ekki öðrum en frjálsum mönnum landsvist; allir aðrir skulu upprættir. Eigi að eins klerkar og aðalsmenn eru fjandmenn yðar, heldur og einnig allir þeir, sem hafa sýnt þeim nokkra lotningu. Hafi einhver alls nægtir, eru það rángindi móti rétti þjóðarinnar; takið það orðalaust frá eigendum: klæði og skó handa herliðinu, gull og silfur og gersemar handa fjárhirzlu ríkisins. Gleymið eigi, að lýðveldið þekkir engan annan guð, en fósturjörðina, enga guðspjónustu aðra en frelsið, engin lög önnur en náttúrunnar». Öllum kirkjum var þar læst, allir prestar teknir fastir. Mörg háus rifin niður til grunna, og öllu rænt, er hönd varð á fest. Guillotínsöxin hafði ekki við, og voru menn því skotnir niður hópum saman með fallbyssum og alls konar morðvopnum.

Þegar Lyon var frá, þá var Toulon ein eftir óunnin suður í landi. Stjórnin lagði mikið kapp á að ná þeirri borg aftur úr höndum útlendinga, er þar sátu, og voru bæði Englendingar, Spánverjar og Ítalir. Hermálastjóri Frakka, Bouchotte, sendi þángað ýmsa vini sína með talsverðu liði, en af því að þeir voru ónýtir, fengu þeir engu áorkað. Um síðir sendi velferðarnefndin hershöfðingja þann, er *Dugommier* hét; gamlan mann en kappamikinn, og fékk honum í hendur ætlun, er sett hafði verið um það, hvernig haga skyldi atlgögu að borginni til þess

1) Fouché varð seinna æzti lögreglustjóri Napóleons fyrsta, og mjög nafnkendur, hinn slægvitraasti maður og grimmasti. Napóleon trúði honum þó aldrei vel, og sagði einhverju sinni við hann: «það væri rétt gjört af mér að láta skjóta yður». Fouché dó í útlegð í Austurríki 1820.

hún yrði unnin. Hershöfðinginn kallaði liðsforingja sína á fund, og ræddu menn þar þetta mál. Á meðal liðsforingjanna var einn ángur maður, er fallbyssuliðinu stýrði. Hann hét N a p ó l e o n B ó n a p a r t e, var borinn og barnfæddur á Corsica, en hafði lært í hermannaskóla á Frakklandi. Hann kvaðst sjá ráð til að vinna borgina, ef menn vildu fylgja því. Þar gengur höfði einn lítill fram í sjóinn og myndar höfnina að nokkru leyti. Á þeim höfða var kastali, og svo ramgjörður, að menn sögðu hann óvinnandi, og nefndu hann «Litla Gibraltar». Þenna kastala sagði Bónaparte að menn yrðu að taka, þá gætu hin útlendu skip eigi haldizt lengur við á höfninni, en yrðu að leita burt, og þá væri borgin unnin. Og hvort sem menn töluðu hér um lengur eða skemur, urðu þær málalyktir, að allir féllust á hans tillögu, og eftir því var nú atlögunni hagað. Lýðveldismenn náðu kastalanum, og jafnskjótt létu þeir skothrífina dynja yfir enska flotann, og fór þá sem Bónaparte hafði sagt, að Englendingar lögðu skipum sínum frá, og fluttast burtu með liði því, er þeir höfðu sett í borgina, en áður þeir færu alfaríð af stað, lögðu þeir eld í vopnabúr Frakka þar í borginni, óg brendu upp fyrir þeim eða tóku 38 línuskip og freigátur. Var það hinn mesti skaði. Margar þúsundir af íbúum borgarinnar leituðu trausts og hælis hjá Englendingum og þyrptust fram á bryggjurnar. Komust margir í báta og út á skipin, margir druknuðu og margir voru drepnir á sundi eða féllu þar í flæðarmáli, því að skotin dundu á þeim frá lýðveldismönnum eftir því sem þeir ruddust inn í borgina. Þessi atburður varð 18. og 19. desembermánaðar (1793). Þjóðþingið hafði skipað að leggja Toulon í eyði, en það var Dugommier og mönnum hans að þakka, að það var eigi gjört; mörg hús voru þó rifin þar niður til grunna, og fólkið drepíð hrönnum saman eins og í Lyon; segja menn, að fleiri hafi þá týnt lífi í Toulon en í París haustið áður, þá er september-vígin miklu urðu þar.

Mikið hafði að vísu verið að gjört á Suður-Frakklandi, þar sem uppreistin var brotin á bak aftur og bæld niður í stórborgum þeim, sem nú voru nefndar, en engu minni voru þau tíðindi, er um sama leyti gjörðust vestur í landi. Menn muna, af því sem fyr er ritað, að Vendée var alt í uppnámi. Stjórnin hafði sent þangað eina hersveitina á fætur annari. Sumar sóttu

fram fyrir norðan Loire-fljót, sumar fyrir sunnan það, því að ófriðurinn var beggja megin fljótsins. Hershöfðingjar stjórnarinnar voru með fyrsta ófærir til yfirstjórnar, og fyrir þá sök báru uppreistarmenn (Vendée-búar) framan af því nær alls staðar hærra hlut. En smámsaman komu þar nokkrir undirforingjar til sögunnar í liði stjórnarinnar, er sýndu afbragðs vit og dug, og fengu meiri yfirráð, og þá fór stjórnarliðinu að veita betur. Af foringjum þessum er enginn eins nafnkendur og *Kleber*. Hann hafði skamma stund verið í liðinu þar vestra, er menn sáu, að það varð alt að ráði, er hann lagði til. Þó vildi hann ekki verða yfirhöfðingi liðsins, er honum stóð það til boða, og kaus heldur hitt, að leggja á ráðin, en láta annan hafa yfirstjórn hersins í orði kveðnu. Hinn 15. dag októbermánaðar (1793) stóð orusta mikil við bæ þann, er Chollet heitir. Það er fyrir sunnan Loire-fljót. Var það ráðum og framgöngu Klebers að þakka, að stjórnarherinn vann sigur, en Vendée-byggjar voru þá svo aðþrengdár, að þeir gátu eigi haldizt við fyrir sunnan fljótið, og leituðu norður yfir með öllu sínu skuldaliði (hér um bil 100,000 manna). Landið fyrir sunnan fljótið var komið í auðn, svo að ekki var þar verandi, enda rituðu umboðsmenn stjórnarinnar við herinn til Parísar og sögðu: „Vendée er ekki lengur til“. Allur hinn mikli managrúi — og þar voru með konur og börn og gamalmenni — komst slysalaust yfir fljótið, en þá tók lítið betra við, og eftir ýms vopnaviðskipti mátti heita að alt það lið væri annaðhvert fallið eða hertekið að tveim mánuðum liðnum, og Vendée-ófriðurinn á enda fyrir árslok. En þar næst komu erindrekar stjórnarinnar þangað vestar, og létu drepa alla þá menn, karla og konur, er þeir töldu grunaða, og skifti það þúsundum. Einn af þeim erindrekum hét Carrier, og er við brugðið fyrir grind. Hann var sendur til borgar þeirrar, er Nantes heitir, til þess að hegna mótstöðumönnum stjórnarinnar. Þangað komu daglega margir flóttamenn af Vendée-byggjum, er leituðu þar hælis. Carrier lét taka þá alla og skjóta, en þá af Nantesmönnum, er honum þótti grunsamir, lét hann hálshöggva. En af því að honum þótti það ganga seint, og líkin fengust eigi jörðuð négn fljótt, þá tók hann það til bragðs, að drekkja þeim í Loire-fljótinu, er borgin stendur við. Til þess að reyna hvernig þetta gæti tekizt sem best, tók hann 90 presta, setti þá út á skip,

lèt flytja það út á fjótið og sökkva því þar. Þegar þetta gekk svo greitt, voru menn teknir á nætarþeli úr dýflissunum, og fluttir út á skip, 100 eða 200 manns á hvert, keyrðir þar niður undir þiljur, og öllum harðum og hlemmum vandlega læst. Þegar böðlarnir höfðu lokið þessu starfi, fóru þeir á burt, en smiðir komu á smábátum, og lögðu að skipunum og hjuggu göt á, og saku þau svo niður með öllu sem á var. Á þenna hátt týndu milli 4 og 5000 manna lífinu. Carrier þóttist maður að meiri, er honum hafði hugsast slíkt snjallræði. Íbúar Nantes-borgar höfðu bjargað mörgum úngbörnum og tekið þau til fósturs, þegar foreldrar þeirra á Vendée féllu fyrir vopnum, eða flæmdust frá heimilum sínum. «Þetta eru úlfshvelpar», mælti Carrier, og lèt taka börnin og drekkja þeim. Svo segja nokkrir sagnaritendur, að þann tíma, er hann hafði yfirráðin í Nantes, hafi þar verið drepnar um 15000 manna; aðrir segja þá færri.

Þannig hafði nú stjórnin í París, eða, með öðrum orðum, velferðarnefndin, sigrast á öllum mótstöðumönnum sínum innanlands. Hún gjörði hvorttveggja, bæði að bæla niður alla upp-reistarmenn þar sem þeir bærðu á sér, og líka hitt, að halda öllum landslýðnum hræddum, svo að hann þorði eigi sig að hreyfa. Umboðsmenn stjórnarinnar og undirtyllur þeirra voru um allar sveitir, og tóku hvern mann fastan eftir því sem sjálfr þeirra geðþótti bauð, og hrifsuðu eigur þeirra undir sig. Einn þessara manna, er Dumont hét, og fór um Norðurfrakkland, ritaði meðal annars stjórninni í októbermánuði þannig: «eg finn daglega nýja fjársjóði, peninga, silfurskeiðar o. fl., og kalla það góðan feng, því að höfðingjarnir eiga. Eg handsama alla presta, er halda sunnudaginn heilagan. Í hlöðu einni hitti eg 3 dýr svört, er menn nefna múnka, og lèt taka þau». Þess konar fréttir bárust úr öllum áttum. Enginn maður var óhultur um líf sitt eða eignir, og var af öllu saman þessu mikill ófagnaður um land allt.

Eitt af því, sem menn ræðu á og vildu kollvarpa um þessar mundir, var hin kristna trú. Var það Hébert og hans flokkur, er mest og best gengust fyrir því, að eyða trúnni. Parísarklerkarnir sögðu af sér embættum, og flestum kirkjum var þar lokað. Höfuðkirkjan (Notre-Dame) var gjörð að m u s t e r i s k y n s e m i n n a r, og skyldi þar 10. hvern dag haldin

hátíð, ræður fluttar og þjóðsöngvar sýgnir. Hinn 10. dag nóvembermánaðar (20. Brumaire) var hin fyrsta hátíð haldin. Ung prentarakona var látin tákna skynsemis-gyðjuna. Hún sat á stóli forkunnarfögnum, skrydd hvítum klæðum, með bláa heklum á herðum, slegnu hári og rauða húfu á höfði; hvítklæddar yngismeyjar rósum prýddar og blómsveigum, stóðu umhverfis. Því næst var gyðjan borin af 4 mönnum, sitjandi á stóli sínum, til þingsalsins, í dýrðlegri prócessíu. Þegar þangað var komið, stóð gyðjan upp úr sæti sínu, gekk til forseta, og hann í móti, og svo kystust þau, en þingið laust upp fagnaðarópi. Þetta var þeirra guðspjónusta.

Eftir að Girondínar voru liðnir undir lok, gátu engir staðið Jakobínur á sporði; þeir máttu heita einvaldir, og gekk svo um hríð. En eigi leið á löngu, áður ýmsar greinir urðu með þeim, svo að auðsætt var, að leiða mundi til flokkadráttar. Sumum þótti að of mikilli hörku hefði verið beitt við Girondína og ýmsa aðra, er sömu kjörum urðu að sæta, að ráðið hefði verið með ofmikilli frekju á trúarbrögð og helga siðu, og hitt, sem þeir vildu setja í staðinn, væri ekki annað en guðleysi, o. s. frv. Þar á móti sagði Hébert og hans fylgismenn, er mestu reðu í bæjarstjórninni (í París), að þeir, sem slíkt segðu, ætluðu sjer að koma aftur á fót nýjum mótstöðuflokki og vekja nýjar óeirðir í lýðveldinu.

Danton hafði um tíma verið norður í landi, tekið sèr hvíld frá þingstörfum, og lifað þar með kyrr og spekt í fegurð náttúrunnar. Nú kom hann aftur til Parísar um þessar mundir. Menn vissu, að honum hafði komið til hugar að bjarga Girondínum, að hann hafði tekið sèr nærri afdrif þeirra, og að hann vildi, að endir yrði á öllum ofsóknum og allri grimd, jafnskjótt sem hættan væri úti. Nú var það sýnilegt, að mestu hættunni var lokið, að minsta kosti um stundarsakir. Þess vegna tók Danton málstað þeirra manna, er nú vildu fara að öllu með stillingu og sanngirni, og fékk því komið til leiðar, að þingið gjörði nokkrar fyrirskipanir í þá átt. Vinur hans, Camille Desmoulins, mesti ritsnillíngur, gaf út nýtt blað, er hét: „hinn gamli Cordelier“ og var í því einatt farið ómjúkum orðum um Hébert og hans fylgifiska, og alla þá, er enga vægð eða vorkunn vildu sýna. Hébert þorði ekki með fyrsta að ganga í berhög

við Danton, en rægði hann í leynum það hann kunni, og sá rógur festi sums staðar rætur. Eins og við var að búast, fór óvildin vaxandi milli manna, þeirra sem hófsins vildu gæta og hinna, sem ekki kunnu sèr hóf í neinu. Robespierre gaf hvor-um tveggja auga, og var illa við þenna ágreining. Honum og hinum öðrum, er sátu í velferðarnefndinni, virtist svo, sem þessi tvídrægni gæti komið miklu illu til vegar. Hann vildi, eins og nú var komið, komast hjá nýrri stjórnarbyltíngu, að þingið gæti náð alþýðuhylli, og velferðarnefndin hylli þingsins, því að hann vildi hafa sterka stjórn. Honum þótti ískyggilegt, að menn skyldu vera farnir að bera sakir á slíka ættjarðarvini sem Danton og Camille Desmoulins; hann þóttist sjá fyrir, að guðleysi það, sem var að ryðja sèr til rúms, mundi koma óorði á Frakka í augum útlendra þjóða; hann þóttist vita, að útlendingar væru hér í verki með, og ættu illan hlut að máli. Þess vegna þótti honum nauðsynlegt, að stjórnin lèti nokkuð til sín taka og sýndi í verki, að hún væri vaxin öllum flokkum yfir höfuð. Velferðarnefndin afrèð því, að halda flokkum þessum í skefjum, og koma því svo fyrir, að þeir gætu engan skaða gjört. Robespierre snerist því fyrst við þeim floknum (Héberts-mönnum), er ákafari var, og honum virtist í bráð hættulegri, og bar á hann þær sakir, að hann væri í vitorði með útlendingum, er alt vildu gjöra Frökkum til ógagns, en lèzt taka málstað Dantons og hans fylgismanna, því að honum (Robespierre) þótti þeir, eins og þá stóð, ekki vera til muna viðsjárverðir. Þeir höfðu enn ekkert það aðhafzt, er hindrað gat straum stjórnarbyltíngarinnar, og þeirra flokkur var enn hvorki mannmargur eða harðsnúinn.

Viðskifti Frakka við aðrar þjóðir gengu að óskum. Það voru farnir að koma í ljós úngir og efnilegir hershöfðingjar, er sýndu, að þeir kunnu að stýra mönnum og leiða þá til sigurs þótt liðsmenn væri, enn sem komið, lítt vanir orustum. Norður í landi hafði sá maður, er *Jourdan* hét, tekið við herstjórn. Á yngri árum var hann liðsmaður og valdalaus með Vesturheims-mönnum, þá er þeir börðust við Englendinga og náðu frelsi sínu. Síðan var hann nokkur ár eins konar Kaupahèðinn, fór um sveitir og lèt vöru fala. En árið 1791 gekk hann öðru sinni og óbeðinn í herþjónustu, og var 1793 orðinn hershöfðingi. Hann rak Austurríkismenn norður yfir landamæri. Enn betur

gekk Frökkum austur í landi, eftir að þeir *Pichegru* og *Hoche* tóku við herstjórn. *Pichegru* var fyrst undirforingi við fallbyssuliðið, fylgdi stjórnarbyktingunni af miklum áhuga og var um hríð forseti í einni deild *Jakobína-félagsins*. Hann var kaldlyndur maður og kjarkmikill, frásneiddur skemtunum, en fróðleiksgjarn. *Saint Just* kom því til leiðar, að honum var falið herstjórn á hendur austur í *Rínardal*; tók þá að halla á *Þjóðverja*. *Lazarus Hoche* var af fátæku foreldri kominn og alinn upp við fátækt, en var þegar á unga aldri afbragð sinna jafnaldra að námsgáfum og allri atgjörfi. Hann var á 16. ári, er hann gekk í herþjónustu, og varð skjótt frægur af framgöngu sinni, en á 25. ári (1793), er hann varð höfðingi fyrir liði því, er *Frakkar* höfðu í *Mósel-dalnum* móti *Prússum*. Þar vann *Hoche* ekki á, og gaf hann því stjórninni það ráð, að sameina hvorttveggja liðið, bæði það, er hann sjálfur stýrði, og hitt, er *Pichegru* ræð fyrir, og var svo gjört. Varð *Hoche* því næst yfirhöfðingi hins sameinaða herliðs, og stóðst þá ekki við honum, enda hrakku *Prússar* og *Þjóðverjar* fyrir og austur yfir *Rín*. Það var síðustu dagana í desembermánuði 1793, litlu síðar en *Frakkar* unnu *Toulon* úr höndum *Englendinga*.

Þegar litið er yfir viðburði þá, er gjörðust á *Frakklandi* árið 1793, þá gegnir það undrum, hve miklu landstjórnin (þ. e. velferðarnefndin og þjóðþingið) fékk til leiðar komið. Varla hefir nokkur landstjórn öðru sinni verið umkríngd meiri hættum, en *Frakkastjórn* ár það, er hér ræðir um. Árið 1792 höfðu *Prússar* og *Austurríkismenn*, er þá brutust inn á *Frakkland*, hvorki verið mjög fjölmennir eða vel samhentir, enda farið í ýmsu ráðlauslega. *Frakkar* ráku þá af höndum sér, *Prússa* austur yfir *Rín*, *Austurríkismenn* austur yfir *Maas-fljót*, og létu eigi þar með búið, heldur lögðu þeir undir sig meiri hluta *Niðurlanda*, unnu *Mainz*, *Savoyen* og *Nizza*. Árið 1793 — þetta ógnarár í *Frakkasögu* — gengur ískyggilega í garð. *Englendingar*, *Hollendingar* og *Spánverjar* ganga í sambandið móti *Frökkum*. Nú eru þeir umsetnir af fjandmönnum á allar hliðar, bæði á sjó og landi. *Dumouriez* brýzt inn á *Holland*, en nær þar engri fótfestu, því að *Austurríkismenn* neyða hann til að hverfa aftur. *Frakkar* bíða ósigur við *Neervinden* og missa *Niðurlöndin* (*Belgíu*). Ósigrinum fylgir reiði og gremja, og *Dumouriez* stókkur af landi burt. Um sama

leyti fer Custine flatur fyrir Þjóðverjum, hröklast vestur yfir Rín, kemst ekki til Mainz, svo að sú borg verður að bjarga sér sjálf móti Prússum, er setjast um hana með óvígum her. Ítalir, eða réttara Piemontsmenn, vinna sigur á Frökkum suður í Alpa-fjöllum, Spánverjar setjast í Pyreneafjölin, og hafa 50000 vígra manna. Ýms fylki vestan á Frakklandi (Vendée) gjöra uppreisn móti stjórninni, því að þeim gremst bæði það, að þeir eru sviptir prestum sínum, og svo hitt, að margar þúsundir ungtra manna eru heimtaðar af þeim til herþjónustu. Þá sér stjórnin, að annaðhvort er að gjöra: falla eða hlífast eigi við, og þá lætur hún leggja hendur á Girondína, til þess að ryðja þeim úr vegi, er hyggja á miskunn og meðalhóf. Þetta ofríki afþýður þjóðinni; af 83 fylkjum rísa 67 upp til mótstöðu við stjórnina, hvert óhappið fylgir á annað ofan, og ekki er annað sýnna, en að innlendir og útlendir óvinir taki París og eyði öllu því, er áunnizt hafði gott og gagnlegt í stjórnartyltingunni. Aldrei höfðu önnur eins vandræði að höndum borið. En með hættunni vex stjórninni hugur og dugur. Hún kúgar fê af öllum, er það hafa, og hún kemur fótum undir talsverðar hersveitir, er hún sendir í allar áttir, enda er Carnot þá genginn í nefndina og hrindir öllum hermálefnum í lag. Ávextirnir koma bráðum í ljós af því dæmalausum þreki og dugnaði, er stjórnin lagði þá fram. Ýmsar borgir og byggðarlög eru jafnskjótt kúgnð til hlýðni. Jourdan ber herra hlut í viðskiftum við Austurríkismenn norður í landi, sömuleiðis Pichegru móti Prússum og Þjóðverjum. Kellermann rekur Piemontsmenn suður yfir fjöll, Spánverjar vinna ekki á, ráðsnild Klebers kemur Vendée-byggjum á knè. Loksins leggja þeir smiðshöggið á, Hoche austur frá, er hann rekur Þjóðverja yfir Rín, og Napóleon Bónaparte suður frá, er hann finnur ráð það, er dugði til þess að reka Englendínga burt úr Toulon. Við árslokin (1793) hafði stjórnin þannig bælt niður að mestu allan innanlands ófrið, og rekið af höndum sér alla útlenda óvini.

Þess er áður getið, að Velferðarnefndin hafði angastað á þeim tveimur flokkum, sem nú kvað mest að í París, Hébertsmönnum og Dantonsmönnum, og einsetti sér að halda þeim í skefjum. Það hefir einnig verið bent til þess, hverja stefnu hvor af þessum flokkum vildi halda. Nefndinni líkaði við hvor-

uga, eins og ráða má af orðum Robespierres, er hann talaði á þingi 5. febr. 1794. Hann sagði, „að annar af flokkum þessum (Hébert) eirði engu og kynni sér ekkert hóf, en hinn flokkurinn (Danton) væri hneigður til óhófs og munaðar, eins og fyr hefði átt sér stað, og gjarn á vorkunnsemi við óhlutvanda menn“. Þenna vetur var húngur mikið og harðrætti í París meðal fátækra manna. Þángað hafði áður verið flutt gnægð af sláturfæ, bæði af Vendée og austan úr Ríndalnum, en nú var loku fyrir þá aðflutninga skotið síðan ófriðurinn hófst. Þeir, sem þetta kom niður á, kvörtuðu sáran, og það lá við vandræðum. Hébert og hans flokkur gáfu stjórninni sök á öllu þessu, og sögðu jafnvel, að hún byggði yfir svikum. Um það leyti kom St. Just til Parísar, eftir 4 mánaða dvöl við herinn. Hann var löngum ótraður til stórræða, og miklu djarfari til framgöngu en Robespierre vinur hans, enda gaf haun þá þegar það ráð, að menn skyldu taka allar eigur þeirra manna, er sátu í varðhaldi og dýflissum, og skifta þeim milli allra þeirra, sem bágstaddir væru, og var það undramikið fæ. Slíkt gat Hébert ekki boðið, og nú fékk stjórnin mikið lof á sig hjá öllum þeim, er hjálparinnar nutu. En nú hugsaði stjórnin (Robespierre) þeim Hébert þegjandi þörfina. Þegar Hébert sá hvað verða vildi, reyndi hann að koma af stað upphlaupi gegn stjórninni, en fáir sem engir sintu því, og varð hann þá og hans fylgismenn að draga sig í hlè. Þá þótti Robespierre tími til kominn að gjöra út af við þenna flokk. Collot d'Herbois, aldavinur Héberts, þóttist nú eigi lengur geta liðsint honum, og sagði því skilið við hann. En hins vegar krafði hann þess, að Danton og fylgismenn hans væru einnig dregnir fyrir lög og dóm. Hann hataði Danton og hans flokk, því að af þeim hafði hann fengið þúngar ákærur fyrir frammistöðu sína og aðfarir í Lyon. St. Just studdi fast að þessu með Collot, en Robespierre fór sér hægt, og lét eins og sér þætti mikið fyrir að snúast í móti fornkunníngjum sínum, Dantoni og Camille Desmoulins, en þó eru allar líkur til þess, að hann hafi helzt viljað þá báða feiga. Robespierre óttaðist alla afbragðsmenn, og stóð stuggur af þeim, og því verður eigi neitað, að þeir Danton og Camille voru það báðir, hvor á sinn hátt.

Þegar komið var fram í miðjan marz mánuð (1794) var Hé-

bert, Chaumette og 20 aðrir af þeim flokki teknir og settir í varðhald. Ýmsar sakir voru á þá bornar, en sú var þó hin helzta, að þeir væru þjónustusveinar Pitts, og hefðu ráðið með sèr, að koma af stað stórkostlegum ránum og manndrápum. Ekki varð þetta reyndar sannað, en menn voru ekki svo vandlátir í þeim efnum um þær mundir, og enginn varð til að mæla þeim bót. Voru þeir síðan allir höggðir.

Danton, Camille Desmoulins og nokkrir af vinum þeirra voru teknir höndum skömmu síðar (aðfaranótt 31. marz 1794). Hérault de Séchelles hafði verið tekinn litlu áður, því að St. Just hafði ákært hann fyrir það, að hann hefði hýst sekan mann. Danton vildi eigi trúa því, að nokkur mundi þora að leggja hönd á sig, og fyrir því hafði hann ekkert gjört til þess að forða sèr. Þegar um morguninn eptir spurðust þessi tíðindi um alla borgina, og þótti mikils um vert. Á þingið sló ótta og undrun, og sátu menn hljóðir um stundarsakir. Loksins tók einn af þingmönnum til máls, er Legendre hét, og kvað eigi annað hlýða, en að Danton fengi að bera fram vörn sína á þinginu, enda var það hið besta ráð til þess að bjarga honum. Í því komu þeir á þing Robespierre og St. Just, og báru margar og þúngar sakir á þá Danton, og þó að flestar þeirra væru ósannar og hinar hefðu við lítið að styðjast, ályktaði þingið engu að síður, að þeir skyldu dregnir fyrir stjórnbýltíngardóminn. Þegar kom fyrir dóminn, var það engu líkara en að Danton væri sakaráberi, en dómendur allir sakbitnir, svo var hann þá snúðuglegur, og höfðu þeir allir beig af honum. Þá hann var spurður að heiti, aldri og bústað, mælti hann: „eg er 34 ára, nafn mitt stendur ritað í musteri sögunnar, en bústaður minn verður innan skamms í hinni eilífu auðn“. Hann gjörði sèr lítið far um að verja mál sitt, en hitt sparaði hann eigi, að láta beiskyrði dýnja yfir velferðarnefndina og alla sína fjandmenn. Dómendur komust í hálfgjört ráðaleysi, og tóku það til bragðs að skýra velferðarnefndinni fra málavöxtum. St. Just fékk þá komið til leiðar þeirri þingsályktun, að dómendum var boðið að leiða sökina til lykta sem allrafyrst, og var það alt hið sama sem að banna hinum ákærðu mönnum alla vörn. Var þá litlu síðar kveðinn upp dauðadómur yfir þeim Danton, og 5. dag aprílmánaðar voru þeir höggðir.

Þannig eyddi stjórnin (velferðarnefndin) báðum þessum flokkum, Hébertsmönnum, er engu eirðu, og án alls efa voru hverri stjórn hættulegir, og Dantonsmönnum, er vildu nema þar staðar sem komið var, og friða aftur þjóðina og græða af þeim sárum, er hún hafði fengið, og þess vegna voru alt annað en hættulegir. Þegar helztu forvígismenn flokka þessara voru fallnir, þorðu aðrir, er með þeim höfðu staðið, ekki annað en auðmýkja sig við stjórnina. Jafnvel þingið sjálft gjörði ekkert annað en það, sem henni var geðfellt. Stjórnin var þannig einvöld, og gat viðstöðulaust komið öllu sínu fram. En þó nú svo væri, þó stjórnin hefði rutt öllum mótspyrnum á braut, og enginn þyrði orð að mæla í gegn henni, var samt gremjan eftir og hatrið í brjóstum manna, og beið þess, að færi gæfist til hefnda við harðstjórana. Robespierre setti þá menn eina til valda í bæjarráðinu og lögreglustjórninni, er hann þóttist mega treysta. Þó var honum eigi rótt. Hann þóttist vita, að margur hataði sig í þeli niðri, jafnvel í velferðarnefndinni. Vissi hann, að St. Just og Couthon voru hans einustu vinir, Hann hafði beig af þeim hershöfðingjum, er sigursælir voru. og höfðu almannalof, og því var það, að ágætismaðurinn Hoche, er þá þótti einna helstur af hershöfðingjum Frakka, var tekinn og settur í varðhald. St. Just var öðru hverju við herinn sem umboðsmaður stjórnarinnar, til þess að hafa augastað á hershöfðingjunum. Honum vildi Hoche ekki hlýða í öllu, og það þótti þeim St. Just og Robespierre óþolandi. Slíkur afbragðsmaður gat orðið þeim hættulegur, og fyrir því var hann tekinn. En það var Carnot að þakka, að sökinni var frestað, svo að hún kom eigi í stjórnbýltingardóm.

Robespierre var nú orðinn því nær einvaldi alls Frakklands, og til þeirrar upphéðar hafði hann komið, þótt hann skorti andlega atgjörfi og málsnild á við Mirabeau eða Vergniaud, eldlegt fjör og karlmanns kjark á við Danton, og þótt hann mætti hugltill heita. Hann hafði haft vit á, að beita dugandi mönnum í sínar þarfir, og láta þá eigast ilt við og eyða hverja öðrum, ef þeir ætluðu að gjörast honum erfiðir. Hann hafði manna bært lag á því, að gjöra þá, er hann óttaðist, tortryggilega í annara augum og svifta þá áhiti og vinsældum, en koma því orði á sjálfan sig, að hann væri hinn ráðvandasti maður og óser-

plægnasti alþýðu vinur. Hann var að því leyti ólíkur mörgum af höfðingjum stjórnbyltíngarinnar, að hann var hvorki ágjarn til fjár, nè hneigður til munaðar. Hann var sparneytinn og hófsamur í öllu sínu dagfari, bjó alltaf á sama stað, í óbreyttu húsi hjá trèsmiði einum, og átti gott við hann og hans hyski. Hin eina ástriða, sem hann hafði, var drotnunargirni, og til þess að seðja hana stóð honum á sama hvert meðal var við haft, og hann hafði svo mikla ást á sjálfum sér, að hún yfirgnæfði alla mannlega titfinningu í brjósti hans. Robespierre, St. Just og Couthon réðu mestu í velferðarnefndinni, og mynduðu þar eins konar þristjórnarvald. Þeir Barrère, Collot d'Herbois og Billaud Varennes réðu minnu og sáu ofsjómum yfir vogi og virðingu hinna þriggja samnefndarmanna sinna, en létu þó eigi á því bera. Carnot og tveir aðrir af nefndarmönnum höfðu allan hug á hermálefnum og öðrum sérstökum störfum, er fengu þeim nóg að vinna, svo þeir gáfu sig lítið við öðrum innlendum málefnum. Carnot, er var yfirskipaður alla hershöfðingja, veitti þeim völd og tók þau af þeim, hafði sjálfur að eins liðsforingja (kapteins) nafnbót. Hann var löngum á ferðum frá einni herdeildinni til annarar, og þá er heim kom, skilaði hann jafnan aftur óeyddum meira hlata þess fjár, er honum var ætlaður til ferðakostnaðar. Carnot hugsaði ekki um sjálfan sig, heldur um málefni þau, er honum voru á hendur fallin; óttaðist engan og fór ekki í manngreinarálit. Hann einn þorði að segja Robespierre sannleikann: „þú ert allsráðandi“, sagði Carnot einhverju sinni við hann, „og gjörir allt eftir sjálfs þíns hugþótta“. Robespierre hataði Carnot, en gat ekki án hans verið, og hugsaði sér að láta hann fá að kenna á því seinna, ef færi byðist.

Ráðgjafarnir höfðu stundum verið velferðarnefndinni all-erfiðir; voru nú þau embætti lögð niður, og öllum stjórnarstörfum skipt niður í tólf deildir, er allar stóðu beinlínis undir nefndinni. Robespierre setti þá eina til að gegna þar störfum, er hann vissi að hann mátti treysta, og þingið staðfesti þetta allt saman. Úr bæjarráðinu var þeim öllum vikið á burt, er eigi þóttu fáltryggir, og engin fálög, nema Jakobínafélagið eitt, máttu lengur eiga sér stað. Öllu þessu tóku menn með þögn og þolinmæði, því að enginn þorði að láta á sér bæra, hvorki í París nè annars staðar um landið. Hér var allt undir því kom-

ið, að embættismennirnir reyndust hlýðnir þjónar stjórnarinnar, og Robespierre lagði nú allan hug á það, að koma á fót sterkri einveldisstjórn, og hafa stráangan aga á öllu.

Í miðjum aprílmánuði (1794) kom St. Just á þing, og skýrði frá, hvernig ástætt væri í ríkinu. Hann mintist á hinn mikla skort á matvælum, er átt hefði sér stað í öllum hinum stærri borgum og einkum í París. Allir vissu, að orsakir til þessa voru þær, að allir atvinnuvegir voru eyddir eða raskaðir af óöld þeirri, er gengið hafði yfir landið. En St. Just vildi eigi við það kannast, heldur væri það, sagði hann, alt að kenna endalausum samsærum, og eina ráðið til þess, að bæta í búi hjá mönnum, væri að herða á allri lögreglustjórn, og kúga þá, sem þess þyrftu við. Hann lagði það til, að öllum „samsæris-mönnum“, hvar sem væru á Frakklandi, skyldi stefnt fyrir stjórnbyltíngardóm í París, og sá dómur alveg vera háður stjórninni. Þingið samþykkti tillögu þessa, en einatt var þó út af brugðið, og menn voru dregnir fyrir slíka dóma annars staðar en í París, og beittu þá umboðsmenn stjórnarinnar allri hinni sömu grimd, sem að undanfögnu. Þótti sá maður, er *Jósef Lebon* hét, taka flestum fram að því leyti. Hann hafði verið prestur, en síðan gengið í þjónustu stjórnarinnar, hafði aðsetu í Arras, og fór um Norðurfrakkland með engu minna grimdaræði en Carrier vestur í landi. Menn voru sendir frá Arras til þess að tjá Robespierre raunir sínar — hann var sjálfur frá þeirri borg — en sendimenn fengu eigi að tala við hann, enda tóku þeir St. Just og Barrère málstað Lebons, og fékst þar svo engin bót á ráðin.

Um þessar mundir hafði St. Just frumvarp eitt í smíðum til laga um nýja tilhögan á þjóðfélaginu, er hann vildi öllu breyta og ummynda samkvæmt kenningum Rousseaus. Hinna einstöku heimila skyldi sem allraminst gæta, en alt skyldi miðað við hið almenna, við þjóðfélagið, eins og hjá hinum fornu Spartverjum, öll sveinbörn alin upp í félagsskap, allir vinna þjóðfélaginu frá 16. ári til þess þeir hefðu einn um tvítugt, en ganga í herþjónustu þess frá 21. til 26. árs, síðan skyldu allir, nema þeir sem eitthvert embætti hefðu á hendi eða væru iðnaðarmenn, taka jörð til ábúðar og yrkja hana. Erfðaréttinn skyldi takmarka þannig, að börn og afkomendur tækju að eins arf eftir foreldri sitt, en eigi eftir aðra frændur, væri barn eigi

til skyldi þjóðfjárhirzla taka arf. Hjón skyldu slíta samvistum, of saman hefðu verið 7 ár, og eigi orðið barna auðið. Eftir þessu var alt frumvarpið lagað. Það þóttist byggja á jafnrætti, en gætti eigi hins, að það lagði óeðlileg bönd á þjóðfélagið, og frelsinu var alveg útrýmt, og það var þó beint á móti tilgangi stjórnbyltíngarinnar.

Hið nýja lýðveldi varð einnig að fá nýja trú, lagaða sem mest eftir kenningu Rousseaus, og Robespierre færði mönnum sjálfur þann boðskap í ræðu þeirri, er hann flutti 7. dag maímánaðar. Fór hann þá ómjúkum orðum um konunga, klerka og guðleysingja, og bar að lyktum upp frumvarp þar að lútandi, og er þetta upphaf að: Tíunda hvern dag í árinu skyldi helgan halda í kirkjunum með ræðum og lofsöngum, til minningar um ýmislegt. Þannig skyldi hinn fyrsti af þessum dögum vera helgaður hinni æztu veru; annar mannkyninu, þriðji Frökkum, fjórði velgjörðamönnum mannkynsins, fimti píslarvottum frelsisins, sjötti frelsi og jafnrætti, sjöundi hatri til harðstjóra o. s. frv.

Áttunda dag júnímánaðar fóru í fyrsta sinni fram helgihöld eftir hinum nýja sið, var það mikil hátíð, og í minning hinnar æztu veru. Davíð, hinn nafnfrægi málari, hafði undirbúið öll hátíðahöldin sem skrautlegast. Húsin voru skreytt fán-um og blómum, bæjarbúar voru kvaddir til fundarins með bumbuslætti um alla borgina. Nær dagmálum gekk mannfjöldinn hátíðagöngu í aldingarö Tuileri-hallarinnar, en fallbyssuskotin dundu við á meðan. Því næst komu þingmenn allir og Robespierre í broddi fylkingar, klæddur einkennilegum búningi. Þar var ræðustóll, er Robespierre steig í og flutti ræðu um hina æztu veru, er skapað hefði mannkynið, og ætlað því að ná hamíngju með dygd og réttlæti. Þá kom lofsöngur, súnginn og leikinn á hljóðfæri af mörgum þúsundum. Því næst steig Robespierre úr stól, og kveikti í mynd einni, er þar stóð skamt frá, og táknaði guðleysið styðjandi sig við sjálfselsku, sundurlyndi og drotnunargirni. Þegar mynd sú var brunnin og reykinn lagði frá, kom í ljós líkneskja vízkunnar, en hún var reyndar orðin nokkuð svört af reyknun. Þá talaði Robespierre aftur, og að því búnu hélt allur söfnuðurinn út á Marzvöllu, og tóku þar við söngvar og gleðileikir. Þann dag komst Robespierre hæst í heiðrinum, en þó bar lítinn skugga á, því að nokkrir af þingmönnum

gátu eigi varizt þess, að gjöra gys að ýmsu, er fyrir þá hafði borið þenna dag. Aðrir létu sér um munn fara orðið „harðstjóri“, og að til væru enn þá Brútusar. Sá maður, er Bourdon hét, hvíslaði honum í eyra: „Tarpejuklettur er rétt við kapítólíum“. Robespierre hugsaði sér, að þessir skyldu eigi verða ellidaufir, og, til þess að koma því fram, var það litlu síðar (10. júní) tekið í lög, að stjórnabyltíngardómurinn skyldi geta dæmt menn til dauða án allrar rannsóknar, vitnaleiðslu eða varnar. Þingið hafði reyndar sett þá grein í lögín, að engan af þingmönnum mætti draga fyrir þenna dóm, nema því að eins að alt þingið leyfði, en Robespierre og þeir, sem með honum stóðu, fengu þingið til þess að taka greinina aftur, og samþykkja lögín án hennar; mátti því svo að orði kveða, að Robespierre hafði hvers manns líf í sinni hendi. Alt árið á undan þeim degi (10. júní), er lög þessi voru samþykkt, hafði að vísu fjöldi manna verið til dauða dæmdur og af lífi tekinn, en það komst þó í engan samjöfnuð við alt það sem á gekk, og öll þau manndráp, sem urðu eftir að lögín komu út, og þær 6 vikur, er þar fylgdu næstar á eftir. Mennt geta gjört sér hugmynd um þetta, þegar þess er gætt, að frá því í marzmánuði 1793, er dómur þessi tók til starfa í París, og til 10. júní 1794, hafði hann dæmt til dauða 577 manns, en frá 10. júní 1794 til 27. júlí sama ár, voru dæmdir til dauða 1285 manns.

Það reður að líkindum, hvernig hagur manna hafi verið á Frakklandi um þessar mundir, eða við hvern kost landsfólkið hafi átt að búa. Margar þúsundir manna voru sumpart fallnar í innanlandsóeirðum, sumpart flúnar af landi burta eða sátu í fangelsum, og allur þorri þessara manna voru á einn eður annan hátt dugandi menn, er þjóðin mátti sízt missa. Talsvert á aðra millión manna hafði orðið að ganga í herþjónustu gegn útlöndum fjandönnnum og yfingfa hús og heimili; og hinir voru lítilu færri, er stjórnan hafði sett til sinnar þjónustu út um allt land, og allir þeir mörgu þjónustumenn urðu að fá sín verklaun. En hér var eigi hægðin á: vinnuaflið skorti í borgum og bygdum, og flestir atvinnuvegir voru í lamasessi. Til þess að hafa eitthvað handa á milli til útgjaldanna greip stjórnan til þeirrar harðneskja, að hún lagði hendur á eignir manna, kúgaði þá til að lána sér fê, gaf út ógrynna af seðlum, er vera

skyldu fult ígylði peninga, en seðlarnir lækkuðu því meira í verði, sem fjöldi þeirra varð meiri. Stjórnin komst oft í mestu vandræði, er hún þurfti að kaupa vistir handa hetnum. Þá var alt kúgað út af mönnum sem til var, og þó var stjórnin jafnan í mestu peninga þröng. Alt gekk á tréfótum: þjóðvegir og siki gengu úr sér, því að þeim var eigi upp haldið; skógar lögðust í eyði, akuryrkju hnignaði, af því að fê og fólksafia vantaði, og hestar og annar kvikfænaður fór til hersins. Alt hið sama var að segja um iðnað og verzlun, verksmiðjur allar stóðu óhreyfðar og aðgjörðalausar, nema þær einar, sem smíðuðu vopn og verjur og annað, er herinn þurfti á að halda. Allur félagsskapur manna á millum var horfinn, ótti og tortrygni átti sér alls staðar rúm, menn þorðu varla að talast við. Enginn var óhultur á heimili sínu, því að á hverri stundu mátti búast við komumönnum, til þess að rannsaka hús og eigur manna, eða til að taka þá sjálfa fasta. Menn fundu til þeirrar harðstjórnar, sem yfir öllum grúfði, og sú harðstjórn var því verri og tilfinnanlegri, sem menn vissu eigi með fullum sanni, hvaðan hún hafði sín upptök, hver sá maður var, er í raun og veru hafði líf og eignir hinnar frakknesku þjóðar í hendi sér, því að það var eins og stjórnin væri alls staðar, og engin föst regla á neinu; engum var unt að segja, hver mál-efni heyrðu til þess eður þess valdsmanns, til þingsins eða til velferðarnefndarinnar.

Robespierre vildi eflaust koma meiri og fastari reglu á stjórnarstörfun, en slíkt gekk eigi svo greiðlega sem hann vildi; menn voru bæði á þinginu og í stjórnardeildunum, búnir að fá nóg af hans yfirráðum. Meðalhófsmenn þingsins gáfu sig lítið fram enn sem komið var, og meðal hinna áköfu manna (fjallsins) voru mjög fáir orðnir eftir, er beinlínis vildu fylgja Robespierre að hverju máli. Hatrið á milli Héberts og Dantons manna fór minnkandi dag frá degi eftir því sem þeir sáu, að hinn sameiginlegi óvinur þeirra hvortatveggja varð sterkari og vobalegri. Menn vissu, að Robespierre hafði augastað á nekkrum meðal þingmanna, er hann ætlaði að stytta aldur, og margir þeirra urðu svo skelkaðir, að þeir þorðu eigi að vera um nætur á heimilum sínum. Þingið var orðið fremur fáment, um þessar mundir, svo að varla sóttu

fundi nema 200 manns. Af 750 þíngmönnum var búið að drepa 50; ófriðhelgir voru 20, í varðhaldi sátu 73, í sendiferðum stjórnarinnar voru 100, og hinir aðrir komu eigi á þíng, eða sátu í fóstum þíngnefndum.

Það er engum efa undirorpið, að Robespierre hefði þegar látið taka þá af þíngmönnum fasta, er hann vildi feiga, ef hann hefði séð sér það fært. En samstjórnendur hans í velferðarnefndinni, Billaud, Collot og Barrère, og aðrir fleiri, vildu eigi samþykkjast því, og þess vegna áráddi hann það eigi. En nærri má geta, hvernig hoðum hafi fallið, að mæta slíkri mótstöðu, og það í sjálfri nefndinni. Þá bar það og til, einmitt um sama leyti, að siðgæzlunefndin hafði komið að því, að trúvillumenn nokkrir áttu fundi með sér í húsi gamallar konu, er Katrín Theot hét. Hún hafði fyrrum setið í «Bastillen» og orðið þar hálfríngluð, nefndi sjálfa sig «guðs móður», og boðaði komu Messiasar í heiminn, og þá er hann birtist, átti eilífðarinnar dagur að renna upp yfir alla útvalda. Hún nefndi Robespierre son sinn elskulegan, og flokksmenn þessir gjörðu sér þá hugmynd um hann, að hann væri að minsta kosti spámaður hafinn langt yfir alla aðra. Mennt sögðu, að Robespierre væri vel kunnugt um flokk þenna, og þætti eigi miður að trú hans breiddist út meðal almennings. Nú höfðu siðgæzlumenn handsamað kerlingu þessa og allan söfnuðinn, og borið málefnið fram á þíngi. Vildu þá óvinir Robespierres, og höldu því fast fram, að flokkurinn yrði með öllu upprættur, sem gagnstæðilegur rætti trú og góðum siðum. Robespierre þóttist sjá, að leikurinn var til þess gjörður, að gjöra sig hlægilegan í augum þíngs og þjóðar, og sveið honum það sárast af öllu. Þess vegna kom hann sjaldan á þíng eftir þetta, og sjaldan á aðalfundi velferðarnefndarinnar, en dró sig í hlé. Hann hafði það álit á sjálfum sér, að alt mundi fara aflaga á þínginu og í nefndinni, ef hann væri þar eigi við, sem leiðbeinandi og stýrandi; þá mundu menn bezta finna, hver hann hefði verið og hvað menn hefðu mist, og þá mundi tími og tækifæri komið, að ná aftur í óskoruð völd yfir þjóðinni. En því sjaldnar sem hann kom á þíngið eða í nefndina, því oftár kom hann á félagsfundi Jakobína. Þar bar hann jafnan sakir á mótstöðumenn sína: þeir sætu á svikráðum við fósturjörðina, og alla hennar beztu vini, þeir reyndu til að

raska friðnum innanlands o. s. frv. Þannig gjörði Robespierre það hann kunni til þess, að þeir skyldu verða sem tortryggilegastir í augum Jakobína og þeirra allra, er þann flokk fyltu, en eigi hafði hann hug til að ráða atför við þá þegar í stað.

Undir lok júnímánaðar kom St. Just heim norðan úr landi. Hann hafði verið þar við herinn eins og oftár, og sagði þaðan góðar fréttir. Höfðingjar fyrir liði Frakka þar nyrðra voru þeir Pichegru og Jourdan. Hældu þeir liðinu inn á Belgíu, sinnir í hvorum stað, og áttu ýms vopnaviðskipti við Austurríkismenn, til þess er Jourdan vann á þeim sigur í stórorustunni við *Fleurus* (26. jún. 1794), urðu þá Austurríkismenn að rýma Belgíu, og halda austur á Þýzkaland. Um sama leyti börðust Frakkar austur við Rín og suður við Pyreneafjöll, og báru alls staðar sigur úr bítum. En Robespierre þótti það engar gleðifréttir, því að Carnot og hershöfðingjarnir, og aðrir en hann sjálfur, höfðu alla sæmd af sigrinum. Þess vegna leitaðist hann við, hve nær sem hann flutti ræðu á Jakobínafundum, að gjöra sem minst úr hverjum sigri, og eyða þeim áhrifum, er sigurfregnin hafði á menn. «Hvað gagna oss», sagði Robespierre, «þessar sigurvinnningar, sem svo mikið er skrumað um? Hinn sanni sigur er sá, sem vinir frelsisins vinna á flokkadráttum heima fyrir, sá sigur flytur frið, réttlæti og hamingju inn í hýbýli manna. Frægð einnar þjóðar er eigi komin undir því, að hafa sigrazt á nokkrum harðstjórum og leyst fjötra af þegnum þeirra. Rómverjar og sumar aðrar þjóðir nutu þeirrar frægðar. En vort ætlunarverk er miklu æðra og veglegra; vèr eigum að grundvalla yfirráð vizkunnar, réttlætisins og dygðarinnar hér á jörðu». Robespierre hafði engan hug á hermálefnum og vantaði allan garp-skáp og áráði. Þar á móti skorti St. Just þetta hvorugt, enda ræð hann fastlega til þess, að ryðja þingið nú þegar, eða með öðrum orðum, handtaka alla þá þingmenn og styttu þeim aldar, er væru mótsnúðir Robespierre. Þeir Tallien, Fouché og aðrir fleiri, sem dauði var ætlaður, voru reknir úr Jakobínafélaginu, og félagið sendi nefnd manna til þingsins, til þess að bera þar upp umkvartanir yfir því dugleysi stjórnarinnar, sem nú ætti sér stað, og krefja þess, að hörðu væri beitt við alla þá, er á svikráðum sætu. Nefnd þessi lofaði að vísu aðgjörðir þingmanna, en kvað þó sárt til þess að vita, að þar sætu glæpa-

mennt á meðal þeirra. Þetta sýnir, að hér átti að viðhafa alla hina sömu aðferð, eins og áður: hleypa Jakobínafélaginu á vaðið, með því að láta það senda flokk manna með bænarskrá eða áskorun til þingsins, og sjá hver áhrif sú sendiför hefði, þar næst ætlaði Robespierre sjálfur að koma á þing, flytja þar ræðu, og halda fram sömu stefnu, sem sendinefndin hefði á undan farið. Vildi þingið eigi skipast við orð hans, þá var að gjöra slíkt hið sama, sem áður hafði verið gjört og gefizt vel, og það var, að umkrínja þingið með vopnuðu liði og kúga það til þess, er hann vildi vera láta. Daginn eftir að sendimenn Jakobína höfðu verið á þingi, kom Robespierre sjálfur þangað (26. júlí), og flutti þá lánga og allmerkilega ræðu. Hann hafði löngum verið sigursæll í ræðustólnum, og einnig nú bjóst hann við hinu sama. Meðal annars sagði hann svo: „allir þingmenn með góðri samvizku mega óhræddir vera; eg þekki einungis tvo flokka: góða og illa þegna. Eg hef sífelt barizt móti glæpamönnum, og þess vegna bakbíta menn mig og kalla mig harðstjóra. Hver er höfundur þessa róga? Fyrst og fremst Pitt og allir þeir harðstjórar, sem bera vopn í móti oss, og þar næst hinir seyrðu postular guðleysis og spillíngar. Og í hverra höndum er nú herlið vort, og fjárhirzlur og stjórn lýðveldisins? Í höndum samsærismanna, sem ofsækja mig. Hinir, sem ráðvandar vilja vera, fá engu ráðið. Menn gjöra sig slætta í máli, er þeir tala um sigursæld vora; en það er hvorki með fagurmælum eða fólkorustum, að vér eigum að leggja norðurálfuna undir oss, heldur með spekt laga vorra og mikilleik vorra manakosta. Fjármálefnum vorum stýra annaðhvort höfðingjar eða bófar eins og Cambon¹. Menn gjöra samsæri gegn frelsinu; menn taka vopnin úr höndum manna hér í París, og senda varnarmenn borgarinnar á burt. Samsærismennirnir eru hér alls staðar, þeir eru hér á þinginu. Hvað skal til ráðs taka til þess að frelsa fósturjörð vora? Menn eiga að handsama svikarana og hegna þeim,

1) Cambon var kaupmaður suður í landi, en eftir að hann varð þingmaður, gaf hann sig allan við fjárhagsmálum ríkisins, og þótti mikið að honum kveða, engu síður sakir mannkosta hans en vitsmuna. Hann hafði tekið málstað Girondína og viljað að þeim væri hlíf, en það mislíkaði Robespierre, og þaðan var óvildin komin.

skipa nýja stjórn undir yfirlýðingum þingsins, eyða öllum flokkum, en setja í þeirra stað vald réttlætis og frelsis».

Þegar Robespierre hafði lokið ræðu sinni, sátu þingmenn allir hljóðir um stund. Loksins lagði einn það til, að ræðan yrði prentuð og send út um land, en aðrir mæltu í móti, og spunnust af því lángar umræður. Cambon, Billaud Varennes og enn fleiri, er þóttust eiga Robespierre fyrir grátt að gjalda, sögðu að nú væri kominn tími til að segja sannleikann afdráttarlaust, Robespierre væri sá, er öll völdin hefði hrifsað undir sig, og enginn hefði komið sínum vilja fram fyrir honum. Menn skorðu á hann, að nefna þá á nafn, er hann kallaði svikara, og segja hverjir þeir væru, er hann hefði afráðið að láta drepa. En Robespierre færðist undan því, og vöflur komu á hann. Þá mælti einn af mótstöðumönnum hans: «Þú þykist hafa hug til að vera dygðugur, hafðu líka hug til að vera sannorður, og nefndu mennina á nafn!». Robespierre gjörði það eigi að heldur, og gekk af þingi bæði hryggur og reiður og þegar á fund Jakobína, og var honum þar vel fagnað. Couthon var á fundi og lagði það til, að allir þeir af þingmönnum, er verið hefðu því mótmæltir að ræðan yrði prentuð, skyldu reknir úr félaginu, og var svo gjört. Collot d'Herbois þótti það ekki ráð og vildi mýkja málin, en þá urðu fundarmenn óðir og uppvægir, og lá við sjálfst, að þeir dræpu hann, en hann gat komist úr höndum þeim og forðað sér. Margir lögðu það til, að veita skyldi þinginu aðgöngu þegar í stað, taka alla mótstöðumenn höndum og draga þá fyrir stjórnbyltingardóminn. En Robespierre þorði það eigi, hann kvaðst vona, að þingið mundi slaka til, nú eins og fyr, ef menn að eins létu það hafa hitann í haldi; en bæjarráðið og Henriot skyldu sjá fyrir því. Henriot kvaðat hafa skyldu herlið við búið, hve nær sem á þyrfti að halda, og mundi hann enn rata leið til þinghússins. St. Just var þetta kvöld og alla nóttina eftir á fundi, er velferðarnefndin átti með sér, og gjörði hann það meðfram til þess, að þeir af nefndarmönnum, sem voru óvinir Robespierre, gætu eigi gjört ráð sín. En hinu gat hann eigi varnað, að þeir Cambon, Tallien, Fréron og aðrir af þingmönnum, er vissu að þeim var bani búinn, gengu til fundar við höfðingja «slættumanna» flokksins og beiddu þá liðs. Flokksmenn þessir höfðu, eins og áður er sagt, gefið sig lítið fram, og

voru engir vinir þeirra manna («fjallmenn»), er nú beiddust liðveizlu, en þeim var vel kunnugt, að Robespierre hafði öll yfirráð yfir stjórnbyltíngardómnum, Jakóbínafélaginu og yfirvöldunum í Parísarborg; væri hann sviftur völdum, mundu einnig þessi hans voðaverkfæri falla með honum. Fyrir því hétu höfðingjar þessir að ganga í lið með þeim, er bundizt höfðu í félag til þess að steypa Robespierre úr völdum.

Daginn eftir, er var 27. dagur júlímánaðar (9. permidor), komu menn fjölmennir á þíng, því að allir bjuggust við tíðindum. Þar komu þeir Robespierre og St. Just, og nokkrir af vinum þeirra. St. Just beiddi sér hljóðs, og ætlaði að tala fyrir hönd velferðarnefndarinnar, en fékk eigi sagt nema fáein orð, því að þá greip Tallien fram í og mælti: «lýðveldinu er háski búinn. Í gær tók einn í stjórnarnefndinni sig út úr, og bar þúngar sakir á samnefndarmenn sína; í dag ætlar annar maður í nefndinni að gjöra slíkt hið sama. Þetta má eigi lengur svo til ganga; eg kref þess, að skýlan verði dregin frá augum manna til fulls og alls». Að þessu gjörðu menn mikinn róm í þingsalnum. St. Just og ýmsir af vinum Robespierre vildu koma fyrir sig orði, en fengu það eigi. Robespierre gekk að ræðustólnum og ætlaði að tala, en þá æptu menn um allan salinn: «burt með harðstjóran!» Sneri hann sér þá þar að, er «hægri menn» (slöttumenn) sátu, og mælti: «það er til yðar, lastvöru og dygðugu menn, að eg séf mér, en eigi til þessara bófa». En hér fór sem áður: allir æptu í móti, enginn vildi heyra orð af hans vörum. Loksins gekk hann þángað, sem forseti þingsins sat og segir: «forseti morðingjanna! eg heimta í síðasta sinni að mega tala!» Þessum orðum fékk hann varla upp komið. Þá sagði einn af þíngmönnum: «Dantons blóð ætlar að kæfa þig!» Þessu næst voru þeir teknir höndum Robespierre, St. Just, Couthon, Henriot o. fl., og settir í varðhald. En sem bæjarráðið og Jakóbínar frétu það, brutust þeir þángað með mannafla og leystu þá. Lá þá við sjálft, að sigurinn gengi úr greipum þingsins, en sá maður, er Barras hét, safnaði liði eftir skipun þingsins, og varð hinum yfirsterkari. Þegar Robespierre sá eigi undanfæri, ætlaði hann að skjóta sig, en það tókst eigi betur en svo, að hann braut í sér annan kjálkann. Daginn eftir var Robespierre og 20 af hans fylgismönnum höggðir.

